


Juziñamui Ñuera
Uai



New Testament in Huitoto, Minica

Juziñamui Ñuera Uai

New Testament in Huitoto, Minica

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files dated 29 Jan 2022

740f11a2-2e26-57f5-a3a7-5deb2d20bd24

Contents

SAN MATEO	1
SAN MARCOS	87
SAN LUCAS	140
SAN JUAN	229
LOS HECHOS	288
ROMANOS	366
1 CORINTIOS	407
2 CORINTIOS	444
GALATAS	469
EFESIOS	483
FILIPENSES	497
COLOSENSES	507
1 TESALONICENSES	517
2 TESALONICENSES	525
1 TIMOTEO	530
2 TIMOTEO	541
TITO	549
FILEMÓN	554
HEBREOS	556
SANTIAGO	591
1 PEDRO	600
2 PEDRO	612
1 JUAN	618
2 JUAN	626
3 JUAN	628
JUDAS	630
APOCALIPSIS	633

JUZÍÑAMUI ÑUEFUE SAN MATEO LLOGAFUE El Santo Evangelio Según San Mateo

Jesucristo nánoramaci
(Lc 3.23-38)

¹ Benomo cuega mámeceiai Juzíñamui Jitó Jesucristo nánoramaci. Jesucristo jaiiai illaïma David náiraimona comuïdimie. Daje izói afémie David nánoramie Abraham náiraimona comuïdimie.

² Afe Abraham Isaac moo, íemo jíái Isaac Jacob moo. Iemo Jacob Judá ie ámatiairi íaioi moo.

³ Iemo Judá Fares Zara ñiga íaillinoi moo. Afe íaillinoi ei Tamar. Iemo Fares Esrom moo. Iemo Esrom Aram moo.

⁴ Iemo Aram Aminadab moo. Iemo jíái Aminadab Naasón moo. Iemo Naasón Salmón moo.

⁵ Iemo Salmón Booz moo. Afe Booz ei Rahab. Iemo Booz Obed moo. Afe Obed ei Rut. Iemo Obed Isaí moo.

⁶ Iemo Isaí illaïma David moo. Iemo illaïma David, Urías tilla mei Urías ai ote. Iemo David íaillinoi jitó Salomón.

⁷ Iemo Salomón Roboam moo. Iemo Roboam Abías moo. Iemo Abías Asa moo.

⁸ Iemo Asa Josofat moo. Iemo Josofat Joram moo. Iemo Joram Uzías moo.

⁹ Iemo Uzías Jotam moo. Iemo Jotam Acáz moo. Iemo Acáz Ezequías moo.

¹⁰ Iemo Ezequías Manasés moo. Iemo Manasés Amón moo. Iemo Amón Josías moo.

¹¹ Iemo Josías Jeconías naa ie ámatiairi moo. Aféruillaïdo Israel nairai Babilonia éniemo lláviano uigáiaioi.

¹² Afe mei Jeconías Salatiel moo. Iemo Salatiel Zorobabel moo.

¹³ Iemo Zorobabel Abiud moo. Iemo Abiud Eliaquim moo. Iemo Eliaquim Azor moo.

¹⁴ Iemo Azor Sadoc moo. Iemo Sadoc Aquim moo. Iemo Aquim Eliud moo.

¹⁵ Iemo Eliud Eleazar moo. Iemo Eleazar Matán moo. Iemo Matán Jacob moo.

¹⁶ Iemo Jacob José moo. Afe José, María ini. Aféngomona comuide Jesús. Afémie jíáici Cristo.

¹⁷ Be ñaí Abrahamona Davidmo itígima catorce méidigimaiai. Daje izói David illágimamona Israel nairai lláviano Babilonia éniemo uillágimamo catorce méidigimaiai. Iemo jíái afénomona catorce jíágima Cristo comuïllanomo.

*Jesucristo comuñlafue**(Lc 2.1-7)*

18 Jesucristo jocoína bie izói joide. Ie ei María ja jicánogango Josemo iníreillena. Nai José diga iñena llezica, María Juzíñamui Ñuera Joreño ríinodo, ja úruereacade.

19 Ie ini José ñue jaícina ítimie, mei íadi uáfodo comini eróicana Maríana oni dotáacañede. Mei jiáifodo báinino buna onóñeno aféngona oni fiéacade.

20 Bíemo comécilla llezica, ie ínia anado ángel dainámie, Juzíñamui abi ímie íemo cíocaide. Iena daide:

—José, David izíe ímie, meáiruiñeno o iri. María o aiza o oíri, mei afengo jocolle jító Juzíñamui Ñuera Joreñoodo comuídeza.

21 Afengo jító jócoite; ie mei Jesuna ie mámecei jítaitio. Afémie daí mámeceireite, mei ie comínina íaioi fiénidifuemona jílloiteza, —daide.

22 Nana bie íficaide, jaiai Juzíñamui uai jino llóraíma dainana ñue ícoímo fúitallena. Afe uai llóraíma bie izói daide:

23 Nai inínide jitaíngo úruereacade; íemona jító cómuite.

Afémie mámecei Emanuel daílle.

Afeci daíacade, Juzíñamui cai diga ite.

24 José nicáirillamona cazíllano Juzíñamui abi ímie íemo ocuilla izói finode. Maríana ie ai izói ote.

25 Mei íadi María jító jócuano, afe íaillinoi ua ini izói inédiaillinoi. Jócuano Jesuna ie mámecei jítade.

2*Magos dainámaci ucúduaido ráfuenta baitádino Jesuna méiñuabítiaioi*

1 Jesús Belén jófuego jococa. Afe Belén Judea éniemo ite. Aféruillaído Herodes aféniemo illáimana ite. Iemo dáamací jítoma billáfene imaci Jerusalem dúcidaioi. Afémaci ucúduaido ráfuenta baitádino.

2 Dúciillano jicánotiaioi:

—¿Ninomo ite jococa Judíuai illaíma? Mei jítoma billáfenemo ie illano onótate ucúduna cíódicaíza. Afémie cáimadollena benomo biticaí, —daídíaioi.

3 Bífuenta Herodes fídiamona, afémie comeci llícide. Daje izói jíaí nana Jerusalén comini áfemo comeci llícioidiaioi.

4 Iemona Herodes nana lletáiraini illaini, íemo ocuica uailaí llófuetino diga dáanomo járillano jicánote. ¿Mei nie jófuego afe Cristo jécille?

5 Jira íena daídíaioi:

—Afémie Belén jófuego jécille, mei jaiai Juzíñamui uai llóraini bie izói dáideza:

6 Belén jofue Judá éniemo ite.

Afe éniemo ite jamánomoide jófue mona afe Belén dinó dúeñeite; mei afénomo cue nairai Israel úiñoite illaíma cómuíteza, —daií daidíaioi.

⁷ Afe mei Herodes ucúduaido ráfue na baitádinona báinino uáidote. Uáiduno íaiioimo jícanote: “¿Ñie monado afe ucúduna ciódiomoi?”

⁸ Íaioi llua méifomo, Belemo íaioina orede. Oriano íaioina daide:

—Afénomo omoi jai. Jaillano afézana ñue jaícina omoi jícanori. Afeza omoi báidi, cuemo lluaíbiri, mei afézana cáimaduaiacadie, —daide.

⁹ Afe illaíma daií íaioina daina mei, ucúduaido ráfue na baitáдино jáidiaioi. Ie mei jítoma billa dibénemona íaioi ciona ucudu, meine abido íaioina ifóicaide. Ifóicaillano afe úrue illánomo mózizaide.

¹⁰ Baitáдино afe ucudu mózizaillana cióillano, iere cáimacaidiaioi.

¹¹ Iemo afeco eromo jaillano, afézana ie ei María diga cióidiaioi. Iemona afézamo cañici ana dújuillano, íena cáimadotiaioi. Afe mei íaioi atica raa túiñoano, afézamo fecádiaioi. Ua oro, íemo uguci, íemo “mirra” daina ráifide ziórede raa, afézamo fecádiaioi.

¹² Afe méifomo, Juzíñamui nicáirillado íaiioimo llote; Herodes illánomo íaioi jáiñeillena íaioina daide. Afemona oni jíaié iodo íaioi éniemo jáidiaioi.

Jesús moo íaillinoi Egíptomoo bótaja

¹³ Ucúduaido baitáдино meine jailla méifomo, Juzíñamui abi ímie (ángel dainámie) nicai anado Josemo cíocaide. Cíocaillano íena daide:

—¡Náidacai! Náidacaillano úrue ie ei diga Egipto éniemo omoi bota. Afénomo cue daiílle dinó omoi iri. Mei Herodes bie úrue fállena jénoíteza, —daide.

¹⁴ Mei jira José náidacaillano, úrue naa ie éioiri naio Egíptomoo botádiaioi.

¹⁵ Afénomo ua Herodes tílle dinó itíaioi. Bie izói íficaide, Juzíñamui uai llóraíma jaiái daina uai ñue ícoimo fuitállena. Afe uai be ñie: “Egíptomona cue Jitó uáidotie.”

Herodes nana úruiaína fazítate

¹⁶ Iemo Herodes ucúduaido baitáдино afémie jífánodoiana fidíillano, afémie jamánomo ríicaide. Iemona nana Belemo ite mena fimona fuitade úruiaína fazítate. Afe jofue áinodo ite úruiaína daje izói fazítate. Naui ucúduaido baitáдино úrue jocóinana Heródesmo llua izói, mena fimona fuitade úruiaína fazítate.

17 Bie izói jaiái Juziñamui uai llóramá Jeremías lloga uai fuite. Be níuái:

18 Rama jófueмо zúurede uai cácaíte; cáillicaii eia uai cácaíte.

Nairái uzuma Jacob aí Raquel báifene jica ía cómuitaga úruiaíri éhena.

Aféngomona jica ía úruiaí cómuitatino eia jaca buna fíranide, mei afengo úruiaí fazilliaíoiza, daí Jeremías daide.

19 Mei afe Herodes tilla méifodo Juziñamui abí ímie nícaí anado batí Egíptomo Joseмо cíocaide. Cíocaillano íena daide:

20 —¡Náidacái! Náidacaillano úrue naa íe éioíri abído Israel éniemo omoi jairi, mei nauí baie fáiacadino nana ja tíidiaíoi, —daide.

21 Afemona José afe úrue naa íe éioíri abído Israel éniemo jáidiaíoi.

22 Mei íadi Arquelao íe moo Herodes ífomo illáimana íllana fidíillano, José afe Judea éniemo jáillana jacíruite. Iemo Juziñamui nícaí anado afémiemo llúamona, afémie afénoмо jáiñeno Galilea éniemo jaide.

23 Afe Galiléamo dúcia méifodo, Nazaret jófueмо fiébizaide. Bífue bie izói joide, jaiái Juziñamui uai llóramá daína uai ñue ícoímo fuitállena. Be níuái: “Jesús Nazaret ímie daírena.”

3

Juan Bautista táizicimo rafue jino llote

(Mr 1.1-8; Lc 3.1-9, 15-17; Jn 1.19-28)

1 Aféruido Juan Bautista Judea éniemo íte táizicimo lletámaizaíbite.

2 Daide:

—Omoi comeci ífuiaí maí méidori, mei monamo íte Juziñamui illáimana illirui ja íanori íteza, —daide.

3 Bie Juan jaiái Juziñamui uai llóramá Isaias llogámie. Afémie jica ía bie izói Juaado cuete:

Fíciре úritímie uai táizicimo cácaíte.

Afémie daide: “Juziñamui bille ío ñue fínua izói, omoi comeci ñue omoi finori.

Afémiemo ío jaícina dénuu izói,

Omoi comeci íaífuiaí omoi féitari”, —daide.

4 Aféruillaído Juan jítaoigaroi camello itíraiaí níinaroi. Íe ciraigi ífe rille ígoí finoina. Afémie jaca fíuái rífírede. Daje izói cíiji jírofirede.

5 Jerusalén comíni afémie úrillamo cacáreizaíbítiaíoi, daje izói nana Judea énie ímací, íemo jíái Jordán ímani abí comíni íe úrillamo cacáreizaíbítiaíoi.

⁶ Iaiõimo ite fiénidifuiái jino íaiõi llua méifomo afe Juan Jordamo íaiõina báutizade.

⁷ Mei íadi fariséuaimona, jái saducéuaimona aillo comini Juan diné ie báutizajonomo bitíaiõi. Afémaci bíllana Juan cíõillano, íaiõina daide:

—¡Titade jaiõniõaimona comuídino izóidiõomoi! Ja ánozide duere zefuúllifue mona omoi botállena ¿bu omoi llua?

⁸ Omoi comeci ifue méidoiacanana ñúfuedo uáfodo jino ácatari.

⁹ Dani ómoimona “Abrahámona comuídindicai cai íllamona Juziñamui íena iticai,” afe izói daiñeno iri, mei táinoza. Mei bie noñiciamona, Juziñamui jitáidi Abraham comínina comúitaredeza, daií ómoina daidicue.

¹⁰ Fiénde amena tiéllena jata jicaida jóonia izói, fiénidino duere finoille jae ñue mameca. Nana figo llizíñede amena tíiano iraimo zocana uillano jobaica. (Tiéfirega zena izóidiõomoi.)

¹¹ Uáfueña bimaci comeci ifue íaiõi méidua jira, jáinoido íaiõina báutizadícue. Mei jáífodo cue méifodo bíitimie, comínina Ñuera Joreño úcaitaite. Daje izói iraimo raa ñue zia izói afémie comínina íáinino ñue finoite. Afémie iere cue baimo riñorede, cue bie jamáimiedicueza afémiena dama ñue jacíruiredicue.

¹² Afe cue méifodo bíitimie arroz biájidimie izói ja ie llocofe líicabite. Afémie arroz bíamona ícuai oni eneno ua izói, ñúemacimona fiénidinona oni eneno óite. Ñúemacina ie illánomo ñue ráiruite, mei jáífodo fiénidicuai izóidinona jaca dúíñeite iraimo jóbaite, —dinori Juan úrite.

Jesús báutizaina

(Mr 1.9-11; Lc 3.21-22)

¹³ Jesús Galiléamona imani Jordamo Juan illánomo bite, afe Juan ie báutizallena.

¹⁴ Jesús bítemo Juan íena báutizaacañede. Jira Jesuna daide:

—Cue bie odo báutizaregacue. ¿Nibái mei cue dinena bitio? —daide.

¹⁵ Jira Jesús íena daide:

—Dama daiñtadeza, birui cue daina izói fino, mei nana Juziñamui jítaina izói finóredicocozá. Afe coco finolle cócomo ñue jóbide, —daide.

Iemona Juan ja fairíote.

¹⁶ Afemona Juan Jesús báutizade. Báutiza mei Jesús jáinoimona jino bite. Afe llezica mona raire túijicaide. Afe dáaruido Jesús Ñuera Joreño fíiciri ana billa izói bíllana ciode. Afémiemo ráinazaibite.

17 Mei ímona monámona daa úrilla uai cácacaide. Afe úrilla daide:

—Bie iere cue izíruiga Jitó. Afémiemo jamánomo ióboidicue, —daide.

4

Taife Jesús facátate

(Mr 1.12-13; Lc 4.1-13)

1 Afe mei Ñuera Joreño Jesús táizicimo uite, afénomo Taife afémie fiene facátallena.

2 Afénomo Jesús cuarenta dígarui güiñeno ite. Mona naio diga afénomo güiñeno ite. Afe mei afémie iere jamánomo jufínaite.

3 Ie jufínailla llezica, Taife Jesús facátallena ánozide. Iena daide:

—Ua Juzíñamui Jitona o íadi, mai bie nofíciái paana mei fino, —daide.

4 Jira Jesús uai ote:

—Jaiái Juzíñamui Cuegáuai daide: “Fia güílledo come ínide, mei jiáifodo nana Juzíñamui lloga uaido írede,” —daide.

5 Iemo Taife Jesuna ñuera Jerusalén jófueмо uite. Afénomo ite gairíracо emódomo caifo jica Jesuna uite.

6 Uillano íena daide:

—Ua Juzíñamui Jitona o íadi, benómona ana batí mai ticai, mei Juzíñamui Cuegáuai bie izóí dáideza: Juzíñamui ie abi imácina ona uíñotaite.

Iaioi ónoido ona mozíñoitiaioi, o éiba nofíciáimo íziñeillena, —daide.

7 Jira Jesús uai ote:

—Jaiái Juzíñamui Cuegáuai nane daide: “O ocuide Juzíñamui mai facátañeno,” —daide.

8 Nane dáanomo Taife iere caifónedumo Jesuna uite. Afénomona Taife nana éniemo ite náiraina ie ácatate, naa íaioimo ite ebíredifuiári.

9 Iemo nane íena daide:

—Cañícido cue anamo dújuano cuemo o caimátaíadi, nana bie omo íiticue, —daide.

10 Mei jira Jesús daide:

—Taife, mai oni jai, mei Juzíñamui Cuegáuai dáideza: “Dama ocuide Juzíñamuimo caimátairena. Dama afémie ocuífíregamiéna o iri,” —daide.

11 Afemona Taife Jesús fáicanocaillano oni jaide. Afe mei dáarie Juzíñamui abi ímiái Jesuna cánuaibite.

Jesús Galilea éniemo como fueñe táijizaide

(Mr 1.14-15; Lc 4.14-15)

12 Jesús Juan Bautista llavéinana fidíillano, oni Galilea éniemo jaide.

13 Mei íadi Nazaremo fiébiñeno, Capernaum jófue mo jaide. Afe jofue Galilea jorai fuédamo ite. Iemo afe jofue Zabulón éniemo ite. Daje izói Naftalí énie áinomo ite.

14 Jaiái Juzíñamui uai llóraima Isaías lloga uai ñue fuitállena, bie izói íficaide. Afe uai daide:

15 Zabulón énie, Naftalí énie diga áillue jóraimo jóide io áinori ite.

Afénie Jordán ruicáfellemo ite.

Afénie judíoñedinomo dúide Galilea daína énie.

16 Aféniaino ite comini jítinomo itino izói Juzíñamuina onóñediaioi.

Mei íadi ja birui afémaci como aillo egáiñotena ciódino izói, Juzíñamuina uáfodo onódiaioi.

Iemo jiái afe tíide izói Juzíñamuina ónoñedinomo jae egáiñogaiáioi, Juzíñamui zíñona illífuena íaioi maiñóllena.

17 Afe mei Jesús jino comínimo ie llófuelle uai fueñe tainede. Daide:

—Omoi comeci ífuiai méidori, mei monamo ite Juzíñamui illáimana illirui áinozideza, —daide.

*Jesús cuatro dígamie facóñredino uáidote
(Mr 1.16-20; Lc 5.1-11)*

18 Jesús Galilea jorai fuédado macádemo, mena ama íaillinoína baite. Dáamie mámece Simón, afémie jiáifodo mameina Pedro. Jiáie baigámie mámece Andrés. Afe íaillinoi facóraini. Afe llezica llóiji jóraimo dotádiaillinoi.

19 Iemo Jesús íaillinoína daide:

—Mai cuedo bi, comini llófuellena íaioi jénoitimiena ómicoína jóneiticue, —daide.

20 Íaillinoi llóiji fiénocaillano afémiedo jáidiaillinoi.

21 Nane afe báifenemo Jesús mena jiáie ama íaillinoína cóizaide. Afe íaillinoi Zebedeo jító Santiago Juan diga. Afe íaillinoi áillue nocaemo ie moo diga íaioi llóiji ñue finódiaioi. Jesús íaillinoi uáidote.

22 Afe llezica, áillue nocaemo íaillinoi moo fiénocaillano, Jesudo jáidiaillinoi.

*Jesús nágagobiamo aillo comini llófuete
(Lc 6.17-19)*

23 Afe mei Jesús Galilea éniemo nágafenedo jaide. Nana Juzíñamui uai llófueriracuaimo llófuerite. Afémie Juzíñamui illáimana illirui ñúefuedo jino llócaide. Daje llezica nana jiáifodorie irárede comini jíllotote.

24 Nana Siria éniemo Jesús finoca ñúefuiai jalleide. Iemona Jesumo jáíforiede dúicuaimo duere zefuídino atídíai. Iemo jáíforie izi cácadino, íemo fiénide jóríai uícaigamací, íemo chémemo raamo jíridino, íemo tízitaitino, nana bie izóidino Jesumo atídíai. Iemo nana afémacina Jesús jíllotate.

25 Iemona diga jáínuiaimona bitíai Jesudo jáillena. Galilea éniemona bitíai, íemo Decapólís jófuiaimona bitíai, íemo Jerusalén naa Judea éniemona bitíai. Daje izóí imani Jordán ruicáfellemona Jesudo bitíai.

5

Caifónedumona Jesús lloga are uai

1 Jesús afe aillo iedo jáidínona cíoillano, caifónedumo ráinazaide. Iemona ie llófuegamaci afémie abído ofídíai.

2 Afe mei Jesús bie izóí como íai. Iena llófuete:

Caimare íóbidino (Lc 6.20-23)

3 “Comeci dinena dúeredicai” daíífredino íóbidíai, mei monamo ite Juzíñamui illáimana illarui afémacimo dúideza.

4 Comécina zúuredino caimare itíai, mei Juzíñamui íai. Iena fíraiteza.

5 Comécina mánaidino caimare íóbidíai, mei Juzíñamui jica ía íai. Iena mameca énie máíñoitíai.

6 Júbiena méinegamie iere gülacana izóí, Juzíñamui comece jítaina izóí iere íacadino caimare íóbidíai, mei Juzíñamui afe íai. Iena íacanana izóí íai. Iena íllena afémacina cánoiteza.

7 Jáímacimo dúecaífredino caimare íóbidíai, mei Juzíñamui íai. Iemo dúecaiteza.

8 Comécina íainidino caimare íóbidíai, mei Juzíñamuina cíoitíai.

9 Icírafuena oni orédino caimare íóbidíai, mei Juzíñamui afémacina “Cue jítoí. Iemo” dáíteza.

10 Juzíñamui jítaina íai. Iena fínuari duere zefuídino caimare íóbidíai, mei monamo ite Juzíñamui illáimana illarui íai. Iemo dúideza.

11 Comini omoi báíña, omoi duere íai. Iena fínua caimare íóbidíai. Daje izóí cue ícoínia taino uailai ómoí. Iemo íai. Iena nítaadi caimare íóbidíai.

12 Afena náfueño íóbicana caimare omoi iri, mei monamo ite áillue ebíredí fue jíridoí. Iemo. Iena. Mei jai. Iena nai omoi íñena llezica ite Juzíñamui uai llóraini daí duere fínóllena racácaí. Iena.

Sal ñue fínua izóí, afe izóí comini ñue fínódinona ití. Iemo; daje izóí bñie egáíñoití. Iemo
(Mr 9.50; Lc 14.34-35)

13 Omoi, sal izói, bínie comini ñue finódinona itíomoi. Mei íadi sal ie riino íñenia güllena caimáretañede. Afe riinonide sal ¿minícado meine riiretade? Jaca meine riiretaninamona jaca ráifíñede. Comini zaizíllena macáranomo dotárega.

14 Omoi finoca ñúfuiaí finuamona, bínie comini ñue íllena egáíñote raa izóidiomoi. Iemona caifónedumo ite uáfori cíocaiide jofue jaca retáidonina izói itíomoi.

15 Uneca mechera nogo eromo retáidollena unéñediomoi. Mei jíáfodo caifo uáfori cíoidinomo uneda ráinafirediomoi, jofu eromo itínomo ñue egáíñollena.

16 Afe izói ómoimo Juzíñamui comuítaga omoi finófírega ñúfuiaí jino comini eróicana finócana omoi uiri. Daíí omoi ñue finócafuiaina ñue íaiói cíoillesa. Uáfori íaióimo cíotari, monamo ite omoi Moomo ñúfuiaí íaiói jóonellena.

Jesús Moisés ocuica uai dibénedo llófuete

17 “Moisés ocuica uai cáitajaíbite,” daíí cuemo omoi comécíñeno iri. Daje izói jaiái Juzíñamui uai llóraíma llófuia féitajaíbiñedicue. Jaca afe uailái féitajaíbiñedicue, mei jíáfodo afe uailái ñue ícoímo fúitaiíticue.

18 Uáfuenta ómoína daííticue, mona naa énie diga nai fúíñeille dño bie ocuica uáillaimona daa uai oni ónide. Nana áfemo lloga ífcáitífuiaí nai zuiñena llezica, afe uailái jaca íite.

19 Ie jira afe ocuica uáillaimona daa uai iere duere íadi dáamie náfueñenia, monamo ite Juzíñamui illáimana illáruimo afémie jamáimiena jáite. Daje izói afémie náfueñena izói jíámacina “Cai náfueñeillí” daííadi, iere jamáimiena jáite. Mei jíáfodo aféuailái náfuetinona íemo jíámaci afe uaina náfuetadinona, “Bimaci Juzíñamui illáimana illáruimo jamánomoidinona,” daíílle.

20 Mei birui ómoína daííticue: Juzíñamui jítaínana ñue ícoímo fuitállena, ocuica uai llófuetino, fariséuai diga iere áfena nícidotíaiói. Mei íadi íaiói nícidoga baimo omoi fínoñenia, monamo ite Juzíñamui illáimana illáruimo dúcíñeitiomoi.

*Jesús comini icírilla dibénedo llófuete
(Lc 12.57-59)*

21 Omoi jaiáidigimaci daínana cacádiomoi. Afe daína be ñie: “Jíáimana titáñeno iri, mei jíáima titádimie jícánuano duere finolle.”

22 Mei íadi afe emódomo nane daííticue. Nínó dáamie ie aino come diga icíría, afémie áferi jícánuano duere finolle. Daje izói ie ámana íaire daídímie Jamánomo Ríillaini afémiemo jícánuano duere finolle. Iemo jíái ie ámana “O abina onóñedimiedio,” daííadi afémie áferi jaca ninomo dúíñede iraimo orérede.

²³ Iemona Juziñamuimo o úriacana llezica, daje izói afémiemo fia fecáacaga raa o izájiacana llezica, o aino come diga o icírillamo o uibóicaiadi,

²⁴ afe o izájiacaga raana izáiñeno iri. Fueñe afémie diga ñue o finori, caimare uái ómicoi íllena. Afe ñue ómicoi fínua méifomo, o izájiacaga raana fecáredio. Ja Juziñamuimo úriredio.

²⁵ Iemo jiáifuemo omoi cacai. Iafue omo mamédimie diga raire o úrizairi, afe íaifue záilleza. Jicánoracomo nai ona uíñena llezica, mai jino io anamo ñue ómicoi záitari, jicánoraimamo o ie úñeilleza. Daií o fínoñenia, afe jicánoraima fiénidino llaitáfiredinomo ona izájite. Iemo afémaci ona llavéracomo íbaitiaioi.

²⁶ Uafue ona dáitícue, o llavétatimie jicaca úcube ie jícaja dieze o íbañenia, afécomona jaca jino bíñeitio, —daidícue.

Jesús comini finoca jiruifue dibénedo llófuete

²⁷ Jaiai daináuai cacádiomoiza. Afe be ñie uai. Jiáie ringo diga jiruídoñeno o iri.

²⁸ Mei íadi ómoína daidícue: Omoimona dáamie ringomo eróicana fiéni comeci facáadi, afémie jae afengo diga ie comécido jiruifue finode.

²⁹ Mei o ciona raamo o éroillamona fiénidifuemo ona baiítaia afemo eróiñeno o iri. Ua, o uíji nabeji o fítajamona o eróinino o illa izói, afe izói o fiéniruitate raamo eróiñeno o iri. Afe uíji júbene o fítañenia izói, fiénide raamo éroillano o fáicanocaiñenia o abina nana iraimo dotátaite. Ie jira o abímona daa íeizi íñena izói, nana o abi táinocaille baimo iere ñuera.

³⁰ Daje izói o finóacanafuiai fiénidifuemo ona baiítaia, aféfuiai finóñeno o iri. O onoi nabezi o jáitajamona aféfuiai o finónino o illa izói, afe o fiéniruitate ráfuiaina o fáicanocairi. O jáitañenia izói, o fáicanocaiñenia, o abina nana iraimo dotátaite. Ie jira o abímona daa onoi íñenia izói, nana o abi táinocaille baimo iere ñue ite.

Come ai dótafirena dibénedo Jesús llófuete
(Mt 19.9; Mr 10.11-12; Lc 16.18)

³¹ Daje izói jiáie jaiai daina uai bie izói joide: “Ñinó daa come ie ai dotáadi, afe bie ringona benómona óñeitícue dainabe aféngomo írena.”

³² Mei íadi birui ómoína daidícue: Dáamie ie ai dotáadi, afémie aféngona jiruíretaité. Mei íadi daa ráfuedo dotárede. Afefue be ñie: Afengo inírede ia jiáie iima diga íadi afengo dotárede. Daje izói dotácango aina otímie afe úamona afémie afengo diga jiruifue finode, mei Juziñamui eróicana, afengo nai fueñeidimie ai.

Jesús táinona uafue daiíllena Juzíñamui mámecei líñnuado llófuete

33 Daje izói omoi jaiáidigimamona cacádiomoi. Afe be ñie uai: “Juzíñamui eróicana ie mámecei o líñnuano o dáinana ñue ícoimo záitari.”

34 Mei íadi birui ómoína daidicue: Uafue daiíllena jaca mona mámecei líñnonidiomoi. Mona Moo Juzíñamui illánoza, áfedo iere uafue daiíñeno iri.

35 Daje izói énie íbogido uafue daiíñeno iri, mei aféniena Juzíñamuimo jaináideza; fia ie ídai jóonera izóideza. Daje izói o llógana uafue daiíllena Jerusalén mámecei líññoñeno iri, mei afe jofue Nahíllaimamo, ua Juzíñamuimo dúideza.

36 Daje izói dama o ífócido uafue daiíñeno iri, mei o ífótirai úzetiraina méidonidiomoiza, daje izói jítitiraina orénidiomoiza.

37 Iemona jíáie uaina nabáiñeno “Jíí fínoíticue” daiíri. Mei jíáífodo “Jíí fínoiñeíticue” daiírena. Uafue daiíllena bie izói o daína baimo jíáie uaina o nabáiadi afe uai Taifémona bite.

Jíáimamo íba úado Jesús llófuete
(Lc 6.29-30)

38 Daje izói jíáie jaiái nanómona dáinana cacádiomoi. Afe daína be ñie uai: “Dáamie jíáimie ui fitáadi afe íbana afémie ui fitárega. Daje izói dáamie jíáimie ízido ditáadi afe íbana afémie ízido ditárega.”

39 Mei íadi birui ómoína daidicue: Dáamie fiene omoi finóadi, íbana afémiemo riire úriñeno o iri. Mei jíáífodo dáamie o uíeco putáadi daje llezica enéfene putari íena o daiíri.

40 Dáamie taino omo jítajano, o caifóferoi bairóadi, afe llezica o jinófenemo jítáraroi caifóferoi diga naga afémiemo o fecari.

41 Daje izói dáamie mei policia izóidimie méere de raana daa kilómetro ríífuedo o abítaiadi, afe baimo mena kilómetros ícíríñeno o uíri.

42 Nane dáamie raa ómoimo jíacáadi, afe íemo o fecari. Jíáimie “Nano íanori cuemo fia feca” daiíadi, afémiemona oni jíjicaiñeno o iri.

Cai ícírillamacina izíruiédicaí
(Lc 6.27-28, 32-36)

43 Daje izói jaiái nanómona daína uaina cacádiomoi. Afe be ñie uai: “Omo caimare úrifirenamiéna izírui, íemo o ícírillamiéna éoiri.”

44 Mei íadi birui ómoína daidicue: Omoi ícírillamiéna omoi izírui. Omoi faidódimiéna caimare íemo omoi finori. Omoína éoidinona ñue omoi finori. Omoi báíñotino, íemo jíái ómoína fiene finóacadino diga afémaci íena Juzíñamuimo omoi jíicari.

45 Daií omoi íllemona monamo ite omoi Moo Juzíñamui jítótiaína jáitíomoi. Mei afémie ñúemaci ie jítómana egáíñotadeza, daje izói jáíie fiénidimaci íena egáíñotadeza. Iemo, comécina jáicína jóidinomo afémie nocina bíítate, daje izói comécina jáicína jóíñedino íena nocina bíítate.

46 Mei dani ómoína izíruitinona omoi izíruiadi, ¿áfemona minica jirídoitiomoi? Jaca jíridoñeitiomoi. Omoi jámairuiga gobierno raiñoca úcube llínofiredino da afémaci izíruitinona izíruitiaioi. Afémaci baímo izíruiarediomoi.

47 Dama omoi ámatiaí caimare omoi uáidoiadi, ¿ñie ñúefue finódiomoi? Juzíñamuina onóñedino bie izói illa. Afémaci baímo nana comini caimare uáidorediomoi.

48 Monamo ite omoi Moo Juzíñamui íaífuenide comécina figomíena illa izói, afe izói omoi iri.

6

Jesús cai finófirega ñúefuiaí dibénedo llófuete

1 Jesús nai úrite; daide: Omoi finófirega ñúefuiaí comini eróicana afémaci ómoímo cáimacaillena omoi finóñeno iri. Daií omoi finóadi monamo ite omoi Moo Juzíñamui ómoína minícana jirídotañeite.

2 Ie jira dúeredino o cánua llezica nana comini lloñeno, uái daií omoi canori. Jino omoi macáraomo, daje izói Juzíñamui uai llófueriraco eromo diga táinona abi íñotino bífirediaioi. Afémaci comeci figóñedimaci illa llezica jino finócafuiaímona ñúemacina eróidiaioi. Iaiói finua izói finóñeno omoi iri. Afémaci daií finofirediaioi jáíimaci íaíoido ñue úrillena. Mei uafue ómoína dáitícue: Comini íaíoido caimare úrillado, íaíoi jirídoacaga raana jae íaíoi jirídogá.

3 Mei jáíifodo dúeredinomo daa raa o fecalle llezica o izíruiaga aino cómemo lloñeno uái daií o fecari.

4 O finófirega ñúefue báinino o finori. Iemona o Moo Juzíñamui o báinino finoca raana cóiteza. Afemona óiena mameca raana o jirídotáiteza.

Jesús Juzíñamuimo úrillado llófuete
(Lc 11.2-4)

5 Juzíñamuimo omoi úrilla llezica, abi diné ñue cóidimaci finua izói finóñeno omoi iri. Afémaci Juzíñamui uai lloraco eromo caífo naídáillano ficírede uaido Juzíñamuimo úrilla izói finódiaioi. Iemo jofue cígimo ite aillo comini ofíranomo daje izói finófirediaioi, comini íaíoina cóillena. Uáfuenta ómoína dáitícue, afe bie comini íaíoido ñue úrillado, íaíoi jirídoacaga raana jae jirídotiaioi.

6 Mei jíáifodo Juzíñamuimo o úrilla llezica, o jofe eromo jaillano o naze ibairi; íemo afénomo o diga ite Moo Juzíñamuimo o úriri. Afemona o Moo Juzíñamui o báinino úrilla uaina cacáillano, óiena mameca raana o jirídotaite.

7 Juzíñamuimo o úrilla llezica, Juzíñamuina onóñedino fínua izói, taino uaillai diga icaiño lloñeno o iri. Afémaci bie izói comécidíai: “Are cue úrillado Juzíñamui níbai cuemo cacáreite,” daidíai.

8 Afémaci izói iñeno o iri, mei nai o jitaille raa o jicáñena llezica o Moo Juzíñamui uícodo onódeza.

9 Ie jira bie izói afémiemo omoi úrifireiri: Cai Moo Juzíñamui, monamo itio; o mámevido ñúefue nitácaza.

10 O illáimana illirui raire bíteza.

Dinomo monamo o comeci jítáillafue íai: fínua izói, afe izói bie éniemo finótaibiteza.

11 Cai nágarui jitaiga gülleniai, birui caimo fecari.

12 Cai finoca fiénidífue iba caimo oñeno iri, mei afe izói jíáimaci fiéni caimo finódíai: íadi, afémacimo ibana oñédíca.

13 Íaífue mo cai baíñellena caina uíñori.

Iemo afe llezica nana fiénidífuiamona caina jíllotari.

Mei bínie comini jaca o illáimana illa anamo itíai.

Afémaci illáimaillena ríino jaca omo ite.

Daje izói jamánomo ñue ébífue jaca omo ite.

Ja daítadeza.

14 Mei uafue, ómoimo fiéni finódino finoca fiénidífue omoi féitaia, afe izói monamo ite o Moo o finoca fiénidífue omoi féitaite.

15 Mei íadi aféfuia: omoi féitañenia, omoi Moo omoi fiénidífuiaina féitañeite.

Jesús comini fímairilla dibéndo llófue

16 Iemo nane Jesús daide: Dama Juzíñamuimo izire omoi comeci facállena güllena güñeno omoi fímairilla llezica, omoi uieóna zuure finóñeno omoi iri. Jínofene ñue cíoina mei íadi comécina íairedino daí finódíai. Íai: fímairilla llezica abina iere zuure finódíai, comini íai: cíoilano “Baie fímairitino,” íai: daíllena. Uafue ona dáitícue, afe izoide comini íai: dánado íai: jirídoacaga raana jae jirídotíai.

17 Mei jíáifodo güñeno o fímairilla llezica o uieco ñue jocori; o ífo ñue júri,

18 ona comini “Baie fímairitimie” dáíñeillena. Iemona o diga ite báinidena cíófirede Juzíñamui, áfena dama cíoille, íemona afémie áfena ona jirídotaite.

*Monamo cai jirídollena ofítaredíca
(Lc 12.33-34)*

19 Iemo nane Jesús daide: Biniemo aillo ráaniaina ofitañeno o iri, mei biniemo diga raa ícuai güífirigaza, íemo jiáie raana ráataifiredeza, íemo jiái merírifiredino merífiredeza.

20 Mei jiáifodo Moo Juziñamui jítainana o finófireiri; caifo monamo ie illánomo ñúefuiai o ofítari, mei afénomo ite raana ícuai güiñédeza, íemo jiái afeno raa zabíñede, íemo afénomo merírifiredino meríndiaioi.

21 Mei uáfueza, o gaiga raa ofítajanomo dáanomo daje izói o comeci íteza.

*Cai illafue ñue egáñote raa
(Lc 11.34-36)*

22 Ñúefuemo o comeciilla omo ñue egáñote raa izoide. Jira bobaie egáioinamona o uído ciónana o ióbitaja izói, afe izói ñúefuiai o jítáigana o comeci ífuena caimare itátaite.

23 Mei íadi ñúefuemo o comeciñenia, fiénidifuedo mácaja izói itio. Nana o comeci ífue zuure íteza. Mei Juziñamui omo jóonega ñuera comécido dama fiénidifueemo o comeciia nii jamánomo jítifomo o illa izoide. ¡Nii jamánomo jítirena!

*Juziñamuimo cai jainaina llezica úcubemo jaináinidicai
(Lc 16.13)*

24 Daje llezica mena ocuídime anamo buna ínide, mei ménamiede anamo o íadi dáamie éoitio, íemo jiáimie izíruitio. Daje izói dáamiemo ñue táijitio, mei íadi jiáimiena jamairuitio. Afe izói Juziñamuina abi o náamataja llezica úcubemo abina náamatanidío.

*Juziñamui ie úruiaina jáidinona ñue úiñote
(Lc 12.22-31)*

25 Jira ómoína dáititue, nágarui omoi jitaiga güille naa jirolle diga áfemo comeci faiñeno omoi iri. Daje izói daa o jitalle inícuromo comeci faiñeno omoi iri. Cai ñue illafue güille baimo ráifide. Daje izói cai caana abi iniroi baimo ráifide.

26 Mai monamo feede ófocuizaimo omoi comeciiri. Afémaci güilleniaina riñediaioi. Daje izói llíziena jofo oñediaioi, íemo jiái güille ñue finóranomo ofitañediaioi. Mei íadi monamo ite omoi Moo afémacina ecáfirede. Omoi bie ófocuizai baimo iere ráifina.

27 Omoimona, comeci iere fáiamona ¿mei bu ie zairilla caifomo medio metro zairirena? Buna jaca daí ínide. Dama Juziñamui ona dinori o zairítaja. Afe izói o güillena ócuite, jira áfemo comeci faiñeno omoi iri.

28 Iemo jiái ¿nibái mei inícuromo iere comeci fáifirediomo? Jazícimo ite záfiamo omoi comeciiri. Raamo táijíñediaioi, daje izói iníroina niñediaioi. Mei íadi iere ebire cíoidiaioi.

29 Iemona ómoína dáititue jaiái illaina Salomón iere ráarede íadi, bie záfia ebírena izói, ebírediroina jítáñede.

30 Mei Juzíñamui ráitiamo ebire cíotaiadi, afémie ómoimo jeruíñeno iníroina jítaite, mei afe ráitiai íanori ebire eróideza. Iemo afe jíáiruideo ja jobáicaza.

31 Iemona nana jíáie raamo comeci faiñeno omoí iri. “Cai güille inédeza, ¿minica güíticai?” daiñeno omoí iri. Daje izóí jíái “¿Minica jíroiticai?” daiñeno omoí iri. Iemo jíái, “Iníroinidicaiza, ¿minica jíitaiticai?” daiñeno omoí iri.

32 Mei uafue, bíniemo ite Juzíñamuimo ínoñede comini bífuiamo iere comécidiai; mei íadi omoí Moo monamo ite. Afémie bie izoide raana omoí jítaíllana onode. Jira ómoimo íñede raamo comeci fáinidíomoi.

33 Mei íemona Juzíñamui illáimana illáruimo duide raamo raire uícodo járitafireiri. Daje izóí jíáie ie ocuícáfue raire uícodo omo fínofireiri. Afe mei nana bie omoí jitaiga raana ótiomoi.

34 Uire jiti cómutifuemo comeci faiñeno omoí iri, mei uire aferui dama ie comeci uille ráfueniai átiite. Nágaruillaído comuide comeci faille ráfuiái ja figo báiteza, baimo nabáinide.

7

Jiáima jánana fieni úriñeno o iri

(Lc 6.37-38, 41-42)

1 Juzíñamui ómoimo izire jícanoñeillena, mai jíáima jánana fieni úriñeno o iri.

2 Mei jíáima jánana riire o úrilla izóí, afe izóí Juzíñamui riire ómoimo jícanoite. Jíámamo raana fácano omoí feca izóí, afe izóí afémie ómoimo fácano fécaite.

3 ¿Mei ñie izóí o ama uimo ite jéenide ráaruaina cíodio, mei íadi afe dáaruideo dama o uimo jéerie rarúnguai íllana náfueñedio? (Afena dáiacade: Aillo fiénidífue omo illa llezica, ¿ñie izóí due jiza oni nibéfodo baíidímie jánana úiredio? Urinidio.)

4 Iemo afe jéerie rarúnguai dama o uimo íadi o ámana ¿ñie izóí daiñedio: “O uimo ite jéenide ráaruai cuena otátari”? Daiñidio.

5 ¡Abi dine ñue cioide comécina íáiredímedio! Fueñe dama o uimo ite jéerie rarúnguai oíri. Afe o ua mei, afe o ama uimo ite jéenide ráaruaina jino óredioza.

6 Juzíñamui ñue finoca raa, Juzíñamuina íairuitinomo fecáñeno iri; fecadíomoiniadi áfena jámairuillano afémaci ómoína títaitai; Daje izóí perla izoide ráifidífuiai meróniai izoide íafuiaredinomo lloñeno iri; llotíomoiniadi meróniai ríirífirena izóí bimaci ómoína uáitaitai; Afe izoide ñúefuiai fieni íacadinomo llónide.

Juzíñamuimo cai jícalle bie izóí jóide

(Lc 11.9-13; 6.31)

7 Mai omoi jicari, íemona Juzíñamui ómoimo fécaite. Mai omoi jenori; báitiomoiza. Nazémona caimare omoi uáidori; ómoimo tuizáibiteza.

8 Mei jicádimie llínoteza. Daje izói jenódimie báiteza; íemo jíai nazémona caimare uáidotimiemo túigaza.

9 Mei ómoimona dáamie ie jitó pan jícaja llezica ¿meita nofícina írede? ¡Jaca ínide!

10 Iemo afémie chamu jícaja llezica ¿meita jaiona írede? ¡Inide!

11 Mei fiénidinodicaí íadi, ñuera raa cai úruiaimo fécajana onódicaí. Mei íadi afe baimo monamo ite omoi Moo, afémiemo jicádinomo jamánomo ñuera raa fécajana onode.

12 Mei íemona omoi jitailla jíáimaci íaioi ómoimo fínua dieze, dájeze afémacimo finórediomoi. Mei Moisés ocuica uai bie izói jóideza. Daje izói jaiái Juzíñamui uai lloraini cuega uai afe izói jóideza.

*Rillírede monamo duide io rafue
(Lc 13.24)*

13 Mei afe rillírede monamo duide iodo omoi jai. Niné táinocaitaitinomo jóide io iere áilloo. Daje izói áfeo boilla jamánomo áillue. Afeodo aillo comíni jailla.

14 Mei jíaífodo zíñona cai cáaillinomo jóide io jaícina jóide íadi rillírede. Daje izói áfeo boilla rillírede. Afeodo jáidino dúemaci.

*Naga amena ie llizíledo onórede
(Lc 6.43-44)*

15 Diga comíni “Juzíñamui dibénedo úriticaí” daídíaioi, íadi taino llotíaioi. Afe izoide comínimona abí omoi rairuiri. Afe bimaci ebire jiféidino izói ómoimo bitíaioi. Uáfueza, illáinide ovéjaiai izói ómoimo bitíaioi, mei íadi comeci dine illáirede jánallari izóidino.

16 Afémaci finócafuaíido íaioina uáfodo ónoitiomoi. Mei jíirede ñecínamona jíricue óñegaza. Daje izói jíirede monáigimona jíficolliai óñegaza.

17 Mei daí nana ñuera amena ñue llizide. Daje izói nana fiénide amena fiénidijaina llizide.

18 Ñuera aménamo fiénide ráajiai llizínide. Daje izói fiénide aménamo ñuera ráajiai llizínide.

19 Nana ñuera ráajaina llizíñede amena túiano iraimo jobaica.

20 Bie izói baie ómoimo bitínona íaioi finócaigafuedo uáfodo ónoitiomoi.

Nana comini monamo ite Juziñamui illáimana illáruimo jáiñeitiaioi

(Lc 13.25-27)

²¹ Nana cuena “Ocuíraima” daiífiredino monamo ite Juziñamui illáimana illánomo jofo jáiñeite. Dani monamo ite cue Moo comeci jítaillana finódino jofo jáirena.

²² Aféruillaimo dúcia llezica, diga comini cuena dáitiaioi, “Ocuíraima, Ocuíraima, o mámecido úrifiredicai. Daje izói o mámecido fiénide jóriaina jino orédicai. Daje izói o mámecido ciórainina raana uaido comúitaticai.”

²³ Mei íadi afémacina dáitice: “Jaca ómoina onóñedicue. Diga íaifuiai comúidomoiza, cúemona oni ii,” dáitice.

Ménade jofo nillino rafue

(Lc 6.47-49; Mr 1.22)

²⁴ Mei afe bie izói joide. Cuena cacádimie íemo cue ocuícana finódime jofo nállana baitádimie izoide. Afémie mairídinomo ie jofo nite.

²⁵ Riire noci biide, íemo ille riire renaide, íemo riírede jairifo afécomo jaiñode; mei íadi afeco jainóñede, mei mairide éniemo nígaza.

²⁶ Mei jiáifodo cuena cacádimie mei íadi cue ocuícana finóñedime jofo nállana figo baitáñedime izoide. Afémie ídiaidinomo ie jofo nite.

²⁷ Afe mei riire noci biide, íemo ille riire renaide, íemo riírede jairifo jaiñode. Iemona afécona jainode. Nana ana baiíllano due fiébiñeno niné táinocaide. Jesús dinori úrite.

²⁸ Jesús úrilla méifomo, nana comini ie llófuemarillari caimare fáigacaidiaioi,

²⁹ mei riinoredime izói íaioina llófuezeza. Jaiai ocuica uai llófuefiredino riinonide llófuia izói afémie llófueñede.

8

Jesús chíinaitimie jíllotate

(Mr 1.40-45; Lc 5.12-16)

¹ Jesús caifónedumona ana billa llezica, diga comini afémiedo jáidiaioi.

² Iemo irárede chíinaitimie Jesumo áinozide. Afémie Jesús anamo dújuillano daide:

—Ocuíraima, o jitáidi bie duícana cúemona oréredio. Cúemona oreri, —daide.

³ Iemona Jesús ie ónoído afémiena jétano daide:

—Jii, ona jíllotaiacadicue. Benómona ja íainitioza, —daide.

Daí dáina llezica ie iráretade chiie jacáibicaide.

⁴ Iemo Jesús íena daide:

—Cácarei, bifue bumo lloñeno iri. Dama lletáriraimamo o abi o ácatairi. Afe llezica Moisés ocuica o abi ja íainide daiitate raa afénomo mai o fecari. Afemona nana comini o chiie ja jacáillana ónoitiaioi, —daide.

Romano illaíma ocuífiregamiena Jesús jíllotate
(Lc 7.1-10)

⁵ Capernaum jófuemo Jesús jailla llezica, Romano illaíma Jesumo billano izire jicade:

⁶ —Ocuíraíma, cue ocuífirega jitócome iere irárede. Batí jofomo bíide. Afémie tíziri iere jamánomo izi cácade, —daide.

⁷ Jira Jesús íena daide:

—O jofomo jaillano afémiena jíllotaiticue, —daide.

⁸ Jira illaíma Jesús uai ote:

—Ocuíraíma, cue jofomo o jáillena, cue iere jamáimiedicue. Jicana o uaido o ocuiri, afémie jílloilleza.

⁹ Mei dama cue jíaíllaíma uai anamo iticue. Daje izói cue anamo cue úiñoa fuíríraini ite. Dáamiena “Bi” cue daiía, afémie bírede. Jáíamiena “Jai” cue daiía afémie jaide. Daje izói cue ocuífiregamiena “Bie fino” cue daiía, afémie áfena finode, —daide.

¹⁰ Jesús áfena cacáillano, caímare fáigacaillano afémiedo jáidinona daide:

—Uáfuenta ómoína daidicue: Nana Israel náiraímo bie izói íinote come jaca baiñédicue.

¹¹ Omoína daidicue, nágafeniamona aillo oni jicánemaci bíitiaioi. Afémaci monamo ite Juzíñamui illáimana illánomo jofo ráinazaillano, daane Abraham, Isaac, Jacob diga güítiaioi.

¹² Mei íadi fueñe jáiredino, jino jítinomo dotálliaioi. Afénomo afémaci iere éenaicana murímuritiaioi, —daide.

¹³ Iemona afe illáímaña daide:

—Mai o jofomo jai. O ínuaze íteza, —daide.

Daií daina llezica afe irárede jitócome jíllode.

Jesús Pedro jífaiño jíllotate
(Mr 1.29-31; Lc 4.38-39)

¹⁴ Afe mei Jesús Pedro jofomo jaide. Afénomo Pedro jífaiño abi cuaríllari irare bíinana cióizaide.

¹⁵ Iemo Jesús afengo onoi llínua llezica ie abi cuarilla llíicaide. Afemona afengo náidacaillano afémaci jitailla bai atide.

Jesús aillo iráredínuaí jíllotate
(Mr 1.32-34; Lc 4.40-41)

¹⁶ Aferui jitoma jímaícaidemo diga fiénide jóriaí ogano Jesumo atídiaioi. Iemona daade uaido afe fiénide jóriaí jino orede. Daje izói nane nana duícotaidínuaí afémie jíllotate.

17 Nana bie izói zúide, jaiái uai lloiraíma Isaías lloga uai fuitállena. Be afe uai: “Cai íraniaí afémie uite. Daje izói cai duícuaí afémie oni orede.” Daií Isaías llote.

Jesudo jáiacadino bie izói írediaíoi

(Lc 9.57-62)

Afe mei jorai fuédamo illa llezica,

18 diga comini Jesús abido nágafene gairíllana cíollano, afémie “Mai jorai ruicáfenemo cai jai,” daide.

19 Iemo ocuica uai llófueraima Jesumo billano daide:

—Llófueraima, nana o jáiacana diné odo jáiacadícue, —daide.

20 Jira Jesús ie uai ote:

—Nana jazici rílleníai uái ífireillino ite. Daje izói caifodo féedinuíai uái íaíoi ráillino ite. Mei íadi Nanoide fima jítódicueza, dáanori uái cue illino íñede, —daide.

21 Iemo jíáie ie llófuegamacimona dáamie íena daide:

—Odo jáiacadícue, mei íadi fueñe cue ore cue moo tílle dinó cue ílleza, íemo íena ráiacadícue; afe méifomo odo jáitícue, —daide.

22 Jira Jesús ie uai ote:

—Mai cuedo bi. Juzíñamuimo náfueñedino tíide izóidimaci; mai mei jadíe ua tíitimie afémaci ráilleza. O cuedo bi, —daide.

Jesús jairifo naa jorai bagua diga líicaitate

(Mr 4.35-41; Lc 8.22-25)

23 Ie mei Jesús naa ie llófuegamaci diga áillue nocaedo jáidiaíoi.

24 Afe mei jorai ruicáfenemo jáidiaíoiimo, daa jamánomo rírede jairifo náidacailla. Afe jairíomona jorai bagua afecae acónillaina íbáiacade izoide. Mei íadi afe llezica Jesús inide.

25 Iemona ie llófuegamaci ie cazítatiaíoi. Cazítajano íena daidíaíoi:

—¡Ocuíraíma, cai jíllota! ¡Ja buízaidicaíza! —daidíaíoi.

26 Jira afémie uai ote:

—¿Nibái mei iere jacínaitíomoi? ¡Omoi nai figo íinoñediomoi! —daide.

Iemona afémie náidacaillano jairifo naa jorai diga lletade. Daií ie daína llezica jorai bagóñeno uái ite.

27 Iemona afécaemo ítimíai caimare fáigacaidiaíoi. Fáigacaillano daidíaíoi:

—Bie mei, ¿níie come? ¡Bímie daína uaina jairifo naa jorai diga íinote! —daidíaíoi.

Gerasa éniemo ite fiénide jóraí úicaíga íaillinoí rafue

(Mr 5.1-20; Lc 8.26-39)

28 Afe mei Jesús jorai enéfenemo Gerasa éniemo dúcidemo, mena íima raíáfuaímona Jesús diné bite. Afe íaillinoí fiénide

jóriai úicaiga. Afe íaillinoi jamánomo jacire illáirede. Afedo jóide iodo buna jáinide.

²⁹ Jesús afe íaillinoi lleta llezica caillíoidiaillinoi:

—Jesús, Juzíñamui Jitódioza. ¿Nibái mei cócomo jíricaidio? ¿Nai aferui dúciñedemo benó coco duere fínuaibitio? — daidíiaillinoi.

³⁰ Afe llezica afe áinori tóica meróniai güitíaioi.

³¹ Jira afe fiénide jóriai Jesumo izire jicádiaioi:

—Bie come íaillinoimona jino cai o oréadi, táinomo oréñeno baie meróniaimo cai oreri, —daidíiaioi.

³² Jira Jesús íaioina daide:

—Mai afénomo omoi jai, —daide.

Afe fiénide jóriai afe íaillinoimona jino billano meróniaimo jaide. Afe mei afe meróniai jorai arimo ite íconido jabida jóraimo cocídiaioi. Afénomo coróbaizidiaioi.

³³ Iemona afe meróniai úiñotino jacinaillano botádiaioi. Jófuemo dúcillano nana aféfuiai llotíaioi. Daje izói fiénide jóriai úicaiga íaillinoimo finócafue llotíaioi.

³⁴ Iemona nana afe jofue comini Jesús illánomo jáidiaioi. Afémiena cíoillano, afe íaioi éniemona oni jáillena izire jicádiaioi.

9

Jesús tízitaitimie jíllotate
(Mr 2.1-12; Lc 5.17-26)

¹ Afe mei Jesús áillue nocaemo ana jaillano jorai enéferaimo ruica jaide. Iemo dama ie jófuemo dúcide.

² Afénomo tízitaitimie Jesumo atídiaioi, naa ie bíirallu diga. Afémaci íinuana Jesús cíoillano, iráredimiena daide:

—Cue izíruigamie, mai caimare ii, mei omo ite fiénidifuijai jae dógaza, —daide.

³ Jira ocuica uai llófuetinomona dáarie comeci anado daidíiaioi: “Bímie baie jíáimie fiénidifuijai dóina dáinado Juzíñamuina icíritade.”

⁴ Jesús afémaci comécido dáinana onóillano daide:

—¿Nibái mei fieni omoi comeci facádíomoi?

⁵ Mei daí daina ménade uáimona ¿ñie uai iere llotáinina? Afe ménade uai be ñie: O fiénidifue muiñócaza. Iemo jíáie uai bie izói daina: Náidacaillano, maca. (Iraie uai jamánomo llotáirede, mei omoi eróicana íficaideza.)

⁶ Ie jira Nanoide fima Jitódicueza, bíniemo cue illa llezica, comínimo ite fiénidifue cue muiñolle ríino jino ómoimo cíotaiticue, —daide.

Afemona afe tízitaitimiena Jesús daide:

—Mai náidacai, náidacaillano o bírallu llínnota o jofomo jai, —daide.

⁷ Afemona tízitaitimie náidacaillano, ie jofomo jaide.

⁸ Nana comini áfena cíoillano iere jacinaitiaioi. Afemona Juzíñamuimo ñúefuena nitádiaioi: “Mei Juzíñamui áillue ríino bie cómemo fecádeza,” daidíaioi.

Jesús Mateo uáidote

(Mr 2.13-17; Lc 5.27-32)

⁹ Jesús afénomona oni jaide. Jaillano Mateo dainámiena ciode. Afémie gobierno ibátaga úcube llínoraíma. Ie jira afe úcube oránomo ráiide. Jesús íena daide:

—Mai cuedo bi, —daide.

Ie jira afe Mateo náidacaillano iedo jaide.

¹⁰ Afe jiáiruido Jesús naa ie llófuegamaciri jofo eromo íaioi güilla llezica, aillo jiáie úcube llínofiredino naa jiáie fiénidino dáanomo güitíaioi.

¹¹ Mei íadi Fariséuai áfena cíoillano afémie llófueganomo jicánotiaioi:

—¿Ñibái mei omoi llófuetimie úcube llínofiredino diga naa fiénidinori güite? —jicánotiaioi.

¹² Afena Jesús cacáillano, íaioina daide:

—Íociredino iránidino daje izói manóriraimana jítaiñediaioi, mei jiáifodo iráredino manóriraimana jitailla.

¹³ Bie jaiái Juzíñamui Cuegáuai dáinana omoi onóizairi. Afe be níuái: “Conímana omoi duéruillena daje izói cuena omoi duéruillena jítáidicue. Mei íadi omoi fatá cuemo fia fecaca rílleníai jítaiñedicue,” daide. Ie jira dani ñúemacina abi mamédinona uáiduaibiñedicue, mei jiáifodo fiénidino íaioi comeci ifue méidollena biticue, —daide Jesús.

Iaioi fimairillena Jesumo jicánotiaioi

(Mr 2.18-22; Lc 5.33-39)

¹⁴ Afe mei Juan Bautístado jáidino Jesumo dúcillano jicánotiaioi:

—Mei cai bie fariséuai diga ¿ñibái fimairitagacai, mei íadi o llófuegamaci fimairiñediaioi? —daidíaioi.

¹⁵ Jira Jesús uai ote:

—¿Airena rafue llezica afemo uáidogano, meita zúurenari güinidiaioi? Daí íñédeza; ringo otímie íaioi cígimo illa llezica caimare güitíaioi. Mei íadi ringo otímie íaioimona báiruaibillirui dúciite. Aféruído comeci zúurenari güíñeitíaioi. Ringo otímie izói birui cuedo jáicadino cígiri itícueza, —daide.

¹⁶ Jesús nane jiáie onótatifue llote:

—Jaca ninomo dáamie tífoñegaroimona jaitada jácaie inícuirromo nitáñediaioi. Daií nitáadi afe cómoroi jácaroina fieni finode; mei nai jócoñega cómoroi jofa jainánuamona jácaroimo ite cúaidinona aillo oni cuatácana jaide.

17 Daje izói comue vino jácara igorai finoina iciru izoide raamo totánide. Dámie daií totáadi afe comue vino afe jácara iciruna eroide raana cúataite. Afemona afe iciru naa vino diga táinomo fáifite. Iemona comue vino comue igorai finoina iciruna eróidemo jónefirega. Iemona afe naga ñue éenoga. (Afe bie dáinado Jesús ie comue llófueinafue, íemo íaiói ja-iai llófuegafue dáanomo ínnonide, dáanomo náfuenide, íaióimo llófue.)

Jairo jiza íemo jiáingo Jesús iniroi jétaibitíngo Jesús jíllotate
(Mr 5.21-43; Lc 8.40-56)

18 Jesús bífuiaido úrilla llezica, judío illaima Jesumo dúcide. Dúciillano, afémie anamo fueco dine bíjicaillano daide:

—Cue jiza ja tíide, mei íadi o bíllaza, mei aféngomo o onoi bítaibiri afengo jíllolleza, —daide.

19 Afe jira, Jesús náidacaillano afémie diné jaide naa ie llófuegamaciri.

20 Afémie iodo jailla llezica, jiáie iráredíngo afémiemo bite. Afengo afe irárenamona doce diga fimona dícotaite. Jesús comini cígido rillire jailla llezica, afengo Jesús jinófene dinena ie iniroi fueda jétaibite.

21 Mei afengo comécido daide: “Daa ie iniroi cue jetáadi jíllotícue,” daide.

22 Iemona Jesús meine abido gírecaillano aféngona cíoillano daide:

—Ízruigango, caimare o iri. O ínnuamona ja jíllodioza, —daide.

Daií daina llezica afengo jíllode. Afemona afengo ja íocirede.

23 Jesús illaima jofomo dúcia llezica, aillo comini come tíllari cáillicailli éediaioi. Afe llezica jiáimaci toticai zuure fúudiaioi.

24 Jesús áfena cíoillano daide:

—Benómona oni omoi jai. Afeza tííñedeza fia inide, —daide.

Afémie dáinari comini íemo zadáidiaioi.

25 Mei íadi Jesús afémacina jino orede. Oriano jofa jaide. Jofa jaillano afe tídingo ónoído llínnote. Llínua llezica afengo caifo náidacaide.

26 Iemona Jesús finócafue nana afe éniemo itígobiaido jica jalleide.

Jesús mena uínidimie jíllotate

27 Afénomona Jesús jáidemo, mena uínidimie ie óodana caillícana bite. Daidíaiillinoi:

—Davidmona comuídime Juzíñamui oreca Mesía ímie, mai cócomo dúecai, —daidíaiillinoi.

28 Afe mei Jesús jofo eromo jáidemo, afe íaiillinoi Jesumo dúcide. Iemo Jesús íaiillinoína daide:

—Cuemo ómicoi jicácafueña finóredicueza ¿meita ínotiomicoi? —daide.

Jira afe íaiillinoi daide:

—Ocuíraima, jii ínoticoco, —daidíaiillinoi.

29 Iemona Jesús íaiillinoi ui jetánota daide:

—Ómicoi íinua dieze, ómicoimo cómuiteza, —daide.

30 Daií ie daína llezica, íaiillinoi ui ñue cíoide. Afe mei Jesús íaiillinoína riire daide: “Bie ómicoimo cue finócafue bumo lloñeno ómicoi iri,” daide.

31 Afena afémie rairuide íadi, afe íaiillinoi jino billano, nana afénomo Jesús ui mánuana llócadaiillinoi.

Jesús uáinidimie jíllotate

32 Afe mei Jesús afénomona jáidemo, fiénide jóríai úicaiga uáinidimie, Jesumo atídíaiioi.

33 Iemona Jesús afe fiénide jóríai jino orede. Afemona uáinidimie ja úrite. Aferi comini caimare fáigacaillano daidíaiioi:

—Bie izóidifueña jaca Israel nairai cígimo cíóñedícaí, —daidíaiioi.

34 Mei íadi fariséuai daidíaiioi:

—Jesús dama fiénide jóríai illaíma ríinodo afe úicaigamie fiénide jóríaina jino orede, —daidíaiioi.

Jesús comínimo dúecaide

35 Afe mei Jesús nana aféniemo ite jófuiamo naa onífedo itícuaído llófuiaide. Afénuiamo ite Juzíñamui uai llófueriracuaido llófuete. Afémie Juzíñamui illáimana illarui ñuera rafue llocana uite. Iemo nana jáíiforiedemo izi cácade iráredínona jíllotate.

36 Meita nana daií itínona cíoillano, afémacimo Jesús dúecaide, mei úiñoñegano izóidiaioi. Ie jira oni ráide ovéjaíai izóidiaioiza. Afémaci duere finócaíaiioi, daje izói duere zefuide buna ráiruiñegano izói itíaiioi.

37 Afemona Jesús ie llófuegamacina daide:

—Uáfueza, jacáfaimo ite raa ailla llezica jofo óitino íñena izói, birui Juzíñamui illáimana illánomo jofo órega comini aillo ite. Mei íadi afémaci jofo óitino figo íñede. (Afe jofo óitino jáíimacimo ñúefue llóitino.)

38 Ie jira jacafai Naama izóidimiemo jáíie ñúefue llóitimacina omoi jicari, afémaci afémie oréllena.

10

*Jesús doce dígamie ie oni oréllino nizede
(Mr 3.13-19; Lc 6.12-16)*

1 Afe mei Jesús doce dígade ie llófuegamaci uáidote. Uáiduano fiénide joría comínimona oni orelle ríino íaioimo fecade. Daje izói nana jáíforiede duico ogano jíllotalle ríino afémacimo fecade.

2 Be afe doce dígadimaci oni oréllino mámeciai: Nánoramie Simón, dáamiéna Pedro daína, íemo ie ama Andrés, íemo Zebedeo jitó íaillinoi Santiago Juan diga,

3 íemo Felipe, íemo Bartolomé, íemo Tomás, íemo gobierno íbátaga úcube llíinoraíma Mateo, íemo Alfeo jitó Santiago, íemo Lebeo dáamie mámecei Tadeo,

4 íemo Iere Járidotimacimo jáináidimie Simón, íemo uire Jesús fécaitimie Judas Iscariote.

*Jesús ie llófuegamaci jáígobiaimo llófuellena orede
(Mr 6.7-13; Lc 9.1-6)*

5 Jesús bie doce dígamíena ie oréacana llezica íaioi táijille izói llote. Daíde:

—Judíoñedíno éniemo omoi jáíñeno iri. Daje izói Samaria éniemo ite jófuaímo jáíñeno iri.

6 Mei jáíáfodo Israel náiraímo ovejai féirailla izói féiraitinomo omoi jairi.

7 Monamo ite Juzíñamui illáimana illirui áinozillana llocana omoi uiri.

8 Iráredínuaí omoi jíllotairi. Tíidínuaí meine abído omoi cáatari. Daje izói íáire chíñaitimíaiána ñue omoi finori. Daje izói comínimo ite fiénide joría jino oreri. Bie izói omoi táijille ríinona raiñoñeno ómoimo fecádícue, íemona áfedo jáíimacina raiñoñeno omoi canori.

9 Jabe omoi jaille llezica úcubena uiñeno iri.

10 Omoi cirítico uiñeno iri. Jaca daa o abímo jíidíroi diga jairi. Daje izói ídaí icona uiñeno iri, íemo jáí macara jigüida uiñeno iri. Mei jáíimacina omoi cánua jira, áfemo táijiraíma jaca raiñoñeno écafiregaza.

11 Omoi jáillinomo ite comíni jófuemo omoi dúcia llezica, ñue ínofiregamie illano omoi jeno. Aféno nái oni omoi jáíñeille díno uái omoi iri.

12 Jofo jaillano, afémaci ñue daí uáidori. “Caímare uái omoi iri,” afémacina daíri.

13 Afe jofu comini caimare omoi llínoiadi, omoi afémaci ie ñue mameca uai afémacimo fiébiteza. Mei íadi omoi daina uaina afémaci náfueñenia, afémacimo omoi mameca ñue uai abido ómoimo bíteza.

14 Mei íadi afémaci ómoína llínoacañenia, daje izói omoi llógamo cacáreacañenia, afe jofómoma, daje izói afe jófuemona oni omoi jai. Omoi jailla llezica omoi éibamo ite íaie afémacimo teténocairi. Afedo íaioi comécimo ite íaifue nai íaioimo illana ónoítiaioi.

15 Mei ua ómoína dáititue, íraicaño riire jicánolliruimo dúcina llezica, bie ómoína ruifruite comini, Sodoma Gomorra diga jofue comini duere zefuilla baimo, iere duere finólliaioi.

Cristo ícoinia duere cai zefullifue

16 Omoi cacai. Ovejai illáirede jazici jico cígimo ória izói ómoína orédicue. Jaio abi rairuilla onona izói abi omoi onoiri. Mei íadi afe llezica fíiciri illáienina izói omoi iri.

17 Ñue abi omoi rairuiri, mei comini jabóidillainimo ómoína fécaítiaioiza. Juzíñamui uai lloraco eromo omoi fáitíiaioiza.

18 Iemo ríillainimo, daje izói jamánomo ocuídillainimo cue ícoinia ómoína uítíiaioiza. Iemo afe omoi íaioi úilledo afe illáinimo cuedo úritiomoi. Daje izói afe judíoñedinomo cuedo úritiomoi.

19 Mei íadi illáicomínimo omoi íaioi uille llezica, “¿Ñue izói úritícaí?” dáinamo comeci faiñeno iri; daje izói “¿Ñue uillaí llóitícaí?” daiñeno iri. Mei omoi úrille llezica, Juzíñamui ómoína úritaiteza.

20 Afe llezica dani omoi comeci izói úriñeitiomoi. Moo Juzíñamui Ñuera Joreño ómoído úrilleza.

21 Afe llezica comini dani íaioi nahí ámana Crístomo ínotimíena illa jira, jíáimacimo íena fállena fécaítiaioi. Daje izói móotíai dani íaioi Crístomo ínote jítótíai fállena fécaítiaioi. Iemo jíái jítótíai dani íaioi móotíaido éoícana eróitíiaioi, íemo íaioína titátaitíiaioi.

22 Nana comini cue ícoinia ómoído éoícana eróitíiaioi. Mei íadi fuillinomo fáicanocaiñeno ñue ínoicaitimie dama jíllote.

23 Daa jofue comini omoi duere finóadi, jíaie jófuemo omoi jairi. Mei ua ómoína dáititue, nana Israel jófuiáido nai omoi jáiñenia uícodo raire dúcítitícueza; mei Nanoide íima Jító Crístodicue.

24 Llófuegamacimona llófuetimie baimo jamánomoidimie íñede. Daje izói ocuífíregamie ie ocuídímie baimo ocuínide.

25 Llófuegamie ie llófuetimie illa izói írede. Daje izói ocuífíregamie ie ocuídímie illa izói írede. Jofu naama izóidícueza, Beelzebú daina Taife mámecei cuemo íaioi jíitáadi,

jofo ero úruiai mámecina dájena jítaitiaioi. Iemo afe úruiaina cue baimo fienu úritiaioiza.

¿Námiena jacírui redicai?
(Lc 12.2-7)

²⁶ Ie jira comínina jacíruiño eno iri. Mei nana báinino daina uailai jino uáfodo cíozite. Daje izói nana báinino itífuiaina jino uáfodo onuille.

²⁷ Birui jítifomo úrilla izói báinino ómoimo cue llógana, uire uáfodo monari comínimo omoi lloiri. Daje izói ómoína báinino cue daina uai, comini dáanomo uáidota ficire lloiri.

²⁸ Omoi íeizi titaitinona jacíruiño eno iri; mei omoi joreño na titánidiaioiza. Mei jíáifo boode iraimo cai íeizi naa cai joreño duere finótaitimiena omoi jacírui.

²⁹ Onódiomoiiza mena duera ófocuzai duera úcubedo ibárega. Mei daií íaioi ráifiñede íadi, afémacimona omoi Moo Juzíñamui daiñenia dácuiño tñide izói ana báiiñeite.

³⁰ Mei uafue, omoi ifócimo ifótiraii illa dígatirai facádoga.

³¹ Mei daiñtadeza jacíruiño eno omoi iri. Omoi, aillo ófocuiñuai baimo ráifidiomoi.

Comini eróicana Jesuna jíeruitino
(Lc 12.8-9)

³² Comini eróicana nana cuena jíeruitinona monamo ite cue Moo eróicana jíeruiticue.

³³ Mei íadi comini eróicana cuena jáanotinona, afe izói monamo ite cue Moo uíecori afémacina jáanoiticue.

Comini conímana ruifruitatallena biticue
(Lc 12.51-53; 14.26-27)

³⁴ Comini dájena uái illifue biniemo lluáibiticueza daiñeno iri. Mei jíáfodo dájena uái illifue lluáibiñeno, fuirilla izoide lluáibiticue.

³⁵ Cuemo ínua mona dáamie ie moo dinena íena ruifruicaite. Afe daií cue bíllamona dájena uái íñeitiaillinoi. Daje izói ei cuemo ínua jira afengo jiza dinena ruifruibicaite. Afe daií cue bíllamona dájena uái íñeitiainguai, íemo jíái cuemo ínua mona mio ie jífaíño dinena ruifruibicaite. Afe daií cue bíllamona dájena uái íñeitiainguai.

³⁶ Iemona illa dígamie dama ie jofo ero comini dinena éoigamiéna mámeitiaioi.

³⁷ Ninó daa come ie moo, ie eina cue baimo izíruiá, afémie cuemo dúinide. Daje izói ninó daa come ie jítóna, nibai ie jízana cue baimo ie izíruiá, afémie cuemo dúinide.

³⁸ Iemo jíái, comini dama afémie titácanamo náfuiano cuedo jáiacañedimie afémie cuemo dúinide.

39 Ie jira ie cáanano rairuácadimie áfena táinomo fáifitaite. Mei jáífodo cue ícoinia ie cáanano táinomo fáifitimie afe fáifidena baimo ziiño illínona máíñoite.

Jirídua izóidifuiái
(Mr 9.41)

40 Iemo Jesús nai úrillano daide: Omoína caimare uáidotino, daje izói cuena caimare uáidote. Iemo cuena caimare uáidotino daje izói cuena orédimiena caimare uáidote.

41 Juziñamui uai jino llóraima Juziñamui dibénedo bíllado afémiena caimare uáidotimie, dájeze afémie jirídua izói jirídoite. Daje izói ñüemiena caimare uáidotimie afe jáímie ñue íllado, afémie jirídua izói jirídoite.

42 Daje izói ninó daa come cue llófuegamacimona jabóidimie daa due jiza mánaide jáinoína jirótaadi, afémie cuedo jailla jira, afe jirótatimie uáfueña íeiena mameca raana jirídoite, —dinori Jesús ie oréllimacimo llófue.

11

Juan Bautista orécano
(Lc 7.18-35)

1 Jesús ie doce dígade llófuegamaci íaioi táijille izói llófuiana fuilla méifomo, Jesús oni afe éniemo ite jófuiaimo jaide, afénomo ite comini llófuellena.

2 Aféruido Juan Bautista llavéracomo illa llezica afémie Jesús finócafuiaina fidide. Ie jira iedo jáidinomona dáarie Jesumo jicánuaitate.

3 Jesumo dúcillano jicánotiaioi:

—¿Meita o biite Cristo dainámiedio? ¿Nibai nai jáíe bíitimie úíñoredicai? —daidíaioi.

4 Jira Jesús afémacina daide:

—Omoi ciona, omoi cacana izói Juaamo omoi llujiri.

5 Bífuiái afémiemo llujiri: Uínidino ñue ciódiaioi, macáñedino macádiaioi, íaire chíñaitino íaioi chíemona ñue jacáitagaiaioi. Iemo jefona cacáñedino ñue cacádiaioi, íemo dáarie tíidino meine abido cáadinona jáidiaioi. Daje izói dúeredino jílona uaina llogaiaioi.

6 Cuemo íñoñeilli uaina baiñédimie íóbite.

7 Juan orécano meine abido jailla méifomo, Jesús Juaado comínimo úrite; daide:

—Mei táizicimo ¿minícana cióizaidiomoi? Nibai dáamie ie daina uaina méidofiredimiena cióizafirediomoi.

8 Afe izóidimiena omoi cióizaiñenia, ¿mei nie izóidena cióizaidiomoi? ¿Meita nibai ñue cíoide ráifide iniroi jitáoidimie cióizaidiomoi? Onódiomoiza ráifide ñüecuiroi jitáoifiredino jaca illaini jofomo ífirediaioi.

9 Mei írainomo ¿minícana cíóizaidíomoi? ¿Nibai Juzíñamui uai jino llórainmana cíóizaidíomoi? Jii. Uáfueza. Juzíñamui uai llórainma baimo jamánomoidimiena cíóizaidíomoi.

10 Juan baie Cuegáuai dainámie. Jaiai uícodo nai cue biñena llezica, aféuaimo Juzíñamui, afémie dibénedo cuena daide: O bille io ñue finóllena izói, comini íaioi comécido ñue omo jieruillena, cue lluájitimie o uícodo orédicue.

11 Uáfena ómoína dáitícue, nana comínimona ite Juzíñamui uai llórainimona Juan Bautista baimo jamánomoidimiena iñede. Mei jiáifodo Juzíñamui illáimana illánomona jabóidimie Juan baimo jamánomoide.

12 Mei íadi Juan Bautista bíllamona ua biruimo aillo comini riífuedo raa báirua izói, monamo ite Juzíñamui illáimana illánomo iere izire jofu jíaiacadiaioi. Afe riífuedo afénomo jofu jíaiacadino bie izói comécidiaioi: “Afe illánona anáfenuano jofu jáitícaí,” daíí comeci facádiaioi.

13 Nana Juan uícómo ite Juzíñamui uai llóraini naa Moisés lloga ocuica uai diga Juzíñamui illáimana illáruido úritiaioi. Íaioi úrilla méifodo Juan bite.

14 Iemo jiáífue ómoimo llóitícue. Omoi íinoiacaniadi, bífuena íinoredíomoi. Naui lloga bíite Elías be námie Juan; mei Juan Elías dainámiena bíteza.

15 Maí cacáreacadino, omoi cacai.

16 Iemo Jesús nai úrillano daide: Biruúllaido itínona, ¿ñie izói íaioína mámeitícue?

17 Jofue cigi íbírimo jífánote úrue izóidiaioi. Afémaci conímamo ebírede rúado caimátaiacadiaioi, mei íadi áfena fairíoñediaioi. Daje izói conímama zúurede rúado fíraacadiaioi, mei íadi daje izói áfemo cacáreicañediaioi.

18 Afe bie izói ómoimo ite. Mei Juan Bautista billa llezica afémie fímarillano figo güiñede, daje izói ríiji jiróñede. Ie jira “Fiénide jóríai úicaigamedio” íena daidíomoi.

19 Afe mei cue, afe Nanoide íima Jitó dainámiedicue bitícue. Billano, jiáimaci izói güitícue, íemo jiródicue. Afemona nane bie izói cuena daidíomoi: “Bímie iere güilláredimie, jéerie jíofíredimie. Fiénidino nabáidimie. Daje izói gobierno íbátaga úcube llínoraini nabáifíredimie.” Daíí cuedo úritíomoi. Comini Juzíñamui orécanona bie izói fiéni daidíaioi íadi, Juzíñamui baitácafue dama ie finócafuiado jino cíozite, —dinori Jesús daide.

*Jófuiaimona dáarie Jesús uaina cacáreacañediaioi
(Lc 10.13-15)*

20 Iemona Jesús jiáie jófuiái comini íaioi íñoñena jira fueñe lletade. Mei afémie uaido daina comuide cíórainina ráamona

nabene afémaci cígimo finódeza. Mei íadi afeno comini íaiói comeci ífuenta nai méidoñediaíói. Afémie daide:

²¹ —¿Corazín jofue comini nii dúerena! ¿Daje izói Betsaida jofue comini nii duere zefuilla! Mei íaiói cígiri cue finoca ciórainina raa, áfena Tiro comini daje izói Sidón comini cígimo nauí finódicuenia, nibai raire jaiái uícodo íaiói comeci ífuenta méidotiaíói. Uafue íaiói comeci ífuenta méiduamona, ja diga fimona jaide. Afe llezica zúunaia jítáfirega jítiroi jítácadiaíói. Daje izói aféruimo íaiói zúunailla jino ácatallena jízefo ifomo jutácadiaíói.

²² Mei jíáfodo ómoína dáitícue, íraicaiño riire jicánolliruimo Tiro Sidón diga duere finóbina baimo Corazín íemo Betsaida comini duere finólliaíói, —daí daide.

²³ Iemo Capernaum jofue comini Jesús lletade. Afémaci dibénedo daide:

—¿Meita íaiói íinoga jofue monamo úirede? ¿Daí comeci facádiaíói, ero ua? Mei jíáfodo íaíoína daidícue, tíidino illánomo ana dotaca izói niné táinocaitalliaíói. Mei íaiói cígimo cue finoca ciórainina raa nauí Sodoma jófue mo finódicuenia, afe jofue nai biruimo nia ite.

²⁴ Mei íadi jíáfodo Capernaum comínina dáitícue, íraicaiño riire jicánolliruimo Sodoma comini baimo jicánolliaíói, —aqué izói Jesús íaíoína lletade.

*Cuomo billano omoi ocózinairi
(Lc 10.21-22)*

²⁵ Aféruillaído Jesús daide:

—Mona Ocuíraíma Moo Juzíñamui, omo ñúefue jóoneitícue, mei Juzíñamui dibénedo onóigafuiai úrue izoide, comécina níifuenide jamai comínimo jino cíotatioza; mei íadi bínie ráfuenta baitádinomona aféfuiai o retáidoga.

²⁶ Jíi, Moo, mei o daí jítáidíza.

²⁷ Jesús nai úrioide: Cue Moo, nana uafue onóigafuiai ja cuemo llotio. Moo Juzíñamui, o Jitódícue, mei íadi buna uáfodo cuena ñue onóñena. O cue Móodioza, dama o ñue cuena onódío. Daje izói buna uáfodo ona ñue onóñena. Cue, o Jitódícueza, dama ona ñue onódícue. Iemo jíái daje izói o Jitó onótaacagano ñue ona ónoítiaíói.

²⁸ Iemo comínina daide: Omoi ñúefuiai finóacanamona zefuínaitino cue diné omoi bí; íemo jíái fiénidí fue ábiana méeruitino daje izói cue diné omoi bí. Omoína ocózinaitaitícueza.

²⁹ Mai cue diga táijifirena izói ñúefuíaína finóllena omoi onoiri; mei omoi diga táijifiredícueza. Afe dájena táijinana cúemona omoi onoiri. Mei comécina járidoñedícueza. Daje

izói comécina mánaidicueza. Afemona omoi comeci uái ocózinaillinona báitio moiza.

³⁰ Omoi diga cue táijinana féinide. Daje izói ómoimo cue ocuállafue jaca ómoína zéfuitañeite, —dinori úrite Jesús.

12

Jesús llófuegamaci ocózinaillarumo trigo úmoiai dícoiano otá güitíaioi

(Mr 2.23-28; Lc 6.1-5)

¹ Aféruido Jesús naa ie llófuegamaciri ocózinaillaruido trigo ritino jacafai cígido macade. Afe llezica ie llófuegamaci iere jufínaillano, trigo úmoiai otá güitíaioi.

² Afena fariséuai cíoillano Jesuna daidíaioi:

—Ero, o llófuegamaci ocózinaillarumo rairuírede táijinamo táijidiaioi.

³ Mei íadi Jesús íaioina daide:

—¿Omoi ico jaiái illaíma David finócafue cúegana facadoñediomoi? Afémie naa ie nabáiñiairi iere jufínaitiaioi.

⁴ Afe llezica Juzíñamui gairíracomo jofo jaillano rairuica panes otá güitíaioi. Mei íadi afe páaniai afémiemona rairuírede, daje izói ie nabáiñiaimona rairuírede. Afe pan dama lletáriraini güirede.

⁵ ¿Mei nane jíáie Moisés ocuica uai cúegana facadoñediomoi? Afénomo daina: Juzíñamui gairíracomo táijide lletáriraini, ocózinaillarumo ocózinaíñediaioi, mei daí íaioi illa fiénidifueñede.

⁶ Mei ómoína dáitícue, birui benomo afe gairíraco baimo jamánomoidimie ite.

⁷ Bie jíáie Juzíñamui Cuegáuai llógana nai onóñediomoi. Afe be níuui: “Fatá fia fecaca rille baimo cuena izíruillena jítáidicue.” Bíuaina omoi onóadi níufuena finóñedinona “Duere cai finótalli” dáíñeitiomoiza.

⁸ Mei uáfueza, ocózinaillarui Nanoide Hima Jitó Cristo dainámie ocuilla uai anamo ite.

Onoína llirídímie rafue

(Mr 3.1-6; Lc 6.6-11)

⁹ Afe mei Jesús afénomona jaide. Jaillano Juzíñamui uai llorácomo jofo jaide.

¹⁰ Afeco eromo ónoína llirídímie ite. Afe comini Jesumo fiénidifue jítállena jenódiaioi. Iemona afémiena jicánodoidiaioi:

—¿Meita iráredímie ocózinaillarumo jíllotarede? —daidíaioi.

¹¹ Jira Jesús afémaci uai ote:

—Omoimona daa cómemo oveja íadi, afe oveja ocózinaillarumo ifomo baíadi ¿meita caifo óñega?

12 Mei uafue, daa come oveja baimo jamánomo ráifide. Afemona ñúefue fínuana ocózinai llaruimo rairuíñega.

13 Iemona Jesús afe iráredimiena daide:

—O onoi jino zúita, —daide.

Jira ie onoi zúitamona, enéfene izói ñuera.

14 Iemona fariséuai jino jaillano, Jesús fállena mamérizaidiaioi.

Jai ai uai llóraima Jesudo daina uai como zuilla

15 Aféfuena Jesús fidíllano, afénomona oni jaide. Ie jailla llezica aillo comini afémiedo jaide. Iemo Jesús nana iráredino jíllotate.

16 Afe llezica afémie íaioina llotátañede: “Cue bie izói íllana bummo lloñeno iri,” íaioina daide.

17 Bie izói zuide jai ai uai llóraima Isaías lloga uai ñue ícoimo fuitállena. Afe uai be ñie:

18 Bímie nizada cue oga ocuífiregamie.

Afémiena iere izíruticue, íemo afémieri iere íóbidicue.

Cue Ñuera Joréñona afémie úcaitaicue.

Afémie cue mameca jaícina jóidifuiaina náiraímo jino llóite.

19 Afémie ríifuedo llóñeite.

Daje izói cáillicaiilli úriñeite.

Iemo jíai jofue cigi macáraodo ie uaina cácaíñeille.

20 Comécina náinidinona ruifíruíñede. Afémie íaioi comécina náiretaite.

Daje izói dúiacade uillide mechera meine abido omoi boota izói, afe izói jabo ínote comini afémie fáicanocaiñeite.

Fáicanocaiñeno ñue íaioina ínotaite.

Afe ícoimo nana duéredinona fáicanocaiñeitemo afémie jaícina illáimana illíruimo dúcáite.

21 Iemona nana náiraiai afémiemo ocuíritiaioi.

Taife ríino Jesumo illa afémiemo jítdáiaioi
(Mr 3.19-30; Lc 11.14-23; 12.10)

22 Afe mei únidímie Jesús diné atídiaioi. Afémie fiénide jóriai úcaiga úrinidímie. Afémiena Jesús jíllotate. Iemona afémie ja ciode, daje izói ñue úrite.

23 Ie jira nana comini áferi caimare fáigacaillano daidíaioi:

—¿Meita afe be nímie jai ai illaíma Davidmona comútagamie? —daidíaioi.

24 Fariséuai áfena cacáillano daidíaioi:

—Bímie fiénide jóriai illaíma Belzebú daínámie ríinodo afémacina jino oréfiredo, —daidíaioi.

25 Jesús daí íaioi comécido daínana onóillano íaioina daide:

—Ninó daje náiraina ite comini conima diga fuiríadi, afe náirai ráidoizillano niné táinocaite. Daje izói daje jofue

comini eneno ráidoiziadi, afe jofue are íñeite. Iemo jiái daaco ero comini eneno ráidoiziadi, afémaci are íñeite.

26 Iemo daje izói, mei Satanás dama íemo jaináidino jino oréadi, dani Satanás mairídino oni énenorie jáitiaioi. Mei íemona afémie ocuille ríino íñeite.

27 Omoi cuena: “Belzebumo ite ríinodo fiénide jóriai jino oréadio,” daidíomoi. Afe omoi daina uáfuedenia, jiáifue ómoimo jicánoiticue. ¿Mei bu ómoído jáidino fiénide jóriai jino orelle ríino iga? Ie jira dani afémaci ñue onóñeno taino omoi llua jino cíotatiaioi.

28 Mei jiáifodo Juzíñamui Ñuera Joreñodo afe fiénide joriaina jino orédicue. Iemo bifue bie izói daiíacana: Juzíñamui illáimana illarui ja ómoimo dúcide.

29 Mei uáfueza, ríiredimiena fueñe o máñenia, ¿ñie izói dáamie ie jofomo jaillano ie jofo ero ráaiena bairóredio? Bairónidio. Nano fueñe afémie máirede. Ie mei ie ráaiena bairórede. (Afe daií Cristo Taifena jaca anáfenorede.)

30 Cue dibénemo íacañedimie cuena uáitate. Cue diga dájena tájiñedimie, cue raana oni jutádimie izoide, mei afémie jiáimaci cuena ínotañedeza.

31 Ie jira ómoína dáitícue, naga come ie finoca fiénidifue, Juzíñamuimo jicáadi dórede; daje izói nana ie úrilla fiénidifue dórede. Mei íadi ninó dáamie Juzíñamui Ñuera Joreñona íaire dáíadi, afe uai jaca dónide.

32 Iemo jiái ninó dáamie Nanoide ñima Jitó Crístona íaire dáíadi, afe afémiemo ie lloia dórede. Mei íadi Juzíñamui Ñuera Joreño jánana fieni úritimie afe ie úrilla íaifue birui dónide. Daje izói uire jaca ninomo dónide.

Naga amena ie llizíllajido onórena izói, daje izói naga come ie úrillafuiaido ónorede

(Lc 6.43-45)

33 Ñuera aménamona ñuera ráajina llizide. Daje izói fiénide amena jaca fieni llizide. Mei uáfueza naga amena ie llizíllado ónorede.

34 Jaio izóidinodiomoi. Ja fiénidinodiomoiza ¿ñie izói ñue úrirediomoi? Mei uáfueza, cai fue cai comécimo jebuide raado úrite.

35 Ñuera come ñúefuedo úrite, mei ie comécimo ñúefue íllaza. Daje izói fiénidimie fieni úrite, mei ie comécimo fiénidifue íllaza.

36 Iemo nane ómoína dáitícue, íraícaíño Juzíñamui caimo riire jicánolliruimo, nana ráiruiñega fieni cai úrilla uai, daje izói abi cai rairuíñena úrilla uai diga, jáanoñeno “jii” daiíredícai.

37 Mei uafue, o úrilla dieze Juziñamui omo izire jicánoiteza. Jiáimiena “O náifuenidimedio” dáite; ie mei jiáimiena “Dama o ícoinia daí itio,” dáite.

Fiénide comini ciórainina raa finóllena Jesumo jicádiaioi
(Mr 8.12; Lc 11.29-32)

38 Afe mei fariséuaimona dáamerie Jesuna daidíai, daje izói Ocuica Uai llófuefiredino diga:

—Llófueraima, ciórainina raa o finuana cióacadicaí, — daidíai.

39 Jira Jesús afémaci uai ote:

—Bigima fiénidino botade jiruiredingo izoide ja Juziñamuina zófetiaioi. Iemo ciórainina raa cuemo jicádiaioi. Mei íadi nauí Juziñamui uai llóraima Jonás onótagafue baimo jiáifuenta llóñeilliaioi.

40 Mei Jonás daaruiámani íemo daámani naio afe áillue chamu eromo illa izói, afe izói Nanoide íima Jitó Cristo énie anamo daaruiámani íite, daje izói daámani naio.

41 Jaiaí Nínive jófuemo ite comini bigima comínimo riire jicánolliruimo bimácimo fiénidifue jítaitiaioi. Mei Nínivemo ite comini Jonás Juziñamui uai íaioimo llua llezica íaioi comeci ífuenta méidotiaioiza. Mei íadi biruí benomo Jonás baimo jamánomoidimie ite.

42 Daje izói sur dibénemo jica ite nairai illaíngo, bigima comínimo riire jicánolliruimo, bimácimo fiénidifue jítaite, mei afengo jica énie fuédamona Salomón comeci onóigafuemo cacáreizaibiteza. Mei íadi biruí benomo Salomón baimo jamánomo baitádimie illa.

Jino oreca fiénide jóriai meine dáamiemo bite
(Lc 11.24-26)

43 Jesús nai llícaíñeno úrite: Fiénide jóriai cómemona jino jáiadi, táiziciaido ie uái illino jenócana uite. Ie uái illino baiñenamona bie izói comeci facade:

44 “Meine abido cue billa cómemo jáitícue,” daide. Afe jóriai meine afe cómemo bítemo, jofo taico izoide baizáibite. Daje izói rafode ñue finócaco izói baizáibite.

45 Iemona afémie siete diga jamánomo afémie baimo fiénide jóriai uájide. Afémaci nana afe cómemo jofo jáidiaioi. Afemona afe come nauí ie fiénina baimo biruí jamánomo fiénide. Afémiemo illa izói, afe izói ómoimo íficaite, mei bigima fiénidigimaza.

Jesús ei naa ie ámatiairi
(Mr 3.31-35; Lc 8.19-21)

46 Jesús nai comínimo úritemo, ie ei naa ie ámatiairi dúcide. Afémaci jofo jinófecomo itíaioi. Afémie diga úriacadiaioi.

47 Afe llezica dáamie Jesuna daide:

—O ei, o ámatiairi jino benomo itíaiói. Afémaci o diga úriacadiaíói, —daide.

48 Mei íadi Jesús afe lluáibitimiena daide:

—¿Mei bu cue eina? Daje izói ¿mei bu cue ámatiaína? —daide.

49 Daíí dáinamona afémie llófuegamacina fuedo uidánote. Uidánuano daide:

—Bimaci cue eina, daje izói bimaci cue ámatiaína.

50 Mei ninó dáamie monamo ite cue Moo começi jitailla izói finódime bie come cue ámana, daje izói cue miríngona, daje izói cue eina, —daíí Jesús afémacina daide.

13

*Afémaci onótaité ríjifiredimie rafue
(Mr 4.1-9; Lc 8.4-8)*

1 Afe monado Jesús jofómona jino jaillano, jorai fuédamo ráinazaide.

2 Iemo afémie illánomo aillo comini ofilla jira, afémie bai no-caemo ráizazide. Afe llezica nana comini fuédamo fiébidiaíói.

3 Mei áfemona diga ráfuiaina afémaci llófuete. Afémaci onoiga izóidedo afémie íaiói llófuete. Daide:

—Jacáfaimo rífiredimie rizájilla.

4 Ricana ie uilla llezica, afe júdaica íjiaimona dáarie iomo baiide. Baiilla mei ófocuiñuai güizáibitiaíói.

5 Ie mei jíaijiai énie figo iñena noficiaimo baiide. Aféjiai raire zicode, mei afe énie llíaideza.

6 Iemo jáinaonideza jitoma egáñuamona, zafénaillano tíidiaíói.

7 Ie mei nane jíaijiai éegiai cígiri cocidino. Afe éegiai móonaillamona aféjiai íracotaillano tíidiaíói.

8 Mei íadi jíaijiai ñuera éniemo baiide. Aféjiai ñue ailla. Dáaride cien diga llizíllajiai comúitate. Jíairi sesenta diga llizíllajiai comúitate. Iemo jíairimo treinta dígaji comuide.

9 Bíemo cacáiacadino mai cacai.

*Nibái mei bie comini onoiga izóidedo úrilla, Jesús jino llote
(Mr 4.10-12; Lc 8.9-10)*

10 Iemona ie llófuegamaci billano Jesumo jicánotiaíói:

—¿Nibái mei cominimo íaiói onoiga izóidedo úritio? —daidíaíói.

11 Jira Jesús uai ote:

—Monamo Juzíñamui illáimana illirui uáfodo ónoñega ráfuiaina, afémie ómoína onótate. Mei íadi baie comini áfeniaina ónotanidiaíói.

12 Mei ua, Juzíñamuina iere onóacadimiemo ie báitaja baimo jíaiena írede. Iemona afémiemo aillo íite. Mei íadi Juzíñamui

dibénedo onóacañediemiemona íemo ite due jiza onónana bairórede.

13 Ie jira afémacimo íaioi onoiga izóidedo úriticue. Mei afémaci ñúefuena ciódiaioi, mei íadi nai cíoiñedino izói itíaiioiza. Daje izói cacádiaioi, mei íadi nai cacáñedino izói itíaiioi.

14 Mei áfemona Juziñamui uai llórainma Isaías afémacina jicana daína uai ñue ícoimo fuilla. Be níuui:

Omoi uáfodo cácaitiomoi mei íadi afe dáinana ónoñeitiomoi.

15 Mei bimaci comeci riiredinona abido jaide.

Daje izói afémaci figo cacáacañediaioi.

Afémaci ui ibaica izói ite. Daí itíaiioi íaioi uído cíoiñeillena, íemo jíai íaioi jefodo cácañeillena; daje izói íaioi comécido ñúefuiai ónoñeillena.

Iemona íaioi cue jíllotallena abido cuemo bínidiaioi, daí Isaías daide.

16 Mei íadi dani omoi uído omoi ciónamona, daje izói dani omoi jefodo omoi cacánamona íóbidinodiomoi.

17 Uáfueña ómoína dáititue, diga Juziñamui uai llóraini bie omoi ciónana cióacadiaioi, naa aillo jíai ñue comíniri. Mei íadi áfena cíóñediaioi. Daje izói bie omoi cacánana cacáacadiaioi, mei íadi cacáñediaioi.

Jesús ríjifiredimie rigájiai rafue ñue jino llote

(Mr 4.13-20; Lc 8.11-15)

18 Jira bíemo omoi cacáreiri. Rífiredimie rafue bie izói jino daide.

19 Monamo ite Juziñamui illáimana illarui uaina dámie cacáadi, mei íadi afémie áfena ínoñeniadi, afémie comeci afe bie io izoide. Jí, afe rigájiai iomo baídino izoide. Afe izói comécido jabo ie onoiga ñuera uaina Taife báiruabite.

20 Afe rigájiai ní afe nofíciai emódomo cocídino jana, ñúefuiana raire cacáillano caimare otino coméciai.

21 Mei íadi afémaci raire zicode raa riire jaináñena izói, Juziñamui afémaci figo jaináñenamona are inédiaioi. Mei íadi ñuera uai ícoinia jacire facátafuiai, íemo duere finóllena rácafuiai afémacimo comuíadi, ñúefuena fáicanocaitiaioi.

22 Afe éegiai illano jana Juziñamui ñúefuena cacádiaioi ia, bínie ráaniaimo comécina fáifiredino. Iere ráaniaicana afémacina jífujete. Nana aféfuiai Juziñamui ñúefuena íracotailla izói ínotañede. Iemona afe uai afémiemo ñue áide izói inede.

23 Mei íadi afe rigájiai ní afe ñuera éniemo baídino jana bie izói ite. Bimaci Juziñamui ñúefuena cacáillano afe uaina jeire otíaiioi, mei áfena ñue onódiaioiza. Uamona iere aite rigájiai izói afémaci aillo ñúefuiai finófrediaioi. Afémacimona dáarie jamánomo aillo ñúefue finódiaioi, íemo jíaimaci aillo ñúefue finódiaioi. Iemo nane jíai fia jabo aillo ñúefue finódiaioi.

Riga trigo cígimo fiénide raróciai z'ícua rafue

24 Iemo nane Jesús bie íaioi onoiga izóidifue llote:

—Monamo ite Juzíñamui illáimana illarui bie izoide. Dáamie ñuera íjiaí ie jacáfaimo rite. (Aféruillaído comini diga ráaniaí daane riñeno énenorie ritíaióí.) Bímie ie jacáfaimo jíaiena jaicuíñeno daa trigo rite.

25 Mei íadi naama ínia mei ie diga icíritimie trigo cígimo fiénide raróciaí rizáibite. Rillano oni jaide.

26 Afe trigo móonaillamona ímoiaí comuilla llezica riga fiénide raróciaí cíozite.

27 Afemona táijitafiregano jacafai náamamo llujáide: “Ocuíraima, o ritátaga caí ríganíai nibai ñuera. Mei afe cígimo fiénide ráitiaí ¿ninómona comuide?”

28 Jira afefai naama daide: “Níbai ninó cue diga icíritimie bie rizáibiga.” Mei jira afe táijitafiregamaci íena daide: “¿Afe fiénide ráitiaí caí áiruailleza meita airótatio?”

29 Mei afémie íaioina daide: “Dama íteza, aíñoñeno iri, mei afe fiénide ráitiaí aíñódiomoinia naa trigo diga aíñódiomoiza.

30 Dama trigo diga daane móonaiteza, aíñoñegania ñuera. Afe mei jofo ollíruimo, cue táijitafiregano óreitícue fueñe afe fiénide ráitiaí óllena. Afe uano afe ráitiaí jobaille eneno icútuaina maitátaitícue. Afe mei cue trígona éenoracomo éenotaitícue.”

Mostaza daína riga raa íjiaí rafue

(Mr 4.30-32; Lc 13.18-19)

31 Iemo nane Jesús bie jíaie onótaitifue llote:

—Monamo ite Juzíñamui illáimana illarui mostaza daína riga raa íjiaí izoide. Dáamie afe íjiaí ie jacáfaimo rite.

32 Uáfueza, afe íjiaí nana jíaie rífiregajiaí jofomo jéenide. Mei íadi móonailla llezica nana juzítotíai caifomo are zairide. Afe llezica caifo amena dínorí aillo zairide. Afemona áfena ícairuaimo feede ófocuíñuai jillaína nizáibitiaíoi, —daide. (Afe izóí Juzíñamuimo ínotino dúemaci íadi, jamánomo aíllomacina jébuioicaitiaíoi.)

Levadura daína pan fáitara rafue

(Lc 13.20-21)

33 Iemo nane Jesús bie jíaie onoiga izóidifue llote:

—Monamo ite Juzíñamui illáimana illarui pan aillo fáitate levadura izoide. Daa ringo daámani julleco harínana oruítajano, áfemo due jiza levadúrana tamede. Iemona nana afe iféllana mullétano oni aillo fáitate, —daide. (Afe izóí diga jíaimaci Jesumo ínuamona, Juzíñamuimo jaináidino aillo jébutiaíoi.)

Jaiai daináuai fuitállena Jesús íaiói onoiga izóidifuiaido comínimo úrite
(Mr 4.33-34)

³⁴ Nana bífuiái Jesús íaiói onoiga izóidifuiaido comínimo llote. Onótaitifue afémie llóñenia comínina nñie izói daiíñede.

³⁵ Jaiai Juzíñamui uai llóramá daina uai ñue ícoimo fuitállena, afémie daií llófuete. Afe be níuui: Onótatífuiaido jino úriticue.

Juzíñamui énie fínua llezícamaona figo ónoñegafuiái jino llóiticue.

Trigo cígimo comuide fiénide ráitíai ifue Jesús jino llote

³⁶ Afe mei Jesús nana comíni jino fíiano jofo eromo jaide. Afécomo Jesús llófuegamaci afémiemo jicánuaibítiaíoi:

—Jacáfaimo comuide fiénide ráitíai rafue caimo jino ñue llóiri, —daídíaíoi.

³⁷ Jira Jesús íaióina daide:

—Afe ñuera íjai ritímie jana Nanoide Hima Jitó Cristo.

³⁸ Afe jacafai jana bie énie. Afe ñuera rigájai jana Juzíñamui illáimana illáruimo jaináidino. Afe fiénide ráitíai jana Taifemo jaináidino.

³⁹ Afe fiénide ráitíai rizáibítimie dama Taife. Afe llizíllajiai jofo otá éenua jana énie fuillírui. Iemo afe llizíllajiai jofo otino jana Juzíñamui abí imaci.

⁴⁰ Ie mei afe fiénide ráitíai jobáillena oni eneno jóonia izói, afe izói énie fuillíruimo fiénidinomo zúite.

⁴¹ Aféruimo Nanoide Hima Jitó Cristo ie abí imaci óreite, jáimana fiénidifue finótatino eneno óllena, naa fiénidifue finódinori.

⁴² Afémacina iraimo dótaite. Afénomo iere éenaitiaíoi; iere izi cácaillamaona murímurítiaíoi.

⁴³ Ie mei Juzíñamui jitailla izói finódino íaiói Moo illáimana illíruimo jítoma uiéco meáire egáíñua izói íaiói maiñoca Juzíñamui ebíredifuenta jino cíotaitiaíoi. Omoí cacáacania, cacai.

Retáidoga ráifide raa jino onótaitifue

⁴⁴ Monamo ite Juzíñamui illáimaitagamacina íacadino bie izói fínoítiaíoi. Enie anamo ónonino retáidoga ráifide raa jénua izói fínoítiaíoi. Nñie monado daa come afe retáidoga ráifide raa baite. Bailla mei, abido dáanomo áfena retáidote. Afe mei jofomo ióbicana jaillano nana íemo ite raa fécajide. Raa fécajano oga úcubedo afe retáidua énie íbajide.

Perla daina iere ráifide zírjji jino onótaitifue

45 Nane daje izói monamo ite Juziñamui illáimaitagamacina íacadino perla jenoda fécafiredimie izói finoitiaioi. Afémie jicado jenode.

46 Iere ráifide perla daa ie baía, nana íemo ite ráaniai fécajano, ie ciona ráifidiji íbajide.

Chamu ora llóiji onótatífue

47 Daje izói nane monamo ite Juziñamui illáimana illarui, jóraimo dótafirega chamu ora llóiji izoide. Afe llóiji nana jiáiforiede chámuna ote.

48 Afe llóiji oruilla llezica, facódino oni fuédamo jainácana uite. Afénomo raináillano, ñuera chamu diga nizédiaioi. Fiénidino oni dótano ñuera chamu íaioi cirígaimo iráidiaioi.

49 Afe izói énie fuillíruimo comínimo íite. Juziñamui abí imaci billano ñuémaci fiénidimacimona oni eneno ofítaite.

50 Iemo fiénidinona iraimo óreite. Afénomo iere éenaitiaioi. Izi cácanamona murímuritiaioi.

Comue ráifide raa naa jácaie diga

51 Afe mei Jesús íaioina jicánote:

—¿Meita omoi nana bífuiaina onódiomoi? —daide.

Jira afémaci daidíaioi:

—Jii, Ocuíraima onódicaí, —daidíaioi.

52 Iemona Jesús íaioina daide:

—Cue ocuica uaina ñue llófuefiredimie, monamo ite Juziñamui illáimana illíruui dibénedo llófuia llezica bie izói íficaide. Aillue jofo naama ie éenoga ráamona comue raa jino úana onode. Iemo jiáíruido jácara raa mei íadi nai ñuera raa, jino úana onode. Afe izói afe ñue llófuefiredimie nana ie onóigafuiaimona cue cómfue naa jaiái lloga jácafue diga jino llúana onode, —daide.

Jesús Nazaret jófue mo jaide

(Mr 6.1-6; Lc 4.16-30)

53 Jesús nana bie jino ñue onótatífuiaí llua méifomo dama ie éniemo jaide.

54 Dúcizaillano afénomo ite Juziñamui uai llorácomo llófue. Aferi comini caimare fáigacaidiaioi. Daidíaioi:

—Bímie ¿ninómona diga ráfuiaina onode? Bie cíórainina raa ¿niie izói finode?

55 Bímie baie rabíciaimo táijifiredimie jitó. Ie ei María. Daje izói afémie ámatiaí Santiago, José, Simón, Judas benomo cairi íte.

56 Daje izói ie miríngotiaí cai cígimo itíaioi. ¿Mei ninómona nana bífuena onode? —daidíaioi.

57 Iemona afémie llógamo náfueacañediaioi. Mei jira Jesús íaioina daide:

—Nana jíaimaciai Juzíñamui uai llóramana jíeruitiaioi, mei íadi dama ie comuillano comíni íena jámairuitiaioi, daje izói naa ie jofe ero comíniri, —daide.

⁵⁸ Ie jira afénomo ciórainina raana aillo finóñede, mei afémaci afémiemo íinoñediaioiza.

14

Juan Bautista tilla

(Mr 6.14-29; Lc 9.7-9)

¹ Aféruillaído Galilea énie ocuídillaíma Herodes, Jesús jalléinana fidide.

² Fídiano ie díga itínona daide:

—Bímie tíllamona meine abído cáadímie Juan Bautista. Iemona afémiemo ciórainina raa finolle ríino ite, —daide.

³ Mei jaiaí nano Herodes Juaana maitá llavéracomo uitátate. Mei nauí Herodes ie ama Felipe ai Herodías dainango aina ote. Ua mei, Juan Heródesna ríire lletádeza. Ie lleta jira íena llavétate.

⁴ Juan daina uai be níie:

—O bie ríngo o ai izói uícainidio, —daide.

⁵ Daí daina jira Herodes Juaana fáiacade. Mei íadi comínina jacíruite, mei “Afe Juan Juzíñamui dibénedo úrifíredeza,” daidíaioi.

⁶ Afe méifodo, Herodes ie jocóinamona jíáie fimona fuilláruimo dúcide. Aféruído ie cumpleaños rafue fínua llezica, iráizillena llogano eróicana Herodías jiza bai zaizájide. Afengo záillana Herodes iere ebíruite.

⁷ Afena iere gáinamona Herodes ríirede uaido daide:

—Nínó o jícáacanana rairuíñeno íredicue, —daide.

⁸ Iemona afengo ei uícodo llua izói Heródena daide:

—Juan Bautista ifoci plátomo jóoneta cuemo ati, —daide.

⁹ Aferi ocuídillaíma Herodes zúucaide. Mei íadi uícodo ríirede uaido dainana nana iráizillena llogano cacádiaioi. Jira jíáfodo méidoñeno nano fueñe ie daina izói ocuide.

¹⁰ Iemona llavéracomo llaveca Juan ifócina jaitátate.

¹¹ Afe mei jáitano plátomo jóoniano aféngomo izájidiaioi. Afe méifodo afengo afe ifócina ie eimo ite, afengo Juan ua tíllana onóillena.

¹² Afe mei afe Juan díga jáicadino uillano ie abi raíájidiaioi. Afe mei Jesumo lluájidiaioi.

Jesús cinco mil comíni ecade

(Mr 6.30-44; Lc 9.10-17; Jn 6.1-14)

13 Jesús Juan fáajana fidíillano dama ruica táinomo nocaedo jaide. Mei íadi comini ie jáillana fidíillano naga jófuiaimona ie illánomo arido jáidiaioi.

14 Iemo Jesús afe nocáemona ari jailla llezica, diga comini ofíllana ciode. Cíoillano íaioimo dúecaide. Afémiemo atica iráredinuiaina jíllotate.

15 Ja nauízaila llezica ie llófuegamaci afémiena daiízaibitiaioi:

—Ja nauide. Benomo buna iñede. Nana comínina mai jófuego oreri, afe áinori ite dúegobiaimo íaioi güille íaioi íbajillena, —daiidiaioi.

16 Jira Jesús afémacina daide:

—Afémaci nai jáinidiaioi. Afémaci dani omoi eca, —daide.

17 Jira afémaci uai otíaioi:

—Cinco diga páaniai, íemo mena chamu afe baimo jáíena caimo iñede, —daiidiaioi.

18 Jira Jesús íaioina daide:

—Mai áfena cuemo ati, —daide.

19 Afe mei nana comínina daide: “Ráitiai emódomo ana omoi ráii,” daide. Afe llezica Jesús cinco diga páaniai mena chamu diga llínota, monamo érocaillano Juzíñamuina “Figora” daide. Daií daina méifodo Jesús afe pan ditada ie llófuegamacimo ite, afémaci nana comínimo fecállena.

20 Afe güillano nana comini ñue jeírediaioi. Íaioi güilla mei, güiga állana ie llófuegamaci doce cirigai oruítatiaioi.

21 Afe güitino cinco mil diga ííñiaí. Iemo afe baimo ringóniaí naa úruiaíri fácadoñega.

Jesús jainoi emódodo macade

(Mr 6.45-52; Jn 6.16-21)

22 Afe mei Jesús ie llófuegamacina daide: “Mai ífódino ruica enéferaimo nocaedo omoi jairi. Afe llezica bie comini ráinoiticueza,” daide.

23 Comini ráinua mei Jesús caifónedumo dama Juzíñamuimo úrizaide. Nauízaila llezica Jesús afénomo dama ite.

24 Afe llezica íaioi jailla nocáe bai dáaferaimo ite. Mei íadi jorai bagua meine íaioina ñuitáñuitade. Afe llezica jairifo meine íaioina fúuoide.

25 Como monáioicaidemo Jesús jainoi emódodo afémaci diné macácana jaide.

26 Afe jainoi emódodo jáillana cíoillano, caillíoidiaioi. “Jan-aba billa,” dainano iere jacínaitiaioi.

27 Mei íadi Jesús íaioina daide:

—Cueza, jacínaiñeno omoi iri. Abí omoi mame, —daide.

28 Jira Pedro afémiena daide:

—Ocuíraima, mei ónia, o illánomo mai jainoi emódodo cue mácata, —daide.

²⁹ Jira Jesús íena daide:

—Mai mei bi, —daide.

Iemona Pedro nocáemona ana jaillano jainoi emódodo Jesús diné macácana jaide.

³⁰ Mei íadi jairifo riire jáiñua cacáillano abi jácidote. Afe llezica afémie ja anábaiacade. Anábaioicailla llezica afémie caillide:

—¡Ocuíraima, iñédicueza, cue llíno! —daide.

³¹ Daí daina llezica, Jesús ónoído llínota daide:

—¡Níi o due íinua! ¿Níbái mei o íinogafuena fáicanocaidio? —daide.

³² Nocaemo caifo íaillinoi jailla llezica, afe jairifo llícaide.

³³ Iemona afécaemo itino, Jesús anamo dújuillano íena daide:

—Uáfuena, Juzíñamui Jitódioza, —daidíaioi.

Jesús Genesaret éniemo ite iráredino jíllotate

(Mr 6.53-56)

³⁴ Jorai ruica jáitajano Genesaret éniemo dúcidiaioi. (Afe énie jáífodo mameina Galilea.)

³⁵ Iemo afeno comini ñue afémiena onónamona, nana afénomo itígobiaimo conímana fidítatiaioi. Afemona afénomo ite iráredinuiaina Jesumo atídiaioi.

³⁶ Daa afémie inícuero fueda jetánollena izire jicádiaioi. Iemona nana ie inícuero fueda jetádino jíllodiaioi.

15

Cómena iaire fínode raa

(Mr 7.1-23)

¹ Afe mei dáarie Jerusalémona bite fariséuai naa ocuica uai llófuefiredinori Jesumo jicánuaibitiaioi:

² —¿Níbái mei o llófuegamaci cai uzútiai daina uaina oni caitáfirediaioi? Mei afémaci fiénidifue múiñua jana, nai güiñena llezica onoi jócuana finóñediaioiza, —daidíaioi.

³ Mei afe ibana Jesús íaioimo jicánote:

—¿Mei níbai omoi Juzíñamui riire ocuica uai oni caitáfirediomoi dani omoi jaiái daina uaimo náfuellena?

⁴ Mei Juzíñamui caina daide: “O moo o ei diga caimare omoi uícairi. Dámie ie moona ie ei diga íaire dáia, afémie tíiteza,” daide.

⁵ Mei jáífodo daífirediomoi. Dámie ie moona ie ei diga bie izói daífirediomoi: “Moo, ona canónidicue, mei nana cuemo ite raa Juzíñamui fecállena cue mamécaza.”

⁶ Iemo ninó dáamie daí dáidi, ie moo ie ei diga canolle afémieo dúñede, daí daífirediomoi. Daí omoi dánamona

Juziñamui ocuica uai jámairuitadiomoi, dani omoi jaijai daina uáillaímo náfuellena.

⁷ ¡Comeci diné ráatailla mei, abina ñue cíoidinodiomoi! Jaijai Juziñamui uai llóraíma Isaías ie cuegánícomo omoi dibénedo uáfodo úrite. Be afe uai:

⁸ Bie comini fia fue do cuemo ñúefue mamédaíoi, mei íadi íaioi come ci diné íáiredeza, cuemo jaináíñede.

⁹ Diga ebírede ráfuiaído cuemo caimátaídaíoi íadi, afe caimátaílla ráííñede, mei afémaci jíáímaci llófuia jamai come ocuica uáillaíza.

Isaías Juziñamui daináuai bie izói cuete.

¹⁰ Afe mei comini uáídota Jesús íaíoi na daide:

—Cacáillano ñue omoi onoiri.

¹¹ Come fue do jofo jaide raa afémiena íáiretañede. Mei jíáífo do come fuémona bite uai, afémiena íáiretate, —daide.

¹² Afe jira ie llófuegamaci Jesuna daíízaíbitiaíoi:

—¿Meita onódioza, o daina uáillaína cacáillano fariséuai ícírítiaíoi? —daídaíoi.

¹³ Mei íadi Jesús jíáífo do uai ote:

—Naga Juziñamuimo uáfue na jaináíñedímie monamo ite cue Moo ríñega raa izóidiaíoi. Afémaci come gáíñega riga raa naa jáinaori aíñólle izói táinocaitalliaíoi.

¹⁴ Afe baie fariséuai dama daíítadiaíoiíza; áfemo lloñeno. Mei afémaci uínidíno izóidíno. Iemo afe llezica jíáíe uínidíno ífódiaíoi. Uínidímie jíáíe uínidímie ífóadi, nágaíllínoi dáafomo báíítiaíllínoi, —daide.

¹⁵ Jira Pedro Jesuna daide:

—Bie uai jino caímo féinino llone, —daide.

¹⁶ Jira Jesús jícánote:

—¿Omoi jíái nai onóñnedíomoi?

¹⁷ ¿Onóñnedíomoiíza, fue do jofo jaide raa jébe goímo jaide; afe mei abímona jino faiga?

¹⁸ Mei íadi come fuémona jino bite uallaí ana comécimona comuide. Afe bie uallaí dama afémiena íáíruitade.

¹⁹ Mei diga íaífuiaí come comécimona comuide. Fieni come ci fácafuiaí comuide. Daje izói daje comécimona jíáíma fáiacanafuiaí comuide. Iemo jíáíma aí diga íacanafue come comécimona comuide, naa jíáíe íere jíruírenafuiaíri. Iemo jíái merírillaífuiaí come comécimona comuide. Daje izói táinona úrilla uallaí, naa jíáímana íáíre daináuallaíri come comécimona comuide.

²⁰ Afe bífuiaí cómena íere íáíruitanona orede. Mei íadi fiénidí fue múíñua jana onoi jócuana finóñeno dáamie güíadi, áfena cómena íaífueredímiena oréñede, —daide.

*Jicánemaci ringo Jesuna ñnote**(Mr 7.24-30)*

²¹ Afénomona Jesús oni jiáie éniemo jaide. Afénomo Tiro jofue Sidón jofue diga ite.

²² Afénomo Canaán énie ingo Jesús diné caillícana bite:

—Cai ocuífiredede jaiai illaíma David comuítagamie, cuemo dúecai. Cue jiza fiénide jóriai uícaigaza, iere duere zefuide, —daide.

²³ Mei íadi Jesús aféngona ñie izóí daiññede. Mei jira ie llófuegamaci íemo izire jícaibitiaioi:

—Mai ie uai fáirio, mei cai méifodo duere caillícana bíteza, —daidiaioi.

²⁴ Jira Jesús daide:

—Juzíñamui dani Israel náiraimona oni féiraite ovejai izóidino mameda cuena orede, mei afémaci Juzíñamui lloga uaillai jeire oñediaioiza, —daide.

²⁵ Mei íadi afengo Jesús diné billano afémie anamo dújude. Dújuillano aféniemo jicade:

—¡Ocuíraíma, mai cue cano! —daide.

²⁶ Jira Jesús aféngona daide:

—Uruiái izoide Judíuai ónoimona pan bairoda jicóniai izoide jicánemacimo illa fiénide, —daide.

²⁷ Mei afengo jaca nai daide:

—Cai Ocuíraíma, jii uáfueza, mei íadi jicóniai naama güigamona ana baiide íruiaina güífirediaioi, —daide.

²⁸ Mei jira Jesús aféngona daide:

—O íco iere ínotioza. Cuemo o jícaze, daií íteza, —daide.

Daií daina llezica afengo jiza jíllode.

Jesús aillo iráredinuiái jíllotate

²⁹ Afénomona Jesús oni jaillano Galilea jorai fuédado jaide. Afe mei caifónedu ícoimo ráizaide.

³⁰ Iemo afémie illánomo aillo comini gairilla. Afe jáidino diga jiáiforie iráredino uitiaioi. Aféniemo ídainidino atidiaioi, íemo uínidinuiái, íemo uáinidino, íemo ónoinidinuiái, íemo diga jiáie iráredino aféniemo atidiaioi. Dieze átiano Jesús anamo jóonetiaioi. Iemona afémie nana afémacina jíllotate.

³¹ Afe afémie fínuari comini caimare fáigacaidiaioi, mei eróidiaioimo uáinidino úritiaioiza. Iemo ónoinidino ñue jíllodiaioiza. Iemo ídainidino ñue macádiaioiza. Iemo uínidino ñue ciódiaioiza. Iemona Israel nairai Juzíñamuimo ñúefue nitádiaioi.

*Jesús cuatro mil dígade comini ecade**(Mr 8.1-10)*

³² Afe llezica Jesús ie llófuegamaci uáiduano daide:

—Bie comínimo dúecaidicue. Ja daruíamani benó cue diga itíaiõiza. Iemo íaiõ gúllena ja ñede. Afémacina íaiõ jofomo ecáñeno orécañedicue, io anamo íaiõ zafénaiza dáii, —daide.

³³ Iemo ie llófuegamaci íena daidíaiõ:

—Mei benomo comini jofue ñédeza, bie aillo comini ecállena ¿ninómona óiticaí? —daidíaiõ.

³⁴ Jira Jesús afémacimo jicánote:

—¿Omoimo niga páaniai ite? —daide.

Jira afémaci daidíaiõ:

—Siete diga pan ite íemo due chámuna ite, —daidíaiõ.

³⁵ Afe mei nana comínina: “Ana omoi ráii,” daide.

³⁶ Daí daina méifomo siete dígade panes naa chamu diga llínota, Juzíñamuina “Iere figura” daide. Afe mei ditada, ie llófuegamacimo ite, afémaci nana comínido fecállena.

³⁷ Afena nana güitíaiõ. Iaiõ güilla mei nana ñue jeírediaíõ. Afe mei íaiõ güiga állana siete diga cirigai oruítatiaíõ.

³⁸ Afe güitino cuatro mil dígadimaci. Afe baimo ringóniaí naa úruiaíri fácadõñega.

³⁹ Afe mei Jesús afe gairide comini rainode. Ráinua mei ana nocaemo jaillano oni Magdala éniemo jaide.

16

Fariséuai naa saducéuai diga ciórainina raa finóllena jicádaiõ
(Mr 8.11-13; Lc 12.54-56)

¹ Fariséuai naa saducéuai diga Jesumo eróizaidiaíõ. Iemo afémie fiéni facátallena monámona comuide ciórainina raana finótaacadiaíõ.

² Mei íadi afe llezica afémie jiáifodo uai ote:

—Nauíacana llezica mona jáirenia uire jiti ñue mónaite daífirediomoi.

³ Iemo jítiramo dibénemo mona jáire nairíadi, bie mona fiénite, daífirediomoi. ¡Comeci jáirena mei, jino abi diné ñue cíoidinodiomoi! Uire jítiramo ñue mona monaille llote raana ñue onódiomoi. Mei íadi birui omoi cígimo cue finoca onótatífuiaina onóñediomoi.

⁴ Biruido ite ñinoñede fiénidino ciórainina raana finóllena jicáfrediaíõ. Mei íadi nauí Juzíñamui uai llóraíma Jonásmo zúidífue íaiõ onótatífue. Afefue baimo jiáífueña llóñeilliaíõ, —daide.

Daí daina mei, afémacina fáicanocaillano Jesús oni jáinomo jaide.

Fariséuai taino llófirenafue levadura daina pan aillo fáitate raa izoide
(Mr 8.14-21)

⁵ Jesús llófuegamaci jorai ruícafenemo jailla llezica, pan féideza uññediaioi.

⁶ Afe mei Jesús íaioina daide:

—Ero, fariséuai naa saducéuaimo ite levadura daina pan aillo fáitate raa izóidemona abí omoi rairuiri, —daide.

⁷ Mei jira llófuegamaci dani conímana daidíaioi:

—Nibai pan cai atíñena jira afémie daií daide, —daidíaioi.

⁸ Jesús áfena comécido onóillano daide:

—¿Nibái mei páanidicai daidíomoi? ¡Omoi ico nai figo iñoñediomoi!

⁹ ¿Nauí cinco páaniai ditada cinco mil comini cue écamo jaca uíbcáiñediomoi? ¿Nai áfena ñue onóñediomoi? Aféruido fiébidinona ¿niga cirigai oruítatiomoi?

¹⁰ Iemo daje izói siete dígade páaniai cuatro mil comínimo cue feca mei ¿niga cirigai fiébidinona iráidiomoi? ¿Afemo jiái daje izói uíbcáiñediomoi?

¹¹ ¿Minícamo jizídiomoi levadúrado cue úrillana nai onóñena? Nauí fariséuai, naa saducéuaimo ite levadúramona abí omoi rairuiri cue daina uaina jamai paando úriñedicue; jiáifue lloticue.

¹² Afemona ie llófuegamaci ie dainana ñue onódiaioi. Pan aillo fáitate levadúramona abi rairuillana lloñédeza. Mei jiáifodo fariséuai naa saducéuai jino lloga taino llófuiamona abí rairuíredeza.

Pedro Jesús Crístona jino jaícina lote

(Mr 8.27-30; Lc 9.18-21)

¹³ Afe mei Filípomo dúide Cesarea éniemo Jesús dúcina llezica, ie llófuegamacimo jicánote:

—Cue Nanoide hima Jitódicueza. Afe dibénena ¿ñie izói comini daidíaioi? —daide.

¹⁴ Jira afémaci daidíaioi:

—Dámierie “Bie Juan Bautista” daidíaioi, jiáimaci “Bie Elías” daidíaioi, íemo nai jiáimaci “Nibai Jeremías, nibai jiáie Juzíñamui uai llóraima,” —daidíaioi.

¹⁵ Mei jira Jesús daide:

—Omoi ¿mei ñie izói cuena daidíomoi? —daide.

¹⁶ Jira Simón Pedro uai ote:

—Juzíñamui nizeca Cristo dainámiedio. Daje izói caade Juzíñamui Jitódio, —daide.

¹⁷ Jira Jesús afémie uai ote:

—Jonás jitó Simón, o iere ióbidio. Mei ailli o daina uai cómemona omo llóñegaza. Mei jiáifodo monamo ite cue Moo Juzíñamui omo lloga.

¹⁸ Ona Pédrodio dáitícue. Mei jae cuena o daina uai riírede oni dotánide nofici izóideza. Iemona afe bie riírede nofici izoide

uáitanide dáinamo cuemo ñnotinona comuítaiticue. Iemona titáfirede riino cuemo ñnotinona anáfenoneite.

¹⁹ Iemo jiái monamo ite Juzíñamui illáimana illano naze zuitáfirena llave izoide raa omo íiticue. Iemona bíniemo o rairuícafueña, daje izói monamo ráiruiteza. Afe izói bíniemo o ráiruínegafueña monamo ráiruíñelle, —dinori Jesús daide.

²⁰ Afe mei Jesús ie llófuegamacina Crístona ie íllana bumo jino llotátañede.

Jesús ie túille llote

(Mr 8.31-9.1; Lc 9.22-27)

²¹ Aféruimona Jesús Jerusalemo ie jáizaillena ie llófuegamacimo jino uáfodo llote. Iaiñoia daide: “Jerusalemo cue dúcille mei ocuífiredede écomini, naa lletáriraini illáiniri, íemo jiái ocuica uai llófuefiredinori nana iere cuena duere fñoitiaioi. Omoimo llotícueza cuena títaitiaioi, mei íadi daruíamani íllemona meine abido cáadimiena íiticue,” daide.

²² Afe jira Pedro Jesús bai uillano íena lletade. Daide:

—Ocuíraima cacai, Juzíñamui afe izói gáñede. ¡Aféfuiai jaca omo zúñeiteza! —daide.

²³ Mei jira Jesús oni gírecaillano afémiena daide:

—Satanás uícaigaoza. Cúemona oni jai; cue llótaidotioza. Juzíñamui comeci faca izói o comécina facáñedio. Jamai come comeci faca izói o comécina facádio, —daide.

²⁴ Afe jira Jesús ie llófuegamacina daide:

—Ninó dáamie cuedo jáiacania dama ie comeci jitáillana féitarede. Féitano cuedo jáirede. Afémie cuedo jailla ícoinia tíidena, afémie áfena izire ónide.

²⁵ Mei ninó dáamie ie cáananona rairuíacadimie áfena táinomo fáifitaite. Mei jiáifodo cue ícoinia ie cáananona táinomo fáifitimie afe fáifidena abido máíñoite, jaca ninomo zúñona ie íllena.

²⁶ Mei daa come nana bínie ráaniai aillo náamataadi, íemo afe llezica dama ie comeci afémie táinocaitaiadi, nana ie maiñoca ráaniai afémiena jillotañeite. Mei daa come ie comécina ¿nieze ibárede?

²⁷ Mei uáfueza, Nanoide Hima Jitódicueza. Cue Moomo ite ebíredinuiyai naa ie abi imáciri uire bíiticue. Iemona illa dígamie íaioi finócaza fécaiticue.

²⁸ Uáfueña ómoína dáíiticue, benó cue díga ítinomona dáarie nai tíñeitiaioimo illáimana cue bíllana cíoitiaioi, —daide.

17

Jesús abi jiáifo méidoficaide

(Mr 9.2-13; Lc 9.28-36)

1 Seis dígarui jailla mei, Jesús Pedro, Santiago, Juan diga uite. Dígamie dani eneno iere caifónedumo uite.

2 Afénomo íaiói eróicana ie abi jíáifo méidoficaide. Ie uieco jitoma izói queníficaide. Daje llezica ie incuiro jamánomo úzereficaide. Luz egáñua izói úzerede.

3 Afe llezica, Moisés, Elías, Jesús diga úrillana ciódiaíoi.

4 Jira Pedro Jesuna daide:

—Cai Ocuíraima, nii cai benó caimare cai illa. O jitáyadi daámani jofóchupi benó cai nilli; daa óochupi, jíáie Moisés ie, íemo jíáie Elías ichupi, —daíí daide.

5 Daíí Pedro úrioina llezica, iere quenírede mona ero uíllie, íaiói ferínocaiide. Afe uílliemona da uai cácaide. Afe uai daide:

—Bie iere cue izíruiga Jitó. Afémiemo omoi cacáreiri, —daide.

6 Afe uaina cacáillano ie llófuegamaci éniemo fueco diné bíjicaidiaíoi. Afémaci iere jacínaitiaíoi.

7 Afe méifomo Jesús íaióina jetánota daide:

—Jacíruiño caifo omoi náidacai, —daide.

8 Afemona érocaidiaíoi mo, ja buna cióñena. Dama Jesús ciódiaíoi.

9 Afe íduaimona fei íaiói billa llezica, Jesús afémaci ocuide:

—Bie omoi ciona rafue bumo lloñoeno iri. Nanoide fima Jitódicueza, tíllamona nai meine abido cue cáañeille dinó lloñoeno omoi iri, —daide.

10 Iemona ie llófuegamaci Jesumo jicánotiaíoi:

—¿Níabái mei ocuilla uai llófueraini Elías raire uícodo bírena, daíí firediaíoi? —jicánotiaíoi.

11 Jira Jesús uai ote:

—Uáfueña Elías fueñe bille. Billano naga ráaniaina ñue fínoite.

12 Mei íadi: “Elías ja bite” ómoína daídícue. Mei bimaci afémiena onóñediaíoi. Afémiena onóñenamona afémaci comeci óiacana izói afémiena finódiaíoi. Iemo birui Nanoide fima Jitódicueza, afe izói cuena duere zefuítaitiaíoi, —daide.

13 Iemona ie llófuegamaci, Jesús Juan Bautístado íaióimo úrite, comécido daídiaíoi.

*Jesús fiénide jóriai uícaiga jitócomena jíllotate
(Mr 9.14-29; Lc 9.37-43)*

14 Idumona ana comini illánomo bitiaíoi mo, dámie Jesús anamo dújuzabite. Dújuzabillano daide:

15 —Cai Ocuíraima, mai cue jitomo dúecai. Fiénide jóriai fena naillítafirede. Aferi afémie iere duere zefuide. Afémie diga ícaíño iraimo baíí firede; jíáiruido illemo baíí firede.

16 Benomo o llófuegamacimo cue atica, mei íadi afémaci afémiena jíllotanidiaíoi, —daide.

17 Jira Jesús uai ote:

—¡Aiii! ¡Níiena jamánomo ñinofinidiomoi! Nñuefueña jamairuitiomoi. Omoi ñue cue rairuüllena, ¿ñie dinó omoi cígimo íredicue? Afe jitócome cuemo ati, —daide.

18 Atia mei, Jesús afémiemo ite fiénide joríaí izire rairuide. Rairuüllano jino orede. Afe daií daina llezica, afe jitócome jíllobicaide.

19 Afe mei Jesús llófuegamaci bai eneno Jesús diga úrite; jicánotiaíoi:

—¿Mei nibái cai afe fiénide joríaí orénidicai? —daiíaiíoi.

20 Jira Jesús íaioina daide:

—Omoi nai figo ñinoñediomoiza, afe fiénide joríaí nai jino orénidiomoiza. Uáfueña ómoína dáitícue, ua due omoi ñinoiadi iere juáredifueña finórediomoi. Omoi ñinogafue mostaza iji jamánomo dúena izoide íadi, áfedo iere juáredifueña fínoitiomoi. Bie áillue caifóneduna “Oni jai” o daiíadi, afedu oni jíáinomo jáite. Uáfueña omoi ñinoiadi, jánaideza finónide raa ómoimo íñeite.

21 Mei íadi bie izoide fiénide joríaí dama cai güüllena güiñeno fímairillado íemo jíái Juziñamuimo cai úrillado jino orérede.

Jesús nane ie tílle dáanomo jino llote

(Mr 9.30-32; Lc 9.43-45)

22 Galilea éniedo íaioi macácailla llezica, Jesús ie llófuegamacimo ie tíllifuena íaioimo llote; daide:

—Nanoide fima Jitódicueza, nairai duere finóllena uillícue.

23 Afe mei cuena títaítiaíoi. Mei íadi daruiámani íllamona meine abido cáadimíena íitícue, —daide. Aféfuena cacáillano iere zúucaidiaíoi.

Juziñamuimo gairíracomo dúide úcube Jesús íbade

24 Jesús naa ie llófuegamaciri Capernaum jófuemo dúcidiaíoi. Dúcina llezica, Juziñamuimo gairíracomo dúide úcube jicáfiredino Pédro mo jicánuaidiaíoi:

—¿Omoi llófueraima afe raiñoca úcubena íbaiñete? — jicánotiaíoi.

25 Jira Pedro:

—Jii, íbaite, —daide. Afe mei Pedro jofa jailla llezica, Jesús fueñe Pédrona daide:

—Simón, ¿ómona ñie izói cíoide? Bínie illaini ¿ñie comínimo úcube jicáfirediaíoi? ¿Meita dani ie comínimo? ¿Mei jíáífodo jicánemacimo? ¿Ñie comínimo? —daide.

26 Jira Pedro:

—Jicánemacimo, —daide.

Íemo Jesús íena daide:

—Ie jira dani ie comini ibánidiaioi. Iemona afe ailli omo íaioi jicaca raiñoca úcube ibánidicue, zero ua? Jii, ibánidicue.

27 Mei íadi bu cai íciñeillena, áfena íbaiticue. Ie jira jóraimo jaillano fácuai. Fueñe riáibite chamu o oíri. Otá ie fue eromo daa úcubetuni báitioza. Afe úcubetuni cócomo jicaca úcube záitaiteza. Afétuni uano afémacimo o ibari, —daide.

18

¿Ñie come iere jamánomoina?

(Mr 9.33-37; Lc 9.46-48)

1 Aféruido ie llófuegamaci dáanomo gairíllano Jesumo jicánotiaioi:

—Monamo ite Juzíñamui illáimana illáruimo ¿ñie come iere jamánomoina? —daidíaioi.

2 Afemona Jesús daa jíiza uáiduano íaioi cígiri naidánete.

3 Dáií ñiano daide:

—Uáfueña ómoína daidicue, omoí illafue jamai comécina mánairede úrue illa izói méjorediomoi. Afe izói omoí íñenia jaca monamo ite Juzíñamui illáimana illánomo jofo jáiñeitiomoi.

4 Mei íadi bie úrue izoide dama ie abi jacire maméñedimie monamo ite Juzíñamui illáimana illáruimo jamánomoidimie. Iemo daje izói bie nífuenide úrue illáfueña dama ie illáfueña méidotimie, afémie jamánomoina.

5 Daa come cue mámecido bie izoide dúeza llíinoiadi afémie ja dáaruído cuena llínote.

Fiénidifuemo come baiílla iere jacírede

(Mr 9.42-48; Lc 17.1-2)

6 Ñie come daa bie izoide cuemo ínote dúeza fiénidifuemo baiítaiadi, afémie jamánomo duere finórede. Monáillaji iere afóredinomo ie cimomimo áillue nofici cuinada dotalle baimo ñuera.

7 Jáie comínina fieni finótaoicaidino jñi dúerena! Oni nibéfodo fiénidifuemo baiítifuijai jaca ífirede; mei íadi afémie afémaci fiénidifuemo baiíta ícoínia afémie jñi dúerena!

8 Iemona, o finócafuedo oni nibéfodo fiénidifuemo o baiíadi, dama o onoi jáitaja izói, afefue fínuana fáicanocairi. Daje izói ninó o jáillado fiénidifuemo o baiíadi, dama o idai jáitaja izói, afénomo jáillana fáicanocairi. Mei júbene onoi diga daje izói júbene idai diga izói o íllana zíñona illínomo o jáiadi iere ñuera, mei íadi nágafezi diga, comini duere finólliraimo o baiíadi iere figóñede.

9 Daje izói minícamo o eróillamona fiénidifuemo o baiíadi, dama o ují cuerónota oni jica dota izói, áfeniaino eróillana

fáicanocairi. Mei júbene uina fíidimie zíiñona illínomo o jáiadi jamánomo ñuera. Mei íadi mena ui diga comini duere finólliraimo o dotábiadi iere figóñede.

Oveja oni féiraila izoide rafue

(Lc 15.3-7)

¹⁰ Bie úruiaimona daaza jámairuiñeno omoi iri. Mei ómoína daidícueza, afémacimo uíñote Juzíñamui abi imaci, monamo ite cue Moo uíecomo jaca ífirediaioiza.

¹¹ Mei Nanoide fima Jitódicueza, oni nibéfodo féiraitino jíllotaibiticue.

¹² Omoimona ¿ñie izói comeci facádiomoi? Daa cómemo cien diga ovéjaiai ia, íemo afémacimona daa oveja féiraiadi, afémie afe noventa y nueve diga ovéjaiai ie cirínoracomo fiénocajte, afe féirajte oveja jénuaillena.

¹³ Afe féirajte oveja bailla llezica, áferi afémie jamánomo ióbide. Ua nana jáiae noventa y nueve diga féiraiñede ovéjaiai baímo, afe baiga féiraitimieri jamánomo ióbide.

¹⁴ Afe izói monamo ite Moo Juzíñamui bie dúezaiaimona jaca daa féiraitacañede.

Cai ámatiaimona dámie omo fieni íadi, afémiena caimare uáidorediomoi
(Lc 17.3)

¹⁵ O ama omo fieni úriadi, uái daií jaillano dama afémiemo úrizairi; afémie fieni illa afémiemo ñue lloiri. Afémie áfena náfueiadi, ja afémiena ñue cáimacaitadio. Afémie diga ñue nabáiritio.

¹⁶ Mei íadi afémie áfena náfueñeniadi o uai nábaitena mena come jíiriri. Afe mei afémiemo úrizairi, mei afémiemo nana nitácafuiái mena come nibai daámani come uai nabáifirenado záitarede.

¹⁷ Mei íadi afémie afémacimo cácareacañenia, Juzíñamuina íinote aillo dáanomo gairídinomo lloiri. Iemo afémie afémacina nai náfueñenia mai afémie Juzíñamuimo íinoñedimiena omoi mameri. Daje izói gobierno raiñoca úcube íairede jicáfiredinona omoi jámairuia izói afémiena omoi jámairuigamiena mameri.

¹⁸ Uáfueña ómoína dáititue, bíniemo nana omoi féitañega jáimaci fiénidifuiái, daje izói monamo féitañega. Iemo jááfodo bíniemo omoi féitaga jáimaci fiénidifuiái, afe izói monamo féitaga.

¹⁹ Nane dáanomo ómoína dáititue, ómoimona ménamie bie éniemo dájena mameda Juzíñamuimo jicáadi, monamo ite cue Moo ómicoi jica izói fínoiteza.

²⁰ Mei mena come, nibai daámani come cue mámecido dáanomo gairíadi, afénomo afémaci cígimo iticue, —daide.

21 Iemo Pedro Jesumo jicánote:

—Cai Ocuíraima, cue ama cuemo fieni ítena ¿nígacaiño caimare íena uáidoredicue? ¿Meita siete dígacaiño caimare íena uáidoredicue? —daide.

22 Jira Jesús uai ote:

—Siete dígacaiño daiñedicue. Mei jíáfodo jamánomo aillo dígacaiño íena caimare uáidoredio. Uafue jaca ninomo o ámana caimare uáidoredio, —daide.

Caimare uáidoiacañede táijitafiregamie izoide rafue

23 Jesús nai úrioicaide; daide:

—Ie jira monamo ite Juziñamui illáimana illirui bíniemo ite illaíma finócafue izoide. Aféllaíma nana ie táijitafiregano íemo ibáacaga raana záitaiacade.

24 Afe záitalle táinia mei daa táijitafiregamie illáimamo atídiaioi. Afémiemo jamánomo aillo iballe ite.

25 Mei íadi afémie úcubenide. Ie jira ie ocuídímie daide: “Mai bímie, ie ai naa ie úruiai riire ocuífirellinona feca, cuemo dúide ie ibárega raa záitalleza,” —daide.

26 Iemona afe táijitafiregamie ie ocuífiredímie anamo dújullano íemo izire jicade: “Cue Ocuídímie, cuemo járitaño. Fíaicana nana omo íbaiticue,” daide.

27 Iemo afe ocuídímie afémiemo dúecaide. Dúecaillano afémie ibárega raa íbatañede. Afe llezica ja afémiena rairuíño macátate.

28 Mei íadi afe táijitafiregamie oni jailla llezica, jíaie afémie izói táijitafiregamie baizájide. Afe táijitafiregamiemo fuéñeidimiemo íbállena due ite. Ie jira ie cimoi líinota íena títaite izói finode. Afe llezica daide: “Mai cuemo íbárega raa íba,” daide.

29 Iemona ie llaitádimie anamo dújullano íemo izire jicade: “Cuemo raire járitaño. Fíaicana nana omo íbaiticue,” daide.

30 Mei íadi afémie áfena náfueño llavéracomo íena llavétate, ie íbárega íbañelle dino.

31 Jíaie táijitagano áfena cíoillano, iere zúucaidiaioi. Iemona nana afe llezica íficaillafuena íaioi ocuídímiemo lluájidiaioi.

32 Iemona ocuídímie nanóidímiema jíritade. Jírillano íena daide: “Iere fieni táijitafiregamiedio. Mei izire cuemo jicádioza, nana cuemo o íbárega raana dinó fáicanocaidicue.

33 Omo cue dúecailla izói, daje izói o nabaimo dúecairedio,” daide.

34 Afe jira afe ocuídímie iere ríicaide. Ríicaillano ie nabaimo dúecaíñedímiema riire duere finótate, nana ie íbárega íbañelle dino.

35 Bie izói dáinado Jesús ie úrillana záitate. Daide:

—Hlla dígamie comécido ñue ie ámana uáidoñenia monamo ite cue Moo afe izói ómoína duere fínoite, —daide.

19

Iima ie ai dótajado Jesús lletade

(Mr 10.1-12)

¹ Jesús bie uaido úrilla méifomo Galilea éniemona jaide. Jaillano Jordán imani ruícafellemo ite Judea éniemo dúcide.

² Díga comini Jesudo jailla, íemo afénomo aillo iráredinuiaína jílloate.

³ Afe mei fariséuaimona dámierie Jesús zanóllena facátaibitiaioi. Afémiemo jicánotiaioi:

—¿Meita daa come ie áina fia come comeci dáinamona dotárede? Afe izoide ¿meita rairuírede? —daidiaioi.

⁴ Jira Jesús uai ote:

—¿Jaiái Juzíñamui Cuegáuaina facádoñediomoí? Afénicomoe bie izói llote. Fueñe comini comútatimie ringo iima díga finode.

⁵ Nane dáanomo daide: “Bie izóidemona dáamie ie moo ie ei díga fáicanocaite, afe ie ai díga dájena íaillinoi íllena. Iemona afe íaillinoi daade come izói íite.”

⁶ Afemona ménañedeza, daade come izoide. Ie jira jae Juzíñamui daade come finócaza, comini oni eneno dotánide, —daide.

⁷ Mei jira jicánotiaioi:

—¿Iemo nibái mei Moisés lloga uaimo áina dotárede daide? Dótaitimie ie dotaca aimo cuegábena írena. Afébena aféngomo íllano, afémie aféngona dotárede, —daide.

⁸ Jira Jesús íaioína daide:

—Mei afe omoi comeci íinoacañenamona Moisés omoi ai dotállena rairuíñede. Mei íadi nanómona daíí mámeñega.

⁹ Cue ómoína dáitícue, daa come ai jiruíreiñeniadi dotáadi, jáie ringo óiadi afémie fiénide jiruifue finode. Daje izói oni dotácango otímie jiruifue finode, —daide.

¹⁰ Iemona ie llófuegamaci íena daidiaioi:

—Mei o lloga ringo iima nabaina jaca íadi, ua ráfueza, ¿meita áireiñeno fia cai jáicaille iere baimo ñuera? —daidiaioi.

¹¹ Jira Jesús íaioína daide:

—Nana comini bífuena ónonidiaioi. Dama Juzíñamui onótallino bífuena ónoite.

¹² Íñiaimona dáamierie áina ónidiaioi. Dáarie fiene jocóinamona áina ónidiaioi. Jáimíai comínimona finócari áina ónidiaioi. Iemo jáimíai Juzíñamui illáimana uai llócaillena jaca áina oñediaioi. Bie uai jeire óredimie jeire óiteza, —dinori Jesús úrite.

Jesús úruiai ñue illena finode

(Mr 10.13-16; Lc 18.15-17)

13 Afe mei úruiai Jesumo atídiaioi, ie onoi afézaímo bítano afémie Juzíñamuimo afémacido úrillena. Mei íadi ie llófuegamaci úruiai atídino rairuide.

14 Mei jiáifodo Jesús daide:

—Dama úruiai cue dine bíteza; afémaci rairuíño omoi iri. Mei monamo ite Juzíñamui illáimana illáruimo jáitino bie úruiai izóidiaioi, —daide.

15 Jesús afe úruiaímo onoi bítano íaioina ézicite. Eziciano oni jiáigobemo jaide.

Ráarede jitócome Jesús diga úrilla

(Mr 10.17-31; Lc 18.18-30)

16 Iemo jiáiruido daa jitócome Jesumo úrizaibite. Dúciillano íemo jicánote:

—Ñuera llófueraíma, zíiñoa cue illino cue maiño llena ¿nie ñúefue fínoiticue? —daide.

17 Jesús íena daide:

—¿Nibái mei cuena ñúemiedio daidio? Dama Juzíñamui ñuena. Abi diné jiáie ñúemiena íne. Mei jiáifodo zíiñoa illínomo o jáiacania, Juzíñamui cai ocuilla uai jeire o oíri, —daide.

18 Jira afe jitócome íena daide:

—¿Nee mei aféuai? —daide.

Jira Jesús afémiena daide:

—Jáimana titáño iri. Jiruíreño iri. Meríreño iri. Jiáie cómemo taino lloño iri.

19 O moo o ei diga caímare jacírui. O abina o izíruilla izói, o jiáie cómena o izírui, —daide.

20 Jira afe jitócome íena daide:

—Nana bífuiaína jízananomona jeire oticue. ¿Afe baimo ní fue nai cuemo fiébilla? —daide.

21 Jira Jesús íena daide:

—Nífuenino comécina jaícina jóidimie o íacania, mai jaillano omo ite ráaniai o fecari. Fécano afe iba úcube dúredinodo fecari. Afemona monamo ite zíiñoa ráifide raa óiena íteza. Afe nana o fecalle mei, mai cuedo bi, —daide.

22 Mei íadi afe jitócome Jesús daí dái nana cacáillano abido zuure jaide, mei afémie iere ráaredeza.

23 Iemona Jesús ie llófuegamacina daide:

—Uáfueña ómoína dáiticue, iere aillo ráaredimie mei íadi ie ráaniaína cue baimo afémie izíruiadi, iere férede Juzíñamui illáimana illíruimo jáillena.

24 Nane dánomo dáiticue, caméllona mameide áillue rille eedo uífodo enéfemo jailla juánide, mei jiáifodo aillo ráaredimie

Juzíñamui illáimana illíruimo jaille iere juárede, mei ie ráaniai cue baimo afémie izíruiteza, —daide.

²⁵ Ie llófuegamaci áfena cacáillano iere fáigacaidiaioi. Iemo dani jofo conímaiaimo jicánotiaioi:

—Iemona ¿níimie jíllorede? —daidíai.

²⁶ Jesús íaioimo eróicana daide:

—Comínimona bie izóidifue finónide, mei íadi Juzíñamuimona nana finórede.

²⁷ Iemona Pedro íena daide:

—Cai Ocuíraima, caimo ite raana nana fiénocaillano odo ja jáidicai. Iemona mei ¿minica máiñoiticaí? —daide.

²⁸ Jesús íaioina daide:

—Uáfueña dáitícue, uire jíáiruido naga ráfuiái cómfuiaina jáite. Aféruimo Nanoide íima Jitódicueza ebírede illaíma ráiiranomo ráitícue. Afe llezica omoi cue díga jáicana jira, doce dígade illaíma ráiiranomo ráitíomoi. Afénamona doce dígade Israel náiraiái ñue jáicina jicánoitíomoi.

²⁹ Iemo cue ícoínia naga jofona fiénocaidimie, daje izói ámatiaí naa ie móotiaíri fiénocaidimie, daje izói naa úruiaíri fiénocaidimie, íemo jíái ie illano zóofenocaidimie, afémaci cien dígacaiño ibálliaioi. Daje llezica afémaci zíiñona illínona máiñoitiaioi.

³⁰ Mei íadi birui aillo uícoficaidino aféruimo óodaficaite. Daje izói birui aillo óodaficaidino uícoficaitiaioi.

20

Jírícoremo oreca táijiraini izoide rafue

¹ Monamo ite Juzíñamui illáimana illíruí jírícore naama finoca izoide. Afémie jítiramo raire ie táijiramaci jénuaide, ie jírícue óllena.

² Afémie ie táijiramaci ibállena afémacimo jaícina llote: “Daarui táijina iba dieze úcube illa dígamiemo íbaitícue,” daide. Daí dainano ie jacáfaimo táijillena orede.

³ Afe mei jítoma nuévemo ítemo oni gairíranomo jíáie táijitino jénuaide. Afe gairíranomo dáarie táijíñeno itino baite.

⁴ Iaioina daide: “Mai batí cue jacáfaimo táijizairi. Nauife dibénemo óomimo ñue íbaitícue,” daide. Iemo afémaci dinomo táijizaidiaioi.

⁵ Afe jacafai naama jítoma jaíciri ítemo meine nane jíáie táijitino jénuaide. Daje izói nane nauife dibénemo jénuaide.

⁶ Iemo nane ja nauízaidemo ocuídime gairíranomo jíáie táijitino jénuaide. Dinomo jíáie táijíñedino baizájide. Iaioina daide: “¿Níbái mei omoi nágarui táijíñeno benó ífiredíomoi?” daide.

7 Jira afémaci íena daidíai: “Mei bu caina táijitañede,” daidíai. Iemona afémie íaiina daide: “Omoi daje izói cue jacáfaimo táijizairi. Iemona ómoimo dúide dieze ñue íbaiticue,” daide.

8 Ja nauídemo, jacafai naama táijitagano úiñotimiena daide: “Mai táijidino dáanomo uáiduano iba. Iirainomo jáidino fueñe ibari, íemo nano fueñe jáidino méifodo ibari,” daide.

9 Iemona nauízaiacademo jáidino dúcidiaí. Afémacimona illa dígamie ñue íai: táijina iba llínotiaí. Daa denario daina úcube illa dígamie llínotiaí.

10 Afe mei nano fueñe táijizaidino ducina llezica, “Jíáimaci baimo aillo úcubena llínoiticaí,” daí comécido facádiaí. Mei íadi nana illa dígamie dájerize daarui táijina iba dieze úcube llínotiaí.

11 Úcube llínua llezica, ocuídime ríicaidiaí.

12 Iena daidíai: “Bie íirainomo dúcidino daa hora táijidiaí. Mei íadi daa cai o íbaze íaiina íbáido. Cai náamonaze uzíredemo táijidicaí,” daidíai.

13 Mei íadi afe ocuídime íaiina daide: “Omoi cacai. Omoimo fieni íñédicue. Fueñe cai úrilla llezica ¿ómoimo dáaruina táijina iba dieze úcube íbaiticue daíñédicue? Jii, daidicue. ¿Afe llezica áfena jíeruiñediomoi? Uáfueza, jíeruitiomoi.

14 O táijina iba llínota, mai jai. Bie íirainomo dúcidinona daa o cue íbaze íbáacadicue.

15 ¿Meita cue úcube cue dotáacana dieze dotánidicue? ¿Meita jíáimie cue dúcaillano aillo cue fécarí úraddio?” dínorí ocuídime úrite.

16 Afe izói fueñeidino óodaficaitiaí, íemo jíái óodaidino uícoficaitiaí. Mei uafue, jíirigano aillo ite, mei íadi nizécano dúemaci, —dínorí Jesús daide.

*Jesús nane dáanomo ie tíille llote
(Mr 10.32-34; Lc 18.31-34)*

17 Jerusalén iodo Jesús jailla llezica, doce dígade ie llófuegamaci bai eneno uillano daide:

18 —Birui omoi ciona izói Jerusalemo jáidicaí. Daje izói Nanoide íima Jitódicueza onódiomoi. Afénomo lletáriraini illaíma, naa ocuica uai llófueraini cue titállena mámeitiaí.

19 Mámiano onínemacimo cuena fécaítiaí, cue íai: jífánodoillena. Daje izói ráziado cuena fáítiaí. Afe mei cuena cruzmo córaítiaí. Mei íadi daruiámani íllemona meine abido cáadimiena jáiticue, —daide.

*Santiago Juan díga íaillinoi ei Jesús díné daa rafue jícánuaíbite
(Mr 10.35-45)*

²⁰ Afe mei Santiago Juan diga íaillinoi ei Jesuna daiízaibite. “Mai cuemo dúecairi,” daide. Bíaillinoi moo Zebedeo. Afengo naa afe íaillinoiri Jesús anamo dújuzaibitiaioi.

²¹ Jira afémie aféngona jicánote:

—¿Minica óiacadio? —daide.

Jira afengo daide:

—Ílláimana o illíruimo dúcille llezica, cue jitó íaillinoimona dáamie o nabézimo rainari, íemo jíaimie o jarífezimo rainari, —daide.

²² Jira Jesús íaioina daide:

—Omoi cuemo jicaca raana nai figo onóñediomoi. ¿Meita duere cue zefuille izóí zefuírediomicoi? Cue duere íaioi finolle izóí ¿meita ocuírediomicoi? —daide.

Jira afe íaillinoi: —Jii, —daide.

²³ Iemona íaillinoina daide:

—Iere uáfueza. Duere cue zefuilla izóí duere zéfuitiomicoi. Daje izóí cue duere íaioi finua izóí afe izóí duere finólliomicoi. Mei íadi cue nabezi, cue jarífezimo ómicoi ráinaille cue daiínidicue. Dama cue Moo úcodo mamécamie ráiirena, —daide.

²⁴ Jíáie diez dígade ie llófuegamaci afe jicánuana cacáillano, afe íaillinoimo ráicaidiaioi.

²⁵ Iemona Jesús dáanomo nana íaioi uáiduano daide:

—Onódiomoiza náiraiai illaini íaioi úiñoganona ocuíofirediaioi. Iemo íaioimona iere ocuídillaini afémacimo ite ríinodo iere jacire ocuífirediaioi.

²⁶ Mei íadi omoi cígiri daií íñeite. Mei jíáfodo ómoimona jamánomoidimiena íacadimie, omoi anamo tájidimie izóí írede.

²⁷ Daje izóí ómoimona uícofiacadimie omoi riire ocuícamie izóí írede.

²⁸ Afe izóí Nanoide hima Jitó omoi cígimo ite. Mei jii, jíáimaci cuena canóllena biñédicue, mei jíáfodo nana comini cánuabiticue. Uafue aillo comini íaioimo ite fiénidifuiái oni dóllena tíizaibiticue, —dinori Jesús úrite.

*Jesús mena uínidimie jíllotate
(Mr 10.46-52; Lc 18.35-43)*

²⁹ Jesús naa ie llófuegamaciri Jericó jófueмона jino jailla llezica, diga comini afémiedo jáidiaioi.

³⁰ Jáidiaioimo afe io abimo mena uínidimie ráidiaillinoi. Ja Jesús afe íaillinoi abido jáizaillana cacádiaillinoi; cacáillano riire daidiaillinoi:

—Ocuíraima, jiaia illaima Davidmona comuítagamie mai cócomo dúecai, —daidiaillinoi.

³¹ Jira comini íaillinoína rairuídiaoí. Afe íaillinoína, “Uriñeno, llícaí,” daidíaoí. Mei íadi afe íaillinoí llícaíñeno jamánomo caillíoidiaillinoí:

—Ocuíraíma, jaíai illaíma Davidmona comuítagamie, mai cócomo dúecai, —daidíaoillinoí.

³² Jira Jesús mózide. Mózillano afe íaillinoí jíirillano jicánote:

—¿Nie izóí jitáidiomicoí afe izóí ómicoí cue finóllena? —daide.

³³ Jira afe íaillinoí uai ote:

—Ocuíraíma, cióacadíococo, —daidíaoillinoí.

³⁴ Jira Jesús afe íaillinoímo dúecaillano, íaillinoí ui jetade. Jeta llezica ñue ciódiaillinoí. Afe mei Jesúoíri jáidiaillinoí.

21

Jesús Jerusalemo jofo jaide

(Mr 11.1-11; Lc 19.28-40; Jn 12.12-19)

¹ Ja Jerusalemo áinozidiaíoímo, Betfagé duera jófuemo dúcidiaoí. Afe jofue Olivo daína idu áinori ite. Aféno mona Jesús ie llófuegamacimona ménamie orede.

² Oriano íaillinoína daide:

—Baie ómicoí uícomo ite duera jófuemo ómicoí jai. Aféno mo cuinaca búrrana cíoitíomicoí, naa ie úrue diga. Afe zuitada cuemo atíri.

³ Aféno mo comini jáífodo dáíiadi, “Cai Ocuíraíma jitáillano jicácaza; bie búrrana raire abido omo óreite,” daíri, —Jesús daide.

⁴ Bífuaí íficaide jaíai Juzíñamui uai llóraini cuega uai ñue ícoímo fuitállena. Afe uai daide:

⁵ Jerusalena mameide jofue comínina daíri:

“Ero, o illaíma comécina mánaidímie izóí billa.

Burra emódomo ráicabite.

Afe méere de raa abífirede burra úrue emódodo bite,” —daide.

⁶ Afe mei ie llófuega íaillinoí jaillano Jesús íaillinoí ocuilla izóí finódiaillinoí.

⁷ Afe burra naa ie úrue atídiaillinoí. Atiano íaíoi inícuirona afe búrrana jobédiaoí. Afe mei Jesús afe emódomo ráinazaide.

⁸ Afe llezica aillo comini Jesús jáillao inícuirona jobédiaoí. Jáímaci rafóruai jáitajano íemo jobédiaoí.

⁹ Dáarie Jesús uícodo jáidiaíoi; jáímaci óodana jáidiaíoi. Nana dajé izóí riire úritiaoí:

—Jaíai illaíma Davidmona comuítagamíemo ñúefue mai cai daíilli. Juzíñamui mámeceido bitímie caimare íiteza. Juzíñamuimo ebíredífue cai mamelli, —daidíaoí.

¹⁰ Jesús Jerusalemo jofo jailla llezica afe jofue comini diga rafue júfidotiaoí. Diga comini afémie dibénedo jicánotiaoí:

—¿Bie bu? —daízítiaoí.

11 Jira jáimaci daidíai:

—Bímie Galiléamo ite Nazaret jofue ímie. Afémie Jesús, Juzíñamui uai jino llórama, —daidíai.

Jesús Juzíñamuimo gairíracó ráfua izóí ñue finode
(Mr 11.15-19; Lc 19.45-48; Jn 2.13-22)

12 Afe mei Jesús Juzíñamuimo gairíracó como jofu jaillano, afeco eromo ite ráaniai fecádino naa íbároidinori jino jiude. Afénomo ite úcube méidofiredino táijinabani Jesús oni cáicoide. Daje izóí fíicirillai fecádino íaiói ráiracuai Jesús oni cáicoide.

13 Afémacina daide:

—Juzíñamui Cuegáuai daide: “Cue jofu daa cuemo úrifireracona íte.” Mei íadi biconá merírifiredino jofu izóí finódiomoi, —daide.

14 Afe Juzíñamuimo gairíracó como Jesús illa llezica dáarie uínidimíai, naa ídainidino Jesumo bitíaiói. Afémie afémacina jíllotate.

15 Mei íadi lletáriraini illaini, naa ocuica uai llófuetinori Jesús uaido dánamona comúdena cíoillano ríicaidiaíói. Daje izóí afe gairíracó eromo ite úruiai Juzíñamuimo caimátailla uai cacáillano bimaci iere ríicaidiaíói. Mei afe úruiai daidíaiói: “Jaíai illaíma Davidmona comútagamie iere ebíredeza,” daidíaióiza.

16 Jira bimaci ríicaillano Jesuna daidíaiói:

—¿Baie úruiai úrillana cacáñedio? —daidíaiói.

Jira Jesús íaiói uai ote:

—Cacádícue. ¿Bie rafue úrilla cúeina uaina facádoñediomoi? Afe jaíai David dáina uai Juzíñamuina bie izóí daide: Uruiai ebire ñúefuena óiena jae rotátatio, —afe daí Jesús íaióimo lloste.

17 Afe mei ie jícanotínona fáicanocaillano Jesús oni Jerusalémona Betania jófueмо íniaide.

Jesús llizíñede higuera dáina amena faidode
(Mr 11.12-14, 20-26)

18 Afe jítiramo Jesús meine Jerusalemo bítemo iere júfínaite.

19 Afe ío abiri higuera dáina aménana cíode. Jesús afénomo áinozide, afena llizilla ríellena. Mei íadi llizíllajíina íñédeza, daa íe íbiaina cíode. Mei jira Jesús afe higuérana daide:

—Jacá benómona llízíñeítio, —daide.

Daí dáina llezica afe higuera dúide.

20 Íe llófuegamaci áfena cíoillano fáigacaidiaíói. Íemo Jesumo jícanotiaíói:

—¿Ñie izóí íte bie higuera amena raire dúilla? —daidíaiói.

21 Jesús íaiói uai ote:

—Uáfueña ómoína daidícue, ua o ñnoiadi daa bie aménamo cue fínua izói finórediomoi, íemo jiái afe baimo aillo finórediomoi. Bie caifóneduna “Caifo áijicaillano oni monáillaimo báizai” o dáidiadi, afe bie caifónedu o uai jeire uano, oni dinomo baízai.

²² Juziñamui omoi úrilla llezica, ua o ñnoia nana omoi jicácana ñue llñnoitiomoi, —daide.

Illáicomini Jesús ocuífirena ríino jicánotiaioi

(Mr 11.27-33; Lc 20.1-8)

²³ Afe mei Jesús Juziñamui gairíracomo jofo jaide. Jaillano afénomo llófuemarite. Afe llezica lletáriraini illaini naa judúuai eicomíniri Jesumo jicánuaidiaioi:

—¿Nié ríinodo o raana finófredio? ¿Afe ríino bu mei omo fecaca? —daidiaioi.

²⁴ Jira Jesús íaioi uai ote:

—Cuemo omoi jicánua izói, ómoimo daafue jicánoiticue. Cue jicánolle uai ñue omoi óiadi, bie raa cue fínua ríino ómoimo llóitícue.

²⁵ Mei Juan ¿bu comini báutizallena ocuica? ¿Meita Juziñamui ocuica? ¿Mei ñibai comini ocuica? —daide.

Mei íadi uai oñeno, áfena dani conímamo júfidotiaioi; daidiaioi:

—Juziñamui ocuica cai daíadi, Jesús caina dáite: “¿Ñibái mei afémiena ñnoñediomoi?”

²⁶ Mei jiáifodo, comini ocuica, cai daíadi, comínina jacíruiticai; mei nana comini “Juan Juziñamui dibénedo úrifirede” daidiaioiza.

²⁷ Iemona bie izói Jesuna daidiaioi:

—O jicánoga jaca onóñedicai, —daidiaioi.

Jira Jesús íaioina daide:

—Daje izói bie raa cue fínua ríino ómoimo llóñeiticue, —daide.

Mena jitó íaillinoi illa izoide rafue

²⁸ Daí daína mei, Jesús íaioina daide:

—Bíena ¿nie izói daidíomoi? Daa iima mena jitórede. Iaillinoi moo dámierna daide: “Cue jitó, mai cue jíricore illánomo táijizairi,” daide.

²⁹ Afe jitó uai ote: “Jáiacañedicue.” Mei íadi afe mei ie comeci jiáifodo fácano, afénomo táijizaide.

³⁰ Afe mei afe moo jiáie jítomo úrizaide. Daje izói íena daide. Iemo bie jiáito íena daide: “Jii, táijizaiticue.” Mei íadi afémie táijizaiñede.

³¹ Meita bie ménailinoimona ¿nie jitó ie moo jítánana fínua? —daide.

Jira íena daidiaioi:

—Nanóidimie, —daidíaiOi.

Jira Jesús íaiOina daide:

—Uáfueña dáitícue, gobierno jicátáfirega úcube llínnotino, naa ímamo jiruífírede ringóniari naa jíáie afe izoide fiénidino Juziñamui illáimana illánomo raire omoi úcodo jáitíaiOi.

³² Mei nauí Juan Bautista ñue omoi íllena llófuiabite, mei íadi áfena íñoñediomoi. Mei jíáifodo afe úcube llínoraini naa jiruíredingotíari ie dáinana ínotíaiOi. Mei íadi omoi baimaci comeci ífue méiduana ciódiomoi íadi, afémiemo ínollena omoi comeci itífuiaina méidoñediomoi, —daide.

Fiénide táijinamaci izoide rafue

(Mr 12.1-12; Lc 20.9-19)

³³ Mai bie jíáie ráfueño omoi cácarei. Jacafai naama jíricojíai éroide úvaíai rillino finode. Fínuano afeno nágafene cirínote. Cirínuano afe úvaíai zaizillico finode. Afe llezica caífo jica tígicaco nite nana afe rigániaimo ñue rairuílleña.

Afe mei afémie afécaie ie úíñotimacimo fecade, ie biñena dino. Afe dígamona íemo íbádiaiOi. Daí fécano afémie jíáie éniemo jaide.

³⁴ Afe mei úvaíai llizille llezica, ie ocuífíregano orede, náamamo dúide díbene jicállena.

³⁵ Mei íadi afe táijidino jacafai naama orécano llaitádiaiOi. Lláitano dáamiena rázido fatíaiOi. Jáimiena titádiaiOi, íemo jíáimiena nófiema níjidíaiOi.

³⁶ Te mei jacafai naama nane jíáie ocuífíregano orede. Nano fueñe ória baimo orede. Mei íadi afénomo táijidino daje izói nane nana afémacina fiéni finódíaiOi.

³⁷ Iiraínomo afe jacafai naama ie jító orede. “Afémiena níbai caimare náfueitíaiOi,” daide.

³⁸ Mei íadi naama jító bíllana cíoillano afe táijidino conímana daidíaiOi; “Bímie bie énie uire máíñoitimie. Mai cai falli. Afe mei bie énie daní cáieiteza,” daidíaiOi.

³⁹ Afe mei afe jító llaitádiaiOi. Lláitano jacafai baimo uillano íena titádiaiOi.

⁴⁰ Mei jira Jesús jicánote:

—Afe jacafai naama billa llezica, afénomo táijidinona ¿ñie izói níbaite? —daide.

⁴¹ Jira íena daidíaiOi:

—Afémie afe táijitatinomo dúecaíñeno íaiOina títaite. Afe mei jíáie ñue táijidinomo ie énie nano íanori fécaite, mei náamamo dúina díeze llizíllaji raire afémiemo izájífireitíaiOiza, —daidíaiOi.

⁴² Jira Jesús daide:

—¿Cue dibénedo Juzíñamui Cuegáuaina jaca facádoñediomoi?
Aféuai bie izói daide:

Jofo níraini jámairuillano oni fádoica jáillirai ja ñuera jáillirai
izóidena jaide.

(Bie daíacade comini jámairuillano ruifíruigamie ja ñuera jica
jalleide illáimana jaide.)

Bie cai Moo Juzíñamui finoca.

Afue iere caimo ebire cacaide.

⁴³ Mei íadi ómoína daíticue, Juzíñamui illáimana
ómoimona oni bairolle. Afe mei Juzíñamuimo duide dibene
ízafiredinomo ie illáimana fécaite.

⁴⁴ Iemo afe nofici dainámie mo écitaitimie niné tibérotaitie.
Iemo afe nofici jáimie mo baiíadi jízefo izói afémiena finoite,
—daide.

⁴⁵ Lletáiriraini illaini naa fariséuairi Jesús afe izoide ráfui
llúana cacáillano daidíai, “Afémie ico caido úrite,” daidíai.

⁴⁶ Iemona afe Jesuna llaitáacadiaí, mei íadi comínina
jacíruillano llaitáñediaí. Mei nana comini, “Jesús Juzíñamui
dibénedo úrite,” daidíai oiza.

22

Airena llezica finoca ráfue mo mameca uai

¹ Jesús nane dáanomo úrizaide. Afémie jáífue mo mameca
uaido úrizaide. Iaióna daide:

² —Monamo ite Juzíñamui illáimana illirui bie izoide.
Illaíma ie jító áirena llezica rafue finua izoide.

³ Ie ocuífregano orede, naui uícodo llogano jírillena. Mei
íadi afe uáidogano bíacañediaí.

⁴ Ie jira afémie jáíe ocuífregano dáanomo orede.
Uáidoganona bie izói daíri daide: “Íráiziñi güille ja nana ñue
uédeza. Farede juráreto fatícueza. Ja nana ñue finócaza. Airena
ráfue mo mai nana omoi biri.”

⁵ Mei íadi áfemo iráizillena llogano náfueñediaí.
Afémacimona dáamie ie jacáfaimo jáizaide. Jáímie ie ráaie
oni fécajide.

⁶ Jáímaci illaíma oreca jírizaidino llaitádiaí. Lláitano
íaióna duere finoda titádiaí.

⁷ Jira afe illaíma iere rícaide. Rícaillano ie úíñote fuiríraini
orede, ie orécano fatino titállena; afe llezica afémaci jofue
jobáillena.

⁸ Afe mei nane jáíe ie ocuífreganona daide: “Airenafue
nana ñue finoca. Mei íadi fueñe uáidogano fieni itíai oiza
bínidiaí.

⁹ Iemona jofue cígido macáramo omoi jai. Aféno mo nana o
cíoillimacina iráizizaí biri o daíri,” daide.

¹⁰ Iemona afe ocuífíregano jino macáraomo jáidiaioi. Jaillano nana íaioi ciónamacina: “Íráizizaíbiri,” daidíai. Fiénidino naa ñúemaciri nana dáanomo íaioina gairítate. Afemona iráizillico ja comínina oruide.

¹¹ Afe mei afe illaíma ie jíriganona onóillena jofo jaide. Íaioimo eroilla llezica daa áirena ráfue mo jítáfiregaroi jítáoiñedimiena ciode.

¹² Jira íena daide: “O áirena ráfue mo jítáfiregaroina jítáñeno ¿o nie izói jofo bitio?” daide. Mei íadi afémie uai ollíuai ñede.

¹³ Ie jira illaíma güirábanimo táijidínona daide: “Bímie riire omoi maíri; maíano afémie jino jítifomo dotari. Afénomo afémie duere éheiteza, daje izói izírenari murímuriteza,” daí afe illaíma ocuide.

¹⁴ Iemo Jesús nai úrillano daide: Uáidogamaci iere aillo ite, mei íadi eneno nizécano dúemaci, —daide.

*Gobierno ibátaga úcube rafue
(Mr 12.13-17; Lc 20.20-26)*

¹⁵ Iemona fariséuai Jesús úrilla uai féitaiacadiaioi. Féitajano fiénidifue afémiemo jóoneacadiaioi. Afe izói finóllena dáanomo maméritiaioi.

¹⁶ Iemona afémacimo jaináidino, daje izói naa Heródesmo jaináidinori Jesuna daiíllena orédiaioi:

—Llófueráima, onódicaiza ua rafue daiífredio. Daje izói Juzíñamui diné cai jáillio uáfuena llófuefredio. Afe llezica comíni daináuaimo náfuefinidio. Iemo jino cíoidifuiaina comínimo riire jicáñoñedio.

¹⁷ Ie jira o comeci dainafue jino caimo lloiri: ¿Romano jamánomoidillaíma ibátaga úcube ibádicainia ñuera? ¿Nibái fiénide? —daidíai.

¹⁸ Mei íadi Jesús afémaci facátamarillana onode. Jira íaioina daide:

—Comeci íairena mei abina ñue cíoidinodiomoi. ¿Nibái mei cuena jítaiacadiomoi?

¹⁹ Afe ibátafirega úcubetuni cuemo ácata, —daide.

Iemona daa denario daina úcubetuni atídiaioi.

²⁰ Afena cíoilano Jesús íaioimo jicánote:

—Afétunimo ¿bu uíeco jana illa? Iemo afétunimo ¿nie come mámecei cúeina? —daide.

²¹ Ie uai otíaioi:

—Romano jamánomoidillaíma mámecei illa, —daidíai.

Jira Jesús íaioina daide:

—Jamánomoidillaímamo dúide diga mai íemo fecari. Daje izói Juzíñamui dúide diga Juzíñamui fecari, —daide.

²² Afena afémaci cacáillano iere fáigacaidiaioi. Iena zóofiano oni jáidiaioi.

Tiide comini meine abido cáailena jicánotiaioi

(Mr 12.18-27; Lc 20.27-40)

²³ Aféruído saducéuai mona dáarie Jesumo úrizaidiaioi. Saducéuai: “Tiidino meine abido cáaiñeite,” daifirediaioi. Afe daí Jesumo jicánuaibitiaioi:

²⁴ —Llófueraima, Moisés caimo cuetá fiécabemo daide: “Daa come tíia, afémie ama ie fecíngona órede, afémie úruiaí ie tiide ama méifomo comuillena.”

²⁵ Mei nauí cai cigimo siete diga ámaredimíaina ite. Nanóidimie áireillano nai úruenidemo tiide. Tíillano ie méifoide ama afe fecingo ote.

²⁶ Iemo daje izói afémieri íficaide. Afe mei nane jíaimie daango ote. Afémiemo daje izói íficaide. Daí fiébiñeno nana fujtíaioi.

²⁷ Afémaci nana tilla méifomo afengo nane tiide.

²⁸ Iemona tíidino meine abido cáailiruimo, mei siete dígamie daango óteza, ¿afengo nie ima aina mámeite? — daidiaioi.

²⁹ Jira Jesús íaioi uai ote:

—Juzíñamui Cuegáuai naa afémiemo ite ríinori omoi onóñenamona fienu úritiomoí.

³⁰ Tiidino meine abido cáailano áinitiaioi. Daje izói jíainomo íaioi jízaníai ínireitañeitiaioi. Mei jíáifodo monamo ite Juzíñamui abi ímaci ízoitiaioi.

³¹ Mei íadi tíidino meine abido caana dibénedo ¿afe Juzíñamui ómoimo Cuegáuaina facádoñediomoí? Afémie bie izói daide:

³² “Dáaruido Abraham Juzíñamuidícue, naa Isaac, Jacob diga,” mei afémaci Juzíñamui illánomo cáadiaioiza. Mei uáfueza, Juzíñamui tíidino íeñede mei jíáifodo cáadino ie, —daide.

³³ Daí Jesús dánana cacáillano comini ie llófuemarillari fágacaidiaioi.

Iere jamánomo ínnorega caimo ocuina uai

(Mr 12.28-34)

³⁴ Fariséuai Jesús saducéuai llícaitajana cacáillano, dánomo gairídiaioi.

³⁵ Afémacimona daa ocuica uai llófueraima Jesús facátaiacade. Jira íemo jicánote:

³⁶ —Llófueraima, nana ocuica uáillaímona ¿níuaina jamánomoina? —daide.

³⁷ Jira Jesús daide:

—“O Juzíñamui nana o comécido ízírui, naa o joréñori, íemo o ífoci úrillado.”

³⁸ Aquíe uai nana ocuica uáillaímona jamánomoina. Afe uai raire uícodo ínnorede.

³⁹ Afe méifoide uai daje izoide. Aféuai daide: “Dama o abina o izíruilla izói, afe izói o jiáie cómena izíruiiri.”

⁴⁰ Bie ménade ocuilla uai nana Moisés ocuilla uailai jillaci. Daje izói Juzíñamui uai jino llóraini llócaiga uai bíemona comuide, —daide.

¿Mei bu jitó Cristo?

(Mr 12.35-37; Lc 20.41-44)

⁴¹ Afe fariséuai nai dáanomo itíaiioimo,

⁴² Jesús íaiioimo jicánote:

—¿Crístomo nie izói comécido daidíomoi? Afémie nano ie comuítatimie ¿mei bu? —daide.

Jira íena daidíaioi:

—Afémie Davidmona comuítagamie, —daidíaioi.

⁴³ Iemona Jesús íaiioina daide:

—Mei ¿nie izói David, Juzíñamui Ñuera Joreño llúado afémie jítana “Cue Ocuíraima” daírede? David daí daina uai cúeina:

⁴⁴ Monamo ite cai Moo Juzíñamui cue Ocuíraimana daide:

“Bené cue nabézimo o ráiri, o éoigamací cue anáfenolle dino.”

⁴⁵ Mei David afémiena “Cue Ocuíraima” dáiiadi, ¿nie izói Cristo Davidmona comuídímiena maméirede? —daide.

⁴⁶ Daí daina uai buna ónide. Iemo aféruimona jiáie facátalle jicánua uai maméñediaioi.

23

Jesús fariséuaimo naa ocuica uai llófuetinori íaioi fiénidifue llote

(Mr 12.38-40; Lc 11.37-54; 20.45-47)

¹ Afe jira Jesús nana comínina naa ie llófuegamaciri daide:

² —Ocuica uai llófuefiredino naa fariséuairi Moisés ocuica uai jino llóllena mamécaíaioi.

³ Afemona afémaci llógana jeire omoi oíri. Daje izói nana afémaci ómoína dánana náfuerei. Mei íadi afémaci illa izói iñeno iri. Mei comínimo íaioi úrilla izói iñediaioiza.

⁴ Afémaci comínina iere riire ocuide. Afe íaioi ocuica uaina comini finónide. Mei íadi dani afémaci afe ocuica uaina due jiza jetáacañediaioi.

⁵ Ñuemaci daíllena nana íaioi finócafuiái comini eróicana taino finófirediaioi. Daje izói ñuemaci daíllena Juzíñamui uai cúeina ozócimo jítajana gáidiaioi. Afe izói afe uai jiáimaci ie ónoimo maitá úcaillena gáidiaioi. Iemo jiái íaioi jítáfirega áreroi fuemo ite ebire cíoillena jiáimaci baimo finórifirediaioi.

⁶ Iemo ráfuemo íaioi güizájiadi afémaci ñuera ráillinuai jenófirediaioi. Daje izói Juzíñamui uai llorácomo íaioi jáiadi illaini ráiranuai jenódiaioi.

⁷ Afe izói jino jofue cígimo ite macáraodo íaiói jáiadi, comini caimare íaiói uáiduana gáidiaíoi. Daje izói “Cai Llófueraimadio” dáinana gáidiaíoi.

⁸ Mei íadi “Cai Llófueraimadio” daí daiítañoeno iri. Mei nana omoi ámatiai; iemo jái omoi Llófueraima jaca daade; afémie Cristo.

⁹ Afe izói bie éniemo buna cue Móodio daiíñoeno iri. Mei omoi Moo dáadeza. Afémie monamo ite.

¹⁰ Daje izói jáímacina “O cai Illáimadio” daiítañoeno iri. Mei o Ocuídimie dáadeza. Afémie Cristo.

¹¹ Omoimona jamánomoidimiéna jáímana canófiredimie.

¹² Mei uáfueza, jamánomo abí jacire mamédimie jamáimieña jáite. Mei jáífodo abí íinoñoeno jiba cómedicue daidímie jamánomoidimiéna jáite.

¹³ Ocuica uai llófuetino naa fariséuairi, comécina íáirena mei abina ñue cíoidiomoiza, ¡nii omoi dúerena! Mei comini jofo jáíñeillena, monamo ite Juzíñamui illáimana illano nazena ibáífirediomoi. Mei diga Juzíñamui ñue ocuífafuiai lluno, aféfuiaína abído náfueñediomoiza, dani o illafue ñue jáícina jóíñena jira. O lloga iodo uáfueña jáíñedioza. Afe lezica aféno mo jofo omoi jáíacañediomoi. Daje izói aféno mo jofo jáíacadino rairuídíomoi.

¹⁴ Ocuica uai llófuetino naa fariséuairi, comécina íáirena mei abina ñue cíoidiomoiza, ¡nii omoi dúerena! Fecíngotíai jofóníai bairófirediomoi. Afe lezica ñúemaci daiíllena comini eróicana Juzíñamui mo are úrifirediomoi. Ie jira omoi jáímaci duere zefuille baímo duere finólliomoi.

¹⁵ Ocuica uai llófuetino naa fariséuairi, comécina íáirena mei abina ñue cíoidiomoiza, ¡nii omoi dúerena! Nágagobiaído jáídiomoi daa come omoi ínoga uai dibénemo omoi itátallena. Itata mei, afe come omoi baímo fiénidimiéna orédiomoi. Iemona omoi afémieoíri, comini duere finolle iraimo zííñoña duere zefuillena mamécaomoi.

¹⁶ Uina cíoiñede io ífódino izóidiomoiza, ¡nii omoi dúerena! Comínina bie izói daiífirediomoi: “Daa come iere uafue daiíllena, Juzíñamui ico mámece líínoiadi afefue ráañede. Mei íadi afémie afécomo nitaca oro mámece líínoiadi ie daina uai jeire órede,” daidíomoi.

¹⁷ ¡Abina onóñede uínidino izóidiomoi! ¿Ñie mei jamánomoina? ¿Meita afe jamai oro? Ieñedeza. Mei afe oro Juzíñamui ico mo jóoniamona ñuera raana jáideza.

¹⁸ Nane jáífue daiífirediomoi: “Daa come iere uafue daiíllena, altar daina Juzíñamui íena rille fecárabani mámece líínoiadi afefue ráañede. Mei íadi afémie aféno mo fecaca raa mámece líínoiadi ie daina uai jeire órede,” daidíomoi.

19 ¡Abina onóñede uínidino izóidiomoi! ¿Ñie mei jamánomoina? ¿Meita afe fecaca rille? Ieñede. Afe Juzíñamuimo fecárabani afénomo fecaca raana ñue finode.

20 Mei jii, Juzíñamui íena rille fecárabani mámece llínotimie daa afe ibani llínoñede, mei jiáifodo nana afébanimo fecaca raana llínote.

21 Daje izói Juzíñamuimo gairíraco mámece llínotimie daa afe gairíraco llínoñede, mei jiáifodo afeco ite Juzíñamui mámece llínote.

22 Nane daje izói iere uafue daiíllena mona mámece llínotimie, Juzíñamui illáimana ráirano mámece llínote. Daií llínua llezica Juzíñamui mámece llínote, mei afe Juzíñamui afénomo ráiideza.

23 Ocuica uai llófuetino naa fariséuairi, comécina nai íairena mei abina ñue cíoidiomoi, jñii omoi dúerena! Nana omoi ríganiamona jamánomo jéenide rábiaina Juzíñamui íena oni jónefirediomoi. Menta daina jéenide rábiai, naa anis daina dúebiai diga, íemo jiái comino daina rábiai facádota oni eneno jónetiomoi. Mei íadi ocuica uáimona jamánomo jitáiredifuiaina náfueñediomoi. Afe jitáirediuai be ñie: come comeci jaícina jóoinana, íemo jiáimaci dúecaifirena, íemo Juzíñamuimo íinofirena. Nai afe jiáifuiiai omoi zóofeñena llezica, afe bífuiiai raire fueñe jeire órediomoi.

24 Táino omoi llúamona uina cíoiñedino io ifódino izóidiomoi. Ráañede uáillaimo iere izire nícidofirediomoi, mei íadi jamánomoide ñuera uaimo náfueñediomoi.

25 Ocuica uai llófuetino naa fariséuairi comécina nai íairena mei abina ñue cíoidiomoi, jñii omoi dúerena! Mei jiróraco naa plato diga jinófene ñue jocódiomoi, mei íadi afe ero dinena íairede. Daje izói comini cíocana abi ñue finódiomoi, mei íadi omoi comeci dine merírilla, naa jiáie comini raa báiruamona ógana oruide.

26 Uina cíoiñede fariseo ímie: Mai jiróraco naa plato diga ero jócua izói omoi illafue ñue méidori. Iemona omoi comeci ñúefuiaina oruíbicaite. Afemona afe jiróraco jinófene íainina izói, afe izói omoi jinófene íainiteza.

27 Ocuica uai llófuetino naa fariséuairi, comécina nai íairena mei abina ñue cíoidiomoi, jñii omoi dúerena! Uzeredena biga ñue cíoide tíidino ráillena nigaco izóidiomoi. Jinófene ebire cíoide mei íadi ero dine tíidino ícuruaina oruide, nana jiáifoide íairedinuiiai diga.

28 Omoi comeci dine afe izóidiomoi. Comini eróicana jinófenena ñue cíoidinodiomoi. Mei íadi comeci dine jiáimacina

fieni jífuefirenana oruide, íemo jíáie fiénide uáillaina oruide.

²⁹ Ocuica uai llófuetino naa fariséuairi, comécina nai íáirena mei abina ñue cíoidiomoiza, ¡nii omoi dúerena! Mei jaiái Juzíñamui uai jino llóraini raiáfo ebire finófirediomoi. Daje izói jaiái ñue itino emódomo jóonega nofíbicina ebire finódiomoi.

³⁰ Daií finuano daiífirediomoí: “Cai jáiaigima illáruillaído itícainia, afe Juzíñamui uai jino llórainina fatátañedicai,” daiífirediomoí.

³¹ Daií dáinado afe Juzíñamui uai jino llóraini fatino erófene igímadicai daidíomoi, —daide. Jira Jesús afémaci diga icírillano bie izói daina:

³² —¡Omoi jáiaigima taineca fiénidífue ñue ícoimo omoi fuitari! —daide.

³³ Jesús nai afémacimo úrite:

—¡Jaióniaí izóidiomoi! ¡Omoi nairai titade jaizai izoide! ¿Mei ñie izói duere finóbille iráimona jíllaitiomoi?

³⁴ Afe jira Juzíñamui uai llóraini, íemo iere baitáдино naa llófuefiređinori ómoimo óreitícue. Mei íadi afémacimona dámerie titaitiomoi. Daje izói jíáimacina córaitiomoi. Iemo jíáimacina Juzíñamui uai lloraco eromo rázido fáitiomoi. Iemo jíáimacina naga jófuiáído rácaítiomoi.

³⁵ Daií omoi íllamona nana jaiái ñúemaci titáfírena ícoiniadi ómoimo daií íficaite. Uáfueza, jaiái Abel fáinamona benomo Berequíás jitó Zacarías omoi faja llezica, nana afémaci ícoinia duere zéfuitiomoi. Juzíñamuimo gairíraco íemo Juzíñamuimo rille fecárabani dáafenedo afe Zacaríana fatíomoi.

³⁶ Uáfueña ómoína dáitícue, nana bie fagano ícoinia birui itino duere zéfuitiaíoi.

*Jerusalén jófueri Jesús eede
(Lc 13.34-35)*

³⁷ Jerusalén comínimo dúecaidícue. Juzíñamui uai llórainina fáfirediaíoi. Daje izói Juzíñamui orécanona nófiena níjidiaíoi. Diga icaiño átava ie úruiaí íáicona bícua izói íaioína ríidoiacadícue. Mei íadi íaíoi cue ríiduana gáñediaíoi.

³⁸ Cacai, Juzíñamui ómoína zóofeíteza.

³⁹ Mei ómoína daidícue, meine abido cuena cíóñeítiomoi. “Juzíñamui mámedido bitímie ñue finóbilleza,” omoi daílle dino cuena cíóñeítiomoi, —dinó Jesús úrite.

24

*Juzíñamuimo gairíraco júdaizille Jesús llote
(Mr 13.1-2; Lc 21.5-6)*

¹ Daií daina mei Jesús Juziñamuimo gairíracomona jino jaide. Jino jailla llezica ie llófuegamaci: “Bie ebire finoca gairíracomo éroi,” Jesuna daidíaioi.

² Mei íadi Jesús íaioi uai ote:

—¿Bie nana ciódiomoi? Uáfueña ómoimo llóiticue. Bie niroca nófie daa fiébiñeno nana niné jújicaite. Afeno jofue nana niné táinocaite, —daide.

Enie fúiacana cai onuille rafue

(Mr 13.3-23; Lc 21.7-24; 17.22-24)

³ Iemona Olivo daina ídumo jáidiaiои. Afénomo Jesús ráinana mei ie llófuegamaci báinino íemo jícanotiaiои:

—O daina jofue niné táinocaillifue, ¿niiruído daií zúite? Afena cai llone. O meine bíllena cai onótaite raa, ¿nie izói eroide? Daje izói énie fúillena ¿nie izói onóiticaí? —daidíaiои.

⁴ Jira Jesús íaioina daide:

—Comini omoi jífueiza abí rairuiri.

⁵ Mei diga comini cue mámedido billano “Cristodicue” daítiaiои. Afémaci aillo comínina jífueitiaiои.

⁶ Aillo jobáirillana fidiitiomoi. Dáarie áinori cácaitiomoi, íemo jíaiena jica cácaitiomoi. Mei íadi áferi jacinañeno omoi iri, mei daií ífciairedeza. Mei íadi énie fuillíruíñede.

⁷ Mei jíi daa nairai jíaié nairai diga fúirite. Iemo daa énie jíaié énie comini diga jobáiritiaiои. Afe llezica aillo náiraiai júbietaitiaiои, íemo aillo dúicuai íite, íemo ñuizaingo diga ígobiaina ñúite.

⁸ Comini duere zefuíllemona nana bífuiai como tainéinafue.

⁹ Afe llezica ómoína duere finóllena fécaítiaiои. Duere finoda ómoína títaítiaiои. Cue ícoína nana comini ómoína éoitiaiои.

¹⁰ Aféruillaído aillo comini Juziñamuimo ínuana féitaitiaiои. Dani conímana éoitiaiои. Daje izói conímana fállena fécaítiaiои.

¹¹ Afe llezica taino llotino iere íite. Afémaci: “Cai bie Juziñamui dibénedo úriticaí,” daítiaiои. Afémaci aillo comínina jífuecana uite.

¹² Aféruimo diga fiénidífuiai comuállamona, aillo comini conímana izíruillana féitaitiaiои.

¹³ Mei íadi fuitállinomo ñue nífuenino íitimie jíllote.

¹⁴ Iemo afe bie Juziñamui illáimana illano ñuera rafue nágagobiaído llóitiaiои, nana náiraiai áfena onóillena. Afe mei énie fuillíruimo dúciite.

¹⁵ Jaiai Juziñamui uai jino llóraíma Daniel, íraíruimo biite iaire finuaíbitimiedo úrite. Afe bíitimie diga ráaniaina táinocaitaite. Afe fieni finuaíbitimie Juziñamui gairíracomero ite rairuírede ñúenomo jáillana o cióadi, jica botárediomoi. Bíuai facádotimie afe uaina ñue onoiri. Onóillano abí rairuiri.

16 Afemona Judea éniemo itino oni caifóneduaímo botárede.

17 Daje izói daa come ie jofo caifófebanimo íadi, ie jofo eromo ite raana jofo jaillano bairóñeno afénomona bótaiteza.

18 Daje izói jacáfaimo itímie abido ie jofomo ite incuiruaina uáibiñeite.

19 Aféruillaido namócingotiaina, ¡ñi dúerena! Daje izói monoi jirode úrue llúidingotiaina, ¡ñi dúerena!

20 Nocíruillaido jino o bótañeillena, Juzíñamuimo jicari. Daje izói ocózinaillaruiamo o bótañeillena o jicari.

21 Mei aféruimo iere aillo duere zefuállifuiái íiteza. Enie comuállanomona bené afe izóidena íñede. Iemo jíái afe méifomo afe izói íñeite.

22 Mei jíi, aféruillai Juzíñamui due mozíñoñedenia buna jíllóñena. Mei íadi ie nizécanona izíruillano, aféruillaina afémie nano íanori mozíñoite.

23 Iemona dáamie ómoína: “Be Cristo,” daííadi, daje izói: “Cristo batí ite,” daííadi afémiemo íñoñeno omoi iri.

24 Mei Crístona abi mamede jífueridino bíteza. Daje izói afémaci: “Cai bie Juzíñamui dibénedo úriticai,” dáítiaíoi. Afémaci uaido dáinamona áillue comuídena fñoitiaíoi, naa fáigacaitade ráaniairi. Afedo comínina jífueiacadiaíoi. Dama Juzíñamui nizécanona jífuefillena facátaitiaíoi, mei íadi jífuetañeitiaíoi.

25 Ja nana bífuiái uícodo ómoímo llotícueza.

26 Ie jira: “Ero bai batí táizicimo Cristo ite,” afémaci daííadi afénomo jáiñeno omoi iri. Daje izói: “Ero, bico eromo Cristo ite,” daííadi afémiemo íñoñeno omoi iri.

27 Mei ameo fuiri llairilla llezica jica afáífene ícoímo cíocailla izói, afe izói cue billirui jica cíocaizaíbite; Nanoide fima Jitódicueza.

28 Iemo inóniaí gairízaiñenamona rille rifáillanona ñue omoi onona izói, afe izói abido cue cíocaillemona raire ómoína duere fínóllena uáfuenta ónoitiomoi.

Nanoide fima Jitó Cristo billirui ñe izoite

(Mr 13.24-37; Lc 21.25-33; 17.26-30, 34-36)

29 Afe duere zefuállirui záailla méifomo, jitoma dúite. Daje izói fíui égaíñoñeite, íemo jíái ucúduai monámona ana cócítiaíoi. Afe llezica nana monamo itínuiaí riire mozíoide ráaniaí niráiricaite.

30 Afe mei Nanoide fima Jitó Cristo bille jana monamo cíocaite. Afena cíóillano nana énie nairai éenaitiaíoi. Nanoide fima Jitó Cristo ana bíllana cíoitiaíoi. Afémie mona ero uálliedo bite, naa íemo ite ríino naa ebíredino diga.

31 Afe mei ie abi imaci óreite, afémaci riire bainada fúullemona nana Juzíñamui eneno nizécano nágafeniaimona dáanomo jíirillena. Iemona jica énie fuédaiaimona, íemo énie enéfeniaimona bíitiaioi.

32 Higuera daina aménamo mamécafuena omoi onoiri. Ie onócairo como fueñe zícua llezica, ja fimona áinozide, daidíomoi. Daje izói afe amena rábiai jino firuilla llezica, ja fimona áinozide daiífirediomoi.

33 Afe izói jítoma dúilla, íemo afémonado nana jíáie zuide raa omoi cíoiadi, íirairui áinozillana ónoitiomoi. “Ja dúciacade,” daiírediomoi.

34 Uáfuenta ómoimo lloticue, bigíma nai tíñeille llezica nana bie raa jino zúite.

35 Mona énie diga fuite, mei íadi cue uaillai jaca fúíñeite. Cue lloga raa nana zúite.

36 Mei íadi cue billirui ónoñega. Daje izói cue bille hora buna onóñena. Juzíñamui abi imaci onóñediaioi. Daje izói Juzíñamui Jító áfena onóñede. Dama Moo Juzíñamui ónoiga.

37 Noé illágimamo comini fiени illa izói, afe izói Nanoide fima Jító billíruimo comini daií íitiaioi.

38 Aféruillaido aillo noci nai bíñena uícodo, comini Noé llogáuaimo náfueñeno daa güilla llotíaiioi. Güillano jírófirediaioi. Afe llezica íaioi fiени illafue meídoñeno, áireoidiaioi, íemo íaioi jízaníai ínreitaoidiaioi. Jaca daií itíaiioi abina Noé áillue nocáe eromo jaide.

39 Íaioi duere zefuíllemo due jiza coméciñediaioimo áillue noci íaioimo bíide; áferi coróbaizidiaioi. Nanoide fima Jító billirui afe izói íite.

40 Aféruimo mena íima jacáfaimo illa llezica, afe íaillinoimona dáamie Juzíñamuiimo ínotímie caifo monamo uille, ie mei jíáimie fiébicaite.

41 Daje izói mena ringo trigo lláia llezica, daango caifo uiga, jíáingo fiébicaite.

42 Caade izói abí omoi onoiri, mei cai Ocuíraima billirui ónoñegaza.

43 Mei íadi bífuena onódiomoiza; jofo naama merírizaibitímie bíllana onóadi, afémie ie jofo rairuílano ínñeno cáate. Daií afémie merírizaibitímie ie jofona tuíñotañeite ie raa meríllena.

44 Ie jira jica ia abí ñue omoi finori. Mei due jiza comeci fácañeitiomoimo, Nanoide fima Jító bíiteza.

*Ínofírede ocufíregamie naa ínofínidímie diga
(Lc 12.41-48)*

45 ñinofirede ocuífiregamiemo omoi coméciri. Afémie ñúefue baitádimie. Ie ocuídime nana jofo ero comínina uíñotaite. Güille hóramo dúcia llezica afémie afémacina écaite.

46 Naga ie naama ocuícana ñue finófiredimie afémie billíruimo caimare ite, mei ie ocuica ñue finuana cíozaibiteza.

47 Uáfuenta ómoína dáitucue. Afemona jofo naama nana ie jofo eromo ite ráaniaina afémiena uíñotaite.

48 Mei íadi ocuífiregamie fiénidimiena jáiadi, íemo afe llezica: “Cue ocuídime are bíñeite,” comécido dáiiadi, afe ocuífiregamie jaca ñinofinide.

49 Daií daina mei afémie jáie ócuífiregano duere finoite. Afe llezica afémie jifáidino diga güizájite.

50 Iemo ie ocuídime billíruimo afémie comécíñeitemo, ie naama dúciite. Daje izói ocuífiregamie ónoñega hóramo dúciite.

51 Dúciillano afémiena jamánomo duere finoite. Afe mei comeci diné nai íáirena mei abina ñue cíoidino iere duere zefuilla izói, afe izói afémiena duere zefuítate. Afemona afémie iere éite. Eiano izírenari murímurite, —dinori Jesús úrite.

25

Diez dígade jitáingomo mamécasue

1 Jesús nane jáifue llote:

—Monamo ite Juzíñamui illáimana illirui diez dígade jitaingo izoide. Aféngotiai iníreille ráfuego jáidiaioi. Jailla llezica íaioi mechéraiai uitíaioi. Ringo otímie íaioi uáidollena afénomo jáidiaioi.

2 Afénguai mona cinco dígango finóbiñeno ebena jaide. Iemo jáie cinco dígango ñue finóbillano jáidiaioi.

3 Afe finóbiñeno ebena jáidingotiai íaioi mechéraiai fuilla mei méidolle íjina uíñédiaioi.

4 Mei jáífodo afe ñue finóbingotiai íaioi méidolle íjina botéllado uitíaioi jái íaioi mechéraiai.

5 Mei afe ringo otímie are biñenamona, nana jitáingotiai ja iníacadiaioi. Iemona ua iníaidiaioi.

6 Afe mei dáaferui llezica riire uáidua uai cácaide: “Ringo otímie ja bíteza. Raire afémie omoi uáiduari,” daide.

7 Afemona nana afe jitáingotiai náidacaillano íaioi mechéraiai unédiaioi.

8 Afe llezica afe cinco diga finóbiñeno ebena bitínguai, jáie cinco diga ñue finóbingotiaina daide: “Cai mechéraiai ja bóoñedeza. Omoimo ite eneno atica íjimonaa cai ine,” daidiaioi.

⁹ Mei íadi afe ñue finóbidingotiai finóbiñedingotiaina daide: “Omoimo fecánidicai. Mei ómoimo fecádicainia caimo fiébiñede. Afe izói ómoimo fiébiñede. Batí fecáriracomo dani jenuaidiomoinia ñuera.” Jira aféngotiai jáidiaioi.

¹⁰ Mei íadi finóbiñedingotiai oni aceite íbajilla llezica, ringo otímie dúcide. Afe ñue finóbidingotiai afémie diga áirena ráfuego jofa jáidiaioi. Afe mei afémie naze ibaide.

¹¹ Ibailla mei aceite íbajidingotiai dúcidiaioi. Dúciillano daidíaioi: “Ocuíraima, naze caimo tuiño,” daidíaioi.

¹² Mei íadi afémie jofona uai ote: “Uáfueña ómoína onóñedicue,” daide.

¹³ Iemo Jesús nai úrillano daide: Nanoide íma Jitó Cristo billirui ónonideza, iníñeno abí omoi rairuiri. Ie bille mona ónonideza. Daje izói ie dúcille hora buna ónoñega, —daide.

Talenta daina ráifide úcubemo mamécafue

¹⁴ Jesús nane jíáfue llote:

—Monamo ite Juzíñamui illáimana illarui bie izoide. Daa ocuífiredimie oni jíáigobemo jáiacana llezica, ie ocuíferegano uáidota íemo ite úcubé afémacina úiñotade.

¹⁵ Ocuídímie afémacimona daa cómemo cinco mil úcubetuni fecade. Iemo jíáimie mo mena mil dígatuni fecade. Iemo nane jíáimie mo daa milna fecade. Afémacimona illa dígamie ie ifoci onona dieze fecade. Dai íécajano oni jíáie éniemo jaide.

¹⁶ Cinco mil dígatuni igámie, afe úcubena afémie níciduamona, afe baímo cinco mil áfemo baí nabaide.

¹⁷ Daje izói mena mil dígatuni igámie afe baímo jíáie mena mil áfemo baí nabaide.

¹⁸ Mei íadi daa milna igámie ie ocuídímie úcubé oni énie ifomo retáidote.

¹⁹ Afe mei, are íllamona afe ocuídímie ocuífirégamíai diné meine bite. Billano íaioi úiñoga úcubé onóillena afémacimo jícanote.

²⁰ Cinco milna igámie fueñe billa. Billano afe baímo ie nabaica jíáie cinco mil ie ocuídímie mo izáibite. Izájillano daide: “Cue Ocuídímie, o cuemo iga cinco milna baímo jíáie cinco milna nabáidicueza. Be o diez mil dígatuni,” daide.

²¹ Jira ie ocuídímie íena daide: “Cue ocuícana íere ínofiréio. Cue ñuera ocuícamedio. Due omo cue fecácana ñue ínotio. Afemona afe baímo jíáiena ona úiñotaiticue. Cue illáimana illánomo mai caimare coco jai,” daide.

²² Afe mei nane mena milna iga ocuífirégamie dúcide. Afémie daide: “Cue Ocuídímie, mena milna cue itio. Afe baí nane jíáie mena milna nabáidicue. Be o cuatro mil dígatuni,” daide.

23 Jira ie ocuídime íena daide: “Cue ocuícana iere íinofiredio. Cue ñuera ocuícamedio. Due omo cue fecácana ñue íinotio. Afemona afe baimo jíaiena ona úñotaiticue. Cue illáimana illánomo mai caimare coco jai,” daide.

24 Mei íadi afe mei, daa mil dígatuni iga ocuífíregamie dúcillano ie ocuídimeia daide: “Cue Ocuídime, o iere ríimienana onódicueza. O ríñeganomona jaca ófiredio. Daje izói trigo tuiránomo táijiñeno afénomona trigo ófiredio.

25 Ie jira ona jacíruillano o cuemo iga úcube éniemo cue retáidoga. Mei íadi o úcube meine cue atícaza. Be ñie,” daide.

26 Iemona ocuídime íena daide: “Fíenide ocuífíregamedio. Daje izói ráiraiere de ocuífíregamedio. Cue ríirenana onódio ia, ¿ñibái mei bie izói itio? Cue ríñeganomona cue ófírenana onódio. Daje izói trigo tuiránomo táijiñeno, afénomona cue ófírenana onódio.

27 Afemona cue úcube jóoneranomo fecáredio. Iemo meine cue bíllemo afe úcubena naa jíaié baimo nabáicatuni diga llínoredicue,” daide.

28 Iemona ocuídime afénomo itínona daide: “Bímiemo ite mil dígatuni otá, afe diez mil dígatuni ofítatiemiemo ine.

29 Igámie nane baimo írega. Afemona afémiemo baimo aillo íite. Mei íadi íñegamiemo due íemo ite meine bairórega.

30 Iemo bie ráííñede ocuífíregamie jino jítifomo dota. Afénomo éheiteza. Afe llezica izírenari murímuriteza,” daide. Daí daide Jesús.

Nana náiraiamo izire jicánollirui

31 Jesús nai úrioide: Mei Nanoide Hima Jitó Crístodicueza, illáimana ana cue bille llezica, nana cue abi imáciai diga bíticue. Billano ebire finoca illaíma ráíiranomo ráizaíbiticue.

32 Nana nairai comíni cue uícomo gairítalliaíoi. Afe íaíoi bille llezica, ovejai úñoraíma chívuaimona ovéjaíaina oni eneno nízia izói, afe izói Nahí Illáimana cue íllemona nana náiraiaina oni enénorie jóoneiticue.

33 Cue nabézimo ovejai izóidino jóoneiticue. Iemo chívuai izóidino cue jarífezimo jóoneiticue.

34 Afe mei cue nabézimo itínona dáíticue: “Cue Moo ñue finócamaci, mai omoi bi. Juzíñamui énie comúitaja llezica ómoiena mameca illáimana illínomo jofo jai.

35 Mei cue jufíruilla llezica, cuena ecádio. Daje izói cue jiróacana llezica cuena jirótatio. Iemo jíai jífocinino cue mácaja llezica cuena jofo inítatiomoi.

36 Iemo cue inícuiironina llezica cue itíomoi. Daje izói cue dúicotailla llezica cuena uáidotíomoi. Daje izói llavéracomo cue illa llezica, cuena méiñuaibitíomoi,” daide.

37 Iemona cue nabézimo ite nífuenidino cuena dáitíai: “Cai Ocuíraima, ¿mei nírui o jufíruillana cióillano ona ecádicaí? Daje izói ¿mei níruido o jiróacana llezica ona jirótaticai?”

38 Iemo jái, ¿mei níruido o jífocinino o mácaja llezica ona inítaticai? Iemo jái ¿níruido o inícuiironina llezica o iticai?”

39 Iemo jáie ¿níruido o dúicotailla llezica o méiñuaidicaí? Daje izói llavéracomo o illa llezica ¿níruido o méiñuaidicaí?” daidíai.

40 Jira Illaima cue íllamona uai óitícue: “Uáfúena ona dáitícue, nana afe bie comécina mánaide cue ámatíaimo omoi finócafuaí, aféfuai ja cuemo finódiomoi,” dáitícue.

41 Afe mei cue Illáimana cue ráirano ie jarífezimo itínona dáitícue: “Cúemona oni omoi jái. Omoi fieni faidócanodíomoi. Comini zíñona duere finolle iraimo omoi jái. Afe irai Taife, nana ie abi imaci diga íena finoca.

42 Mei cue jufíruilla llezica cuena ecáñediomoi. Cue jiróacana llezica cuena jirótañediomoi.

43 Afe izói jífocinino cue jáicana llezica cuena jofe inítañediomoi. Cue inícuiro íñena llezica cuena inédiomoi. Duico cue ua llezica, daje izói llavéracomo cue illa llezica cuena uáiduaibifinidíomoi,” daide.

44 Jira afémaci cuena dáitíai: “Cai Ocuíraima, mei nírui o jufíruillana ciódicaí, daje izói o jiróacanana, íemo jífocinino o macácana, íemo o inícuiro inénana, íemo o irárenana, íemo llavéracomo o íllana, ¿mei níruido daí o íllana ciódicaí ia, ona canóñedicaí?” dáitíai.

45 Iemona afe llezica íaioina dáitícue: “Uáfúena ómoína dáitícue, bie comécina mánaide cuemo jaináidinomona dáamiemo omoi finoñegafuaína, aféfuai ja cuemo finoñediomoi,” dáitícue.

46 Afe mei afémaci zíñona duere finolle iraimo jáitíai. Iemo Juzíñamui jónega comécina nífuenidino, caimare zíñona cáallinomo jáitíai, —dinori Jesús úrite.

26

Jesús llaitállena maméritíai

(Mr 14.1-2; Lc 22.1-2; Jn 11.45-53)

1 Jesús nana bífuai llua méifodo, ie llófuegamacina daide:

2 —Onódiomoi benómoma ménarui íllamona pascua rafue íteza. Aféruído Nanoide Iima Jitó Crístitícueza cruzmo coráillena cuena fécaítíai, —daide.

³ Afe llezica lletáriraini illaini, daje izói ocuica uai llófueraini, naa judíuai eicomíniri dáanomo gairídiaioi. Lletáriraini caifóidillaíma Caifás ñúeco ibírímo gairídiaioi.

⁴ Afénomo Jesús jífuiano llaitállena maméritiaioi. Afe llezica afémie titállena maméritiaioi.

⁵ Mei íadi afémaci daidíaioi:

—Nana comini áferi fáillifailliñañeillena, rafue ana íena lláitañeiticai, —daidíaioi.

Ringo zióredijina Jesús ifo jillaide

(Mr 14.3-9; Jn 12.1-8)

⁶ Jesús Betania jófuego ite. Afémie, chíinaitimiena maméidimie Simón jofomo ite.

⁷ Afe llezica, afénomo daa ringo alabastro daína nofici finoína icítirudo ziórediji uite. Afeji iere ráifide. Jesús güirábanimo ráina llezica, afengo afe ziórede cáirediji Jesús ifomo totade.

⁸ Ie llófuegamaci áfena cióillano ríicaidiaioi. Dani conímana daidíaioi:

—¿Ñibái mei áfeji táinomo fáifitaga?

⁹ Afeji aillo úcube óllena fecárede. Afedo oga úcube, dúeredinomo írede, —daidíaioi.

¹⁰ Jesús dai íaioi úrillana cacáillano íaioína daide:

—¿Ñibái mei bie ringo jífánodoidiomoí? Bie ringo cuemo finoca raa iere ñuera.

¹¹ Omoi cígimo dúeredino jaca ífirede, mei íadi omoi cígimo are íñeiticue.

¹² Bie ringo cue abimo totaca ziórede cáiredijina, cue raillínomo dúide. Afedo afengo ñue cuena finode.

¹³ Uáfueña ómoína dáititue, náganomo bie éniemo bie jíllóille uai jino llóyadi, bie ringo cuemo finócana jino llóitiaioiza, afémaci aféngomo uíbicaifireillena, —daide.

Judas Jesuna ie éoidinomo fecade

(Mr 14.10-11; Lc 22.3-6)

¹⁴ Afe mei doce dígade llófuegamacimona Judas Iscariote lletáriraini illáimamo úrizaide.

¹⁵ Afémacina daide:

—Jesús ómoimo cue fecálleza, ¿nieze cuemo íbaitiomoí? —daide.

Jira “cuatro fiui táijina iba dieze, omo íbaiticai” daínano, treinta díga ráifide úcubetunillai afémiemo fecádiaioi.

¹⁶ Iemo áfemona afe Judas Jesús íaioimo ñue fecállino jenode.

Jesús páscuamo íraicaiño güillafue

(Mr 14.12-25; Lc 22.7-23; Jn 13.21-30; 1 Co 11.23-26)

17 Afe rafue nanóidiruimo fáitañega pan güífirediaioi. Afe llezica Jesús llófuegamaci billano jicánotiaioi:

—¿Pascua rafue llezica güllena, uícodo ninomo cai finuaille? —daidíaioi.

18 Afémie íaioina daide:

—Batí jófuemo jaillano, cue dainámie jofomo jai. Afémiena daiíri: “Cai Llófueraima ona daide; Cúeiena mamécaruimo ja dúcizaideza. Pascua rafue güífirenana o jofomo cue llófuegamaciri güíticue,” —daide.

19 Iemona ie llófuegamaci ie ocuilla izói pascua ráfuemo güllena finuaidiaioi.

20 Ja nauilla llezica, Jesús ie doce dígade llófuegamaciri afénomo güizájidiaioi.

21 Afénomo íaioi güilla llezica Jesús daide:

—Uáfuenta dáiticueza, ómoimona dáamie cuena fécaite, —daide.

22 Iemona afémaci iere zúucaidiaioi. Zúucaillano illa dígamierie Jesumo jicánotiaioi:

—Cai Ocuíraima, ¿meita cue? —daidíaioi.

23 Jesús íaioi uai ote:

—Birui cue diga daje plátomona güítimie, nii cue fécaitimie.

24 Nanoide Iima Jitó Crístodicue; jaiái Juzíñamui Cuegáuaimo lloga iodo jáiticue. Mei íadi cue fecádimie jñii dúerenal Afémie nanómona jaca jéiciñegania figura, —daide.

25 Iemona afe fécaitimie Judas Jesuna daide:

—Llófueraima ¿meita cue? —daide.

Jira Jesús uai ote:

—Jii, o. O cue fecalle.

26 Ie güilla llezica, Jesús pan llíinota, Juzíñamuina “Iere figura” daide. Daina mei ditada, ie llófuegamacimo fecade. Fécajano daide:

—Bie güi. Bie cue abiza, —daide.

27 Afe mei jiróraco llíinota, Juzíñamuina “Iere figura” daide. Dainano ie llófuegamacimo fecade. Feca mei íaioina daide:

—Nana bicúrimona omoi jirori.

28 Mei bie cue díeza. Cue die, dájemo Juzíñamui llíinoga comue uai uáfuenta daiítate. Aillo comini íaifue muiñóllena cue die totalle.

29 Mei íadi dáanomo bie uva íjina meine jíroñeiticue. Cue Moo illáimana illirui nai dúciñeille dino aféjina jíroñeiticue. Afe bille llezica cómojina omoi diga jíroiticue, —daide.

*Pedro Jesús jáanollena Jesús uícodo llole
(Mr 14.26-31; Lc 22.31-34; Jn 13.36-38)*

30 Juzíñamuimo íaioi rua fuilla mei, jino Olivo daina ídumo jáidiaioi.

31 Afénomo Jesús íaioina daide:

—Bie naio cueri méaicaillano nana omoi cuena feitiomoi. Mei jaiái Juziñamui Cuegáuaimo omoi dibénedo bie izói daide: “Ovejai úiñoraima cue fáiticue, íemona afe ovéjaiai rainólliaoi,” daide.

32 Jesús nai úrite: Mei íadi meine abido cue cáaille mei omoi uícodo Galiléamo jáiticue, —daide.

33 Jira Pedro uai ote:

—Nana comini ona fáicanocaitiaoi ia, cue ona fáicanocaiñeiticue, —daide.

34 Jira Jesús afémiena daide:

—Uáfueña ona dáiticueza. Bie naio átava nai úriñenia, daámani dígacaiño cuena jáanoitioza, —daide.

35 Pedro íena daide:

—O diga cue tíillena iere jitáirede ia, ona jáanoñeiticue, —daide.

Afe llezica nana llófuegamaci Pedro daína izói daidíaioi.

Getsemanímo Jesús Juziñamuimo úrite

(Mr 14.32-42; Lc 22.39-46)

36 Afe mei Jesús naa ie llófuegamaciri Getsemaní mámeciredinomo dúcide. Afénomo íaioina daide:

—Bai batí Juziñamuimo cue úrizaiilla llezica benomo omoi ráiri, —daide.

37 Daí daína mei Pedro, naa Zebedeo jitó íaillinoiri Jesús bai uite. Afe llezica Jesús iere zúucaide. Zúucailla llezica comécimo duere zefuilla izói cácaide.

38 Iemona íaioina daide:

—Cue comeci iere zúurede. Afe zuufue cuena titade izói finode. Benó omoi fiébiri. Iníñeno cue omoi úiñori, —daide.

39 Daí daína mei afe baimo íanori jaide. Afénomo éniemo fueco dine bíjicaillano Juziñamuimo úrite; daide:

—Cue Moo, o finórenia bie duere finóllinomona cue jíllotari. Mei íadi cue comeci jítaina izói finóñeno iri. O comeci jítaina izói finori, —daide.

40 Afe mei daámani ie llófuegamaci illánomo meine bite. Inídiaioina cíozaibite. Iemo Pédróna daide:

—¿Nano íanori omoi cue diga iníñeno cáadino izói ínidiomoi?

41 Fiéndifueño omoi báiníñelleza, iníñeno abí omoi rairuiri. Daje izói Juziñamuimo comécido omoi úriri. Uáfueña omoi joreño jíéredeza, mei íadi omoi abí nánide, —daide.

42 Afe mei nane Jesús Juziñamuimo úrizaide. Bie izói daide:

—Cue Moo, bie duere cue íaioi facátallemona cue o jíllotareñenia o comeci jítaina izói fino, —daide.

43 Afe mei nane meine bite. Bítemo ie llófuegamaci inídena cíozaibite, mei íaioi uimo ínie iere íllaza.

44 Iemona nane afémacina fiénocaillano bai Juziñamuimo úrizaide. Ja daámani dígcacaiño úrizaide. Ie mei nane daje uaido úrite.

45 Afe mei nane ie llófuegamaci illánomo jaide. Afémacina daide:

—¿Nai inídiomoi? ¿Nai ocózinaidiomoi? ¡Cacai! Nanoide fima Jitódicueza, ja cuena fiénidinomo fecalle hóramo dúcidez.

46 Omoi náidacai; jáiticaiza. Cue fécaitimie ja dúcidez, —daide.

Jesús ja llaitada uitíaioi

(Mr 14.43-50; Lc 22.47-53; Jn 18.2-11)

47 Daií Jesús nai úrioina llezica Judas dúcidez. Afémie doce dígade llófuegamacimona dáamie. Afémie aillo comini diga bite. Lloéfaillai naa bigíniari atídiaioi. Afémaci lletáriraini illaini orécaiaioi. Daje izói judúuai éicomini orécaiaioi.

48 Fécaitimie Judas Jesús íaioi onóillena llaitalle uai úcodo íaioimo llote:

—Ñimie cacai ñítaiticueza; afémie llaitada omoi uiri, —daide.

49 Afemona Jesumo áinozillano daide:

—Llófueraima, caimare itio, —daide.

Afe emódomo Jesuna ñitade.

50 Jira Jesús ie uai ote:

—Cue nabai, ¿minícamo bitio? —daide.

Daií daina mei, comini billano Jesús llaitádiaioi. Llaitada llavéllena uitíaioi.

51 Afe llezica Jesús nabáiñiaimona dáamie ie lloefai otá, lletáriraini illaima ocuífiegamie jefo cotade.

52 Jira Jesús íena daide:

—Jadí o lloefai oni joone. Mei nana lloéfaido fuirídino, afe lloéfaido tíitiaioi.

53 ¿Onóñedioza cue Móomona doce dígazie ríiduaibitinona jicáredicue? Daií jicádicuena afémie biruimo raire cuemo orérede. ¿Afena onóñedio?

54 Mei íadi birui afémaci cue llaitáñediaioinia, ¿nie izói Juziñamui Cuegáuai daina ñue ícoimo zúite? Aféuai bie íficaidifuiái ie zúille llote, —daide.

55 Afe mei Jesús comínina daide:

—¿Ñibái mei merírifiredimie izói cue lláitaibitioi? Mei lloéfaillairi íemo bigíniari cuemo bitioimoiza. Nágaruillaido Juziñamuimo gairíracomo ráicana ómoína llófuefiredicue. Afénomo jaca cuena llaitáñediomoi.

56 Mei íadi nana bie íficaide, jaiaí Juziñamui uai jino llóraini lloga ñue ícoimo fuitállena, —daide.

Afe llezica nana Jesús llófuegamaci afémie fáicanocaillano botádiaioi.

Jesús jamánomoidillaini uícomo uitíaiói

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Afe Jesús llaítada oni uitino Caifás uícomo uitíaiói. Afémie lletáriraini caifóidillaíma. Afénomo ocuica uai llófuefiredino naa eicomíniri dáanomo ofídiaioi.

⁵⁸ Mei íadi afe llezica Pedro Jesús uilla óodana caifóidillaíma jofo ibírimo jaide. Afénomo dúciillano jofo jaide. Jaillano afeco úiñotino diga ráiide. Afémie dinomo ráiide Jesús lláitaja ñue ícoímo fúillana cíoillena.

⁵⁹ Lletáriraini naa eicomíniri, íemo nana jamánomoidillainiri Jesumo fiéni jónellifue jenódiaioi. Uafue jónellifue íaiói báíñenia “Táínofue nítaiticai,” daidíaiói, “áfedo afémie cai titátalleza.” Afe llezica aillo comini billano taino uailai afémiemo jónetiaioi.

⁶⁰ Mei íadi afémiemo íaiói jónellena baiñédiaioi. Afe mei íraíno mo ménamie taino llófiredino íaillinoi dúcide.

⁶¹ Afe íaillinoi daide:

—Baie Jesús bie izói daiífiredo: “Juzíñamuimo gairíracona júdairedicue. Afe mei daaruíamani íllamona meine caífo níredicue,” —daidíaillinoi.

⁶² Jira lletáriraini caifóidillaíma náidacaillano Jesuna daide:

—¿Nibái mei uai oñédio? Bie omo íaiói jónegafue ¿nie izoide? —daide.

⁶³ Mei íadi afe llezica Jesús jaca uaina oñede. Ie jira lletáriraini illaíma íena daide:

—Caade Juzíñamui mámedo o úritadicueza, uri. Uáfuenta daíllena riire o ocuídícue. O, Juzíñamui Jitó Crístona o illa caímo lloiri, —daide.

⁶⁴ Jira Jesús daide:

—Jii, o daina izói nímiedicue. Nane ómoina dáíticue, Nanoide íma Jitó Crístodicueza, ríinorede Juzíñamui nabézimo cue ráiillana cíoitímoí. Afe llezica mona uílliedo ana monámona cue bíllana cíoitímoí, —daí daide.

⁶⁵ Afena cacáillano lletáriraini caifóidillaíma jamánomo ríicaide. Daí ríicaillana ácatallena íe jítáoi garoi cuatade. Afe mei daide:

—Bie íima íe daina uáillaído Juzíñamuina íáire úrite. ¿Nibái mei nai jíáie uai nábitino jítáidicai? Omoi dani íe fiénide dáinana cacáímoí.

⁶⁶ ¿Mínica afémiemo dúina? —daide.

Jira afémaci daidíaiói:

—Dama íe ícoínia tíirede, —daidíaiói.

⁶⁷ Afe mei íe uíecona tuádiaioi. Rázido íena fatíaioi. Jíáimaci íe uíeco púcoídiaioi.

68 Daií ñiano íena daidíaiói:

—Mei Crístodioza, ¿nímie o faja? Jino llone, —daidíaiói.

Pedro Jesús onode íadi jáanote

(Mr 14.66-72; Lc 22.56-62; Jn 18.15-18, 25-27)

69 Afe llezica Pedro jinófeco ibírimo ráiide. Afénomo ie illa llezica ocuífirégango afémiemo billano daide:

—O daje izói Galilea ímie Jesús diga macáfiredio, —daide.

70 Mei íadi Pedro comini eróicana afémiena jáanote; daide:

—O dainana onóñedicue. ¿Minica llotio? —daide.

71 Afe mei Pedro jofo nazemo jáidemo jáíngio íena ciode.

Cíoillano afénomo itinona daide:

—Bímie daje izói Nazaret ímie Jesús diga macáfiredo, —daide.

72 Afengio daií daina llezica, Pedro nane íena jáanote. Ríirede uaido daide:

—Afe ímana jaca onóñedicue, —daide.

73 Afe mei íanori íllamona afénomo itino Pédromo áinozillano daidíaiói:

—Uáfueza, afémaci ímiedio, mei dama o úrillado onódicaiza, —daidíaiói.

74 Afe jira Pedro uafue daiíllena Juzíñamui mámece líínota riire daide:

—Afe báimiena jaca onóñedicue, —daide.

Daií ie daina llezica ítava úrite.

75 Afemona Pedro Jesús uícodo íena dainamo úibicaide. Afe be níuui: “Atava nai úriñena llezica, daámani dígacaiño cuena jáanoitioza.” Afemo úibicaillano Pedro jino iere zuure éecana jaide.

27

Pilátomo Jesús izájidiaiói

(Mr 15.1; Lc 23.1-2; Jn 18.28-32)

1 Mona monáizailla llezica, nana lletáriraini illaini, naa judíuui eicomíniri, dáanomo gairíllano Jesús titállena nana daje izói maméritiaíoi.

2 Afe mei Jesús maiáno, afe énie úiñote illaíma Poncio Pilátomo izájidiaiói.

Judas tíillafue

3 Judas, Jesús fecádimie, Jesuna íaiói coráiaillana cíoillano comece ífue méidote. Iemona treinta diga úcubetuni meine lletáriraini illáinimo izájide, ocuide eicomínimo diga.

4 Izájillano daide:

—Iere fiénidífue finódicue; nífuenidimie titállena fecádicueza, —daide.

Jira afémaci uai otíaíoi:

—¿Afue caimo mei nibái? Dama ófue, —daidíaiói.

⁵ Ie jira Judas afe úcube gairíracomo ana jutade. Afe mei afémie jaillano dama cimoi cúinajano aménamo ágüicaide. Daií afémie tíde.

⁶ Lletáriraini illaini, afe jutaca úcube iráiano daidíaioi:

—Juzíñamuimo fia iga úcube jóoneracomo bie úcube jóonenidicai, mei come titaja úcubeza, —daidíaioi.

⁷ Afe mei afémaci afe úcubedo énie ibállena dájena coméciidiaioi. Iaioi ibaca énie mámece Nógora Orano. Afébiri ibádiaioi jicánemaci tíadi afénomo ráillena.

⁸ Afe jira nai biruimo afébiri Diébirina daiífirina.

⁹ Daií íaioi finuamona jiaiaí uai llóraima Jeremías lloga uai ñue ícoimo fuite. Be níuui: “Israel nairai cue íaioi fécaja úcube abido llínotiaioi.

¹⁰ Llínuano Nógora Orano ibádiaioi. Daií Juzíñamui cue ocuide.”

Jesús Pilato uíécomo jóonetiaioi

(Mr 15.2-5; Lc 23.3-5; Jn 18.33-38)

¹¹ Afe mei énie úiñotillaima uícomo Jesús uitíaioi. Afénomo afémie Jesumo jicánote:

—¿O meita judíuai illaíma? —daide.

Jira Jesús daide:

—O daina izói níimiedicue, —daide.

¹² Iemo lletáriraini illaini naa ocuide eicomíniri Jesumo fiénide uailai jóonia llezica, afémie jaca uai oñede.

¹³ Jira Pilato íena daide:

—¿Aquíe omo íaioi jóonegafuiai cacáñedio? —daide.

¹⁴ Mei íadi Jesús jaca afe llezica uai oñede. Iemona uai ie oñénari énie úiñotillaima fáigacaide. Ie daille uai onóñede.

Jesús titállena mameca

(Mr 15.6-20; Lc 23.13-25; Jn 18.38-19.16)

¹⁵ Aféruillaído afe rafue ana, llaveca fiénidinomona dáamie Pilato zuitáfirede. Afémie comini uaido zuitácamié.

¹⁶ Mei afénomo ite mámece jica jalleide fiénide maigámie. Afémie mámece Barrabás.

¹⁷ Illáicomini dáanomo gairilla llezica Pilato afémacimo jicánote:

—Bíailinoímona ¿nímie ómoímo jino zúitaiticue? ¿Barrabás, mei níbai Cristo daina Jesús? —daide.

¹⁸ Mei Pilato, comini úradoillamona Cristo íaioi fécajana ñue onode.

¹⁹ Pilato, riire jicánofiredimie ráiranomo ráina llezica, Pilato ai uai orede. Afe be níuui: “Afe jadímie nífuenidímieza afémiemo jírcañeno iri. Mei ja naio afémiena cue nicáirilla llezica iere duere zefuídicue,” daide.

20 Mei íadi lletáriraini illaini naa ocuide eicomíniri, nana jáie comini Pilátona daiílluai riire llotíaiói. Barrabás zuitállena Pilátomo jicátatíaiói. Daje llezica Jesús titállena jicátatíaiói.

21 Afe énie úiñotillaíma nane dáanomo jicánote:

—Bíailinoímona ¿nímiena cue zuitátatiomói? —daide.

Jira: —Barrabás zuita, —daidíaiói.

22 Iemo Pilato íaióimo jicánote:

—Iemona bie Crístona mámeciredímie Jesús ¿nie izói níbaiticue? —daide.

Jira nana uai otíaiói:

—¿Cruzmo corai! —daidíaiói.

23 Iemona Pilato íaióina daide:

—¿Níbái mei? ¿Nie fiénidífue afémie finode? —daide.

Mei íadi comini dáanomo riire daidíaiói:

—Cruzmo corai, —daidíaiói.

24 Pilato ie uaina íaiói íñoñenana ciode. Daje izói nana comini aféfuiaíri jamánomo cáilliana cacade. Ie jírari “Onói cue jocólleza jainói ati” daide. Jócua llezica daide:

—Afe bie nífuenidímie tulle cuemo jííñede. Dani ómoífueza, —daide.

25 Iemona nana comini uai otíaiói:

—Afémie tulle caímo jíite, daje izói cai úruiaímo, —daidíaiói.

26 Afe jira Pilato Barrabás zuitade. Afe mei Pilato Jesús rázido fatátate. Fatata mei Jesuna afémacina corátate.

27 Afe mei énie úiñotillaíma fuíríraini áillue gairíracomo Jesús uitíaiói. Afénomo nana jáie fuírírainíai afémie onífenedo gairídiaíói.

28 Afe mei ie iníroi dúíñuano, illaíma jítáfirega jáicuiro afémiemo jítádiaíói.

29 Afe llezica ifo icuífoi eegi nínacuífoina afémiemo jítádiaíói. Iemo jáí illaíma llííifirega bigina íena llíínotadiaíói. Daií ñiano afémie anamo dújudiaíói. Dújuillano jifánodoiano íena daidíaiói:

—Judíuai Illaíma are íitioza, —daidíaiói.

30 Afe llezica afémaci ie túallaítiaíói. Afe dáanomo ie llííiga bigi báiruano, ie ifoci púcoídiaíói.

31 Daií ie íaiói jifánodoia mei, afémiemo íaiói jítaca jáicuiro dúíñuano, dama ie iníroina jítádiaíói. Afe mei afémie coráiaidiaíói.

Jesús cruzmo coráidiaíói

(Mr 15.21-32; Lc 23.26-43; Jn 19.17-27)

32 Jofue jinomo íaiói coráiailla llezica, Cirene énie ímie baitíaiói. Baillano Jesús uiga cruzna rocátatíaiói.

33 Daií Gólgata mámeciredínomo dúcídiaíói. Gólgata daína “come ifócorai illano.”

³⁴ Afénomo eriredena jaicuica vínona Jesús jirótataioi. Mei íadi Jesús áfena due fácano, jiróacañede.

³⁵ Jesús ja íaioi coraia méifodo, fuiriraini Jesús iniroi illa dígamie íaioi máíñuana onoíllena, onótaraji dotádiaioi. Daií jaiai uai llóraini lloga uai ñue ícoimo fuite. Afe be níuui: “Onótaraji dótajano, cue iniroi conímaiaimo fecádiaioi.”

³⁶ Afe mei afémiedo éroíllena afénomo ráiiediaioi.

³⁷ Ie ifo acónimo ciegábici netádiaioi. Afébicimo níifue ícoinia duere finoca daína cúeina. Afébicimo cuela bie izói daide: “Bie Jesús, Judíuai illaíma.”

³⁸ Afe llezica afénomo mena merírifiredimie coráidiaioi. Dáamie Jesús nabézimo coráidiaioi. Jáimie ie jarífezimo coráidiaioi.

³⁹ Afe llezica áfeodo jaide comini Jesuna íáire úritiaioi. Uaido iere riire íena táigoídiaioi.

⁴⁰ Daií fiene ie táigoiano íena daidíaioi:

—Juzíñamuimo gairíraco júdaiano daaruiámani ille mei meine níiticue daifíredioza; mai, o abi jíllota. Daje izói Juzíñamui Jitona o íadi, jadíe cruzmona ana bi, —daidíaioi.

⁴¹ Daje izói lletáriraini illaini, íemo ocuica uai llófuetino, íemo fariséuai naa ocuífiredede eicomíniri íena áfeduano conímana daidíaioi:

⁴² —Diga jáímaciaina afémie jíllotafiredede, mei íadi dama ie abina jíllotanide. “Uafue Israel illaíma o ia, jadíe crúzmona ana bii, áfemona omo cai íinolleza,” íena daidíaioi.

⁴³ Nai ie áfeduano íena úritiaioi:

—Mei afémie Juzíñamuimo ínoteza, mai mei birui Juzíñamui ie jíllota, Juzíñamui ie jíllotaíacania. Afémie caina “Juzíñamui Jitódicue” daide, —daidíaioi.

⁴⁴ Daje izói ie díga coraica merírifiredede íaillinoi íena íaire úritiaillinoi.

Jesús tilla

(Mr 15.33-41; Lc 23.44-49; Jn 19.28-30)

⁴⁵ Afe llezica nániena jítfireficaide. Jitoma jaíciri íllamona batí ana ítemo jítfireficaide.

⁴⁶ Ja jitoma arífemona ana ítemo Jesús riire caillide:

—Elí, Elí, ¿lama sabactani? —daide. Afe uai daíacana: “Cue Juzíñamui, cue Juzíñamui, ¿ñibái mei cue zóofetio?”

⁴⁷ Afénomo itínomona dáarie áfena cacáíllano daidíaioi:

—Bímie jaiai Juzíñamui uai llóraíma Elías jíirite, —daidíaioi.

⁴⁸ Daií daína llezica afémacimona dáamie aizida esponja daína fíllicide raa uájide. Erírede vínomo riáitano Jesús jiróíllena caífo rázido ñuitádiaioi.

⁴⁹ Mei íadi jáímaci daidíaioi:

—Dama íteza. Jetáñeno, Elías ie jíllotaibiadi, cai cíuilleza, — daidíai.

⁵⁰ Afe mei Jesús dáanomo riire caillide. Daií cáillia méifodo ja tíide.

⁵¹ Ie tíilla llezica Juziñamui gairíraco eromo fetácaroi caifona ana eróicana atóroido oni cúajicaide. Afe llezica énie docaide, íemo jíái jéerie noficiai bócoizite.

⁵² Iemo daje llezica, comini raiáfuai túicoizite. Afe llezica aillo tíide Juziñamuimo ínotinuiái meine abido cáadimacina jáidiai.

⁵³ Afe bimaci íaiói raiáfuaímona jino bitíaiói. Iemo Jesús abido caana mei, ñuera Jerusalén jófuego jáidiai. Afénomo aillo comini bie como meine abido cáadimacina cíodiai.

⁵⁴ Iemona fuiríraini illaíma naa afémie diga Jesús úínotinori, énie docailla, naa jíáie comuídifuiaina cíoillano, iere jacínaitiaí. Jacínaillano daidíai:

—Uáfueza bie Juziñamui Jitó, —daidíai.

⁵⁵ Afénomo diga ringóniai jicana eróiediaí. Aféngotiai Galiléamona Jesudo jáidiai. Aféngotiai Jesuna canófrediaí.

⁵⁶ Aféngotiai cígimo, Magdalena énie ingo María ite. Iemo jíáie María, Santiago José íaillinoi ei ite. Iemo jíái Zebedeo ai ite. Afengo mena jitórede.

Jesús raitíai

(Mr 15.42-47; Lc 23.50-56; Jn 19.38-42)

⁵⁷ Ja nauilla llezica Arimatea énie ímie José bite. Afémie ráaredimie, íemo jíái afémie Jesudo jáicaífrede.

⁵⁸ Afe jira Pilátomo Jesús abi jícajide. Iemona Pilato Josemo afémiena ite.

⁵⁹ Iemo José Jesús abi ana uano ñuera áilloroina junide.

⁶⁰ Juníllano dama ie comue raiafomo jóonete. Afe raiafo nofícimo finoca. Raia mei áillue nofícina naze íbáillano jaide.

⁶¹ Afénomo Magdalena énie ingo María naa jíáie María diga raiafo uícori ráidiainguai.

Jesús raíáfo uíñoitínona jóonetiaí

⁶² Afe jíáiruido, ocózinaiaruimo jitaica raa fínua mei, lletáiraini illaini, naa fariséuairi Pilátomo úrizaidiaí:

⁶³ —Ocuídímie, afe taino llóraíma Jesús dáinamo úibicaídicaí. Afémie caana llezica, “Daruíámani ille mei, tíillanomona meine abido cáaiticue,” daíífrede.

⁶⁴ Ie jira afe raiafo daruíámani fidi riire o finori, ie llófuegamaci ie abi naío mériaibiñelleza. Mériano comínina “Ja Cristo tíide meine abido caade,” daíítiaí. Ie llófuegamaci daíí finóadi, íaiói írainomo lloga táinofue, fueñe lloga táinofuaí baimo fiénite, —daíí daidíai.

⁶⁵ Jira Pilato daide:

—Batí omoi úiñote fuiríraini ite. Afémacido afe raiáfo omoi onona izói riire omoi finori, —daide.

⁶⁶ Iemona raiáfomo jaillano, afénona riire finódiaioi. Afe mei afe raiáfo emodo ibaila noficimo túiñoñeillena jana finódiaioi. Afe mei jóoneoide fuiríraini afénomo fíiano oni jáidiaioi.

28

Jesús tíllanomona meine abido cáadimiéna jaide

(Mr 16.1-8; Lc 24.1-12; Jn 20.1-10)

¹ Ocózinaillarui jáiruido, semana fuéñediruimo mona monáiacana llezica, Magdalena énie ingo María, jáie María diga raiáfo méiñuaidiainguai.

² Afe llezica énie riire docáiricaide. Juzíñamui abi ímie ángel dainámie monámona ana billa énie níraidua. Afémie Jesús raiáfomo dúciillano afe ibaila nofici oni tuiñode. Tuíñuano afébicimo ráide.

³ Afémie abi mona borilla izói quenire cioide. Iemo afémie iniroi jaillici izói iere úzere.

⁴ Afémiena cíóillano, jóonete fuiríraini iere jacínaitiaioi. Cuidíridiaioi. Afe llezica tíidino izói jáidiaioi.

⁵ Afe mei Juzíñamui abi ímie afénomo jaide ringóniaina daide:

—Jacínaiñeno. Onódicueza, coraica Jesús jénuaibitiomoi.

⁶ Afémie ja benó iñede. Omoína ie daina izói, ja meine abido caade. Ie íaioi raiano eróizaibi.

⁷ Afe mei ie llófuegamacimo omoi llujiri. Bie izói lloiri: “Ja afémie tíide íadi meine abido cáadimiéna jáideza. Afémie ja omoi uícomo Galiléamo jaide. Afénomo íena cíoitíomoi.” Be ómoimo cue llóiacagafue, —daí daide.

⁸ Iemona ringóniai afe raiáfomona raire abido jáidiaioi. Aféngotiai iere ióbicaidiaioi íadi, nai jacíruioidimaci.

⁹ Iodo íaioi jailla llezica Jesús íaioimo cíocaide. Cíocaillano íaioina uáidote. Aféngotiai íemo ánozillano íemo cáimadotiaioi. Ie ídaí meníñotiaioi.

¹⁰ Jira íaioina daide:

—Omoi jacíruiñeno. Cue ámatiaimo llujiri, Galiléamo raire íaioi jáilleza. Dinomo cuena cíoitiaioi, —daide.

Raiáfona úiñotaga fuiríraini llogafue

¹¹ Ringóniai jailla llezica, raiáfo jóonete fuirírainimona dáarie jófueimo jáidiaioi. Afénomo dúciillano lletáriraini illáinimo nana íaioi cíónana llotíaioi.

¹² Aféllaini ocuide eicomínimo ñue íaioi onóillena llujidiaioi. Ie jira aillo úcubena afe fuirírainimo itíaioi.

¹³ Illano íaioina daide:

—Bie izói omoi daiíri: “Naió cai ínia llezica ie llófuegamaci mériano ie abina uitíaiói.”

¹⁴ Iemo énie úiñotillaíma aféfuena fidíadi, omoi ñue íllena dani cai afémiemo úrizaitícai. Afemona afémie ómoína duere finoñeite, —daií daidíaiói.

¹⁵ Iemona afe fuiríraini úcube llínnotiaíói. Llínnota íaióina daina izói finuaidiaíói. Iemona judíuai nai biruimo Jesús meine abido cáanana uáitadiaíói; uáitano bie izói daiífirediaíói.

Jesús ie orécamacimo jónega uai

(Mr 16.14-18; Lc 24.36-49; Jn 20.19-23)

¹⁶ Afemona Jesús once dígade llófuegamaci Galiléamo jáidiaíói. Uícodo Jesús íaióimo lloga ídumo jáidiaíói.

¹⁷ Afénoimo Jesuna íaiói cíoillano, afémiemo cáimadotiaíói. Mei íadi dáamierie nai figo íinoñede.

¹⁸ Jira Jesús afémacimo áinozillano daide:

—Nana monamo ite ocuilla ríino, naa éniemo ite ríino díga ja cuemo fecaca.

¹⁹ Ie jira nana éniemo ite comínimo omoi jairi. Afémacina cue llófuegamacina oreri. Afe mei Moo Juzíñamui mámecido, daje izói ie Jitó mámecido, naa ie Ñuera Joreño mámecido íaióina báutizari.

²⁰ Nana omoi cue ocuilla uáillaina afémaci jeire omoi otátari. Afe llezica bíena omoi onoiri, cue nágarui omoi díga íifireiticueza. Jaca omoi díga íiticuemo énie fuillíruimo dúciite. Daiítadeza; ja ñie.

JUZÍÑAMUI ÑUEFUE SAN MARCOS LLOGAFUE El Santo Evangelio Según San Marcos

Juan Bautista táizicimo lluaíbite

(Mt 3.1-12; Lc 3.1-9, 15-17; Jn 1.19-28)

¹ Juzíñamui Jitó Jesucristo lloga ñúefue bie izói tainede.

² Jaiái uícodo Juzíñamui uai jino llóraima Isaías cuete:

Mai cacai, o uiécode cue rafue llotímie orédicue, o jáille io ñue ifóllena.

³ Táizicimo caillídimie uai ñue cacaide; daide:

Mai omoi Ocuíraima jaille io ñue finori; ie macalle io jáicina tuiñori, —daide.

⁴ Afe izói báutizaraima Juan táizicimo cíocaizaíbite. Dinomo comini jitáirede báutizaillena afémie ñue lluaíbite. Iaioina daide:

—Omoi comeci ifue ñúefuena méidorediomoí. Ie mei báutizarediomoí. Iemona Juzíñamui omoi comeci fiénidifuiái dóite, —daide.

⁵ Iemona nana Judea énie imaci, Jerusalen comini diga, Juan llógamo cacáreizaidiaíoi. Cacáillano íaioi comécimo ite fiénidifuiái uáfodo jino llotíaíoi. Daí íaioi llua méifomo imani Jordámo Juan báutizagaíaioi.

⁶ Juan jitaca iniroí camello itíraíai finoina. Ie ciraigi llaitáinafe igoraí finoina. Fíuai rite; jazici ie cíiji jirófiredo.

⁷ Comínimo llócaillano daide:

—Fui cue méifodo bíitimie, iere cue baimo riire ocuífireitimie. Iemona ie idai ico igai zuitánidicue, mei jofófene jamáimedicueza.

⁸ Jae jáinoido ómoína báutizadícue, ñuera iodo omoi jáiacana jino llóllena; mei íadi afe bíitimie Ñuera Joreño do ómoína uícaitaite, ñuera iodo éicitaiñeno ñue omoi jáillena, —daí daide Juan.

Jesús báutizainafue

(Mt 3.13-17; Lc 3.21-22)

⁹ Aféruillaído Jesús Nazarétmona bite. Afe Nazaret jofue Galilea éniemo ite. Billano Juan illánomo dúcide. Afénomo Juan íena Jordámo báutizade.

¹⁰ Jáinoimona jino billa llezica Jesús mona túijicaillana ciode. Daje llezica Ñuera Joreño fíiciri izói Jesumo ana bíllana Jesús ciode.

¹¹ Afe llezica monámona uai cácaide; daide:

—O iere cue izíruiga Jitódio. Ori iere caimare iticue, —daide.

Taife Jesús facátate
(Mt 4.1-11; Lc 4.1-13)

¹² Afe méifodo raire Ñuera Joreño Jesuna táizicimo orede.

¹³ Dinomo tóñega rílleniai cígimo Jesús cuarenta dígarui ite. Afénomo Satanás (Taife jiáifodo mámeciredimie) Jesús facátate. Aféruillaído Juzíñamui abi imaci ángeles dainámaci Jesús cánuabitiaioi.

Jesús Galiléamo llófuiáfue táiniaide
(Mt 4.12-17; Lc 4.14-15)

¹⁴ Ie mei illaima Herodes Bautézaraima Juan llavétate. Juan llavébilla mei, Jesús Galilea éniemo jaide. Jáillano Jesús, Juzíñamui ñuera rafue lluájide.

¹⁵ Jesús bie izói daide:

—Ja aféruimo dúcide. Ianori íllamona Juzíñamui nana íemo jaináidimaci dáaziena caimare íllena gairítaibiteza. Iemona jíllonafue omoi ínuano, omoi comeci ífuiái méidori afémacimo dájena omoi jaináillena, —daide.

Jesús cuatro dígamie facóramaci uáidote
(Mt 4.18-22; Lc 5.1-11)

¹⁶ Jesús Galilea jorai fuédado mácajide. Jaillano Simona ciode ie ama Andrés diga. Facóramai íaillinoi. Llójí jóramo dotáfirediaillinoi.

¹⁷ Jesús íaillinoína daide:

—Mai cuedo ómicoi bi. Chámuniaí ómicoi jenófírena izói, afe izói comini jenórainina ómicoína jóoneiticue, —daide.

¹⁸ Raire íemona íaillinoi llójí fíianona, afémiedo jáidiaillinoi.

¹⁹ Ie mei Jesús bai jabo jaillano Zebedeo jitó, Santiágonaciode, ie ama Juan diga. Iaiói llójí cúaidino, nocáe ero ráicana niródiaillinoi.

²⁰ Jesús íaillinoi jíríte. Iaillinoi moo Zebedeo nocaemo fiénocaillano ie canóramaci diga, Jesudo jáidiaillinoi.

Capernaumo fiénide jóriairedimie Jesús jíllotaga
(Lc 4.31-37)

²¹ Ja Capernaumo dúcidiaioi. Ie mei ocózinai llaruimo Jesús Juzíñamui uai llófueracomo jofu llófuiaide.

²² Afémie llogáfueri fáigacaidiaioi. Ua nibai ríimie izói ñue llófullofuede. Ocuícafue llófueraini afe daí llófueñediaioi.

²³ Afe llezica Juzíñamui uai llófueracomo fiénidena jóriairedimie ite.

²⁴ Afémie ja Jesumo caillide; daide:

—Nazaret ímie, Jesús, ¿ní fue có como illa? ¿Cai fatátaibitio? Ona onódicue. Juzíñamui íaifuenidimedio; afémie rafue ñue llúaibitimidio, —daide.

²⁵ Iemo Jesús fiénide jóriaímo riire úrite; daide:

—¡Líicai! Bímie fáicanocaillano oni jai, —daide.

²⁶ Iemo fiénide jóriaí afémiena izire docáitate. Ie mei jamánomo caillídemo afémiemona oni jaide.

²⁷ Ie jira nana nairai jacínaitiaíoi. Jira conímamo jicánotiaíoi:

—¿Bie minica? ¿Minica bie como llófueinafue? Bie Jesumo riire ocuállafue ite, fiénide jóriaí oréllena. Afe fiénide jóriaí afémiena ínofirediaíoi, —daidíaíoi.

²⁸ Ie jira Jesús mámeçi nana Galilea énie fuédado raire jica jalleide.

Jesús Simón Pedro jifaiño jíllotate

(Mt 8.14-15; Lc 4.38-39)

²⁹ Juzíñamui uai llófueracomona jino billano, Jesús, Simón ie ama Andrés íaillinoi icomo jaide, Santiago, Juan diga.

³⁰ Dínomo Simón jifaiño abí cuaríllamona íniranomo bíide. Afengo irárenana Jesumo llotíaíoi.

³¹ Iemona aféngomo ánozillano, Jesús afengo onoi llínota, íena caífo naidánete. Afe llezica afengo abí cuarilla aféngomona llíicaide. Daje llezica jarire íaíoi jitailla güille afengo bai íaíoi mo atide.

Jesús aillo iráredino jíllotate

(Mt 8.16-17; Lc 4.40-41)

³² Aféruído, jítoma ana zójicaidemo, ja nauíoicailla llezica, nana afénomo ite iráredino, fiénidena jóriairedino diga, Jesumo atídíaíoi.

³³ Nana dino jofue nairai afeco naze fue íbírimo gairízitiaíoi.

³⁴ Jesús aillo íaíoi mo ite diga ie duico jíllotate. Afe llezica aillo fiénide jóriaíai Jesús jino comínimona orede, mei íadi Jesús afe jóriaí úriñeillena íaíoi mona rairuide, mei afémiena onódiaíoi za.

Jesús Galiléamo llúaíjide

(Lc 4.42-44)

³⁵ Ja monáioicaidemo, nai jítireoidemo, Jesús cazíllano jino jófuemona oni tí daidínomo jaide, dínomo Juzíñamuimo úrillena.

³⁶ Afe mei Simón ie nabáñiaíri Jesús jénuaidiaíoi.

³⁷ Baillánona íena daidíaíoi:

—Nana o jenódiaíoi, —daidíaíoi.

³⁸ Iemo Jesús íaíoi na daide:

—Ainori itícuaímo mai cai jai, dínomo daje izói ñúefue cai llúaíjillena; mei afe jira jino bitícueza, —daide.

39 Daií Jesús nana Galiléado macade. Naga illánuiaimo Juzíñamui uai llófueriracomo llócaide. Afe llezica comínimona fiénide jóriai jino orede.

Chíinaite izóidimie Jesús jíllotate

(Mt 8.1-4; Lc 5.12-16)

40 Jesumo chíinaite izóidimie áinozide. Ana dújuano daide:

—Cue o jíllotaiacaniadi cuena jíllotaredio, —daide.

41 Ie jira Jesús afémiemo dúecaide. Jira ónoído jétano daide:

—Jii, ona jíllotaiacadicue. Mai o abi jácaiteza, —daide.

42 Daií dáinamona afe duico iráredimiemona cióbicaifena. Jae ñüemie.

43 Iemo Jesús afémie orede. Daje llezica riire ocuúllano daide:

44 —¡Cacai! Bumo lloñeno iri. Dama lletáriraima sacerdote dainámiemo jaillano, o abi ácatari. Dáaruído Moisés jaiiai ocuica abi dua fue ráana, mai afémiemo izájiri. Iemona comini o abi jíllotana fidiitiaioi, —daide.

45 Mei íadi afémie jaillano nana comínimo afe ie jíllonafue lluéjide. Iemo aillo comini Jesumo izire gairíoidiaioi. Ie jira ja Jesús bu jófuemo uáfodo jáinide; mei íadi jino jofue iñénanomo mácajide. Mei íadi nágagobiaimona bizájidiaioi afémiena cíoillena.

2

Jesús tízitaitimie jíllotate

(Mt 9.1-8; Lc 5.17-26)

1 Ie méifodo nano nígarui íllamona Jesús meine abido Capernaumo jaide. Afémie jofomo íllana ja fididiaioi.

2 Iemo aillo nairai ie jofomo gairídiaioi. Jofo comínina oruúllamona iere rillírede; ja naze fuemo íaioi illino iñede. Iaiommo Juzíñamui úrillafue Jesús jino llote.

3 Iemo cuatro dígamie tízitaitimie atidiaioi.

4 Iere comini íllaza, Jesús illánomo dúcinide. Ie jira jofo emódomo caifo jaillano, Jesús illa llezícamo jofo emodo íbáicano cúcoidiaioi. Cúcoianona aféfodo tízitaitimie ana agüínetiaioi, naa afémie bíirallu díga.

5 Afémaci comeci ínuana cíoillano, Jesús tízitaitimiena daide:

—Jitó, o fiénidifue jae ñue dófide, —daide.

6 Dáarie ocuúcafue llófueraini, dinomo ráiidino, íaioi comeci façáoidiaioi:

7 “¿Níbái mei bímie daií úrite? Juzíñamuina fiéni úrite. Dama Juzíñamui fiénidifuena dua. Abi dine bu Juzíñamui izói fiénidifuena doñena.”

⁸ Mei íadi dama Jesús ie comécido afémaci comeci úrillafuena onode. Jira daide:

—¿Nibái mei omoi comeci daíí facádiomoi?

⁹ ¿Ñie iere júanina iráredimiena daííllena: “O fiénidifue dófite,” nibai jáífodo daina: “Náidacai, o bíira llínota ui, mai maca”? ¿Ñie iere júanina?

¹⁰ Ie jira jáífueña ómoimo fidítaiticue. Biniemo comini fiénidifuiaina oni muiñolle ríino cuemo ite. Nanoide fima Jitódicueza, —daide. Iemo úzitaitimiena juare daináfueña daide:

¹¹ —Ona daidicue: Caifo náidacai. O bíirallu llínota mai o jofomo jairi, —daide.

¹² Ja iráredimie raire náidacaillano ie bíirallu llínote. Llínuano dinómona jino jaide. Ie jáillana nana comini ciódiaioi. Jira áferi fáigacaidiaioi. Daje llezica Juzíñamuina cáimadotiaioi. Daidíaioi:

—Jaca daíítadifueña cíorainidicai, Juzíñamui o iere jamánomoidimiedio. Mai Juzíñamuimo cai íóbilli, —daidíaioi.

Jesús Leví uáidote

(Mt 9.9-13; Lc 5.27-32)

¹³ Ie mei Jesús meine abido jorai fuédamo jaide. Nana comini íemo áinozidiaioimo, afémie íaioina llófue.

¹⁴ Jesús mácajilla llezica, Levína ciode. Leví Alfeo jitó. Afémie gobierno íbátaga úcube llínoranomo ráiide afe úcube llínollena. Iemo Jesús íena daide:

—Cuedo bi, —daide. Jira Leví náidacaillano afémiedo jaide.

¹⁵ Afe méifomo Jesús Leví jofomo güizájide. Dinomo aillo jáíie gobierno íbátaga úcube llínoraimaci Jesús dánomo güirábanimo ráiiediaioi naa fiénidimaciri. Mei iere áillomaci afe izóidino afémiedo jáidino. Afe dánomo Jesús llófuegamaci ráiidiaioi.

¹⁶ Mei íadi dáarie ocuícáfue llófueraini fariséuai diga, Jesús nana afe fiénidimaci diga naa íáiruiga íbátaga úcube llínoraimaciri dánomo güíllana ciódiaioi. Iemona Jesús llófuegamacina daidíaioi:

—¿Nibái mei omoi llófueraima afe íáiruiga íbátaga úcube llínoraimaci diga güífiredé, jirófirede? Daje izói, ¿nibái mei jáíie fiénidino diga güífiredé? —daidíaioi.

¹⁷ Aféfuena Jesús cacáillanona duera ráfuedo íaioina daide, nie ícoinia mei íáiruigamací diga ie güífirenana íaioi onóillena. Be ñifue:

—Íránidimaci manóriraimana jitáíñediaioi; dani duícotaidino da manóriraimana jítaina. Mei ñuemacimo cue

uáiduaibiñedicue. Fiénidino uáiduaibiticue afémaci jílloillena, —daide.

*Daa mona güllena fimairillena Jesumo jicánotiaioi
(Mt 9.14-17; Lc 5.33-39)*

¹⁸ Jíairuido Bántizaraima Juaado jáidino fariséuaido jáidino diga nana güñeno fimairitiaioi. Aféruimo dámierie Jesumo jicánuabitiaioi:

—¿Nibái mei Juaado jáidino fariséuaido jáidino diga nana güñeno fimairitiaioi, mei íadi o llófuegamaci fimairiñediaioi? —daidíaioi.

¹⁹ Jesús uai uano ráfuego mámano íaioi llófuete, afémiedo jáidino finócana jáimaci féinino onótallena. Daide:

—Airenafuemo uáidogamací ringo otímie íaioimo illa llezica ¿meita fimairirediaioi? ¿Nibái fimairinidiaioi? Ringo otímie íaioimo illa llezica jaca fimainidiaioi.

²⁰ Mei íadi ringo otímie íaioimona bairóbicailliruimo dúciite; aféruimo uáfueña fimairitiaioi.

²¹ Iemo daje izói ñue onótallena jáíie ráfuego mámano íaioi llófuete; daide:

—Buna jáiácuero inícuero cúaidinomo comue jofo gáijicañede iniroi nitácapu dájemo jofo jillíñede, mei comue gáijicañede nitácapu afe jáiácuirona onífenedo nane ráataitade. Iemona cúaidino jae iere aillóite.

²² Daje izói comue vino jácara igorai ie finoína botéllamo jóonenide. Jácara botéllamo comue vino jóoneadi, afétella bójicaide. Iemo nana vino táinomo tójicaide. Daje izói afe igorai finoína botella bójicaillano meine finónide. Ie jira comue vino comue igorai finoína botéllamo jóonerede, —daide.

*Jesús llófuegamaci ocózinaillaruimo trigo llizíllaticiai tícoidiaioi
(Mt 12.1-8; Lc 6.1-5)*

²³ Daa mona ocózinaillaruimo Jesús ríganíai cígido mácajide ie llófuegamaci diga. Afénodo jaillano ie llófuegamaci arrozna eroide trigo llizíllaticiai ja tícoiaidiaioi.

²⁴ Iemo fariséuái íena daidíaioi:

—¡Erocaí! ¿Nibái mei o llófuegamaci rairuírede jetádiaioi? Afena ocózinaillaruimo rairuírede, —daidíaioi.

²⁵⁻²⁶ Mei íadi afémie íaioína daide:

—¿Jaca nibái David finócana facadoñediomoi? Afémie naa ie nabáiñiairi güille iñena llezica, júbietaillano Juzíñamui jo-fomo jaide. Ua Abiatar lletáriraini illáimana illáruído, David jofo jaide. Afe jofo eromo Juzíñamui eneno mameca rairuírede panes ite. Dani Juzíñamui lletáriraini áfena güirena; jáimacimona afe rairuírede. Afe panes David uánona güite; ie mei ie nabáiñiaimo fecade.

²⁷ Iemo nane Jesús íaioina daide:

—Íima ocózinaiillarui íena fínoñega, mei íadi ocózinaiillarui íima íena mameca.

²⁸ Jira Nanoide íima Jitona cue íllamona, ocózinaiillaruina ocuíredicue. Aferui Náamadícue, —daide.

3

Jesús ónoina llirídimie jíllotate

(Mt 12.9-14; Lc 6.6-11)

¹ Jesús dáanomo Juzíñamui uai llófueriracomo jofo jaide. Afénomo ónoina llirídimie ite.

² Afénomo itínomona Jesumo iere eróioidiaioi, ocózinaiillaruimo Jesús bímienna jíllotajana onóillena, áfedo Jesumo fiénidífue jíállena.

³ Ie jira ónoina llirídimienna Jesús daide:

—Náidacai; jofo bené cígimo bi, —daide.

⁴ Dáanomo jíáimacimo jíacánote:

—¿Minícana ocózinaiillaruimo ómoiri finóredicue? ¿Nibai fiénidífue fínoitícue, nibai ñúefue fínoitícue? ¿Nibai omoi jíllotaitícue, nibai omoi títaítícue? —daide Jesús.

Mei íadi afémaci ja uai oñédiaioi.

⁵ Jira Jesús íaioiri ríicaide. Daje izói zuure íaioimo eroide, mei íaioi onóiacañena jira. Iemo afe íímana daide:

—Mai, o onoi zúitacai, —daide.

Ie jira ie onoi zuitácaide. Iemona ja ie onoi ñuera.

⁶ Afe mei fariséuai, naa Herodes imaci díga jino jaillano, Jesús fallífue raire mamédiaioi.

Aillo nairai jorai fuédamo gairídiaioi

⁷ Jesús ie llófuegamaci díga, jorai fuédamo jaide. Iemo aillo nairai Galilea imaci, íedo jáidiaioi.

⁸ Mei áillue ráfuena, afémie finócafuiaina, fidíillano aillo Judea énie imaci bite, Jerusalem imaci díga. Daje izói Idumea énie imaci bite; Jordán imani ruicáfelle imaci bite; Tiro, Sidón díga áinori itímaci bite. Nana dáanomo bitíiaioi; Jesús eróizaitíiaioi.

⁹ Ie jira Jesús ie llófuegamaci ocuide nocáe atíllena, aillo nairai iere ríllire íemo íñeíllena.

¹⁰ Mei iere aillo nairai jíllotate. Iemona nana jíáie iráredino ríllire afémiemo gairídiaioi, ie jetánollena.

¹¹ Iemo afénomo itínomona dáarie fiéni joríairediaioi. Afémiena cíóillanona, afémie uíécomo ana dújudiaioi. Dújuillano caillíoicaidiaioi:

—O Juzíñamui Jitódio, —daide.

¹² Mei íadi Jesús fiénide joríaina izire rairuide; daide:

—Juzíñamui Jitona cue íllana daiñño iri, —daide.

Jesús doce dígamie nizede, oni íaioi óriano afémaci ie ñúefue llúájillena

(Mt 10.1-4; Lc 6.12-16)

13 Ie mei Jesús ídumo caifo jaide. Dínomo jaillano Jesús comeci óiacagamie dígamie nizede. Afémiemo bitíaiói.

14 Doce dígamie Jesús níziano ote. Afémaci ie oréllimacina Jesús mamede. Ua íaioina ote ie abímo íllena, ie uai llóitínona jáillena.

15 Dáanomo ríinona igáiaioi iráredino jíllotallena, íemo jíái fiénide jóríai jino oréllena.

16 Afe nizécamaci doce dígamie. Afémaci mámeciai: Simón, ñímiemo Jesús jíáie mámecina jitaca, Pedro;

17 ie mei Zebedeo jitó íaillinoi Santiago ie ama Juan diga. Afe íaillinoimo Jesús jíáie mámeci jítade, Boanerges. Afe mámeci dáina: Iocimie íaillinoi.

18 Ie emódomo jíáie nizécamaci mámeciai: Andrés, Felipe, Bartolomé, Mateo, Tomás, Alfeo jitó Jacobo, Tadeo, íemo íere Járidotimacimo jaináidimie Simón,

19 ie mei Judas Iscariote. Afémie méifodo Jesús ie éoidinomo fécaitimie.

Fiénide jóríai ríino Jesumo ite táinona daiífirediaioi

(Mt 12.22-32; Lc 11.14-23; 12.10)

Afe méifomo Jesús ie llófuegamaci diga jofomo jofo jaide.

20 Nane dáanomo aillo nairai gairízitiaioi. Iemona Cristo ie nizécano diga ja güinidiaioi.

21 Afefue fidíillano ie onoiga nabáññiai bitíaiói ie oni uíllena, mei afémie uáírítaiide daidíaioi.

22 Daje llezica Jerusalémona bite ocuífufue llófueraini, bie izói íeri úritiaioi; daidíaioi:

—Bímie Beelzebumo jaináidimie. Afe Beelzebú fiénide jóríai illaíma, (jíáici ie mámeci Taife). Afe Beelzebú ríinodo fiénide jóríai afémie jino jíude, —daidíaioi.

23 Ie jira Jesús íaioi jíirite. Jíirilla mei, onoiga ráfuiái íaioimo llote:

—¿Ñie izói afe Taifedo Taife jíúrede? jíúnidel

24 Daa nairai énenorie jíáiziena oni bójicaillano are íñeitiaioi, mei nágazie conima diga fuirífirediaioiza.

25 Daje izói eneno dani jofóredino íaioi bójicaíadi, are íñeitiaioi.

26 Mei jira Taife dama ie diga fuiríadi, íemona dama ie bójicaíadi, afémie are íñeite. Ua áfedo fúbicaite.

27 Máirimie jofomo, buna jofo jáinide, ie ráaie bairóllena. Dama afémie máia méifomo jofo jaillano bairórega.

28 Uáfueña ómoimo lloticue. Comini fiénidifuiái nana dórede, daje izói nana íaioi fue bore fue diga dórede.

29 Mei íadi Juzíñamui Ñuera Joréño mo fieni úritimie ie fiénidifuiái jaca ua oni dónide. Dama ie ícoinia jaca íemo jíite, —daide.

30 Daí daide, mei afémie fiénidena jóriarede daidíai.

Jesús ei ie ámatiai diga Jesuna uáiduaibitiaioi

(Mt 12.46-50; Lc 8.19-21)

31 Iemo Jesús ei ie ámatiai diga dúcidiaioi, mei íadi jino fiébidiaioi. Dinómona jofo gairídina daidíai:

—Mai ie jírízai, —daidíai.

32 Jesús abido ráiedino íena daidíai:

—O ei, o ámatiai diga jino ite. O jénuaibitiaioi, —daidíai.

33 Mei afémie daide:

—¿Buoí cue eina? ¿Buoí cue ámatiaina? —daide.

34 Afe mei ie abido ráiedinomo eróillano daide:

—Be mei cue éitiai. Be mei cue ámatiai.

35 Mei Juzíñamui ocuícafueña jeire otinona bie cue ama, bie cue miringo, bie cue ei, —daide.

4

Ríjiraíma ie ifue

(Mt 13.1-9; Lc 8.4-8)

1 Meine dáanomo jorai fuédamo Jesús llófuete. Ie illánomo aillo nairai gairídiaioi. Jamánomo aillo comini illa jira, Jesús jóraimo ite nocaemo ráizaide. Nana comini guamáemo fiébicaidiaioi.

2 Iemo diga ráfuiái íaioimo llófuete. Ua íaioi onóigafuiaido llote. Ie llogáuai daide:

3 —Bíemo cácarei: Ríjiraíma ríjizaide.

4 Ricana jailla llezica dáarie rillájiai iodo cocide. Iemo ófocuizai áfena güizáibitiaioi.

5 Jáie rillájiai noficiaímo énie iñénanomo cocide. Afe rigájiai raire zocade, mei afe énie figo iñédeza.

6 Mei íadi jitoma billa llezica uzídiaioi. Jáinao iñénamona dúidiaioi.

7 Jáie rillájiai éegiai cígimo cocide. Afe éegiai zoca anamo itábicaidiaioi. Meita jaca llizíñediaioi.

8 Mei íadi jáie rillájiai ñuera éniemo baíide. Zocádiaioi; ie mei ñue comúidiaioi. Mei ñue llizídiaioi. Daji rígamona zocano aillo llizide; jáijiai afe baímo llizide; jáijiai ie baímo ua aillo jamánomo llizide.

9 Ie mei íaioina daide:

—Omoímona cacáacadino cacai, —daide.

*Afémie nibai íaioi onóigafuiai cígido llófuefirede
(Mt 13.10-17; Lc 8.9-10)*

¹⁰ Afe mei Jesús dama fiébilla llezica, afémie áinori itino ie doce llófuegamaci diga íemo jicánotiaioi:

—Bie onóigafue ¿nie izói daiíacade? —daiíiaioi.

¹¹ Jira íaioina daide:

—Juzíñamui ie uáfodo onóñega illáimana illirui rafue ómoimo llóiacade. Afedo ja lloííomoi. Mei íadi jino ite íemo jaináñhedino jaca íaioi onóigafuiaido llogáiaioi.

¹² Daií cue llófuegaiaioi, íaioi cióillano nai uina cióñedimaci izói íaioi fiébicaillena. Afe izói cácaitiaioi íadi ónoñeitiaioi. Daií llófuegaiaioi íaioi comeci ifue méidoñeillena; íemo jíái íaioi comeci fiénidifuiyai dóficaiñeillena.

*Jesús afe ríjiraima onóigafue ja ua jino llote
(Mt 13.18-23; Lc 8.11-15)*

¹³ Dáanomo Jesús jicánote:

—¿Omoi bie onóigafue onóñediomoi? ¿Nie izói daií mei jíáiena ónoitiomoi?

¹⁴ Afe riraima Juzíñamui ñuefue lloraima izóidimie.

¹⁵ Dáarie comini afe iodo cocide rigájiai izóidiaioi. Afémaci afe cue llogáfuemo cacáreidiaioi. Mei íadi áfena cacáillanona, Taife íaioi comécimo lloga ráfuena raire báruaibite.

¹⁶ Jíáie comini afe noficiaimo énie iñénanomo cocide rigájiai izóidiaioi. Afe cue lloga uaina cacáillano raire caimare líinotiaioi.

¹⁷ Mei íadi figo jánaonide rigájiai izóidiaioiza, dama íanori íllado ñue itíaioi. Afe mei lloga uai ícoinia facátafuiyai bíadi, nibai duere íaioi zefuíadi, íaioi íñoñenamona íaioimo lloga uaina raire meine abido zóofetiaioi.

¹⁸ Jíáie comini afe éegiai cígiri cocide rigájiai izóidiaioi. Lloga uaina cacádiaioi,

¹⁹ mei íadi bie éniemo ite raamo comécillano aféfuiaimo iere járaitiaioi. Bínie raa íaioina jífuate. Iemona jamánomo aillo ráaniaina óiacadiaioi. Nana bie jofo comeci óiacaigafue íaioimo lloga uaina niné féitate. Ja mei féitagaza; ja ie comécimo llizilla izói iñede.

²⁰ Mei íadi dámierie lloga uaina cacáillano áfena ñue jeire otíaioi. Afémaci ñuera éniemo cocide rigájiai izóidiaioi. Afe izói íaioi íllamona, ñuefuiaina ñue aite izói finódiaioi. Afémacimona dáarie afe daji rígamona zocano aillo llizilla izóidiaioi. Íaioimona jíáimaci afe baímo llizilla izóidiaioi. Jíáimaci afe ie baímo aillo jamánomo llizilla izóidiaioi.

*Mechera iedo cai onóigafue
(Lc 8.16-18)*

²¹ Jesús nai úrite; íaioina daide:

—¿Nogo anamo jóonellena mechera meita atica? ¡Atiñega!
 ¿Daje izói inírabani anamo rainállena mechera atícaza?
 ¡Atiñega! Naga mechera caifo jica raináfírega, ñue egáiñollena.

²² Mei ja nana báinino ite raa jino uáfodo cíocaitade. Daje izói nana jáanoga rafue ñue onóigafuena jáite.

²³ Omoimona cacáacadino cácarei.

²⁴ Afe emódomo íaioina daide:

—Omoí cacánafuena ñue omoí onoiri. Naga raa omoí
 faca izói, afe izói Juziñamui ibana ómoimo fácaiteza. Ie
 mei afe baímo afémie jamánomo aillo ómoimo íite, mei ñue
 cacádiomoiza.

²⁵ Mei íeredimíemo jíaiena ille; mei íadi íénidimíemona, íemo
 due ite raa meine baírolle.

Eniemo rigají zócajamo mameca rafue

²⁶ Nane dáanomo daide Jesús:

—Juziñamui illáimana illirui bie izoide. Daa íima éniemo
 rigájiai júdaia izoide.

²⁷ Rillano afémie abina íniaide. Ie mei cazide. Naio mona
 díga jaide. Afe llezica rigájiai zocade; zócano ñue zairide, mei
 íadi nie izói comuídeza afémie onóñede.

²⁸ Mei ñuera éniemo rigájiai énie zocataga. Nano fueñe ie ina
 jino billa, ie mei llizíllachecoí comuide, ie mei afe llizíllachecoí
 íjiaína oruide.

²⁹ Ja ie jeia llezica, riraima afe llizíllajiaína uájide. Mei afe
 jofo uáruimo ja dúcidez.

Mostaza llizíllají iedo onoiga rafue

(Mt 13.31-32; Lc 13.18-19)

³⁰ Jesús nane daide:

—Juziñamui illáimana illarui, ¿nié izoide? ¿Ñie onóigafuedo
 daje izói fácaíticai?

³¹ Juziñamui illáimana illarui mostaza llizíllajiai rilla izoide.
 Afe íjiai nana énie llizíllajiaimona da jaca íere jéjinide.

³² Mei íadi rígamona, nana raróciai ie baímo áillo nana
 jaide. Ie ícairuái áarie. Iemona féedino ófocuizai ie ícairuáimo
 ráinazaidiaioi. Afe jánamo uái ráíiediaioi, —daí Jesús daide.

Jesús jaca onoiga ráfuiáimo mámano llófueñede

(Mt 13.34-35)

³³ Daí Jesús ie jino llóiacagafuiai aillo bie izói onóigafuíaído
 jóonecana uite. Íaioi onóíllinomo daí llócaide.

³⁴ Onóigafue llóñeniadi, afémacina llófueñede. Mei íadi Jesús
 ie llófuegamaci díga oni eneno daní íaioi illa llezica nana áfena
 jino íaioimo llote.

Jesús jairifo naa jorai bagua díga llícaítade

(Mt 8.23-27; Lc 8.22-25)

35 Aferui nauídemo Jesús ie llófuegamacina daide:

—Jorai ruícafenemo mai cai jai, —daide.

36 Ie mei comini fiiano, Jesús uitíaiói. Afémie illácaedo jáidiaíói. Daje llezica jáícaeiáido afémiedo jáidiaíói.

37 Iemo iere riírede jairifo náidacaide. Iemona jorai bagua nocáe eromo cocide. Uafue, nocáe jáinoina oruíbicaide.

38 Afe llezica Jesús moífecaemo ifo jobéracadamo bíicana inide. Afémie cazítajano íena daidíaíói:

—¡Llófueraíma! ¿O caina ráiruiñedio? ¡Buízaidicai! —daidíaíói.

39 Iemo Jesús náidacaillano jairifo lletade. Llétajano jóraina daide:

—¡Llícai! ¡Uái ii! —daide. Iemona jairifo llícaide. Nana ñue jáfueraide.

40 Ie mei ie llófuegamacina daide:

—¿Nibái mei iere jacíruitiomoi? ¿Nibai nai Juzíñamuimo íinoñediomoi? —daide.

41 Iadi jairifo ie llícaitari iere jacínaitiaíói. Dani conímamo úritiaíói:

—¿Bie námie? ¡Jairifo jorai diga, afémie uaina jeire ote! —daidíaíói.

*Gerasa éniemo fiénidena jóriairedimie Jesús jíllotate
(Mt 8.28-34; Lc 8.26-39)*

5

1 Jae jorai ruicáfellemo ite Gadara éniemo dúcidiaíói.

2 Jesús nocáemona jino jáidemo, raíáfuai illánomo ífirede fiénidena jóriairedimie Jesumo bite.

3 Afémie raíáfuai illánomo ífirede. Aféruillaído afémie jaca buna llójeodo cuinánide.

4 Diga ícaíño llójeodo idai onoi diga íena cuinádiaíói, mei íadi afémie afe llójeona titada jaca jéenino titúbite. Jaca buna afémiena anáfenonide.

5 Mona naio diga afémie afénomo macáfiredé. Iduaido caillícana jaide naa raíáfuaído. Daje llezica nofíciáido ie abi bofécade.

6 Iadi Jesuna jicana ciode; cíoillano, aizícana bite. Billano Jesús anamo afémie ie caiñícido ana dújude.

7 Jesumo riire lléjecaide:

—¿Nibái cuemo jíricaidio? O Jesúsio; jamánomo caifoide Juzíñamui Jitódio. Juzíñamui mámecido omo jicádicue duere cue zéfuiñellena, —daide.

8 Daíí lléjecaide, mei nano fueñe Jesús íena dáideza:

—¡Fiénide jóriai, bie ímamona oni jai! —daide.

9 Jesús íemo jicánote:

—¿O mei búdio? —daide. Uai ote:

—Cue mámeçi Aillo Dáanomo Iráicano, mei áillomacidicaiza, —daide.

¹⁰ Iemo fiénide jóriai Jesumo izire jicade, afe éniemona jica íaiõina oni óreiñeillena.

¹¹ Afe íduai áinomo aillo tóica meróniai güífiredede.

¹² Ie jira fiénide jóriai Jesumo jicade:

—Afe meróniaimo cai oreri, dinomo cai ílleza, —daidíaiõi.

¹³ Ie mei Jesús fairíote. Iemo fiénide jóriai ímmona jino meróniaimo jáidiaiõi. Mena mil tóiníai ite. Nana afe tóiníai jorai ígodado aizida cocídiaiõi. Iemona jóraimo coróbaitiaõi.

¹⁴ Ie jira meróniai úiñoraimaci jacínaillano botádiaiõi. Afe rafue íaiõi jófuego llúajidiaiõi naa jínoidimaci diga. Ie jira afe finócafuego comini erózaibitiaiõi.

¹⁵ Jesús illánomo dúcillano nauí fiénidena jóriairedimiena ciódiaõi. Mei íadi ja biruí afémie ñue uái ráiide. Ja incuirona jítáoi. Ja ñue abina onode. Nana comini jacíruitiaõi.

¹⁶ Ie mei ciódino nauí fiénidena jóriairedimienmo finócafue llúajidiaiõi. Daje izói meróniaimo finócafue llotíaiõi.

¹⁷ Ie mei Jesumo izire jícajidiaiõi íaiõi éniemona afémie oni jáillena.

¹⁸ Jesús meine nocáe eromo jailla llezica, nauí fiénidena jóriaiana ogámie Jesús diga íllena izire jicade.

¹⁹ Mei íadi Jesús fairíoñede. Afémiena daide:

—Mai o jofomo jai. O comínimo nana omo cue finócafue o llúajiri. O Ocuíraimadicueza. Omo cue dúcaillafue llúajiri, —daide Jesús.

²⁰ Ie jira afémie jaillano nana Jesús afémiemo finócafue llúajide. Uafue nana Decápolis éniemo llúajide. Nana comini aféfuerei fáigacaidiaõi.

Jairo jiza jíllofafue

(Mt 9.18-26; Lc 8.40-56)

²¹ Jesús meine jorai ruícafenemo nocaedo jáidemo, aillo comini Jesús illánomo gairízaibitiaiõi. Afémie dino jorai fuédamo fiébide.

²² Iemo Juziñamui uai llófuériraco illáinimona dámie dúcide. Afémie mámeçi Jairo. Jesuna cióillano ie ídaimo bíjicaide.

²³ Daje llezica izire jicade:

—Cue jiza tíiacade. O onoi cue jízamo bítaibi, ie jílloilleza, ie tíiñelleza, —daide.

²⁴ Iemona Jesús afémie diga jaide. Ie llezica aillo comini afémiedo rillire jáidiaiõi.

²⁵ Afémaci cígimo daa ringo iráredingo ite. Doce diga fimona dícotaite.

26 Aillo manórirainimona duere zéfuide. Afe manórirainimo afengo úcube nana fuite. Iadi jaca ñnoñede, mei íadi jamánomo irárede. Ua iere ana jaide.

27 Naui jiáimaci Jesudo úrillafuena cacáillano, afe ringo óodana comini cígido Jesumo áinozide. Iemo afémie inícuero jetánuaide.

28 Afe uícori afengo comeci anado daide; “Ie inícuero cue jetáadi jíllotícue,” daide.

29 Ie mei inícuero jetaa llezica afengo die tótaja llíicaide. Afe llezica ie irárena jílluamona afengo abi ñue cacaide.

30 Ie mei Jesús onóbicaide. Uafue, ie ríinodo da come jíllotaga afémie raire fidide. Ie jira comini cígido jino éroicaillano jicánote:

—¿Mei bu cue inícuero jetaca? —daide.

31 Iemo ie llófuegamaci afémiena daide:

—¿Aillo comini ríllire finuana cióñedio? ¿Ñibái mei bu o inícuero jetaa jicánotio? —daidíaioi.

32 Mei íadi Jesús nágafene erórifide afémie inícuero jetádingona cióillena.

33 Ie mei afengo jágieri cuidírite. Aféngomo finócafueña onóillano, Jesús uícomo ana bíjicaizaibite. Afengo rafue nana afémiemo uáfueña jino llote.

34 Jira Jesús daide:

—Eicango, o comécido ñue ínotio, jira jíllodio. Mai jai. Jaillano uái o iri. O irárenamona ja jíllodioza, —daide.

35 Jesús nai úritemo, dáarie comini illaíma Jairo jofómona bitíaioi. Dúengo moomo lluáíbitiaíoi:

—O jiza ja tíide. ¿Ñibái mei are llófueraíma ífoci daidódio? —daidíaioi.

36 Mei íadi Jesús íaioi uai jeire oñeno, llófueriraco illaíma Jáirona daide:

—Jacíruiñeno iri. Dama o comécido ínnori, —daide.

37 Iemo Jesús nana comini íedo jáíñellena rairuide. Dama Pedro, Santiago, ie ama Juan diga uite.

38 Llófueriraco illaíma jofomo dúcillano, Jesús aillo comini failíñainana cacade; nana cáillcailli éenailana cacade.

39 Jofo jaillano Jesús daide:

—¿Ñibái mei iere failíñaidiomoi? ¿Ñibái mei iere éediomoi? Afeza tííñedeza; fia inide, —daide.

40 Iemona afémieri tadáidiaíoi. Ie mei Jesús nana íaioi jino orede. Dama jiza moo, afengo ei, íedo bitímaci diga jofo uite. Jiza illácomo jofo jáidiaíoi.

41 Jiza onoi líinuano daide:

—Talita, cumi—. Aféuai dobáicana llote: “Jiza, ona daidicue, náidacai.”

⁴² Daií dáinamona afengo raire náidacaide. Náidacaillano macade; mei afengo doce diga fimona íteza. Aferi comini iere fágacaidiaioi.

⁴³ Mei íadi Jesús:

—Afefue bumo lloñeno iri, —daide. Daií ocuide. Afe llezica afe ringoza ecállena íaioina ocuide.

6

Jesús Nazaremo jailla

(Mt 13.53-58; Lc 4.16-30)

¹ Dinómona Jesús ie éniemo jaide. Ie llófuegamaci iedo jáidiaioi.

² Ocózinai llaruimo dúciillanona Juzíñamui uai llófueriracomo llófuaide. Aillo comini íena cacáreidiaioi. Iemona íena jacíruicana fágacaidiaioi. Daidíaioi:

—¿Ninómona bímie nana bie ráfuiái onode? ¿Minica bie onónafue íemo ite? ¿Nie izói afémie bie aillo uaido dáinamona comútaga raa comútarede?

³ Mei bímie afe aménado tájiraíma, zero ua? Afémie María jitoza onódicai, zero ua? Daje izói afémie ámatíai Santiago, José, Judas, Simón dígadeza onódicai. Iemo ie miríngotíai nai cai cígimo íllana onódicai, —daidiaioi.

Iemona afémaci Jesús uaina náfueacañediaioi.

⁴ Iemo Jesús íaioina daide:

—Nana jíaie comini, Juzíñamui uai jino llóraímana ñue jíeruitaioi. Mei íadi afe llóraíma énie imaci, íezie imaci diga, figo íena jíeruiñediaioi. Daje izói ie jofo imaci íena jíeruiñediaioi, —daide.

⁵ Ie jira afénomo jamánomo aillo fia uaido dáinamona comútaga ráfuiaina comútanide. Due iráredinomo ie onoi bítanona jíllotate.

⁶ Mei íadi nabémaci íñoñenari afémie fágacaide. Ie mei Jesús áinori ite jófuedo llófuecana uite.

Jesús ie doce dígamie oni jíáinomo óriano llotátate

(Mt 10.5-15; Lc 9.1-6)

⁷ Jesús ie doce dígade llófuegamaci uáidote. Uáiduano ménamierie íaioi orede. Afe llezica Jesús afe íaioimo ie ríino iga, fiénide jóriai jino oréllena.

⁸ Ie llófuegamacina ocuide:

—Omoi jaille iodo ráíñuái jíaie minícana uiñeno iri. Daa omoi jigüida diga jairi. Tura uiñeno iri. Pan úcube diga uiñeno iri.

⁹ Omoí idai ico jitada jairi. Mena caifófecuiro uiiñeno iri, dama o jitáoi gacuiro uiri, —daide.

¹⁰ Iemo nane íai oina daide:

—Nicomo o jáiadi, dinó o fiébiri; ua afe éniemona jáinomo o jáiacana llezica dinó o fiébiri.

¹¹ Jái como omoi jáiadi, ómoína íai oí llínoñeniadi, afénomona jairi. Daje izói o uai cacáacañenomona jairi. Jaillano, o idai ico como ite eníchoma jino íai oímo teténori, daií íai oí finócafue mo o jíeruñenana jino llóitio. Uáfue na omoi lloticue: Uire duere finóbilliruimo dúcia llezica, ómoína llínoñedino jamánomo duere finóbitiaí oí. Mei íadi Sodoma comini Gomorra comini diga figo duere finóbiñeitiaí oí, —daide.

¹² Iemo ie llófuegamaci jino jáidiaí oí. Jaillano comini llotíaí oí:

—Mai omoi comeci ifue meídori, —daidiaí oí.

¹³ Daje llezica aillo fiénide jóriai jino orédiaí oí. Iráredinomo cáiredijina due jónetiaí oí; íemona jíllodiaí oí.

Juan Bautista tíllafue

(Mt 14.1-12; Lc 9.7-9)

¹⁴ Illaima Herodes aféfuiaína como fidide. Mei nana comini Jesús jalléinana onódiaí oíza. Dáarie daidiaí oí:

—Juan Bautista tíide íadi meine abido cáadimiena jaide. Iemona bie ríino afémiemo ite, —daidiaí oí.

¹⁵ Jáimaci daidiaí oí:

—Bie Juzíñamui uai llóraima Elías, —daidiaí oí.

Nane jáimaci daidiaí oí:

—Jaiái Juzíñamui uai jino llóraini izoide bímie jáie Juzíñamui uai llóraima, —daidiaí oí.

¹⁶ Herodes áfena cacáillano daide:

—Bímie ifona cue jaitátagamie Juan. Ja birui tíllanomona meine abido caade, —daide.

¹⁷ Herodes ama Felipe; ie ofaiño Herodías, mei íadi Herodes afengo ie aina ote. Afe Herodías ícoína Herodes Juan jae llavétate. Afe llezica íena llavéracomo maitátate.

¹⁸ Mei nauí Juan Heródemo llógaza:

—O ofaiño o aina ónidio; áfena rairuírede, —daide.

¹⁹ Ie jira Herodías Juamo éoicana eroide. Iena fáiacade, íadi íena fánide.

²⁰ Herodes afémie comécina jaícina ñue jóidimienana onode; iere ñuémiénana onode. Ñúefuedo íena jacíruite. Ie jira afengo íena fiéni finótañede. Herodes Juan llogafue nai figo onóñede, íadi caimare íemo cacáreide.

²¹ Mei íadi Herodías jáifuemo uíbicaide. Herodes jocóinamona jáie fimona fuilláruimo dúcide. Jira aféruído Herodes cumpleaños rafue finode. Nana ie illaini, jabóllaini,

Galilea ocúraini diga afénomo gairírdiaioi, mei Herodes uáidogaiaioiza.

²² Dínomo Herodías jiza jofo jaillano zaite. Afengo záillari Herodes ióbide; daje izói nana ie diga güizáibitino ióbidiaioi. Iemona illaíma Herodes aféngona daide:

—O jicáacaiga raa cuemo jica. Omo íitícue, —daide.

²³ Rírede uaido nana afengo jicalle raa ie fecállena íaioi uíecomo llote: “Nana cuemo jainaide éniemona júbene o jitailla dieze omo llóitícue,” daide.

²⁴ Afengo jaillano ie eina daide:

—¿Minica jícaítícue? —daide.

Afengo daide:

—Mai, Juan Bautista ifoci jica, —daide.

²⁵ Afe ríngoza jarire illaíma illánomo jofo jaide; íena daide:

—Raire plato eromo Juan Bautista ifoci jóneta cuemo ine, —daide.

²⁶ Iemona illaíma iere zúureficaide. Mei ja rírede uaido llógaza afengo jicácana afémie jáanoiacañede. Daje llezica nana ie uáidogamací cacádiaioi. Ie jira jáanoiacañede.

²⁷ Ie jira afe llezica ie abi úiñoraíma raire llavériracomo orede, Juan ifoci atíllena.

²⁸ Afe abi úiñoraíma llavériracomo jaillano, Juan ifoci jáitano plátomo jóneta atide. Afémie aféngomo izáibite. Iemo ie eimo afengo izájide.

²⁹ Juaado jáidino, fidíillano, ie abi uájidiaioi, ráillena.

Jesús cinco mil dígade iñiaí ecade

(Mt 14.13-21; Lc 9.10-17; Jn 6.1-14)

³⁰ Afe mei Jesús nauí oni jino orécamaci meine Jesumo gairíllano, nana íaioi finócafue afémiemo llotíaioi. Afe íaioi llogafue llotíaioi.

³¹ Iemona Jesús íaioína daide:

—Mai bí, oni báinino cai ocózinaili, —daide.

Aillo comíni dúcoidiaioi, jáioidiaioi; ie jira Jesús ie imaci diga, güínidiaioi.

³² Ie mei Jesús ie imaci diga nocaedo oni eneno tii daidínomo jáidiaioi.

³³ Mei íadi aillo nairai íaioi jáillana ciode. Jesuna onóíllano nana jófueмона batínomo aizícana jáidiaioi. Uafue, Jesús ie imaci diga uícomo dúcidiaioi.

³⁴ Jesús dúcia mei nocáemona jino jaillano aillo comínina ciode. Cióíllano afémacimo dúecaide. Íaioína izíruite nibai úiñoraímanide ovéjaiaí izói itíaioi. Ie jira diga ráfuiaina íaioímo llote.

³⁵ Ja nauídemo ie llófuegamaci afémiena daízáibitiaioi:

—Ja nauzáide. Afe benomo comini jofona iñede.

36 Mai comini oni ore áinori iticuaimo jáie jofue diga, dinomo íaioi güille íbajillena. Mei íaioi güillena benomo iñédeza, —daidíaioi.

37 Jira Jesús uai ote:

—Mai omoi íaioi eca, —daide.

Afémiena daidíaioi:

—¿Cai meita jaillano íbáredicai, doscientos dígabe fidi pan bimaci ecállena? —daidíaioi.

38 Jira Jesús daide:

—¿Niga pan ómoimo ite? Eroizai, —daide.

Afe fidíillano daidíaioi:

—Jubécuiro diga panes ite, mena chamu diga, —daidíaioi.

39 Ie jira mócorede raitíremo Jesús comini énenorie dázierie raizítate.

40 Iemona cincuenta íemo jái cien dígamierie raizídaitiaioi.

41 Iemona Jesús afe jubeba panes mena chamu diga llínote. Llínuano caifo monamo érocaillano:

—Iere figura, —daide. Daií dainano afe pan ditade. Dítajano ie llófuegamacimo fecade. Llófuegamaci ja comínimo oni fecádiaioi. Daje izói mena chamu nana comínido fecádiaioi.

42 Nana comini güitíaioi. Ua ñue jeírediaioi.

43 Güilla mei panes chamu diga fiébidinona doce dígagai cirígai oruítatiaioi.

44 Afe Jesús fecaca panes güitímaci cinco mil dígamíai.

Jesús jainoi emódodo macade

(Mt 14.22-27; Jn 6.16-21)

45 Raire méifodo Jesús ie llófuegamaci nocaedo jorai ruícafenemo orede. Afe llezica íaioina ie uícomo Betsáidamo orede. Dinomo íaioi jailla. Daií ñeta llezica mei Jesús nana comini diga rainode.

46 Íaioi ráinua méifodo Jesús idu emódomo Juzíñamuimo úrizaide.

47 Ja naiomo nocáe jorai cígimo ite. Jesús dama éniemo fiébicaide.

48 Jesús íaioi taino jáiana ciode. Taino jaitíaioi, mei jairifo meine íaioi fúuoideza. Iemo ja monáizaidemo Jesús íaioimo ánozide. Jainoi emódodo macade. Ainozide, íadi jícado fíiaide izói macade.

49 Ie jainoi emódodo mácajana íaioi cióillano comeci jacíruiocana facádiaioi: “¡Ñibai janaba!” daidíaioi. Jira caillíoidiaioi.

50 Nana áfena cióillano iere jacínaitiaioi. Mei íadi Jesús raire íaioimo úrite; daide:

—¡Abi omoi mame! ¡Cueza! ¡Jacíruiño omoi iri! —daide.

51 Iai oimo itícaemo jofo jaide. Jofo jáidemo jairifo llícaide. Iemo jacírui oicana áferi iere fáigacaidiaioi.

52 Ua afe daií fáigacaidiaioi, mei afe duera pan fia uáimona jamánomo aillo comútatena comécido onóñediaioiza; íaioi comeci nai riirena jira.

*Genesaret éniemo ite iráredino Jesús jíllo tate
(Mt 14.34-36)*

53 Jorai ruicáfellemo jáitanona Genesaret éniemo dúc diaioi. Zíjillano nocáe ari cuiná diaioi.

54 Nocáemona jino jailla llezica, afénomo ite comini raire Jesuna onódiaioi.

55 Iemona afémaci nana afe éni edo raire aizícana lluájid iaioi. Iemona Jesús illánona fidiillano, afe dinomo iráredimaci duera inírabanido atíd iaioi.

56 Nágagobiaido ie jáiacana izói afe jofue cígimo ite ocózinairanomo iráredino jónefrediaioi. Aillue jofue diné ie jáiadi, dúera jofue diné ie jáiadi, fia jofo inénallegoido ie jáiadi, daje izói iráredino iomo jónetiaioi. Afe llezica Jesús inícuiro fueda íaioi jetánollena daa bie dáarie izire íemo jicá diaioi. Nana áfena jetánotino jíllobicaidiaioi.

7

*¿Minica caina iaire finode?
(Mt 15.1-20)*

1 Iemo fariséuai Jesumo ánozid iaioi, dáarie ocuícáfue llófueraini diga. Afe llófueraini Jerusalémona bitíaioi.

2 Nana bimaci Jesús llófuegamacimona dámierie ciódiaioi. Afe llófuegamaci onoi jocóñeno güitíaioi, fariséuai afémacina daií daide, mei bimaci onoi jócua ocuica níciduafuemo dúc itañediaioiza. Afe ícoinia íaioi jánana úritiaioi.

3 Daií daidíaioi mei fariséuai nana judíuai diga íaioi jaiáigima uai nai uícadiaioiza. Aféfuiai daide, comini nai bie izói íaioi onoi diga icaiño jócoñenia güinidiaioi.

4 Daje izói güille fecáracomona meine billano, onoi jócua ocuica níciduafue nai fuitañenia güinidiaioi. Nai aillo ite afémaci jáie uícaigafuiai. Uafue, íaioi jiróracuai diga icaiño jocófrediaioi. Daje izói íaioi icírui, cadéruai, jamánomo diga ícaiño jocódiaioi íaioi inírabanillai diga.

5 Iemona fariséuai, ocuícáfue llófueraini diga Jesumo jicánotiaioi:

—¿Nibái mei o llófuegamaci cai jaiáigima daináfui ai uícañediaioi? Daií onoi íáirededo güitíaioi, —daidíaioi.

⁶ Jesús uai ote:

—Juziñamui uai lloraima Isaías ñue llote. Nana omoi abina ñúemaci, íadi comécina íáirediomoi. Te cuia llezica ómoimo llote:

Bie comini fueo ñúefue cuemo jitádiaioi.

Mei íadi íaioi comeci cuemo jaináñede.

⁷ Cue ñúefuedo úrillena cuemo gairífrediaioi, mei íadi íaioi úrillafue ráifiñede.

Íaioi llófuega Juziñamui daináuai, fia jamai comini ocuícáfui.

Juziñamui uáñede, daií íaioi daina íadi, daide.

⁸ Mei Juziñamui ocuícáfue féitatomoi, fia comini daináfuiái jeire omoi óllena. Aféfuai daide: ícíruai jocóllena, jiróracuai jocóllena, aillo jíáie afe izóidifuiái omoi finóllena.

⁹ Iemo afe emódomo bie izói zanoda íaioina daide:

—Juziñamui ocuícáuai iere ebire oni eneno omoi fáicanocaiga, dani omoi daináfuiái uícaillena.

¹⁰ Mei Moisés daide: “Ñue jacíruioicana o moo canori, o ei diga. Te ei ie moo diga fiénina úritimie uáfueña titáredeza,” daide.

¹¹ Mei íadi jíáifodo daidíomoi:

—Dámie ie moo íaillinona bie daiírede, “Ona canónidicue, mei nana cuemo ite ráaie jae ‘Corbán’ itíáioiza”. (Afe uai dobáicana daina Juziñamui íena mamécaza.)

¹² Damie daií daiíadi, ja mei ie ei ie moo diga canónide náfuetiomoi.

¹³ Afe ícoina Juziñamui ocuica uaina jámairuitiomoi. Uafue, comini llocana jaide llogafue ínota ñúefueña jámairuitiomoi. Aillo afe izóidifuiái finófrediomoi.

¹⁴ Nane dáanomoi Jesús comini jíirite; jíirillano íaioina daide:

—Nana omoi cácarei, comeci onoiri.

¹⁵ Nana güillemo comécina íáirenafue ñede. Mei íadi comécimona jino bitifue come comeci íáiretate.

¹⁶ Omoimona cacáreiacadino cacai, —daide.

¹⁷ Jesús comini fíiano jofomo jaide. Dinomoi ie llófuegamaci afe onóigafuedo íemo jícanotiaioi.

¹⁸⁻¹⁹ Iemo íaioina daide:

—¿Daií jaca ónoñeitiomoi? Nana jinona güiga raa comécimo jíñede. Jébegimo jaide. Te jira cómena íáiruitañede. Jébegimo jailla mei, abímona oni dotácaza. ¿Aféfuena fidíñediomoi?

Afedo Jesús daiíacade nana güille ñuera.

²⁰ Nane daide:

—Íima comécimona jino bitifue dama afémiena íáiruitade.

²¹ Mei afémie erómona, ua ie comécimona jino fienui uibíllafue bite; íemo jíruírenafue bite, naa jíáie jíruífuai díga; íemo jíáima méniáfue bite,

22 meríillafue diga; iemo jiáima raa bairóacanafue bite, jiáie fiénidifuiái diga; ie mei jiáima jífuiafue bite, nana iáiredifuiái diga. Iemo úradoillafue bite, naa táinona úrillafue diga. Iemo táinona abi ínuafue bite, naa abina onóñenafue diga.

23 Nana bie figóñedifuiái come erómona bite; billano cómena iaire finode.

Jiáizie ingo Jesumo ínote

(Mt 15.21-28)

24 Dinómona Jesús Tiro éniemo jaide, Sidón énie diga. Daa jofomo jaide. Buna ónoñeillena báinino jaide. Mei íadi afémie retáirinide.

25 Iemo fiénidena jóriaredingo ei, ie íllana raire fidide. Billano Jesús anamo dújude.

26 Afengo judío ingóñede; jiáizie ingo. Afengo énie mámecei Sirofenicia. Afengo jízamo ite fiénide jóriái óllena Jesumo jicade.

27 Mei íadi Jesús daide:

—Juzíñamui úruiaí raire nano fueñe güilleza. Juzíñamui úruiaí güille bairoda tóica jico izoide comínimo ígadenia figóñede.

28 Afengo uai ote:

—Uafue Ocuíraíma; mei íadi úruiaí güíllamona, ana cocídijiaí, güirábani anamo ite jicótiruai güífirediaíoi, —daide.

29 Ie mei Jesús daide:

—Ua llotio. Iemona ja jáiredio, o jízamo ite fiénide jóriái jae oni jáideza, —daide.

30 Afengo jofomo dúcina llezica, iníramo bíide jízana ciode. Fiénide jóriái ja ua aféngomona ñue oni jaide.

Jefona cacáñede gogódime Jesús jíllotate

31 Nano íanori íllano Jesús ja Tiro éniemona billano, Sidón énie dibénedo jaide. Afe mei Decápolis éniemo ite jófuiaí dinedo jaide. Aféniedo jaillano, meine abido Galilea jóraimo dúcide.

32 Afénomo jefona cacáñede uaina jino figo baiñedime Jesumo atídiaíoi. Iemo izire jicádiaíoi Jesús aféniemo onoi bitállena.

33 Ie jira Jesús náiraímona oni báinino íena uite. Dinomo Jesús dama ie onocai jefona cacáñedime jefomo dutade. Ie mei Jesús dama ie onócaimo tuánuano afe úriñedime iife jetánote.

34 Afe mei Jesús monamo érocaillanona comecei zúurenamona zegóricai. Zegóricailano íena daide:

—¡Efata! —daide. Afe uai jino dobáiñuano daina: tújicaí.

35 Afe llezica jefona cacáñedime jefo tújicaide; ie iife ñue jíllode. Iemona afémie ja ñue úrite.

36 Iemona Jesús íaíoina rairuide:

—Jiáimacimo lloñeno iri, —daide. Jesús afe daií dígacaiño íaiõina rairuide. Mei íadi Jesús iere rairuide íadi, áfena náfueñeno aféfuena baimo jino llócaidiaioi.

³⁷Iemo nana comini iere jamánomo fáigacaidiaioi. Daidíaioi:

—Nana ñue finode. Afémie jefona cacáíñedimie cacáitate; uaina jino figo baiíñedimiena ñue úritade, —daidíaioi.

8

Jesús cuatro mil diga comini ecade
(Mt 15.32-39)

¹ Aféruillaído aillo comini meine dáanomo gairídiaioi. Iaiõi güille iñede. Ie jira Jesús ie llófuegamaci jíirita, íaiõina daide:

² —Bie náirairi dúecaidicue. Ja daruiámami benó cue diga itíaioi. Iaiõi güille jae iñede.

³ Güiñeno íaiõi jofomo orédicuenia, iodo báicana jáitiaioi. Dáarie jicana bitíaioiza, —daide Jesús.

⁴ Ie llófuegamaci uai otíaioi:

—Benó bu iñénanoza ¿minícana íaiõi ecáredicaí?

⁵ Jesús íaiõimo jicánote:

—¿Niga panes ómoimo ite? —daide.

Jira afémaci daidíaioi:

—Siete panes caimo ite, —daidíaioi.

⁶ Ie jira nana comini ana éniemo ráiitate. Iemo Jesús afe siete panes llínuano, Juzíñamuina “Figora” daide. Daina mei, afe panes ditade. Daií ñeta, ie llófuegamacimo ite. Afe mei llófuegamaci comínido oni fecádiaioi.

⁷ Afémacimo due jiza chamu ite. Jesús Juzíñamuina “Figora” dainano afe chamu fecátate.

⁸ Nana güitíaioi. Iemona ñue jeirediaioi. Ie mei güíllamona fiébidino siete diga cirigai iráidiaioi.

⁹ Afe güitino cuatro milmo áinoziacade. Afe mei Jesús nana íaiõi rainode.

¹⁰ Ráinua mei afémie raire ie llófuegamaci diga nocaemo jofojaide. Iemo Dalmanuta éniemo jaide.

Fariséuai uai dáinamona comuide onótate raa jicádiaioi
(Mt 16.1-4; Lc 12.54-56)

¹¹ Iemona fariséuai Jesumo júfiduai bitiaioi. Ie facátaiacadiaioi. Iemona: “Monámona uaido comuide onótate raa caimo ácatari,” daidíaioi.

¹² Iemo Jesús comeci zúurenamona izire zegóricaillano daide:

—¿Nibái mei bie nairai uáimona comuide onótate raa jicádiaioi? Uáfuena ómoimo lloticue, jaca onótate raana bu ómoimo finoñeite, —daide.

13 Jira Jesús íaioi fíiano meine nocaemo jaide. Iemo jorai enéfenemo jaide.

Fariséuaimo ite pan aillo fáitate raa izóidifuedo Jesús llote (Mt 16.5-12)

14 Jesús ie llófuegamaci diga íaioi jailla llezica, íaioi ráiñuai féitatiaoi. Dinó nocaemo fia daa pan íaiomimo ite.

15 Iemo Jesús íaioi ocuide:

—Omoi cacai. Fariséuaimo ite pan aillo fáitate raa izóidifuemona abí omoi rairuiri. Daje izói Heródesmo ite pan fáitate raa izóidifuemona abí omoi rairuiri, —daide.

16 Iemo llófuegamaci dani conímamo llotíaioi:

—Ñibai cai pan iñena jírari, Jesús caina daí riire daide, —daidíaioi.

17 Jesús dani íaioi úrillana onóillano daide:

—¿Ñibái mei, “caimo pan iñede” dani jofo conímamo daíñrediomoi? ¿Nai fidíñediomoi? ¿Nai omoi comécimo déiñede? ¿Omoi comeci nai iere riirede?

18 ¿Omoi uído cióñediomoi? ¿Omoi jefodo cacáñediomoi? ¿Nai cue finócafuena onóñediomoi?

19 Naui cinco mil iñiaí dígamiedemo afe cinco panes cue fecácamo, ¿niga cirigai fiébidinona iráidiomoi? —daide.

Iemo daidíaioi:

—Doce dígagai cirigai, —daidíaioi.

20 Jesús nane daide:

—Daje izói cuatro mil iñiaí dígamiedemo afe siete panes cue fecácamo, ¿niga oruide cirigai iráidiomoi? —daide.

Iemo daidíaioi:

—Siete dígagai cirigai, —daidíaioi.

21 Iemo íaioina daide:

—¿Nai omoi comécimo jaca déiñede? —daide.

Betsaida jófuego ite uina cióñedimie Jesús jíllotate

22 Ja Betsaida jófuego dúcidiaoi. Iemo uina cióñedimie Jesumo comini atídiaoi. Iena jetánollena izire jicádiaoi.

23 Uina cióñedimie ónoído llínota, jofue jinomo Jesús ie uite. Iemo fue fáicido ie uimo bitade. Afe llezica afémiemo onoi bitade. Afe mei íemo jicánote:

—¿Ja baca o ui cioide? —daide.

24 Jira uina cióñedimie érocaillano daide:

—Jii, comini mácana ciódicue, mei íadi uáfodo íaioina cióñedicue. Afémaci aménaiaí izói cióidiaoi, —daide.

25 Ie jira Jesús nane dáanomo ie uimo ie onoi jóonete. Afe mei afémie riire eroide. Iemo ie ui ja jíllode; ja afémie naga raana uáfodo ñue ciode.

26 Ie mei Jesús ie jofomo ie orede. Iena daide:

—Jófuemo jáiñeno iri. Afénomo ite comínimo, buna lloñeno iri, —daide.

Pedro Jesús Crístona maméinafue jino ñue llote
(Mt 16.13-20; Lc 9.18-21)

²⁷ Afe mei Jesús ie llófuegamaci diga, Cesarea Filipo éniemo jaide. Afénomo ite jéenide jófuiai dinedo jáidiaioi. Afe iodo íaioi jáillanomo, Jesús ie llófuegamacimo jicánote:

—Comini cuena ¿nie izói daidiaioi? —daide.

²⁸ Afémaci uai otíaioi:

—Dáamierie Juan Bautístadio daide. Jáimíiai Elíasdio daidiaioi. Ie jáimíiai jáie uai lloráimadio daidiaioi, —daí uai otíaioi.

²⁹ Iemo íaioina jicánote:

—Omoimona, ¿cuena bu daidíomoi? —daide.

Ie jira Pedro íena daide:

—O Crístodio, —daide.

³⁰ Iemo Jesús íaioina ocuide, aféfuena bumo llóñeilla.

Jesús ie tíillifue fíditate
(Mt 16.21-28; Lc 9.22-27)

³¹ Iemo Jesús dama ie duere finóllifue como fueñe íaioimo llote. Lluano daide:

—Nanoide Hima Jitódicueza íadi iere duere zefuítallicue. Eicomini cuena ruifíruitiaioi. Daje izói lletáriraini illaini, ocuícáfue llófueraini diga cuena ruifíruitiaioi. Omoina daidícue, afémaci cuena méineitiaioi. Mei íadi daruíamani íllamona tíllanomona meine abido caifo náidacaiticue.

³² Afefue íaioimo ñue jino llote. Ie jira Pedro eneno oni Jesuna uite. Uillano Pedro Jesús íena lletade.

³³ Mei íadi Jesús meine gírecaillano ie llófuegamacimo eroide. Jesús Pedro llétano daide:

—¡Mai cúemona oni jai! Satanás izóidimiedioza. O comeci Juzíñamui mamécana ónoñede. Dama bie éniemo dúidino úrilla izói úritio, —daide.

³⁴ Dáanomo nane Jesús ie llófuegamaci jírrite, nana jáie comini diga. Iaioina daide:

—Cuedo jáiacadimie mai dama ie comeci jítaina féitari. Féitano cuedo biri. Daí cuedo bíllamona nibai afémie tíadi áfemo comeci fánide; cuedo bírede.

³⁵ Jaca ninomo íllena, dama ie abi rairuíacadimie dinó jaca raire llícaite. Mei íadi cue ícoinia abi rairuíacañedimie meine jíllano llícaíñeite; daje izói, cue lloga ñúefue ícoinia abi rairuíacañedimie zíñona íite.

³⁶ Mei jáífodo nana éniemo ite raa cai óiadi, mei íadi afe llezica cai zíñona illifue niné féiadi, ¿nieze canócacai? ¡Canóñegacai!

³⁷ ¿Ñieze ibárede da come ie ziiñona illafue abido óllena? Ibáñide.

³⁸ Mei jii, dáamie cuena meáiruiadi, abido afémiena meáruiticue. Daje izói bie minícana iñoñede fiénidimaci uiécomo cue lloga uaina meáruitimie, iena meáruiticue. Mei Nanoide Hima Jitódicueza. Uire cue Moo aillo ñue máriedo bíiticue. Nana ie ñuera abi imaci diga bíiticue. Aféruimo bie éniemo ite cuena meáruitinona, daje izói íaioina meáruiticue.

9

¹ Nane Jesús íaioina daide:

—Uáfueña ómoimo lloticue. Benomo itímacimona dáarie nai íaioi tiiñenia Juziñamui aillo ie riinodo ie illáimana íllana cíoitiaioi, —daide.

Jesús abi jiáifodo méidoficaide
(Mt 17.1-13; Lc 9.28-36)

² Seis dígarui íllamona, Jesús Pedro, Santiago, Juan diga uite. Dani dígamie eneno caifónedumo afémie uite. Ja dinomo íaioi eróicana afémie abi jiáifodo méidoficaide.

³ Ie inícuiro quénicuiirona jaide, ua iere úzerede jaillici izói. Bie éniemo finódino iníroina afe izói úzeretanidiaioi.

⁴ Afe llezica Elías, Moisés diga Jesumo úrillana cíodiaioi.

⁵ Jira Pedro Jesuna daide:

—Llófueraima, nii cai benomo ñue illa. Daámani jofóchupi ómoiena cai finolli, daa óchupi, jiáie Moisés ichupi, jiáie Elías ichupi, —daide.

⁶ Afe dáanomo ie llófuegamaci iere jacinaificaidiaioi; jacinaillano Pedro nie izói dáinana onóñenano daí daide.

⁷ Afe llezica íaioimo mona uíllie ana bite. Billano afémacina ferínote. Afe mona uílliemona daa uaina cacádiaioi. Llote:

—Bie cue izíruiga Jitó. Aféniemo cácarei, —daide.

⁸ Afe llezica, nágafene eróroidiaioi íadi íaioi diga buna cíóñena, dama Jesús.

⁹ Idumona ana bitaioimo Jesús afe íaioimo cíonafue jiáimacimo llúana rairuide. Íaioina daide:

—Nanoide Hima Jitódicue. Uire cue tíillinomona meine abido cáadimiena cue illíruimo afe omoi cíonafueña llóreitiomoi, —daide.

¹⁰ Ie jira aféfuemo dani coméciidiaioi. Mei íadi afémie tíillinomona abido cáadimiena illífuena jicánofirediaioi:

—¿Minícana íite? —conímana dani daidiaioi.

¹¹ Ie mei Jesumo jicánotiaioi:

—¿Ñibái mei ocuícáfue llófueraini daífirediaioi, caina illáimaite Mesías daínámie uícodo Elías raire biite? —jicánotiaioi.

¹² Afémie uai ote:

—Iere uafue Elías raire cue uícodo bite. Ua billano nana meine ñue jaícina finuai bite. Iemo, mei Nanoide ñima Jitódicueza, cue billáfuedo ¿nie izói Juziñamui Cuegáuai daide? Aféuai bie izói daide: “duere zéfuiticue” daide. Daje izói “comini cuena jámairuitiaioi” daide.

¹³ Mei íadi ómoína daidicue, Elías ja bite. Dani afémaci óiacana izói afémiemo finódiaioi. Mei Cuegáuai uícomo daina izói, afe izói ja afémiemo zuíde, —daide.

Jesús fiénidena jóriairede dúemie jillotate

(Mt 17.14-21; Lc 9.37-43)

¹⁴ Ie mei ja jáie llófuegamaci illánomo Jesús daámani caifónedumo uigámaci diga meine bitíaioi. Billano aillo comini íaioimo gairíllana ciódiaioi. Ocuica uai llófueraíni dáanomo ite. Afe llezica afémaci Jesús llófuegamacimo júfidotiaioi.

¹⁵ Ie mei Jesuna cióillano iere fáigacaidiaioi. Afémiemo aizícana uáiduidiaioi.

¹⁶ Ie jira Jesús ie llófuegamacimo jicánote:

—¿Minica afe ocuica uai llófueraíni júfidotiomoí? —daide.

¹⁷ Afénoimo itímacimona daa uai ote:

—Llófueraíma, benó omo cue jitó atídicue. Fiénide jóriaí afémie uáinino finode.

¹⁸ Náganomo ie jáiadi afe jóriaí ie uánona ana dotáfiredo. Ja dinomo fuedo mulléfiredo; afe llezica ízie mutúricaide. Iemona ie abi iere naillílicaide. O llófuegamacimo fiénide jóriaí jino óllena jicádicue, íadi afémaci ónidiaioi, —daide.

¹⁹ Jira Jesús uai ote:

—¡Aíí, Juziñamuimo íñoñedimaci! ¿Nie dinó ómoíri íitícue? ¿Nie dinó ómoína mozóitícue? Bené dúemie ati, —daide.

²⁰ Jira atídiaioi. Afe jóriaí Jesuna cióillano, afe dúemie abi mejne cuidítate. Cúdiamona afémie éniemo baide. Dinomo jabíoicaide. Fuedo mulléoide.

²¹ Jira Jesús ie moomo jicánote:

—¿Ja níé dino daí ite? —daide.

Jira moo daide:

—Jaca ie dúenamona.

²² Diga ícaíño fiénide jóriaí afémie iraimo dotáfiredo. Daje izói illemo dotade ie titállena. Minícana cairi o finórenia, mai cairi fino. Cairi dúecairi. Cai cano, —daide.

²³ Jesús íena daide:

—¿Ñibái mei “O finóreniadi cai cano” cuena daidio? Daí daíñeno iri, mei Juziñamuimo ínotimiemo naga raa finóredeza, —daide.

²⁴ Ie jira afe úrue moo caillíoicaide:

—¡ínoticue! Cue cano jamánomo cue ínolleza, —daide.

25 Jesús aillo comini ofillana cióillano, fiénide jóriai riire lletade. Daide:

—Uáinitade jóriai, cacáitañede jóriai, o jino jáillena ja ocuídicueza, ¡jai! ¡Bie úrue fáinocai! Meine abido íena oñeno iri, —daide.

26 Iemona jóriai caillide; cáilliano dúemie meine nane riire cuidítate. Cuidítajano oni jaide, íadi afe dúemiena tíide izói finode. Jira aillo comini:

—Ja tíide, —daidíai.

27 Mei íadi Jesús ónoído llínnota caifo dúemiena naidánete. Iemona afémie ñue jílloda náidacaide.

28 Ie mei Jesús daa jofomo jofa jaide. Afe mei ie llófuegamaci eneno íemo jicánotiaoi:

—¿Ñibái mei fiénide jóriaina ónidicai? —daidíai.

29 Jira Jesús daide:

—Bie izói jóriai dama Juziñamuimo úrillado, íemo fimairillado jino orérede, —daide.

Jesús ie tíillifue meine fidítate

(Mt 17.22-23; Lc 9.43-45)

30 Afénomona íaioi jaillano Galilea éniédo jáidiaoi. Jesús báinino jáiacade bu ónoñeillena.

31 Mei aféruillaído Jesús ie llófuegamacimo llófullofuedeza. Afémiemo zúillifue íaioimo llote. Lluano íaioina daide:

—Nanoide íima Jitódicueza íadi uire náiraímo izájillicueza, cue íaioi fállena. Mei íadi daruíamani cue tíillanomona meine abido cáadimiena íiticue, —daide.

32 Mei íadi afémaci ie dáiñana onóñediaoi. Daje izói íemo jicánuana jacíruítiaoi.

¿Bu iere jamánomo áillomiena?

(Mt 18.1-5; Lc 9.46-48)

33 Iemo afémaci Capernaumo dúcidiaoi. Jofomo íaioi illa llezica, Jesús íaioimo jicánote:

—¿Minícafue íomo júfidotiomo? —daide.

34 Mei íadi jaca uaina oñediaoi. Mei jae íodo júfidotiaoi, ¿bu cáimona jamánomo áillomiena illa?

35 Ie jira Jesús ana ráinaillano, ie doce diga llófuegamaci jírite; daide:

—Dámie raire uiécodo áillomiena jáiacaniadi, nano fueñe iere jamáimiena írede; daje izói nana comini canóraimana írede, —daide.

36 Iemona Jesús daa úrue llínuano íaioi cígimo jónete. Ie mei ie ónoído íena llirínuano comínina daide:

37 —Bie úrue cue mámeçido llínotimie dájena cuena llínote. Daje izói cuena llínotimie dama cue llínoñede, mei íadi cue orédimiena cue abido llínote, —daide.

*Caina éoñedimie cai dibénemo ite
(Mt 10.42; Lc 9.49-50)*

38 Iemo Juan Jesuna daide:

—Llófueraíma, dámie ciódicaí o mámeçido fiénide jóriai jino orede. Mei íadi caido jáiñena jira íena rairuídicaí.

39 Mei Jesús daide:

—Rairuñeno iri. Mei daí cue mámeçido ciórainina raa finódimie ñuemie. Daí finódimie afe finua méifomo raire cuedo fiénide.

40 Mei caina éoñedimie ua cai dibéfodo itímie.

41 Jáie come cue mámeçido omoi jirótaadi, mei Crísono omoi jainaina jira, afe jirótatimie uáfueña ie jirídolle raa llínoite, —daide.

*Fiénidifuego baiñena iere jacírede
(Mt 18.6-9; Lc 17.1-2)*

42 Jáie come, bie cuena ñnote dúemie fiénidifuego baiñtaiadi, afe come fiénide. Baiñtatimemona figura, cimoímo áillue noñcina cúinano monáillaimo dotárede.

43 Dama o onoi fiénidifuego o baiñtaiadi, afe o jaitari. Júbezi onoi diga ziiño ñue illafue Juziñamuimona o maiñóadi, iere ñuera. Mei nágafezi onoi íadi “comini duere finolle iraimo” o dotábicaíadi, iere figóñede. Afénomo ite irai dúitanide.

44 Afénomo ite aigíroíai tíñediaíoi; afe aigíroi, afeno itímacina ziiñona duere fínoitiaíoi. Afe irai jaca dúíñede.

45 Daje izói o ídai fiénidifuego o baiñtaiadi, áfena jaita. Júbene ídaiñide o illa llezica ziiño ñue illafue Juziñamuimona o maiñóadi, jamánomo ñuera. Mei jííifodo iraimo o dotábicaíadi ñue mena ídaiñedimie o íadi, iere figóñede. Afénomo ite irai dúitanide.

46 Afénomo ite aigíroíai tíñediaíoi; afe aigíroi, afeno itímacina ziiñona duere fínoitiaíoi. Afe irai jaca dúíñeiteza.

47 Daje izói o uíj onai íáidaitaiadi, mai afeji cuerónori. Ua júbene fíidimie Juziñamui illáimana illánomo o jáiadi, jamánomo ñuera. Mei íadi nágaillinoi újñeredimie o illa llezica, iraimo o dotábicaíadi iere figóñede.

48 Afénomo ite aigíroíai tíñeitiaíoi; afe aigíroi afeno itímacina ziiñona duere fínoitiaíoi. Afe irai jaca dúíñede.

49 Mei nana fia fecaca Juziñamui íóbitalle jobaica ríllenaimo salna jóoneñediaíoi, afe fecaca rille ñue íllena. Daje izói nana

raamo cai jírinafuiaido ñue íredicai. Aféfuiai irai come uzilla izírena izói caina izi cácataite, Juzíñamui anamo ñue cai íllena.

⁵⁰ Sal ñuera; mei íadi afe sal ie cáimana féiadi, ¿minícado afe sal meine abido cáimacaitarede? Mai dani conímaiaina caimátailafue dibénemo omoi iri. Afe llezica comeci caimare uái illáfuemo dani conímaiaina ífireiri.

10

Jesús, naga come ie aina oni dótana rairuide

(Mt 19.1-12; Lc 16.18)

¹ Jesús ja Capernaúmona oni Judea éniemo jaide. Ua Jordán ruicáfellemo ite éniemo jaide. Iemo aillo comini ie illano dinó meine abido gairízaibitiaioi. Iemona Jesús ie ífírena izói íaioina llófuete.

² Iemo fariséuaimona dáarie Jesuna fieni facátaibitiaioi. Jesumo jicánotiaioi:

—¿Mei nibai dáamie ie aina oni dótajana rairuírede, nibai ráiruíñega? —daidíaioi.

³ Iemona Jesús uai ote:

—¿Ñie izói Moisés ómoina ocuide? —daide.

⁴ Jira íena daidíaioi:

—Moisés llote, dáamie ie aina oni dotáacanamona, afémie dinena aféngona “jae ai oni dotaina rabe” cúerede. Ie mei daií oni dotárede, —daidíaioi.

⁵ Iemo Jesús íaioina daide:

—Moisés afe uaina ómoimo llote, mei omoi comeci ifue iere riíredeza.

⁶ Mei íadi nano fueñe, Juzíñamui nana ráaniaina comuítaja llezica, “afémie iima ringo diga íaillinoina comuítate.”

⁷ “Ie jira naga iima, ie ai úamona, ie moo ei diga fiénocaillano, oni dáanomo íitiaillinoi.

⁸ Daií ie ai onónamona afe íaillinoi daa come izóidena jáitiaillinoi.” Ja mena cómeñediaillinoi, dama daa cómedeza.

⁹ Ie jira Juzíñamui dáanomo jónegaiaillinoi, comini oni dotánide, —dinori Jesús daide.

¹⁰ Ja jofomo Jesús naa ie llófuegamaciri dúcinamo, ie llófuegamaci aféfuena Jesumo meine abido jicánotiaioi.

¹¹ Jesús íaioina daide:

—Afe ai oni dotádimie jiáie ai óllena, dotaca ringo dibénemo afémie jiruifue finode.

¹² Daje izói ini oni dotádingo jiáimie mo iníreillena, afengo jiruifue finode.

Jesús úruiai ñue íllena finode

(Mt 19.13-15; Lc 18.15-17)

¹³ Ie mei Jesumo úruiai atídíaioi, íaioimo ie onoi bitállena. Mei íadi llófuegamaci atídina rairuide, íaioi átíñeillena.

14 Jesús áfena cióillano ríicaide; jira íaioina daide:

—Rairuíño iri. Fáinocai úruiai cuemo bílleza. Iaiioina llótaidoño iri. Juziñamui jaináidino ua afe bie úruiai izói itíaiioiza.

15 Uáfueña ómoína daidicue, Juziñamui illáimana íllana jíeruiredicai. Uruiai áfena jíeruilla izói jíeruiredicai. Mei íadi nana afe izói jíeruiñedinona Juziñamui ie caimare illínomo jofe óreñeite.

16 Iemo úruiaína llirínuano, ie onoi íaioimo bítano íaioína ñue finode.

*Ráarede jitócome Jesús diga úrizabite
(Mt 19.16-30; Lc 18.18-30)*

17 Jesús meine abido jáizaidemo, dáamie aizícana Jesús anamo dújuzaibite. Dújuillano jicánote:

—Ñue Llófueraima, ¿nie izói íiticue zííñoña cue illino cue óllena? —daide.

18 Jira Jesús daide:

—¿Níabái mei cuena fígomie daidio? Íimamona buna fígomiéna íñede. Dama Juziñamui fígomie.

19 Ocuícafuiaina onódio:

“Jíáima ai diga íñoño iri;

come fañoño iri;

meríriñoño iri;

bumo taino lloñoño iri;

jíáima jífueñoño iri;

o moo, o ei diga ñue cacáreiri,” —Jesús daide.

20 Afémie uai ote:

—Llófueraima, nana aféfuiaína cue jitócomenamona jeire ófiredicue.

21 Jesús afémiemo éroicaillano íena izíruite; daide:

—O dafue nai jeire oñédio. Mai nana omo ite raa fécajiri. Fécajano afe iba dúeredimacimo ine. Iemona jamánomo jíridolle izoide raa monamo omo iite. Daí o finolle mei, cuedo bii. Mei cuedo o bíllamona o tíadi, áfena náfueñoño benó biri. Coco jai, —daide.

22 Mei íadi áfena cacáillano, afe íima zúucaide. Ua zuure oni jaide, aillo ie ráaniai illa jira.

23 Ie mei Jesús abido comínimo éroicaillano, ie llófuegamacina daide:

—¡Níí féireña ráaredimie Juziñamui illáimana illáruimo jofe jáillena! —daide.

24 Jira llófuegamaci aféuairi iere fáigacaidiaioi. Jesús meine nane daide:

—¡Uruiai, níí féireña úcubena ínotino Juziñamui illáimana illáruimo jofe jáillena!

²⁵ Camello eedo uífodo jailla jamánomo juánide, mei íadi ráaredimie Juzíñamui illáimana illáruimo jailla iere Juárezde, —daide.

²⁶ Afena cacáillano, jacínaificaidiaioi. Dani conímamo jicánotiaioi:

—¿Mei bu jílluille? —daidíaioi.

²⁷ Jesús íaioimo eróillano daide:

—Afena comínimo finónide; mei íadi Juzíñamuimo finórede. Juzíñamuimo finónide raana íñede, —daide.

²⁸ Jira Pedro íena daide:

—Ocuíraima, nana caimo ite raana fiénocaidicai o diga cai jáillena, —daide.

²⁹⁻³⁰ Jira Jesús uai ote:

—Uáfueña ómoína dáitícue, naga come cue ícoínia íemo cue lloga jíllonafue ícoínia diga, ie jofu, ie ámatiai, ie mirínguai, ie moo, ie ei, ie jitótiai, ie jacáfaiái dieze afémie fiénocaiadi, uáfueña meine llínoite. Ja bie éniemo cien dígcáiño afe baimo jofue, ámatiai, mirínguai, éitiai, jitótiai, jacáfaiái llínoite. Uafue, dieze llínoite duere zefuúllafue diga íadi. Ie mei monamo zíñona illino llínoite.

³¹ Aillo biruúllaido nánoraímaci uire ódaidímacina jáitiaioi. Daje izói aillo biruúllaido ódaidímaci uire nánoraímaca jáitiaioi, —daide.

Dáanomo Jesús ie tíllifue llote

(Mt 20.17-19; Lc 18.31-34)

³² Ja Jerusalén iodo jáizaidiaioi. Jesús ie llófuegamaci uícodo jaide. Comeci iere facábicaidiaioi. Jiáie íedo jáidino jacíruiocana afémiedo jáidiaioi. Jira Jesús doce diga llófuegamaci eneno uáidote. Ianori íllamona íemo finóllifueña abido íaioimo llote.

³³ Daide:

—Maí omoi cacai. Nanoide íima Jitódícueza. Jerusalemo jáizaidicai. Mei íadi dinomo lletáriraini illáiniaimo izájillicue. Daje llezica ocuica uai llófueraímimo izájillicue. Iemo afémaci cue titállena ócutiaioi. Onínemacimo cuena izájitiaioi.

³⁴ Cueri jífánodoítiaioi. Cuena tícoítiaioi. Cue túallaitiaioi. Cue títaítiaioi. Mei íadi daruíamani íllamona tíllanomona meine abido cáadímiena íitícue, —daide.

Santiago Juan diga uire uícoinafue Jesumo jicádiaillinoi

(Mt 20.20-28)

³⁵ Afe mei Zebedeo jíto íaillinoi Santiago Juan diga, Jesumo jícajidiaillinoi; daidíaillinoi:

—Llófueraíma, coco jicalle jítaigafueña cócomo lloiri, —daidíaillinoi.

36 Iemona Jesús íaillinoína daide:

—¿Minica mei ómicoimo cue finóllena jitáidiomicoi? —daide.

37 Iemo íena daidíaillinoi:

—Uire o ebírede illáimana illíruido, cócomona dáamie o nabézimo, jíaimie o jarífezimo cócona o ráinatari, —daidíaillinoi.

38 Iemona Jesús íaillinoína daide:

—Daií jicádiomicoi íadi abina onóñediomicoi. Cue duere zéfuillifue izói, ua erírede jirole júrua izói, ¿zéfuiREDIomicoi? Daje izói cue izire tíizaillifue izói, ¿tíizairedIomicoi? —daide.

39 Iemo uai otíaillinoi:

—¡Ie mei! Afena ocuédicoco, —daidíaillinoi.

Jira Jesús íaillinoína daide:

—Uáfueña dáitícue, cue duere zefuillifue izói, duere zéfuitiomicoi. Cue izire tíille izói, tíitíomicoi.

40 Mei íadi cue nabéfenemo, cue jarífenemo ómicoi ráinallena, cúemona llónide. Afe ráinallino dama Juzíñamui maméinamacimo dúide, —daide.

41 Jíáie diez diga llófuegamaci afefue cacáillano, Santiago Juan dígamo icíritiaioi.

42 Iemo Jesús íaioína jíirillano, íaioína daide:

—Onódiomoiza, náiraiaimo illáimaifiredino riire ocuídillaini dani jáidiaioi, comínina náamatallena. Aféllaini cígiri ite ríimaci, íaioi ríinona izire comínimo cácatatiaioi.

43 Mei íadi omoi cígiri afe daií íñeitiomoi. Mei jíáifodo omoi dibénemo illáimana íacadimie, omoi canófireDIMIENA jáirede.

44 Daje izói ómoimona ocuíacadimiena íacadimie, nana jíáimaci anamo íaioi táijitagamiENA írede.

45 Mei jíi, Juzíñamui oreca Nanoide fima Jitódicueza. Mei íadi jíáimaci cuena canóllena biñédicue. Mei jíáifodo nana comínina cánuabiticue. Uafue áillomaci íaioi fiénidifueMONA zuitalle izói, íaioína cue jíllotallena tíizaibitícue, —dinori Jesús llote.

Jesús uínidimie Bartimeo jíllotate

(Mt 20.29-34; Lc 18.35-43)

46 Jae Jericomo dúcidiaioi. Afe jófueMONA Jesús jino jáidemo ie llófuegamaci diga, naa aillo comíniri, uínidimie io fuemo ráide. Afémie Timeo jitó, Bartimeo. Dino afémie úcube jicáfirede.

47 Nazaret ímie Jesús ánozillano fidíillano, uínidimie jíriioicaide:

—¡Jesús, jaiai illaíma David Jitó, cuemo dúecai! —daide.

48 Aillo comíni íena rairuídíaioi ie llícaillena; íadi jaca nai jamánomo jíriioide:

—¡David Jitó, cuemo dúecai! —daide.

⁴⁹ Ie jira Jesús uái náidaillano daide:

—Afémie uaido, —daide.

Jira uínidimie uáiduano íena daidíaiói:

—Abi mame. Náidacai. O uáidoteza, —daidíaiói.

⁵⁰ Jira ie emódodiroi duíñuano iere raire náidacaillano Jesumo bite.

⁵¹ Jira Jesús íemo jicánote:

—¿Minica omo cue finóllena jitáidío? —daide.

Jira uínidimie uai ote:

—Llófueraíma, cue uíreacadícue, cue eróillena, —daide.

⁵² Jesús íena daide:

—Mai o jairi. O ínuamona jae jíllodioza, —daide.

Afe llezica uínidimie ciode. Iemona Jesús jáillado afémie jaide.

11

Jesús illáimana Jerusalemo jofo jaide
(Mt 21.1-11; Lc 19.28-40; Jn 12.12-19)

¹ Jerusalemo áinozillamona, Jesús mena llófuega íaillinoi uícomo orede. Jae Betfagé jofue, íemo jíái Betania jofue diga áinomo itíaiói. Dáanori Olivo daina ídumo itíaiói. Íaillinoi óriano daide:

² —Uícomo ite duera jófuemo ómicoi jai. Omicoi dúcille llezica cuinaca duera búrrona cíoitíomicoi. Nai áfedo buna ráiñena. Zúitajano cuemo ati.

³ Bu ómicoimo jicánoiadi ¿nibái ómicoi zuitaca? íena dáitío: “Ocuíraíma Jesús jitailla jira. Ie mei raire meine omo atille,” —daide.

⁴ Afe íaillinoi jaillano jino naze fue iori cuinaca búrrona baizájidiaillinoi. Afe zuitádiaillinoi.

⁵ Dáamie dño itínomona íaillinoína daide:

—¿Minica ñetíomicoi? ¿Nibái burro zuitádiomicoi? —daide.

⁶ Jira uai otíaillinoi Jesús íaillinoína daina izói. Ie jira:

—Jii, mai ui, —daidíaiói.

⁷ Iemona búrrona Jesumo izájidiaillinoi. Izájillano íaiói inícuirona burro emodo jobédiaiói. Ie mei dñomo Jesús caífo ráinade.

⁸ Aillo comini íaiói iniroi iomo jobédiaiói. Jíáimaci íbiairede amena rábaillai otá iomo jóonetiaíoi.

⁹ Uícoídímaci ódaídímaci diga jírrioicaídiaiói:

—¡Ebírede! ¡Juzíñamui mámedo bitímie caímáreficairi!

¹⁰ ¡Como íacade illáimana illino caímare comuiri! ¡Ua caí jaiáigima comúidímie David illáimana illino ñue móonairi! ¡Juzíñamui ebírede rafue daíri! —daidíaiói.

11 Ja daí Jesús Jerusalemo jofo jaide. Jaillano Juziñamuimo gairíracomo jaide. Nágafenemo eróirioicaillano jino Betániamo jaide, naa ie doce diga llófuegamaciri, mei ja nauídeza.

Jesús llizíñede higuera daina amena faidode
(Mt 21.18-19)

12 Afe jáíruido Betániamona jino abido billano, Jesús jufíruite.

13 Macádiaoimo ñue íbiairede higuera aménana Jesús jicana ciode. Iemona dinomo jaide afénamona nibai ie llizíllajaiina óllena. Mei íadi Jesús dúciillano, hígojiaina baiñede. Afe amena táinona fia íbiairede, mei aféruimo hígonino nai dúciñedeza.

14 Iemo Jesús afe aménana fáiduno daide:

—Jaca benómona buna bie amena llizíñenamona ie llizíllajaiina ríeñeiteza, —daide.

Daí ie dáinana ie llófuegamaci cacádiaoi.

Juziñamui gairíraco Jesús duano ñue finode
(Mt 21.12-17; Lc 19.45-48; Jn 2.13-22)

15 Ie mei Jerusalemo meine dúcidiaoi. Juziñamui gairíracomo Jesús jofo jaillánona, dinomo ráaie fecádino íbároidino diga jino júaide. Ucube méidoraini ibani Jesús caitade, fíicirillai fecádino ráiraniai diga.

16 Afe gairíracomo buna minícana úiñellena afémie rairuide.

17 Iaioi llófuete:

—Juziñamui Cuegáuai daide: “Cue jofo ua nana náiraimo Juziñamuimo úrille illácona mameide,” mei íadi meríritino illano jae afénona finódiomoi, —daide.

18 Lletáiraini illaini, ocuícáfue llófueraini diga afe ie finócafueña fidídiaoi. Iemona afémie fállena jenódiaoi. Iena jacíruitiaoi, afémie llófueinafuerei nana nairai iere fáigacaideza.

19 Ja nauízaidemo Jesús afe jófueмона jino jaide, naa ie llófuegamaciri.

Naui ciona higuera amena jae zaférede duiraina jaide
(Mt 21.20-22)

20 Afe jáíruido, jítiramo meine abido Jerusalemo íaioi billano, naui ciona higúerana abido ciódiaoi, mei íadi birui afe amena nana ie jáinauairi zaférede duiraina ja jaide.

21 Iemo Pedro comeci uíbicaillano, Jesuna daide:

—¡Llófueraima, erói! O faidoca higúerana ja duiraina zaféreficaide, —daide.

22 Jesús íaioimo uai ote:

—Juziñamuimo mai omoi ñnofireiri.

23 Uáfuenta ómoína dáititue, dáamie jizíñeno nana ie comécido ínuamona, bie caifóneduna ocuícana daiíadi, “Benómona oni ii; jóraimo dotábicairei,” afe ie dáiñana ua zúite; afémie jeire ua llezica, afefue daií afémiemo íficaite.

24 Ie jira ómoína dáititue, Juzíñamuimo omoi úrillano jicaca raa, ja nibai o llínoga, áfena mai o ínofireiri. Iemona afe jicaca raa óitiomoi.

25 Nágaruido Juzíñamuimo o úriadi, jíáimiena o éoiadi, mai íemo o comécimo ite íaifue féitari. Daií o finori, monamo ite omoi Moo Juzíñamui ómoimo ite íaifuiái dólleña.

26 Iadi o abi ímie iba omoi óiadi, monamo ite omoi Moo Juzíñamui, ómoimo ite íaifuiáiña dóñeite.

Jesumo ocuille uai ite

(Mt 21.23-27; Lc 20.1-8)

27 Iemo Jerusalemo abido bitíaiói. Jesús gairíracomo maca llezica, lletáriraini illaini íemo ánozidiaíói. Afe llezica ocuica uai llófuetino afémiemo gairídiaíói, éicomini díga.

28 Nana íemo jicánotiaíói:

—¿Bífuiai fínuana, bu o ocuilla? ¿Bu ríinodo bie raa finódio? —daií daidíaíói.

29 Jesús íaiói uai ote:

—Omoimo daa rafue jicánoititue. Cuemo uafue omoi llóíadi, bífuiai cue finoca ríino ómoimo llóititue.

30 ¿Bu mei ocuica báutizallena Juan? ¿Juzíñamui nibai ocuica, nibai comini? Mai fáirio, —daide Jesús.

31 Ie mei afémaci dani júfidotiaíói; daidíaíói:

—Juzíñamui ocuica cai daiíadi, Jesús caina fáiríoite: “Iemona ¿nibái mei íemo ínoñediomoi?”

32 Mei íadi comini ocuica, daiínidicai, —daidíaíói.

Comínina jacíruillano daií úritiaíói. Ja onódiaíoiiza, nana comini Juamo ñue comécidiaíói: “Ua Juzíñamui uaido Juan úrite,” daidíaíói.

33 Iemona Jesuna daidíaíói:

—Onóñedicai, —daidíaíói.

Ie mei Jesús íaíoína daide:

—Nie ríinodo bie raa finóditue, daje izói ómoimo llóñeititue, —daide.

12

Comini fáfirede tájidino jíáifuena caina onótate

(Mt 21.33-46; Lc 20.9-19)

1 Iemona Jesús íaiói onógafuiaido íaíoimo úrizaide; íaíoína daide:

—Nauí dáamie jíriconai izoide raa rizájide. (Afe jíritue izoide raa ríinano víñédona mameína.) Afémie afe rillano ie abi

cirínora finode. Ie mei afe jíricono eroide úvaiaí zaizíraco finode, afe llizilla iji íaioí óllena. Nane are caífo jacafai cigí úñoraco afémie nite, afe rigano ñue úñollena.

‘Ie mei afe énie naama dáarie táijitaganomo ie rigano fecade, áfena íaioí úñollena. Afémie daíí fécano oni jica jíaie éniemo jaide.

² Jíriconino llezica, ritímie ie ocuícamié afe táijitagamacimo orede, íeiena mameide llizíllajiaí dieze óllena.

³ Mei íadi afe uáibitímiena llaitádiaioí; lláitano íaioí faga. Daíí ñeta ria íemo fecáñeno oni íena orédiaioí.

⁴ Ie jira afe naama nane jíaie ocuícamié orede. Mei íadi afe orécamiéna nófiedo níjidiaioí. Níjiano ie ifona íaioí bofeca. Iemo fieni íena úritiaioí.

⁵ Daje izóí nane jíaimie orede. Afémie íaioí titaca tíide. Afe mei diga icaíño aillo jíaie ocuícamiéaí dínomo oréide. Afe orécamacimona dámerie fia faga; jíaimaci tícoízitiaioí.

⁶ ‘Nai dáamie naama dibénemo ite. Daa afe naama jítana fiébite; iere ie izíruigamie. Iiraicaíño ie jító orede. Comeci facade: “Afémaci ñue íemo comécillano íena ñue íinoitiaioí; ie daína uaina jeire óitiaioí,” daide.

⁷ Mei íadi táijitaganano dani afémaci úritiaioí: “Bímie nibai ie moo feci raa máíñoitimie. Mai ie cai faa, ie mei cai náamatallena.”

⁸ Ie jira íaioí llaitaca; íaioí titaca tíide. Ie mei ie abi raiñeno afénomona oni dotaca.

⁹ Ie mei Jesús jicánote:

—¿Nie izóí bie énie naama afe fiénidinona fínoite? Billano afe táijitaganona títaite. Ie mei afe jírícore izóidino jíaie úñoraimacimo fécaite.

¹⁰ ‘Jaiái Cuegáuaina nai facádoñediomoi? Afe uai bie izóí daide:

Jofó níraíni oni fádoica nófie, ja ñuera jíaílliraina jaide.

¹¹ Bie cai Ocuíraíma finoca.

Iere jamánomo ebire caimo cíoide.

Dinori Jesús úrite.

¹² Iemona Jesuna llaitáacadiaioí, llavéllena. Mei ja onódiaioíza, Jesús bie onóigafuedo íaioína uáitate. Mei íadi comínina jacíruillano, Jesús jetáñeno íena fiédiaioí. Fíiano oni jíáinomo jáidiaioí.

*Gobierno íbátaga úcube cai íbállena Jesús llote
(Mt 22.15-22; Lc 20.20-26)*

¹³ Afe mei fariseo illáicomíni afémacimona dáarie Jesumo orédiaioí. Daje izóí Heródemo jaináidinomona orédiaioí, Jesuna úritallena, afe ie uaido taino íeri nitállena.

¹⁴ Bimaci billano íena daídíaioí:

—Llófueraima, onódicaiza jiáimaci ie lloga uai iinoñoeno, o jaca uáfueña úrifiredio. Comini jínofene ciona izói riire jicánoñedio. Mei jiáifodo Juzíñamui lloga cai ñue illafue jífueñoeno jino llófuetio. ¿Mei iere riiredillaima ocuica úcube íemo fecáredicai, ñibai fecánidicai? ¿Afe cai fecállifue figura, ñibai figóñede? —daidíaiói.

15 Mei íadi Jesús íaiói uáfodo úriñenafueña onode. Ie jira íaioina daide:

—¿Ñibái mei cue jánari táinona úritiomoi, cue llaitállena? Daa úcubetuni cuemo ati, cue eróillena, —daide.

16 Afétuni atídíaiói. Afe eróillano Jesús íaioimo jicánote:

—Bie uíeco jana, ¿bu ie? Benomo cuega mámecei ¿bu ie? —daide.

Afémaci fairíotíaiói:

—Riiredillaíma ie, —daidíaiói.

17 Iemo Jesús íaioina daide:

—Riillaíma ie raa íemo abido ine. Daje izói Juzíñamui ie raa íemo abido ine, —daide.

Afémacina ie dáinari iere comecei jiáifoficaidiaíoi.

Tíidino meine abido cáadena íllena jicánotíaiói

(Mt 22.23-33; Lc 20.27-40)

18 Ie mei saduceo imaci dáarie Jesumo úrizaidíaiói. Bimaci tíidino meine abido cáaillena lloñédíaiói. Ie jira bie taino lloga rafue Jesumo jicánotíaiói. Nai jicánoñenia fueñe daidíaiói:

19 —Llófueraíma, Moisés jaiáimona caimo cuegáuai daide: Daa íima áiredimie ie úrue nai íñena llezica tíadi, ie ama afe ofaiño óite. Aféngomona daa jító comuírede ie ama tíidimie íena. Daií daina mei jicánotíaiói:

20 ‘Mei nauí siete dígade ámatíai cai cígimo ite. Nanóidimie áirede. Afémie jítónino tíide.

21 Nanóidimie emodo ímie ie ama fecingo ote. Daje izói jítónino tíide. Daje izói nanóidiaillinoi emodo ímie afe fecingo uano jítónino tíide.

22 Nana afe siete dígamíai nanóidimie fecingo otíaiói. Afémacimona daa jítóna comuíñede. Afe ícoimo afe fecingo tíide.

23 Ie jira meine abido cáailiruimo ¿bumo afengo dúide? Mei siete dígamie daango otíaióiza, —daidíaiói.

24 Mei jira Jesús fairíote:

—Omoi onóñoeno fieni comecei facádotiomoi, mei Juzíñamui Cuegáuaina onóñediomoiza. Daje izói ie ríinona onóñediomoiza.

²⁵ Mei tíidino meine abido cáaille llezica aina óñeitaiói. Afe izói íaiói jízanaiina iníretatañeitaiói, mei monamo ite Juzíñamui abi imáciai izóitaióaiza.

²⁶ Mei íadi tíidino meine abido cáailífue dibénedo llogáfueña ¿nai facadóñediomoi? Afefue Moisés cuezánicomo ite. Aféruimo Juzíñamui Moiseño boode raroci cígido úrite. Bie izói éna daide: “Dáanomo Abraham ínoga Juzíñamuidícue, Isaac, Jacob díga, mei birui afémaci cue illánomo cue díga cáadiaióaiza,” daí Juzíñamui daide.

²⁷ Iemo Jesús nai daíloide: Mei ua inéidino Juzíñamuiñedeza; mei íadi jíáfodo cáadimaci ie Juzíñamui. Daí bífueña omoi baitáñenia iere féiraitiomoi, —Jesús ja dínomo daide.

Iere jamánomo ínorede caiño ocuica uai
(Mt 22.34-40)

²⁸ Afe dáaruído ocuica uai llófueraínimona dáamie Jesumo dúcide. Jesumo gairídino nana Jesús díga úrilla uaina afémie cacade. Daje izói Jesús ñue íaiói uaina fairíuana afémie cacade. Afe uai fairíuana fidíllano Jesumo jícanote:

—Nana ocuica uáimona, ¿nie iere jamánomo ínoreña? — daide.

²⁹ Jesús ie uai ote:

—Nana ocuica uáimona bie iere ínorede nánora uai: “Israel, mai omoi cácarei. Cai Ocuíraíma Juzíñamui jaca daide.

³⁰ Mei jira nana o comécido o Ocuíraíma Juzíñamuina izírui. Daje izói o comécimo ite joreño díga izírui. Daje izói nana o ífo úrilla uaido éna izírui. Daje izói nana omo ite ríinodo éna izírui.” Be ñie nánora ocuica uai.

³¹ Afe méifoide ocuica uai daje izói jóide. Afe uai daide: “Dama o abi o izíruiella izói, afe izói o aino ímiena mai izírui.” Jíáie ocuica uai izoide bie baímo íñede, —daide.

³² Iemona Ocuica uai llófueraíma daide:

—¡Ie mei! Llófueraíma, ñue daídío. O daína uafue. Uáfueña Juzíñamui daide. Afémie baímo jíámiena íñede.

³³ Daje izói afémiena nana cai comécido izíruiella ñuera. Ie llezica nana cai ífoci úrilla uaido éna izíruiella ñuera. Ie llezica nana cai comécimo itífuiaído éna izíruiella ñuera. Ie llezica nana caiño ite ríinodo éna izíruiella ñuera. Daje izói cai abi ímiena dani cai abi izíruiella izói, afe izói éna izíruiella jítaírede. Bie izói cai izíruiella, aillo ráífide. Ua, nana fatá Juzíñamuimo fia fecaca rílleníai baímo ráífide, nana Juzíñamui íóbitallena jobaica rílleníai díga, —daide.

³⁴ Iemona baitádimie izói afémie ie fairíua uaina cacáillano, Jesús éna daide:

—Juzíñamuimo dúillena ímiena íanori itio, —daide.

Afe mei jacírui llano buna jiáifue na Jesumo jicánoñediaioi.

¿Bu jító Cristo? Jesús dama jicánote
(Mt 22.41-46; Lc 20.41-44)

³⁵ Jesús gairíracomo llófullofue na llezica, comínimo jicánote:
—Onódiomoiza ocuica uai llófueraíni “Cristo David jító”
daíífrediaioi. ¿Nie izóí daíírede?

³⁶ Mei dama David Juzíñamui Joreñodo úrite; daide:

—Monamo ite cai Moo Juzíñamui cue Ocuíraimana daide:
“Cue nabézimo rainai, o éoigamacina cue anáfenolliruimo,” daíí
David daide.

³⁷ David Crístona “cue Ocuíraima” daííadi, ¿nie izóí afe llezica
Cristo ie jítóna írede? —daide Jesús. (David emodo imácimona
Cristo cómuide.)

Aféruido aillo comini, caimare Jesús úrilla cacáreizaibitiaioi.

Ocuica uai llófueraíni fiéni illafue Jesús jino comínimo llote
(Mt 23.1-36; Lc 11.37-54; 20.45-47)

³⁸ Jesús llófullofue na llezica íaioina daide:

—Ocuica uai llófueraínimona abíomoi rairuiri. Afémaci árrera
ñuera inícuiro jítano comini uíecomo mácafírenana gáidiaioi.
Afe llezica íaioi anamo comini fecáracuaimo ñue jacírui oicana
íaioi uáiduana gáidiaioi. (Daje izóí comini íaioi daínauai
jíeruillena gáidiaioi.)

³⁹ Afémaci Juzíñamui uai llófuera como ite ñuera ráíiranona
raire jiáimaci uíecodo jenóífrediaioi. Afe izóí comini
iráiziracomo iráiziadi, afémaci iere ñuera ráíirano uíecodo
maíñóífrediaioi.

⁴⁰ Afémaci fecínguai jofue naa íaioi raari bairóífrediaioi;
mei íadi comínimo jiáífodo afémiaí cíoillena, are Juzíñamuimo
úrioidiaioi, comini éoilla llezica. Afémaci iere jamánomo duere
finócamacina jáitiaioi, —daide Jesús.

Dúerede fecingo fecaca úcube jamánomo ñuera
(Lc 21.1-4)

⁴¹ Iemo Jesús Juzíñamuimo gairíracomo ráíicana eroide.
Úcube dotáranu uícomo ráíide. Comini afénomo úcube
dótajillamo eroide. Iere ráaredino aillo úcubena dotádiaioi.

⁴² Bie llezica fecingo dúeredingo mena úcubetuni dótaibite.
Bituni íaínguai ‘cobre’ ie; iere due ráífide centavo izoide.

⁴³ Ie mei Jesús ie llófuegamaci jírrillano íaioina daide:

—Uáfue na ómoimo lloticue. Bie dúerede fecingo úcube
jóneracojimo dotaca úcube, iere jamánomo jiáimaci afénomo
dotaca úcube baimo jaide.

⁴⁴ Nana jiáimaci úcube fiébide államona dotádiaioi, mei íadi
afengo dúeredingo íadi, nana aféngomo ite úcube ie iga. Afengo
güille óllena úcubena nana afengo ja dotaca, —Jesús daide.

13

Gairíraco uire júdaijena Jesús ie llófuegamacimo lloste
(Mt 24.1-2; Lc 21.5-6)

¹ Jesús gairíracomona jino billa llezica, ie llófuegamacimona dáamie íena daide:

—Llófueraíma, ¡bie iere ñuera nófiemo eroi! ¡Daje izói bie jofo áilluemo eroi! —daide.

² Iemo Jesús uai ote:

—Mai bie áillue jófuemo ñue omoi eroi. Benomo daje emódomo nófiena fiebiñeite. Nana oni júdaille, —daide.

Iirairui uícodo íitífuiai

(Mt 24.3-28; Lc 21.7-24; 17.22-24)

³ Afe mei Olívona mameide ídumo jáidiaioi. Gairíraco uíeco dibénemo ite. Afénomo Jesús ráiidemo, Pedro, Jacobo, Juan, íemo Andrés báinino íena daidíai:

⁴ —Nana bífuiai o daina júdaille zuíllaruina onóiacadicaí. Mai caimo llone. Nana bífuiai fúiacana ¿nie izói caina onótaité? —daidíai.

⁵ Jesús uai ote:

—Bu omoi jífueñeillena, ñue abí omoi rairuiri.

⁶ Aillo cue mámecido imaci abí jítano bíitiaioi. “Cristodicue” dainano bíitiaioi. Afémaci aillo comínina jífueitiaioi.

⁷ Mei íadi aillo áinori ite fuiríllafuena, íemo jica ite fuiríllafue diga omoi fidíadi, omoi jacínaiñeno iri, mei afe daí íredeza. Mei íadi nai íirairuiñedeza.

⁸ Mei aféruimo daa nairai jíai náiraímo fuirízaité. Afe llezica dáazie jíáziemo jobáirizaité. Aféruillaído diga illánomo énie riire dócaite. Dáaruído aillo júbie diga éñiaído iite. Be aféfuiai comini duere zefuille táinia raa.

⁹ Mei jira abí ñue omoi rairuiri, mei riire ocuídímaci gairíllanomo omoi uítiaioiza; Juzíñamui uai llófueriracomo ómoína fáziitiaioi. Cue ícoínia ríillaini uícomo ómoína óreititiaioi, jamánomo riiredillaini diga. Afe daí cue dibénedo íaíoi mo úritiomoi.

¹⁰ Mei íirairui nai dúciñena llezica, cai jíllonafue uai nana náiraímo jino llóredeza.

¹¹ Riiredillainimo omoi oreille llezica, omoi úrillifuemo raire uícomo comécido facáñeno omoi iri. Daje izói omoi comécillifuemo raire uícomo uibíñoñeno iri. Aféruimo Juzíñamui omoi ífomo úrilla izói, mai omoi daíri, mei dani omoi úriñeitiomoi; omoi comécimona Juzíñamui ie Ñuera Joreño úrite.

¹² Afe llezica dáamie nahí ie ámamo fiénidífue nítano jíáimiena ie fatátaite. Daje izói móotiai nahí ie jítótaiina

fiénidifuedo izájitaitiaioi, íaioi titállena. Afe ibana íaioi jítótiai, nahí ie móotiaimo fiénidifue nítano íaioi fáite titállena.

¹³ Cue ícoinia, nana comini ómoína éoillano iere íáruitiaioi. Mei íadi íirairuimo jáicina Juzíñamuimo iere féitañoeno ínotimie jíllobicaite.

¹⁴ ‘Jaii Juzíñamui uai jino llóraima Daniel daa iere íáruiga raa dibénedo cuete. Afe íáruitaitaite raa nabene jofue júdaitaite. Afe fiénidifuena oruide raa Juzíñamuimo gairíracomo ite jeruícacomo jóonia llezica, Judea éniemo itino, árera íduaimo botárediaioi. (Bibe facádimie mai ñue onoiri.)

¹⁵ Aféruimo o jofu jinófene idamo omoi íadi, jofu eromo ite ráaniaina omoi uájíñoeno iri; raire botari.

¹⁶ Jacáfaimo táijidimie abido jofomo biñoeno iri, ie inícuiruai óllena.

¹⁷ Aféruimo ite ringóniai namóciredino iere duere zéfuitiaioi, aizínidiaioiza. Daje izói monoi jirode duera úrue llíidíngotiai duere zéfuitiaioi.

¹⁸ ‘Ie jira Juzíñamuimo omoi jicari, “Nóci illáruillaído caina botátañoeno iri.”

¹⁹ ‘Bie izói duere zefuálliruina jaca jaii ífinide. Ua, Juzíñamui bínie fínuamona benomo afe izóidena íñede. Aféruillai méifomo afe izói íñeite.

²⁰ Juzíñamui afe zúuredirui are jóoneadi buna jíllóñeille. Mei íadi afémie nizécanona izíruillano íanori afe zúurediruina afémie jóoneite. Are íñeite.

²¹ ‘Iemona aféruimo dámie ómoína daííadi: “¡Erocai, benomo ite Cristo!” áemo íñoñoeno iri. Daje izói jíáimie daííadi: “Eroi, batínomo ite Cristo,” áfena íñoñoeno iri.

²² Mei uafue, aféruído aillo jífueritino bíitiaioi. “Cristodicue” dáíitiaioi. Daje izói “Juzíñamui dibénedo úriticai” daínano comínina jífueitiaioi. Afémaci cíorainina ráaniai fínoitiaioi, jíáie jacíredifuiái diga, comini jífuellena. Uafue, daje izói dama Juzíñamui nizécanona jífueacadiaioi, afémaci daí jífuetareniadi.

²³ Mei íadi mai ñue omoi comeci facáoiri; mei nana bífuiaina jae uícodo ómoimo llotícueza.

Monámona bite Nanoide Ima Jitó, Cristo meine bíllena Jesús llote

(Mt 24.29-35, 42-44; Lc 21.25-36)

²⁴ ‘Ie mei aféruillaído, zúurediruillai méifomo, jitoma duíbicaite. Fíui égaiñoñoite.

²⁵ Monamo ite úcuai cócítiaioi. Afe llezica mona eromo ite ríino mozídino, mairíñoeno jaillano dócáitiaioi.

26 Iemo naui monámona bite Nanoide fima Jitó Cristo meine abido cíocaite. Uíllie cígido biíte; aillo ríino diga. Jamánomo ebírenafuedo biíte.

27 Afe mei ie abi imácina óreite, nana ie nizécamací nana mona fuédamona gairítallena. Ua jamánomo jica ite ígobíai imácimona nizécano nana dáanomo atille. Daje izóí énie fueda imácimona nizécano nana dáanomo atílliaíoi.

Nai ie llófuegamacimo llófuiano, íaíoi na daide:

28 ‘Mai bie higuera amena rafue omoí onoiri. Afe higuera íbíaí firuilla llezica fimona áinozillana onódiomoi za.

29 Daje izóí nana bie zúurediruillai zuíllana omoí cíoiadi, íirairuí áinozillana onóitiomoi. Jae iere íanori ite.

30 Uáfueña ómoína dáitícue, afe illáruido itino comíni nai tíñenia, nana bifue zúite.

31 Nana mona énie diga fúite, mei íadi cue daína uai jaca nínomo méidonide. Cue llua izóí zúite.

32 ‘Mei íadi afe illíruina buna onóñena. Daje izóí Juzíñamui abi imaci onóñediaíoi. Ua afe izóí Juzíñamui Jitó aféruina onóñede. Dama cai Moo Juzíñamui onoi ga.

33 ‘Te jira, aferuí dúcinana onóñediomoi za, mai ñue figo abína omoí onoiri. Afe llezica mai ñue omoí uíñori. Daje izóí Juzíñamui mo úrifireiri.

34 Cue meine billifue dámie jica jailla izoide. Afémie nai jáiñenia íemo táijidinona ie jofo uíñotade. Illa dígamie dáarie táijillena igáiaíoi. Iemo naze uíñoraíma jóoniano, íena ríire ocuide, jofo uíñollena.

35 Afe izóí mai omoí abi onóicana uíñori, mei jofo naama billiruí óñoñegaza. Níbai nauíoilla llezica biíte, níbai dáaferuimo, óñoñega. Níbai atava úrilla llezica, níbai jítiramo afémie biíte; óñoñega.

36 Mai abi omoí onoiri, afémie raire bíadi, omoí iníllena ie cíóñeíllena.

37 Omoina cue daína izóí nana comínina daidícue:

—Cue bíllemo abi omoí onoiri, —daide Jesús.

14

*Comíni Jesús llaitállena maméritiaíoi
(Mt 26.1-5; Lc 22.1-2; Jn 11.45-53)*

1 Nai ménaruí ite pascua ráfue mo. Afe rafue llezica afénomo ite comíni íaíoi pan fáitara jóoneñeno güífirediaíoi, mei aféruillai fáitañega pan güífírenafue. Lletáriraini illaini ocuícáfue llóraini diga Jesús jífuiado llaitállena jenódiaíoi, ie titállena.

² Iadi daidíaíoi:

—Íraízíe ana íena llaitánide; afemo comíni ficire júfidoñeílleza, —daidíaíoi.

*Ringo zióredijido Jesús ifona jillaide**(Mt 26.6-13; Jn 12.1-8)*

³ Jesús Betániamo ite. Simón jofomo ite. Afe Simón chíinaitimiena mameide. Güirácomo íaioi ráina llezica, daa ringo jamánomo ráifide ziórediji Jesumo jilláizaibite. Afe ziórediji duera alabastro daína nofici finoína icítirumo ite. Afe ziórediji mámece nardo. Afeji jíáiena fáñega. Afengo afe icítiru llaillano, Jesús ifomo áfeji totade.

⁴ Afénoimo itínomona dámerie áferi ríicaidiaioi. Dani conímána riire daidiaioi:

—¿Ñibái mei bie ziórediji táinomo dotade?

⁵ Afeji trescientos romano úcubetuni baimo fecárede, duéredimacina canóllena, —daidiaioi. Aféngomo ríicaillano íáruitiaioi.

⁶ Mei íemo Jesús daide:

—Mai aféngona fáicanocai. ¿Ñibái mei aféngona áifedodiomoi? Bie cuemo afengo finócafue ñuera.

⁷ Mei jíi, duéredino jaca omoi cígimo íitiaioi. Omoi jitáiaidi afémacina canórediomoi. Mei íadi cue omoi cígimo are íñeiticue.

⁸ Afengo ñue cuemo finórede raa cuemo finuaibite. Jáimaci cue raíájiñenia cue abimo zióredijina afengo cuemo jóoniaibite.

⁹ Uáfueña ómoína dáititue, náganomo bie éniemo comini jilloille uai jino llóiaidi, bie ringo cuemo finócafue jino llóitiaioiza, áfemona aféngomo uíbicaifireillena.

*Judas Jesús íena éoidimacimo izájide**(Mt 26.14-16; Lc 22.3-6)*

¹⁰ Ie mei Judas Iscariote lletáriraini illaini dine úrizaide, Jesús afémacimo izájillena. Afe Judas, doce dígamie Jesús llófuega ímje.

¹¹ Afe illaini Judas dánana cacáillano, íóbidiaioi. Afe jira íena daidiaioi: “Jesús caimo o atíadi, úcubena omo íbaiticai.” Iemona Judas nie izói Jesús íaioimo fecállena jenode.

*Jesús íraifuena güillafue**(Mt 26.17-29; Lc 22.7-23; Jn 13.21-30; 1 Co 11.23-26)*

¹² Fáitañega pan rafue nanódiruimo oveja jiza fáfirediaioi, pascua ráfueño ríllena. Aféruimo jae dúcide. Aféruído Jesús llófuegamaci íemo jícanotiaioi:

—¿Ñinomo pascua rafue uícodo cai fínuaillena óiacadio, afénoimo pascua ráfueño mameide güille cai güillena? — daidiaioi.

¹³ Ie jira ie llófuegamacimona ménaillinoi óriano daide:

—Jófuemo jai. Dinomo jainoi icírudo uítimiena báitiomicoi. Iedo jairi.

14 Afémie jofo jáillanomo, afeco náamana daiíri: “Llófueraima daide, ¿Ninomo ite cue güillino cue llófuegamaci diga? Dinomo pascua rafue llezica güíticai daide.”

15 Jira afécona ómicoimo ácatajite, áillico. Caifóidicomo iite. Ja fuífide. Dinomo cáiena finori, —daide.

16 Jira llófuega íaillinoi oni jaillano jófueмо dúcidiailinoi. Dúciillano uícodo Jesús íaillinoina daina izói baizájidiaillinoi. Pascua rafue ja finódiaillinoi.

17 Nauízaila llezica, Jesús doce diga ie llófuegamaciri dúcidiailoi.

18 Güirábanimo güitíaiomo Jesús íaioina daide:

—Uáfueña ómoína daíticue, daa ómoimona, cue diga güitínomona cuena fécaite, —daide.

19 Jira afémaci zúucaidiaioi. Afe llezica dáamierie Jesumo jicánotiaioi:

—¿Nibai cue? —daide.

Jíaimie daje izói daide:

—¿Nibai cue? —daide.

20 Jira Jesús uai ote:

—Afémie daa ómoimona, bie doce dígamiedemona; ua cue birui diga dáajemona güitímacimona.

21 Nanoide íima Jitódicueza Cuegáuai lloga iodo jáidicue; ua cue tíillinomo jáidicue. Mei íadi cue fecádimie, jñii iere dúerenal Afe íima jócoñegana baimo ñue jaide, íadi jae comuide, —daide.

22 Güitíaiomo, Jesús pan llínota daide:

—Iere figura, —daide. Daina mei ditade. Ditada íaiomo fécajano daide:

—Mai omoi güi. Bie cue abi, —daide.

23 Iemo Jesús jiróracuri llínote. Afécuri vínona oruítaga. Ie mei:

—Iere figura, —dainano íaiomo ite. Nana afécurimona áfeji jiródiaioi.

24 Iemo daide:

—Bie cue die; áfedo comue dájemo llínoga uai uáfueña daiíllena. Aillo nairai jíllollena cue die tóite.

25 Uáfueña ómoína daidicue, ja biruímona afe uva rao llizilla iji jiroñeiticue. Ua nágaruillaído Juzíñamui illáimana illirui nai biñena llezica jiroñeiticue. Aféruimo comóicana áfeji nane meine dáanomo jiroiticue, —daide.

*Pedro Jesuna jáanuana Jesús uícodo llote
(Mt 26.30-35; Lc 22.31-34; Jn 13.36-38)*

26 Juzíñamui rua íaioi rua mei, jino Olivo dainádumo jáidiaioi.

27 Iemo Jesús daide:

—Bie naio, iomo come éicitaila izói, méaicaillamona nana omoi cuena zóofeitimoi. Cuegáuai daide: “Ovejai úiñoraïmana fáiticue; fállemona ovejai oni rájicaítiaioi.”

²⁸ Mei íadi cáadimiena meine abido cue ille méifodo, omoi uiécomo Galiléamo jáiticue, —daide.

²⁹ Jira Pedro daide:

—Nana ona fáicanocaitiaioimo, jaca o fáicanocaiñeiticue, —daide.

³⁰ Iemo Jesús uai ote:

—Uáfuenta dáiticue, bie naio atava ménacaiño nai úriñeniadi dacaiñoámani cuena jáanoitio, —daide.

³¹ Mei íadi afémie iere afe íeñede úricana daide:

—O diga cue tïllena jitáïadi, nai ona jáanoñeiticue, —daide.

Nana daje izói daidíaioi.

*Jesús Getsemanimo Juzíñamuimo úrizaide
(Mt 26.36-46; Lc 22.39-46)*

³² Iemo güirácomona jino billano Getsemaní ibírimo dúcidiaioi. Dinomo Jesús ie llófuegamacina daide:

—Bai bené Juzíñamuimo cue úrizaila llezica, benó omoi ráiri, —daide.

³³ Iemo Pedro, Santiago, Juan diga uite. Jesús ja zuure cácaaide; afémie aillo jaci cácade.

³⁴ Jira daide:

—Cue joreño iere zúureficaide; afe zuufue tïlla izói cue orede. Benó omoi fiebi. Abí omoi onoiri, —daide.

³⁵ Iemo Jesús jabo baife jaide. Dinomo éniemo bíjicaillano Juzíñamuimo jicade:

—Nana bie cuemo jíriacade raa cúemona oni o oréreadi, mai oni oreri, —daide.

³⁶ Nai Juzíñamuimo úrioicana daide:

—Cue Moo, ómona nana finórede. Bie iere zuure facállinomona cue zuitari. Mei íadi cue oíacana izói finóñeno iri, mei jáifodo o oíacana izói finori, —daide.

³⁷ Iemo daámani llófuegamaci diné jaide. Inídiaioimo dúcide. Pédrona daide:

—Simón, ¿ja o inídio? ¿Jaca due jiza abí onóoicana uíñonidio?

³⁸ Abí omoi uíñori. Juzíñamuimo úriri, fiénidifuego omoi báíñeillena. Uáfuenta o joreño iere jíerede, mei íadi o abí nánide, —daide.

³⁹ Iemona dáanomo nane, Juzíñamuimo úrizaide. Daje uáillaina daide.

⁴⁰ Ie mei nane bítemo, ie llófuegamaci meine dáanomo inídiaioi. Daí afémaci íniamo, Jesús íaioina cíozaibite, mei íaioi uíji ínie ibáicaza. Íaioi uai ollino íñede.

41 Ja dacaiñoámani Juziñamuimo úrillano bite. Billano íaiõina daide:

—¿Mei nai birui inídiomoi? ¿Nai ocózinaidiomoi? Jae mai. Nanoide fima Jitódicueza, mei íadi fiénidimacimo cue itábicaillarui mo ja dúcide.

42 Náidacai. Mai cai jai. Cue fecádimie ja bite.

Jesús llaitádiaioi

(Mt 26.47-56; Lc 22.47-53; Jn 18.2-11)

43 Ie llezica Jesús nai úritemo Judas dúcizaibite. Afémie doce dígadimacimona. Afémieõiri aillo comini bitíaiõi. Lloefai bigíniai diga bitíaiõi. Lletáriraini illáinimona bitíaiõi. Dáarie bie comini ocuífacue llófueraimona éicomini diga bitíaiõi.

44 Fecádimie Judas bimácimo ónoitara nauí lloga. Daide:

—Cue ñitállimie níimieite. Ie llaitari. Ñue maiano, ui, — daide.

45 Iemo Judas billano, Jesumo áinozillano uáidote:

—¡Llófueraima! ¡Llófueraima!

Daií daínano ñitade.

46 Iemo Jesús llaitada, maiano, bitino íena uitíaiõi.

47 Afe llezica dinomo itínomona dáamie lloefai otá daa bitímie jefo ñetade. Afe jefona ñetácamié lletáriraini illaíma jaiénici.

48 Iemo Jesús comínina daide:

—¿Meita meríriraimadícue izói lloéfaillairi bigíniai diga cuena lláitaibitíomoi maiano cue uíllena?

49 Nágariuí ómoiri Juziñamuimo gairíracomo llófuecana iticue; íadi jaca cuena llaitáñediomoi. Mei íadi bifue íficaide Cuegáuaillai fuitállena, —daide.

50 Iemona nana llófuegamaci íena fáicanocaillano botádiaioi.

Da Jesudo jáicaide jitócome botade

51 Mei íadi da jitócome dama áillue iniroi jitada nai Jesús óodana jáicaide. Ie mei bitino íena llaitádiaioi.

52 Mei íadi afémie jarire duíñuano aferoi íaioimo fainóicaide. Daií ñeta emuíroma jarire botade.

Jesús jicánodoillinomo uiga

(Mt 26.57-68; Lc 22.54-55, 63-71; Jn 18.12-14, 19-24)

53 Iemo judíuai lletáriraini caifóidillaímamo Jesús uitíaiõi. Afe llezica nana lletáriraini illaini, íemo éicomini, íemo ocuica uai llófueraini diga, dáanomo gairírdiaioi.

54 Pedro, afe jamánomoidillaíma jofo abi ibírímo, óodana jicado jaide. Dinomo llazíriraini diga ráiide; irai fuemo agaide abi uzíreillena.

55 Nana lletáriraini illaini jamánomo ocuídímaci diga Jesumo fienu íaiói facátallena uai nabáidino jenódiaíoi, áfedo íena titállena. Mei íadi áfena baiñédiaíoi.

56 Aillo íemo taino llotíaíoi. Iadi íaiói táinofuiaí jaícina jóobiñede.

57 Iemo dáarie caífo náidacaillano, afémiemo taino fiénidífue nitádiaíoi. Daidíaíoi:

58 —Afémie dáinana cacádicaí: “Bie comini finoca gairíracó júdaíticue, íemo daruíamani íllemona jíái gairíracó comini finóñegaco abido níitícue,” daide, —daidíaíoi.

59 Mei íadi nane íaiói lloga uai nabáíllafuiaí jaícina jóobiñede.

60 Iemo lletáriraini illaíma íaiói cígimona jino náidacaillano Jesumo jícanote:

—¿O uai óñeitío? ¿Minica bie omo nitádiaíoi? —daide.

61 Mei íadi daa uai óñede. Iemona lletáriraini illaíma nane dáanomo jícanote:

—¿O Crístodío? ¿Afe caí ñúefuena nitaca Juzíñamui Jitódioza? —daide.

62 Jira Jesús daide:

—Jii, ie mei. Nanoide íima Jitódicue. Uire uáfuena cuena cíoitíomoi. Ua ríirede Juzíñamui nabézimo dínomo cue ráinaíllana cíoitíomoi. Aféruíllaido mona ero úíííedío cue bíllana cíoitíomoi, —daide.

63 Lletáriraini illaíma jamánomo ríicaillano ícíríllamona ie íiroí cúatajano daide:

—¿Níbaí mei jíáíe uai nabáiraíma jítaíticaí?

64 Ja Jesús ie uáíllaido Juzíñamui díbénemo fienu úrillana cacádíomoi. ¿Omoi, nie izóí íena daidíomoi? —daide.

Iemona nana íena titállena daidíaíoi.

65 Iemo dámierie afémiemo túallaítiaíoi. Afe llezica ie uíéco ííroína íbáíllano, íena fatíaíoi. Fájano daidíaíoi:

—¡Mai bai! ¿Bu o faja? —daidíaíoi.

Iemo llaitáidino ie uíéco túcoídiaíoi.

Pedro Jesús jáanote

(Mt 26.69-75; Lc 22.56-62; Jn 18.15-18, 25-29)

66 Pedro ana jofo íbírimo íte. Iemo daa lletáriraini illaíma canóraíngo afénomo dúcide.

67 Pedro irai fue agáíllana cíóíllano, afengo afémiemo ríire eroide. Iemona daide:

—O daje izóí Nazarena ímie Jesús diga macáfiredío, —daide.

68 Mei íadi Pedro jáanuano daide:

—Aféfuena fídíñedicue. Mínicado úritío onóñedicue, —daide. Daina mei afémie naze fuemo jino jaide. Iemo íítava úrite.

69 Iemona canóraíngo íena nane cíóíllano afénomo ítínona daide:

—Afe iima Jesudo jáidimacimona, —daide.

⁷⁰ Mei íadi Pedro meine jáanote. Ja baido afénomo itino Pédróna nane daidíaiói:

—Uáfuenta. O Jesús imaci iédio. Galilea ímiedio. O úrilla afémaci úrilla izóí jóoide, —daidíaiói.

⁷¹ Ie jira Pedro: “Uáfuenta cue llóñenia Juzíñamui cue fáidoiteza,” daide. Dáanomo Pedro ie daina uai nabáillena Juzíñamui mámedido riire mámano daide:

—Afe omoi úrillamiéna onóñedicue, —daide.

⁷² Daií daina llezica atava dáanomo nane úrite. Iemona Jesús íena daináfue mo Pedro uíbicaide. Nano uícomo íena daide Jesús: “Atava ménacaiño nai úriñenia dacaiñoámani cuena jáanoitio.” Afemo comeci fácajano éeiaide.

15

Jesús onínellaima Pilátomo uitíaiói

(Mt 27.1-2, 11-14; Lc 23.1-5; Jn 18.28-38)

¹ Afe jítiramo lletáriraini illaini íemo eicomíniri gairízaidiaíói, ocuica uai llófueraini diga; ie emódomo naa jáíe jamánomoidillainiri. Gairíllano Jesumo íaiói finóllifueri dani úritiaíói. Maiga Jesús Pilátomo izájidiaíói.

² Jira Pilato jicánote:

—¿O meita judío illáimadio? —daide.

Iemo Jesús uai ote:

—¡Ie mei! Daií jaca o daina izóí, —daide.

³ Iemo lletáriraini illaini aillo fiénidífuiaí afémiemo nitade.

⁴ Jira Pilato dáanomo jicánuano daide:

—¿O uai oñédio? ¡Cacai! Diga fiénidíuai omo nitádiaíói, —daide.

⁵ Mei íadi Jesús uaina oñede. Aféme uai oñenamona Pilato fáigacaide.

Jesús ie tiíllena uáfodo maméritiaíói

(Mt 27.15-31; Lc 23.13-25; Jn 18.38-19.16)

⁶ Afe rafue ana naga fimónado comínimona llogámie llaitácamiéna Pilato zuitáfiredé.

⁷ Come fatímie Barrabás jae llavéracomo ite, jáíe come fatímaci diga. Nano jáíruido illaima dotátaruimo comini fatíaíói.

⁸ Ja birui comini Pilátomo jícáibitiaíói. Billano Pilato íaióimo finófírena izóí ie finóllena jicádiaíói.

⁹ Pilato uai ote:

—¿Judíuai illaima ómoimo cue zuitállena jitáidíomoi? —daide.

¹⁰ Pilato ja lletáriraini illaini Jesús úradoillafuedo fécajana fidide.

11 Mei íadi lletáriraini illaini nana comini jeire otímaci. Iaiói úamona iere caillídímaci. Iaióina llófuetiaíói:

—Jesús ifomo mai Barrabás caimo zuitállena izire omoi jicari, —daídíaíói.

12 Jira Pilato jicánote:

—¿Nie izói oíacadiomoi omoi mamécamié Judío Illaíma cue finóllena? —daíde.

13 Iemo caillíoicana uai otíaíói:

—¡Cruzmo íena corai! —daídíaíói.

14 Jira Pilato daíde:

—¿Ñibái mei? ¿Afémie nie fiénidífue finode? —daíde.

Nane dáanomo baímo caillíoicana daídíaíói:

—¡Cruzmo íena corai! —daídíaíói.

15 Iemona Pilato nairai uíécomo ñue íacanamona, Barrabás zuitada orede. Iemo Jesús zechétajano llazíritinomo izájide íena coráíllena.

16 Ie mei afe onínellaíma áilloco jofo ibírímo íena uitíaíói. Afénomo nana fuíríraini gairítatíaíói.

17 Iemo ñue jáirede inícuro, illaíma íena, afémiemo jitádiaíói. Aferoi uállaíma jítafiregaroi. Afe llezica ifo icuifoí eegi nínacuifoína íemo jitádiaíói.

18 Jítajano janónaíocana riire íena uáidotíaíói; daídíaíói:

—¡Figo o iri, Judíuai Illaíma! —daídíaíói.

19 Iemo rázido díga icaiño ie ifo butíaíói. Ie túallaitíaíói. Afémiemo caiñíci ana dújullano jífánodoicana íena ebíruitíaíói.

20 Daíí ie íaíói áfedua méifodo, afe illaíma jítaícaroi íemona duiñódíaíói. Dúíñuano dama íecuirona ie jítaícaroi. Ie mei afénomona jino íaíói uiga íena coráíallena.

Jesús coráíina

(Mt 27.32-44; Lc 23.26-43; Jn 19.17-27)

21 Jesuna coráíaidiaíoímo Cirene ímie Simón jinona jófuemo bite. Afémie Alejandro Rufo íaíllinoí moo. Bítemo Jesús coráíllibícina rocátatíaíói.

22 Iemo Jesús Gólgota maméidinomo uitíaíói. Afe Gólgota jíáímaci uaido ífócorai Illánona mameide.

23 Afénomo vino eríredíji díga jóonegana Jesús jírótatíaíói. Mei íadi áfena afémie jíróñede.

24 Afe mei ja Jesuna coráídiaíói. Iemo fuíríraini onótaraji dotádiaíói, Jesús inícuro íaíói máíñuana onóíllena. Iemona dájerize illa dígamie ie inícuro uite.

25 Jae jítoíma caífo illa llezica Jesús coráídiaíói.

26 Jesús coráígabícimo jíáíe uai llotíbícina netádiaíói. Afébícimo nie íaífue ie fínua jíra coraíca, daíí íaíói cuega. Bibícimo cuetíaíói: “Bímie Judíuai Illaíma.”

27 Afémie diga mena meríriraíma íaillinoi coráidiaioi, dámie ie nabénemo, jiáimie ie jarífenemo.

28 Jaiái Cuegáuai daíí fúibicaide. Aféuai daide: “Afémie fiénidimacimo jaináitaga.”

29 Afe iodo jáidino Jesumo fiéni úritiaioi. Fuena iere riire íena zanódiaioi. Daidíaioi:

—Mai, cacai. O Juzíñamui gairíraco ana júdaitimedioza. Daje izói daruíamani íllado abido afeco níitimedioza.

30 ¡Mai dama o abi jíllota! ¡Crúzmona ana bi! —daidíaioi.

31 Daíí daje izói lletáiriraini illaini, ocuica uai llófueraini diga, Jesuna janónaitiaioi. Dani conímana daidíaioi:

—Afémie jiáimaci jíllotate, íadi afémie dama ie abina jíllotanide.

32 Mei birui Cristo, Israel Illaíma ana crúzmona bíadi, áfena cai ciónamona afémie uaina ja uáfuenta ínoiticaí, —daidíaioi.

Daje izói afémie diga coráicaiaillinoi fiéni Jesumo úritiaioi.

Jesús tílla

(Mt 27.45-56; Lc 23.44-49; Jn 19.28-30)

33 Jaíciri illa llezica nana énie jítfreficaide. Dahoraámani fidi monáíñede.

34 Afe llezica Jesús riire cáilliano daide:

—Eloí, Eloí, ¿lama sabachtani? —afe uai dobáiñuana daide: ¡Cue Moo Juzíñamui, Cue Moo Juzíñamui! ¿Nibái cue zóofetio? —daide.

35 Dámierie afénomo itínomona áfena cacáillano daide:

—Cacarei, afémie Juzíñamui uai jino llóraíma Elías jírite, —daidíaioi.

36 Iemona afémacimona dámie aizida fíllicide raa uájide. Erírede vínona riáitano, áfena ragüizi ícoímo jóonete, áfedo Jesús jírótallena. Daíí ñeta, íemo ñuitade. Afe llezica jiáimaci íena daide:

—Ína jabe. Mai cai éroi, neca afémie Elías ana ólleza, —daide.

37 Ie mei Jesús riire caillida tíide.

38 Afe llezica Juzíñamui gairíracomo zebica jédaciede iniroi, dáfenedo caifófenemona ana cuájicaide.

39 Jesús anamo romano jabóidillaíma uiéco dibénemo naidaide. Ie cáilliana cacade. Ie tílla izóidena ciode. Cíuano daide:

—Uafue, bie íima Juzíñamui Jitó, —daide.

40 Dáanomo dáarie ringóniaí jicana eróiediaioi. Iaiói cígímo ite Magdalena jofue ingo María, íemo Salomé, íemo jiáie María. Afengo Santiago José ei. Afe Santiago jofófene ímiena mameide.

41 Bie ringóniai Jesudo jáicadino. Naui Galiléamo ie illa llezica, afémaci íena canódiaioi. Mei íadi bimaci baímo aillo jíáingotiaína, Galilea ingóniai afémiedo Jerusalemo bitíaioi.

Jesús abi raíáfomo jóoniaidiaioi
(Mt 27.57-61; Lc 23.50-56; Jn 19.38-42)

42 Ja nauízaide. Mei aferui ocózinallarui uicodirui íllaza, comini íaioi jítaille raa finóñrediaioi.

43 Jira José Pilátomo Jesús abi jícajide. Afe bie José Arimatea jofue ímie. Afémie caifóidillaimaíaimo iere jaináideza, ie mámece jica jalleide. Afémie Juzíñamui illáimana illíruina ñue uíñote. Afémie abi mámano jáicaiñeno Pilato illánomo jaide. Dinomo Pilátomona Jesús abi jícade.

44 Pilato ja ie raire tíllari fáigacaide. Jira jabóidillaima uáidote íemo jícanollena meita uafue daíllena.

45 Jabóidillaima “Jí” dáinamona Pilato fairíote Jesús abi José uíllena.

46 Jira José iere ñuera iniroi íbade. Iemo Jesús abi ana uáno, aféroido junide. Iemona idu ana nofíci ero raigácomo íte raíáfomo íena jóoniaide. Jóoniano raigaco áillue nofícina íbade.

47 Magdalena ingo María, José ei María diga, afe raíanona cíodiainguai.

16

Jesús tíidemona meine abído cáadimíena jaide
(Mt 28.1-10; Lc 24.1-12; Jn 20.1-10)

1 Ocózinallarui méifomo Magdalena énie ingo María, Santiago ei María, Salomé diga zíoji íbádiaioi, Jesús abi recuíllena.

2 Jira semana nanóidirui jíñramo raíáfomo jáidiaioi. Afe llezica jítoma ja cíode.

3 Iemo ringóniai dúciillano conímana daidiaioi:

—¿Bu mei raiafo uíeco íbaina nofíci cairi oni ñuitalle? mei afeci iere áillueza, —daidiaioi.

4 Mei íadi érocaillano raiafo uíeco íbaina áillue nofíci oni jóoniana cíodiaioi.

5 Iemo raiafo ico eromo íaioi jáillanomo jíto come nabézimo ráinana cíodiaioi. Afémie árecuiro úzerói jítaoide. Ieri iere jacínaitiaioi.

6 Jira ringóniaína daide:

—Omoí jacínaiñeno iri. Omoí Jesús, Nazaret ímie naui coráicame jenódiomoi. Mei íadi ja tíidemona meine abído cáadimíena jaide. Benomo íñede. Afémie íaioi jóoniano omoí eroi.

⁷ Ie mei Pédro mo naa jíáie llófuegamaciri llujáiri. Afe bifue daíri: “Omoí uícomo Galiléamo jaide. Dinomo ie daína izoí íena cíoitíomoi,” —daide.

⁸ Jira ringóniai raíáfomona botádiaioi. Fáigacaillano cuidírítiaioi. Iere íaioi jacíruillamona bumo lloñediaioi.

Magdalena énie ingo Maríamo Jesús cíocailla
(Jn 20.11-18)

⁹ Semana nanóidirui monáiacana llezica, Jesús meine abído cáadimíena jaide. Afe mei fueñe Magdalena énie ingo Maríamo afémie cíocaide. Naui afémie aféngomona siete díga fiénide jóríai oni orede.

¹⁰ Iena ciona mei, afengo Jesús díga naui jáicadinomo llujáide; afémaci nai zuure éenaitiaioi.

¹¹ Afe Jesús meine caade íllana María íaioimo llote, mei íadi aféfuena cacáillano, áfena nai íñoñediaioi. Daje izoí afengo “Iena cíódicue” daína uaina íñoñediaioi.

Jesús llófuegamacimona ménailinoimo afémie cíocailla
(Lc 24.13-35)

¹² Bie mei, Jesús llófuegamacimona ménailinoi jofue onimo mácajidiaillinoi. Mácajilla llezica Jesús jíáifodo íaillinomo cíocaide.

¹³ Afe íaillinoi jíáie llófuegamacimo abído llujáidiaillinoi, mei íadi daje izoí íaillinoína íñoñediaioi.

Jesús ie uai oni llóllena orécamacimo ie uai jóonenocaide
(Mt 28.16-20; Lc 24.36-49; Jn 20.19-23)

¹⁴ Afe jíáiruido once díga llófuegamaci íaioi güiránomo raíidiaioimo Jesús cíocaide. Íaioi comeci ríirena jira, íaioína lletade. Dáanomo íaioi íñoñena jira, íaioína lletade, mei afe íena cíódino íaioimo llógana íñoñediaioiza.

¹⁵ Ie mei íaioína daide:

—Mai nágagobiaído bie jíllóille uai nana comínimo jino omoi llujáiri.

¹⁶ Afe uaina íñoitímie íemo báutizagamie jíllóicaite. Mei íadi afe uaina íñoñeitímie jíllóñeno duere finócamíena jáite.

¹⁷ Cuemo íñoitíno bie onótarafuíai fínoítiaioi, afe lloga uai uafue daíllena. Cue mámecido fiénide jóríairedímie ite fiénide jóríai oni óreitíai. Uícodo óñoñega jíáie uáilláido úritíai.

¹⁸ Daje izoí titade jaio íaioi llaitada íaioína ainíadi, tíñeítiaioi. Jucúredíji íaioi jíróadi, iránitañeite. Afe emódomo, iráredímacimo íaioi onoi bitáadi, afe iráredíno jíllóitiaioi.

Jesús monamo jailla
(Lc 24.50-53)

¹⁹ Afémacimo úrilla mei, cai Ocuíraima Jesús fíaicana caifo monamo uiga. Iemo Juzíñamui nabézimo ráinazaide.

²⁰ Ie mei ie llófuegamaci nágagobaiimo comini jílona uai llocana uitíaioi. Afe dáamie, cai Ocuíraima, íaiolina canode. Afe llezica afémie íaioi lloga uaina cíofinina íaioi finócafuiaido uáfuenta daiítate; daje izói diga onótatifuiaido uáfuenta daiítate. Jae nñe.

JUZÍÑAMUI ÑUEFUE SAN LUCAS LLOGAFUE El Santo Evangelio Según San Lucas

Rafue uiécodo llogáuai

¹ Cue ama izóidimie Teófilomo cueticue. Diga comini caimo comuide ráfuiyai ñue jaícina cúellena facádiaioi.

² Afe comuídifuiyai táiniamona, áfena ciódino caimo llua izói, cuetíaioi. Afeniaina ciódino ñúefuiyai jino llóllena canódiaioi.

³ Afe izói nana bífuiaina ñue jicánofiredicue. Uáfueza, bífuiyai táiniana iere jicánofiredicue. Ie jira omo cueticue. Iemona bífuiyai jaícina omo cue cúellena cuedo ñue jaide, mei ñúefuiairedimie Teófilodioza.

⁴ Bífuiyai omo cúeiacadicue, afémaci omo llogafue uáfueza o onóillena.

Juzíñamui abi ímie Juan Bautista jocoille llote

⁵ Herodes Judea éniemo illáimana illa llezica, afénomo Zacaríasna mámeciredimie ite. Afémie Juzíñamuimo comini dibénedo úriraima. Afe Zacarías jaiyai ímie Aarón jitó, Abías iziémo dúidimie. Ie ai mámecei Elisabet. Afengo daje izói Aarón iziémona comuídingo. Afe Aarón nánora Juzíñamuimo úriraima.

⁶ Afe íaillinoi Juzíñamui eróicana ñue jaícina itiaillinoi. Juzíñamui ocuica uai jeire ófirediaillinoi. Ie jira afe íaillinoimo buna fiénidena jitánidiaioi.

⁷ Mei íadi úruenidiaillinoi, mei Elisabet úrueninide. Iemo jiái jae iere jónaitiaillinoi.

⁸ Iemo daarui Abías izíe táijinaruillaimo dúcina llezica, Zacarías Juzíñamuimo úriraimana íllena afémiemo dúcide.

⁹ Iemo afémaci fínofirena izói, íaioi níziamona, uguci uillítallena Zacaríasmo baite. Ie jira afémie Juzíñamuimo gairíraco rairúredinomo jofo jaide, afénomo uguci uillítallena.

¹⁰ Afémie uillítaa llezica, nana comini jinófenemo Juzíñamuimo úritiaioi.

¹¹ Iemo Juzíñamui abi ímie, ángel dainámie Zacaríasmo cíocaide. Afémie uillítarano nabéfenemo cíocaide.

¹² Juzíñamui abi ímie cíoillano Zacarías iere jacinaillano ie finóacaigana onóñede.

¹³ Iemo Juzíñamui abi ímie íena daide:

—Zacarías, jacíruiñeno iri, mei Juzíñamuimo o jícafírenana afémie cacádeza. O ai Elisabet jitóreite. Afémie mámecei Juana o jítalle.

14 O íóbito, daje izói aillo comini o úrue jocólleri íóbitimaciza,
 15 mei o jító Juzíñamui uiécomo iere uai iinotimiena mámeiteza. O jító comini jifáitaraji vino diga jaca jíroñeite. Afémie nai jócoñenia Juzíñamui Ñuera Joreño úicaite.

16 Afémie Israel náiraímona diga comini comeci ífuiái méidotaite, afémaci ócuifirede Juzíñamui uaimo meine ñue íaíoi jíeruillena.

17 Bie Juan Ocuíraíma Cristo uiécodo biite. Afémie ja-
 íai Juzíñamui uai lloiraíma Elías coméciífirena izói coméciite. Daje izói Elías riire ocuilla izói riire ócuite, ie uaido móotiai íaíoi úruiai diga caimare íaíoi itátallena. Daje izói uaina náfueñedino afémie afe uaina jeire otátaite. Bie izói afémie comini ñúemacina íaíoi fínoite, Ocuíraíma Jesús ñue llínollena.

18 Juzíñamui abi ímie úrilla llíicailla mei Zacarías jicánote:

—¿Ñie izói bífuena uáfuena onóredicue? mei ja iere jónaiticue, cue ai diga.

19 Juzíñamui abi ímie uai ote:

—Gabriéldicue. Juzíñamui ócuifiregamiedicue. Ie orécamiedicue omo úrillena, bie ñúefuiái omo llóllena.

20 Mei íadi birui omo cue dáinana o íñoñenamona uáinitio. Benómona úriñeítio o jító jocóllinomo. Bie Juzíñamui mamécaruimo zúite.

21 Afe llezica comini jino itíaíoi; Zacarías úiñotiaíoi. Afémie are jino gairíracomona biñena jira jacínaioidiaíoi.

22 Iemo Zacarías jino bítemo ja úrinide. Afemona afémie gairíraco eromo rairuícánomo nicáirilla izói nibai ciode daidíaíoi. Afémie onoi níraídua izói afémacimo úrite, mei afémie úrinideza.

23 Juzíñamui gairíracomo Zacarías táijinaruillai fúillamona, ie jofomo jaide.

24 Bie mei ie ai Elisabet ja úruereacade. Afengo jofómona cinco diga fiui uáfori jino cióñede. Afengo comécido daide:

25 “Juzíñamui ja bie izói cuena úrueretade, íemona comini cuena jámairuiñeítiaíoi,” daide.

Juzíñamui abi ímie Jesús jocoille llote

26 Ja seis diga fiui Juan comuíllamona, Juzíñamui ie abi ímie Gabriel, Galilea éniemo ite Nazaret mámecirede jófuemo orede, daa ringo méiñollena.

27 Afengo nai ínínide jitaíngo. Ie mámece María. Afengo ja jicánogango Josemo ínireillena. Afe José illaíma David izíemona comuídimie.

28 Juzíñamui abi ímie afengo illánomo jofa jaillano daide:

—¡Ona uáidotícue, Juzíñamui ñue finócanodio! Ocuifirede Juzíñamui o diga ite. Nana ringóniai baímo Juzíñamui caimare omo eroide, —daide.

29 Mei íadi afengo Juzíñamui abi ímie cióillano, afe ie uáimona iere fáigacaide. Iemo afengo comeci anado jicánote, “¿Níbái cuena daií uáidote?”

30 Ie jira Juzíñamui abi ímie íena daide:

—María, jacíruiñeno, mei Juzíñamui caimare omo eroide.

31 Benómona úruereitío, íemona o jító jócoitío. Afémie mámecei Jesuna jítaitío.

32 Afémie ñúefuena iere jálleite. Afémie caifo monamo ite Juzíñamui Jítóite. Naui Juzíñamui bínie jaiáidigima David illáimana ória izói, bie Jesuna Juzíñamui illáimana óreite,

33 jaca ninomo Israel náiraímo illáimana íllena. Ie illáimana íllana jaca ninomo fúíñeite, —daide.

34 Ie jira María Juzíñamui abi ímiemo jicánote:

—¿Nie izói bie mei ite, mei cue iima diga iñédicueza? —daide.

35 Juzíñamui abi ímie uai ote:

—Juzíñamui Ñuera Joreño omo itábicaite. Iemo caifo monamo ite Juzíñamui ie ríinodo ona ráiruie. Ie jira o jocolle jító jaca Juzíñamui mamécamiena ite. Iemona comini íena Juzíñamui Jító dáitíai.

36 Iemo jái o onógango Elisabet úruereite, jamánomo ei ringo íadi. Ie jira úruenitíngo íaií daiíngango íadi, seis diga fiui íllamona ja úruereacade.

37 Juzíñamuimona jaca finónide raana iñede, —daide.

38 Ie jira María daide:

—Juzíñamui ócuifiregangodícue. Mai mei Juzíñamui cuena ie daína izói cuemo fínoiteza, —daide.

Afemona Juzíñamui abi ímie oni jaide.

María ie onógango Elisabet uáiduaide

39 Aféruillaído María Judea íduai cígiri ite jófuemo raire jaide.

40 Dúciillano Zacarías jofomo jaide. Daií ñeta Elisabet uáidote.

41 Elisabet daií uáidua cacáillano eromo ite úrue niráiricaide. Afe llezica afengo Juzíñamui Ñuera Joréñodo úicaitaga.

42 Ie jira iere ficírede uaido úrite:

—Nana jáíngotíai baimo Juzíñamui iere caimare omo eroide, ñúefue omo finóllena. Daje izói o jítomo iere caimare eroide.

43 Iere jamáingodícue, mei íadi cue Ocuíraíma ei cue erózaibíte.

44 Mei ua, o cue uáidua cacáillano cue eromo ite jító iere ióbillano niráiricaide.

45 Juzíñamui ona daína o ínuado iere ióbinangodio, mei Juzíñamui ona daína ñue zúiteza.

46 Ie jira María daide:

—Cue joréñodo cai Ocuíraímamo ñúefue llotícue.

47 Cue Jíllotaraima Juzíñamuimo cue comeci ióbicaide.

48 Mei Juzíñamui ie dúerede ocuícaingona uibíoicaideza.

Biruímona nana uire íte comini “Iere Juzíñamui ióbitagangodio”
cuena dáitiaoí.

49 Mei jamánomo rínorede Juzíñamui iere ñúefuiai cuemo
finódeza.

Afémie mámecei ñúefuiaido jacíruiregaci.

50 Nana íena ñue jacíruitinona afémie jaca dúecaite.

51 Finónide ráfuiai afémie finode.

Fiénidena abi ínotinona afémie jae anáfenode.

52 Ríillainina jamáimacina Juzíñamui finode.

Mei jíáfodo comécina mánaidino illáinina orede.

53 Jufíruitinona afémie ñúefuiaido imaci jeírítade.

Mei jíáfodo ráaredinona fia duere imácina orede.

54 Ie ócuifiregamaci Israel nairai afémie canode.

Iaioina duéruillena féitañede.

55 Naui cai móotiaina daína izói jaca duéruifireite.

Ua, Abrahana ie daína izói, íemo ie náiraina daína izói afémie
jaca caina duéruite.

Bie izói María úrilla fuite.

56 María daámani diga fiui Elisabet diga ite. Afe mei meine
ie jofomo jaide.

Juan Bautista jocóinafue

57 Afe mei Elisabet úrue jocólliruimo dúcinamo, jító jocode.

58 Juzíñamui ñue aféngomo érocaillano fidíllano, afengo abi
imaci naa onógamaciri afengo uáiduidiaioí.

59 Ocho dígarui íllamona, judíuai fínofirena izói, gairíracomo
jáidiaioí úrue bacano icoí quetállena. Afe llezica ie moo
mámecina Zacaríasna jítácadiaioí.

60 Mei íadi ie ei daide:

—Ieñeite. Afémie mámecei Juaana jítalle, —daide.

61 Aféngona daidíaioí:

—¿Ñibái mei? O comínimo afe bie mámecei íñede, —daidíaioí.

62 Ie jira onoi níraíduado úrue moomo jicánotiaioí, nie izói
mámeci jóoneacade.

63 Ie jira afémie daa cuerábici jicade áfemo cúellena.
Llínuano cuete: “Ie mámecei Juan.” Aferi nana comini
jacínaitiaioí.

64 Afe cuia llezica Zacarías meine nane úrerede. Jira raire
Juzíñamuimo ñúefuiai llote.

65 Bíeri nana abi imaci jacínaoidiaioí. Iemo nana Judea íduai
éniemo bifue llócadiaioí.

66 Nana áfena fidídino áfemo iere comécidiaioí. Dani íaioí
nabáitiai jicánotiaioí.

—¿Bie úrue minícamiēna jáite? Mei uafue, Juzíñamui afémiemo iere caimare eróideza, —daídíaiōi.

Zacarías ñue llocana dainafue

⁶⁷ Iemo ie moo Zacarías Juzíñamui Ñuera Joreño úicaillamona úrite; Juzíñamui íemo lloga uaido afémiē daide:

⁶⁸ Israel nairai cai ócuifirede Juzíñamuimo ñúefue nitárede, mei afémiē caimo éroizaibiteza.

Ja ie comínidicai, íemo afémiē ja cai jílloitaibiteza.

⁶⁹ Jaiai ie ocuífirgamie David izíemona, daa ríinorede cai Jíllotaraima caimo orede.

⁷⁰ Jaiai ñúefuiairede ie uai llórainido uícodo ie daina izóí afémiē cai Jíllotaraimana orede.

⁷¹ Afémiē cai fairíconimona caina jílloitaite. Daje izóí cai éoidimacimona cai jílloitaite.

⁷² Cai nánoramacina duéruite, afe izóí ie íaiōina ñúefuiairede daina uai féitañede.

⁷³ Jaiai cai uzuma Abrahana uícodo daina uai Juzíñamui uáfuenta daina.

Afe uai bie izóí daide:

⁷⁴ Juzíñamui cai fairíconimona caina báiroite, jacíruiñeno ie ócuífirgamacina cai maméillena,

⁷⁵ Iemo jáí ñúefuiaido ie jaícinaidimacina cai íllena, íemo daje izóí nana cai illáruillaído afémiemo ñue cai jaináillena.

⁷⁶ Ie mei cue duera jitó, caifo monamo ite Juzíñamui uai llórainana o mámeitiaiōi, mei Ocuíraima uícodo jáitioza, ñuera uai llocana uíllena, comini íemo ínollena.

⁷⁷ Daje izóí afémiē bíllado ie comini íaifuiái féitallena fidítaitio. Afémaci fiénidifuiái féitalledo afémaci jíllotiaioi.

⁷⁸ Mei ua, cai Juzíñamui caina izíruillano caimo dúecaide.

Dúecaillano cáimaci jáíimaci íemo ínollirui caimo ite.

⁷⁹ Afedo tíiacade jítinodo macádino Juzíñamuina onóitiaioi.

Daje izóí comeci uái illáfuiaimo joide io afémiē cai ífoite.

Benomo Zacarías úrilla fuite.

⁸⁰ Iemo afe úrue móonaicana jaide. Afe llezica joreño dibénedo onóicana jaide. Comini ínénanomo ífirede. Israel náiraímo abí ie onónanomo afémiē dinomo fiévide.

2

Jesús jocóinafue
(Mt 1.18-25)

¹ Aféruillaído énie jamánomoidillaima Agosto nana comini mámeiciai cuiájillena ocuide.

2 Siria éniemo Cirenio illáimana illa llezica, bie nánora mámechiai cuiájillena ocuica.

3 Naga come ie móotiai illánomo ie mámechi cuiájirediaioi.

4 Ie jira José Galilea éniemo ite Nazaret jófue mona jaide Judea éniemo. Afémie David iziemono comuídeza, David jocóinanomo Belemo jaide.

5 Móotiai illánomo José María diga mámechina cuiájidiaillinoi. Afengo jae jicánogango Josemo iníreillena, íemo ja úruereacade.

6 Iemo Belemo íaillinoi illa llezica afengo úrue jocólliruimo dúcide.

7 Dinomo afengo nánora jító llíide. Jócua mei iníroido ferínote. Iemo juráreto ecáranomo rallaí jóbiano ie bitade, mei afe íaillinoimo comini dúciranomo illino íñédeza.

Juzíñamui abi imaci ovejai úiñoraimacimo cíocaide

8 Belén jofue onimo dáarie ovéjaiaí úiñoraini naiona íaioi ovéjaiaí úiñofirediaioi.

9 Uái daí ítiaioimo raire Juzíñamui abi ímie ángel daínámie íaioimo cíocaide. Afe llezica Juzíñamui quenírie íaioi ábiedo egáiñozide. Aferi iere jacínaitiaioi.

10 Mei íadi Juzíñamui abi ímie íaioina daide:

—Jacíruiñeno iri, mei ñuera rafue ómoimo lluáibiticueza. Bie ráfuerei nana comini iere íóbitaioi.

11 Birui jaiái illaíma David jófue mo omoi Jíllotaraíma jae jococa. Afémie cai Ocuíraíma Cristo.

12 Afémiena omoi onóillena afe úrue iníroido ferínoga, íemo juráreto ecáranomo bitaca báitiomoi, —daide.

13 Afe llezica Juzíñamui abi ímiemo aillo jíáie mona imaci ofíoide. Afémaci Juzíñamuimo aillo ñúefuiaí llotíaioi:

14 —Caifoide Juzíñamuimo ite ebírenafuiaí omoi lloiri.

Afe dáaruído afémie caímare eróinamacimo comécina uái illa-fue íiteza, —daídiaioi.

15 Iemona, Juzíñamui abi imaci abido monamo jailla mei, ovéjaiaí úiñoraini dani conímana daízitiaioi:

—Mai mei Belemo cai jai; bie Juzíñamui caímo lloga ie jocóinafue mai cai méiñuai, —daídiaioi.

16 Jira jarire jáidiaioi. María José diga cíódiaioi. Iemo jíái juráreto ecáranomo bitaca úruena cíódiaioi.

17 Afena cíóillano, Juzíñamui abi imaci afe úrue ífueña íaioimo llúana jino llotíaioi.

18 Nana afefue cacádino afe dáinari iere caímare fágacaidiaioi.

19 Mei íadi María nana aféfuiaí comécimo jóoniano áfemo uibíoicaide.

20 Iemo ovéjaiaí úiñoraini dinena meine abido jaide. Jailla llezica nana íaioi cacana, íemo íaioi cíónado Juzíñamuimo ñúefue

llotíai. Iemo daje izói ebírenafue Juzíñamui nitádiai. Mei nana íaiimo daína izói íteza.

Dúemie Jesús Juzíñamui gairíracomo ácataga

21 Jócua mona ocho dígarui íllamona, dúemie bacano ícoi quetátatíai. Afe llezica Jesuna ie mámece jítdíaiillinoi, mei afeci nano María nai úruenina llezica Juzíñamui abi ímie aféngomo llóteza.

22 Iemo diga irui íllamona, Moisés ocuica uai llua izói, María abi íainina daíllena níciduafue fúillamo, úruena Jerusalemo uítíaiillinoi. Afénomo ite Juzíñamui gairíracomo úruena Juzíñamui íena íllena acátajidiillinoi.

23 Daí finódíaiillinoi Juzíñamui ocuica uaimo daí cúeina jira. Afe uai daide: “Nana nánora jococa íza Juzíñamui íena mamérede.”

24 Jira jáidíaiillinoi Juzíñamui daína fecalle raa fecállena. “Mena úcugi, nibai mena fíiciri fatá Juzíñamui omoi fecari,” aféuai daí daide.

25 Aféruillaido Jerusalemo Simeóna mámece redímie illa. Afémie iere ñúemie; Juzíñamui ínofirede. Israel nairai fairíconimona bairolle úínote. Simeón Juzíñamui Ñuera Joreño do úicaigamie.

26 Afe Ñuera Joreño, Simeón nai tíñenia Juzíñamui orelle Crístona cíote, daí ie fidítate.

27 Ie jira Jesús móotíai íaillinoi, gairíracomo Jesuna uilla uícodo, Juzíñamui Ñuera Joreño afe Simeón gairíracomo jáillena ífode. Iemona José María diga, jaíai ocuica fínofirena izói Jesuna íaillinoi fínuaíbillla llezica, Simeón Jesús ie ónoimo llínote.

28 Simeón íena llínua llezica Juzíñamui ñúefue llocana daide:

29 —Juzíñamui, mai birui caimare tíredícue, mei o ocuífíregamíedícue, o cuena daína izói nana ñue fuitádo.

30 Dama cue uído caí Jíllotaraimana cíodícue.

31 Afémie jae nana comíni erócana o jóonegamie.

32 Afémie judíuaiñedíno ñúefuíaina onótaitímie.

Iemo jíai afémie o comíni Israelmo ñúefuíaina nítaite, —daí daide Simeón.

33 Jira José María diga Simeón úruena daí ie dáinari fáigacaidíaiillinoi.

34 Ie jira Simeón uáillaido íaióina cáimacaitade. Iemo Maríana, Jesús eina daide:

—Eroi, bie úrue Juzíñamui mamécámie. Diga Israel comíni íena ruífruíllamona táinoficaitíai. Iemo jíai aillo comíni íemo

ñinuamona ñúemacina jáitiaioi. Afémie onótate raa ízoite, íemo aillo comini éna íairuitiaioi.

³⁵ Afedo illa dígamie ie comeci ifue onuille. Mei íadi ómona bie nana, jáirede lloefai izoide, dango o comeci izire finoite, — daí Simeón daide.

³⁶ Afénori daa ringo illa. Afengo Juzíñamuimona ie oga uai llófuefirede. Afengo mámece Ana; Fanuel jiza. Iemo jíái Aser náiraimona comúdingo. Afengo iere éirogi. Afengo jitáingona illa llezica inírede. Afengo siete diga fimona afémie diga ite. Afe mei afengo fecíngona jaide.

³⁷ Iemo birui aféngomo ochenta y cuatro diga fimona fecíngona ite. Afengo Juzíñamui gairíracomo jaca ífirede, mei afénomo mona naio diga Juzíñamui ocuífiregangona ite. Afengo iere Juzíñamuimo úrifirede, íemo jíái iere fimairite Juzíñamui íóbitallena.

³⁸ Simeón Jesudo úrilla llezica afengo afénomo bite. Iemo úrue dibéfodo Juzíñamuina “Figora” daína mei, afengo nana Jerusalemo ite jíllollena uíñotino mo úrite. Dúemie Jesús ñúefuiaína afengo íaioimo llote.

Nazaremo meine jáillafue

³⁹ Iemona, nana Juzíñamui ocuica uailla íaioi fuita mei meine Galilea éniemo jáidiaioi. Afénomo dani íaioi jofue Nazaremo fiébizaide.

⁴⁰ Afénomo afe úrue iere íocire móonaite, íemo jíái ráfuena baitádimiena móonaite. Afe llezica Juzíñamui afézamo caimare eroide.

Juzíñamui gairíracomo úrue Jesús finócafue

⁴¹ Jesús moo íaillinoi naga fimónaiaido Jerusalemo pascua ráfuemo jáifirede.

⁴² Jesús doce diga fimona fuita mei, íaioi finófirena izói afe ráfuemo nana jáidiaioi.

⁴³ Afe rafue záillamona, jofomo meine íaioi jailla llezica, afe úrue Jesús Jerusalemo fiébicaide. Afeza fiébicaillana ie ei, José diga onóñediaillinoi.

⁴⁴ Nibai cai onógamaci diga bite, daidíillinoi. Daa mona daí iodo comécidiaillinoi. Mei íadi íaillinoi onógamaci cígido jenódiaillinoimo

⁴⁵ afézana cióñediaillinoi. Jira meine Jerusalemo íemo jénuaidiaillinoi.

⁴⁶ Afe mei daruíamani íllamona Juzíñamui gairíraco eromo afézana baitaillinoi. Ocuica uai llófuetino cígimo ráidena baizájidiaillinoi. Afeza afémaci úrillamo cacáreide. Afe llezica afeza afémacimo jicánofirede.

47 Nana afeza íaiói uaillai úana cacádino fáigacaidiaíoi; daje izói ie ráfuena baitari.

48 Ie moo íaillinoi íena cíozaiilla llezica íaillinoína jacinaitade. Ie ei íena daide:

—Cue jitó ¿níbái cócori bifue finódio? Cue o moo diga iere coco comécina llícitatio, ona iere zuure jenódicocozá, —daide.

49 Mei jira Jesús íaillinoi uai ote:

—¿Mei níbái cue jenódiomicoi? Cue Moo llogáfueмо cue járitaiticue; ¿áfena onóñediomicoi? —daide.

50 Mei íadi afe íaillinoína afeza dáinana onóñediaillinoi.

51 Afe mei afeza ie moo íaillinoi diga abido Nazaremo jaide. Iemo íaillinoi ocuállana jeire ófirede. Ie ei nana bífuiaí comécimo jóonete.

52 Afe llezica Jesús ñue zairíoicaide, íemo onócana jaca jaide. Afe llezica Juziñamui naa comíniri afémiemo jíeruítiaíoi.

3

*Juan Bautista táizicimo rafue jino llote
(Mt 3.1-12; Mr 1.1-8; Jn 1.19-28)*

1 Romano jamánomoidillaíma Tiberio illáimana illa llezica, Poncio Pilato Judea énie illaíma. Iemo Herodes Galilea énie illaíma. Iemo ie ama Felipe mena énie illáimana ite. Be ñie: Iturea, íemo Traconite. Afe llezica Lisánias Abilinia énie illaíma.

2 Afe llezica Jerusalemo jamánomoide lletáiriraíma íaillinoi Anás Caifás diga. Aféruillaído Juziñamui Zacarías jitó Juaamo táizicimo úrite.

3 Iemona Jordán abi comini illágobaiído Juan llócaide. Afémacina bie izói daícade: Omoi comeci ífuiaí méidori; áfemona omoi fiénidífuiaí dólleza. Iemona omoi báutizatari.

4 Jaiái uai lloraíma Isaías uícodo cuega uai izói bífuiaí íficaide. Be afe uai:

Ficire úritimie uai táizicimo cácacaide. Afémie daide:

“Juziñamui bille io ñue finua izói omoi comeci ñue fino.

Afémiemo io jaícina dénuá izói, omoi comeci íaífuiaí féítari.

5 Nana ana jica ite ítaicoiaí ñue jaícina oruíziite.

Nana caifóneduai ana dájena jaícina jóbite.

Jullícana joide io, jaícina tuiñolle.

Daje llezica ñede io, daje llezica jóbite.

6 Iemona nana naíraí Juziñamui caímo orelle jíllóillífueмо coméciidiaíoi.”

7 Comini Juan díne íaiói báutizailla llezica, afémie íaíoína daide:

—¡Titade jaióniaímona comuídino izóidiomoi! Ja ánozide duere zefuillífueмона omoi botállena, ¿bu omoi llua?

⁸ Omoi comeci ifue méidoiacanana ñúefuedo uáfodo jino ácatari. Dani ómoimona táinona “Abrahámona comuídinodicai” daiñeno iri. Mei bie noficiaimona Juzíñamui jitáiadi, Abraham comínina comuítaredeza, daií ómoína daidícue.

⁹ Fiénide amena tiéllena jata jicaida jóonia izóí fiénidino duere finoille jae ñue mameca. Nana figo llizíñede amena iraimo zocana uillano jobaica. (Tiéfirega izóidiomoi.)

¹⁰ Jira comini afémiemo jicánotiaioi:

—¿Mei bie ñie izóí íredicai? —daidíaioi.

¹¹ Jira Juan uai ote:

—Mena caifóferoiredimie, caifófenidimie daa írede. Iemo gülleredimie güllenidimie güllena fecárede, —daide.

¹² Afénomo dáarie gobierno ibátaga úcube llínoraini báutizaillena Juaamo jícaibitiaioi. Afémiemo jicánotiaioi:

—Llófueraima, ¿mei bie cai ñie izóí íiticaí? —daidíaioi.

¹³ Jira Juan íaioína daide:

—Ocuica uai daina baímo dama raiñoñoeno iri, —daide.

¹⁴ Iemo dáarie “soldado” daina nairai úiñotino Juaamo jicánuaibitiaioi:

—¿Mei bie cai ñie izóí íiticaí? —daidíaioi.

Jira Juan íaioi uai ote:

—Jácidota, jíaimamona minícana bairóñoeno iri. Daje izóí jácidoñoeno jíaimamo ie finoñegafue táinona íaioímo jitáñoeno iri. Nano omoi táijina iba dieze uái omoi iri, —daide.

¹⁵ Nana comini Juaamo coméci idiaioi. “Ñibaí bímie Crístona,” comécido daidíaioi.

¹⁶ Mei íadi Juan nana afémacina daide: Mei uáfueza, cue jáinoína omoi báutizadicue.

—Mei jíaimie ja bite. Afémie Juzíñamui Ñuera Joréñodo ómoína úicaite. Daje izóí iraimo raa ñue zia izóí, afémie ómoína íainino ñue finoite. Afémie cue baímo ríinorede. Cue bie jamáimiedicueza, afémiena dama jacíruiredicue.

¹⁷ Jabe bítimie arroz bíaidimie izóí ja ie llocofe llícabite. Afémie arroz bíamona ícuai oni eneno ua izóí, ñúemacimona fiénidinona oni eneno óite. Ñúemacina ie illánomo ñue éenoite. Mei jíáifodo fiénidicuai izóidino zíñona dúíñeite iraimo jóbaite, —daide Juan.

¹⁸ Afe bíemona naa aillo jíáie llófuiado Juan ñúefuiai jino comínimo llote.

¹⁹ Afe emódomo Juan illaíma Heródesna riire lletade, mei ie ama Felipe ai Herodías ie aina ua jira. Daje llezica ie finoca fiénidifuiari Juan íena lletade.

²⁰ Mei íadi Juan llétajana íñoñoeno afe baímo jíáie íaífuenta nabaide: Herodes Juan llavéracomo ibaide.

*Jesús báutizaga**(Mt 3.13-17; Mr 1.9-11)*

²¹ Afe uícodo, Juan nana comini báutizaja llezica, Jesús jiái báutizaga. Afe Jesús báutizaja llezica afémié Juziñamuimo úrite. Urilla llezica mona tújicaide.

²² Afemona Ñuera Joreño fiiciri baizáibilla izói, afémiemo comini cíoicana baizáibite. Afe llezica monámona daa úrilla cácaide. Afe úrilla daide:

—Cue iziruiga Jitódio. Ori iere ióbioidicue, —daide.

*Jesucristo uzútiái**(Mr 1.1-17)*

²³ Ja Jesús treinta fimona íllamona Jesús comínina canóllena ie táijina como tainede. Comini comécilla izói Jesús José jító.

Iemo afe José Elí jító.

²⁴ Iemo daje izói Elí Matat jító.

Iemo afe Matat Leví jító.

Iemo afe Leví Melqui jító.

Iemo afe Melqui Jana jító.

Iemo afe Jana José jító.

²⁵ Iemo afe José Matatías jító.

Iemo afe Matatías Amos jító.

Iemo afe Amos Nahum jító.

Iemo afe Nahum Esli jító.

Iemo afe Esli Nagai jító.

²⁶ Iemo afe Nagai Maat jító.

Iemo afe Maat Matatías jító.

Iemo afe Matatías Semei jító.

Iemo afe Semei Josec jító.

Iemo afe Josec Judá jító.

²⁷ Iemo afe Judá Joanán jító.

Iemo afe Joanán Resa jító.

Iemo afe Resa Zorobabel jító.

Iemo afe Zorobabel Salatiel jító.

Iemo afe Salatiel Neri jító.

²⁸ Iemo afe Neri Melqui jító.

Iemo afe Melqui Adi jító.

Iemo afe Adi Cosam jító.

Iemo afe Cosam Elmadam jító.

Iemo afe Elmadam Er jító.

²⁹ Iemo afe Er Josué jító.

Iemo afe Josué Eliezer jító.

Iemo afe Eliezer Jorim jító.

Iemo afe Jorim Matat jító.

³⁰ Iemo afe Matat Leví jító.

Iemo afe Leví Simeón jító.

Iemo afe Simeón Judá jító.
Iemo afe Judá José jító.
Iemo afe José Jonam jító.
Iemo afe Jonam Eliaquim jító.
³¹ Iemo afe Eliaquim Melea jító.
Iemo afe Melea Mena jító.
Iemo afe Mena Matata jító.
Iemo afe Matata Natán jító.
³² Iemo afe Natán David jító.
Iemo afe David Isaí jító.
Iemo afe Isaí Obed jító.
Iemo afe Obed Booz jító.
Iemo afe Booz Sala jító.
Iemo afe Sala Naasón jító.
³³ Iemo afe Naasón Aminadab jító.
Iemo afe Aminadab Admin jító.
Iemo afe Admin Arni jító.
Iemo afe Arni Esrom jító.
Iemo afe Esrom Fares jító.
Iemo afe Fares Judá jító.
³⁴ Iemo afe Judá Jacob jító.
Iemo afe Jacob Isaac jító.
Iemo afe Isaac Abraham jító.
Iemo afe Abraham Taré jító.
Iemo afe Taré Nacor jító.
³⁵ Iemo afe Nacor Serug jító.
Iemo afe Serug Ragau jító.
Iemo afe Ragau Peleg jító.
Iemo afe Peleg Heber jító.
Iemo afe Heber Sala jító.
³⁶ Iemo afe Sala Cainán jító.
Iemo afe Cainán Arfaxad jító.
Iemo afe Arfaxad Sem jító.
Iemo afe Sem Noé jító.
Iemo afe Noé Lamec jító.
³⁷ Iemo afe Lamec Matusalén jító.
Iemo afe Matusalén Enoc jító.
Iemo afe Enoc Jared jító.
Iemo afe Jared Mahalaleel jító.
Iemo afe Mahalaleel Cainán jító.
³⁸ Iemo afe Cainán Enós jító.
Iemo afe Enós Set jító.
Iemo afe Set Adán jító.
Iemo afe Adán Juzíñamui jító;
ua, Juzíñamui nano finócamie.

4

Taife Jesús facátate
(Mt 4.1-11; Mr 1.12-13)

¹ Jesús diga Ñuera Joreño uaido íllamona imani Jordámona oni jaide. Afe llezica Ñuera Joreño táizicimo ie uite.

² Afénomo afémie cuarenta dígarui ite. Afe dinomo Taife íena fieni facátate. Aféruillaído Jesús jaca due jiza güiñede. Afe mei iere jamánomo jufínaite.

³ Mei jira Taife íena daide:

—Ua Juziñamui Jitona o íadi, bie nofíciái güíllena fino, —daide.

⁴ Jira Jesús uai ote:

—Juziñamui Cuegáuai daide: “Fia güílledo come ínide, mei jiáifodo nana Juziñamui lloga uaido írede,” —daide.

⁵ Afe mei Taife caifónedumo ie uite. Dinómona nana éniemo ite náiraiái dáaruído íena ácatate.

⁶ Iemo Taife íena daide:

—Nana bie náiraiái ríino naa ie ebíredinuiari omo íitícue. Mei nana bie cúeieza. Iemona cue fecáacana dieze jiámamo íredicueza.

⁷ Cue anamo o dújuillano cuemo o caimátaia nana bie óieiteza.

⁸ Mei jira Jesús uai ote:

—Taife, mai cúemona oni jai, mei Juziñamui Cuegáuai dáideza: “Dama Ocuide Juziñamuimo caimátairena. Dama afémie ocuífíregamiena o iri,” —daide.

⁹ Nane afe mei Taife Jerusalén jófuemo Jesús uite. Afénomo ite gairíraco emódomo caifo jica uite. Uillano íena daide:

—Ua Juziñamui Jitona o íadi, mai benómona ana batí ticai,

¹⁰ mei Juziñamui Cuegáuai bie izói dáideza:

Juziñamui ie abi imácina ona uíñotaite.

¹¹ Iaiói ónoído ona mozíñoitiaíoi, o eiba nofíciáimo íziñeillena.

¹² Jira Jesús uai ote:

—Juziñamui Cuegáuai nane daide: “O ocuide Juziñamui mai facátaño,” —daide.

¹³ Ja Taife Jesuna jiáie facátaja raana baiñenamona nano íanori afémiemona fáicanocaillano oni jaide.

Jesús Galilea éniemo fueñe táijizaide
(Mr 4.12-17; Mt 1.14-15)

¹⁴ Jesús Galilea éniemo abido bite. Juziñamui Ñuera Joreño afémiena ñue úicade. Nana afe énie fuédado afémiedo úritiaíoi.

¹⁵ Nágagobiaímo ite Juziñamui uai llorácuaido Jesús llófuecaide. Iemona nana comini ñúefuiái afémiemo mamédiaíoi.

Jesús Nazaremo mácajide
(Mt 13.53-58; Mr 6.1-6)

16 Mei íemo Jesús ie móonaila Nazaret jófuego abido mácajide. Iemo ocózinai llaruimo Juzíñamui uai llorácomo ie finofirena izói, jofu jaide. Jaillano Juzíñamui Cuegáuai facádollena caifo naidaide.

17 Iemona jaiái uai llóraima Isaías Cuegáuai illabe Jesumo itíaiói. Afémie afénico túiñuano afe bie uai illano baite. Afe be níuui:

18 “Cai ocuide Juzíñamui Ñuera Joreño cue diga jáicade.

Mei dúeredinomo ñúefue cue llóllena cuena ñue mamédeza.

Comécina dúeredinona cue jílloallena ocuícacue.

Daje izói llavécanona zuitalle uai llóllena orécacue.

Iemo jiái uina cíoiñedino uina cíoitallena orécacue.

Iemo duere finócanona zuitállena orécacue.

19 Daje izói Juzíñamui caimo jamánomo caimare érocaillirui llóllena orécacue.”

20 Iemona Jesús afénico ibáillano, Juzíñamui uai lloraco ero canófiredimiemo abido ite. Afe mei Jesús ana ráinade. Iemo nana afe llorácomo itino Jesumo riire eróiediaíói.

21 Iemona Jesús íaíoi na daide:

—Ja birui omoi eróicana bie Cuegáuai ñue ícoimo fuite, — daide.

22 Nana Jesudo ñue úritiaíói. Afémie íaíoi mo lloga ebírede uáillairi caimare fáigacaidiaíói. Mei jira jicánotiaíói:

—¿Mei bie afe José jitóñede? —daidíaiói.

23 Jira Jesús íaíoi na daide:

—Uáfueza bie omoi daífirera uai cuemo mámeitiomoi: “Ítráredinona manóriacadieme, fueñe dama o abina jíllo!” (Comini Jesús Juzíñamui oreca ua Crístona íaíoi daíñenamona, Jesús bie izói daide. Mei afémie fia José jitó íadi, jiáimana jílloallena.) Daje izói nibai cuena dáitiomoi: “Nauí caí cacana Capernaumo ebire o finócafue mai birui dama bie o jófuego finori.”

24 Iemo Jesús ie úrillana mozíñoñoeno nai jiái uai llote:

—Mei uáfueza ómoína daidicue, naga uai jino llóraima dama ie comini cígiri jaca figo íñoñega.

25 Omoimo jino uáfodo llóiticue, nauí Elías illáruillaído Israel nairai cígimo diga fecíngotiai ite. Aféruillaído dáamani fimona átuedo noci bíñede. Afemona afeno nairai jamánomo júbietaidiaíói.

26 Mei íadi Elías Israelmo ite aillo fecíngotiaimona daingo mameda óreñega. Mei jiáfodo jica Sarepta jófuego ite fecíng mameda Elías oreca daingo canóllena. Afe Sarepta jofue Sidón jofue áinori ite.

27 Daje izói uai llóraima Eliseo illáruillaído Israel nairaimo aillo chíinaitinuiái ite. Mei íadi afémacimona dáame jaca

jíllotañega. Mei jíáifodo jica Siria énie ímie Naamán jíllotaina, —daide.

²⁸ Afe uaina cacáillano nana llorácomo itino afe Jesumo iere ríicaidiaioi.

²⁹ Náidacaillano afe jófueмона jino ie jíúdiaioi. Afe mei afe jofue idu ícoimo íena uitíaiioi, afénomona ana ie dotállena.

³⁰ Mei íadi Jesús afedu ícoimona gírecaillano íaioi cígido abido jaide.

*Fiénide jóríai úicaigamie Jesús jíllotate
(Mr 1.21-28)*

³¹ Afe mei Jesús Galilea éniemo ite Capernaum jófueмо jaide. Afénomono ocózinaillaruiño nane como comini llófuiaide.

³² Riire ocuilla uaido ie íaioi llófuiari caimare fáigacaidiaioi.

³³ Afe Juzíñamui uai llófueraco eromo fiénide jóríai úicaigamie ite. Afémie Jesuna cióillanona riire caillide:

³⁴ —Cai fáicanocai. Nazaret ímie Jesús, ¿nibái mei caimo jíricaidio? ¿Caina niné táinocaitaibitio? Ona ónodicue Juzíñamui ñúefuiaido jacíruiregamiedio, —daide.

³⁵ Jira Jesús fiénide jóríai uai ote:

—¡Uriñeno! ¡Bímie fáicanocai! —daide.

Mei áfemona afe ímana fiénide jóríai comini eróicana ana éniemo dotade. Daií fínuano afe jóríai afe ímana ízitañeno oni jáidiaioi.

³⁶ Aferi nana jacínaillano jofo conímaiaina daidíaioi:

—¡Bímie uailai ñi mei riñorena! Afe bímie riírede uaido fiénide jóríaina orede. Iemo afémaci áfemona jáidiaioi, —daidíaioi.

³⁷ Afe énie comini nágagobiaido Jesudo úritiaioi.

*Jesús Simón Pedro jífaiño jíllotate
(Mt 8.14-15; Mr 1.29-31)*

³⁸ Afe mei Jesús Juzíñamui uai llófueracomona jino billano, Simón jofomo jaide. Afénomono Simón jífaiño ie abi cuaríllari iere irárede. Jira afengo jíllotallena Jesumo izire jícadiaioi.

³⁹ Iemo Jesús aféngomo ana áinozillano ie onoi llínote. Afe llezica ie abi cuarilla llícaide. Iemona afengo jíllobicaide. Daií daína llezica afengo náidacaillano afémaci jitaica raa bai atide.

*Jesús diga iráredino jíllotate
(Mt 8.16-17; Mr 1.32-34)*

⁴⁰ Ja jitoma jímaicaidemo, diga jíáiforiede duico ogánuiaina Jesumo atidiaioi. Afémacimona illa dígamieмо Jesús ie onoi bitade. Bitajamona afémaci jíllozítiaioi.

⁴¹ Iaioi atica iráredinuiaimona diga fiénide jóríai jino jaide. Jaillano afémaci riire caillíoidiaioi:

—O Juzíñamui Jitódio, —daidíai. Mei íadi, como úrizaidíai oimo Jesús íai oina úritañede. Mei afémaci afémie Crístona íllana onódíai oiza.

Jesús Galilea éniemo uai jino llote
(Mr 1.35-39)

⁴² Afe jítiramo Jesús jofue baimo buna iñénanomo jaide. Mei íadi comíni íena jenódíai; ie illánona baizájídi. Afémaci afémiena iere jeruídíai oni jíáinomo afémie jáiñeillena.

⁴³ Jira Jesús íai oina daide:

—Jíaié jófuai oimo Juzíñamui illáimana illíruimo ja áinozideza afena llujíredicue, mei afe jira orécacueza, —daide.

⁴⁴ Afemona daí Jesús Galilea éniemo ite Juzíñamui uai llorácomo llófuecana uite.

5

Jesús uaido dáinamona jamánomo aillo chamuniai oga
(Mt 4.18-22; Mr 1.16-20)

¹ Afe mei jíáiruido Jesús Genesaret jorai fuédamo ite. (Afe jorai jíáfodo mameina Galilea.) Afénomo ie illa llezica díga comíniai afénomo dúcina. Afémiena jamánomo rillíretadíai, mei afémaci Juzíñamui uáillai oimo iere cacáacadi oiza.

² Afe jorai fueda áinori mena nocáe táicaena Jesús ciode. Mei afécaemona facóraini oni jaillano íai oí chamu ora llóiji jocódíai oiza.

³ Iemona Jesús Simón icaemo jaide. Afécaemo jáillano íena daide:

—Bícae fuédamona bai batí due ñuita, —daide. Afe mei Jesús afécaemo ráinaillano nane como bai afénomona comíni llófuete.

⁴ Ie llófuia fúillamo, Simona daide:

—Bíe nocáe bai batí afóredinomo ui. Afénomo chamu ólleza omoi llóiji dota, —daide.

⁵ Jira Simón uai ote:

—Llófueraíma, jae nai o náamonana facódícaíza, íadi jaca daa onédícaí. Mei íadi o daína izoí mei o ocuícaza llóiji dótaiticue, —daide.

⁶ Daí dotádemo, jamánomo aillo chámuniai jíideza, llóijina cuatáacade.

⁷ Afe jira oni jíáicaemo ite íai oí nabáitíai ónoído jííritíai, ie íai oí cánuaíbillena. Jira afémaci cánuaíbitíai. Afe íai oí jíitaga chámuniai íai oí ménacae áillocaemo oruítatíai. Jamánomo oruíllamona afe ménacae buíacade.

⁸ Afena Simón cíoillano Jesús ana dújullano daide:

—Cue Ocuíraíma, cúemona oni ii. Cue bíe fiénidí fue finódimíedicueza, —daide.

9 Mei ua, afe aillo chamu jíllari Simón naa ie nabáíñiairi jacínaitiaioi.

10 Iemo jíái Zebedeo jító íaillinoi Santiago Juan diga, Simón nabai daje izói jacínaitiaioi. Mei íadi Jesús nane Simona daide:

—Jacíruiño. Benómona chamu fácuca izói comínina jénoitioza, cuemo íaioi íinollena, —daide.

11 Iemona afe ménacae oni fuédamo zítajano, dinomo nana fíiano Jesudo jáidiaioi.

Jesús chíñaitimie jíllotate

(Mt 8.1-4; Mr 1.40-45)

12 Iemo jíáiruido, Jesús jófuemo illa llezica chíñaitimie Jesumo dúcide. Jesuna cíoillano ana dújuillano uíeco dinena ana éniemo bíjicaide. Daií ñiano Jesumo izire jicade:

—Cue Ocuíraima o jítáíadi bie duícóna cúemona oréredio. Cúemona oreri, —daide.

13 Iemona Jesús ie ónoído jétano daide:

—Jíi, ona jíllotaiacadicue. Benómona ja íainitioza, —daide.

Daií dáina llezica ie irárena chiie jacáibicaide.

14 Afemona Jesús afémiena “Bie bummo lloñoeno iri” daide. Afe emódomo nane daide:

—Mai lletáriraimamo o abi ácatari. Afe llezica Moisés ocuica o abi ja íainide daiítaite raa, mai fecari. Afemona nana comini o chiie ja jacáillana ónoítiaioi, —daide.

15 Jesús izire íena rairuide íadi Jesús mámecei jamánomo bai jica jalléicaide. Iemona aillo comini ie uaimo cacáreizaibítiaioi. Daje izói íaioimo ite duícomona ie jíllotallena aillo bitíaioi.

16 Mei íadi Jesús bai comini íñéñanomo jaide, afénomo ie Moo Juzíñamuimo úrillena.

Jesús tízitaitimie jíllotate

(Mt 9.1-8; Mr 2.1-12)

17 Nane afe jíáiruido Jesús llófuemaritemo, fariséuaimona dáarie afénomo ráíiede. Afe llezica oni jicana bite ocuica uai llófueraíni dáanomo ite. Dáarie Galilea ígobiaimona bitíaioi. Daje izói jíáimaci Judea éniemona, íemo Jerusalén dinena jíái bitíaioi. Aféruimo Juzíñamui ríino aillo iráredino jílluamona jino ácataga.

18 Afe dáaruído diga ímie tízitaitimie naa ie bíralludo atídiaioi. Jofo Jesús uícomo ie uíacadiaioi.

19 Mei íadi iere comínina oruídeza jofo íaioi jáillino íñede. Ie jira caifo jofo emódomo uitíaioi. Uillano afeno tuiñódiaioi. Afeno túíñuano afe iráredimie naa ie bírallu diga ana comini cígimo Jesús uícomo agüínetiaioi.

20 Jesús ñue íaioi íinuana cíoullano, iráredimiena daide:

—Mii, nana o fiénidifuiái ja muiñócaza, —daide.

21 Iemona ocuica uai llófueraini naa fariséuairi, como comeci anado daidíaioi:

—¿Mei bie bu? baie jáimie fiénidifuiái dóficailla dáinado Juziñamuina icíritaja. Jaca bu comini fiénidifue muiñóñena; dama Juziñamui fiénidifueña múiñua, —daidíaioi.

22 Mei íadi Jesús comeci íaioi fácajana onóillano daide:

—¿Nibái mei bie izói comeci facádiomoi?

23 Mei daí daína ménade uáimona ¿nie uai iere llotáinina? Afe ménade uai be ñie: O fiénidifue muiñócaza. Iemo jáie uai bie izói joide: Mai náidacaillano maca. Iraie uai jamánomo llotáirede, mei omoi eróicana íteza.

24 Mei jira, Nanoide íima Jitódicueza bíniemo cue illa llezica comínimo ite fiénidifue cue muiñolle ríino jino ómoimo cíotaiticue, —daide.

Mei jira Jesús tízitaitimiena daide:

—Ona dáiticue náidacai; náidacaillano o bírallu llínota o jofomo jai, —daide.

25 Daí daína llezica, afe tízitaitimie comini eróicana caifo náidacaide. Náidacaillano, ie bírallu llínota, Juziñamuimo caimátaicana ie jofomo jaide.

26 Aferi nana comini caimare fáigacaidiaioi, íemo Juziñamuimo caimátaidiaioi. Afe mei jacíruioicana daide:

—Ñi birui cai iere ebíredifuiaina ciona, —daidíaioi.

Jesús Leví jírute

(Mt 9.9-13; Mr 2.13-17)

27 Nane bie méifomo Jesús jofue cígido mácaja llezica, go-bierno íbátaga úcube llínoraímamo riire éroicaide. Afémie mámece Leví. Afe úcube íbafirenanomo afémie ráiide. Jesús íena daide:

—Mai cuedo bi, —daide.

28 Iemona Leví náidacaillano nana ie táijina fáicanocaillano Jesudo jaide.

29 Afe mei Leví áillue rafue ie jofomo Jesús íena finode. Afe Leví izoide aillo úcube llínoraini naa jáímaciri güirábanimo ráizaititiaioi.

30 Mei íadi fariséuai naa ocuica uai llófuetinori Jesús llófuegamacimo como meine fieni úritiaioi. Iaioina daide:

—¿Nibái mei baie úcube llínofirede fiénidinori güitíomoi? —daidíaioi.

31 Jira Jesús íaioi uai ote:

—Iociredimie mánuamo dúiñede. Iráredino manórena.

³² Dani ñüemacina abi mamédinona uáiduaibiñedicue, mei jiáifodo fiénidifuiairedino comeci ifue méiduaibiticue, —daide.

Iaioi fimairillena Jesumo jicánotiaioi
(Mt 9.14-17; Mr 2.18-22)

³³ Iemona afémaci Jesumo jicánotiaioi:

—¿Nibái mei Juan dibénedo jáidino, íemo jiái fariséodo jáidino, diga ícaiño riire fimafirediaioi? Iaioi fimairilla llezica Juzíñamuimo jamánomo jicáfirediaioi. Mei jiáifodo o llófuegamaci jaca güífirediaioi, jirófirediaioi. ¿Nibái mei daí itíaió?

³⁴ Jira Jesús íaioi uai ote:

—Mai cuena omoi daí: ¿Airena rafue llezica áfemo uáidogano meita zúurenari güínidiaioi? Daítañede; ringo otímie íaioi cígimo illa llezica caimare güitíaió.

³⁵ Mei íadi ringo otímie íaioimona báiruaibilliruimo dúciite. Aféruído comeci zúurenari güíñeitiaioi. Ringo otímie izóí birui cuedo jáicaidino cígiri itícieza.

³⁶ Ie emódomo jiáie onótate rafue llote:

—Jaca nino dáamie comue iníroimona jáitano, jácaroimo nitáñede. Daí nitáadi cómoroina fiéni cíoitate. Iemo jiái jácaroimo nitaca cómoroi figo cíoiñede.

³⁷ Iemo nane jiáifue llote. Daje izóí comue vino jácara igorai finoína iciru izoide raamo totánide. Dáamie daí totáadi afe comue vino afe jácara iciruna eroide raana cuatade. Afemona afe iciru naa vino diga táinomo fáifite.

³⁸ Iemona comue vino comue igorai finoína iciruna eróidemo jóonerede. Iemona afe naga ñue éenoga.

³⁹ Daje izóí jácara vino jiródinomona, buna cómojina jicáñena. Mei afémie “Jácaji jamánomo caimárena,” dáideza. (Afe bie dáinado Jesús ie comue llófueinafue íemo íaioi jaiái llófuegafue dáanomo ínonide íaioimo llote.)

6

Jesús llófuegamaci ocózinallarumo trigo ímoiai dícoiano otá güitíaió

(Mt 12.1-8; Mr 2.23-28)

¹ Daa ocózinallaruido Jesús naa ie llófuegamaci jacáfaiai cígido íaioi maca llezica, ie llófuegamaci trigo ímoiai dícoiano otíaió. Uano íaioi ónoído lléguano aféjiaina güitíaió.

² Mei jira fariséuaimona dáamierie jicánotiaioi:

—¿Nibái mei ocózinallarumo rairuícamo táijidiómoi? —daidíaió.

³ Jira Jesús íaioi uai ote:

—¿Omoi jaii illaïma David finócafue cúeinana facadoñediomoi? Afémie naa ie nabáiñiaïri juffinaitiaïoi.

⁴ Afe llezica Juziñamui jofomo jofo jaillano rairuica pániai ote. Uano güite. Afe mei afémiedo jáidinomo fecade. Mei íadi afe pan dani lletáriraini güiga. Abi dine jamai comini güinide.

⁵ Nane dáanomo íaïoïna daide:

—Nanoide ñima Jitódicueza, ocózinairuui, cue ocuille ríino ite, —daide.

Onoïna jofo naillídimie rafue

(Mt 12.9-14; Mr 3.1-6)

⁶ Nane jáie ocózinairuui Jesús Juziñamui uai llorácomo jofo jaide. Jaillano llófuete. Afécomo onoi nabézina jofo naillídimie ite.

⁷ Afe llezica ocuica uai llófuetino naa fariséuairi Jesumo báinino éroiediaïoi, ocózinairuuido afe ónoïna jofo naillídimie jíllotajana cíoilena. Afémie jíllotaia áfedo fiénidifue íemo jítaíticai, comeci anado daidíaïoi.

⁸ Mei íadi Jesús íaïoi comeci fácajana onode; jira ónoïna jofo naillídimiena daide:

—Náidacaillano bai cai cigimo bi, —daide.

Iemona afémie náidacaillano bai náidazaide.

⁹ Afe mei Jesús jáíimacina daide:

—Omoïmo dafue jicánoíticue. ¿Ocózinairuui ñie táijina rairuínina? ¿Cai finoca fiénidifue, mei ñibai cai finoca ñúefue? ¿Cómena jíllotaiticai, mei ñibai méineíticai? —daide.

¹⁰ Iemona Jesús nana ie onífenedo gairide comínimo eroide. Afemaci ie uai oñena jira, ónoïna jofo naillídimiena daide:

—O onoi jino zuita, —daide.

Jira afémie zuitade. Zuitádemo ñue jíllode.

¹¹ Mei íadi áfemona afe jáíimaci jamánomo ríicaidiaïoi. Dani jofo conímamo jicánotiaïoi, ¿Mei ñie izói baie Jesús uáitaredicai?

Jesús doce diga oni oréllimacina nizede

(Mt 10.1-4; Mr 3.13-19)

¹² Aféruillaïdo Jesús caifónedumo Moo Juziñamuïmo úrizaide. Afénomo afémie Juziñamuïmo úritemo monaide.

¹³ Ja monáidemo nana ie llófuegamaci jírite. Jírillano afémacimona doce dígamie nizede. “Oni oréllino” íaïoïna mamede.

¹⁴ Afe be ñíimaci: Simón, afémie jáíe mámecí jítaina Pedro, íemo Simón ama Andrés, íemo Santiago, íemo Juan, íemo Felipe, íemo Bartolomé,

¹⁵ íemo Mateo, íemo Tomás, íemo Alfeo jíto Santiago, íemo ñere Járidotimacimo jáináidimie Simón,

16 Íemo Santiago ama Judas, íemo uire Jesús fécaitimie Judas Iscariote.

Jesús aillo nairai llófuete
(Mt 4.23-25)

17 Jesús caifónedumona naa afémaciri ana bitíaiói. Billano ñúenomo nano íanori naidáiediaíói. Afénomo aillo jicánemaci Judea éniemona bitino gairídiaíói. Daje llezica Jerusalémona, íemo jíái Tiro, Sidón diga jica itíniemona bitíaiói. Bimaci nana Jesús úrillamo cacáreizaíbitiaíói. Daje izói afémaci íaíoiimo ite dúicomona Jesús jíllotallena bitíaiói.

18 Daje izói fiénide jóriaí uícaigano jíllotagaiaíói.

19 Afe llezica nana comini Jesuna jetáacadiaíói, mei afémie íemo ite ríinodo nana íaíoiina jíllotateza.

Cáimafue zuufue diga
(Mt 5.1-12)

20 Iemona Jesús ie llófuegamacimo érocaillano íaíoiina daide:

—“Comeci dinena dúeredicai,” dáíifiredino omoi íadi, dúerede íadi íóbidiomoi; mei ómoimo Juzíñamui illáimana illano dúideza.

21 Júbiena méinegamie iere güícana izói, Juzíñamui comece jítaina izói iere íacadino omoi íadi, caimare íóbidiomoi, mei Juzíñamui afe omoi íacana izói omoi íllena ómoína cánoiteza.

Birui duere éediomoi íadi caimare itíiomoi, mei uire zádaítomoi.

22 Nanoide Hima Jitódicueza cue ícoínia comini ómoína éoína llezica caimare ítiomoi.

Daje izói cue ícoínia ómoína jino íaíoi jíuadi íóbítomoi. Iemo jíái cue ícoínia ómoína íaire íaíoi daííadi, daje izói o mámecina íáirede raa izói íaíoi jámairuía, íóbítomoi.

23 Aféruído iere omoi íóbiocairi. Jamánomo caimare omoi iri, monamo áillue omoi jíridolle raa íteza. Mei afe izói bimaci nánoidigima Juzíñamui uai llórainina iere duere finódiaíói.

24 Mei jíáífodo omoi ráanaitino ñí dúerena, mei omoi caimátailla raana jae otíomoiza.

25 Daje izói omoi jeírede izói itino ñí dúerena, mei uire iere júfíruitomoiiza.

Afe izói birui ómoimona zadáidino ñí dúerena, mei uire dúerenari éeítomoiiza.

26 Daje izói nana comini ómoído ñue íaíoi úrilla llezica, ñí omoi dúerena. Mei afe izói afémaci jáiáigima taino uai llórainimo caimare úritiaíoiiza.

Caina éoidinona izíruiredicai
(Mt 5.38-48; 7.12)

27 Mei íadi cue úrillamo cacáreidiomoiña dáitícue: Omoi bacáuai imaci izói dino, nñi omoi diga iciritinona mai omoi izírui. Daje izói omoi éoidinona mai ñue omoi finori.

28 Omoi faidódinona mai omoi cáimadori. Daje izói ómoína fienni finócadino, ñue íaiói ílleza, mai Juzíñamui omoi jicari.

29 Daa come o uíeco putáadi, daje llezica enéfenena ie fállena mai o fecari. Daje izói dáamie táinona omo jítajano, o emódoidiroi bairóadi, daje llezica o caifóferoina mai o uitátari.

30 Ninó dáamie raana omo jicáadi mai afémiemo jeruíñeno o fecari. Omona bairoca raana abido jicánoñeno o iri.

31 Jira jíaimacimo uícodo bie izói finórediomoi. Jíaima omo finóllena o óiacana dieze, áfeze afémiemo mai o finori.

32 Daa ómoína izíruintinona omoi izírui, ¿Mei nñie ñúefue finódiomoi? Mei fiénidino afe izói finuaza.

33 Daje izói daa omoi ñue finódino ñue omoi finóadi, ¿néemei omoi finoca ñúefue? Mei fiénide comini afe izói finuaza.

34 Afe izói daa “meine abido cue méidolle cue coméicillamiemo” o fecáadi, ¿néemei o finoca ñúefue? Mei afe izói, fiénidino jíaié fiénidinomo méidollena fecádiaioiza.

35 Mei íadi ómoína éoidinona izírui rediomoi. Abido méidollemo coméicño, fia fecárediomoi, afémacimo ñue finóllena. Afe izói omoi íllemona áille ñúefuai máinoitiomoi. Afe llezica caifoide Juzíñamui jítótaiña jáitiomoi. Mei afémie daje izói jeruífinidimie. Figora daiífinidinomo, daje izói fiénidinomo afémie jeruíñeno dájerize fecade.

36 Omoi Moo comínimo dúecaifiredeza, afe dieze jíaimacimo mai omoi dúecaifireiri.

*Jíaima jánana fienni úriñeno iri
(Mt 7.1-5)*

37 Jíaima jánana mai fienni úriñeno omoi iri, áfemona Juzíñamui riire ómoimo jicánoiza. Mai jíaimana duere finótañeno omoi iri, afe izói Juzíñamui duere omoi fínoiza. Jíaima ómoimo finoca fiénidifue mai omoi féitari, afe izói Juzíñamui omoi fiénidifue féitaiteza.

38 Jíaimamo mai omoi ífireiri, íemona Juzíñamui ómoimo ífireiteza. Afémie raa omoi ofítara cirígaimo iere ñue fácajano afégaimo jóoneite. Afémie afégaina ñue riire jilloicíteza. Iemo jíai afégaina caifo jica ebena óruitaita. Afémie afegai jamánomo oruítajamona ana abido cócite. Jíaimamo cai facáfirena izói Juzíñamui caimo fácaite.

39 Jesús bie onótatífue afémacimo llote:

¿Meita únidimie jíaié únidimie iodo ifórede? Nibai afe íaillinoi jáidiaillinoína ¿meita dáafomo báitíiaillinoi?

40 Llófuegamacimona dáamie ie llófuetimie baimo onóñede. Mei íadi ie llófueina fuilla mei ie llófuetimie illa izói iite.

41 ¿Mei ñie izóí o ama uimo ite jéenide ráaruaina eróiredio, mei íadi dama o uimo ite jéerie rarúnguaina náfueñedio? (Afena daiíacade: Aillo fiénidifue omo illa llezica; ¿ñie izóí due jiza oni nibéfodo baíidimie jánana úriredio? Urinidío.)

42 Mei o uimo ite jéerie rarúnguaina o náfueñenia, ¿ñie izóí o ámana “o uimo ite jéenide ráaruaina cue otata,” dáitio? Daiínidío. ¡Comeci dine íáirena mei jínofene ñue cíoidimedio! Fueñe o uimo ite áillue rarúnguái mai o oírí; afe mei o ama uimo ite jéenide ráaruái óllena ñue cíoitioza.

Nana amena ie lliziedo ónoredé
(Mt 7.17-20; 12.34-35)

43 Ñuera amena fiénide ráajiaína llizínide. Daje izóí fiénide amena ñuera ráajiaína llizínide.

44 Mei naga amena ie llizíllajido onoiga. Jaca jírede monáigimona jíficollina jofo óñenaza. Daje izóí “zarza” daína íanoride rarócimona jíricue jofo óñega.

45 Ñuera come ñúefuedo úrite, mei ie comécimo ñúefue íllaza. Daje izóí fiénidimie fiéni úrite, mei ie comécimo fiénidifue íllaza. Mei uáfueza o comécimo aillo jebuide raa o fuedo úrillaza.

Mena jofo nillino rafue
(Mt 7.24-27)

46 Cue dáinana íinoñediómoi ía ¿nibái mei, “caí Ocuíraíma, caí Ocuíraíma” daidíómoi?

47 Cuemo cacárezaíbitimie, íemo cue daína finófiredimie illa izóí ómoímo llóitícue.

48 Afémie jofo nílana baitádimie izoide. Afe ñue nífiredimie fueñe ana jica jáílliraina raíte; ana maírídínomo jóonete. Afe mei ille renailla llezica afécomo jainoi riire dúcide. Mei íadi afe jofona jainóñede, mei afeco mozíoidíllirai maírídínomo jóideza.

49 Mei jíáífodo, cuemo cacárezaíbitimie mei íadi cue dáinana finóñedimie, bie jíáífo jofo nitímie izoide. Bímie riire llííñede éniemo jofo nite. Afe mei ille renailla llezica afécomo jainoi riire dúcide. Afemona afeco jainode. Iemona afeco due fiébiñeno nine táinocaide.

7

Romano illaíma ocuífiregamie Jesús jíllotate
(Mt 8.5-13)

1 Jesús comínimo úrilla fuilla mei Capernaumo jaide.

2 Afénomo daa romano illaíma ite. Afémie ie ocuífiregamiena iere izíruite, mei íadi afe ocuífiregamie iere irárede, tíllanomo dúcide.

³ Afe illaïma comini Jesudo úrillana cacáillano, judíuaimona ocuífiredede éicomini orede, Jesumo izire jicállena, ie ocuífiregamie jíllotaïbillena.

⁴ Afémaci Jesumo dúcïllano iere izire jicádiaioi:

—Baie illaïma iere canórede,

⁵ mei afémie cai náiraïmo caïmare comécïfiredede. Daa afémie cai Juzíñamui uai lloraco nitátate, —daïdiaioi.

⁶ Iemona Jesús afémaciri jaide. Mei íadi ja afe jofomo ánozilla llezica afe illaïma dáarie ónoigamiïai Jesumo orede. Illaïma daina izói Jesuna daïdiaioi:

—Ocuíraïma, ona áfedoacañedicue. Cue jofomo o bíllena dúíñede, mei jamáimïedicue.

⁷ Ie jira dama omo úrizabiñedicue. Jicana o uaido o daiíri, áfemona cue ocuífiregamie jílloteza.

⁸ Mei cue jíaïe illaïma uai anamo iticue. Afe izói cue úíñoga fuíríraïni cue uai anamo ite. Afémacimona dáamiena “Mai jai” cue daiíadi, afémie jaide. Iemo jíaimiena “Bi” cue daiíadi, afémie bite. Cue ocuífiregamiena “Bíemo o táijiri” cue daiíadi, afémie áfena finode, —daïde.

⁹ Jesús áfena cacáillano, afémie dáinari caïmare fáigacaide. Iemo Jesús afémiedo jáidinomo érocaillano daïde:

—Uáfuenta ómoïna dáititcue: Nana Israel náiraïmo bie izói íinote come jaca baiñedicue, —daïde.

¹⁰ Afe orécano meine jofomo jáidiaioïmo, afe irárede ocuífiregamie ja jíllodena cíozaidiaioi.

Jesús daa fecingo jitó tílla abido cáadimiena jaitate

¹¹ Bie méifomo Jesús Naïna daina jófuemo jaide. Ie llófuegamaci naa aillo jíaimaciri iedo jáidiaioi.

¹² Afe jófuemo ja ánozidiaioïmo, Jesús tíidimie íaioi raíájillana ciode. Afe tíidimie ie éïmona daade jitó. Afe llezica afengo jae fecingo. Aféruido afe jofue comínimona aillo aféngona nabáidiaioi.

¹³ Ocuíraïma Jesús aféngona cíoïllano íemo dúecaide. Dúecaillano daïde:

—Mai éeñeno, —daïde.

¹⁴ Afe llezica Jesús “ataúd” daina tíidimie illácojïmo ánozillano afécojï jetade. Jira afécojï uitino mozíñotiaioi. Iemona Jesús tíidimiena daïde:

—Jitócome, mai náidacai ona daïdicue, —daïde.

¹⁵ Mei daií daina llezica, afe tíidimie raïnáicaillano úrite. Afe mei Jesús ie eina daïde, “Be, o jitó; mai ómicoi jai; uái ómicoi iri,” daïde.

¹⁶ Nana comini áfena cíoïllano jacínaitiaioi. Juzíñamuïmo aillo ñúefue jóoniano daïdiaioi:

—Birui cai cígiri jamánomoide uai llóraima cíocailla, —
daidíaioi.

Nane jiáifodo daidíaioi:

—Juzíñamui ie nairai cánuaibilla, —daidíaioi.

17 Iemona afe bie Jesús finócafue jica jalleide; ua nana Judea
éniemo naa afe onífenemo itígobiaido jalleide.

Juan Bautista orécano

(Mt 11.2-19)

18 Juan nana afe Jesús finócano fidide, mei íedo jáidino
afémiemo llógaza.

19 Mei íemona afémacimona ménamie uáidota Jesús dine
orede. Oriano, bie meita ua bite Cristo dáinana ónoillena
jicánotade. Daje izói, meita nibai nai jiáie bíitimie uíñoiticaí,
afémie daí jicánotade.

20 Afemona Juan orécano Jesumo dúciillano íena daidíaioi:

—O meita ua bite Cristo dainámiedio áfena ñue onóillena Juan
cai jicánotade. Daje izói meita nibai nai jiáie bíitimie uíñoiticaí
dáinana ónoillena cai jicánotade, —daidíaiillinoi.

21 Afe íaillinoi dúcina llezica, Jesús diga comini íaioi
íraniaimona jíllotade; daje izói dáaruido íaioi ote duícuaimona
jíllotade. Daje izói fiénide joríaí úcaigamacina jíllotade. Iemo jiái
diga únidinuiái uina cíoitade.

22 Afe llezica Jesús íaillinoína daide:

—Omicoi cíonafue, naa ómicoi cacánafue diga mai Juaamo
lluájiri. Bie izói afémiemo lluájiri: Uínidino ui ja cíoide, íemo
macáñedino ja macádeza, íemo chíunaitino ja ñúemacina jaide,
íemo jefona cacáñedino ja ñue cacádíaioi, íemo dáarie tíidino
meine abido cáadíaioi, íemo dúeredinomo jíllona uai llógaza.
Nana bífuiaí mai afémiemo lluájiri.

23 Cuemo íñoñeilliuaina baiñédimie íóbite.

24 Juan orécano meine abido jailla mei, Jesús Juaado
comínimo úrite; daide:

—¿Mei táizicimo minícana cíozaidiomoí? Nibai dáamie ie
daina uaina méidofiredimiena cíozaidiomoí.

25 Afe izóidena omoi cíozaiñenia, ¿mei minícana
cíozaidiomoí? ¿Meita nibai ñue cíoide ráifide iniroi
jitáoidimiena cíozaidiomoí? Onódiomoíza, ñúecuiri
jitáoifiredino illaini jofomo ífirediaioi naa dani íaioi comeci
jitaina izói itínori.

26 Mei íirainomo, ¿minícana cíozaidiomoí? ¿Nibai Juzíñamui
uai jino llóraimana cíozaidiomoí? Jii, ua, Juzíñamui uai
llóraima baimo jamánomoidimiena cíozaidiomoí.

27 Juan baie Cuegáuai dainámie. Jaiai úicodo nai cue biñena llezica, afe uaimo Juzíñamui afémie dibenedo cuena daide: O bille io ñue finóllena izói, comini íaioi comécido ñue omo jieruillena cue lluájitimie o uícodo óreiticue.

28 Nana comínimona ite Juzíñamui uai llórainimona Juan Bautista baimo jamánomoidimiena iñede. Mei jíáfodo, Juzíñamui illáimana illánomona jabóidimie Juan baimo jamánomoide.

29 Afena cacáillano, Juan báutizaga gobierno ibátaga úcube llínoraini, naa jíáie báutizaiganori, “Juzíñamui nífuenidena finódimie,” daidíaioi.

30 Mei jíáfodo Juan báutizañega fariséuai naa báutizañega ocuica uai llófuetinori Juzíñamui íaioiena mameca ñúefuiai jámairuillano táinomo fáifitatiaioi.

31 Iemo Ocuíraima Jesús daide:

—Bie monado itínona ¿ñie izói íaioina mámeiticue? ¿Mei ñie izói cíotiaioi?

32 Jofue cigi ibírimo jífánote úrue izóidiaioi. Afémaci conímamo ebírede rúado caimátaiacadiaioi, mei íadi áfena fairíoñediaioi. Daje izói conímama zúurede rúado fíraacadiaioi, mei íadi daje izói áfemo cacáreacañediaioi. Afémaci jaca caimátaitanidiaioi.

33 Afe bie izói ómoimo ite. Mei Juan Bautista billa llezica afémie fímairillano güllenai figo güñede, daje izói vónona jiróñede. Iemona “fiénide joríaí uícaigamedio” íena daidíomoi.

34 Afe mei cue, afe Nanoide fima Jitó dainámiedicue biticue. Billano, jíámaci izói güiticue, íemo jiródicue. Afemona bie izói nane cuena daidíomoi: “Bímie iere güilláredimie; jéerie jirófiredimie. Fiénidifuiaredino nabáidimie; daje izói gobierno ibátaga úcube llínoraini nabáifiredimie,” cuena dáifirediomoi.

35 Comini Juzíñamui orécanona fieni daidíaioi íadi, Juzíñamui baitaca rafue jieruitinodo jino comínimo ñue cíotaga.

Fariseo Simón jofomo Jesús güizájide

36 Fariséuaimona dáamie Jesús güizájillena llote. Iemona Jesús afécomo güizájide. Jaillano afeco eromo güirábanimo ráinazaide.

37 Afe llezica, afe jófuego ite fiénide ringo, fariseo Simón Jesús güizaibillana fidiillano afécomo bite. Afengo “alabastro” daina nofici finoina duera iciru atide. Aferu ziore cáiredijina oruide.

38 Eebicaillano Jesús idai abimo ráinazaide. Afe llezica ie ui jémedo Jesús idai jocode. Afe mei ie ifótido dote. Duano ñítade; ñítajano ie uiga ziore cáiredijina afémie ídaimo totade.

39 Afe Jesús güllena uáidote fariseo, afengo finócafuena cíoillano, comécido daide: “Bímie ua uai llóraimania, bie ringo fiéninana ónoite. Afémie abina nibai aféngona jétatañeite. Mei afengo fiénidíngo íllaza afémie aféngomona abí ráiruite,” daí comeci facade.

40 Afe jira Jesús fariséona daide:

—Simón, cue daa uai omo llóiacadicue, —daide.

Mei jira fariseo uai ote:

—Llófueraíma, mei daíni, —daide.

41 Jira Jesús daide:

—Mena come úcomo íaillinoímo iga úcube daje izói meine fecádimiemo írediaillinoí. Dáamie quinientos dieze meine írede, íemo jáímie cincuenta dieze meine írede.

42 Mei íadí nágaillinoí afe úcube fecádimiemo íaillinoí méidolle íñena jira, afe fecádimie afe íaillinoí abído írede úcubena féitate. Mei birui cuena daíni, mei bíaillinoímona ¿níímie fecádimiena jamánomo izíruirena? —daide.

43 Jira Simón uai ote:

—Cúemona, jamánomo aillo illano féitagamie aillo izíruilla, —daide.

Jira Jesús íena daide:

—Ñue onódio, —daide.

44 Afe mei, Jesús ringomo érocaillano Simona daide:

—¿Bíngona cíódio? O jofomo cue billa llezica, cue ídáina jocóñedio, mei jáífodo bie ringo ie ui jémedo cue ídáina jocode. Jócuanó ie ífótído zafénaitade.

45 Íemo o jofomo bitícue íadí cuena ñítáñedio, mei íadí afengo jofó cue billa llezica cue idai ñítajana jaca fáicanocaiñede.

46 Daje izói o jofomo cue dúcina mei cue ífomo cáiredíjina totáñedio, mei jáífodo afengo ziore cáiredíjina cue ídaimo totade.

47 Íe jira ona daidícue, bie ringo aillo cuena izíruillamona, afengo finoca aillo fiénidífue dóinana ácatate. Mei jáífodo jabo cuena izíruitimie íemo ite íaífue jabo dogá.

48 Mei afe mei Jesús aféngona daide:

—O finoca fiénidífue jae dófideza, —daide.

49 Afénoimo afémie díga ráide daane güllena uáidogano daíni conímána daidíaioí:

—Mei bie ¿níie come; comínimo ite fiénidífuiána dóteza? —daidíaioí.

50 Afe mei Jesús afe ringona daide:

—Mei daíngo o ínuado jae jíllodio; mái uái daíí o jairi, —daide.

8

Jesús canófredingoniai

¹ Bie méifodo, Jesús diga jófuiaido macácaide, naa due illánuiari. Afénuiaido Juziñamui illáimana illa rafue jino llocana uite. Afe llezica ie nizeca doce dígade oréllino afémiedo jáidiaioi.

² Afe dáaruído dáarie duícuaïmona ie jíllotaga ringóniaï afémiedo jáidiaioi. Iemo jáiá dáarie íaioi uícaide fiénide jóriaïmona jíllotaga ringóniaï iedo jáidiaioi. Afémacïmona Magdalena énie ingo Mariana mámeciredingo ite. Aféngomona siete dígade fiénide jóriaï nauï jino oreca.

³ Iemo jáiáie canódingo Cuza ai Juana. Afe Cuza illaïma Herodes jabóidillaïma. Iemo jáiángo Susana. Iemo jáiá aillo jáiáie ringóniaï, íaioïmo ite ráaniaïna Jesús canódingotiaï.

Ríjifiredimie rafue

(Mt 13.1-9; Mr 4.1-9)

⁴ Afe jófuiáïmona aillo comini Jesuna cíóïllena bitíaioi. Aillo comini dáanommo ofilla llezica, íaioi onóigafuedo Jesús jáifue íaioïmo llófuete. Iaioïna daïde:

⁵ —Ríjifiredimie ie rilliji rizájide. Rizájilla llezica, ie rigájiaïmona dáarie iommo baïde. Afe iommo baïdíjiaï zaizíbide; jáijiaï ofocuizai güiga.

⁶ Jáiáie rigájiaï noficiaï emódomo baïde. Aféjiaï zícua llezica jainoi ñénari dúizite.

⁷ Ie mei jáijiaï éegiaï cígimmo baïde. Afe éegiaï jéerie zícuaïmona aféjiaïna írataitano titade.

⁸ Mei íadi jáiáie rigájiaï ñuera éniemmo baïde. Ñue zícua mei, jamánommo aite. Dáajidemonna cien dígaji llizide.

Bie izói úrillano, Jesús ficire daïde:

—Cacáacadimie cacai, —daïde.

Cacáacaïñedino jánaïllena Jesús comini onóigado úrite

(Mt 13.10-17; Mr 4.10-12)

⁹ Iemona ie llófuegamaci afémiemmo jicánotiaioi:

—Afe llogafue ¿ñie izói daïacade? —daïdiaioi.

¹⁰ Jira afémie íaioïna daïde:

—Juziñamui ie illáimana illa rafue ónonidifuiáï ómoïna onótate. Mei íadi jáiámacimmo afémaci jánaïllena comini onóigado úriticue. Iemona uina cíóñedino izói íitiaioi. Daje izói afe uai afémaci cacana llezica, onóñedino izói íitiaioi.

Ríjifiredimie rafue Jesús jino uáfodo llote

(Mt 13.18-23; Mr 4.13-20)

¹¹ Ríjifiredimiedo lloga rafue bie izói daïacade: Afe rigájiaï daïna Juziñamui lloga ñuera uai.

12 Afe iomo baiídijiai daina ñuera uaina cacádino. Mei íadi cacana mei, Taife billano afe ñuera uaina comini íaioi comécimona féitate. Afémaci jílloneillena, Taife afémaci afe uaina ínotañede.

13 Afe noficiaimo baiídijiai daina jíáfodo jóide ñuera uaina cacádino. Afe uaina cacáillano caimare otíaiioi. Mei íadi afémaci raire zicode raa riire jaináñena izói, Juzíñamuimo afémaci figo jaináñenamona are iñédiaioi. Nano íanori ínotiaioi. Mei íadi izire íaioi facátalliruimo dúcina llezica ñúefuena fáicanocaitiaioi.

14 Iemo afe éegiai cígimo baiídijiai daina, jíaie ñuera uai cacádino. Mei íadi cacana llezica dani íaioi comeci jitaina diné jáiacadiaioi. Iemona afémaci comeci oni jíáinomo uilláfuiado, nocáe builla izói féiraitiaioi. Daje izói iere íaioi ráareiacanado, íemo jíai bíniemo ite caimare cai itátafuiado anáfenogaiaioi izóidiaioi. Iemona figo llizíñede itíaioi.

15 Mei jíáfodo afe ñuera éniemo baiídijiai daina ñuera uaina cacáreacadino. Afémaci ñuera comécido cacáillano afe uaina ñue náfuetiaioi. Iemona áfena fáicanocaiñeno ñue aite izói jáidiaioi.

Boode mechera jánaide izóidifue

(Mr 4.21-25)

16 Buna boode mechera retáidoñede. Daje izói buna boode mechera bíira anamo raináñede. Mei íadi jíáfodo boode mechera caifo uáfori cíoidinomo raináfirega, jofa jáidino ñue cíoilena.

17 Mei uáfueza, nana retáidoga ráaniai uáfori jino cíotaibile. Daje izói nana báinide ráfuijai jino uáfori llócailleza.

18 Aquíe izóideza ñue omoi cacáreiri: Iere Juzíñamuina onóacadimiemo ie báitaja baímo jamánomo írede, mei íadi Juzíñamui dibénedo figo onóacañedimie, due ie onógafue féitale.

Jesús ei naa ie ámatiairi

(Mt 12.46-50; Mr 3.31-35)

19 Iemona Jesús ei naa ie ámatiairi ie illánomo dúcidiaioi. Afénomo aillo comini íllaza, afémiemo áinozinidiaioi.

20 Jira dáamie Jesumo lluájide:

—O ei, naa o ámatiairi jino benó itíaioi. O diga úriacadiaioi, —daide.

21 Jira Jesús comínina daide:

—Juzíñamui lloga uaina cacáillano afe uai jeire otino cue eina, cue ámatiaína, —daide.

Jesús jorai bagua naa jairifo diga llícaitate

(Mt 8.23-27; Mr 4.35-41)

22 Afe mei jáíruido, Jesús ie llófuegamaciri áillocamo ana jaillano Jesús daide:

—Mai jorai ruícaferaimo cai jai, —daide.

Iemona jáidiaioi.

23 Ruica íaioi jáitaja llezica, Jesús inide. Afe llezica riírede jairifo jóraimo ónonino raire bite. Riire jáiñuamona afe nocáe buíacade. Afécaena jacire anábaitacade.

24 Mei jira Jesús cazítatiaioi. Cazítajano íena daidíaioi:

—Llófueraima, Llófueraima, ja buízaidicai! —daidíaioi.

Iemona Jesús náidacaillano jairifo naa jorai bagua diga llícaidade. Afemona nana llícaide; náñfuenino jorai uái ite.

25 Afe mei Jesús ie llófuegamacina daide:

—¿Ico nai Juziñamuimo ñnoñediomoi? —daide.

Mei íadi afémaci jacínaitiaioi. Afémiemo caimare fáigacaillano conímamo jicánotiaioi:

—¿Mei bie ñie cómeita? Afémie jairífona ocuide, daje izói jáinoina ocuide. Iemo afémie uaina ñnotiaioi, —daidíaioi.

Gerasa éniemo ite fiénide jóraiaí uícaigamie

(Mt 8.28-34; Mr 5.1-20)

26 Jailla ícoimo Gerasa éniemo dúcidiaioi. Afémie Galilea énie ruícaferaimo ite.

27 Como ari aféniemo jáidiaioimo, afe jófueмона dáamie Jesús diné bite. Ja diga fimónaiaí afémie fiénide jóraiaí uícaiga. Afémie inícuíro jaca jitáñede. Daje jofomo uái iñede, mei jáífodo raíáfuaina jofórede.

28 Jesuna cíoillano afémie anamo dújuzaibite. Dújuzaibillano ficire daide:

—Caifoide Juziñamui Jitó Jesús, ¿ñibái mei cuemo jíricaidio? Duere cue o fínoñeillena izire jicádícue, —daide.

29 Afémie bie izói daide, mei Jesús afémiemo ite fiénide jóraiaí jino oréllena ocuícaza. Diga ícaíño afémiena fiénide jóraiaí riire uícade. Afe llezica comini afémie onoi idai diga llojéodo máifirediaioi. Jáíamaci fiéni fínoñeillena izire íena rairuídíaioi. Mei íadi afémie afe maia llójejina titáfírede, ie mei afe ie uícaide fiénide jóraiaí afémiena táizicimo botátáfírede.

30 Jira Jesús afémiemo jicánote:

—¿O mámecí bu? —daide.

Jira afémie uai ote:

—Legiona mámecíredicue, —daide. Afe “Legiona” daina uai, aillo comini, daííacana.

Afémie bie izói daide mei aillo fiénide jóraiaí íena uícaideza.

31 Afe bie fiénide jóraiaí Jesumo izire jicádíaioi duere finótalle íbárafomo afémaci óreiñellena.

32 Mei afe llezica afénomo ite íconido aillo meróniai güicaidiaioiza, fiénide joría afe meróniaimo jáillena Jesumo izire jicádiaioi. Iemona Jesús áfena fairíote.

33 Iemona afe fiénide joríaiai ímamona jino billano meróniaimo jáidiaioi. Afe mei afe meróniai árera íconido jabícana jóraimo cocízitiaioi. Dinomo coróbaitiaioi.

34 Meróniai úiñotino áfena cíoilano jacinaítiaioi. Aferi jacinaillano botádiaioi. Iemona jófuemo llujáidiaioi; daje izói oni fuédamo itícuaímo llotíaioi.

35 Iemona jofue comíni afe comuídifuemo acárizaidiaioi. Jesús illánomo íaioi dúcina llezica fiénide joríaina jino orécamié Jesús anari uái ráinana cíozaidiaioi. Afe íima ja iniroi jítáuide; daje izói ie abina ñue onode. Afena cíoilano iere jacíruitiaioi.

36 Afena cíódino nauí fiénide joría uícaigamié jíllotaja oni jíáinomo llujáidiaioi.

37 Mei bíemona nana afe Gerasa énie comíni, afénomona Jesús oni jíáinomo jáillena izire jicádiaioi, mei áfena iere jacíruitiaioiza. Iemona Jesús ana áillocaemo jáizaide, ruica abído jáillena.

38 Afe llezica afe fiénide joríaina jino orécamié Jesús diga jáillena izire jicade. Mei íadí Jesús áfena fairíoñede; afémiena afénomo fiébitade. Iena daide:

39 —Mai meine o jofomo jai. Jaillano nana Juzíñamui omo finócafuiaina jino lloiri, —daide.

Iemona afémie jaillano, nana jofue comínimo Juzíñamui íemo finócafuiái jino llujáide.

*Jairo jiza íemo jíáingo Jesús inícuiro jétáibítingo Jesús jíllotate
(Mt 9.18-26; Mr 5.21-43)*

40 Jesús meine jorai ruicáfenemona dúcina llezica, comíni afémiena iere caimare llínotiaioi. Mei nana afémiemo ocuírídiaioiza.

41 Afe llezica Jáirona mámeciredímie dúcide. Afémie Juzíñamui uai lloraco illaíma. Afémie Jesús anamo fueco díne ana bíjicaide. Bíjicaillamo izire daide,

42 “Cue jofomo biri; mei daide cue jiza tíizaideza,” daide. Afengo ja doce fimona ite. Iemona Jesús afémiedo jaide. Jailla llezica diga comíni íedo jaide; iere ríllire jáidiaioi.

43 Afémaci cígímo iráredíngo ite. Afengo doce fimona die dícotaillari irárede. Nana aféngomo ite úcube manófiredínomo fuite; mei íadí afémaci aféngona jíllotanidiaioi.

44 Afe ríngo jinófene dímena Jesumo billano ie inícuiro fueda jetánote. Ie jetánua llezica afengo die llícaide.

45 Iemona Jesús jicánote:

—¿Mei bu cue inícuiro jetánoga? —daide.

Iemo nana comini jáanuano “Ona bu jetáñena,” daidíaiói. Jira Pedro naa ie nabáiñiairi daide:

—Llófueraíma, nana comini rillírenari o ñuitádiaíói. ¿Ñibái mei, “Bu cue jeta,” daidío?

⁴⁶ Mei íadi Jesús daide:

—Ja onódicueza daa come cuena jetade. Mei cue ríino afe come jíllotajana onódicue, —daide.

⁴⁷ Afe jétaibitingo ja ie báillana onóillano cuidíricana Jesús anamo dújuzaibite. Iemona afengo jino nana comini eróicana jáanoñeno ie inícuero jetáacana rafue llote. Iemo jíái afémie inícuero jeta llezica ie jíllona llote.

⁴⁸ Mei jira Jesús aféngona daide:

—Cue jiza, cuemo o ínuamona ja jíllodioza. Jaillano caimare uái o iri, —daide.

⁴⁹ Jesús nai úroidemo, daa come Jairo jofómona Jesús diné bite. Afe Jairo Juzíñamui uai lloraco illaíma. Afe llúaíbitimie Jáirona daide:

—O jiza ja tíideza. Mai Llófueraímana úroidoñeno iri, —daide.

⁵⁰ Mei Jesús áfena cacáillano daide:

—O jacíruiñeno iri. Dama Juzíñamui o ínofireiri. Afemona o jiza jílloteza, —daide.

⁵¹ Afe jofomo íaiói dúcina llezica, nana comini afe jofo eromo afémie oréñede. Afe jiza moo, ei diga, íemo jíái: Pedro, Santiago, Juan diga jofo uite.

⁵² Nana comini afengo tíllari fícirerie éenaitiaíói. Mei íadi Jesús íaioina daide:

—Omoí éeñeno. Afengo tíñedeza, fia inide, —daide.

⁵³ Daí afémie dáinari zadáidiaíói, mei afengo tíllana onódiaíoiiza.

⁵⁴ Iemona Jesús afengo onoi líllinota fícire daide:

—Jitaíngo, mai náidacai, —daide.

⁵⁵ Afemona afengo meine abido caade. Iemo afe daina llezica caífo náidacaide. Afe mei Jesús, “Mai afengo ecari” daide.

⁵⁶ Afe llezica ie moo íaillinoi iere caimare fáigacaidiaillinoi. Mei íadi Jesús íaillinoina afe ie finócafue bumo llotáñede.

9

*Jesús doce dígade ie llófuegamacina oni orede
(Mt 10.5-15; Mr 6.7-13)*

¹ Jesús doce dígade ie llófuegamacina dáanomo gairítate. Gairítanona afémiemo ite ríino íaioimo fecade, nana jíáiforiede fiénide joríaí jino oréllena. Daje izói nana iráredino jíllotallena ríino afémacimo fecade.

² Iemo Juzíñamui illáimana illarui rafue íaioina oni llúajitade. Daje izói iráredinona jállotate.

³ Íaioina daide:

—Omoi jaille llezica minícana uiñeno, fia omoi jairi. Macara jigüida uiñeno iri, daje izói ciríticoi, íemo güllena, íemo úcube uiñeno iri. Mena caifóferoi uiñeno, daa uiri.

⁴ Ninó daa jofomo omoi dúcia, afécomo uái iri, afénomona oni omoi jáiñeille dino.

⁵ Niie jofue comini ómoina llínoacañenia afénomona oni omoi jairi. Omoi jaille llezica, omoi eiba íaie afémacimo teténocairi. Afedo íaioi comécimo ite íaifue nai íaioimo íllana onótaiomoi.

⁶ Afemona ja oni nana dúgobiaido jáidiaioi. Jaillano ñuera jállona uai llocana uitíaioi. Daje izói iráredinona jállotacana uitíaioi.

Juan Bautista tilla rafue
(Mt 14.1-12; Mr 6.14-29)

⁷ Ocuídillaíma Herodes nana Jesús finócafuiái fídide. Iemona Herodes comeci uibílluai iñede, mei dáarie “Juan tíde meine abido cáadimiena jaide,” daidíaioi.

⁸ Jiáimaci, “Juzíñamui uai llóraíma Elías meine cíocaizaibilla,” daidíaioi. Iemo jiáimaci, “Jaiái ninomo tíde jáie Juzíñamui uai llóraíma meine abido cáadimiena jailla,” —daíí llotíaioi.

⁹ Mei jira Herodes daide:

—Nauí cue Juan ifoci jaitátaticue. Iemona ¿mei bie nímie? Afémiedo diga ráfuiái cacáfiredicue, —daide.

Afe llezica Herodes iere Jesuna cíocade.

Jesús cinco mil comini ecade
(Mt 14.13-21; Mr 6.30-44; Jn 6.1-14)

¹⁰ Ie orécano abido dúcina mei, nana íaioi finócafuiái Jesumo llotíaioi. Afe mei Jesús afémacina oni eneno Betsaida jofue áinomo uite.

¹¹ Mei íadi áfena fidíillano comini afénomo jáidiaioi. Afénomo Jesús caimare afémaci llínote. Juzíñamui illáimana illírui rafue íaioimo llote. Daje izói afénomo iráredinona jállotate.

¹² Iemo ja nauízaiilla llezica, doce dígamie orécano Jesumo billano daidíaioi:

—Mai, comini íaioi ocózinaillena oni ore, áinori ite jófuiáido güille íaioi jenólleza. Mei benomo cai íllánomo güille iñédeza, —daidíaioi.

¹³ Mei jáífodo Jesús íaioina daide:

—Afémaci omoi eca, —daide.

Jira ie uai otíaioi:

—Benomo caimo cinco pániai íemo mena chamu ite. Afe baimo inédeza. ¿Meita nana bie comini ecállena íbajiredicai? —daidíai*oi*.

14 Mei afénomo cinco mil comini gairídia*oi*za. Mei íadi Jesús llófuegamacina daide:

—Nana bie comini cincuenta dígamierie ana raiziri, —daide.

15 Daií finua méifodo nana ana raizídaitia*oi*.

16 Afe llezica Jesús cinco dígade pániai, íemo mena chamu llínote. Llínuano monamo eróillanona Juzíñamuina afe gülleri “Íere figura,” daide. Daií daina méifodo, afe ditada, ie llófuegamacimo fecade, afémaci comínimo fecállena.

17 Iemona nana áferi ñue jeíredia*oi*. Afe mei llófuegamaci güígamona fiebidino doce cirigai oruítatia*oi*.

Pedro Jesús Crístona uáfodo jino llote

(Mt 16.13-19; Mr 8.27-29)

18 Afe mei jíairuido Jesús oni eneno Juzíñamuimo úrizaide. Afénomo ie llófuegamaciri ite. Afémacimo afémie jicánote:

—¿Comini nñe izói cuena daidíai*oi*?

19 Jira uai otía*oi*:

—Dámierie “Bie Juan Bautista,” daidíai*oi*, jíáimaci “Bie Elías” daidíai*oi*, íemo nai jíáimaci “Jai*ai* Juzíñamui uai lloraima meine abido cáailla” daidíai*oi*.

20 Jira Jesús jicánote:

¿Omoi nñe izói cuena daidíomoi?

Jira Pedro daide:

—Juzíñamui nizeca Cristo dainámiedio, —daide.

Jesús ie tíille rafue jino llote

(Mt 16.20-28; Mr 8.30-9.1)

21 Iemo afe Pedro llógana afémie jíáie comínimo iere rairuállano ie llófuegamacina áfena bumo llotátañede.

22 Iai*oi*na daide:

—Nanoide íma Jitó Crístodícueza, iere duere finóllícue. Ocuide éinamací cuena ruifíruitia*oi*. Daje izói lletáriraini illaini cuena ruifíruitia*oi*, íemo jíái ocuica uai llófuefiredino cuena íáiruitia*oi*. Cuena títaítia*oi*, mei íadi daaruíámani íllemona meine abido cáaitícue, —daide.

23 Afe méifodo nana afémacina daide:

—Ninó dáamie cuedo jáiacania dama ie comeci jítaíllana féitarede. Féitano cuedo jáirede. Afémie cuedo jailla ícoinia tíidena afémie áfena izire ónide.

24 Mei ie caana rairuíacadimie áfena táinomo fáífitaita. Mei jíáifodo cue ícoinia ie caana táinomo fáífitimie afe fáífidena baimo ziiño illínona máíñoite.

25 Mei daa come nana bínie ráaniai aillo náamataadi, mei íadi afe llezica dama ie comeci afémie táinocaitaiadi, nana ie maiñoca ráaniai afémiena jállotañeite.

26 Ninó daa come cuena meáiruia, daje izói cue uaina meáiruia, afe ibana uire illáimana ana cue billíruimo afémiena meáruiticue. Nanoide ima Jitódicueza, aféruimo Moo Juzíñamui ebírededo bíiticue naa nñfuenide Juzíñamui abi imáçiri.

27 Uáfuená ómoína dáititcúe: Birui benó itínomona, dáarie nai íaiói tíñena llezica Juzíñamui illáimana illarui cíoitiaíoi, —daide.

Jesús abi jiáifodo méidoficailla
(Mt 17.1-8; Mr 9.2-8)

28 Daí daina mei ocho dígarui jailla mei, Jesús Juzíñamuimo úrilla caifónedumo jaide. Afémie Pedro, Santiago, Juan dígamie uite.

29 Nai Juzíñamuimo Jesús úrioina llezica, afémie uíeco jiáifodo méidoficaide. Daje llezica ie ínícuro jamánomo úzere quenire jaide.

30 Afe llezica mena come ie abimo çioçaide. Afe íaillinoi afémie diga úrite. Afe bíaillinoi Moisés Elías diga.

31 Daje llezica ñue ebire quenire cíoide raa afe íaillinoína onífenedo féricaide. Afe íaillinoi Jesús Jerusalemo duere ze- fuíllano tíllifuedo úritiaíoi.

32 Afe llezica Pedro naa ie nabáiñiaíri iere ínie méinegaiaíoi ia, ocuíaíoi. Afémaci Jesumo ite ebire cíoidena cíodiaíoi; daje izói afémie diga itíaillinoína cíodiaíoi.

33 Afe íaillinoi Jesúmona oni jáioicailla llezica, Pedro daide:

—Llófueraíma, jñi benomo caímare cai illa! Mai daámani jofóchupina cai nñi. Daaco óie, jiáico Moisés ie, íemo jiáico Elías ie, —daide.

Mei íadi Pedro ie daíacana ónoñede. Jira comeci facáñeno ebena daí daide.

34 Nai ie úrioina llezica, mona ero uíllie íaioína ferínocaide. Mona ero uíllie eromo íaíoi íficailla llezica iere jacínaitiaíoi.

35 Afe llezica afe uílliemona daa uaina cacádiaíoi:

—Bie iere cue izíruiga Jitoza, afémiemo omói cacáreiri, —daide.

36 Daí daina méifodo Jesumo érocaldiaíoi mo, ja dama ite. Afe mei afémaci afe íaíoi ciónana bumo lloñédiaíoi.

Jesús fiénide jóriaí uícaiga jitócome jállotate
(Mt 17.14-21; Mr 9.14-29)

37 Afe jiáíruido afe ídumona ana íaíoi billa llezica, aillo comini io anamo Jesús úíñotiaíoi.

38 Iemona comínimona dáamie ficire lléjecaide:

—Llófueraíma, dúecaillano daade cue jitomo érocai.

39 Fiénide jóriai riire íena uícade. Afe jóriai íena caillítacaide, afémiena nano íanori titáfírede. Afe llezica ie fuémona múllecíai bífírede. Iena duere finode; afémiena fáicanocaiñede.

40 O llófuegamacimo afe jóriai jino oréllena izire jicádícue, mei íadi orénidiaíoi, —daide.

41 Jira Jesús uai ote:

—¡Nii jamánomo íinofinidiomoi! Iemo daje izói ñúefuena iere uáitafírediomoi. ¿Níie dinó omoi cígimo íredícue omoi cue ríidollena? O jitó benomo ati, —daide.

42 Mei íadi afe jitócome Jesumo ánozilla llezica, fiénide jóriai afémie ana éniemo dotade. Afe llezica afe jitócome íanori titade. Mei íadi Jesús afe fiénide jóriaina riire dainano oni orede. Afemona Jesús afe jitócome jíllotata. Iemona jíllotano ie moomo abído ite.

43 Iemona nana comini Juziñamuimo ite áillue ríinori caimare fáigacaidiaíoi.

Jesús ie tíille rafue meine nane llote

(Mt 17.22-23; Mr 9.30-32)

Nana comini Jesús finócari caimare fáigacaila llezica, afémie ie llófuegamacina daide:

44 Bíemo ñue omoi cácarei. Afena omoi féitañeno iri. Nanoide íima Jitódícueza, duere cue íaíoi finóllena comínimo fécajillicue, —daide.

45 Mei íadi ie llófuegamaci afe ie dainana ñue onóñediaíoi. Mei afefue afémacimona rairuica. Iemo afe llezica afefue afémiemo jicánuana jacíruiitiaíoi.

¿Mei níie come jamánomoina?

(Mt 18.1-5; Mr 9.33-37)

46 Afe méifomo ie llofúegamaci dani jofo eróicana conímana “cáimona níimie iere jamánomoina” daina júfidotiaíoi.

47 Mei íadi Jesús íaíoi comeci úrillana onode. Iemona daa úrue uáídota ie abímo naidánete.

48 Daií naidániano afémacina daide:

—Bie úrue cue mámecido llíinotímie cuena llíinote. Iemo cuena llíinotímie, ana cue orédimiena llíinote. Mei uafue, omoi cígiri jabóidímie Juziñamui eróicana iere jamánomoidímie, —daide Jesús.

Caina uáitañedímie cai dibénemo ite

(Mr 9.38-40)

49 Ie jira Juan Jesuna daide:

—Llófueraíma nauí o mámeçido fiénide jóríai orédimiena ciódicai. Afémie cai diga macáñena jira afémiena rairuídicai, —daide.

⁵⁰ Mei jira Jesús íena daide:

—Afe izói finódime rairuñeno iri. Mei caina uáitañedime cai dibénemo íteza, —daide.

Jesús Sanatiago Juan diga lletade

⁵¹ Jesús monamo jáiacanarui áinozilla llezica, afémie Jerusalemo jáillena riire mamérite.

⁵² Daií mamérellano uícodo raire uai llóitino orede. Afémaci Samaria éniemo ite duera jófuemo jáidiaioi íaiioi dúcillico raire báillena.

⁵³ Mei íadi afeno itímaci Jesús naa uícodo orécanori Jerusalén diné íaiioi jáiacana jira, íaiioina llínoacañediaioi.

⁵⁴ Ie llofúegamacimona Santiago, Juan diga áfena cióillano Jesuna daide:

—Ocuíraíma, jaiai uai llóraíma Elías finua izói, bimaci fúilleza monámona iraina cai jíriredicai ¿meita jitáidío? —daide.

⁵⁵ Iemona Jesús íaillinoimo éroillano llétajano daide:

—Omicoi jainaina joréñona onóñediomicoi.

⁵⁶ Mei uafue, Nanoide íma Jitódicueza comini niné táinocaitallena biñédicue, mei jáífodo comínina jílloitaibiticue, —daide.

Iemona oni jáígobiaímo jáidiaioi.

Jesudo jáiacadino bie izói írediaioi

(Mt 8.19-22)

⁵⁷ Iodo íaiioi jailla llezica dáamie Jesuna daide:

—Ocuíraíma, o jáiacana diné o diga jáiacadicue, —daide.

⁵⁸ Jira Jesús afémiena daide:

—Nana jazici rílleníai uái ífireillino ite. Daje izói caifodo féedinuíaí uái íaiioi ráillino ite. Mei íadi Nanoide íma Jitódicueza dáanori uái cue illino íñede, —daide.

⁵⁹ Jesús jáímiena daide:

—Mai cuedo bi, —daide.

Mei íadi afémie daide:

—Fueñe cue moo tílla ráiaiticueza cue ore, —daide.

⁶⁰ Jira Jesús ie uai ote:

—Juzíñamuina jieruñedino tíide izóidino; mai mei afémaci jádie ua títimiena ráilleza, mei o cuedo bi, billano Juzíñamui illáimana illirui llujjiri, —daide.

⁶¹ Afe mei jáímie Jesuna daide:

—Ocuíraíma, odo bíacadicue, mei íadi fueñe cue jofo ero comini jáillena facáduaiticueza cue ore, —daide.

⁶² Jira Jesús íena daide:

—Daa come ie táijina ja táinia mei, jiáinomo comeci fácaja fiénide. Ie jira bie izóidimie Juziñamui illáimana illíruimo táijillena ráifiñede, —daide.

10

Jesús setenta dígamie ñúefue llujjillena orede

¹ Bie méifodo, Ocuíraima Jesús nane setenta dígamie nizede. Níziano ménamierie ie uícodo orede. Nana ie jáiacanagobaiimo íaioina orede.

² Íaioina daide:

—Uáfueza, jacáfaimo ite raa ailla llezica jofu óitino iñena izói, birui Juziñamui illáimana illíruimo jofu órede comini aillo ite. Mei íadi afémaci jofu óitino figo iñede. (Afe jofu óitino jiáimacimo ñúefue llóitino.) Ie jira cai Ocuíraimamo, jacafai Naama izóidimie jiaie ñúefue llóitimacina omoi jicari, afémacina afémie oréllena.

³ Jira omoi jai. Jaillano bie uaimo omoi comeciiri: illáirede jazici jicóniai cígimo ovejai jiza ória izói, ómoina orédicue.

⁴ Omoi jailla llezica cirítico uiñeno iri, daje izói úcubena uiñeno iri. O eiba icona uiñeno iri. Io anamo jiáimaci diga are naidáicana úhuriñeno iri.

⁵ Ninó daa jofomo jofu o jáiadi afeco comínina fueñe bie izói omoi daiiri: “Caimare uái illifue bie jofomo íteza.”

⁶ Afécomo comécina caimare uái itino ia, afe uai afémaci íaioieite. Mei íadi afe izoide comini afénomo iñenia, omoi daií uáidua uai abído ómoimo bíiteza.

⁷ Oni omoi jáiñeille dinó dáacomo uái iri. Omoi íaioi ecálleze güitiomoiza. Omoi jirótalleze jirori. Mei jiáimacina omoi cánua jira, nana áfemo táijiraíma ie táijinado íbáredeza. Ie jira naga jófuedo güicaiñeno iri.

⁸ Ninó jófuemo omoi dúcia caimare omoi íaioi llínoia, güillena omoi íaioi ecaa afe omoi güiri.

⁹ Daje izói afénomo iráredinuiaina omoi jíllotari. Afe llezica afémacina daiiri, “Juziñamui illáimana illarui ómoimo ja ánozideza,” daiiri.

¹⁰ Mei íadi jiaie jófuemo omoi dúcia afeno comini ómoina llínoiacañeniadi, jino jofue cígimo ite macáraodo jairi. Jaillano daiiri:

¹¹ “Cai eíbamo aífide omoi jofue íaie ómoimo teténoiticaí. Daií finódicaí, fieni caimo omoi fínuana uáitallena. Mei íadi bíena omoi onoiri: Juziñamui illáimana illarui ja ómoimo ánozideza.”

¹² Ómoina dáitícue, íraicaiño izire jicánollíruimo bie jofue comini Sodoma comini duere finóbina baímo duere finólliaioi.

Náfue finide jófui ai comini
(Mt 11.20-24)

13 ¡Corazín jofue comini, nii dúerena! ¡Daje izói Betsaida jofue comini nii dúerena! Mei íaioi cígiri cue finoca ciórainina raa, áfena Tiro jofue comini naa Sidón jofue comini cígimo nauí finódicuena nibai jaiai uícodo íaioi comeci ífuena méidotiaioi. Uafue íaioi comeci ífuena méiduamona ja diga fimona jailla. Afe llezica zúunaia jítáfirega jítiroi jítáacadiaioi. Daje izói aféruimo íaioi zúunailla jino ácatallena jízefo ifomo jutáacadiaioi.

14 Mei íadi íiraicaiño izire jicánolliruimo Tiro Sidón diga duere finóbina baímo Corazín íemo Betsaida comini duere finólliaioi.

15 Daje izói Jesús Capernaum jofue comini lletade; íaioi dibénedo daide: ¿Meita íaioi íinoga jofue monamo úrede? ¿Daí comeci facádiaioi, ero ua? Mei jíáfodo íaioina dáitícue, tíidino illánomo ana dotaca izói niné táinocaitalliaioi.

16 Iemo ie setenta nizécamacina daide:

—Omoína cacáreidimie cuemo cacáreide. Iemo jíái ómoína ruifruitimie cuena ruifruite. Daje izói cuena ruifruitimie cue ana orédimiena ruifruite, —daide.

Oreca setenta dígadino abido dáanomo dúcina

17 Nauí oreca setenta dígadino meine abido caimare dúcidiaioi. Jesuna daidíaioi:

—Ocuíraíma, nana cai llógamo cacáreidiaioi, ua daje izói fiénide jóriai o mámecido daina uaimo cacáreidiaioi, —daidíaioi.

18 Jira Jesús daide:

—Jii, Satanás monamona ameo izói baíllana ciódicue.

19 Daje izói jaióniaí naa acáiduaí ómoína izi cácatañelle ríino nauí ómoímo cue iga. Daí nana cai bacáuai izóidimie Taife ríinona izi cácañeno anáfenodiomoi.

20 Mei íadi fiénide jóriai jino ória ríino ómoímo íllado figo comécíñeno iri. Mei jíáfodo omoi mámeciaí monamo cúeinari omoi íóbiri, —daide.

Dama Jesús cáimacailla
(Mt 11.25-27; 13.16-17)

21 Afe llezica, Ñuera Joreño Jesuna íóbitade. Íóbicaillano Jesús daide:

—Cue Moo, mona énie diga Ocuíraímadío, omo ñúefue mámeitícue, mei ráfuena baitádinomona o dibénedo retáidoga onóigafuiaí onótañedio. Mei jíáfodo comécina níifuenide úrue izoide jamai comínimo aféfuiaína jino cíotatio. Jii, Moo, mei o daí jítaidíozá, —daide.

22 Jesús nai úrioide: “Cue Moo, nana ráaniaí cuemo fecádío. Moo Juzíñamui, o Jitódicue, mei íadi buna uáfodo cuena ñue

óñoñena. O cue Móodioza, dama o ñue cuena onona. Daje izói buna uáfodo ona ñue óñoñena. Cue, o Jitódicueza, dama cue ñue ona onona. Iemo jiái daje izói o Jitó onótaacagano ñue ona ónoitiaioi, —daide.

²³ Iemona ie llófuegamacimo érocaillano, dani íaioina daide:

—Omoí ciona raana ciónamona jñi íóbirediomoí!

²⁴ Mei ómoína daidicue, diga Juzíñamui uai llóraini naa illáimairi omoí ciona raana cióacadiaioi mei íadi jaca cióñediaioi. Daje izói omoí cacana uai cacáacadiaioi, mei íadi jaca cacáñediaioi, —daide.

Samaria ímie rafue

²⁵ Afe mei ocuica uai llófuefiredimie Jesumo úrizaide, afémie facátallena. Afémiemo jicánote:

—Llófueraíma; zíñoña cue íllena ¿ñie izói íredicue? —daide.

²⁶ Jira Jesús uai ote:

—Ocuica uaimo ¿mei ñie uai cúeina? Afena ¿ñie izói facádotio? —daide.

²⁷ Jira ocuica uai llófuefiredimie uai ote:

—Afe uai bie izói daide: Nana o comécido o Ocuide Juzíñamuina izírui. Daje izói nana o joreñodo, íemo nana o máriedo, íemo nana o ífoci úrillado íena izírui. Afe llezica dama o abina o izíruilla izói afe izói o aino cómena izírui, —daide.

²⁸ Mei jira Jesús daide:

—Ñue fairíotio. Bie izói o finóadi nia are cáaitio, —daide.

²⁹ Mei íadi Ocuica Uai llófuefiredimie ie facátalle uai baiñenamona, ñue jicánotimie daiíllena jiáie uai Jesumo jicánote:

—¿Ñie come cue abi ímiena jóoneitícue? —daide.

³⁰ Jira Jesús uai ote:

—Dáamie Jerusalémoma oni Jericoma jaide. Ie jailla llezica merírifiredino afémie fatíaioi. Fájano ie ráaniai bairódiaioi naa incuiruaimo. Afémiena iere ízitatiaioi; jabo ie títano íena fiénocaidiaioi.

³¹ Afe méifodo lletáriraima ónonino daje llezica afe iodo jaide. Mei íadi fagámiena cióillano onido jaide.

³² Afe mei Leví nairai ímie afénomo dúcide. Daje izói afémiemo fia érocaillano onido jaide.

³³ Afe méifodo Samaria ímie daje iodo jaide. Fagámiena cióillano afémiemo zúucaillano iere dúecaide.

³⁴ Mei íemona fagámie billano, cáirediji naa vino diga ie boáfiai manode. Afe mei afe boáfiai maite. Maia méifomo dama ie búrromo caífo rainada dúciracoma uite. Uillano afécomo afémiena uíñote.

³⁵ Afe jiáiruido, afe Samaria ímie ja jáizailla llezica, mena úcube uano afeco naama íbade. Íbajano daide: “Bie íraredimie

ñue o uññori. Bímiemo omo cue iga úcube baimo o dotáadi, uire meine cue bia omoi cue íbálleza,” daide.

³⁶ Mei íemona birui cuemo llone: Bie daámanidemonna çñímie ñue finoca bie merírfiredino fagámie aino come finófírena izóí? —daide Jesús.

³⁷ Jira ocuica uai llófuefiredímie daide:

—Mei afémiemo dúceaidímie fagámie aino cómena, —daide.

Iemona Jesús íena daide:

—Jaillano bímie fínua izóí o finori, —daide.

Jesús Marta María íainguai jofomo dúcide

³⁸ Jesús iodo jaillano duera jófueмо dúcide. Afénoño ite Marta daínango ie jofomo Jesuna caimare llínote.

³⁹ Marta ebuño María Jesús anamo ráiizaibite ie daínana ñue cáaillena.

⁴⁰ Mei íadi Marta diga jetáacaganiamo comeci llícibite. Iemona Jesumo billano daide:

—Ocuíraima, cue ebuño nana táijina cuemo fiénocaide, çaferi coméçñedio? Cue dine ore, afengo cue cánuaiBILLAZA, —daide.

⁴¹ Mei jíáfodo Jesús afengo uai ote:

—Marta, iere o jetáacaga raamo o comeci llícitaitio. Afe tájinamo iere duere zefuídio.

⁴² Mei íadi daa jítaírede raana nai omo íñede. Ie mei María afe baimo ñuera raa jae nizede. Afengo nizeda oga raa bu báiroñeite, —daide.

11

Juzíñamuimo cai úrífíreillena Jesús llote

(Mt 6.9-15; 7.7-11)

¹ Afe mei jíáiruido Jesús bai táinomo Juzíñamuimo úrite. Juzíñamuimo ie úrilla llícaillamona ie llófuegamacimona dáamie daide:

—Nauí Juan ie llófuegamacimo ie llua izóí, Juzíñamuimo cai úrillena cai llofue, —daide.

² Jira Jesús íaioina daide:

—Juzíñamuimo omoi úria bie izóí daíri:

Cai Moo Juzíñamui, monamo itio; o mámeçido ñúefue nitácaza. O illáimana illirui raíre bíiteza.

Dinomo monamo o comeci jítaíllafue íaioi fínua izóí, afe izóí bie éniemo finótaibiteza.

³ Cai nágarui jítaílla güíllenai, birui caimo fecari.

⁴ Cai finoca fiénidífue íba caimo oñeno iri, mei afe izóí jíáimaci fieni caimo finódiaioi íadi, afémacimo íbana oñédicai.

Íaífuemo cai báíñellena caína úññori.

Iemo afe llezica nana fiénidífuaímona caína jíllotari.

⁵ Iemo nane Jesús daide:

—Bie fia cue daïlle ráfuemo omoï coméçiri. Omoïmona dáamie ie onóigamie ite. Afe o onóigamie dáaferui o jofomo jaillano ona daïde: “Daámani páaniai fia cuemo feca,

⁶ mei cue onóigamie ailli cue jofomo dúcidez. Mei íadi afémie cue ecállena ñede,” daïde.

⁷ Ie jira nibai jofona bie izói uai óredio. “Cue úrue diga inídicueza, cuena áfedoñeno iri. Naze ibáicaza, o jicaca raa omo fecállena jino bínidicue.”

⁸ Mei íadi ómoïna dáitícue, afe jicaïbitimie o nabaina jira fécaïñeitio, mei íadi afémie are ona áfedoñeïllena nana ie jitaica ráaniaïna jeruñeno fécaïtio.

⁹ Afe jira ómoïna dáitícue: Juzíñamuïmo jicari, afémie fécaiteza. Jenori, báitioza. Nazémona jíriri, íemona afémie tuizáibiteza.

¹⁰ Mei uáfueza, jicádimie jaca llínote; jenódimie jaca baite; nazémona uáidotimiemo naze tuiñoca.

¹¹ Omoïmona úrueredimie ie jitó güïllena jicáadi ¿meita nofícina iga? Jaca íniga. Daje izói chamu jicáadi, ¿meita jaiona iga? Iniga.

¹² Iemo jiái jigi jicáadi ¿meita acáidona iga? Iniga.

¹³ Mei fiénidïomoï íadi, ñuera ráaniaïna omoï úruiaïmo fécajana onódiomoï. Mei íadi afe baimo monamo ite omoï Moo afémie Ñuera Joréñona jícainomo fécaite, —daïde.

Fiénide jóriai ríino Jesumo illa afémiemo jitádiaïoï

(Mt 12.22-30; Mr 3.20-27)

¹⁴ Afe mei Jesús uáinidimiemo ite fiénide jóriai jino orede. Afe jáillamona afe uáinidimie ja ñue úrite. Aferi comini caimare fáigacaidiaïoï.

¹⁵ Mei íadi dáarie daidíaïoï:

—Bímie Beelzebú daïna fiénide jóriai illaïma ríinodo, afe fiénide joriaïna jino orede, —daidíaïoï.

¹⁶ Jiáimaci ie facátallena, “Monámona uai dáinamona comuide cíorainina raa fino,” daidíaïoï.

¹⁷ Mei íadi Jesús afémaci comeci úrillana onóïllano daïde:

—Ninó daje náiraina ite comini bozíetaïllano conima diga fuiriadi, afe nairai niné táinocaite. Daje izói daaco ero comini bozíetaïa, afémaci daje izói are ñeno niné táinocaitiaïoï.

¹⁸ Afe izói, mei Satanás dama íemo jaináidinona, daní abina uáitaiadi, ¿mei ñie izói ie ócuifirena ríino are ite? Bie ómoïmo llóitícue, mei cuena “Fiénide joriaïna Beelzebú ríinodo jino óredio,” daidïomoïza.

¹⁹ Mei íadi daiítadena, jiáïuaina ómoïmo jicánoticue, Omoïdo jáidinomo ite fiénide jóriai orelle ríino, ¿bu mei fecaca? Ie jira daní afémaci ñue onóñeno taino omoï llua jino cíotatiaïoï.

20 Mei jiáifodo uáfueza, Juzíñamui ríinodo fiénide jóriaina jino orefiredicue. Iemo bifue bie izói ómoína dáiacade: Juzíñamui illáimana illirui ja ómoimo dúcide.

21 Mei daa mairide cómemo ie ñue fuirira raa ia, ie jofona ñue úiñofirede. Afedo ie uíñuamona buna ie raana bairónide.

22 Mei afémie baimo ríiredimie bíadi, nibai éna anáfenoite. Anáfenuano ie ínoga abi ríidua raana báiroite. Afe mei afe báiruaibitimie nana íemo ite ráaniaina úite.

23 Cuená ruifruitimie cuena uáitate. Daje izói cue diga dájena táijiñedimie, cue ráaie oni jutádimie izoide, mei afémie jiáimaci cuemo ínnotañedeza, —daide Jesús.

*Jino oreca fiénide joríaí meine dáamiemo bite
(Mt 12.43-45)*

24 Jesús nai llíicaiñeno úrite:

—Fiénide joríaí cómemona jino jáiadi, táiziciaido ie uái illino jenócana uite. Ie uái illino baiñenamona bie izói comeci facade. “Meine abido cue billa cómemo jáitícue,” daide.

25 Afe joríaí meine afe cómemo bítemo, ñue rafoda finócaco izói baizáibite.

26 Iemona afémie baimo siete diga jamánomo fiénide joríaí uájide. Afémaci nana afe cómemo jofo jaillano itíaiói. Afemona afe come nauí ie fiénina baimo birui jamánomo fiénide, —daide.

Uáfuenta íobidino

27 Mei Jesús nai bífuiaido úrioina llezica, comínimona daa ringo ficire Jesudo úrite:

—O jocódingo nii caimare érocaillangona. Daje izói o comúitatingo nii caimare íobillangona, —daide.

28 Mei jira Jesús jiáifodo daide:

—Juzíñamui llógamo cacáfiredino, daje izói áfena ñue ínnotino o daínango baimo jamánomo caimare itíaiói, —daide.

*Fiénide comini ciórainina raa finóllena Jesumo jicádaiói
(Mt 12.38-42; Mr 8.12)*

29 Comini Jesús onífenedo ofídaiói. Jesús íaióina daide:

—Biruiamo ite comini iere fiénidino. Afémaci ciórainina raana finóllena jicáfirediaíói, mei íadi nauí Juzíñamui uai llóraíma Jonás onótágafue baimo jiáífuenta llóñeillaíói.

30 Mei Nínive jófuego ite comínimo Jonás Juzíñamui orecamiena áíói onóillena afémie jóonega raa izóidimie. Afémie illa izói, biruíllaido ite comínimo Nanoide íima Jitó Cristo afe bie comini onóillena jóonellimiena íite.

31 Iirairuimo bigímaíai izire jicánolle llezica sur dibénemo jica ite nairai illaingo bigímaíaimo fiénidifuiái nítaite. Mei afengo jica énie fuédamona Salomón comeci onóígaíuemo

caçáreizaibiteza. Mei íadi birui benomo Salomón baimo baitádimie illa.

³² Daje izói bigímaiaimo íirairuimo izire jicánolle llezica, Nínivemo ite comini bimácimo fiénidifuiái nítaite. Mei Nínivemo ite comini Jonás Juzíñamui uai íaioimo llua llezica, íaioi comeci itífueña méidotiaioi. Mei íadi birui benomo Jonás baimo jamánomoidimie ite.

Cai illafue ñue egáñote raa
(Mt 5.15; 6.22-23)

³³ Uneca mechera bu báinino jóoneñede. Daje izói cajón anamo buna mechera retáidoñena. Mei jíáfodo uneda caífo jica rainaca, jofo eromo jáitino ñue cíoilena.

³⁴ Ñúefuemo o comécilla omo ñue egáñote raa izoide. Jira mechera egáioinamona o uído ciónana o íóbitaja izói, afe izói ñúefuiái o jítaigana o comeci ífueña caimare itátaite. Iemona ñúefuemo o comécillado nana o illafue jáicina ñue joide. Mei íadi ñúefuemo o comeciñeniadi, jítifodo mácaja izói itio; nana o comeci ífue zuure íteza.

³⁵ Mei jira omo ite mechera egáioina izoide raa, dúide izói meídoñellena ñue rairuri.

³⁶ Mei nágarui ñúefuiaimo féitañeno o comécia, mechera egáñuamo uáfori cíoina izói, nana o illáfueña ñue uáfodo cíoitio, —dinori Jesús úrite.

Fariséuai daje izói ocuica uai llófuetinori imaci fiénidifue Jesús jino llote

(Mt 23.1-36; Mr 12.38-40; Lc 20.45-47)

³⁷ Jesús ie úrilla llícaillamona daa fariseo ímie ie diga güizájillena Jesumo llote. Jesús jofo jaillano güiránomo ráinazaide.

³⁸ Afémie afémaci fínofirena izói finóñede, mei afémie íaifue múiñua joreño onoi jócua, finóñeno güíteza. Aferi afe Jesús uitímie fáigacaide.

³⁹ Mei íadi Ocuíraima Jesús íena daide:

—Omoi fariséuai jiróraco naa plato diga jócua izói jinófene ñue jocódiomoi, mei íadi jofo erófenena jocóñediomoi. Afe izói nana omoi jinófenena ñue rairuídíomoi, mei íadi jofo comeci dinena, merírillado omoi oga raa ite; daje izói fienni omoi íllado omoi oga raa ite.

⁴⁰ ¡Comécina úriñedinodiomoi! ¿Onóñediomoi za comini jinófene finódimie, íemo íaioi ero diné comeci finódimie dáamie?

⁴¹ Ñúefuiái comécido omoi onónamona ómoimo ite raana jeruñeno dúeredinomo fia fecari. Afemona nana ráaniai ja ómoimo íáinino íitiaioi.

42 Fariséuai, ¡nñi omoi dúerena! Omoi riga ráamona diez dígademona daa Juzíñamuimo dúide raana afémiemo ñue fecáfirediomoí. Omoimo ite “menta” daina rarócimona afémiemo fecáfirediomoí. Daje izói “ruda” daina rarócimona daa fecáfirediomoí. Iemo jiái omoi porótcoduaimona due Juzíñamui íena máme-firediomoí. Mei íadi comécina jaícina jóidifue mo naa Juzíñamuina izíruillana náfueñediomoí. Aquíe izói írediomoí. Afe llezica omoi jiáie finóacaigafuena féitañeno finori.

43 Fariséuai, ¡nñi omoi dúerena! Juzíñamui uai lloraco eromo jamánomo ñue ráiraniaina jicáfirediomoí. Daje izói jofue cígido macáraodo omoi jáia, comini jacírede illaima uáidua izói omoi íaioi uáidollena iere gáidiomoí.

44 Ocuica uai llófue-firedino naa fariséuairi, ¡nñi omoi dúerena! Jínofene dine ñue cíoina mei jofona comeci dine ráataitiomoí. Ciónena énie anamo tíidino ráigano izóidiomoí. Comini afe acónido ónonino macádiaioi.

45 Iemona ocuica uai llófue-firedinomona dáamie afe uai ote:
—Llófueraima, jadíe izói o daina nane caina ríicaitade, — daide.

46 Jira Jesús daide:

—Ocuica uai llófuetino, daje izói ¡nñi jamánomo omoi dúerena! Mei ocuínide méerede raa izoide jiáimamo jaca llonódacáfirediomoíza. Aféfuiaina buna ocuínide. Afe omoi riire ocuícana canófinidiomoí.

47 ¡Nñi omoi dúerena! Mei jaiái omoi nánoragima faga Juzíñamui uai llóraini raírafo izoide tíidimie jóoniacona ébirerie finódiomoíza.

48 Daí omoi finuado jaiái afémaci finócafuena jíeruitiomoí. Mei afémaci afe uai llóraini titádiaioi, íemo birui afémaci raírafo izoide jóoniacona meine abído nitátatiomoí.

49 Ie jira Juzíñamui nana ráfuiaí onóillano, bie izói daide: “Afémacimo cue uai llórainina óreiticue. Daje izói jiáie cue nizécano íaioimo óreiticue. Afémaçimona dáarie titaitiaioi. Jiáimacina duere finóllena rácaitiaioi,” daide.

50 Mei uáfueza, birui itínomo, nana jaiái faga uai llóraini íbana óite. Uafue, énie finuamona biruimo nana tíidino íbana óite.

51 Faga Abel igímamona Zacarías tíllaruimo íbana óite. Afe Zacaríasna Juzíñamui gairíraco eromo ite altar áinori fatíaioi. Jira ómoína dáititue, biruimo itínomo Juzíñamui afe titácana íbana óite.

52 Ocuica uai llófuetino, ¡nñi omoi dúerena! Mei nauí Juzíñamui ómoimo fecaca ie ñue báitaja uai ie illáimana illánomo jofo omoi jáillena, áfena ñue náfueñediomoíza. Iemo

afe llezica onóiacadinomona áfena rairuídíomoi^{za}, —dinori Jesús úrite.

⁵³ Jesús bie izóí íaioina daina llezica, ocuica uai llófuetino naa fariséuairi afémiemo jamánomo ríicaidiaioi. Iemona diga jícanoiacaga uáillaído afémi^{ena} áfedodiaioi.

⁵⁴ Irebai izóidena afémi^e óllena jífánodoí^{diaioi}. Daií finó^{diaioi}, ie daina uáillaído fiénidífuaíⁱ afémiemo nitállena.

12

Comécina íáirena mei jinófenena ñue cíoidino Jesús lletade

¹ Afe dáaruído diga náiraíⁱ dáanomo iere gairí^{diaioi}. Gairíllamona conímaí^{ina} zaízí^{diaioi}. Iemo Jesús ie llófuegamacina nano fueñe daide:

—Fariséuaimona diga comini comécina íáirena mei abina ñue cíoidino ite. Afémaci daií íllamona abí omoi rairuiri, mei afe íaioimo ite íaífue pan fáitara “levadura” izóideza. Due jiza jóonega ia, nana afe erona maiñode.

² Nana báinino daina uai jino uáfodo cíozite. Daje izóí nana báinino retáidoga raa uáfomo báifite.

³ Mei íemona, nana jí^{tifomo} omoi báinino úrilla uail^{ai} jino úzefomo cacaille. Daje izóí jofe eromo báinino omoi daina uai comini dáanomo uáidota afémaci cacáicana ficire llole.

¿Ñie cómena jacírui^{redica}i?

(Mt 10.28-31)

⁴ Omoi cue nabáíñiaí^{diomoi}, jira bie izóí ómoí^{na} dáititue. Fia abi íeizi titáfirede comí^{na} jacíruiñeno iri. Afe mei afémaci ómoimo íaioi finolle jíáifuena iñede.

⁵ Mei jíáífodo omoi jacíruillimie llóititue. Abi íeizi tí^{taja} méfomo boode jóraimo comeci dotáfire^{di}miena omoi jacírui^{ri}.

⁶ Onódiomoi^{za}, cinco diga ófocuíño mena úcubetunido íbárede. Mei íadi afémacimona Juzíñamui dáami^{ena} féitañede.

⁷ Iemo jíái ómoimo ite ífótirai illa dígatirai facádoga. Daiítadeza jacíruiñeno iri. Mei omoi, aillo ófocuizai baimo ráifidiomoi^{za}.

Comini eróicana Jesuna jíéruitino

(Mt 10.32-33; 12.32; 10.19-20)

⁸ Omoí^{na} dáititue: Nanoide íima Jitódicueza, comini eróicana nana cuena jíéruitinona afe izóí Juzíñamui abi imaci eróicana jíéruititue.

⁹ Iemo daje izóí comini eróicana cuena jáanoitinona, afe izóí Juzíñamui abi imaci eróicana jáanoititue.

10 Iemo nane jáifue, ninó daa come Nanoide fima Jitona iaire dáia, afémie daina íaifue dórede. Mei íadi ninó dáamie Ñuera Joréñona iaire dáia, afe jaca dónide.

11 Iemo ninó jáíruido Juziñamui uai llorácomo afémaci omoi uíadi áfemo comeci llícitaiñeno iri. Daje izói izire jicánofiredinomo, naa ocuídillaini diga, afémacimo omoi íaiouia, omoi daiácana uaimo comeci llícitaiñeno iri.

12 Mei omoi úriacanamo dúcille llezica, Juziñamui Ñuera Joreño omoi daiíllifuenta ómoimo llóiteza, —daide.

Comini ráarena jacírede

13 Comínimona dáamie Jesuna daide:

—Llófueraíma, cócomo fiébide feci ráamona, cuemo dúina dieze cue ama cuemo ílleza, o lloiri, —daide.

14 Jira Jesús afémiena daide:

—Ebe, omoi cígimo izire jicánofireitimiena, daje izói fécafireitimiena ¿bu cue jóonia? Jóoneñegacue, —daide.

15 Jesús nane dáanomomo daide:

—Nana úradoillafuíaímona caade come izói, abí omoi rairuiri. Mei come ñue illafue, aillo ráarenamona óñega.

16 Afe mei bie jino onótate raafue llote:

—Nauí iere ráaredimie ite. Afémie jacáfaíai iere áillamona jofo olle llízíe iere ite.

17 Afemona iere ráaredimie comeci facade: “¿Mei ñíe izói ííticue? Afe áillue llízíe éenollino íñede.”

18 Nane dáanomomo comeci facade: “Cue finóllemo ja uíbicaídíe. Cuemo ite éenoracuai júdaiano jamánomomo áillocuaina nitátaiticue. Afécuaimo nana jofo cue olle llízíena éenoíticue. Daje izói nana cuemo ite raana afécuaimo jóoneíticue.

19 Afe mei dama cue abina dáííticue, ‘Ja aillo raa jofo ofítaiticue; áfedo diga fimona cáaiticue. Nágarui táijíñeno fia güíticue. Iemona fia uái ííticue. Aillo vino júruano, áferi caimare ífireíticue,’ ” daide.

20 Mei íadi Juziñamui íena daide: “Comécina onóñedimiedio. Fui naio títio. Afe mei o ofítaga ráaniai ¿bu náamatalle?” daide.

21 Mei dama ie abí íena aillo raana ofítaitimie daí íteza, mei daí afémie ofítaja llezica, Juziñamui jítainomomo comécíñede. Comécíñeno, afémie Juziñamui eróicana iere dúeredimiena jaide, —Jesús daide.

Juziñamui ie úruiaína ñue rairuide (Mt 6.25-34)

22 Afe méifomomo Jesús ie llófuegamacina daide:

—Jira ómoina dáitícue, omoí güacaga güüllemo comeci omoí llícitaiñeno iri. Daje izóí omoí jitácaga inícuirromo comeci llícitaiñeno iri.

²³ Cai ñue illafue cai güille baimo ráifide. Iemo jiái cai abí cai inícuir baimo ráifide.

²⁴ Mai “cuervo” daína cháafona eróidemo coméciiri. Afémaci jaca riñediaioi; daje izóí llizíllaniai jofo oñediaioi. Daje izóí afémaci güille éenoraco iñede, naa íaioi ofítaranori. Mei íadi Juziñamui afémacina ecade. Ie mei omoí afe ófocuzai baimo jamánomo ráifidiomoí.

²⁵ Omoímona, comeci iere llíciamona, ¿mei bu ie zairilla dinori baimo mediio metro zairírena?

²⁶ Mei duera raana finónidiomoí ia, ¿ñibái mei jiáie raa fínuamo iere coméciidiomoí?

²⁷ Raroci záfia zeríllamo omoí coméciiri. Afémaci táijiñediaioi; daje izóí raana niñediaioi. Mei íadi jiáifodo ómoina dáitícue, jaiái illaíma Salomón ñue cíoide raana jamánomo ráarede íadi, bie záfia ebírena izóí, ebírediroina jitáñede.

²⁸ Mei Juziñamui daí raroci ebire cíotaiadi, afémie jeruñíeno ómoina iníroina jítaite, jabo íinotínodiomoí íadi.

²⁹ Afe jira benómona o güacaga raa, o jirolle diga zuure jenóñeno iri; daa áfemo comeci llícitaiñeno iri.

³⁰ Mei bínie comini daa afe izóidemoo jaritaidiaioi. Mei íadi omoí Móorediomoí. Afe omoí Moo Juziñamui nana afe ráaniaina omoí jitáillana onódeza.

³¹ Iemona Juziñamui illáimana illáruimo dúide raamo raire áfemo omoí comécioiri. Iemo afémie nana bie raana ómoímo fécaiteza.

*Monamo cai jirídollena ofítaredicai
(Mt 6.19-21)*

³² Cue izíruiga ovejai izóidiomoíza, jacíruiñeno iri. Dúemacidiomoí íadi, o Moo ie illaímana illano ómoiena maméacade.

³³ Omoímo ite raa fecari. Fécajano raana jitáidinomo ine. Daí omoí finóadi, Moo Juziñamui comeci jítainana fínoitiomoí. Iemona monamo ie illánomo ñúefuiai ofítaitiomoí. Daje izóí jaca ninomo fúíñeite ñúefuiai ómoiena monamo ómoímo íite. Afénomo merírifiredimie jaca jáinide. Daje izóí afénomo ícuai güíñeite.

³⁴ Mei uáfueza, omoí ofítaga raa illánomo, afénomo jiái o comeci íite.

Nágarui ñue finóbiredicai

³⁵ Benómona jaca nágarui ñue omoí finóbifireiri. Nauíllamona comini mechera unéfírena izóí, abí omoí rairuiri.

36 Jofo naama ocuífirgano, áirena ráfueмона meine ie dúciacana uícomo íaioi afémiemo ocuírina izói, afe izói cue billíruimo omoi ocuíriri. Afémaci ñue ocuíridiaioi, afe jofo naama nazémона uáidoia raire íemo túiñuaibillena.

37 Afe izoide ocuífirgano jaca iniñeno íaioi naama bíllemo ñue ocuíridiaioi. Daií íaioi illa afémie cíozaiBILLA llezica, afémaci ja ñue íaioi finóbillari íóbicaidiaioi. Uáfueña ómoína dáitícue: Afe íaioi naama afémacina güiránomo ráinaite. Raina mei dama afémie íaioi güillena bai ráziite.

38 Mei nibai dáaferui llezica afémie dúciadi, nibai monáiacademo afémie dúcia, afémaci uícomo iniñeno ocuíridiaioi. Iemona afémaci íóbicaitiaioi.

39 Iemo jíáfue dibénedo bie izói omoi onoiri: jofo naama merírizaibitímie bille monana onóia, afémie iniñeno ocuíríte. Iemona jofo naama merírizaibitínona ie jofona tuiñotañeite, ie raa íaioi mériñeillena.

40 Afe izói ñue omoi mamériri, mei Nanoide fima Jitó comini coméciñeilliruimo ónonino déizaibite, —daide Jesús.

Raire ínofirede ocuífirgamie, íemo jíái ínofinide ocuífirgamie

(Mt 24.45-51)

41 Mei jira Pedro Jesumo jicánote:

—Ocuíraíma, bífueña, ¿ñie comínimo llotio? ¿Dani caimo, nibai nana comini íena llotio? —daide.

42 Jira Ocuíraíma daide:

—Mei daa jofo naama ie ocuífirga jabóidillaíma eneno mamede. Jofo naama jica jáiacana uícomo, ie jofo ero raana afe jabóidillaímamo llonódacaide. Afe llezica nana jofo ero táijidino ecállena afémiemo jóonenocaide. Daií jóonega jabóidillaíma jaca nágarui ñue ínofirgamíena írede. Daje izói afémie ñue onódimíena írede.

43 Afe izóidímie nana íemo llonódacaíga raa nágarui ñue finófirede. Ie jira jofo naama meine bille llezica, daií ie íllana cíozaiBITE. Iemona afe jabóidillaíma iere cáimacaite, mei nana ie ocuica raana ñue ícoímo fuitádeza.

44 Uáfueña ómoína daidícue, jofo naama afe ínofirga ocuífirgamíemo nana íemo ite raa, llonódacaite.

45 Mei jíáfodo, afe jabóidillaíma jofo naama are bíñeite dainano, jíaie jofo eromo táijidinona duere finóadi, afe jabóidillaíma iere cacáfinidímíena jaide. Mei afe llezica afémie jofo ero táijitatingo fiени finódeza. Iemo aillo güíteza, aillo jiródeza. Jírúa mei jífáitateza.

46 Daií ie illa llezica, afémie due jiza coméciñeitemo jofo naama dénuaiBITE. Onóñeilliruimo dúciite. Dúciillano afe jabóidillaímana jofo naama jamánomo duere íñoite.

Nana jíáie ñnofinidino duere zefuilla izói, afémie íena duere finótaite.

⁴⁷ Ninó daa ocuífiregamie ie naama comeci jitailla tájinana onode íadi, afemo jaca ñue finóbiñede, daje izói afemo cacáreacañede, afe ocuífiregamie duere finoda iere izi cácatalle.

⁴⁸ Mei jíáie ocuífiregamie ie naama jitaillana onóñede íadi, dama fieni ia, afémie jabo izi cácatalle. Bie jíáie uaimo omoi cácarei. Aillo igámiemona aillo jícaitiaioi. Daje izói ñue ñnogamiemo diga ñúefue jónefirediaioi. Ie jira afe aillo jónefiregamiemona aillo ócuitiaioi.

Comini énenorie ráinuaibiticue
(Mt 10.34-36)

⁴⁹ Cue bie éniemo irai izói bónuaibiticue. Aferai raire bóollena iere oíacadicue.

⁵⁰ Ja bautismo izoide, izi cácanafuedo facátallicue. Afénomo nai dúciñedemo raire uícomo aferui dúciñenari duere zéfuiiredicue.

⁵¹ ¿Ñibai bíniemo caimare dájena uái illifue atídio, cuena daidíomoi? Omoina dáititicue, afe izói biñédicueza; comini énenorie ráinuaibiticue.

⁵² Mei benómona dáacomo ite cinco dígadimie cue ícoinia eneno ráidoizitiaioi. Afémacimona daámami cuemo ñnoitiaioi; íemo jadíe enéfenemo ménade ñnoñedimaci ráidoizillanona conima diga fúiritiaioi.

⁵³ Cuemo ñnuamona da jító ie moo dinena ruifíruille. Daje izói jító ie moo cuemo ñnua jira dájena uái iñeno íena ruifíruillano éoite. Iemo jíái, ei jiza cuemo ñnuamona ei dinena ruifíruille. Dájena uái iñeitiainguai. Daje izói jifaiño cuemo ñnua jira mio dinena ruifíruille. Afe íbana mio ie jifaiño diga dájena uái iñeitiainguai, —daide Jesús.

Iirairuillaí dúciacana onótaité raa
(Mt 16.1-4; Mr 8.11-13)

⁵⁴ Afe mei nane comínina Jesús daide:

—Fuirina nairíadi “noci bíite” daidíomoi. Afe mei ua bíide.

⁵⁵ Daje izói ñue mona monáillado “fimona baizájilla” daidíomoi. Iemona jaca fimónana jaide.

⁵⁶ ¡Omoi comécina íáirena mei abina ñue cíodinodiomoi! Noci bíillana onódiomoi, íemo fimona baizájillana onódiomoi, mei íadi birui omoi cígimo cue finoca onótaitifuiaina onóñediomoi.

O diga íciritimie raire manánaitari
(Mt 5.25-26)

⁵⁷ ¿Ñibái mei comeci jáicina jóina izói, daní conímamo jícanoñediomoi?

⁵⁸ Daa come o llógidoiacania, ríimacimo ómicoi úrizaiilla llezica, nai ómicoi dúciñena llezica io anamo afefue ñue o záitari, riire jicánoraímamo o ie izájíñeilla. Izire jicánoraímamo o ie izájíadi, afe izire jicánoraíma fiénidino llaitáfiredinomo o izájíte. Iemo afémaci ona llavéracomo íbaitiaioi.

⁵⁹ Uafue ona dáititue o llavétatímie jicaca úcube ie jícaja dieze o íbaiñenia afécomona jaca jino bíñeitio, —Jesús dinori daide.

13

Cai comeci ifue iere raire méidoredicai

¹ Aféruillaido comínimona dáarie Jesumo Pilato jíáimaci fienu faaja lluaíbitiaioi. Naui Galilea imácimona dáarie Juzíñamui íobilla faga rille fécajilla llezica, Pilato afémacina fate. Fáajano íaioi die íaioi fecaca rille die diga Pilato tamede. Daí ie fínuana jñí íaire cíoina!

² Jira Jesús daide:

—Omoi bie Galilea comínimo ¿ñie izói coméciidíomoi? ¿Meita afémaci jíáie Galilea comíni baimo fiénidino, jira afémaci raamo jíridiaioi?

³ Afe izóiñede, ómoína dáititue. Mei jira omoi comeci ifue omoi méidoñenia, nana daje izói niné táinocaitiomoi.

⁴ Iemo jíáifuemo omoi coméciri. Naui Jerusalemo iere caifo jica caifóidico ite. Afe iere caifóidico, Siloéna mámecirede. Afeco díillamona dieciocho diga comíni jíitafidiaioi. ¿Meita afémaci Jerusalemo ite jíáimaci baimo fiénidino? ¿Meita jira daí zefuídiaioi?

⁵ Omoína daidícueza, afe izóiñede. Mei jira omoi comeci ifue omoi méidoñenia nana omoi niné táinocaitiomoi, —daide.

Higuera daína llizíñede amena rafue

⁶ Afe mei Jesús bie jíáie íaioi onóigafue afémacimo llote:

—Da come higuera daína amena ie jacáfaimo rite. Afe mei afena llizíadi daí eróizaide. Eróizaidemo jaca llizíñede.

⁷ Ie jira afémie jacafai uíñotimiena daide: “Ero, daámani fimona bie amena llizíadi daí eróizabifiredicuemo jaca llizíñede. Llizíñedeza, mai o tieri. Fia cue jacafai llótaidoteza.”

⁸ Jira afe jacafai úíñotímie uai ote: “Naama, bie fimónamo mai nai cai tieñeilli. Afe amena moi ñue fínuano júnaititue.

⁹ Nibai áfemona llizíteza. Mei íadi áfemona llizíñenia tielle,” —daide.

Jesús ocózinaillaruimo abina ana jíicaidingona jillotate

¹⁰ Jíáie ocózinaillaruimo Jesús Juzíñamui uai llorácomo llófuete.

11 Afe llezica afénomo dieciocho fimónamo abina ana jícaillari iráredingo illa. Naui fiénide jóriai aféngona daií finoca. Afengo caifo jaícina jaca náidacainide.

12 Jesús aféngona cíoillano ie jírite. Daide:

—Ringo, o irárenamona ja jíllotio, —daide.

13 Daií dainano Jesús ie onoi aféngomo bitade. Bitá llezica afengo ñue jaícina náidacaide. Afe dáaruido afengo ñúefue Juzíñamui lloste.

14 Mei íadi áferi Juzíñamui uai lloraco illaíma ríicaide, ocózinaillaruiamo Jesús afengo jíllotaja jira. Afémie comínina daide:

—Seis diga mona tájiredicai, aféruillaído omoi jílloilena bíredíomoi. Mei íadi ocózinaillaruiamo omoi abina jíllotaibiñeno iri, —daide.

15 Jira Jesús ie uai ote:

—Comécina íáirena mei abina ñue cíoidinodíomoi. Omoi cuinaca burro, íemo juráreto ocózinaillaruido ¿meita jainoi ie jíruaillena zuitáñediomoi? ¡Zuitáfiredíomoi!

16 Afe izói bie Abrahámona comuídingo ie irárenamona ¿meita ocózinaillaruiamo zuitánidícue? Mei aféngona Taife dieciocho diga fimona ja cuinaca izói duere finódeza, —daide.

17 Jesús daií daina cacáillano, ie éoidino méaicaidiaíoi. Mei íadi nana comini afe Jesús finoca áillue ñúefuiaíri íóbidiaíoi.

Mostaza daina raroci jéenide íji rafue

(Mt 13.31-32; Mr 4.30-32)

18 Iemona Jesús daide:

—Juzíñamui illáimana illáruina omoi ónoillena ¿mei ñíe izói jino cíotaitícue? ¿Ñíe izói afénona mámeitícue?

19 Afe illarui mostaza daina raroci jéenide íjiaí izoide. Daa come aféjiaína ie jacáfaimo rite. Afe jéenide íjiaí ríllamona afe jéejinide zícua caifo amena dínnori aillo zairide. Afe ícairuaimo feede ófocuizai jillaina nitíaíoi.

Levadura rafue

(Mt 13.33)

20 Nane Jesús daide:

—¿Ñíe izói Juzíñamui illáimana illáruina mámeitícue?

21 Afe illáruina “levadura” daina pan aillo fáitate raa izoide. Daa ringo daámani julleco harínana oruítajano áfemo due jiza fáitarana tamede. Iemona nana afe iféllana mulleda oni aillo móonaitade, —daide.

Ríllrede naze izoide rafue

(Mt 7.13-14, 21-23)

22 Jesús Jerusalemo jailla llezica, áfemo ite jofue comínina llófuate, naa jéenidigobiaímo.

23 Afénomono dáamie Jesumo jicánote:

—Ocuíraima, ¿meita jilloitino dúemaci, ero ua? —daide.

Jira Jesús afémie uai ote:

24 —Juzíñamui illáimana illánomo jofo jáirao rillírede naze izoide. Afe rillírede naze izóidedo jofo omoi jáillena riire omoi mamériri. Mei ómoína dáiticeza, aillo comini afénomono jofo jáiacaitiaoi, mei íadi jáinitiaioiza.

25 Mei jofo naama náidacaillano naze ibaille mei, omoi ja jinófenemo fiébitiomoi. Afe llezica nazémona jíjiritiomoi: “Ocuíraima, naze caimo tuiño” dáitiomoi. Afe llezica afémie jofona uai óite: “Omoi ninó cominidiomoiza, ómoína onóñedicue,” dáite.

26 Iemona omoi bie izói dáitiomoi: “Cai, o diga güiticaí, daje izói o diga jiródicaí. Cai jofue cigi iomo caina llófuefredio,” dáitiomoi.

27 Mei íadi nane afémie uai óite: “Jae ómoína daidicue, ninó cominidiomoiza ómoína onóñedicue. Omoi nana fiénidifue finófrediomoiza cúemona oni jai,” dáite.

28 Iemona afénomono jino éenaitiomoi. Daje izói zúurenamona murímuritiomoi. Mei Juzíñamui illáimana illánomo Abraham, íemo Isaac, íemo Jacob jofo jáillana cíoitioimoiza, naa Juzíñamui uai jino llórainiri. Mei íadi afe llezica omoi ja jino dotálliomoiza.

29 Mei uáfueza, nágafeniamona billano, diga ínotino Juzíñamui illáimana illánomo jofo jáillano güizáibitiaoi.

30 Mei afe llezica dámerie óodaficaidino uícoficaitiaoi. Daje izói dáarie uícoficaidino óodaficaítiaoi, —daide Jesús

Jesús Jerusalén cominiri eede
(Mt 23.37-39)

31 Aféruido fariséuaimona dámerie dúcillano Jesuna daidíaoi:

—Herodes o fáiacadeza, benómona oni jairi, —daidíaoi.

32 Jira Jesús uai ote:

—Mai afe iere abi ráiruide egai izoide Herodes omoi lluájiri: “Cacai. Bímonado íemo daje izói uire jiti, fiénide jóriaiana jino óreitice. Daje izói iráredinona jllotaitice. Iemo bai ie uire áfemo cue táijina fúitaiticeza,” daí omoi lluájiri.

33 Mei íadi birui bie cue bíllaodo nai jáiredicue. Daje izói uire jiti nai jáiredicue, íemo bai ie uire nai jáiredicue. Mei Juzíñamui uai llórainmadicueza, Jerusalén jinomo oni jica tíinidicueza, —daide.

34 Iemo Jesús écana daide: “¡Jerusalén comini! ¡Nii íaioi dúerenal! Juzíñamui uai llórainina fáfrediaoi. Daje izói Juzíñamui íaioimo oreca uai lluájitino nófiéna níjifrediaoi.

¡Diga icaiño íaioina átava ie átavachingo iaico anamo bícuia izói, íaioina cue anamo bicóacadicue! Mei íadi áfena jíeruñediaioi.

³⁵ Ie jira omoi cacai, uire jíairuido omoi jofue zóofegacona mámeite. Omoína daidicue, afénomona are cuena cíõñeitiomoi. Mei cuena “Juziñamui mámecido bitímie caimare ióbidímie” omoi dáiiñelle dinó cuena cíõñeitiomoi, —dinori Jesús daide.

14

Abi fáillari duere zefuídímie Jesús jíllotate

¹ Ie mei jíaie ocózinai llaruimo Jesús fariséuai illaíma dine güizájide. Afe llezica jíaie fariséuai Jesumo janónaioicana eróidiaioi.

² Afénomo Jesús uiecori daa abina fáillari duere zefuídímie illa.

³ Mei jira Jesús ocuica uai llófue firedinomo jícanote naa fariséuari.

—Ocózinai llaruimo ¿meita iráredímie jíllotarede? ¿Nibai jíllotanide? —daide.

⁴ Mei íadi afémaci uai oñeno tí daí itíaiioi. Iemona afe iráredímie bai uáidota jíllotate. Jíllotajano, “Maí o jairi,” daide.

⁵ Afe mei Jesús fariséuaina daide:

—Omoimona bu ocózinai llaruimo íemo ite burro, nibai juráreto, ifomo baiía ¿meita raire naado óñega? ¡Ocózinai llaruí íadi jaca raire caífo ófirediomoi! —daide.

⁶ Afemona afe uaina jaca ónidiaioi.

Airena ráfue mo uáidoga comini

⁷ Afe güilláfuemo bite lloga comini illáicomini ráiira izóidino ráiillena izire jenódiaioi. Nana uícoficaiacadiaioi. Jesús áfena cíoillano bie izói íaioina llófuete:

⁸ —Ninó dáamie áirenafue mo omoi uáidoia, illaíma ráiiranomo ráiñeno iri. Mei o baimo jamánomoidímie nibai dúciiteza.

⁹ Iemona omoi uáidote rafue naama omo lluáibite. “O ráiirano maí bímiemo feca,” ona dáite. Afemona íraie ráiiranomo meáire ráizaitio.

¹⁰ Mei jíaífodo ninó dáamie irázillena o jíria, bai ícoimo ite ráiiranomo o ráiri. Afe mei o uáidote rafue naama billa llezica, afémie ona dáite: “Cue onóigamie, bai benó ñuera ráiiranomo bi,” dáite. Afe daí nana güiránomo o diga ráiedino eróicana afe rafue naama ñúefue omo jóneiteza.

¹¹ Mei jira naga come dama ie abina jamánomoidena fínoitimie, jamáimiena óreite. Daje izói “Jiba cómedicue” daidímie, jamánomoidimiena jáitaite, —daide.

¹² Afe dáaruido, Jesús ie uáidotimiena daide:

—Güilla rafue o finoa o onóigamací uáidoñeno iri, naa o ámatiaíri. Daje izóí o comíní uáidoñeno iri, naa o áinori ite ráanaitimacírí. Mei afe íbana ona uáidoitiaíoi. Afe daíí íbaja izóí máíñoítio.

¹³ Mei jíáífodo güilla rafue o finoa dúeredino uáidori naa aídáimacírí. Daje izóí júbene ídaínidino uáidori naa uina cíóñedinori.

¹⁴ Afemona iere caimare íitioza. Mei afémací afe íbana omo finónidiaíoi. Mei íadí tíide comécina jaícina jóidino nífuenidino meine abido cáaillruimo o íbaja ízoide raa máíñoítioza.

Aillue güilla ráfuedo jíáífuenta ñue cai onótaité

¹⁵ Afe güilla ráfueмо Jesús diga ráíiedinomona bífuenta cacáillano dáamie Jesuna daide:

—Juzíñamui illáimana illíruimo nabáiritimie caimare ite, — daide.

¹⁶ Mei jira Jesús íena daide:

—Daa come áillue güilla rafue finode. Afe ráfueмо gairíllena aillo comíní jíiritade.

¹⁷ Ja rafue mámiarumo táijina ñue fuilla llezica, ie ocuífregamie ie uáidoganomo llujítate, bie izóí daííllena: “Ja nana raa ñue finócaza, mai omoi biri.”

¹⁸ Mei íadí afe llezica illa dígamie: “Íere cue jétalle íllaza, bínidícue,” daide. Nanóidímie daide: “Como cue íbaca cue jacafai méíñuacadicueza; bínidícueza. Cuena icíñeno iri,” daide.

¹⁹ Iemo jíáímie daide: “Ja cinco diga juráreto naa íaíoi nabai diga íbádícueza. Aféretuai fueñe fácajiacadicueza. Bínidícueza, cuena icíñeno iri,” daide.

²⁰ Iemo nane jíáímie daide: “Como fueñe ringo otícueza, bínidícue. Eróíñeno iri.”

²¹ Iemona afe ocuífregamie meine jofomo jaillano ie orédímíemo bie izóí íaíoi daíízia llujíide. Aferi rafue naama iere ríicaide. Afe jira ie ocuífregamiena daide: “Jofue cígímo ite áillue macáraodo naa duera iodo mai raíre jai. Aféuaimona dúeredino naa aídáimací diga bené atíri. Daje llezica júbene ídaínidino naa uínidínori benomo atíri,” daide.

²² Afe méífodo íanori íllamona afe ocuífregamie billano daide: “Cue naama, o ocuilla izóí ja finódícueza. Mei íadí nai ñue oruíñede. Nai ráíillinona ite,” daide.

²³ Iemona afe naama ocuífregamiena daide: “Mai jofue jinómona joide íuaido, áillue iodo naa dúeodo o jairi. Aféuaimona cue jofu íaíoi oruítaíbilleza riire oreri.

24 Mei uáfuena ómoina dáiticue: Cue diga güizáibillena fueñe cue uáidogamona buna cue finoca güüllena güññeitiaioi,” daide.

Crístodo cai jaille juárede

25 Aféruillaído diga comini Jesudo jáidiaioi. Afe llezica afémie meine gírecaillano íedo jáidinona daide:

26 —Dáamie cuedo jáiacana llezica, ie móotiana cue baimo izíruiaí cue llófuegamiena ínide. Daje izói dáamie ie aina, ie úruiana, ie ámatiana, daje izói dama ie abina cue baimo izíruia, afémie cuedo bínide.

27 Daje izói dáamie cuedo jailla ícoinia ie tílla izire oía afémie cue llófuegamiena ínide.

28 Bífuomo comeci facari: ómoimona dáamie jofo níacana uícodo, fueñe comeci facade. Daií comeci facárede ie ofítaga raa ñue ñillana fuite dáinana onóillena.

29 Dáamie daií comeci fácañenia, jofo jáaillirai ie naidánia mei, figo ofiñena jira ñue fuitáñeno zoofeite. Iemona afe mei áfena cíoitino afémiena zánoitiaioi.

30 “Bímie jofo níacade íadi fuitánide,” dáitiaioi.

31 Daje izói daa illaima jóbairiacana uícodo fueñe comeci ñue facárede. “¿Meita cuemo ite diez mil fuiríraini, baie cai diga fuirízaibite veinte mil fuirírainina, ñibai anáfenoredicai? ¿Ñibai nai anáfenonidicai?” daií comeci raire uícodo facárede.

32 Afémie ñue comeci fácano: “Baie bitino anáfenonidicai” daiíadi, afémie afe fuirízaibitino nai dúciñena llezica, manánaillena lluájitinona óreite, icíriñeno dájena illifue jicánollena.

33 Afe izói ómoimona ninó dáamie nana íemo ite raana zóofeacañenia, cue llófuegamiena jáinide.

Sal ie ríino iñenia jaca ráifiñede

(Mt 5.13; Mr 9.50)

34 Sal jaca ñuera, mei íadi ie ríino iñenia jaca jáie raamo jóonenide.

35 Jacafai éniemo jóonegana canóñede. Daje izói riga raa junáillena fiénide. Jaca éenoñeno oni dotárede. Aquíe izóideza cacácadino mai omoi cacai, —daide.

15

Oveja oni féiraila rafue

(Mt 18.10-14)

1 Afe mei nana gobierno íbátaga úcube llínoraimaci naa fiénidífuiairedinori Jesús úrillamo cacárezaibitiaioi.

2 Iemona fariséuai naa ocuica uai llófuefiredino Jesús zanódiaioi; daidíaioi:

—Bímie fiénidifuiaredinona caimare uáidota afémaciri güite,
—daídaiói.

³ Afemona Jesús bie onótatifue llote:

⁴ —Omoimona dáamie cien diga ovéjaiaia, afe ovéjaiaimona daa féiraia, áfena riire jénoite. Mei uáfueza, afémiemo fiévide noventa y nueve ovéjaiaia fiiano afe daa féiraitena afémie baille dinó riire jénoite.

⁵ Afe mei afe féiraitimie baillano caimare ie fecábemo bítano jofomo uite.

⁶ Jofomo dúcillano ie onóigamacina naa ie aino comíniri dáanomo gairítajano íaioina dáite: “Ja féiraite oveja cue báigaza. Mai cue diga caimare omoi iri.”

⁷ Mei jira ómoina daidicue: “Afe daje izói daa fiénidifuiaredimie ie comeci ifue méiduari monamo itino jamánomo ióbidiaioi. Mei íadi noventa y nueve diga comeci ifue méidonide Juzíñamuimona oni nibéfedo jáiñedinori jofófemo ióbidiaioi.

Ucubetuni niné baille rafue

⁸ Bie jiáie ñúefuemo omoi cacarei. Daa ringomo diez diga úcubetuni ite. Afemona dáatuni baiide. Afe jenóllena mechera unede. Afe llezica jofó ero rafode. Afe bie izóidedo afe úcubetuni jenócana uite ie baille dinó.

⁹ Afétuni ie báillamona ie onóigangotiaia naa ie aino imáciri dáanomo íaioi gairítano íaioina daide: “Jae niné baiide úcubetuni ja cue báigaza, mai cue diga caimare omoi iri.”

¹⁰ Nane ómoina dáiticue: “Afe izói fiénidifuiaredimie ie comeci ifue méiduari Juzíñamui abi imaci iere ióbidiaioi,” — daidicue.

Moo anámoma oni botade jitó rafue

¹¹ Jesús nane jiáifue llote:

—Daa come mena jitórede.

¹² Afe íaillinoimona íiraímie ie moona daide: “O fecalle ráamona cuemo duide díbene cuemo ine,” daide. Iemona afe íaillinoi moo íemo ite ráaniaia íaillinoimo fecade.

¹³ Afe méifodo íanori íllamona íiraímie íemo duide ráaniaia jiáimamo fecade. Fécajano afe iba úcube llínnota jica jiáie éniemo jaide. Afénomo afémie iere fiéni illáfuemo jaillano, nana ie llínoga úcube táinomo dótajide.

¹⁴ Iemo ie uiga úcube fuite. Afe llezica afe éniemo aillo júbietaidimaci. Aféruillaído afémie iere jufíruite.

¹⁵ Iemona afeno itímiemo táijina jénuaide. Iemona afe énie ímie ie tóica meróniaia uíñollena orede.

¹⁶ Afémie iere júbie méiniamona meróniaia ecáinamona güíacade, íadi ninó buna ie ecáñena.

17 Afemona afénomo dama comeci facade: “Cue moo jo-fomo ñue ecaca táijitagano ¡nii aillo illa! Iaioi jeírillamona fiébifirede. ¡Cue nibai benomo júbieri tíiticue!

18 Meine cue moo illánomo jáitícue. Dúciillano íena dáitícue: Moo, omo fiénidifue finódicue. Daje izói Juziñamuimo fiénidifue finódicue.

19 Cuena cue jitó dáiiñeitioza. Fia o táijitagamiéna mai cue mameri, dáitícue,” afémie comeci facade.

20 Dái ie comeci faca mei, iodo ie moo diné jaide.

Afémie nai jica ítemo ie moo íena ciode. Cíoillano afémieri iere dúecaide. Iemona moo ie jitó dine aizícana jaide. Dúciillano ie jitona iere caimare llínnote. Llínuano íena ñitade.

21 Afe mei jitó ie moona daide: “Moo, Juziñamuimo fiénidifue finódicue, daje izói omo finódicue. Cuena nibai cue jitó dáiiñeitioza,” daide.

22 Mei jiáifodo afémie moo ie ocuífíregamacina daide: “Mai raire jamánomo ñúecuuro jenoda atíri, afémie jitálleza. Daje izói ebírede onocai icuífoi jitari. Daje llezica ie eiba ico jitari.

23 Afe dáaruído farede juráreto jiza fatá atíri. Afe ritá cai iráizilleza.

24 Mei bie cue jitó tíilla izóidinomona meine cáadeza. Daje izói ja niné féiraite baitícaiza,” daide. Afemona caimare iráizitiaoi.

25 Bie féiraitimie dúcina llezica, ie ama nánoramie jino jacáfaimo ite. Afénomona bítemo, jofo áinomo dúcidemo íaioi iráizilla naa íaioi rúanai cacaina.

26 Ie jira jofómoma daa táijitafiregamie jitócome uáidota jicánote: ¿Minica rafue finódiaoi?

27 Afe jitócome íena daide: “O ama dúcina. Afe jira o moo farede juráreto jiza fatátate, mei ie jitó ñue iránino meine dúcina jira,” daide.

28 Mei áfena fidíillano ie ama nánoramie iere riicaide. Riicaillano jofo afénomo jáiacañede. Afe jira ie moo afémie diné lluájide. Jofo bíllena caimare íena bífuiaide.

29 Afe llezica ie moona daide: “Onódioza diga fimona o diga ñue táijifiredicue. Jaca o uaina oni caitáfinidicue. Mei íadi jaca ninó daa duera cabrito cuemo fecáñedio, cue nabáiñiairi cue iráizillena.

30 Mei íadi birui bie o úcube jiruíredingotiaimo dotádimie bíllamo afémie íena farede juráreto fatátatio,” daide.

31 Jira ie moo afémiena daide: “Cue jitó, o jaca cue diga ífiredio. Cuemo ite raana nana omo dúideza.

32 Mei íadi bie ráfuenta cai finuana ñue jáicina joide, caimare cai íllena, mei o ama tíilla izóidinomona meine bíteza. Daje izói ja niné féiraite baitícaiza,” daide.

16

Allue jofo jabóidillaíma izoide rafue

¹ Jesús nane ie llófuegamacina daide:

—Daa aillo ráaredimie ite. Afémiemo ie táijirainina ócuifirede jabóidillaíma ite. Jiáimaci afe ráaredimiena lluíbitiaíoi: “O jabóidillaíma omo ite ñuera ráaniaina táinomo dotádeza. Afémie figo ocuífede,” daidíaioi.

² Ie jira ráaredimie jabóidillaíma uáiduano daide: “O finócafueña cue cacana ¿ñie izói joide? Omo cue iga cue jofo rafue rábiai cuemo izáibiri, mei cue jabóidillaímana íñeitioza. Nana omo cue jóonegafue o záitalleza.

³ Iemona afe jabóidillaíma comeci facade: “Cue ocuídime ja oni cue dotádeza ¿ñie izói fínoitícue? Mairíñedicueza, jacafai tiédimiena ínidícue. Comínimo úcube fia jícana meáiruitícue.

⁴ Cue táijina fülle mei jiáie comini cue íaioi llínollena, cue finóllifue ja onódícue.”

⁵ Ie jira nana ie ocuídime iemona íbáredena itímiiai dámierie dáanomo jírrillano daide: “O íbáredena cue ocuídime ¿ñieze ite?” fueñeidime jicánote.

⁶ Afémie uai ote: “Cien diga látaniai cáiredíji afémiemo cue íballe ite,” daide. Iemo jabóidillaíma daide: “Benó o íbállibe ite. Mai benó raire ráillano, cincuéntana llotíbena cúeiri,” daide.

⁷ Afe mei jiáima uáiduano jicánote: “O íbállena ¿ñieze ite?” daide. Jira afémie íena daide: “Cien diga costales trigo afémiemo cue íbáredena ite,” daide. Jira jabóidillaíma íena daide: “Benó o íbállibe ite. Cómobemo ochenta diga costales cúeiri,” daide.

⁸ Ocuídime áfena fidíillano, afe íbállibe táinona méidotime iere báitafue nitade. Iemona ja onóigaza, bínie comini dani íaioi nícidogafuina Juzíñamui ínotino baimo iere baitádiaoi.

⁹ Bie izói omoi íllena llóitícue. Bie fiénide énie ráaniaido, mai omoi nabáñiaina maiñori, ráaniai fuilla méifodo ómoína jofo íaioi llínolleza. Mei ómoimo ite ráaniai ñue omoi uíñuado omoi ñue ínofirenana jino comínimo ácataitímoiza. Afe izói Juzíñamui omoi ñue ínofirenamona Juzíñamui ie zíñona illánomo ómoína llínoíteza.

¹⁰ Due jiza ite raana ñue íñotíme daje izói aillo raa íemo íadi áfena afémie ñue íñoite. Mei jíáfodo due jiza ite raana figo íñoñedime daje izói aillo raa íemo íadi afémie áfeniai figo íñoñeite.

¹¹ Ie jira bie fiénide éniemo ite ráaniai figo omoi íñoñenia, ¿bu mei zíñona ráífide ráaniai ómoimo fecalle?

12 Daje izói jiáimacimo jainaide raana figo omoi úiñoñenia, ¿bu mei ómoimo dúide raa ómoimo fecalle?

13 Dáaruído buna mena ocuídimeo jaináinide. Iaillinoimo o jaináiadi dáamiena éoitio, jiáimana izruitio. Daje izói dáamie ñue ínoitio, jiáimana jámairuitio. Mei jira onóigaza: Juziñamui o náamataja llezica úcubemo abimo náamatanidio, —dínó Jesús úrite. Daií Jesús úrilla llezica fariséuai ímíai cacáreidiaoi.

14 Afe fariséuai úcubena gáidino Jesús úrillana cacáillano uáitano íeri zadáidiaoi.

15 Mei jira Jesús daide:

—Comini eróicana ñúemacina abi mamédiomoi, mei íadi omoi comeci ífuenta Juziñamui ñue onode. Mei jii, comini mameca jamánomoidimíaina Juziñamui éoide.

Juziñamui illáimana illarui llua uai naa jaii Moisés ocuica uai diga

16 Jaiáimona Juan Bautista illáigimamo, comini Moisés ocuica uaimo dúidiaoi. Daje izói Juziñamui uai jino llóraini llógamo dúidiaoi. Iemo aféruimona bené Juziñamui illáimana illarui ñuera uai llócaiga. Iemo afénomo jofo íaioi jáillena izire nícidotiaoi.

17 Mei binie naa mona diga niné táinocaiadi, illa diga ocuica uaillai táinomo faiñeno ñue ícoimo fuitárede.

Jesús iima ie ai dótajado úrite

(Mt 19.1-12; Mr 10.1-12)

18 Daa come ie ai dotáadi, íemo dótano jiáie ringo óiadi, afémie ja jiruífue finode. Daje izói afe dotácango aina otímie ja jiruífueo baíide.

Aillo ráaredimie íemo Lázaroná mámeciredimie diga

19 Daa iere ráaredimie ite. Afémie iere ñúecuiruai jirófirede; illaíma jitáoi garoillai jitáfirede. Afémie nágarui ñue finóbilla rafue finófirede.

20 Daje llezica afénomo dúeredimie Lázaroná mámeciredimie ite. Afémie abi mallízaina oruide. Ráaredimie naze fuemo ráizai firede.

21 Bie dúeredimie ráaredimie güirábanimona dótafirega güille alla güifirede. Ie ráina llezica, jicóniai ie mállie miábifirede.

22 Afe mei diga irui íllamona dúeredimie tíide. Afémie Juziñamui abi imaci monamo ite paraiso daína ñúenomo uiga. Afeno afémie Abraham abimo ite. Afe mei jiái, ráaredimie tíilla raítíai.

23 Ráaredimie comini duere finólliraimo duere zefuilla llezica, caífo érocaide. Erocaide íadi Lázaro Abraham diga ráinana jicana cíode.

24 Iemona afe ráaredimie caillide: “Cai jaii Moo Abraham, cuemo dúecai. Lázaro bené ore, iere due jiza jáinoina cue

jirótaibilleza, cue iife manánaitallena. Mei bie iraimo iere duere zefuídicueza,” daide.

²⁵ Mei íadi Abraham íena daide: “Nauí o illáfuemo comeci faca. Aféruillaído iere ñue itio. Mei íadi aféruído bie Lázaro iere duere ite. Mei jáifodo birui afémie benó iere caimare ite. Afe llezica o duere zefuídio.

²⁶ Bie baimo, coco cigiri jáie iere afóredino ite, jira benó itino jáiacade ia, jáinide. Daje izói o illánomo itino caifo benó bíacadaioi ia, bínidiaioi.”

²⁷ Mei jira ráaredimie íena daide: “Cai jaiai Moo Abraham, Lázaro batí cue moo jofomo o oréllena izire jicádicue.

²⁸ Cue cinco dígade ama benomo bie duere zefuíllanomo íaioi bíñeillena llotátari,” daide.

²⁹ Mei íadi Abraham íena daide: “Afémacimo Moisés naa Juzíñamui uai llóraini diga cüegana ite. Afe uáillaimo náfueitiaioiza,” daide.

³⁰ Jira afe ráaredimie uai ote: “Cai jaiai Moo Abraham, jü, mei íadi tídinomona dáamie íaioimo llujadi, íaioi comeci ífuena méidoitiaioi,” daide.

³¹ Mei íadi Abraham íena daide, “Afémaci Moisés naa Juzíñamui uai llóraini uaina náfueñenia, daje izói tídinomona jáidino uaina íñoñeitiaioi,” daide.

17

Fiénidifuemo come baiilla iere jacírede

(Mt 18.6-7, 21-22; Mr 9.42)

¹ Jesús ie llófuegamacina daide:

—Jaca nágarui comini fiénidifuemo baiítafue íteza. Jáimana fiénidifuemo baiítatimie jini dúerenal

² Trigo llaiéra áillue noñcina afémie cimoimo ícoinota monáillaimo dotácana baimo ñuera; úrue izói como ínotinomona dáamie fiénidifuemo báitañelleza.

³ Afe izóidemonal abí omoí rairuiri.

O ama omo fiénidifue finóadi, afémiena lletari. Afemona afémie illafue ie méidoia, caimare íena uáidori.

⁴ Mei dáaruido afémie siete dígacaiño o fieni finóadi, íemo siete dígacaiño ona “Ja daí omo íñeiticue” afémie daízaibiadi, jaca ninomo íena caimare uáidoitio, —daide.

Juzíñamuimo cai ínua ríinorede

⁵ Jesús orécana íaioi Ocuíraimana daide:

—Jamánomo cai ínotari, —daide.

⁶ Mei jira afe Ocuíraima íaioina daide:

—Due uáfuena o ínoiadi rírede raana finóredio. O ínogafue diójna eroide mostaza íjai jéenina izoide íadi, bie

sicómoro daína aménana bie izói daíredio: “Caifo áijicaillano monáillajimo zójozai,” daidíonia afe amena o uaina ínoite.

Táijitafiregamiemo dúidifue

⁷ Omoimona daa cómemo ie táijitagamié íadi, afe táijitagamié jacáfaimona táijiano meine bíadi ¿Meita “Mai ráizai, o écaíticue” dáitio?

⁸ Daínide. Mei jíáifodo afémiena ñue dáitio: “Mai cue güille finori. Güillano cue jirolle llezica nana cue jitailla raa diga bai atíllena, mamériri. Afe méifomo güillano jíroitioza.”

⁹ ¿Meita nana afémiemo ocuállana fínuana ocuídime íena “Figora” daírede? Daíñede.

¹⁰ Afe daje izói, nana Juzíñamui ómoimo ocuica omoi fínua fuilla mei, bie izói daírediomoi: “Ñue táijiraimacíñedícaí. ‘Iere fígomací’ caina daínide. Mei daní caimo duide raa finódícaíza. Baimo jíáie finóñedícaí.”

Jesús diez diga chíinaitino jíllotate

¹¹ Jesús Jerusalemo jailla llezica, Galilea énie fuédamo ite duera jófuemo dúcide. Afe jofue daje izói Samaria énie fuédamo ite.

¹² Afe jófuemo dúciacana llezica, diez diga chíinaitino jino bai Jesús diné bitíaiói. Mei íadi afémaci Jesúmona bai jica fiébidíaiói.

¹³ Afénomona riire íena daidíaiói:

—Llófueraíma Jesús, caimo dúecai, —daidíaiói.

¹⁴ Jesús afémacina cíoillano daide:

—Batí lletárirainimo omoi abí ácataji, —daide.

Afénomo íaiói jailla llezica íaióimo ite duícuai jacáibicaide.

¹⁵ Iemo afémacimona dáame ie abímo ite duico jacáillana cíoillano, Jesús diné abído bite. Billa llezica Juzíñamuimo riire cáimadote.

¹⁶ Jesumo dúciillano afémie ana éniemo fueco diné bíjicaide, Jesuna figora daíllena. Afe bie izói daidímie Samaria ímie.

¹⁷ Jira Jesús daide:

—¿Afe duícomona jíllotaga diez dígamieñede? ¿Némei jíáie nueve dígamie?

¹⁸ ¿Meita dama bie jícánemiena Juzíñamuina abído cáimaduabilla? —daide.

¹⁹ Iemona Jesús afe íimana daide:

—Náidacaillano mai jai. O ínuamona o duícomona ja jíllodioza, —daide.

Juzíñamui illáimana illirui bíllana nie izói ónoítícaí

(Mt 24.23-28, 36-41)

²⁰ Fariséuai Jesumo jícánotíaiói, “¿Níirui Juzíñamui illáimana illirui bíite?” Afémie uai ote:

—Juzíñamui illáimana billirui jaca cíõñena.

21 Afena “Ba ñie” daiñide. Daje izói “Bai batí ite” daiñide. Mei Juzíñamui illáimana illino omoi cígimo ite, —daide.

22 Afe mei ie llófuegamacina daide:

—Uire jáiruido daa birui cue illa izóidiruina cíocaiti omoi, mei íadi cíõñeitio moi.

23 Jáimaci ómoína dáitiaioi, “Be ñie,” íemo ñibai “Batí ite” dáitiaioi. Mei íadi afénomo jáiñeno iri. Daje izói afémacido jáiñeno iri.

24 Mei ameo llairilla mona enéfemona jica jáinomo cíoina izói, Nanoide Hima Jitó billirui afe izói cíocaizaibite.

25 Mei íadi aferui ñai dúciñeille llezica, afémie fueñe jamánomo duere zéfuite. Daje izói bigímaiaí íena ruifíruitiaioi.

26 Noé illágimamo comini iere fieni illa izói, afe izói cue billíruimo comini fieni íitiaioi.

27 Noé ie finoca áillue nocaemo jáiñena llezica, nana comini ie lloga uaina náfueñeno fia güoidiaioi. Güillano jirófrediaioi. Afe llezica íaioi fieni illafue méidoñeno áireoidiaioi; íemo íaioi jízaniai ínreitaoidiaioi. Jaca daí ítiaioi abina Noé jofo áillue nocaemo jaide. Iemo aillo noci biide. Jamánomo bíllamona nana afémaci coróbaítiaioi.

28 Iemo Lot illágimamo afe izói ite. Juzíñamuimo coméciñeno güoidiaioi. Güillano jirófrediaioi; íbajano fécafirediaioi. Jacáfaiaina ritiaioi, íemo jofóniaina níoicaidiaioi.

29 Mei íadi afe Lot Sodoma jófue mona jino bítemo, monámona réiciai noci billa izói cocide. Afe llezica iere uzire boode ‘azufre’ daína raa cócia. Afemona nana timádimaci.

30 Cue Nanoide Hima Jitódicueza, cue cíocaizaibillirui afe izoite.

31 Aféruimo daa come ie jofo caifófecomo íadi, ie jofo eromo ite ráaniaina jofo jaillano báiruainide, afénomona botádeza. Daje izói dáamie jino jacáfaimo íadi, abido ie jofomo bíñide.

32 Lot aimo omoi uíbicaí.

33 Ie caana rairuíacadimie áfena afémiemona féite. Mei íadi ie cáanana lloñédimemona afe féiraiñeno, áfena baímo ziiño illínona máíñoite.

34 Iemo nane ómoína dáitícue, cue dúcille ñaio, mena come dájena ínia llezica, íaillinoimona dáamie oni uille. Jáimie fiébicaite.

35 Daje izói mena ringo daane trigo lláia llezica, íaínguaimona dango oni uille, jáíngo fiébicaite.

36 Daje izói mena íima jino jacáfaimo táijina llezica, íaillinoimona dáamie oni uille jáimie fiébicaite, —daide.

37 Daí ie dáinana cacáillano, ie llófuegamaci íemo jicánotiaioi:

—Cai Ocuíraíma, ¿mei ñinomo?

Jira afémie uai ote:

—Inóniai dáanomo gairízaifirenmona, rille rifáillanona ñue onódiomoi. Afe izói fiēni finódino oni íaioi úillemona dani íaioi duere finóllinona uáfuea onóigaza.

18

Daa fecingo comínimo riire jicánoraimamo jicajifirede

¹ Afe mei Jesús ie llófuegamacimo daa rafue mamede, nágaruillai fáicanocaiñeno Juziñamuimo íaioi jicafireillena.

² Iaioina daide:

—Jófuemo daa Juziñamuina náfuefinide comínimo riire jicánoraima ite. Daje izói jiáimacina lloñede.

³ Afe daje jófuemo daa fecingo ite. Afengo afe jicánoraimamo úrizabite. “Cue diga icíriacadimiena mai ñue jaícina jicánori,” daide.

⁴ Diga ícaiño afengo afémiemo jáidemo, afémie afengo uai jeire oñede. Mei íadi méifomo afémie comeci facade: “Juziñamuina jacíruiñedicuena, daje izói comini uaina náfueñedicuena,

⁵ mei íadi bie fecingo diga ícaiño cuemo zefuire bíbideza, aféngona riidoiticue. Afemona afengo cue dine bíñeilleza. Daií afengo are cue zéfuinaitañeilleza,” daií comeci facade.

⁶ Jira Ocuíraima daide:

—Daií bie fiēnide comínimo riire jicánoraima daide.

⁷ ¿Meita Juziñamui ie nizécanona, afe ie mona naio diga íemo izire jicádinona riidoñeite? ¡Raire íaioina riidoiteza! ¿Meita “Fui ómoimo llóiticue” íaioina dáite? Dáiñeite.

⁸ Omoína daidicue, afémie juare dibáiñeno raire íaioina riidoite. Mei íadi Nanoide ñima Jitódicueza meine cue bíadi, ¿meita cuemo ínotino íite? ¿Meita íñeite?

Fariseo, íemo gobierno íbátaga úcube llínoraima izoide rafue

⁹ Jesús nane jiáifue llote, abi ínuana jiáimaci jámairuitinona ñue llófuellena. Daide:

¹⁰ —Mena ñima íaillinoi Juziñamui jofomo Juziñamuimo úrizaide. Dáamie fariseo ímie; jiáima gobierno íbátaga úcube llínoraima.

¹¹ Fariseo ímie naidáicana bie izói Juziñamuimo úrite. “Moo Juziñamui, ona figora daidicue, mei cue bie jiáie fiēnidino izóiñedicueza. Jaca merírifinidicue, jiáimaci jífuefinidicue, daje izói jiruínidicue. Afe baimo bie gobierno íbátaga úcube llínoraima izóiñedicue.

¹² Naga semánamo ménacaiño güiñeno ífiredicue Juziñamui íóbitallena. Nágarui cue oga úcubemona, Juziñamuimo dúide raamo afémiemo fecáfiredicue,” daide.

¹³ Mei íadi afe gobierno ibátaga úcube llínoraima monamo érocaineno oni jica fiébite. Dinó ie illa llezica, iere dúredicue, dainano ie abi iere zuure finode. Finuano daide: “Aii, Juzíñamui mai cuemo dúecai. ¡tere fiénidifuiairedimiedicueza!” daide.

¹⁴ Omoina dáitícue, afe úcube llínoraima Juzíñamui anamo ñue illano jofomo jaide, mei íadi afe fariseo ímie ñue finoñega jailla. Mei uáfueza, abi ínota jamánomoiacadimie anáfeficaide. Mei íadi abí ínoñeno comécina mánaidimie daidímie jamánomoidimiena jailla, —daide.

Jesús úruiai ñue illena finode
(Mt 19.13-15; Mr 10.13-16)

¹⁵ Afe llezica comini íaioi jézainidino Jesumo atídiaioi, afémacimo onoi bitállena. Mei íadi áfena ie llófuegamaci cíoillano afe atídinona rairuídiaioi.

¹⁶ Mei jíáfodo Jesús ie llófuegamaci uáiduano daide:

—Afe úruiai dama cue diné bitíaiioiza. Afémacina rairuíñeno iri. Mei Juzíñamui illáimana illíruimo jáitino bie úruiai izóidiaioi.

¹⁷ Uáfueña ómoina dáitícue, fia comécina mánaide úrue izóíñedimie Juzíñamui illáimana illíruimo jaca jofa jáíñeite, —daide.

Ráarede jitócome Jesús diga úrilla
(Mt 19.16-30; Mr 10.17-31)

¹⁸ Illáicomini mona dáamie Jesumo jicánote:

—Ñuera Llófueraima, ziiñona cue illena ¿nie izói íredicue? —daide.

¹⁹ Jesús íena daide:

—¿Nibái mei cuena “Fígomiedio” daidio? Abi dine jíáie ñúemiena íñede. Dama Juzíñamui ñuena.

²⁰ Cai ocuína uáillaina cacáioza: “Jiruífueña finóñeno iri, jíáimana fañeno iri, meríriñeno iri, jíámamo taino lloñeno iri, o moo o ei diga ñue jacíruiri,” —daide.

²¹ Jira afémie Jesuna daide:

—Bíuallaina cue dúemieniadi jaca nai biruido jeire ófiredicue, —daide.

²² Afena cacáillano Jesús daide:

—Mei íadi omo nai daafue fiévide. Nana omo ite ráaniai fécano, afe iba dúredinomo ine. Afemona monamo ite ziiñona ráifide raa óiena íteza. Afe o ráaniai fecalle mei, mai cuedo bi, —daide.

²³ Mei íadi áfena cacáillano iere zúucaide, mei afémie iere ráaredeza.

²⁴ Jesús ie zúucaillana cíoillano daide:

—Iere ráaredimie mei íadi ie ráaniaina cue baimo afémie izíruiadi, Juzíñamui illáimana illíruimo jofo jáillena ¡nii juárena!

²⁵ Camello mámeçirede áillue rille eedo uífodo enéfenemo jailla juánide, mei jiáifodo iere ráaredimie Juzíñamui illáimana illíruimo jaille iere juárede, —daide.

²⁶ Aféfuena cacáidino íena daidíaioi:

—Iemona ¿níimie jílloille? —daidíaioi.

²⁷ Jira Jesús íaioina daide:

—Comínimona finónide raa Juzíñamui finórede, —daide.

²⁸ Afe mei Pedro íena daide:

—Ocuíraima, odo bíllena caimo ite raana fiénocaidicai, —daide.

²⁹ Jira afémie uai ote:

—Uáfuenta ómoína dáitícue, Juzíñamui illáimana illano ícoínia jofo fiénocaitimie, daje izói ie móotiai naa ie ámatiairi fiénocaitimie, daje izói ie ai naa úruiairi fiénocaitimie

³⁰ nai bíniemo ie illa llezica aillo baimo llínoite. Afe mei monamo zíiñona illino máiñoite, —daide.

Jesús nane dáanomo ie tállifue llote

(Mt 20.17-19; Mr 10.32-34)

³¹ Jesús oni eneno doce dígade ie llófuegamaci uillano daide:

—Ja birui Jerusalemo jáiticaiza. Afénomo nana jaii Juzíñamui uai llóraini Nanoide íima Jitó cuega uai jino zúilleza. Nanoide íima Jitódícueza.

³² Afeno jicánemacimo cue fécaítiaioi, íemo cuena jifánodoiítiaioi, íemo cuena báíñoitíaioi, íemo cuena túallaitiaioi.

³³ Iemo cuena rázido fáitíaioi. Afe mei cuena títaitiaioi. Mei íadi daaruíamani íllemona tíidinomona meine abido cáadimiena íitícue.

³⁴ Afe bífuiaína afémaci jaca onóñediaioi. Daje izói nímiiedo úriteza onóñediaioi, mei aféfuiai afémaci baitánide.

Jesús Jericó ímie uínidimie jílloate

(Mt 20.29-34; Mr 10.46-52)

³⁵ Jesús Jericó jófuemo áinozilla llezica daa uínidimie io fuemo ráiide. Afémie íia úcube jicáfirede.

³⁶ Aillo comíniai jáillana cacáillano afémie, “¿Níifue comuilla?” daide.

³⁷ Jira afémiemo llotíaioi, “Nazaret ímie bíedo jailla,” daidíaioi.

³⁸ Jira afémie jírriocaid:

—Davidmona comuídimie Jesús, Mesía daínámie mai cuemo dúecai, —daide.

³⁹ Uícodo jáidino afémiena “Uriñeno llícai,” daidíaioi. Mei íadi afémie nai riire caillide:

—Davidmona comuídime, Mesía ímie mai cuemo dúecai, — daide.

⁴⁰ Iemona Jesús náidade. “Afémie cue diné omoi uaji,” daide. Afémie dúcizai billa lezica Jesús jicánote:

⁴¹ ¿Minícana jítaidio, omo cue finólleza?

Jira uínidime uai ote:

—Ocuíraima, meine uído cióacadicue, —daide.

⁴² Jira Jesús íena daide:

—Mai érocai. O íinua ícoinia ja jíllodio, —daide.

⁴³ Daí daina lezica, uínidime ñue ciode. Afe mei afémie Juzíñamui mo caimátaicana Jesudo jaide. Daje izói nana afe uínidime jíllonana ciódino Juzíñamui mo caimátaoidiaioi.

19

Jesús Zaqueo uáiduaide

¹ Afe mei Jesús Jericó jófue mo dúciillano, afe jofue cígido jaide.

² Afénomo daa ráaredime ite. Afémie mámeçi Zaqueo. Afémie gobierno íbátaga úcube llínoraimaci illaíma.

³ Bie Zaqueo Jesuna cióiacade ie ónoillena. Ua Jesuna cióacade mei íadi íena ciónide, aillo comini íllaza, íemo jíai afémie iere íámieza.

⁴ Ie jira Jesús uícomo aizíicaillano, sicómoro daina aménamo caífo llíode Jesuna cíoillena. Afe amena Jesús jáillino áinori ite.

⁵ Jesús áfede jailla lezica, caífo íemo érocaide. Iena daide:

—Zaqueo, raire ana bi. Birui o jofomo fiébiticueza, —daide.

⁶ Ie mei Zaqueo raire ana billano Jesuna caimare llínote. Ua Zaqueo jofomo jáidiaillinoi.

⁷ Comini áfena cíoillano, nana áferi úrizidiaioi. Daidíaioi:

—Jesús fiénidime jofomo fiébizaide.

⁸ Iemo Zaqueo náidacaillano Jesuna daide:

—¿Ocuíraima, ero! Cuemo ite ráaniaimona dúeredimacimo átuédo fécaíticue. Daa come jífuiano nauí merídicuena áfena afémiemo meine abído izájíticue. Nane afe emódomo da-caíñoámani afémiemo ííticue, —daide.

⁹ Jira Jesús íena daide:

—Daí o íinuamona Juzíñamui lloga jíllonafue birui jeire o úana ja onódicai. Nauí féiraitio, mei íadi birui ja jíllotagao. Ja Abraham comuítagamiedio.

¹⁰ Mei jíi, o izoide ja oni baízaidino jenoda jíllotaíbiticue. Nanoide íima Jitódicueza, —daide.

Diez dígade úcubetunimo mameca rafue

11 Jesús bífuiaido úrillana comini cacana llezica, afémie daa rafue íaioimo llote. Mei Jerusalemo afémie áinozioicaidemo, afémaci comécido “Juzíñamui illáimana illírui ja raire dúciacade,” daidíaiioiza.

12 Jira Jesús íaioina daide:

—Daa iima ñúemacimona comuídime. Afémie oni jica jáiniemo jaide, afémaci illáimana afémie íaioi jóoneacadiaioiza. Afe mei afémie nane abido biite.

13 Nai ie jáiñena llezica, ie táijitaganomona diez dígamie uáidote. Uáiduano illa dígamie daa iere ráifide úcubetuni fecade. Feca llezica íaioina daide: “Bie úcubetunido nai cue bíñeille dinó ráaniai oíri. Ua mei, afe fécamo aillo úcubena oni jóoneri,” daide.

14 Mei íadi dama ie illano comini afémiena éoidiaioi. Eoillano afémie óodana llóitino orédiaioi. Llotíaioi: “Cai illáimana o íllena jítaiñedicaí,” daidíaiioi.

15 Mei íadi afémie illáimana jóonega. Jóonia mei dama ie éniemo jaide. Dúciillano úcubetunillaina igámiaíai bai uáidote. Uáiduano illa dígamie jicánote: “¿Ja nieze úcubena ofítatio?” daide.

16 Nano jírígamié íena daide: “Ocuíraíma, o úcubemona diez diga baimo óiena nabáidicue,” daide.

17 Ie jira aféllaíma uai ote: “Iere figura. Ñuera ocuífregamiedio. Omo due cue ígari ñue ínotioza, diez dígade comini jofue illáimana o jóoneiticue,” daide.

18 Afe mei nane jáimie jíríte. Afémie billano daide: “Ocuíraíma, o úcubemona cinco diga baimo óiena nabáidicue,” daide.

19 Nane daje izói bímiemo uai ote: “O cinco dígade comini jofue lláimana o jóoneiticue,” daide.

20 Afe mei nane jáimie jíríte. Afémie daide: “Ocuíraíma, be o úcubetuni. Ñue jacíruiocana cue éenogaza.

21 Mei iere ríimiedioza, ona jacíruiticue. O jóoneñegamona jaca ófiredio. Daje izói o ríñeganomona jaca ófiredio,” daide.

22 Afe jira aféllaíma íena daide: “Fíénide cue ocuífregamiedio. Dama o daina uaido riire omo jicánoiticue. Cue riirenana onódio íadi, ¿ñibái mei cue úcube baimo nabáíñedio? Daje izói cue jóoneñegamona cue ófírenana onódio íadi, íemo jáií cue ríñeganomona jaca cue ófírenana onódio íadi,

23 ¿ñibái mei cue úcube jáíe úcube iránomo jóoneñedio, abido cue jofomo cue billa llezica afe úcube íemo afe baimo jáíe úcube diga cue llínollena?”

24 Iemona afénomo itínona daide: “Bímiemo ite dáatuni uano, diez dígatuni otímiemo feca,” daide.

25 Mei íadi afémaci aféllaimana daide: “Illaíma ero, bímiemo ja diez dígatuni ite. ¿Nibái mei jíáie úcubena iga?” daide.

26 Jira afe illaíma uai ote: “Mei uáfueza ómoína dáitícue, igámiemo baimo aillo írede. Mei íadi íñegamiemo due ite bairórede.

27 Iemo afe baie cue illaíma íllana óiacañedino, mai bai bené ati. Atiano cue eróicana afémaci tita,” daide.

Jesús Jerusalén jófuego jofa jaide
(Mt 21.1-11; Mr 11.1-11; Jn 12.12-19)

28 Bie izói daina méifodo Jesús nai Jerusalén diné jaide.

29 Ja Betfagé jófuego, íemo Betania jofue díga, afénomo Jesús dúciacade. Afe jofue Olivo idu áinori ite. Afénomo illa llezica ie llófuegamacimona ménamie orede. Iaillinoína daide:

30 —Batí áinori ite duera jófuego ómicoi jai. Dúciillano afénomo cuinaca búrrona cíotiomicoi. Afe búrrono nai buna ráiñena. Zúitano cuemo atíri.

31 Daa come ómicoimo jícanoia “Nibái mei uiga” daiíadi, “Cai Ocuíraíma jítaillano jícala” ómicoi daiíri, —daide.

32 Afe llófuegamaci íaillinoi jaillano nana Jesús íaillinoína daina izói cíozaidiaillinoi.

33 Afe burro íaillinoi zúitaja llezica burro naama jícanote:

—¿Nibái mei búrrona zuitádiomicoi? —daide.

34 Jira afe íaillinoi uai ote:

—Cai Ocuíraíma jítailla, —daide.

35 Afe mei ja Jesumo uitíiaillinoi. Dúciillano afe burro emodo íaíoi íníroína jobédiaíoi. Jóbiano afe emódomo Jesús rainádiaíoi.

36 Afe búrrodo Jesús jailla llezica, ie jáillao comíni íaíoi íníroillaina jobédiaíoi.

37 Olivo daina ídumona ana íaíoi jailla llezica, nana afémiedo jaide Juzíñamuimo ínotino íóbillano caillíoidiaíoi. Daje llezica Juzíñamuimo iere caimátaidiaíoi, mei díga Jesús uaido daina comuídena nauí uícodo cíodiaíoiza.

38 Daidíaíoi:

—Ocuíraíma mámecido bite illaíma caimare iri. Caimare uái illafue monamo íteza. Daje izói Juzíñamuimo ebire ñúefuíaína nitáíreiri, —daiíiaíoi.

39 Iemo afénomo ite comíni cígimo fariseo ímíiaína ite. Afémaci Jesuna daiíiaíoi:

—Llófueraíma, odo jáidínona “Uriño” o daiíri, —daiíiaíoi.

40 Mei íadi Jesús uai ote:

—Ómoína dáitícue, bimaci úriñenia nofíciai riire úrille, —daide.

41 Afe mei afe Jerusalemo ánozilla llezica, afe jófuena cíoillano Jesús eede.

42 Eiano cómemo úrilla izói afe jófuena daide:

—Nífuenuo uái o illífuena iere o onótaacadícue. Birui ñue o illarui. Mei birui afefue ómoimona báinino íteza, aféfuena onónidiomoi.

⁴³ Mei uáfueza fiénidiruillai ómoimo biite. Aféruimo omoi éoidimaci omoi illa onido nágafeniai nofibanillaina izói ómoina cirínoitiaioi. Afe mei ómoiri riire fúiritiaioi.

⁴⁴ Iemo ana éniemo ona dótaítiaioi. Dótano afe jófuemo ite comínina fáitíiaioi. Afe llezica nana afe jofue finoína noficiai ana dócoítiaioi; mei Juzíñamui ómoína caimare uáiduaibillarui onóñediomoiza, —daide.

Jesús Juzíñamuimo gairíraco ráfua izói ñue finode
(Mt 21.12-17; Mr 11.15-19; Jn 2.13-22)

⁴⁵ Jerusalemo ie jofo jailla méfomo, Jesús Juzíñamuimo gairíracomo jofo jáillano afeco eromo ite ráaniai fecádino naa ibárioidinori jino jiude.

⁴⁶ Iaióina daide:

—Jaii Cuegáuaimo daide: “Cue jofo cuemo úrifireillico.” Mei íadi afécona merírifiredino jofo izói finódiomoi, —daide.

⁴⁷ Nágaruillai Jesús afécomo llófuefirede. Mei íadi afe llezica lletáriraini illaini, daje izói ocuica uai llófuetino, naa jofue illáiniri ie íaioi fallino jenódiaioi.

⁴⁸ Mei íadi aféme fállena baiñediaioi, mei nana comini aféme uai iere cacáreidiaioiza.

20

Illáicomini Jesús ócuifirena ríino jicánotiaioi
(Mt 21.23-27; Mr 11.27-33)

¹ Afe mei jáíruido Jesús Juzíñamuimo gairíracomo comini llófue. Afe llezica ñuera jíllona uai afémacimo llote. Daí llua llezica lletáriraini illaini, íemo ocuica uai llófuetino, naa ocuide eicomíniri, afénomo dúcidiaioi.

² Dúciillano Jesuna daidíaioi:

—Nie ríinodo bie ráaniaina finódio áfena cai lloiri. Afe omo ite ríino ¿bu mei omo fecaca? —daidíaioi.

³ Jira Jesús íaioina daide:

—Cuemo omoi jicánua izói ómoimo daafue jicánoitícue. Nee mei cue uai omoi ólleza.

⁴ Mei Juan ¿bu comini báutizallena ocuica? ¿Meita Juzíñamui ocuica? ¿Mei nibai comini ocuica? —daide.

⁵ Mei íadi uai oñeno, áfena dani conímamo júfidotiaioi; daidíaioi:

—¿Nie izói mei dáiticaí? “Juzíñamui ocuica” cai daíadi, Jesús cai uai óite, “¿Nibái mei afémiemo íinoñediomoi?”

⁶ Mei jíáifodo “Comínimona ocuica” cai daiíadi, nana comini nófiena cai njíitíai. Mei afémaci “Juan Juzíñamui dibénedo úrifirede” jaca daiífiredíai.

⁷ Iemona afe illáicomini Jesuna daidíai:

—Juan báutizabillena ocuídímiena onóñedíai, —daidíai.

⁸ Afe jira Jesús íaióina daide:

—Daje izói bie ráaniai cue fínofirena ríino ómoimo llóñeíticue, —daide.

Fiénide tájidino rafue

(Mt 21.33-44; Mr 12.1-11)

⁹ Afe mei Jesús comínimo úrilla llezica bifue íaióimo llote:

—Daa come jíricuena eroide úvaiai rillino finode. Afe mei áfemo tájíitínomo nano íanori iba llínollena fecade. Fécano oni jíáinomo are íllena jaide.

¹⁰ Afe úvaiai llizilla llezica, ie ocuífíregamie orede, náamamo dúide dibene afénomo tájidínomona jícallena. Mei íadi afémiemo íñeno fájano ie orédíai.

¹¹ Ie jira jacafai naama nane jíáie ocuífíregamie orede. Mei íadi nane afémiena icida fatíai. Fájano íñeno fia meine orédíai.

¹² Nane afe mei jacafai naama jíáimie orede, mei íadi afe tájidino afémiena bófiano jino orédíai.

¹³ Iirainomo jacafai naama daide: “¿Níie izói fínoíticue? Cue izíruga jíto óreíticue. Afémaci afémiena cíoillano, níbai afémiena caimare jacírúitíai,” daide.

¹⁴ Mei íadi tájidino afémiena cíoillano, jofo conímaiaina daidíai: “Bímie uire bie énie máíñoítímie. Mai cai falli. Afe mei bímie cáiena jáiteza,” daidíai.

¹⁵ Afe mei jacafai jinomo uillano íena titádíai.

Jira Jesús jícanote:

—Afe jacafai naama bimácina ¿níie izói fínoíte?

¹⁶ Afémie billano afémacimo dúecaíñeno títaite. Afe mei afénie jíáimacimo fécaite, —daide.

Afena cacáillano daidíai:

—¡Afe izói cai ílleza Juzíñamui rairuirí! —daidíai.

¹⁷ Mei íadi Jesús íaióimo érocaillano daide:

—Iemona, afe Juzíñamui Cuegáuaina ¿níie izói llóíacade? Afe uai bie izói daide:

Jofo níraini jámairuillano oni fádoica jáíllirai ja nahí jáílliraina jaide. Bie daína daíacade, comini jámairuillano ruifíruigamie ja ñuera jíca jalleide illáimana jaide.

¹⁸ Afe jámairuiga nofíci maméidímie mo éicitaitímie níne tibérotáite. Iemo jíái afe nofíci anamo jíitafítino jízefo izói jáítíai, —daí Jesús daide.

*Gobierno ibátaga úcube rafue**(Mt 21.45-46; 22.15-22; Mr 12.12-17)*

¹⁹ Afe llezica lletáriraini illaini naa ocuica uai llófuerairi Jesuna llaitáacadaiaoi, mei afémacido bie rafue afémie llúana onódiaioiza. Mei íadi afémaci comínina jacírutiaioi.

²⁰ Ie jira ñúemaci izói macádino Jesumo báinino orédiaioi. Jesuna comeci féillamona fiени úritallena orécaiaioi. Afe fiени ie úrillana cacáillano afémie romano caifóidillaímamo fécaite.

²¹ Jira afémaci Jesumo bie izói jicánotiaioi:

—Llófueraíma, onódicaíza jaca ñue illifue llófuefiredio. Daje izói jaícina ñue úrifiredio. Iemo jino cíoidífuiaido izire jicánoñedio. Mei jíáfodo Juzíñamuimo cai jáillido uáfueña úrifiredio.

²² Caimo llone: ¿Romano jamánomoidillaíma ibátaga úcube ibádicainia ñuera? ¿Ñibai fiénide? —daidíaioi.

²³ Mei íadi íaioi ie facátaacanana Jesús onode. Jira íaioina daide:

—¿Ñibái mei jíitaja izói cue finódiomoi?

²⁴ Daa úcubetuni cuemo ácataibi. Afétunimo ite uiéco jana ¿bu ie? Iemo afétunimo ¿nie come mámeци cúeina? —daide.

Jira ie uai otíaioi:

—Romano jamánomoidillaíma uiéco illa, naa ie mámeци diga, —daidíaioi.

²⁵ Jira Jesús íaioina daide:

—Mei íemona romano jamánomoidillaímamo dúide afémiemo fecari. Iemo daje izói Juzíñamuimo dúide Juzíñamuimo fecari, —daide.

²⁶ Nana afémaci comini cacáicana daina uáillaído ja Jesuna jaca jíitanidiaioi. Mei jíáfodo ie uai úana cacáillano fáigacaidiaioi. Afe mei íaioi uai ollifue iñédeza úriñediaioi.

*Tíide comini meine abido cáaille jicánotiaioi**(Mt 22.23-33; Mr 12.18-27)*

²⁷ Afe mei saduceo ímíai Jesús diné jaide. Afe saduceuai tíidino meine abido cáañeite daífirediaioi. Jira bimaci Jesuna bie izói daidíaioi:

²⁸ —Llófueraíma, Moisés caimo cuetá fiécabemo daide: Daa come ie ai nai úruenide abina tíia, afémie ama ie fecíngona órede, afémie úruiaí ie tíide ama méifomo comúllena.

²⁹ Mei nauí cai cígímo siete diga ámaredimíaina ite. Nanóidimie áireillano nai úruenino tíide.

³⁰ Afe méifoidimie afe fecíngo ote. Ie mei afémie daje izói úruenino tíide.

³¹ Afe mei nane jíáimie daango ote. Uano nai úruenino tíide. Daje izói nana afémie ámatiaí daango uano úruenino tíidiaioi.

³² Íirainomo ja afengo tíilla.

33 Iemona comini tíllano meine abido cáailiruimo, mei siete dígamie afengo óteza, afengo ¿nie ima aina mámeite? — daidíaioi.

34 Ie jira Jesús uai ote:

—Bie éniemo iíñiai áirediaioi. Daje izói ringóniai inírediaioi.

35 Mei íadi uire monamo jáitena mamécano, daje izói tíidinomona meine abido cáaitena mamécano jaca áinitiaioi. Daje izói afénomoma íaioi jíziatiana jíáimamo iníreitañeitiaioi.

36 Mei afénomoma buna tíinideza. Iemona afémaci Juzíñamui abi imáciai izóidiaioi. Tíillanomona meine abido cáailledo Juzíñamui jítotiaina ja mamécaiaioi.

37 Jaiai Moisés illafue ciegánicomo Juzíñamui tíidino meine abido cáailana caina onótate. Moisés boode rarócina ciona llezica afe bóodemona Juzíñamui daide: “Dáaruído Abraham Juzíñamuidicue naa Isaac Jacob diga,” mei afémaci Juzíñamui illánomo cáadiaioiza.

38 Mei uáfueza, Juzíñamui tíidino íeñede, mei jíáifodo cáadino ie. Mei uáfueza, Juzíñamui eróicana nana cáadiaioiza, —daide.

39 Iemona ocuica uai llófueraimomona dáarie daidíaioi:

—Llófueraima, ¡ñue daidio! —daidíaioi.

40 Afe baimo Jesús facátalle uaina baiñédiaioi.

Cristo ie nano comuídimie ¿bu?

(Mt 22.41-46; Mr 12.35-37)

41 Afe mei Jesús íaioina daide:

—¿Nibái mei Crístona David jíto dáiiifirena?

42 Mei afe David Salmos rabénicomo dáideza:

Monamo ite cai Moo Juzíñamui cue Ocuíraimana daide:

“Bené cue nabézimo ráii;

43 ona éoidino cue anáfenolle dino.”

44 ¿Mei nie izói Cristo David jíto? Mei afe David afémiena ie Ocuífiredimiena mamédeza, —daide.

Jesús ocuica uai llófuefiredinomoma fíenidifue nitade

(Mt 23.1-36; Mr 12.38-40; Lc 11.37-54)

45 Nana comini cacáicana Jesús ie llófuegamacina daide:

46 —Ocuica uai llófuefiredinomoma abí omoi rairuiri. Afémaci “jácimacídicaí” daíllena áreroi jítaírediaioi. Afémaci gairíranomoma jíadi, iere caimare uáiduana gáidiaioi. Afe izói Juzíñamuimo llófuefiracomo ñuera ráiiranuai jénofirediaioi. Daje izói iráizillafue fínua llezica jénofirediaioi.

47 Daje llezica fecíngotiai jofona báirofirediaioi. Afémaci comini cóicana ñuémacina daíllena, are Juzíñamuimo úrifirediaioi. Afémaci jíáimaci duere finolle baimo duere finólliaioi, —daide.

21

*Dúerede fecingo Juzíñamuimo úcube fecade
(Mr 12.41-44)*

¹ Jesús Juzíñamuimo gairíracomo illa llezica, aillo ráaredino Juzíñamuimo dúide úcube jóoneranomo úcube dótana ciode.

² Afe llezica dúerede fecingo cobre finoína mena úcubetuni dótajana Jesús ciode.

³ Cíoillano daide:

—Uáfúena ómoína dáitícue, bie dúerede fecingo nana jíaimaci baímo dotade.

⁴ Mei nana afémaci íaioimo fiébide úcubemona dotádiaioi. Mei íadi bie fecingo dúerede íadi nana aféngomo ite güille íballe úcube dotade, —daide.

*Jesús Juzíñamuimo gairíraco niné táinocaite, daide
(Mt 24.1-2; Mr 13.1-2)*

⁵ Comínimona dáarie Juzíñamuimo gairíraco ero ebire cíoina llotíaioi. Daje izói afécomo ite nofíciai finoína ebire cíoina llotíaioi. Afe izói afécomo fia fecaca ebírede ráaniai llotíaioi. Afe jira Jesús daide:

⁶ —Nana bie omoi ciona ebire eróidinuíai uire dáaruído niné táinoficaite. Bico ero ñuera nofítotíai illa dígatofíai oni eneno júdaizite, —daide.

*Enie fúiacana cai onóillena lloga uai
(Mt 24.3-28; Mr 13.3-23)*

⁷ Jira Jesumo jícanotíaioi:

—Llófueraíma, o lloga bífuíai ¿ñíruído íite? Bífue zúille uícodo cai onóille raa, ¿nie izói íite? —daidíaioi.

⁸ Jira Jesús daide:

—Omoi jífuefiza abí omoi rairuiri. Mei afe llezica díga “Cue bie Crístodícue” dáitino bíitíaioiza. Afe izói “Ja biruí aferuí” dáitíaioi. Mei íadi afémaci llógamo íinoñeno iri.

⁹ Comíni jóbairillana omoi cacáíadi áferi jacínaiñeno iri. Daje izói jíáie comíni íaioi illaíma uáitano jíáimíena méidoiacanari jacínaiñeno iri. Mei uícodo daí íredeza, mei íadi íraírui nai dúciñedeza.

¹⁰ Iemo Jesús nai úrioicaide:

—Daa nairai jíáie nairai díga fúiritíaioi. Daje izói daa zie jíáizie díga jóbairítiaioi.

¹¹ Afe llezica díga ígobíaido énie iere riire docáirite. Daje izói aillo nairai júbietaitíaioi, íemo jíái aillo comíni dáagoberiedo dúicotaitíaioi. Aféruído monamo aillo cai jacínaitaite raa cíocaite, naa énie fülle joréñuairi.

¹² Mei íadi nana bífuíai jino déiacana uícodo, fiéni finóllena ómoína lláitaitíaioi. Daje izói ómoína rácaítiaioi. Iemo

Juziñamui uai llorácomo ómoína uillano riire jicánodoitiaioi. Iemo ómoína llavéracomo íbaitiaioi. Afe llezica cuemo omoi jainaina jira, jamánomoidillaini naa jabóidillaini uícomo ómoína úitiaioi.

13 Daií omoi íaioi uilla llezica cuedo afémacimo ñue úritiomoi.

14 Abí omoi riidolle uaimo uícodo omoi comécillena riire mamériñoeno iri;

15 mei aféruimo afémaci uaillai omoi olle uaina ómoimo llóiticueza. Afe llezica ómoína ráfuenta ñue baitátaiticue. Afemona omoi éoidino ómoína jaca uáitanidiaioi.

16 Mei íadi aféruimo omoi onóigamací Crístomo omoi íinua jira ómoína duere finóllena jíáimacimo izájitiaioi. Daje izóí omoi ámatiaí Crístomo omoi íinua jira ómoína fécaitiaioi, íemo omoi móotiaí dáafuedo ómoína fécaitiaioi, daje izóí jíái omoi nabáíñiaí dáafuedo ómoína fécaitiaioi. Omoimona dáarie títaitiaioi.

17 Aféruído nana nairai cue ícoiniadi ómoína éoitiaioi.

18 Mei íadi omoi ifótiraiaimona, daa táinomo báíñeite.

19 Iemo fáicanocaiñoeno omoi ínoiadi, zííñona cáallinona máíñoitiomoi.

20 Jerusalén jofue fuiríraíni nágafene afeno cirínoia, áfena cíoiillano, áfedo raire táinocaillena ónoitiomoi.

21 Afe jira afe llezica Judea éniemo itínuaí caifóneduaimo botárediaioi. Daje llezica Jerusalemo itínuaí afénomona oni jica jáirediaioi. Iemo jacáfaimo itino meine abido afe jófueмо jáinidiaioi.

22 Mei afe comini duere finólliruimo ja dúcidez. Aféruillaído nana jaiaí Juziñamui Cuegáuai ícoimo ñue fuitárede.

23 Afe llezica namóciredingotiaina ¡Ñi dúerena! Daje izóí monoi jirode úruena llíidingotiaina ¡Ñi dúerena! Mei aféruillaído afénomo aillo izi cácaitiaioi. Afe énie comini jamánomo duere finólliaioi.

24 Afémacimona jíáimací jóbairillanomo tíitiaioi. Iemo jíáimací nana nairai illánomo íaioína llavétaitiaioi. Juziñamui mamécaruillai dieze, jicánemací Jerusalén anáfenuano júdaítiaioi. Afe mamécaruillai fuille dino afe jófuenta fieni fínoitiaioi.

*Nanoide Fima Jitó Cristo billirui ñue izoite
(Mt 24.29-35, 42-44; Mr 13.24-37)*

25 Afe mei jitómamo, fiuimo, naa úcuairi jacírede raa jánaniaí cíocaite. Afe llezica náiraiaí comeci faça mamérilla uaillai niné féite. Iemo monáillaji ficire báguari jacínaitiaioi.

26 Bíníemo comuízaide raamo comécíillano iere jacínaitiaioi. Ie jacínailamona tíidino izóí íficaitiaioi. Mei afe llezica nana monamo itínuiái riire mozóide ráaniai niráiricaiteza.

27 Afe mei Nanoide fima Jitó Crístona cíoitiaioi. Afémie íemo ite ríino naa dama íemo ite ebíredífuiairi uílliedo ana bite.

28 Bífuiái jino zuílle llezica, ñue omoi mamériri; íocire omoi érocairi. Mei íanori íllamona omoi jíllotalliomoi, —daide.

29 Daje izóí nane bie aménamo mamécafue Jesús íaioimo llote:

—Higuera daina aménamo comeci omoi facari. Daje izóí nana jíaíe aménamo omoi comécíiri.

30 Iaioi íbiai firuállana omoi cíónia, “Ja fimona áinozide” daiírediomoi.

31 Afe izóí bífuiái zuíllana omoi cíónamona, “Juzíñamui illáimana billirui ja áinozide,” daiírediomoi.

32 Uáfueña ómoína dáitícue, bigímaiaí naí tííñeille llezica nana bie raa jino zúite.

33 Mona énie díga fúite, mei íadi cue uaillai jaca fúíñeite. Cue lloga raa nana zúite.

34 Omoi comeci rírelleza abí omoi rairuiri. Mei iere aillo güiacanamona come comeci riire jáite, daje izóí jífáifirenmona. Daje izóí dani omoi abí ífue níciduamona come comeci riire jáite. Jira cue billíruimo omoi jácinaíñelleza áfena abí omoi rairuiri.

35 Mei rille jíitafirena raa ónonino jíitaja izóí, afe izóí aferui nana énie comínina jíitaiteza.

36 Jica ia mai ñue omoi finóbiri. Jaca fáicanocaiñeno Juzíñamuimo omoi úrifireiri, afe nana bie zúitífuiaimona omoi jíllóillena. Daje izóí Nanoide fima Jitó uícomo meáiruíñeno omoi náidaillena, jaca Juzíñamuimo úrifireillano, jica ia ñue omoi finóbiri, —daide.

37 Jesús monari Juzíñamuimo gairíracomo llófuefirede. Afe mei naio, Olivos daina ídumo íniaífirede.

38 Nana comíni afémie llófuiana cacáreillena nágarui raire jíitramo bífirediaioi.

22

Jesús llaitállena maméritiaioi

(Mt 26.1-5, 14-16; Mr 14.1-2, 10-11; Jn 11.45-53)

1 Fáitañeno pan güífirena rafue ja áinozide. Afe rafue jíaífodo mameína pascua rafue.

2 Iemo lletáriraini illaini naa ocuica uai llófuetinori Jesús fállena jenódiaioi, mei afe llezica comínina jacíruitiaioiza.

³ Iemo aféruído Taife Judas Iscariótemo jofo jaide. Afe Judas doce dígade Jesús orécamacimona dáamie.

⁴ Afe bímie lletáriraini illáinimo naa gairáraco ocuúdinomo Jesús íaioimo fecállena llujáide.

⁵ Afena cacáillano ióbidiaioi. Iemona, “Ucubena o íbaiticai” daidíai.

⁶ Iemona ie íaioi íbaja úcube llínote. Iemo Judas aféruimona comini figo iñena llezica Jesús íaioimo izájillena jenode.

Cai Ocuúraima íraicaiño güillafue

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Ja fáitañega pan güilláruimo dúcide. Afe llezica aféruimo pascua íena ovejai fáfirega.

⁸ Jira Jesús Pedro, Juan íaillinoína ocuide; daide:

—Mai pascuamo güífiréna izói uícomo ómicoi finori, —daide.

⁹ Jira afémiemo jicánotiailinoi:

—Afena ¿ninomo finuaitcoco? ¿Ninomo áfena güíacadi? —daide.

¹⁰ Jesús íaillinoína daide:

—Batí jófuemo ómicoi jaille llezica, icírudo jainoi uitímie cíotiomicoi. Afémiedo jairi. Afe mei afémie jofo jáillicomo jofo ómicoi jai.

¹¹ Aféno mo afe jofo náamana ómicoi daiíri, “Cai Ocuúraima ona daide: Cue güillico ¿ninomo ite? Afécomo cue llófuegamaciri páscuamo güífiréna izói güíticue.”

¹² Afe mei afémie caifóidibanimó ite áillocona ácatate. Afeco ero ja ñue finóbide, afécomo cai güille finori, —daide.

¹³ Iemona afe íaillinoi jaillano, nana Jesús íaillinoína daina cíozaidiaillinoi. Iemona aféno mo pascua rafue ana güífiréna izói, güille finódiaillinoi.

¹⁴ Ja nauízaidemo güizájilla llezica Jesús naa ie oréllinori dáanomo ráizitiaioi.

¹⁵ Afe llezica Jesús íaioína daide:

—Nai cue tíñena llezica bie pascua ana güífiréna izói omoi diga iere güíacadicue.

¹⁶ Mei ómoína dáitícue, bie ie rafue dáanomo meine güíñeíticue. Bie rafue Juzíñamui illáimana illáruimo bíñeille dino güíñeíticue, —daide.

¹⁷ Daií daina mei jiróraco llínota Juzíñamuina “Iere figura” daide. Afe mei íaioína daide:

—Bie llínota, conímamo omoi fecari,

¹⁸ mei ómoína dáitícue, Juzíñamui illáimana illáruui nai dúciñena dino, nane dáanomo uva íjina jaca jíroñeíticue, —daide.

19 Afe mei pan llínota, Juzíñamuina “Iere figura” daide. Daií dainano afe pan ditade. Pan dítano afémacido fecade. Afe llezica daide:

—Bie cue abiza. Tíillinomo fecálicue omoi ñue íllena. Cuemo omoi úbicaifireíllena bie izói omoi finófireiri.

20 Daje izói güilla fuilla mei jiróraco llínota, íaioimo fécajano daide:

—Bie jiróraco eromo ite iji Juzíñamui ómoiena mameca cómue uai ómoína onótaite. Afe ie mameca cómue uai, uafue daiíllena cue die totálleza, mei cue die omoi ñue íllena totálleza.

21 Mei íadi cue fécaitimie birui benó cue diga güite.

22 Mei jii, Nanoide íima Jitó Crístodicueza, jaiái úcodo cuemo mameca iodo jáitícue. Mei íadi cue fécaitimie, jnií dúerena! —daide.

23 Afe jira conímána daidíaioi:

—¿Cáimona bu mei ie fecalle? —daidíaioi.

Conímamo jamánomoidimie júfidotiaioi

24 Afe mei dani afémaci cígimona nímie jamánomoidimiena daina júfidotiaioi.

25 Mei íadi Jesús íaioína daide:

—Nairai illaini íaioi anamo itínona riire ocuífirediaioi. Daje izói íaioi ocuídínona, jáímaci “Omoi ñue finódino” daiífirediaioi.

26 Mei íadi omoi afe izói íñeno iri. Mei jáífodo omoi cígimo ite jamánomoidimie, afémie jáímaci baímo jamáimiena írede. Daje izói ómoimona ocuífiredimie jáímacina canófredimiena írede.

27 Bífuomo omoi coméciri. Dáamie güirábanimo güíllena ráina llezica, jáímie güille bai atífiredé. Afe íaillinoimona ¿bu mei iere jamánomoina? Mei uáfueza, güirábanimo ráiidimie jamánomoina. Mei íadi cue omoi cígiri ocuífiredimie tájifiredimie izói ítícue.

28 Comini fieni cue facátáfirena llezica jaca cue diga ífirediomoi.

29 Ie jira cue Moo illáimana illánona cuemo illa izói, afe izói ómoimo ítícue.

30 Afena ómoimo ítícue, cue illáimana illánomo cue diga omoi güíllena. Daje izói afe llezica afénomo illaíma ráíranomo ómoína ráínaitícue, doce dígade Israel náíraímo izire omoi jicánollena, —daide.

Jesús Pedro ie jáanollena úcodo llote

(Mt 26.31-35; Mr 14.27-31; Jn 13.36-38)

31 Ocuíraíma Jesús nane daide:

—Simón cácarei. Taife ona facátaiacade. Comini magai izilla izói ona izíacade.

³² Mei íadi Juziñamuimo ja jicádícue Juziñamuimo o ínua féitañeilla. Iemo afe facátainamona abido o bille méifodo, o ámatiai canori, íaiói ínogafuena íaiói fáicanocaiñeilla, —daide.

³³ Iemona Simón Jesuna daide:

—Cue Ocuíraima, llavéracomo o diga cue jáilla ja finóbídicue. Daje izói afénomo o diga cue tilla ja mamériticue, —daide.

³⁴ Jira Jesús íena daide:

—Pedro, birui ona dáitícue, átava nai úriñena llezica daacaiñoámani, cuena jáanoitio, —daide.

Jesús facátalle hora ja ánozide

³⁵ Afe mei Jesús ie llófuegamacimo jicánote:

—Nauí ómoína cue ória llezica, ipécona uiñeno, daje izói úcubena uiñeno, íemo jíái eiba icona uiñeno, fia omoi jairi, daidícue. Aféruimo ¿minica ómoimo nai iñena? —daide.

Jira afémaci daidíaiói:

—Aféruimo ja nana ñue ite, —daidíaiói.

³⁶ Iemona Jesús íaióina daide:

—Mei birui jíáfodo daidícue. Ipécoredimie mai áfena ui. Daje izói úcuberedimie úcubena ui. Iemo jíái lloéfainidimie íemo ite iniroi fécajano afe íbado lloefai oíri.

³⁷ Mei Juziñamui Cuegáuaimo lloga cuemo ñue ícoimo fuitáredeza. Be níuui: “Fiénidimaci cígimo cuena mamédiaiói.” Mei uáfueza, nana cue dibénedo cúegana ñue ícoimo fuitárede, —daide.

³⁸ Iemona afémaci daidíaiói:

—Cai Ocuíraima, caimo mena lloefai ite, —daidíaiói.

Afémie uai ote:

—Jadie ja figo baite, —daide.

Jesús Getsemanímo Juziñamuimo úrite

(Mt 26.36-46; Mr 14.32-42)

³⁹ Afe mei Jesús oni jaide. Ie jáifirena izói Olivos ídumo jaide. Afe llezica ie llófuegamaci afémie diga jáidiaiói.

⁴⁰ Ie jáillanomo dúcillano daide:

—Fiénidífue mo omoi báíñeilleza Juziñamuimo úrifireiri, —daide.

⁴¹ Afe mei Jesús comini nofici bai nitáfirena dino afémacimona oni jaide. Afénomo Juziñamuimo jicállena ana dújude.

⁴² Daide:

—Moo, o comeci jítaíadi, bie duere cue zefuállifue mona cue jíllotari. Mei íadi cue comeci jítaina izói finóñeno iri, mei jíáfodo o comeci daína izói finori, —daide.

43 Afe llezica Juzíñamui abi ímie monámona Jesumo cíocaide; afémie Jesuna mairítaibite.

44 Iemo Jesús ie comeci jamánomo zúurena llezica, afémie Juzíñamuimo iere riire jicade. Afemona iere uzínaila izói ie abi úllie iere jino bite. Afe jino bite úllie ie die izoide. Afeji ana éniemo llocode.

45 Juzíñamuimo ie jícaja fuilla mei, afémie ie llófuegamaci diné jaide. Inídiaioina cíozabite, mei zuufue inítagaiaioi.

46 Jira íaioina daide:

—¿Nibái mei inídiomoi? Fiénidifuemo omoi báiiñelleza cazillano Juzíñamuimo úrifireiri, —daide.

Jesús llaitada uitíaioi

(Mt 26.47-56; Mr 14.43-50; Jn 18.2-11)

47 Jesús nai úrioidemo aillo comini dúcidiaioi. Afe doce dígadínomona Júdasna mámeciredimie bitino ifode. Ainozillano afémie Jesús ñitade.

48 Jira Jesús afémiena daide:

—Judas, ¿Nanoide Hima Jitó o ñítafuedo fécaibitio? —daide.

49 Jesús abimo itino áfena cíóillano jicánotiaioi:

—Cai Ocuíraima, ¿bimaci diga lloéfaido fúiriticai? —daide.

50 Afe llezica afémacimona dáamie lletáriraini caifóidillaíma ocuífirégamie bofede. Ie jefo nabefo ñetade.

51 Jira Jesús daide:

—Dama íteza. Mai fáicanocai, —daide.

Iemona Jesús afe jefona ñetácamié jefo jetánote. Afena afémie jacáitate.

52 Afe mei Jesús lletáriraini illaini naa gairíraco ocuídino, naa ie lláitaibite éinamacina daide:

—¿Mei nibái merírifiredimedicue izói lloéfaillairi, naa bigíniari cuena lláitaibitioi?

53 Naui nágaruillaido Juzíñamuimo gairíracomo omoi cue llófuefirena llezica, jaca cuena jetáñediomoi. Mei íadi birui omoi jitaica raa finóllirui. Naio comini ibaila izói, ja birui Taife bínie náamatade, —daide.

Pedro Jesuna jáanote

(Mt 26.57-58, 69-75; Mr 14.53-54, 66-72; Jn 18.12-18, 25-27)

54 Iemona Jesús llaitada, lletáriraini caifóidillaíma jofomo uitíaioi. Afe llezica Pedro bai jicado jaide.

55 Afénomo afeco cigi ibírimo irai bonódiaioi. Aférimo agáidiaioi. Iemo Pedro afémaci cigimo agáizaide.

56 Iemo afénomo ite ócuífiréango irai fuemo Pedro ráinana ciode. Afe mei afengo daide:

—Bímie jaca Jesús diga ífirede, —daide.

57 Mei íadi Pedro jáanuano daide:

—Afémiena onóñedicue, —daide.

⁵⁸ Afe mei íanori íllamona jíáimie íena cióillano daide:

—O bie afémaci iéδιο, —daide.

Mei íadi Pedro daide:

—Íeñede; cue bie afémaci ímieñedicue, —daide.

⁵⁹ Afe mei jabo are íllamona da hora fidi jíáimie riire daide:

—Uáfueza. Bímie afémie diga ífirede mei afémie daje izói Galilea ímieza, —daide.

⁶⁰ Jira Pedro daide:

—O úrillana onóñedicue. ¿Mínica llotio? —daide.

Ja Pedro úrioidemo átava úrite.

⁶¹ Iemona Jesús Pédro mo érocaide. Afe llezica Pedro afémiena daináfue mo uíbicaide. Be níuui: “Atava nai úriñena llezica dacaíñoámani cuena jáanoítio.”

⁶² Afemona Pedro jino jaillano zuure eede.

Jesús jífánodoidiaioi

(Mt 26.67-68; Mr 14.65)

⁶³ Jesús llaítada úiñotino afémiena jífánodoiano razido íena fatíaioi.

⁶⁴ Daje llezica ie ui íbáillano, ie uíeco fátano daidíaioi:

—¿Bu o faaja? ¡Onóillano jino llone! —daidíaioi.

⁶⁵ Afe llezica diga jíáifuiaido íena báíñotiaioi.

Dáanomo gairide illáicomini uícomo Jesús uitíaioi

(Mt 26.59-66; Mr 14.55-64; Jn 18.19-24)

⁶⁶ Ja mona monáidemo judíuai éicomini, naa lletáriraini illaini, naa ocuica uai llófuetinori dáanomo gairídiaioi. Afe gairítaga illáicomini “Junta Suprema” dainámaci. Afénomo Jesús uillano, jícánotiaioi:

⁶⁷ —Caímo llone, ¿o meita Crístodio? —daidíaioi.

Jira afémie uai ote:

—Afena jíi daidícuenia, cuemo íinoñeitiomoi.

⁶⁸ Daje izói jíáífue ómoímo cue jícánoia, ibana uai óñeitiomoi. Afe izói cuena zúitañeitiomoi.

⁶⁹ Mei íadi benómona Nanoide íima Jitó Cristo jamánomo ríinorede Juzíñamui nabézimo ráinaite, —daide.

⁷⁰ Afe mei nane afémiemo jícánotiaioi:

—¿Meita o Juzíñamui Jitódio? —daidíaioi.

Jira Jesús íaioi uai ote:

—Jíi, dani omoi daina izói níimiedicue, —daide.

⁷¹ Iemona afémaci daidíaioi:

—Ja jíáie uai nábatinona jítaíñedicaí. Cai bie dama ie fuémona ie fieni úrillana cacádicaí, —daidíaioi.

23

Pilato uícomo Jesús uitíai

(Mt 27.1-2, 11-14; Mr 15.1-5; Jn 18.28-38)

¹ Iemona nana náidacaillano Jesús Pilátomo uitíai.

² Afénomo diga fiénidifuiai íemo jónetiaioi. Daidíai:

—Bímie cai comínimo icírafue comúitajana ciódicai. Iemona comíni áferi faillíñaicaidiaioi. Afémie “Romano jamánomoidillaíma ibátaga úcube ibánidicai,” daide. Afe llezica afémie “Illáíma Crístodicue” daiífiredede, —daidíai.

³ Jira Pilato afémiemo jicánote:

—¿Meita o judíuai Illáímana? —daide.

Jira Jesús uai ote:

—O daína izói, jii níimiedicue, —daide.

⁴ Iemona Pilato lletáriraini illáinina, naa comíniri daide:

—Bie cómemo fiénidifuena baiñédicue, —daide.

⁵ Mei íadi dáanomo riire daidíai:

—Nana Judea comínimo ie llófueinafuiaido icírafue íaiiemo comúitate. Fueñe Galilea éniemo daií finode, íemo birui cai éniemo nágagobiaido daje izói finode, —daidíai.

Herodes uícomo Jesús uitíai

⁶ Jesús nauí Galiléamo llófueoinafuena Pilato cacáillano, jicánote:

—¿Bie íima Galilea ímie? —daide.

⁷ Comíni daií daidíaiiemo, Heródesmo íena orede, mei afémie Galilea illáímana. Aféruillaído Herodes Jerusalemote.

⁸ Herodes Jesuna cióillano iere ióbicaide. Jaíai ninomo íena cióiacade. Comíni Jesudo dáinana Herodes cacáfirede. Iemona Jesús daa ciórainina raa fínuana Herodes cióacade.

⁹ Iemo Herodes diga icaiño diga ráfuiai íemo jicájicanode. Mei íadi Jesús jaca uaina oñede.

¹⁰ Dáanomo lletáriraini illáini ocúicafue llófuerainiri itíai. Bimaci Jesumo fiénidifuiai riire jónetiaioi.

¹¹ Iemona Herodes ie fuíríraini diga Jesuna ja jámairuitiaioi; iere íena áifedotiaioi. Afe mei ebírede illáima iníroina íemo jítadíai; jítamona daií afémie jifánodoidiaioi. Afe meífomo Herodes dáanomo Jesuna Pilátomo orede.

¹² Aféruído Pilato Herodes diga daje nabaina mameide. Jaíai uícodo are conímana éoidiaillinoi.

Jesús titállena mamédiaioi

(Mt 27.15-26; Mr 15.6-15; Jn 18.39-19.16)

¹³ Afe jira Pilato lletáriraini illáini, íemo ríimaci naa comíni dáanomo gairítano daide:

¹⁴ —Bie omoi lloga comínimo icírafue comúitatimie. Mei íadi omoi cacáicana izire íena jicánoticue. Jicánuamona ie fiene

finócafueña baiñédicue. Afena cacádiomoi. Daje izói afémiemo omoi nitaca fiénidifuiái cíoñedicue.

15 Daje izói Herodes níifueña cíoñenano afémie abido cuemo orede. Ja ciódiomoiza, bímie titállena iñede.

16 Afémiena zechétaiticue. Afe mei afémiena zuitada jino óreiticue, —daide.

17 Afe rafue ana comini cáimacaitallena, Pilato daa llavécamierna zuitáfirede.

18 Mei íadi nana comini dájena riire daidíaiói:

—Bie Cristo oni jica titálleza. Barrabás caimo zuitari, — daidíaiói.

19 Naui afe Barrabás llavéracomo llavédiaíói, mei afémie jofue comini uáitajano jiáie illaíma jóoneacade. Afe llezica afémie jiáimana ie tita ícoínia llavédiaíói.

20 Pilato Jesuna zuitáacade. Iemona dane dáanomo íaióimo úrite.

21 Mei íadi afémaci riire daidíaiói:

—¡Cruzmo ie coraí! ¡Cruzmo ie coraí! —daidíaiói.

22 Ja dacaiñoámani Pilato íaióina daide:

—¿Nibái mei ie titaiticue? ¿Afémie níié fiénidifue finode? Ie cue titalle fiénidifueña íemo baiñédicue. Afémiena zechétaiticue. Afe mei afémiena zuitada jino óreiticue, — daide.

23 Mei íadi afémaci Jesús coráillena riirerie jicádiaíói. Jamánomo riirerie íaiói jícajamona, íaiói jitaica otíaíói.

24 Íaiói jícajana are illa ícoínia Pilato fairíote.

25 Afe jira nana llavécanuiaímona afe nízeza Barrabás Pilato zuitade. Afe Barrabás illaíma uáitano jiáillaíma jóoneacana ícoínia íena llavédiaíói. Afe izói jiáíma ie tita ícoínia, llavédiaíói. Mei íadi Pilato afe comini jitailla izói Jesuna fecade.

Jesús cruzmo coráidiaíói

(Mt 27.32-44; Mr 15.21-32; Jn 19.17-27)

26 Jesús íaiói coráiaílla llezica Cirene énie ímie Simona llaitádiaíói; Jesús uiga cruz íena uitátatiaíói. Afémie jino jacáfaimona jófuemo bite. Jira Jesús rocaca cruz Jesús óodana uitátatiaíói.

27 Afe llezica diga comini afémie óodana jáidiaíói. Daje izói diga ringóniaí afémieri zúucaillano éecana jáidiaíói.

28 Mei íadi Jesús aféngotiaímo érocaillano daide:

—Jerusalén ringóniaí, mai cueri éeñeno iri. Mei jiáífodo dani omoi abiri eeri. Daje izói dani omoi úruiaímo eeri.

29 Mei jamánomo zúurediruillaímo dúciitiaíoiiza. Aféruimo bie izói dáitiaíói: “Uruena comuítañedingotiaí, jnií caimare illa! Daje izói úruenidingotiaí, jnií caimare illa! Afe izói úrue mónoína jirótañedingotiaí, nií caimare itíaíói.”

³⁰ Aféruimo comini caifóneduaina dáititaiói: “Cai emódomo jaíri,” dáititaiói. Afe izói duera íduaina dáititaiói: “Cai retáidori” dáititaiói.

³¹ Mei birui nífunidimiedicue ia bie izói duere cuena finódiaói. Iemona jaíruido fiénidino cue duere zefuilla baimo duere finólliaói, —daide.

³² Afe llezica mena come, comini fáfiredino Jesús diga daane coráillena uitíaiói.

³³ Calavera maméidinomo dúcillano Jesús coráidiaói. Daje llezica afe mena fiénidimie íaillinoi, dáamie Jesús nabézimo, jaíamie ie jarífezimo coráidiaói.

³⁴ Ie íaiói coraina llezica Jesús daide:

—Moo, íaiói fiéni finócafue iba oñeno iri; abina onóñediaói daií ñíaza, —daide.

Afe mei fuiríraini onótaraji dotádiaói Jesús iniroi áfedo dani íaiói maiñóllena.

³⁵ Afénomo ite comini acáritiaói. Afémaci naa nairai imaci illáicomíniri afémie áifeduardaídíaói:

—Jaíamana jíllotafiredioza, ua o Cristo o íadi, daje izói Juzíñamui nizécamiéna o íadi, daje izói Juzíñamui mai o abi jíllota, —daídíaói.

³⁶ Daje izói fuiríraini íena áifedodiaói. Ainozillano rochíredijina, figóñede vino íena jirótatíaiói.

³⁷ Jirótano daídíaói:

—Judíuai Illaíma o íadi o abi jíllota, —daídíaói.

³⁸ Ie ifo acónimo cuezábici jae jóonega. Afébici dazieámani uai cúeina: griego, íemo latín, íemo hebreo diga. Afébicimo daide: “Bímie Judíuai Illaíma.”

³⁹ Coraíca fiénide íaillinoimona dáamie Jesús uáitano daide:

—Crístona o íadi, mai o abi jíllota coco diga, —daide.

⁴⁰ Mei íadi jaíamie ie nabáimie llétajano daide:

—¿Nibái mei Juzíñamuina o jacíruiñedio? Daje duere finóinafue anamo itíioza.

⁴¹ Coco aillo finócafue ite. Jira dúere finóbicococo. Coco finoca fiénidifue iba ua otíaói. Mei íadi bie íima fiénidifuena finóñede.

⁴² Jira uáitañedimie Jesuna daide:

—Jesús, o illáimana illíruimo o dúciadi cuemo úbicairi, —daide.

⁴³ Jira Jesús uai ote:

—Uáfueña ona dáitícue, ja birui cue diga ñue ebíredinomo íitio, —daide.

Jesús tíilla

(Mt 27.45-56; Mr 15.33-41; Jn 19.28-30)

⁴⁴ Ja jítoma jaíciri illa llezica nániéna nauíbicaide. Afe nauilla are ite. Ua jítoma arífemona ana ítemo llícaide.

45 Afe llezica jitoma ui duide. Jítireficaide. Daje llezica gairíracomo fetácaroi caifona ana eróicana dáafenedo daingo cúajicaide.

46 Afe mei Jesús ficire caillide:

—Moo, cue joreño omo cue ígaza, —daide.

Daií dainano tíide.

47 Romano illaíma afe íficaidifue cióillanona Juzíñamuimo caimátaide. Daide:

—Uáfueza. Bímie jaca níffuenidímie, —daide.

48 Daje izói nana afénomo ite comini bie íficaidifuea cióillano afénomona íaioi jófuemo jamánomo zuure jáidiaioi.

49 Mei íadi nana Jesús onóigamací aféfuiaimo jicana acáritiaioi. Daje izói Galiléamona Jesudo jaide ringóniai jicana acáritiaioi.

Jesús raitíaioi

(Mt 27.57-61; Mr 15.42-47; Jn 19.38-42)

50 Judea éniemo ite Arimatea jofue ímie José afénomo ite. Afémie ñue comeci jaícina jóidímie. Afe José judíuai ocuide illáicomínimo jainaide.

51 Afe bie José Juzíñamui illáimana illíruimo ocuírifírede. Afe jira afémie jáíe judíuai ocuide illáicomini finócana jíeruñede.

52 Ie jira afémie Jesús abi Pilátomo jícajide.

53 Afémie Jesús abi crúzmona ana uano áillue iníroina junide. Junilla mei, idu anamo nofícimo finócaojimo afémie Jesús raite. Aféfomo nai buna ráiñena.

54 Nana bífuiai viernes nauife dibénedo zuíde. Jaca uícodo víernemo ocózinai llaruimo jitaica raana fínofírediaioi.

55 Afe Galiléamona Jesudo bite ringóniai Jesús ráinano éroizaidiaioi. Afe llezica ie abi tíide bíinana ciódiaioi.

56 Aféngotiai meine jofomo jaillano, zióredijí, naa abi bíraniairi finódiaioi. Afe mei ocózinai llaruimo ocuica uai daina izói ocózinaidiaioi.

24

Jesús tíillanomona meine cáadimiena jaide

(Mt 28.1-10; Mr 16.1-8; Jn 20.1-10)

1 Semana nanóidiruido afe ringóniai raire jítiramo Jesús raiafo éroizaidiaioi. Iaioi finoca zióredijillaí uitíaioi. Iemo jáíe ringóniai íaioina nabáidiaioi.

2 Afe ringóniai afénomo dúcidiaioimo, raiafo ibailla nofici nano illa izói iñede. Oni eneno jóonega.

3 Aféfomo jofo jáidiaioi, mei íadi jofo jáidiaioimo cai Ocuíraima Jesús abi cióñediaioi.

4 Afemona iere jacínaitiaioi. “¿Ñiie izói íiticaí?” daidíaiioi. Daií íaiioi daína llezica mena iima aféngotiai áinori naidáinana ciódiaioi. Afe íaillinoi quenírede iniroi jitádiaillinoi.

5 Afe íaillinoina cióillano, iere jacínaitiaioi. Jacínaimonana ana éniemo bíjicaidiaioi. Iaiioi bíjicailla llezica afe íaillinoi aféngotiaina daide:

—¿Ñibái mei cáadimie tíidino cigido jenódiomoi?

6 Afémie ja benó iñede. Ja meine cáadimiena jáideza. Naui Galiléamo ie illa llezica, ómoína ie daína uaimo uíbicaíri.

7 Afénomo afémie bie izói ómoína daide: “Nanoide iima Jitó Cristo fiénide comínimo fecalle. Afémiena cruzmo córaitiaioi. Iemo daruíamani íllemona meine abído cáadimiena jáite,” — daidíiaillinoi.

8 Afemona aféngotiai Jesús íaioina daíífirena uaimo uíbicaidiaioi.

9 Afe mei raíáfomona meine bitíaiioi. Billano nana bífuiái once dígade llófuegamacimo llotíaioi. Daje izói jíáimacimo llotíaioi.

10 Bífuiái llocana uitíngotiai mámeciaí be ñiie: Magdalena énie ingo María, íemo Juana, íemo Santiago ei María, naa jíáie ringóniaíri.

11 Mei íadi aféngotiai íaioina daínana uáiritaidino úrilla izói cacaide. Jira aféngotiai llógana íñoñediaioi.

12 Iemo Pedro íñoñede íadi, Jesús raíáfomo aizícana jaide. Jofo eromo érocaidemo dama ie juníllaroi dínomo jóidena cióizaide. Afe mei Pedro afénomo íficaidemo fáigacaillano meine jofomo jaide.

Emaús jofue iomo Jesús cíocaide
(Mr 16.12-13)

13 Aféruído afémacimona ménamie Emaús jofue iodo jaide. Afe jofue Jerusalémoma once kilómetros díno jino ite.

14 Afeodo jailla llezica, nana aféruíllaido itífuiái júfidocana jáidiaillinoi.

15 Iaillinoi úrilla llezica Jesús íaillinoimo áinozide. Dúciillano afe íaillinoi díga jaide.

16 Afémiena ciódiaillinoi mei íadi afémiena onóñediaillinoi.

17 Jira Jesús afe íaillinoimo jícanote:

—Íodo ómicoi jailla llezica, ¿ñifue júfidotiomoicoi? ¿Ñibái mei iere zuure itíomicoi? —daide.

18 Afe íaillinoimona, Cleofas mámeciredimie uai ote:

—Nana comíni biruíllaido Jerusalemo finócafuiaina fidídiaioi.

Afeno ímiedio íadi ¿meita aféfuiaína jaca nai fidíñedio? — daide.

19 Iemona afémie íaillinoína daide:

—¿Ñifue finódiaioi?

Jira íena daidíallinoi:

—Nazaret ímie, Jesús ñue riire uai llóraima aillo ebírede raana uaido finode. Afena Juzíñamui eróicana finode, daje izói nana comini ui cíoicana finode.

²⁰ Mei íadi lletáriraini illaini naa cai ocuídillaini diga afémiena coráiano titállena fecádiaioi.

²¹ Afe llezica íemo ocuírídicaí, ua Israel Nairai anáfenodinomona cai jíllotallena. Ja afefue záillamona ja daruíamani íteza.

²² Ie emódomo cáimona ringóniai ja caina jacínaitade. Aféngotiai raiáfomo nai jítiredemo jaillano íaioi ciónana meine caimo lluáibitiaioi.

²³ Ie abina cióñediaioi. Mei íadi Juzíñamui abi imaci ángeles dainámacina jae ciódiaioi, daidíaoi. Afe ángeles ringóniaina daide: “Jesús caade.”

²⁴ Iemona cáimona raiáfomo jáidiaioi. Dinomo ringónaijai llua izói baitíaioi. Mei íadi Jesuna cióñediaioi.

²⁵ Jira Jesús daide:

—¡Iere féitafirediomoí! Nana uai llóraini daináuaina iere rairuíoicana ínotiomoí.

²⁶ ¿Uáfueñede Cristo ie ebíredinomo nai jáiñena llezica, afémiemo bie duere finóbillafue jítáirede?

²⁷ Ie mei nana Cuegáuaimo afémiedo dainana ñue jino llote. Moisés cuegánicuaimo ite afémiedo úrilla uai ñue jino llote. Daje izói nana jáie uai jino llóraini llogánicomo itino jino ñue llote.

²⁸ Jófueмо dúcidiaioimo, Jesús iodo nai jáiacadena éroide.

²⁹ Mei íadi afémiena jeruídiaillinoi. Daidíallinoi:

—Jae nauízaideza, mai benó coco diga fiebi, mei ua jítireoicaideza, —daide.

Jira Jesús jofo jaide íaillinoi diga íllena.

³⁰ Jae íaioiri jofo güirábanimo ráillano pan llínote. Llínuano Juzíñamuina:

—Iere figura, —daide.

Daií dainano dítajano íaillinoimo ite.

³¹ Afe llezica íaillinoi ui tújicaillamona íena onódiaillinoi. Afe mei afémie cióbicañena.

³² Conímana daidíallinoi:

—¿Uáfueñede iodo cai úricana jailla llezica, afémie caimo Cuegáuai jino llua llezica coco comecei náicaitade? ¡Afe uáfueza!

³³ Iemo afénomo are íñeno meine Jerusalemo abido jáizaidiaillinoi. Dinomo once orécamaci naa íaioi nabáñiairi dáanomo gairide baizájidiaillinoi.

³⁴ Afénomo itino íaillinoina daide:

—Uáfueza cai Ocuíraima ja meine abido caade, Simón Pedro ja íena ciode.

³⁵ Iemo afe íaillinoi afémacimo nana iomo íaioi úrillafuena llotíaiillinoi. Afemona Jesús pan ditada íllamona afémiena íaillinoi onónana gairídinomo llotíaiillinoi.

*Jesús ie llófuegamacimo cíozite
(Mt 28.16-20; Mr 16.14-18; Jn 20.19-23)*

³⁶ Afe íaillinoi dáinamo úritiaioimo, Jesús íaioi cígimo náidazaide. Náidacaillano íaioi uáidote; daide:

—Jacíruiño, uái omoi iri, —daide.

³⁷ Afémiena cíoillano, “¡Come joreño caimo billa!” daínano iere jacínaitiaioi; cuidíridiaioi.

³⁸ Mei íadi Jesús íaioina daide:

—¿Nibái mei jacínaitiomo? ¿Nibái jizíreoicana cue ínotiomo?

³⁹ Bené cue ónoimo érocai. Daje izói cue ídaimo eroi. Níimedicue. Cue abi jeta. Cómedicueza ónoi. Ja cue abina cíodiomoiza. ¡Mínica joreño ícurunideza; íeizinide! —daide.

⁴⁰ Daií daina llezica ie onoi ie idai diga afémacimo ácatate.

⁴¹ Mei íadi afémaci íóbidiaioi ía, iere uáinificaidiaioi. Ie jira afémie uáfuena íllana nai figo íñoñediaioi. Jira Jesús íaioina daide:

—¿Benó ómoimo due güíllena ite? —daide.

⁴² Ie jira ruica chamu íemo itíaioi, naa due cíifo íji diga.

⁴³ Afe llínota íaioi eróicana güite.

⁴⁴ Afe mei íaioina daide:

—Nana nauí cuemo íficaidífuíai, nauí omoi cígimo cue illa llezica, ómoína cue daina be ñie. Nana cue dibénedo uícodo cuezáuai daina ñue ícoimo fuitárede: Moisés cuezánicomo cue dibénedo úrite; daje izói jaiái uai jino llóraini cue dibénedo úrite; íemo jíái Salmos cuetímie cue dibénedo úrite. Nana afémaci cue dibénedo úrilla uai ñue ícoimo fuitárede, —daide.

⁴⁵ Iemona Juzíñamui Cuezáuaimo dáinana Jesús afémacina ñue onótate.

⁴⁶ Íaioina daide:

—Cuezáuaimo daina izói Cristo jaca tíirede. Daje izói daruíamani íllamona afémie tíllanomona meine cáadimiena jáirede.

⁴⁷ Daje izói Jerusalémoma oni nana jíáie náraiaimo comini comeci ífuíai íaioi méidollena cue mámecido llórede. Daje izói comeci íaioi méiduamona íaioimo ite fiénidífue múíñua cue mámecido llórede.

⁴⁸ Nana bie cuemo comúidífuíai uai nabáirainidíomoi.

⁴⁹ Ie jira cácarei, cue Moo uícodo lloga fecácaga Ñuera Joreño ómoimo óreiticue. Afe caifona bille ríino omoi nai llíñoñeille díno, benó Jerusalén jófue mo omoi iri, —daide.

*Jesús ja caifo monamo jaide**(Mr 16.19-20)*

⁵⁰ Afe mei Jesús afémacina jofue jinomo uite. Betania áinomo jáidiaioi. Afénomo Jesús onoi caifo ñúitajano íaioi ñue íllena llote.

⁵¹ Daií ie daina llezica afémacimona oni jírecaillano afémie ja caifo monamo uiga.

⁵² Afémiemo íaioi caimátailla mei, abido Jerusalemo iere ióbicana jáidiaioi.

⁵³ Afemona afémaci Juzíñamuimo gairíracomo ífirediaioi. Afe llezica aillo ñúefuaii Juzíñamuimo nitáfirediaioi. Daiítadeza. Jae ñie.

JUZÍÑAMUI ÑUEFUE SAN JUAN LLOGAFUE El Santo Evangelio Según San Juan

Juzíñamui Uaina maméidimie ífcaide

¹ Naga raa táinia uícomo afe Uai dainámie Cristo jaca ite. Afe Uai jaca Juzíñamuimo ite. Afémie Juzíñamui.

² Ua nanóidiruimo afémie Juzíñamuimo ite.

³ Afémiedo Juzíñamui bínie naa ráaniairi finode. Minícana ñede afémie finóñegana.

⁴ Afémiemo cáallino ite. Afe cáallino nana comini egáñote.

⁵ Afe egáñotino jaca jítiredinomo egáñote; íadi afe jítiredino afe egáñotinona jaca dúitanide.

⁶ Daa Juzíñamui orécamie biniemo bite. Afémie mámece Juan.

⁷ Afémie uai nabáiraimana bite egáñotinodo ñue úrillena. Dai úrizabite, afémie daináfuedo nana comini ñnollena.

⁸ Juan dama egáñotimieñede. Fia afémie orécamie egáñotimie uai nabáiraimana úrizabite.

⁹ Afe egáñotimie uáfueña ñue egáñotimie. Bie egáñotimie nana caimo egáñote. Afe egáñotimie biniemo dúcizabite.

¹⁰ Afe Uai dainámie biniemo ite; Juzíñamui afe Uai dainámiedo bínie finode, íadi biniemo itino afémiena onóñediaioi.

¹¹ Afémie ie éniemo bite, íadi ie comini afémiena llínoñediaioi.

¹² Mei íadi dáarie mei afémiena llínotiaioi; afémiena ñnotiaioi. Afe ñnotino rínorediuaína igáiaioi, Juzíñamui úruaína íaioi jáillena.

¹³ Afe úruiai come móotiai úruiai izói cómuítañega. Come móotiai bie énie comuilla izói, comuítatiaioi. Afémaci íaioi comeci jítainafuedo comuítatiaioi, íadi Juzíñamui úruiai dama Juzíñamuimona comuide.

¹⁴ Afe Uaina maméidimie cai come abi izói dama ífcaide. Ie mei cai cigiri nano nié dino ite. Afémie comécimo ñúefuiai illa, ua nana izíruillafue uafue diga. Ie jira afémiemo ite ñue ebírenafue caimo cíocai; afe ebíredifue dama Moo Juzíñamui daade Jitó ie.

¹⁵ Juan afémieri jéerie ñúefuedo úrite. Daide:

—Baie cue úrillamie, ómoimo cue llogámie, cue ódana bitímie. Afémie jae cue uíeco dibénemo jaide, cue íñeniadi íteza, —daide Juan.

16 Afémie aillo ñuera ráfuiamona caimo ñue ézicigafuiaina lliinoticaí. Ua nana fáicanocaiñeno lliinoticaí.

17 Juzíñamui caimo ocuícáfue Moisedo oreca, íadi izíruinafue uáfuiái diga Jesucristodo bite.

18 Buna jaca Juzíñamuina cíñena; mei íadi dama daade ie Jitó, ua Moo comeci áinomo itímie, baie Juzíñamui ífuena cai onótatimie.

Báutizaraima Juan Jesucristodo ñue úrite

(Mt 3.11-12; Mr 1.7-8; Lc 3.15-17)

19 Jerusalemo ite judíuai, dárie lletáraini Levítaniai diga Juaamo oré diaioi. Daí íaioina orede báimie mo jicánollena, “Búdio” daíllena.

20 Afémie jáanoñeno llote. Daide:

—Cue Crístoñedicue, —daide.

21 Nane dáanomo íemo jicánotiaioi:

—¿Búdio mei? ¿O Juzíñamui uai llóraima, Elíadio? —daidíaioi.

Juan: —Íéñedicue, —daide.

Iemo nane jicánotiaioi:

—¿Ñi Juzíñamui uai llóraima bille daínámiedio? —daidíaioi.

Jira uai ote: —Íéñedicue, —daide.

22 Ie jira íena daidíaioi:

—¿Mei búdio? cai oré dinomo fairíogafuena cai uíllena. ¿Mei nie izóí caina o abi ífuena dáitio? —daidíaioi.

23 Juan íaioi uai ote:

—Cue dama jofue iñé nanomo caillide uáidimiedicue. Bai Juzíñamui io jaícina zitari, jaiái Juzíñamui uai llóraima Isaías daina izóí, —daide.

24 Juan diga úrizabitino jae Fariséuaimona oré caiaioi.

25 Ie mei Juaamo jicánote:

—Mei Crístoñedio, Elíañedio, Juzíñamui uai jino llóraimañedio, ¿nibái mei báutizaibifiredio? —daidíaioi.

26 Juan íaioina daide:

—Fia jáinoido báutizadicue. Mei íadi omoi cígimo daa omoi onóñegamie ite.

27 Cue óodana afémie bite, íadi cue jinomo baitade. Afémie eiba ico igai zuitánidicue, mei jamáimiedicueza, —daide.

28 Nana afe Juaamo jicánollena Betábaramo úritiaioi. Betábara énie Jordán imani ruicáfellemo ite. Ja dinomo nauí Juan comini báutizafirede.

Jesús, Juzíñamui Cordero

29 Afe meifo iruido Juan ja Jesúna ciode. Jesús Juaamo áinozide. Ainozidemo Juan daide:

—¡Eroi! Juzíñamui Cordero daina ie Ovéjana mamécamie. Ua, afémie nana comini fiénidifue oni dóraima.

³⁰ Naui afémie cue llogámie “Cue óodana daa iima bite. Ua óodana bitímie cue baimo baitade, mei afémie cue jinófenemo íteza; daje izói cue íñenia afémie jae nano itímieza.” Daií naui afémiedo úriticue.

³¹ Dama afémiena onóñedicueza, búdimieza. Iadi jáinoido comini báutizaibiticue, Israel nairai afémiena ñue onóillena, —daide.

³² Ie emódomo daide Juan:

—Ja Juzíñamui Ñuera Joreño, Espíritu Santo, bímiemo monámona ana bíllana ciódicue. Fíicirina eroide. Iemo afémiemo fiévide.

³³ Jaca nanómona onóñedicue nibai bu. Mei íadi jáinoido comini báutizallena daií cuena ocuídímie cuena daide: “Ñuera Joreño daa ímamo ana bíllana íemo afémiemo fiébillana o cióadi, afémiena ónoitio. Afémie Ñuera Joreño itátatímie.” Daií cuena daide.

³⁴ Ja íena ciódicue. Ie jira ñue llóraimadicue. Uáfuenta lloticue. Afémie Juzíñamui Jitó, —daide Juan.

Jesús nano fueñe ie llófuegamaci

³⁵ Afe meifo iruido Juan mena ie llófuegamie íaillinoi diga, meine batí dáonomo ite.

³⁶ Jesús mácajana cióillano, Juan daide:

—Eroi bímie Juzíñamui Cordero daina ie Ovéjana mamécámie, —daide.

³⁷ Iemo Juan llófuegamie íaillinoi ie daináfuenta cacáillanona oni Jesumo jáizaidiaillinoi.

³⁸ Ie mei Jesús jino érocaidemo, afémiemo íaillinoi jáizaillana ciode. Íaillinoína daide:

—¿Bu mei jenódiomicoi? —daide. Afe íaillinoi afémiena daide:

—Llófueraíma, ¿ninomo itio? —daide.

³⁹ Jira Jesús fairíote:

—Eróizaibi, —daide.

Iemona iedo jáidiaillinoi. Afémie illánona cíozaidiaillinoi. Ie mei, nibai jitoma ana ítemo, afémieoiri iruido fiébidiaillinoi.

⁴⁰ Daa afe íaillinoimona ua Juan llogáfuenta cacádinomona, Jesús diné jáidímie Andrés.

⁴¹ Afémie Simón Pedro ama. Afe Andrés, nano fueñe abido ie ama Simón baizaide. Baizájillano íena daide:

—Mesíana, Juzíñamui mámecigamiéna jae baiticai. Cristo jáífodo mamécámie, —daide.

⁴² Ie mei Andrés Jesús illánomo Simona uite. Dúcidemo Jesús íena cióillano daide:

—O Simona, Jonás jitódio. Iadi biruímona Céfana mámeitio. Pedro jáífodo mameína.

Jesús Felipe uáidote Natanael diga

⁴³ Afe meifo iruido Jesús Galilea éniemo jáiacade. Jaillano Felipe baizájide. Afémiena daide:

—Cuedo bi, —daide Jesús.

⁴⁴ Afe Felipe Betsaida jofue ímie. Andrés Pedro diga daano imaci.

⁴⁵ Ie mei Felipe dinena Natanael baizájide. Baizájillano daide:

—Moisés ocuica uai cuegánicomo llogámie ja ciódicai. Ua Juziñamui uai jino llóraini llua izói, afe íaioi llogámiena ciódicai. Afémie Jesús, José jitó, Nazaret jofue ímie, —daide Felipe.

⁴⁶ Natanael dinena daide:

—¿Niga ñúefue jadí Nazarémona fídiitio? —daide.

Felipe uai ote:

—Eróizaibi, —daide.

⁴⁷ Jesús Natanael ánozillana cióillano daide:

—Benomo bite nahí israelita ímie; jífuiafue afémiemo iñede, —daide.

⁴⁸ Ie jira Natanael Jesumo jicánote:

—¿Nie izói cuena onódio? —daide.

Iemo Jesús íena daide:

—Felipe nai ona uáidoñenia, ona ciódicue. Ua higuera anamo o íllana ciódicue, —daí Jesús daide.

⁴⁹ Iemo Natanael daide:

—Llófueraíma, O Juziñamui Jitódio. Israel Illáimadio, —daide.

⁵⁰ Jesús ie uai ote:

—¿Dama cue dáinana higuera anamo ona ciódicue iedo daíi cuena ínotio? —jicánote Jesús. Afe emódomo Jesús íena daide:

—Bie rafue jinomo jáie áillue ráfuena cíotio, —daide.

⁵¹ Iemo afe emódomo Jesús afémacina daide:

—Uáfuena ómoimo llóiticue. Mona túiñuana cíoitio moi. Iemona Juziñamui abi imaci, ángeles dainámaci, cuemo ana bíitiaoí, caífo cúemona jáitiaoí. Mei Nanoide íima Jitódicueza. Afena cíoitio moi, —daide.

2

Galilea éniemo Caná jófuemo áirenafue

¹ Daruíamani íllamona, jadí Caná jófuemo, Galilea éniemo, áirenamona iráizillafue finódino. Jesús ei afénomo ite.

² Jesús naa ie llófuegamaciri ja afe áireina ráfuemo uáidogamaci.

³ Afe iráizillafuemo jirórai, vinoi fuilla. Ie ei Jesuna daide:

—Ja vino iñede.

⁴ Jesús uai ote:

—Ei, ¿nibái cuena daií daidio? Cue jieruillarui mo nai dúciñede, —daide.

⁵ Mei íadi afengo afénomo ite jirole atírainina daide:

—Mai, nana afémie daina diga fino, —daide.

⁶ Dinomo seis diga icírui, nofiruai ráide. Judíuai afe icírui oruítajano jíaimaci ñue oréllena nícidofirediaioi, íaioi abi fiénidifue dóllena. Naga icírumo ochenta o cien litros oruízite.

⁷ Iemo Jesús atírainina daide:

—Jadí icírui jáinoia oruítari, —daide.

Iemona fuemo jibiezidiaioi.

⁸ Iemo Jesús íaioina daide:

—Due uano rafue náamamo uiri, —daide. Daií finódiaioi.

⁹ Iemo afe rafue naama jainoi facádemo, jáinoiñede. Jae vino. Rafue naama onóñedemo icírui jáinoia oruízite. Dani atídino áfena onona. Afe vino nimánuanona, rafue naama ringo óiacadimie uáidote.

¹⁰ Iena daide:

—Nágamiiai ñújei nano fueñe atífrediaioi. Ie mei nana uáidogamací aillo jirole mei, jamai vino atífrediaioi. Mei íadi nai biruido ñújei ja o éenoga, —daide.

¹¹ Afe vino méiduafue ua Jesús nanoide uaido daingo comútaga raa; afefue Galilea éniemo, Caná jófuemo finoca. Bie uaido comútaga raado afémie ie ebírede ríino jino cíotate. Iemona ie llófuegamaci ñue íena ínotiaioi.

¹² Ie meífodo Capernaúmo, Jesús jaide ie ei diga, ie ámatiai diga, ie llófuegamaciri. Dinomo ja bai niga mona itíaiioi.

Jesús Juzíñamui gairíraco ñue duafue

(Mt 21.12-13; Mr 11.15-18; Lc 19.45-46)

¹³ Aféruillaído Judíuai pascua rafue ánozide. Iemona Jesús Jerusalemo jaide.

¹⁴ Afe dinomo gairíraco eromo juráriai, ovejai, íemo fíicirillai dieze fecáriraimacina Jesús ciode. Dáanomo úcube méidoraini ráiidiaioi.

¹⁵ Afena cíoillano Jesús ñécigai móillano jiura finode. Afedo gairíraco erómoma nana fecáriraini íaioi juráriai ovejai diga jino jiude. Daje lezica úcube méidoraini úcubetunillai Jesús ana jutade. Íaioi úcube facádorabani Jesús oni caitade.

¹⁶ Fíiciri fecárainina daide:

—Bie raa benómoma oni ui. ¡Cue Moo jofu fecáriracona mamériñeno iri! —daide.

¹⁷ Ie mei afémie llófuegamaci jaiiai cuezáuai úbicaidiaioi. Afe uai llote: “O jofu cue ríiduamona cue abi íñeite izoide,” daide.

¹⁸ Iemona Judíuai afémiemo jícanote:

—¿Minícado o ríinona cai ácatatio? ¿Bie raa o fínuana bu o ocuilla? —daídíaioi.

¹⁹ Jesús íaioi uai ote:

—Cue ríino ómoimo bie izói ácataitícue. Bie gairíraco omoi júdai, ie mei daruíamani íllemona meine nane caifo cue raiñolle, —daíde.

²⁰ Jae judíuai Jesuna daídíaioi:

—Cuarenta y seis fimona niga gairíracoca; ¿íeca daruíamani íllamona meine abido caifo o ráiñoiti? —daídíaioi.

²¹ Iadi afémie daina uai gairíraco, dama ie abi llote.

²² Iemona Jesús tíidinomona meine abido cáaillano ie llófuegamaci bie daina uaimo uibíoidiaoi. Daje llezica Cuegáuaina ínotiaoi nana Jesús íaioina daina uai diga.

Jesús nana comini comécina onode

²³ Jesús Jerusalemo illano, pascua rafue llezica, aillo comini afémiena ñue ínotiaoi. Ua íaioi cíófinina afémie uaido fínuana cíodiaoi. Afena cíoillano afémiena ínotiaoi.

²⁴ Mei íadi Jesús afe comínimo ie abina nai rairuide. Mei nana imaci comécina onódeza.

²⁵ Jái come afémiemo comini ífuena llónide. Dama afémie dinena íaioi comeci ífuena onode.

3

Nicodemo Jesumo úrillafue

¹ Daa Judíuai illaíma mámece Nicodemo. Afémie fariseo.

² Afe bie Nicodemo naio Jesumo úrzaibite. Jesuna daíde:

—Llófueraíma, Juzíñamui orécao cai llófuellena onódicai. Juzíñamui cómemo íñeniadi bu bie ríirede cíófinina fínuana ácatanide. Ua o fínua izói buna finónide, —daíde.

³ Ie jira Jesús íena daíde:

—Uáfueña dáitícue: meine nane jéiciñegamie jaca Juzíñamui illáimana illánona cíoñeite, —daíde.

⁴ Jira Nicodemo jicánote:

—¡Jae éicomedicaí! ¿Nie izói meine jocóllicai? ¿Meine nane ei eromo come jáirede, dáanomo abido jéicillena? —daíde.

⁵ Ie jira Jesús uai ote:

—Uáfueña dáitícue: meine nane jáinoina jéiciñegamie, Moo Joreñomona jéiciñegamie diga, ua Juzíñamui illáimana illánomo jofo jáinide.

⁶ Come móomona jéicigamie jaca come. Iadi Juzíñamui Joreñomona jéicigamie jaca joreño.

⁷ Cue ona daináfueri jacínaiñoeno iri. Uáfueña nágamie comue jéiciafue, ua caifona jéiciafue jaca jítáirede.

⁸ Jairifo náganomo ebena jaiñófirede. Ie jáiñuana cacádio, mei íadi ninena bite, niné jaide, onóñedio. Daje izói nana Juzíñamui Joréñomona jéicigano, afe jairifo izói itíaiói, —daide.

⁹ Jira meine nane Nicodemo jicánote:

—¿Nie izói bie iite? —daide.

¹⁰ Jesús uai ote:

—¿Nibái mei jicánote? O iere aillo Israel llófueraimana o íadi ¿bie ráfuenta onóñedio?

¹¹ Uáfuenta dáititue: cai onóigafuedo úriticai. Cai ciónafuenta féinino lloticai. Mei íadi cai ómoimo llogáfuenta ñnoñediomoi.

¹² Bie énie raado ómoimo cue úriadi nai ñnoñeniadi, ¿nie izói cuena ñnoitio mona ero ráfuedo cue úriadi?

¹³ Buna mona eromo jáiñede. Dama monámona ana bitímie, Nanoide Hima Jitó, monamo jáirena; mei nauí monamo itímieza. Dáamiedicue.

¹⁴ Nauí jaiái Moisés jofue iñénazicimo jaió caifo ráiñua izói ua afe izói caifo ráiñobicaíticue. Nanoide Hima Jitódicueza.

¹⁵ Ua afe cue ráiñua jitáirede nana cuemo ñnotino fiénidifuego báiiñeillena. Mei íadi ñnotino ziiñona íitíaiói.

Juzíñamui nana comínina izíruillafue

¹⁶ Jesús nai úrillano daide: Juzíñamui nana comínina iere izíruite. Afe iere izíruillamona Juzíñamui ie daade Jitó caimo ite. Ua, afémie ie caimo ite, nana afémiemo ñnotino jaca ninomo féiraiñeillena; mei jááfodo ñue ziiñona íaiói illena.

¹⁷ Comini fiénidifue iba otátaraimana Juzíñamui ie Jitona oréñede, mei íadi ie Jitona orede afémiedo comini jíllobicaillena.

¹⁸ Juzíñamui Jitomo ñue ñnotimie duere finóbiñede. ñnoñedimie jae duere finóbide, Juzíñamui daade Jitomo ñnoñena jira.

¹⁹ ñnoñedino jae duere finóbidiaíoi. Mei ua ñue egáiñotimie ana bie éniemo bítemo, jítinona jamánomo gáidiaíoi, fiénidifue finódinona íaiói illa jira.

²⁰ Nana fiénidifue finóraini úzefona éoidiaíoi. Jaca úzefomo áinoziñede. Ua íemo áinoziñediaíoi íaiói fiéni finócafuenta ónoñellena.

²¹ Uáfue comoeci facádino úzefomo áinozifirediaíoi. Íaiói finócafue jaca Juzíñamui cacádinona íaiói illa izói finódiaíoi. Uzefo íaiói finócafue jaca daíí ñue cíoitae, —daide Jesús.

Báutzaraima Juan Jesudo meine úrizaibite

²² Ie meífomo Jesús Judea éniemo jaide, ie llófuegamaci diga. Dinó diga irui itíaiói. Dinomo comini báutzadiaíoi.

²³ Daje llezica Juan, Enón éniemo báutzade. Enón Salim áinomo ite. Dinomo báutzade, aillo jainoi illa jira. Iemona comini báutzai bitiaíoi.

²⁴ Bifue finódiaioi Juan nai llavéracomo úiñenia.

²⁵ Juan llófuegamacimona dáarie judíuaimo úrizaide. Comini íaifue oni dollínodo úritiaioi.

²⁶ Juaana daízaibitiaioi:

—Llófueraíma, nauí o diga itímie, Jordán ruicáfellemo itímie, caimo o llogámie, ja comini báutizade. Nana comini afémie diné jáidiaioi, —daidíaioi.

²⁷ Iemo Juan afémacina daide:

—Juzíñamui cómemo ifue fécañenia, bumo ráfuena íñeite.

²⁸ Cue nauí uáfuedo dainafue dani cacádiomoi. “Cristoñedicue” daidicue. Afémie uícodo orécamiedicue.

²⁹ Airenafuemo ringo otímie ua ringo óite. Otímie nabai afe dinó itímie ie úrillana cacade. Cacáillanona íeri iere ióbite. Daje izói biruido cue ióbídicue.

³⁰ Nágarui afémie jamánomo illáimana jáizaide. Ie llezica cue jabómieiticue. Daí jítáirede, —daide.

Caifona ana bitímie

³¹ Juan nai úrite; daide:

—Caifona bitímie nana cai jaináinamie. Bie énie ímie ja bíniemo jainaide. Enie ífuena úrite. Mei íadi monámona bitímie nana cai baimo jamánomoidímie.

³² Afémie cacánafuedo úrite ie ciónafue diga. Iadi afémie dainana buna íñoñena.

³³ Da come ie dainana ínoiadi daí Juzíñamuimo fairíote. Ua daí Juzíñamui uáfuena dainafue uáfuetate.

³⁴ Juzíñamui orécamié Juzíñamui uáillaido úrite, mei Juzíñamui ie Joreño afe orécamiemo facáñeno nana íteza.

³⁵ Moo ie Jitona izíruite. Naga itínuiaina afémiemo fecade.

³⁶ Iemo ie Jitona ínotímiemo fúíñeite illánona íemo ite. Mei íadi Jitona ínoiacañedimiemo afe fuiñédinona íñeite. Juzíñamui afémiena iere duere fínoite.

4

Jesús Samaria ingomo úrite

¹ Fariséuai Jesús Juan baimo aillo comini jáillana fidídiaioi. Daje izói Jesús Juan baimo báutizafirenana fidídiaioi.

² Mei íadi Jesús báutizañede; dama ie llófuegamaci báutizaja.

³ Afena Jesús fidíillanona Judéamona meine abido Galilea éniemo jaide.

⁴ Jesús jailla llezica Samaria énie cígido jáirede.

⁵ Ie mei Samaria jófuemo dúcide. Afe jofue mámecei Sicar. Sicar áinori Jacob feci énie ite. Afe éniema ie jító Josemo maiñótate.

⁶ Dáanori Jacob jainoi orano ite. Jesús iodo mácajamona zegónaite. Ie jira jainoi orano abimo ráinade ocózinaillena. Jae jaíciri íacademo.

⁷⁻⁸ Ie llófuegamaci jófuego güille jae íbajidiaíoi. Iemo Samaria ringo dúcide. Jainoi uáibite. Iena Jesús daide:

—Jáinoina cue jírota, —daide.

⁹ Ie jira Samaria ringo Jesuna daide:

—¿Níbaí mei jainoi cuemo jícadío? Odi judíodio. Cue Samaria ingódicue, —daide. (Ua jaiai dinómona judíuai samarítánuaímo nabáirirainide.)

¹⁰ Ie jira Jesús uai ote:

—Juzíñamui fia fecalli raa o onóadi, ua áfena raire cuemo jícaítio. Daje izói omo jainoi jícadimiena, o onóadi ua raire cuemo jícaítio; íemona ua cáadijina o ííticue, —daide.

¹¹ Afengo afémiena daide:

—Íima, o jainoi olle raa íñede. Jainoi orano afórede. ¿Nínómona cáadijina cue íítio?

¹² Cai jaíáigimie Jacob bie jainoi orano caimo iga. Benómona afémie jíruaide ie úruiai diga. Ua dájemona afémie tóiníai jíruaide. ¿O iere afémie báimoidío? —daide.

¹³ Jesús uai ote:

—Nana bie jáinoimona jiródimaci nane meine abído jiróacaitiaíoi.

¹⁴ Mei íadi cue jirótagano jaca meine abído jiróacañeítiaíoi. Omo cue ille jainoi ua zíñona íítiji. Nágarui caímare o itátaite. Illánona fúíñeítinona omo íficaitaite, —daide.

¹⁵ Ie mei ringo afémiena daide:

—Íima, jadíe jáinoina cue ine; ja cue jíroacañeilleza, ua nane meine bie jainoi oránomo cue bíñeilleza, —daide.

¹⁶ Jesús aféngona daide:

—O íni jírizairi ie mei bené bi, —daide.

¹⁷ Ringo uai ote:

—Ínínidicue, —daide.

Ie jira Jesús aféngona daide:

—Uáfúena daídío. Ínínidío.

¹⁸ Jae cinco dígacaiño ínreídío; birui o illámie o ínñede, —daide.

¹⁹ Afena cacáillano ringo afémiena daide:

—Íima, Juzíñamui uai llóraímiedío ja onódicueza.

²⁰ Cai jáiaimaci Samarítánuaí bie ídumo Juzíñamuina íóbitadiaíoi; ñúéfuedo íemo úrizaiíbitiaíoi. Mei íadi o íemo naa judíuairi jíáfodo daídíomoi. Jerusalemo cai gairíllano Juzíñamuina cai íóbitallena daídíomoi, —daí afengo daide.

²¹ Jesús uai ote:

—Ringo, cuena ñno. Jiáiruimo ja dúciizaide. Aféruimo bídumo biñeno, Juzíñamuina ióbitaitiomoí. Daje izói Jerusalemo jáiñeno, Juzíñamuina ióbitaitiomoí.

²² Omoí ióbitagamiena onóñediomoí. Iadi cai ióbitagamiena onódicai, nibai jíllonafue judíuaimona bíteza.

²³ Jae como cue llogáruimo dúcide. Jae birui aferui. Naga Moo Juzíñamuina uáfueña ióbitaacadimie afe o joreñodo uáfueña afémiena ióbitaite. Daí Moo Juzíñamui cai íena ióbitallena jítaide; ua nana afémiena ióbitaacadino daí bíllana Moo jitaide.

²⁴ Juzíñamui ua Joreño. Afémiena ióbitadino íaioi joreñodo uáfueña ióbitaitiaioí, —daide.

²⁵ Iemona afengo íena daide:

—Cue onódicueza Mesías biite. Afe Mesías daina Cristo. Afémie bia nana ñue rafue caimo jino llóite, —daide.

²⁶ Jesús daide:

—Ñimiedicue, ori úrilla, —daide.

²⁷ Iemo ie llófuegamaci dúcide. Dúciillano Jesús ringomo úrillari fáigacaidiaioí. Mei íadi buna jicánoñena áfena. Ua afémiemo afengo jitáillana jicánoñediaioí; “¿Minícafuedo úritiomicoí?” íena daíñediaioí.

²⁸ Ie mei afengo iciru fiénocaillano, jófueмо jaide. Dinomo comínimo llujjide:

²⁹ —Nana cue finócafue jino llotímiemo omoí éroizaibi. ¿Bie afe Crístoñede? —daide.

³⁰ Ie jira jófueмона Jesús illánomo jáidiaioí.

³¹ Afémaci bitiaioimo ie llófuegamaci afémiena jicade:

—Llófueraima, due güi, —daidiaioí.

³² Ie jira afémie daide:

—Cuemo ite güíllena omoí onóñediomoí, —daide.

³³ Ie jira ie llófuegamaci como fueñe conímamo jicánotiaioí:

—¿Jíáie come afémie écaibite? —daidiaioí.

³⁴ Ie jira Jesús afémacina daide:

—Cue orédimie comeci jítaina izói cue finóadi bie cue güíllena. Daje izói ie táijina cue fuitáadi, güíticue izoide.

³⁵ Omoí llua: “Nai riga raa ollíruimo cuatro diga fiui ite” daidíomoí. Mei íadi daíticue: Erocai. Ja rigánuemo eroi. Ja jéiaruimo áinozide.

³⁶ Ollemo táijidimie iba llíinote. Afe oga llízieniai jaca ninomo fiébite; ua fúíñeite illánomo fiébite. Ua ríjiraima óraima diga dáanomo camátaillena daí ite.

³⁷ Omoí jaiai daina uáfueña llote: “Ríjiraimie dáamie íadi otímie jíáimie.”

³⁸ Jae omoí ríñeganomo ómoína orédicue. Jíáimaci táijidiaioí íemo íaioi táijina caimare ínotiomoi, —daide.

39 Aillo Samaria jofue imaci Jesumo ñnotiaioi. Ua uafue ringo llogáuaido Jesuna ñnotiaioi. Afengo daináuai, be ñie: “Nana cue finócafueña cuemo llote.”

40 Ie jira Samaritánuaí Jesumo billano jicádiaioi:

—Cai diga iri, —daidíai. Ie jira Jesús ménarui íai. Diga ite.

41 Afémie dáinana cacáillano aillo jáimaci ñnotiaioi.

42 Ie jira aféngona daidíai:

—Nauí dama o dáinado jabo ñnoticai, mei íadi birui ja cai dani afémiena cacáillano áfedo como ñue ñnoticai. Ja onódicai bie ua Cristo, nana nairai jíllotaraimaza, —daidíai.

Jesús gobiernomo tájiraíma jító jíllote

43 Ménarui íllamona Jesús Samáriamona jáizaide Galilea énie iodo jáillena.

44 Jae dama Jesús llote:

—Juzíñamui uai jino lloraíma dama ie éniemo jaca jámairuiga, —daide.

45 Galiléamo dúcidemo afénomo itino íena ñue llínotiaioi. Ua caimare íena llínotiaioi, nibai pascua ráfueño Jerusalemo nauí Jesús illa llezica jáidiaioi. Iemo aféfuemo nana ie finócafuiaina ciódiaioiza.

46 Ie mei Jesús meine Caná jófuemo, Galilea éniemo jaide. Ua jainoi vínona meíduanomo jaide. Afe llezica Capernaum jófuemo gobierno illaíma tájiraíma jító iere irárede.

47 Afe tájiraíma Jesús Judéamona Galiléamo dúciana fídiano, aféniemo éroizaide. Ua ie jító jíllotaíbillena jícajide; mei ja ie jító tízaide.

48 Iemo Jesús íena daide:

—Onótate ráaniai íemo cíofinina finócafuiái diga omoi ciónñeniadi ñnoñediomoi, —daide.

49 Iadi gobierno tájiraíma Jesuna daide:

—Ocuíraíma, raire bi cue jító nai tíñena llezica, —daide.

50 Ie mei Jesús íena daide:

—Meine o jofomo jai. O jító jílloteza, —daide. Afémie Jesús íena daina uaina ñnote, jira jaide.

51 Ie jofomo dúcizaidemo ie jaiénizai jino íemo bitíaioi. Dúciillano daidíai:

—O jító jae jíllode, —daidíai.

52 Iemo, —¿Ñie hóramo jíllode? —íai. Iemo jicánote. Jira daidíai:

—Nauiri jáiciri illa mei ie abi bóua llícaide, —daidíai.

53 Iedo moo bie daje hora Jesús íena daina hora uíbicaide. Ua “O jító jíllote” daina hóramo afeza jíllode. Iemona afémie Jesumo ñnote, naa ie comini diga.

54 Daií Jesús Judéamona Galiléamo billano mena onótate raa finode. Bie jílloatafue ua ie meífodo finoca cíofinafue.

5

Jesús Betzátamo ite tízitaitimie jílloata

1 Ie meífomo judíuai rafue ite; jira Jesús meine Jerusalemo jaide.

2 Afe jófuemo, ovejai naze áinori jainoi ofillano ite. Afeno hebreo imaci uaido mameca Betzata. Nane dinomo cinco diga gairirano ite.

3 Bie gairira macáranuiaiimo aillo iráredimaci bíiede: uínidimíai, aidáimíai, tízitaitimíai diga. Bimaci jainoi bagua úiñotiai*oi*.

4 Daií úiñotiai*oi* mei dáruinarie Juzíñamui abi ímie ana billano jainoi bagótafiredeza. Bagota mei nanoide come jáinoimo ana jáidimie, ie irárenamona ja jíllobicaifrede.

5 Dinomo iráredimie ite. Ua treinta y ocho diga fimona irárede.

6 Jesús billano ie bínana ciode. Afémie are jai*ai* ninómona daií dinomo íllana onóillano, Jesús íena daide:

—¿Jíllobicaiacadio? —daide.

7 Iráredimie uai ote:

—Ocuíraima, cue cánoitimie íñede, jainoi bagua meífomo jáinoimo cuena ñuitállena. Nágarui cue jáiacana llezica jáimie nano fueñe jáinoimo dúcide, —daide.

8 Jesús íena daide:

—Caifo náidacai. O bírallu llíno. Mai maca, —daide.

9 Afe llezica afémie jíllobicaide. Iemo ie bírallu llínuano macáicaide. Aferui ocózinaiilarui.

10 Jira judíuai jílloatagamiena daide:

—Birui jae ocózinaiilarui. O bírallu rocánollena omo rairuírede, —daidíai*oi*.

11 Afémie uai ote:

—Cue jílloatimie cuena daide: “O bírallu llíno; mai maca,” —daide.

12 Iemo íena jicánotiai*oi*:

—¿Bu ona “o bírallu llíno, mai maca” daína? —daidíai*oi*.

13 Mei íadi afémie ie jílloatimiena onóñede, aillo comini dinomo íllaza. Ua Jesús jae jáideza.

14 Afe mei Jesús gairiraco eromo íena baizájillano daide:

—Mai eroi. Birui jae jílloadio. Meine fiénidífueña finóñeno iri, jamánomo figóñede raa omo jiriñeillena, —daide.

15 Iemo afémie judíuaiimo Jesús íena jílloatimie lluájide.

16 Ie jira judíuai Jesuna duere finóllena racádíai*oi*; íena fáiacadíai*oi*, ocózinaiilaruimo aféfuiai finua jírari.

17 Mei Jesús íaioina daide:

—Cue Moo Juzíñamui jaca nanómona biruimo táijide, jira cue nane táijidicue, —daide.

18 Iemona judíuai jamánomo íena fáiacadiaioi; nibai ocózinaillarui ocuífafue afémie jáanote. Ie emódomo afémie Juzíñamui izóidimiena dama finótate, “Juzíñamui cue Moo” ie daina jira.

Juzíñamui Jitó ríino

19 Ie mei Jesús íaioina daide:

—Uáfuenta ómoína dáiticue, mei Juzíñamui Jitódicueza, dama cue jítaina izói minícana finónidicue. Dama cue Moo Juzíñamui finócafue cue ciona izói birui finódicue. Nana cue Moo finócafue afe izói nana finofiredicue; ie Jitódicueza.

20 Ua Moo Juzíñamui nana ie finuafue ie Jitomo ácatate, Moo ie Jitó izíruilla jira. Ie emódomo jamánomo áillue finóllifue íemo ácataite, omoi fáigacaillena.

21 Mei Moo Juzíñamui tíidino cáadinona itátateza, ua cáallinona íaioimo ite; daje izói ie Jitó nana afémie oíacaiganomo cáallinona ite.

22 Moo Juzíñamui buna jicánoñede íena duere finótallena, mei íadi nana afe jicánolle ríino ie Jitomo iga.

23 Daií nana comini Moo ñue jacíruilla izói, afe izói ie Jitona ñue jacíruitiaioi.

24 Uáfuenta ómoína dáiticue: cue uaina cacádimiemo, dáanomo cuena orédimiena ínotimie mo ja ziiño cáatatina ite. Afémie duere finóbiñeite, tíllanomona ja bai finona jira; jae cáananomo dúcide.

25 Uáfuenta ómoína dáiticue: tíidino meine cáallirui áinozioicaide. Aferui birui. Ua tíidino Juzíñamui Jitó úrillana cáaitiaioi; íemona nana áfena náfuefiredino cáaitiaioi.

26 Mei Moo Juzíñamuimo cáatalle ríino íteza, daje izói afe cáatalle ríino ie Jitomo afémie itátate.

27 Dáanomo comini duere finóllena jicánua ríino íemo iga, afémie Nanoide fima Jitona jira. Afe Jitódicue.

28 Afemo fáigacaiñoeno iri. Nana tíidino cue úrillana cacáilliruimo dúciteza.

29 Aféruido raiáfuaimona jino bíitiaioi. Ñúfue finódimaci meine cáadinona íitiaioi ziiñona íaioi íllena; mei íadi fiénidifue finódimaci meine cáadinona íitiaioi, duere íaioi finóbillena.

Jesús ríino uáfuenta daiítatifuia

30 Dama cue comeci izói minícana finónidicue. Moo cue ocuilla izói comini finuafuia iñue jicánoticue. Cue jicánuafe

jaícina ñue joide; cue jítaina izói jicánoñedicueza, mei íadi cue orédimie, cue Moo jítaina izói jicánoticue, afe izói finóllena.

31 Dama cueri uai cue nabáiadi, cue dáiñana figo uáfueña daiñede.

32 Mei íadi jiáimie cueri uai nabáiraima ite. Afémie cueri dainafue ñue uáfueña facátate. Afena onódicue.

33 Juaamo jicánuaidiomoi. Afémie ie uai úana jaca uafue.

34 Mei íadi íimamona cueri uai nabáillana jicáñedicue. Daa bíena dáititue omoi jíllobicaillena.

35 Juan egáiñora izóidimie. Afe egáiñora bóocabillamona egáiñofirede. Ie egáiñuanomo nano íanori íllamona íóbicaidiomoi.

36 Mei íadi jiáie cueri uáfueña facátafue ite. Afefue Juan cueri dainafue baimo ite. Afe uáfueña facátafue cue finócafuiái. Aféfuíái cue Moo cue finóllena ocuífafuiái daje izói jóoideza. Afe jira afe cue finócafuiái Moo orécacue uáfueña facátate.

37 Ie dánomo Moo, cue orédimie cueri uai nabaide, mei íadi omoi ie uaina jaca cacáñediomoi; ie abi cíocaillana jaca cíóñediomoi.

38 Ie uailai omoi ífócimo déiñede, afe Moo orécamiéna omoi íinoñena jira.

39 Juziñamui Cuegáuailai izire jenoda facádotiomoi; dinomo “Ziñona illino báiticaí” comécimo facáoidiomoi. Uafue, Cuegáuailai cueri ñue úritiaíoi,

40 mei íadi cuemo bíacañediomoi afe ómoimo zíñona íllena.

41 Comini cuemo nitáacaga jalléinafuíái náfueñedicue.

42 Mei íadi ómoína onódicue. Juziñamuina izíruiñediomoi onódicueza.

43 Cue Moo cue ória jira biticue, íadi cuena líinoñediomoi. Jiáimie dama ie ória izói bíadi afe ímana ñue líinoitiomoi.

44 ¿Omoi nie izói ínotiomoi? Dani ómoimona cáimadua uailai líinofirediomoi; mei íadi daade Juziñamuimona bitíuai, ie cáimadua uai jenóñediomoi. Jira ínonidiomoi.

45 Cue Moo uiecori ómoimo fiénidifue cue nitalle comécido facáoiñeno iri. Uáfueña Moisés ómoimo fiénidifue nítaite, nií omoi úiñogamie.

46 Moisés daináuai omoi ínoiadi daje izói cuemo ínoitiomoi, mei Moisés cueri ñue cúeteza.

47 Mei íadi afémie cuegáuai omoi ínoñeniadi ¿nie izói ómoína cue daináfueña ínoitiomoi? ¡ínoñeitiomoi! —daide.

6

Jesús cinco mil íñiaí ecade

(Mt 14.13-21; Mr 6.30-44; Lc 9.10-17)

1 Afe meífodo Galilea jorai ruícaferaimo jaide. Afe jorai jíáfodo mameína: Tiberias.

² Aillo comini íedo jáidiaioi, cíofinina ráaniai ie fínuana íaioi ciónamona. Ua iráredino jíllotana ciódiaioi.

³ Ie mei Jesús ídumo ráizaide ie llófuegamaci diga.

⁴ Ja judíuai rafue páscuafue áinozide.

⁵ Jesús érocaillano aillo afémie óodana bitínona ciode. Jira Felípena daide:

—¿Ninómona nana bimaci ecállena íbaiticai? —daide.

⁶ Afe daí jícanote, Felipe uai úana onóllena. Jesús dama ie finóllifue ñue onode.

⁷ Iemo Felipe uai ote:

—Doscientos dígabe fidi pan dúciñeite naga come jéenino óllena, —daide.

⁸ Ie jira jáie llófuegamie Andrés, Simón Pedro ama, Jesuna daide:

⁹ —Benó daa dúemiemo cinco diga panes ite mena chamu diga. (Bie pan cebada finoina.) Mei íadi iere duera; aillo comini íllaza, —daide.

¹⁰ Ie mei Jesús daide:

—Nana íaioi ráilleza afémacina omoi daíri, —daide.

Afénomo aillo raitire ite. Iemo cinco mil íñiaí raizídaitiaioi.

¹¹ Ie mei Jesús pan llínnota Juzíñamuina “Iere figora” daide.

Dáinamona llófuegamacimo fecade. Afemona llófuegamaci nana ráiedinodo fecade. Jesús daje izói finode mena chámuna, ua nana ríiacadinodo fecade.

¹² Jae íaioi jeírilla mei ie llófuegamacina daide:

—Fiébidinuai nana iráiri, daa báíñelleza, —daide.

¹³ Fiébidinuai doce diga cirigai iráica. Ua cinco diga panes fiébidinomona diga cirigai oruítaga.

¹⁴ Ie mei comini bie cíofinina raa Jesús fínua ciónamona daidíaioi:

—Uafue bímie afe jaiái nanómona lloga ana éniemo bíacade uai lloraíma, —daidíaioi.

¹⁵ Mei íadi comini íena ríire lláitano illáimana jóoneacana Jesús fidíbicaide. Fidíllanona Jesús dama meine idu caifónedumo jaide.

Jesús jainoi emódodo macade

(Mt 14.22-27; Mr 6.45-52)

¹⁶ Ja nauídemo Jesús llófuegamaci ana jóraimo jáidiaioi.

¹⁷ Dúciillano nocaemo jaillano, jorai ruícaferaimo Capernaúmo jaitádiaioi. Jae jí tiredemo, mei íadi nai Jesús meine abído biñede.

¹⁸ Iemo aillo jairifo daingo náidacaide. Iemona bagua móonaioicaide.

¹⁹ Due bai jáidiaioimo Jesús nocaemo ánozillana ciódiaioi. Jainoi emódodo macade. Iemo jacíruitiaioi.

20 Mei jira íaioina daide:

—Cueza, omoi jacíruiñeno, —daide.

21 Iemona caimare nocaemo íena llínotiaioi. Iemona íaioi jáillinomo nitaca izói jarire dúcidiaioi.

Comini Jesús jénua

22 Jáírui meífodo jorai enéferaimo fiébidimaci, llófuegamaci daa ite nocaedo jáillana fidídiaioi. Iadi Jesús afémaciri jáiñede.

23 Mei íadi biruícana jáie nocáiai Tiberias jófueмона dúcizaide. Ua pan güilla áinori Ocuíraima Jesús “fere figura” daínamona, ua afénomo dúcizaidiaioi.

24 Dai Jesús dñomo iñénana cióillano ie llófuegamaci diga, afécaiamo jofo jáidiaioi. Iemona Capernaúmo íena jénuaidiaioi.

Jesús, zíñona cáaille paana maméidimie

25 Jorai ruícaferaimo dúciillano, Jesús baitíaioi. Baillano íena jicánotiaioi:

—Llófueraima ¿niruido benomo dúcidio? —daidiaioi.

26 Jira Jesús daide:

—Uáfueña ómoína dáitícue, güillena omoi jeírillamona cuena jénuaibitiomoi. Cue finoca cíofinina raa omoi onónamona cuena jenóñediomoi.

27 Fúifirede güillemo táijíñeno iri. Mei íadi fúíñeite güillemo táijiri. Afe güille ómoína zíñona itátaite. Afe bie güille ómoimo íitícue mei Nanoide fima Jitódícueza. Mei ua, omoi uáfueña íinogamiéna jae Moo Juzíñamui jónegacueza.

28 Jira jicánotiaioi:

—¿Minícana fínoíticai Juzíñamui jitaille raa cai fuitállena? —daidiaioi.

29 Jesús uai ote:

—Juzíñamui orécamiéna omoi íñollena jitáirede, —daide.

30 Iemo jicánotiaioi:

—¿Minica onótaite raa caimo ácataredio, afe cióillano ona cai íñollena? ¿Minícafue fínoítio?

31 Cai jaiáidígima zaféredizicimo maná güitíaioi; Juzíñamui Cuegáuai daína izói: “Juzíñamui monámona ana baiítaga güilleniai áfena íaioi güitátate,” —daide.

32 Jesús uai ote:

—Uáfueña dáitícue: monámona baiide güilleniai fecáraima Moiséñede. Mei íadi uáfueña monámona baiide güilleniai fecáraima cue Moo.

33 Juzíñamui fecaca güilleniai, monámona ana bitímie. Afémie cáaille paana maméidimie. Afémie énie itímacimo zíñona cáallinona itátaite, —daide.

34 Iemo íena daidiaioi:

—Ocuíraima, bie güilleniai nágarui cai ine, —daidiaioi.

35 Jira Jesús daide:

—Cue cáatate gülledicue. Cuemo bitímie jaca júfiruiñeite. Cuemo ñnotimie jaca ninomo jóroacañeite.

36 Mei íadi ómoína cue daina izói, cuemo ñnoñediomoi nai cuena ciódiomoi íadi.

37 Nana Juzíñamui cuemo fecácamací cuemo bífireitiaíoi. Cuemo bífireitinona jino dótañeiticue.

38 Uafue, cue comeci jitaina izói finóllena, monámona ana biñédicue, mei íadi cue orédimie comeci jitaina izói ana fínuaibiticue.

39 Cue Moo, ua cue orédimie, nana cuemo igánomona buna oni ninó báiiñeillena jítaide. Ua nana afémaci íirairuido cáadinona itátaiticue.

40 Cue orédimie nana Juzíñamui Jitona ciódimaci íena ñnollena jítaide. Daií íaíoi ñnuamona zíñona cáaillinona íaíoi mo íllana cue orédimie daje izói jítaide; ie mei íirairuido cáadinona íaíoi na itátaiticue, —daide.

41 Iemona judíuai Jesurí gugúritiaíoi. Ua ie daináfueri: “Monámona ana baíide gülleniaina maméidimiedicue” íeri gugúritiaíoi.

42 Daidíaíoi:

—¿Bímie José jító Jesúñede? Ie moona onódicai ie ei diga. ¿Nie izói “Monámona ana bitímiedicue” daiírede? —daidíaíoi.

43 Jira Jesús íaíoi na daide:

—Gugúriño.

44 Buna cuemo bínide, cue Moo, cue orédimie nai átiñenia. Ie mei íirairuido afémiena cáadimiena itátaiticue.

45 Uai lloraini ciegánicuai llote: “Nana afémaci Juzíñamui llófuegamaciza íitiaíoi.” Daií nana Moomo cacádino, afémiemona fibítagamaci cuemo bitíaíoi.

46 Bie izói cue daina dáarie Moo Juzíñamuina ciona daiíacañede. Dama Juzíñamuimona bitímie Moona ciona.

47 Uáfueña ómoína dáaiticue: cuemo ñnotimie mo zíñona cáaillinona íte.

48 Cue cáatate gülledicue.

49 Omoi jáíairagíma zaféredizicimo manana güitíaíoi, mei íadi nana jae tíidimaci.

50 Iadi cue daina monámona ana bite gülledicue güitino tíiñeitiaíoi.

51 Cue dama afe bie monámona ana bite cáatate gülledicue. Bie güille güitímie zíñona íite. Bie cue ille güille dama cue íeizi. Afena íiticue nana énie imaci cáallena, —daide.

52 Iemona judíuai dani íaíoiri júfidotiaíoi. Daidíaíoi:

—¿Nie izói bímie dama ie íeizina caina écaite? —daidíaíoi.

53 Jesús íaíoi na daide:

—Uáfueña ómoína dáititue: Nanoide fima Jitódicueza; cue íeizi omoi riñeniadi, daje izói cue die omoi jíroñeniadi nai omoi cáaillinona iñede, dájena cuemo jaináñena jira.

⁵⁴ Cue íeizi ritímiemo, daje izói cue die jiródimiemo comeci zíñona cáaillinona ite; ie mei írairuido afémiena cáadimiena itátitue.

⁵⁵ Cue abi uafue güille. Cue die uafue jirólli.

⁵⁶ Cue íeizi ritímie, jíái cue die jiródimie ja cuemo dájena ite. Daje izói afémiemo dájena ititue.

⁵⁷ Cue caade Moo orécacue, jira afémiedo cáaditue; daje izói cue ríitímie cuedo cáate.

⁵⁸ Monámona ana bite gülleri úrititue. Bie güille omoi jaiáidigima güiga maná izóiñede. Nana afémaci tíidimaci; mei íadi bie güille güitímie zíñona iite, —daide.

⁵⁹ Jesús Capernaúmo ite Juzíñamui uai llófueriracomo nana bífuiai íaioimo llófuete.

Zíñona cáatate uailai

⁶⁰ Bie llófuiana cacáillamona, aillo Jesudo jáidimaci daidíaioi:

—Bie afémie daína afe jeire ollúuai iere féirede. ¿Bu áfena jeire órena? —daidíaioi.

⁶¹ Iemona Jesús íaioi gugúrillana onóbicaide. Onóillano jicánote:

—¿Aféfuiai ómoína íáiruificaitade?

⁶² Ie mei Nanoide fima Jitó nano ie illánomo caifo ie jáillana omoi cióadi, ¿ñie izói íitiomoi?

⁶³ Cai joreño cai cáatate. Íeizi cáatañede. Omoína cue daínauaillai joreño izoide uafue uailai. Cáataitíaioi.

⁶⁴ Mei íadi ómoimona dámierie nai íñoñediaioi, —daide.

Jesús afe íñoñedimaci nanómona onode. Afe llezica íena éoidimacimo fécaitimiena onode.

⁶⁵ Ie mei daide:

—Iemona ómoína dáititue, Moo átiñenia buna cuedo bínide, —daide.

⁶⁶ Aféruimona aillo Jesudo jáidino íena fiénocaidíaioi. Ja íedo macáñediaioi.

⁶⁷ Ie jira ie doce díga llófuegamacimo jicánote:

—¿Omoi daje izói jáiacadiomoi? —daide.

⁶⁸ Mei íadi Simón Pedro uai ote:

—Ocuíraíma, ¿bumo jáiredicai? Zíñona cáatate uailai omo ite.

⁶⁹ Ja cai ínoticaiza. Onódicai caade Juzíñamui Jitódioza. Crístodio, —daide.

⁷⁰ Jesús íaioína daide:

—Jae doce dígamie nizéditue; mei íadi omoi cígimona dámie Taife izoide, —daide.

⁷¹ Afe dáinado Jesús Júdari úrite. Judas Iscariote Simón jító. Afémie Jesuna éoidimacimo fécaitimie, mei íadi afémie doce dígademona.

7

Jesús ámatiai íena íinoñediaioi

¹ Afe méifodo, Jesús Galilea éniédo macade. Judéamo íacañede, dinomo judíuai ie íaioi fáiacana jira.

² Ja bizáinillaimo irázillafue ánozide. Afefue judíuai rafue.

³ Ainozillamona ie ámatiai íena daide:

—Benó fiébiñeno. Judéamo o jairi, dinomo ite odo jáidino o finócafuenta cíoillena.

⁴ Dáamie nana comini íena íaioi onóillena jitáidi, ie raana báinino finóñede. Afe áillofuiái o finóadi nana comini uícomo finori, —daidíaioi.

⁵ Bie izói daidíaioi, mei nai ie ámatiai íena íinoñediaioiza.

⁶ Jira Jesús daide:

—Cue ñue illíruimo nai dúciñede. Mei íadi ómoimona nano nígarui ñuera.

⁷ Enie imaci ómoína éoinide, mei íadi cuena éoidiaioi, nibai íaioi fiéni finócafuiái uai nabáiraimadicueza.

⁸ Mai ráfue mo omoi jai. Nai jáiñeiticue, cue ñue illíruimo nai dúciñede.

⁹ Daí dáina mei Galiléamo fiébide.

Jesús bizáinillai irázillafuemo jaide

¹⁰ Ie ámatiai jailla mei, Jesús daje izói ráfue mo jaide, mei íadi uáfodo jáiñede. Jabo báinino jaide.

¹¹ Judíuai afe rafue ana íena jenódiaioi. Daidíaioi:

—¿Ninomo mei afe iima ite? —daidíaioi.

¹² Comini cígiedo aillo afémieri úritiaioi. Dáarie, “Ñúemie,” daidíaioi. Jáimaci, “Fiénidimie; mei comínina jífujeteza,” daidíaioi.

¹³ Mei íadi judíuaina jacíruillano buna afémieri uáfodo úriñede.

¹⁴ Ja rafue cigi iruido Jesús Juzíñamui gairíracomo jofu jaide. Jaillano dinomo llófuellena tainede.

¹⁵ Iemona judíuai fáigacaillano daidíaioi:

—¿Nie izói bie iima diga ráfuiaina onode, afémie nai llófueñegamo? —daidíaioi.

¹⁶ Jira Jesús uai ote:

—Cue llófuegauai cúeieñede; mei íadi cue orédimie ie.

¹⁷ Dáamie Juzíñamui jitailla izói finóacania, afémie cue llófuegauai Juzíñamuimona bitíuaina ónoite. Afe llezica dama cue jitailla izói llófueñedicuena ónoite.

18 Dama ie comeci jitailla izói úritimie, comini íemo ñúefuena nitállena úrite. Mei íadi íena orédimie mo ñuera ráfuena nitáacadi mie uáfuena dáite. Afémiemo jífuiafuena ññede.

19 ¿Omoimo ocuica uaillai Moisedo ómoimo iga? ¿Ero ua? Mei íadi buna ómoimona aféuai jeire oñena. Aféuai jeire onédimiedicue izói, ¿ñibái mei cue fáiacadiomoi? —daide.

20 Jira comini uai ote:

—Omo fiénide joría illa. ¿Bu o fáiacana? —daidíaioi.

21 Jira Jesús daide:

—Daa raa ocózinaillarui mo cue finuari nana fáigacadiomoi.

22 Mei íadi úrue bacano icoi quétajana facátafue Moisés ómoimo iga. Jira íiza bacano icoi quetádiomoi ocózinaillaruido íadi. (Moisés afefue táineñegaza; jáiairagimaci taineca.)

23 Mei jira Moisés ocuica uaillai nana ñue fuizáillena, íiza bacano icoi omoi quetáadi ocózinaillarui íadi, ¿ñibái ríicadiomoi iima abi námiena cue jíllotaia ocózinaillarui mo?

24 Mai jinófene éroillano comini ifue nitáañeno. Omoi nitáadi jaícina uáfuena nitari.

Jesús ie comuállanodo úrite

25 Ie mei Jerusalemo dáarie itínomona jicánuaidiaioi:

—¿Bímie íaioi fáiacagamieñede?

26 Mei íadi batínomo comini cígimo úrite íadi buna nie izói daiñena. ¿Uáfuena caifóidimaci bímie Crístoza íñotiaioi?

27 Mei íadi cai, afémie ninómona ie bíllana onódicai. Iadi ibana Cristo bíadi, buna ninómona ie bíllana ónoñeite, —daidíaioi.

28 Afena cacáillano Jesús nai gairíracomo llófuia llezica riire daide:

—¿Cuenta onódiomoi za? ¿Ninómona bitícueza onódiomoi? Mei íadi dama cue comeci izói biñédicue, íadi caade cue orédimie mona biticue. Afémie jaca itímie. Afémiena onóñediomoi.

29 Afémiena onódicue, afémie mona bitícueza, ie orécacueza, —daide.

30 Iemona íena lláviano úiacadiaioi. Mei íadi nai buna íena llaitáñede, nai ie llaitáillirui mo dúciñedeza.

31 Mei íadi aillo comini íemo íñotiaioi; daidíaioi:

—Cristo bíadi ¿bímie finoca cíofinina onótafuiaí baimo fínoite? —daidíaioi.

Fariséuai llazíriraini orede, Jesús lláviano úillena

32 Fariséuai comini Jesuna dánana cacádiaioi. Jira lletáriraini illaini, gairíraco jabóidillaímaiaí orede Jesús llaitada úillena.

33 Jira Jesús uai ote:

—Omoi cígiri dama íanori nié dino ííticue. Ie méifodo cue orédímie diné jáíticue.

34 Cuená jénoitiomoi mei íadi cuena báíñeitiomoi, cue illínomo jáinidiomoiza, —daide.

35 Ie mei judíuai dani íaioimo jicánuaidiaioi:

—¿Bímie ninomo jáite, íena cai báíñeilla? ¿Judíuai júdaicamaci griego éniemo afémie jáite, griego imaci llófuellena?

36 Ie dáinana, “Cuená jénoitiomoi mei íadi cuena báíñeitiomoi, cue illínomo jáinidiomoiza,” ¿nie izói daide? —daidíaioi.

Jesús, jáinoi izói cómena cáatate

37 Rafue írairuimo jamánomoidirui. Aféruído Jesús naidáillanona como aillo uaido úrite:

—Nana jirócadímie cuemo bi; júruabi.

38 Cuegáuai dáina izói, cuena ínotímie ie comécimona áillue imani tua izói aillo ñue cáataitífuiaí biite, —daide.

39 Aféfuedo nana afémiena ínotino Ñuera Joreño llínoitiaioi daide. Ua mei, Ñuera Joreño nai biñede, Jesús ie cámafue ebíredífue díga nai llínoñena jira.

Comini Jesuna daínáfuiaí jáífodorie jóide

40 Dáarie comini cígimona aféfuena cacáillano daide:

—Uáfuena bímie uai llóraima, jiaíi ninomo bíacadímie, —daide.

41 Jáíimaci daidíaioi:

—Bie ua Cristo.

Mei íadi jáíimaci daidíaioi:

—¿Nie izói Cristo dino Galilea ímieite?

42 Cuegáuai lote: “Jáiaidillaíma David, ie izíe ímiena Cristo iite. Ua Belén ímiena iite, afe jófuemo nauí David íteza,” —daidíaioi.

43 Daíí nana comini Jesús ícoínia dázierie bózietaidiaioi.

44 Dámierie Jesús maíáno úiacadiaioi, mei íadi buna daíí ñeñena.

Caifoide ríiredino Jesuna íñoñediaioi

45 Gairíracó jabóllaini abído fariséuai illánomo, daje izói lletáiraini illaini illánomo bitíaioi. Afémaci íaioimo jicánote:

—¿Nibái mei íena atíñediomoi? —daide.

46 Jira jabóllaini (jáífodo mameina llavériraini) uai otíaioi:

—Jaca ninomo buna afémie úrilla izói úriñede, —daidíaioi.

47 Jira fariséuai daidíaioi:

—¿Omoi daje izói ja jífuegamacidiomoi?

48 ¿Cai illáicomini dáarie íena ja ínotiaioi fariséuai diga? ¡Jaca ínoñediaioi!

49 Mei íadi bie comini ocuífafuai onóñediaioi, ja faidócaiaioiza, —daidíai.

50 Nicodemo, naio Jesumo eróizaibitimie daa fariseo imácimona. Iaioina daide:

51 —Cai ocuífafue daina izói buna duere finónidicai, nano fueñe íena cai cácañeniadi, ie finócafueña cai ónoillena, —daide.

52 Mei jira uai otíai:

—¿O jíai daje izói Galilea ímiedioza? Cuegáuai fácado. Dinomo cíotio buna uai llórama Galiléamona biñede, —daidíai.

Jiruíredingo Jesumo atídiaioi

53 Mei íemona naga come íaii jofomo jaide.

8

1 Mei íadi Jesús Olivo daina ídumo jaide.

2 Ie jítiramo monáillamona, abido gairíracomo bite. Nana comini íemo ánozidiaioi. Afémie ráinaillano íaioina llófuaide.

3 Ie mei ocuífafue llófueraini fariséuai diga jiruíredingo Jesumo atídiaioi. Daí ñécade afengo baitíai. Afe gairíracomo ítimaci cígimo aféngona jóonetiaioi.

4 Jóoniano Jesuna daidíai:

—Llófueraima, bie ringo afe jiruírenafue finócade baiticai.

5 Afe izoide ringona Moisés ocuífafue cai ocuide noficiaido fállena. ¿O nie izói daidio? —daidíai.

6 Daí daidíai Jesús facátallena. Bie facátamona fiénidifue íemo nitácadiaioi. Iemona Jesús jíjicaillano éniemo onócaido cuete.

7 Mei íadi diga icaiño jícanotiaioimo Jesús meine jaícina rainade. Ráinaillanona daide:

—Omoimona dáamie fiénidifueña íñédimie, mai nanoide nofici aféngomo nitari, —daide.

8 Dáanomomo nane jíjicaillano éniemo cuete.

9 Mei íadi aféfuena cacáillano, nana íaii comeci úrilla uaido méaicaidiaioi. Méaicailano oni nana dáarie jáioidiaioi. Ua iere éicomedimie úcodo oni jailla. Nana ja íaii jailla mei, Jesús dama dinó fiébide afe atícango diga.

10 Iemo Jesús jaícina meine rainade. Afe ringo baimo buna cíóñenano aféngona daide:

—Ringo, ¿ninomo omo fiénidifue jítádino ite? ¿Buna omo nofícina nitáñena? —daide.

11 Jira afengo daide:

—Ocuíraima, ua buna nitáñede, —daide.

Mei jira Jesús daide:

—Cue ona daií nítaiñeiticue. Mai o jairi. Fieni meine abido daií ñeñoeno iri, —daide.

Jesús, bie énie comini egáñoraíma

¹² Jesús dáanomo nane comínimo úrite; daide:

—Cue bínie comini egáñoraímadicue; cuedo jáitimiemo cáataite egáñua iite. Jaca nino jítifodo mácañeite, —daide.

¹³ Ie jira fariséuai íena daidíaioi:

—Dama o uai nabáidío. Afe uai ráifiñede, —daide.

¹⁴ Jira Jesús uai ote:

—Cue daína uáfueña ráifide, afe dama cuemo uai nabáidicue íadi. Cue ninómona biticue, daje izói cue jáillinona onódicueza. Mei íadi ninómona biticueza onóñediomoi, cue jáillinona diga.

¹⁵ Bie énie facárado jenócana facádiomoi; cue buna jenócana facáñedicue.

¹⁶ Mei íadi cue facáadi, cue facállifue jaícina ñue jóide. Dama facáñedicueza. Moo, cue orédimie diga dáanomo jenoda facádicoco.

¹⁷ Omoi ocuica ciegáuai daide: “Mena uai nabáiraíma dáanomo daiíadi, aféfuena ínoitiomoi.”

¹⁸ Cue dama cueri uai nabáiraímadicue. Cue Moo, cue orédimie jáíie cueri uai nabáiraíma, —daide.

¹⁹ Jira jicánotiaiioi:

—¿Ninomo mei o Moo ite? —daidíaioi.

Jira Jesús uai ote:

—Omoi cuena onóñediomoi. Daje izói cue Moona onóñediomoi. Cuena onódiomoi nia, daje izói cue Moona onódiomoiiza, —daide.

²⁰ Gairíracomo llófuia llezica, afe bíuai daide; ua fia fecaca úcube jóneraco illánomo dinomo llófue. Mei íadi buna íena lláviano uiñede, ie llaitáilliruimo nai dúciñena jira.

Cue jáillinomo jáinidiomoi

²¹ Jesús nane dáanomo íaioina daide:

—Cue jáitícue. Cuena jénoitiomoi, íadi omoi fiénidifue nai doñégamo tíitiomoi. Mei jii cue jáillinomo omoi jáinidiomoiiza, —daide.

²² Jira judíuai dani conímana daidíaioi:

—¿Mei nibai afémie dama abi títaite, mei “Cue jáillinomo jáinidiomoi” afémie caina dáideza? —daidíaioi.

²³ Jira Jesús íaioina daide:

—Omoi ana bebeco iédiomoi, mei íadi cue caifófeco ímedicue. Omoi bie énie iédiomoi, mei íadi cue bie énie ímieñedicue.

24 *Ie jira omoi fiénidifue nai doñégamo tíitiomoi daidicue. Cue daina izói itímiedicuenta omoi íinoñeniadi, omoi fiénidifue nai doñégamo tíitiomoi, —daide.*

25 *Jira jicánotiaioi:*

—*Mei ¿o búdio? —daidíaioi.*

Jira Jesús uai ote:

—*Jaiai nanómona ómoimo lloticue.*

26 *Cuomo aillo ómoína cue daiíllifuiái ite. Daje izói aillo ómoína cue jenoda facállifuiái ite. Cue orédimie uáfuenta daide. Afémiemona cue cacana izói bie énie comínina áfedo daidicue, —daide.*

27 *Mei íadi Moodo íaioimo Jesús úrillana figo cacáñediaioi.*

28 *Jira Jesús íaioína daide:*

—*Enie acónimo cuena caifo omoi raiñóadi cue daina izói itímiena ónoitiomoi, mei Nanoide Hima Jitódicueza. Afe llezica dama cue começi izói finófinidicueza ónoitiomoi. Dama cue Moo cuemo llogáfuiái daidicue.*

29 *Cue orédimie jaca cue diga ite. Cue Moo dama cuena fiéñede, afémie ióbitadifuiaina finofiredicueza, —daide.*

30 *Jesús daií dáinamona, aillo íena ínotiaioi.*

Juzíñamui jitóniai fiénidifuedo jeruícamací baimo ñue itíaioi

31 *Afemona judúuaimona íena ínotinona Jesús daide:*

—*Cue ómoína dáinana omoi jaícina jeire oíadi, cue lófuegamacina uáfuenta jáitiomoi.*

32 *Ie mei uáfuenta ónoitiomoi. Afe uáfuedo jéruíñegamacina íitiomoi, —daide.*

33 *Afémaci ie uai otíaioi:*

—*Abraham izíedicai. Jaca ninomo buna jéruíñegamacidicai. ¿Nie izói, jéruíñegamacina íiticaí, daidío? —daidíaioi.*

34 *Jira Jesús daide:*

—*Uáfuenta ómoína dáitícue, nana fiénidifue finódimaci fiénidifuedo jeruícamací.*

35 *Jeruícamié ie naama izíe diga jaca ínide. Mei íadi naama jitó aféziemo jaca jainaide.*

36 *Daií mei Juzíñamui Jitó jeruíñenafue ómoimo fecáadi, uáfuenta jéruíñelliomoi.*

37 *Abraham izíe iédiomoiiza ja onódicue; mei íadi cuena fáiacadiomoi, ómoína cue daináfuenta omoi llíinoñena jira.*

38 *Cue Moo cuemo ácataga raado úritícue. Omoi moo daina izói finófirediomoi, —daide.*

39 *Jira uai otíaioi:*

—*Cai moo Abraham, —daidíaioi.*

Mei íadi Jesús daide:

—Uáfuenta Abraham jítóniaina omoi íadi, afémie fínua izói fínóitiomoi.

⁴⁰ Mei íadi Moo Juzíñamui cuemo lloga uáfuenta ómoína cue daina íadi, nai cuena fáiacadiomoi. Abraham jaca daí fínóñede.

⁴¹ Omoi moo fínua izói fínódiomoi, —daide.

Jira afémaci daidíaioi:

—Jaca jiruúrenamona jócoñegacai. Caimo daade moo illa, Juzíñamui, —daidíaioi.

⁴² Jira mei Jesús daide:

—Juzíñamui uáfuenta omoi móodena, cuena izíruiomoi, mei Juzíñamui mona cue billa jira. Ua ie jira benó iticue. Dama cue comeci izói biñédicue, mei íadi Juzíñamui orécacue.

⁴³ ¿Nibái mei cue dáinana cacánidiomoi? Cue úrilla uaina cacáacañediomoi, jira onóñediomoi.

⁴⁴ Omoi moo Taife. Ie jira afémie iédiomoi. Afémie jitaina izói finóacadiomoi. Taife jaca nanómona fáfiredimie. Jaca uáfue jaináñede. Jaca uafue daíñede. Táinofuiái afémie lloíadi, ie illa izói úrite. Afémie táinofuiairede, ua táinofuiái moo.

⁴⁵ Mei íadi uafue daidícuemo cuena íñoñediomoi.

⁴⁶ ¿Omoi mona bu cue fiénidifue jino due ciotarede? Uáfuenta cue daíladi ¿nibái mei cuena íñoñediomoi?

⁴⁷ Juzíñamui iédimie Juzíñamui uáillaina cácafiredi. Mei íadi Juzíñamui íeñediomoi, ie jira íena cacáacañediomoi, —daide.

Cristo Abraham nano jae itímie

⁴⁸ Jira judíuai íena daidíaioi:

—Omo fiénide joreño íllana onódicaiza; íemo Samaria ímiena o íllana, onódicaiza, —daidíaioi.

⁴⁹ Jesús uai ote:

—Cuemo fiénide joreño jaca íñede. Cue finócafue cue Moomo ñúefuena nitade. Omoi cuemo ñúefuena nitáñediomoi.

⁵⁰ Cuemo ñúefuena nitállena jenóñedicue, íadi jíaimie ite cuemo ñúefuena nitállena. Afémie jenoda facade.

⁵¹ Uáfuenta ómoína dáititcue, cue daináfuenta jeire otímie jaca ninomo tíñeite, —daide.

⁵² Jira judíuai uai otíaioi:

—Fiénide jóriai omo íllana ja uáfuenta onódicai. Abraham jaiái tíide naa uai llóraini diga, niadi jíáifodo daidíoi: “Cue dáinana jeire otímie jaca ninomo tíñeite.”

⁵³ ¿Uáfuenta cai moo Abraham baimo jáidíoi? Afémie tíide. Ua uai llóraini daje izói tíidiai. ¿O comécimo bu o íllana facadíoi? —daidíaioi.

⁵⁴ Jesús dinena íaiomoi uai ote:

—Dama cuemo ñúefuena cue nitáadi, cue ñúefuena minícana ráifiñede. Mei íadi ñúefuena cuemo nitádimie cue Moo. Dáamiena omoi Juziñamui daidíomoi.

⁵⁵ Mei íadi íena onóñediomoi. Cue íena ua onódicue. Afémiena onóñedicue cue daííadi, omoi izói táinofuiairedimiena íitícue. Mei íadi íena uáfueña onódicue. Ie dáinana jeire oticue.

⁵⁶ O jaiáidigima Abraham cue illíruina cióacade áfemona ióbillena; áfena cióillano afémie iere ióbicaide, —daide.

⁵⁷ Jira judíuai Jesuna daidíaiói:

—Nai cincuenta fimona iñédio, ¿Nie izói “Abraham cuena ciode” daidíoi? —daidíaiói.

⁵⁸ Jesús uai ote:

—Uáfueña ómoína dáitícue: Abraham nai iñeniadi cue iticue, —daide.

⁵⁹ Iemona noficiai llínota Jesumo nitáacadiaíoi. Mei íadi afémie retáirillano gairíracomona jino jaide. Afémaci cígido jaillano finocaide.

9

Jesús uina cíoiñede jocócamie jíllotate

¹ Afénodo jaillano, Jesús uina cíoiñede jocócamiena ciode.

² Ie llófuegamaci íemo jícanote:

—Llófueraíma, ¿nibái mei bie íima uina cíoiñede jococa? Nibai ie moo fiénidífuiaí ícoínia daíí jococa. Nibai dama ie fiénidífue finua ícoínia daíí jococa. ¿Bífuiaímona nifue uáfueña? —daidíaiói.

³ Jira Jesús daide:

—Dama ie ícoíniañedeza, jíai ie moo ícoíniañedeza. Mei íadi afémiemo Juziñamui finóllifue ñue jino ácatallena, daíí íficaide.

⁴ Nai monana llezica cue orédimie táijinafue cue finua jítáiredeza. Ja nauilla llezica buna táijinide.

⁵ Nai bie éniemo cue illa llezica, énie comini egáiñotimiedicueza, —daide.

⁶ Afe dáina méifodo, Jesús éniemo tuánote. Tuánogamona ja énie ídiaide. Afe tuánua ídiaidemona ota, uina cíoiñedimie uimo bitade.

⁷ Ie mei íena daide:

—Siloé jainoi ofillanomo jócuai, —daide. Afe Siloé mámecei jino dobáiñua dibéneço “Orécanona” mameide.

Iemona uina cíoiñedimie ui jócuaide. Meine bítemo ja cíoiide.

⁸ Iemo ie abi comini, daje izói nauí uina ie cíoiñenana cíódino diga daidíaiói:

—¿Bímieñede, nii ráicana úcube jícafiredimiñede?

⁹ Dáarie daidíaiói:

—Jii, níimie.

Jiáimaci dinena daide:

—Ieñede, mei íadi afémiena eroide, —daidíaioi.

Mei íadi afémie dinena dama daií daide:

—Jii, níimiedicue, —daide.

¹⁰ Jira íemo jicánotiaioi:

—¿Nie izói ja ciódio? —daidíaioi.

¹¹ Jira afémie uai ote:

—Afe iima, Jesuna mámeciredimie, ídiaidino fínuano cue uimo bitade. Bítanona daide: “Siloé jainoi ofillanomo o ui jócuai.” Jócuaidicue. Iemona cue jócuaillamona ciódicue, —daide.

¹² Jira íemo jicánotiaioi:

—¿Ninomo afe iima ite? —daidíaioi.

Iaioina daide:

—Ico mei, —daide.

Fariséuai jíllotaga uina cíoiñedimie jicánodoidiaioi

¹³ Iemo fariséuaimo nauí uina cíoiñedimiena uitíaioi.

¹⁴ Jesús ídiaidino finuarui, afe ocózinallarui. Aféruimo Jesús uina cíoiñedimie jíllotate.

¹⁵ Fariséuai afe íimana nie izói afémie ui cíoinafue meine abido jicánotiaioi. Iemo afémie íaioina daide:

—Cue ui ídiaidina bitade. Jira jócuaidicue. Iemona ja ciódicue, —daide.

¹⁶ Jira fariséuaimona dáarie íena daidíaioi:

—Afefue finódimie, Juzíñamui ímieñede, ocózinallaruina íinoñena jira.

Mei íadi jiáimiai daide:

—Afémie fiénidifue finóraima íadi, ¿nie izói bie cíofinina finócafue fínoite? —daidíaioi.

Comini bózietaillamona

¹⁷ meine nauí uina cíoiñedimie jicánuaidiaioi:

—¿O afémiena nie izói daidío, o ui cíoitatimiena? —daidíaioi.

Jira afémie daide:

—Afémiena uai llóraima daidicue, —daide.

¹⁸ Mei íadi judíuai afe uina cíoiñedimie finócafueña íinoiacañediaioi. Ie ja cíonafueña íinoiacañediaioi. Ie jira jíllotagamie móotiaina uáidotiaioi.

¹⁹ Iemo jicánotiaioi:

—¿Afe nñ be o jító uina cíoiñede jocócamie ómicoi daina? ¿Nie izói mei birui ciode? —daidíaioi.

²⁰ Ie móotiai uai ote:

—Onódicaiza bie cai jító; uina cíoiñede jococa.

21 Mei íadi nie izóí afémie como ciónana onóñedicai. Daje izóí bu ie ui jíllotana onóñedicai. Afémiemo jícano. Jae eicómeza. Aféfuena onódeza. Afemona uai óite, —daidíaii noi.

22 Ie móotiai daíí úritiaillínoi judíuai jacínaillamona. Judíuai jae nana comini onótatíai noi. Daidíai noi:

—Nágamiiai Jesús ua Cristo dainámiena mámeitimie Juzíñamui uai llófueriracomona jino júitícaí, —daidíai noi.

23 Iemona móotiai daidíai noi, “Afémiemo jícano. Jae eicómeza.”

24 Ie mei judíuai meine nauí uina cíoiñedimiena uáiduano daidíai noi:

—Juzíñamui uíecomo uáfueña caina daííri. Onódicaíza, bímie fiénidifuiaredimie, —daidíai noi.

25 Afémie uai ote:

—Afémie nibai figora, nibai fiénidifuiaredimie onóñedicueza. Daa cue onóigafue. Nano fueñe uina cíoiñedimiedicue, mei íadi biruí cíodicue, —daide.

26 Nane dáanomo íemo jícánuaídaíai noi:

—¿Nie izóí ona ñete? ¿Nie izóí o finode o ui cíoiliena? —daidíai noi.

27 Jira uai ote:

—Jae omoi llotícue, íadi cuena íñoñediomoi. ¿Níbái mei dáanomo omoi llóitícue? ¿Omoi jíái daje izóí iedo jíiacadiomoi? —daide.

28 Báíñuano íena daide:

—O bímiédo jáidíoi, mei íadi Moisedo jáidícaí.

29 Juzíñamui Moísemo úrillana onódicaí, mei íadi bie Jesús ninómona bite onóñedicai, —daidíai noi.

30 Jira afe íima uai ote:

—¡Bífue níi cácafinina raa! Ie billánona onóñediomoi, íadi cuena ñue cíoitate.

31 Fiénidífue finofiredimacimo Juzíñamui cacáñede ñue onódicaíza. Iemo afémiemo íóbicaítadinomo cacáfirede, ie jítáinafue finódimaci díga.

32 Jaca nanómona uina cíoiñede jocócamie jíllotatímie dáinana cacáñena.

33 Bímie Juzíñamuimona biñédeniadi, minícana ñénide, —daide.

34 Jira daidíai noi:

—O fiénidifuiaimona jocócamiedíoi. ¿O caina llófueacadíoi? —daidíai noi. Ie jira íena jino jíúnotíai noi.

Joreño dibéfuiaina onóñedimaci

35 Jesús uina cíoiñedimie jino íai noi jíúnuana fidíde. Ie baillano íena daide:

—¿Juzíñamui Jítomo ínotíoi?

³⁶ Jira afémie daide:

—Ocuíraima, cuemo llone bu afémiena íemo cue íinolleza, —daide.

³⁷ Jira Jesús uai ote:

—Ja ciódioza. Níimiedicue, o diga úrilla, —daide.

³⁸ Iemona afémie Jesús anari ana dújuillanona daide:

—Ocuíraima, íinoticue, —daide.

³⁹ Ie méifomo Jesús daide:

—Bie éniemo biticue, jaícina jenoda facállena. Ua biticue uina cíoiñedimie eróillena. Dáanomo biticue eróidino uina cíoiñellena.

⁴⁰ Ie mei fariséuaimona, Jesús diga itínomona, dáamierie afefue cacáillano íena jicánotiaioi:

—¿Meita cai uina cíoiñedinodicai? —daidíaioi.

⁴¹ Jira Jesús uai ote:

—Omoi uina cíoiñeniadi, omoi fiénidifuiái icoi íiñeite. Mei íadi “Cíodicai” daidíomoi jira omoi fiénidifuiái icoi ite, mei joreño dibéfuiaina onóñediomoiza, —daide.

10

Ovejai cirínoraco cai onótate

¹ Uáfuenta ómoina dáititcue, ovejai cirínoraco nazedo jáiñedimie ua meríriraíma. Enéfenemo táifodo tícaillano jofo jáidimie ua merírifiredimie.

² Mei íadi nazedo jofo jáidimie ua úiñoraíma. Níimie ie ovéjaina ñue uíñote.

³ Naze tuiñoraíma naze tuiñode afémie jofo jáillena. Ie uaina ovejai onódiaioi. Ie ovéjaíai íaioi mámedido jíríte. Daí cirínoracomona jino ófiregaíaioi.

⁴ Nana ie ovejai jino óinana méifodo, íaioi uícodo ifóicaide. Ovéjaíai ie óodana jáioicaidiaioi mei ie uaina onódiaioiza.

⁵ Mei íadi onóñegamiemo jáioicaiñediaioi. Mei jáífodo afémiemona niné botádiaioi, ónoñegamací uaina onóñena jira.

⁶ Bie daje izoide ráfuedo Jesús íaioimo llófujete. Mei íadi daí daíacana uáina onóñediaioi.

Jesús ñue ovéjaíai úiñoraíma

⁷ Iemona Jesús meine dáanomo daíúzaid:

—Uáfuenta ómoina dáititcue: Cue bie ovéjaíai jofo jaira nazédicue.

⁸ Nana cue uícomo bitímací meríriraíni daje izói bairóriraiíni. Mei íadi ovéjaíai afémacina náfueñediaioi.

9 Cue nazénaza. Cuedo jofo jáidimie jíllobicaite. Afémie cirínoracomo jofo jaide, meine jino bite. Afe jofo jáitimie oveja izóidimiena iite. Ie güille raana báifirede.

10 Meríriraíma fia merírizaibite; fájaibite, táinocaitajaibite. Mei íadi cue biticue íaioi cáatallena, ua jamánomo íocire íaioi íllena biticue.

11 Ñue ovéjaiaí úiñoraimadicue. Afe ñue ovéjaiaí úiñoraíma ovéjaiaímo ie cáallinona itátaite.

12 Mei íadi fia íbaca úiñoraíma dama úcube llínollena táijide. Jico izoide bíllana afémie cíóillano, ovéjaiaí fíianona botade. Afémie botade uáfvena úiñoraímañena jira; daje izóí ovéjaiaí íeieñena jira. Iemona jico izoide ovéjaiaína llaítade. Iemona nana jíáie ovéjaiaí júdaízitiaioi.

13 Bie íma botáfírede, daa fia íbállena táijideza. Ovéjaiaína naí lloñede. Íaioína duéruíñede.

14-15 Cue bie ñue úiñoraimadicue. Cue Moo cuena onona izóí daje izóí cue Moona onódicue. Afe izóí cue ovéjaiaína onódicue, ie izóí afémaci cuena onódiaioi. Cue cáallino ovéjaiaímo ííticue.

16 Jíáie ovéjaiaí cuemo ite. Bie cirínoraco íeñede. Cue uaina cacáillanona jeire óitiaioi. Iemona daa cirínoraco íite, daje izóí daa úiñoraíma íite.

17 Cue Moo cuena izíruite, cue abi fécaillano meine cue llínua jira.

18 Buna cue abi báiroñeite, mei íadi dama cue comeci izóí fécaíticue. Cue áfena fecáredicue, ie mei meine áfena llínoredicue. Afe bie cue Moo cue ocuilla dieze, —daide.

19 Judíuaí afe uaina cacáillano bócoízitiaioi.

20 Afémacimona aillo daidíaioi:

—¿Ñibái mei uai jeire otíomoi? Afémiemo fiénide jóriaí íllaza, íemo uáírítaide, —daidíaioi.

21 Mei íadi jíáimaci daidíaioi:

—Fiénidena jóriaíredimie jaca afe izóí úrinide, —daidíaioi. Fiénide joreño uina cíoiñedimie uina cíoitánide.

Judíuaí Jesús llínoacañeno íena ruifíruitiaioi

22 Jae rozíruillarullai. Afe llezica Jerusalemo iráizillafue finódiaioi, gairíraco Juzíñamuimo oni íficaillarui uibíñoicallena.

23 Jesús Salomón macáranodo gairíracomo macade.

24 Judíuaí Jesumo ífoína gairíllano daidíaioi:

—¿Ñie dinó caina figo onótañeítio? O Crístodio raíre uáfodo caímo llone, —daidíaioi.

25 Jira Jesús uai ote:

—Jae lloticue íadi cuena íinoñediomoi. Cue finócafuiaí cue Moo ríinodo finódicue. Afedo ñue jino ácatagacue.

26 Mei íadi cuena íinoñediomoi, cue ovéjajaiñediomoiza. Afena nauí ómoína daidícue.

27 Cue ovéjajai cue uaina onode. Iaióina onódícue, jira cuedo bitíaiói.

28 Zíiñona cáaillino íaióimo fecadícue. Jaca afémacimona dáamie niné báizaiñeite. Buna cúemona íaióimona daa báiroñeite.

29 Afémaci cue Moo cuemo iga. Afémie jamánomoidimie. Nana baimo jáidimie. Buna cue Moo Juzíñamuimona afémacina bairónide.

30 Cue, cue Moo diga dáamiedicoco, —daide.

31 Iemona judíuai meine íena noñiciaina nitáacadaíaiói.

32 Jira Jesús daide:

—Omoi eróicana diga ñúefuiaiina cue Moo ríinodo finódícue. ¿Ní fue ícoína noñiciado cue níjitiomoi? —daide.

33 Jira judíuai uai otíaiói:

—Ñúefuiai o finuamona ona níjiiñeiticai; mei íadi o uáillaido Juzíñamuina báínotío. Fia ímadío, mei íadi Juzíñamuina o abí maméacadio, —daidíaiói.

34 Jira Jesús daide:

—Omoi ocuínafuiaiimo Juzíñamui daina jae cuega. Be níuai: “Omoi juzíñamuillaidiomoi.”

35 Cuegáuai dáinana jaca jáanonide, onódicaiza. Juzíñamui, ie uailai líinotimíaiina juzíñamuillaina mameide.

36 Juzíñamui jae cuena oni ífcaitajano bie éniemo cuena orede. Ua ie orécamedícue. Jira ¿nie izói dáitío “Juzíñamuina báínotío” cue daíadi “Juzíñamui Jitódícue”?

37 Cue Moo finoca izói cue finóñenia, mai cuena omoi íinoñeno.

38 Mei íadi ie finócafue izói cue finóadi, mai aféfuiaiina íno, omoi nai cuena ínoñenia. Afemona cue Moo cuemo íllana, jabe ónoitiomoi. Daje izói cue, cue Moomo itícueza, ónoitiomoi, —daide.

39 Meine maiáno íena uíacadaíaiói, mei íadi Jesús oni finocaide.

40 Ie mei Jesús Jordán ruicáfellemo meine jaide. Dinomo fiévide. Ua nauí Juan báutizano ite.

41 Aillo comini íena eróizaidíaiói. Daidíaiói:

—Uáfueña, Juan cíofinina onótalle raa finóñede, mei íadi nana Juan bímieri daináfuiái uáfuiái, —daidíaiói.

42 Dinomo aillo comini Jesuna ínotiaíai.

11

Lázaro tíide meine cáadimíena jaide

1 Daa íima Lázaro iere irárena. Betania ímie. María ie ebuño Marta diga daje jófueño itíaiói.

² Afe María iráredimie Lázaro miringo. Afe María nauí Jesús ídaimo ziórede cárediji totade. Tótanona ie ifótiido zafénaitade.

³ Ja biruí afe miringo íainguai uai Jesumo orede, Lázaro iere tíiacana jira: llote:

—Ocuíraíma, o nabai Lázaro irárede, —daíde.

⁴ Jesús cacáillano daíde:

—Afe duico títañeite, mei íadi jamánomo ñue Juzíñamui ebírenafue ácataite. Ie llezica afe duico Juzíñamui Jitó ebírenafue ácataite.

⁵ Marta ie ebuño ie íio Lázaro diga Jesús íaíoína iere izíruiite;

⁶ mei íadi Lázaro irárenafuena fidíillanona, Jesús raire jáíñede; nai ménaruí ie illánomo ite.

⁷ Ie mei ie llófuegamacina daíde:

—Meine Judéamo cai jai, —daíde.

⁸ Jira llófuegamaci daídíaíoi:

—Llófueráíma, nano cómoicana Judíuai dino nofíciáido o fáiacadaíoi. ¿Nane meine afe diné jáiacadió? —daídíaíoi.

⁹ Jira Jesús ie tílliruí nai áinoziñenana onóillano, íaíoína onótatiuáido daíde:

—¿Uáfueñede, naga mona doce horas ite? Come monari macáadi éicitaiñede. Bie éniemo ite egáíñuana ciode.

¹⁰ Iadi come naio macáadi éicitáide; afémiemo egáíñotinona íñeídeza.

¹¹ Ie mei Jesús nai úrite; íaíoína daíde:

—Cai nabai Lázaro inídeza, mei íadi cazítaiticue, —daíde.

¹² Jira llófuegamaci daídíaíoi:

—Ocuíraíma, afémie iníadi ja jíllocaite, —daídíaíoi.

¹³ Mei íadi Jesús jáífodo daííacade, Lázaro tíide. Llófuegamaci comeci facade Jesús dáinana fia ínia llote.

¹⁴ Jira Jesús jino uáfodo íaíoína daíde:

—Lázaro ja tíide.

¹⁵ Ióbídícue afémie tíllanomo íñédicueza. Daíí ómoimona ñuera, omoi ínollena. Mei íadi cai éroizaili, —daíde.

¹⁶ Iemo Tomás, Guarámie maméidimie, jáíie llófuegamacina daíde:

—Mai cai jai, afémie diga dáanomo cai tíilleza, —daíde.

¹⁷ Jesús dúciillano como fidíide Lázaro ja cuatro dígaruí énie anamo ite.

¹⁸ Betania iere Jerusalén áinori ite, mena kilómetro átuedo izói.

¹⁹ Aillo judíuai jáidimaci Marta María diga uáiduaidiaíoi, íainguai íio tíllari. Iainguaimo fíraíbitiaíoi.

²⁰ Marta Jesús dúciana fidíillano afémiena jino cióizaide. Mei íadi María jofomo fíévide.

21 Marta Jesúna daide:

—Ocuíraima, o nibai benó itíoniadi cue íio tííñede.

22 Mei íadi onódicue naga raa Juzíñamuimona o jicáadi afémie omo iite, —daide.

23 Jira Jesús daide:

—O íio meine cáaite.

24 Iemo Marta daide:

—Jii, cue onódicueza tíidino cáadinona illíruimo, énie íirairuimo afémie meine cáaite, —daide.

25 Jira Jesús daide:

—Cue tíidino meine abido náidataraimadicue; cáadinona abido itátaraimadicue. Cuena ínotimie ie tíiadi meine cáaite.

26 Nana nai cáadino cuena ínoiadi jaca ninomo tííñeitiaioi. ¿O afefue ínotio? —daide.

27 Jira afengo daide:

—Jii, Ocuíraima, o Crístodio ínoticue. Juzíñamui Jitó ana éniemo bitímiedioza. Afena ínoticue, —daide.

28 Daií dáina méifodo, Marta ie ebuño María uáiduaide. Báinino aféngona daide:

—Llófueraima benó ite. O jíritade, —daide.

29 Afena cacáillano María raire náidacaillano Jesumo eróizaide.

30 Nai Jesús afe jófuego jofo jáiñede. Marta ie baizájillanomo nai ite.

31 Jofo ite judíuai afengo fíraidiaioi. Afengo náidacaillano, raire jino jáillana judíuai cíoillano, aféngodo jáidiaioi. Afémaci comeci facádiaioi, afengo raiafo dinomo éeiaide.

32 Ie mei María Jesús illánomo dúcide. Dúciano afémie eiba abimo caiñícido dújuillano daide:

—Ocuíraima, o nibai benó itíonia cue íio tííñede, —daide.

33 Jesús María éeiana, naa aféngodo bitino judíuairi éeiana ciode. Cíuano afémie iere zúureficaide. Ie comeci docaide.

34 Jira jicánote:

—¿Ninomo omoi raiga?

Jira daidíaioi:

—Ocuíraima, eróizaibi, —daidíaioi.

35 Jesús eede.

36 Jira mei judíuai daidíaioi:

—¡Ero, nii afémiena izíruilla! —daidíaioi.

37 Iadi afémacimona dámie daide:

—Bímie uina cíoiñedimiena meine cíoitaraíma. ¿Nai aféniemo iñede ríino Lázaro tíitañeillena? —daide.

Lázaro tíillamona meine abido cáadimiena jaide

38 Jesús comeci meine iere dokaide. Raiáfomo áinozide. Raiáfo idu ana ifo. Ie jofo jáirano daa nofícina ibaica.

39 Jira Jesús daide:

—Nofici oni ono, —daide.

Tiidimie miringo, Marta daide:

—Ocuíraima, jae íaire jallede. Ráiamona cuatro dígarui íteza, —daide.

40 Jira Jesús daide:

—¿Nauí ona daiíñedicue, o ínoiadi Juziñamui ebírenafuena cíoitio? —daide.

41 Iemona nofici oni otíaiói. Ie mei Jesús monamo érocaillano daide:

—Moo Juziñamui, iere figora cuemo cacáreifredio.

42 Onódicueza cuemo jaca cacáreidio. Mei íadi daií daidicue benó ite comini ñúeillena, daje izói bimaci o cue óriana íinollena, —daide.

43 Daií daina méifodo jíirite:

—¡Lázaro, dinómona jino bi! —daide.

44 Tiidimie jino bite; ua onoi idai diga ferínoraroido maiáno jino bite. Uiéco iníroina ibaica diga bite. Jira Jesús íaióina daide:

—Zuita, zúitanona ie ore, —daide.

Jesús llaitállena jáícina maméritiaíoi
(Mt 26.1-5; Mr 14.1-2; Lc 22.1-2)

45 Afedo aillo judíuaimona Jesuna ínotiaíoi. Afémaci, María ícoínia bitino, Jesús finócafueña cíódimaci.

46 Mei íadi afémacimona dáamierie fariséuaimo úrizaide. Ua Jesús finócafuiái íaióimo llujide.

47 Iemona fariséuai, lletáriraini illaini diga gairídaiói naa caifóidillainiri. Daidíaíoi:

—¿Nie izói ñéiticai? Bie íima aillo cíofinina onótalle raana finode.

48 Fia daií íena cai fáicanocaiadi nana íena ínoitiaíoi. Iemona romano ríimaci cai gairíraco táinocaitaitiaíoi naa cai náirairi, —daidíaíoi.

49 Dáamie íaióimona Caifás mámeciredimie. Afémie afe fimónamo lletáriraini illaíma. Afémie íaióina daide:

—Omoi minícana onóñediomoi.

50 Daa íima comíniri tíia baímo jamánomo ñuera, nana nairai tííñeillena. Afefue nai figo fidíñediomoi, —daide.

51 Mei íadi Caifás afefue dama ie comécido lloñede; mei jíáfodo afe fimónamo afémie lletáriraini illáimana íllamona, Juziñamui Joreño daináfuedo afemie daide: “Jesús judío náirairi tíizaite.”

52 Ua dani afe náirairi tíñeite, mei íadi nana júdaizite Juzíñamui jitóniai dáanomomeine gairíllena tíizate.

53 Daií aféruimona judíuai ríimaci Jesús fállena maméritiaioi.

54 Jira Jesús ja judíuai cígido uáfodo macáñede. Judea éniemona oni jaillano, táizici áinori ite jófuego máizate. Afe jófue mámece Efraín. Dinomomeie llófuegamaci diga fiébide.

55 Judíuai pascua rafue áinozidemo aillo jófue comini Jerusalemó jaidiaioi, pascua uícomomecece duáfuaia finóllena.

56 Jaillano Jesús jénuaidiaioi. Gairíracomome íaioi illano conímame jicánoidiaioi:

—¿O nie izói daidío? ¿Afémie ráfuecomome biite? ¿Nibai bíñeite? —daidíaioi.

57 Fariséuai lletáriraini illaini diga jae ocuídiaioi: “Daa comome Jesús illánona onóyadi lloíri,” íe cai llaitálleza, —daidíaioi.

12

Ringo Jesús jillaide

(Mt 26.6-13; Mr 14.3-9)

1 Pascua uícomome seis dígarui ítemo, Jesús Betániamome jaide, Lázaro illánomome. Lázaro ua tíidimacomome Jesús abidome cáatagamie.

2 Dinomome nauife güillafue finódiaioi Jesumome ñúefuiaina nitállena. Marta güille raizífiredome. Güirábanimome ráicana Jesús diga güitino, Lázaro afémacomome dáamie.

3 Iemome María litromome átuedome zíoje cáiredenome fáíñegajime atíde. Afejime jamánomome ráifide. (Afejime mámece nardome.) Atianome Jesús eibame emodome jillaide. Daií ñianome ifótiidome zafénaitadome. Nana afecomome erome zúenome oruíbicaide.

4 Dinomome Judas Iscariotome ráide. (Judas Simón jitó Jesús llófuegamacomome. Afémie Jesús éoidimacomome fécaitimie.) Afémie daide:

5 —¿Nibái meime trescientos dígabe fidime bie cáiredijime fécañega, duéredinome cai canome daií? —daide.

6 Meime íadi duéredimome izíruillamome daií daiñedome. Meime íadi afémie meríriraime. Nane íaioime úcubellome uícaifiredome. Aféllumome jóonegome raanome merífiredome.

7 Ie jira Jesús íenome daide:

—Aféngomome fáicanomome. Raiáfomome cue raillíruimome aféjina aféngome éenote.

8 Duéredimome jacomome omome diga ífiredome, meime íadi cue jacomome omome diga are íñeiticome, —daide.

Lázaro fállena maméritiaioi

9 Aillo judúuai Jesús Betániamo íllana fidídiaioi. Jira dinomo jáidiaioi dama Jesumo éroiñellena, mei íadi daje izói Lázaron a cíoillena, tíidimacimona Jesús abido cáatagamiena jira.

10 Iemona lletáriraini illaini Lázaro fállena mamédiaioi.

11 Ua Lázaro ícoiniadi aillo judúuai illáicomini mona jirecaillano Jesuna ínotiaioi.

*Jesús Jerusalemo ebire jofo jáillafue
(Mt 21.1-11; Mr 11.1-11; Lc 19.28-40)*

12 Pascua ráfue mo aillo comini Jerusalemo jáidiaioi. Ie méidiruido Jesús jófue mo dúcizaillana fidídiaioi.

13 Amena rafóruai jaitada jino Jesús uáiduaidiaioi. Caillícana daidíaioi:

—¡Juzíñamuina ebífue na daíri! ¡Juzíñamui mámecido bitímie caimare comuiri! ¡Israel Illaíma caimare comuiri! —daidíaioi.

14 Iemo Jesús burro baillano afe emódomo ráinade, jaiai Cuegáuai daína izói; be níuui:

15 “Sión comini omoi jacíruiñeno.

Erocai, o Illaíma búrrodo ráicabite.”

16 Nanómona ie llófuegamaci aféfuai na cacáñediaioi. Ie méifodo ebírenafue Moo íemo nitaca mei, ie tíllanomona meine abido cáatalliruimo, nana afémieri Cuegáuaimo uíbicaidiaioi. Daje izói íemo daí finócafue mo uíbicaidiaioi.

17 Lázaro jino raíáfomona uáiduaruido aillo comini Jesúsóiri ite. Ua Lázaro tíidimacimona abido cáanana cíódino afe íaioi cíónafue na llujáidiaioi.

18 Ie jira comini Jesuna caimare baizájidiaioi, afe cíofinina ie finócafue íaioi fidína jira.

19 Jira fariséuai daní daidíaioi:

—Ja cíódiomoí, jaca nie izói ñénide. Erocai, nana comini íedo jáidiaioi, —daidíaioi.

Dáarie griego imaci Jesús jenódiaioi

20 Rafue illa dino acádoillena Jerusalemo bitímaci cígimo dáarie griego ímiiai ite.

21 Afémaci Felípemo áinozidiaioi. (Felipe Galilea ímie; Bet-saida jofue ímie.) Áinozillano íemo izire jicánotiaioi:

—O onógamie Jesuna cíóiacadicaí, —daide.

22 Jira Felipe Andrena daízaide. Iemo afe íaillinoi Jesumo llujáide.

23 Ie jira Jesús ie abina úrillano daide:

—Nanoide Iima Jitomo ebírenafue na nitálliruimo ja dúcide.

24 Uáfue na ómoína dáitícue, daa güiga raa ido éniemo ríñenia, tíñenia, jaca nai dáajina jóoide; mei íadi afeji ríllamona tíidena eroide zícua mona aillo aite.

25 Daje izói dáamie ie cáaillinona dama íeiēna rairuíadi, áfena féitaite, mei íadi dáamie ie cáaillinona bie éniemo jámairuíadi, áfena zíiñona cáaillinomo éenoite.

26 Dáamie cuemo jaináiacadimie cuedo jáirede. Cue illínomo dáanomo cuena jaináidimie iite. Dáamie cuemo jaináia, cue Moo afémiemo ñúefuena nítaite, —daide.

Jesús ie tíillifuena jino llote

27 Jesús nai úrillano daide: Birui cue comei iere llícitaide. ¿Nie izói cue daiíri? ¿Ñibai bie izói dáaiticue: “Moo birui cuemo zuídifuemona cue jílota”? Mei íadi cue afe jira biticue.

28 Moo, o mámecimo ebírenafuena jóoneri, —daide.

Iemona monámona daa uai cácaaide. Daide:

—Afena jae ebire ífcaitaicue. Iemo meine dáanomo ebire ífcaitaicue, —daide.

29 Afénoimo ite comini áfena cacáillano daidíaioi:

—Mona gíria, —daidíaioi.

Iemo jiáimaci:

—Juzíñamui abi ímie íemo úrite, —daidíaioi.

30 Mei jira Jesús daide:

—Afe uai cuemo cácacaiñede. Omoimo cácaaide.

31 Ja biruímo bie énie comini jenoda facátalliaioi. Jabe bie énie ocuídime jino dotácana iite.

32 Enie acónimo titállena cue íaioi raiñolle llezica, nana dama cuemo cue atille, —daide.

33 Afe dáinamona, ie tílla izói onótate.

34 Jira comini uai otíaioi:

—Cai ocuilla uai ciegánicodo caimo llófuega: “Cristo zíiñona iite.” ¿Nie izói daidíoi: Nanoide íima Jitó titállena caifo raiñóbicaite? ¿Bu mei bie Nanoide íima Jitona? —daidíaioi.

35 Jira Jesús daide:

—Nai omoi cígiri egáiñotimiena izói nano íanori iticue. Bie cue egáiñuana ómoimo illa dino, mai cue llua izói omoi macari, jítiredino raire omoi éidafiñeilla. Jítinodo macádimie ie jáillana onóñede.

36 Uzefomo ñno, nai ómoimo illa dino, egáiñogamacina daí omoi jáillena, —daide.

Afufue daína méifodo, Jesús afémacimona retáirizaide.

Judíuai Jesuna íñoñediaioi

37 Jesús íaioiimo eróicana diga cíofininafuiaína finode. Mei íadi íena íñoñediaioi.

38 Ua íñoñediaioi, jaiái uai llóraíma Isaías Cuegáuai fuitállena. Isaías daide:

Ocuíraíma, ¿bu cai úrillafue íinua?

¿Bumo Ocuíraíma ie ríinona ácatate? daide.

39 Daiítana jira ñnonidiaioi. Ie emódomo jíáifodo Isaías cuete:

40 Juzíñamui uina cíoiñedimacina íaioina finode.

Iaioi ifoci jáiaitate.

Daií finode uído cíoiñeillena,

daje izói ifócido ónoiñeillena.

Jira cuemo bínidimaci, íaioi cue jíllotallena.

41 Isaías aféfuiai lloste, mei afémie Jesús ebírenafuena cíódeza.

Jira afémiedo úrite.

42 Mei íadi aillo judíuaimona Jesuna ñnotiaioi, illáicomínimona jíai dáarie. Mei íadi uáfodo lloñediaioi,

fariséuaina jacíruillano gairíracomona jino íaioi óreñeillena.

43 Comini ñúefuena íaioimo nitajana jamánomo gáidiaioi. Mei íadi Juzíñamui ñúefuena íaioimo nitajana jámairuitiaioi.

Jesús uaillai comínimo riire jicánoite

44 Jesús aillo uaido daide:

—Cuenta ñnotimie, dama cuenta ñnoñede, mei íadi daje izói cue orédimiena ñnote. Ua cue Moona ñnote.

45 Cuenta cíodimie daje izói cue orédimiena cíode.

46 Cue egáñnotimiedicue. Ana bie éniemo biticue, cuenta ñnotino jíitiredifomo fiébiñeillena.

47 Dáamierie cue uaina cacáadi íadi jeire ie óñeniadi, ie jicánoraímana íñeiticue. Cue bie énie comínina duere fínuaibiñedicue, mei íadi afémacina jíllotaíbiticue.

48 Cuenta jámairuitimie, cue uaina jeire oñédimie ja ie duere fínóitímie ite. Cue daina uaillai íirairuillaído duere íena fínótaite.

49 Dama cue comeci izói úriñedicue. Moo Juzíñamui, cue orédimie cue dáinana llófuellena jae ocuide.

50 Moo cuemo ocuícáfue zíñona itátate. Afena onódicue. Jira mei, cue daina, jaca cue Moo cue ocuilla izói.

13

Jesús ie llófuegamaci idai jocode

1 Jae pascua rafue uícodirui. Jesús bie éniena ie fiénocaillana, ie Moo dine jáillirui ánozillana fidide. Ieiena éniemo itínona izíruite. Ua jaca fáicanocaiñeno íaioina izíruite.

2-4 Taife jae Judas Iscariote comécimo Jesús fecállena lloste. Judas Simón jító. Afe llezica Jesús Juzíñamuimona bitímiena fidide. Daje izói Juzíñamuimo meine jáillana fidide. Juzíñamui nana ríinona íemo fécajana Jesús onode. Ie mei güillano, güirábanimona náidacaillano jinóidicuiro duiñode. Dúíñuano daa abi doraroi ciráigimo maitade.

⁵ Ie mei jainoi icáifemo tótajano, ie llófuegamaci idai jócuaide. Daií ñiano, afe ciraigi maitaca abi dorároido íaioi idai zafénaitade.

⁶ Simón Pedro idai ie jócuaille llezica afémie Jesuna daide:

—Ocuíraima, ¿cue ídaina jócoitio?

⁷ Jira Jesús uai ote:

—Birui cue finócafuenta onóñedio, mei íadi fui ónoitio, —daide.

⁸ Mei ie jira Pedro daide:

—Jaca ninomo cue ídaina jócoñeitio, —daide.

Jira Jesús íena daide:

—Ona cue jocóñeniadi, cuemo jáinaiñeitio, —daide.

⁹ Jira Simón Pedro íena daide:

—Mai mei, Ocuíraima, daa cue idai jocóñeno, mei cue onoi, cue ifo diga jocori, —daide.

¹⁰ Jira Jesús daide:

—Como nódimie daa ie idai jócuana dúide, abi nana dóina jira. Ja dogáomoi, mei íadi nánañede, —daide.

¹¹ Iena fécaitimiena onona jira, Jesús jae daide “Nana dóñegaomoi.”

¹² Iaioi idai jócu méifodo, Jesús ie jinóidicuiro meine jítade. Güirábani abimo ráinaillanona daide:

—¿Omoimo cue finócafuenta onódiomoi?

¹³ Omoi jae Llófueraimana, Ocuíraimana cue mamédiomoi. Daií ñue daidíomoi, nímmiedicueza.

¹⁴ Jae omoi Llófueraimadicue; jae omoi Ocuíraimadicue mei íadi omoi idai jocódicue. Afe izói dani conima idai omoi jocolle jítáirede.

¹⁵ Jae ómoína finócafuenta onótaticue, cue finua izói omoi finóllena.

¹⁶ Uáfuenta dáititue: Táijitatimie baimo jaide jaiénicina ñede. Daje izói orédimie baimo jaide orécamiéna ñede.

¹⁷ Aféfuiai omoi onóadi, íemona afe izói ñiano, íóbificaitiomoi.

¹⁸ Omoiri nana úriñedicue. Cue nizécamacina onódicue. Mei íadi Cuegáuai daína ñue fuitállena jítáirede. Cuegáuai daide: “Cue diga güitímie jae cue ícidote.”

¹⁹ Afefue uícomo ómoimo lloticue afe íficailliruimo Crístodicue cuemo omoi ñnollena.

²⁰ Uáfuenta ómoína dáititue, cue orécamiéna llínotimie afe izói cuena llínote. Cuena llínotimie afe izói cue orédimiéna llínote, —daide.

Jesús Judas ie fecállifue jino llore

(Mt 26.20-25; Mr 14.17-21; Lc 22.21-23)

²¹ Daií daína méifodo, Jesús jamánomo comeci zúucaide. Uáfodo jino llore:

—Uáfueña ómoína dáititue, ómoimona dáamie cue fécaite, —
daide.

²² Ie jira llófuegamaci jáimamo eróricaidiaioi, onóñegaza
budo úrite.

²³ Llófuegamacimona dáamie Jesús iere izíruigamie. Afe
güilláruído Jesús abimo ráide.

²⁴ Simón Pedro íemo onócaido llote:

—Mai Jesumo jícano, ¿budo úrite? —daide.

²⁵ Jira jofo áinozillano Jesumo jícanote:

—Ocuíraima, ¿bu llotio? —daide.

²⁶ Jira Jesús uai ote:

—Daa pánllicina cue riáitano afémiemo íititue. Afe níimie, —
daide.

Iemona pánllicina riáitano Judas Iscariote, Simón jitomo
fecade.

²⁷ Afe pan Judas llíinuamona, Taife ie comécimo jofo jaide.
Mei jira Jesús daide:

—O finóllifueña raire fino, —daide.

²⁸ Júdasna daií daináfueña güirábanimo güitínomona buna
aféfueña onóñena.

²⁹ Ucubellu Judas uícaiga jira dáamierie comeci facádiaioi:
Jesús daiíacade ráfueño jitailla raana íbajitade. Jáimaci
comeci facádiaioi, nibai duéredino úcube afémie íllena.

³⁰ Afe pan güilla méifomo Judas jino jaide. Ja naiona.

Comue ocuúllafue

³¹ Judas jino jailla méifomo, Jesús daide:

—Jabe Nanoide íma Jitó ebírenafue ácatalle. Afe
dainámieditue. Iemo jái jabe Juzíñamui ebírenafue iedo
ácatalle.

³² Nanoide íma Jitó Juzíñamui ebírenafue ácataiadi, ibana ie
Jitó ebírenafue Juzíñamui ácataite. Afena raire fínoite.

³³ Cue izíruigamaci, omoi diga ja are íñeítitue. Cuená
jénoitiomoi. Mei íadi nauí judíuaina cue daina izóí biruí ómoína
dáititue: cue jáillinomo jáinidiomoi.

³⁴ Bie comue ocuúcafue ómoímo llotitue: conímana omoi
izírui. Cue omoi izíruiilla izóí afe izóí conímana omoi izíruiillana
jitáirede.

³⁵ Nana conímana omoi izíruiá, nana comíni cue
llófuegamacidiomoi fídiitiaioi, —daide.

Pedro Jesuna jáanollifue Jesús uícomo llote (Mt 26.31-35; Mr 14.27-31; Lc 22.31-34)

³⁶ Ie mei Simón Pedro Jesuna jícanote:

—Ocuíraima, ¿niné jáidio? —daide.

Jira Jesús uai ote:

—Cue jáillinomo birui bínidío; mei íadi méifoidiruido cuedo bíitio, —daide.

³⁷ Mei ie jira Pedro daide:

—Ocuíraíma, ¿níbái mei birui odo bínidícue? Ja finóbídícue o díga cue tíllena, —daide.

³⁸ Jira Jesús uai ote:

—¿Uáfueña meita finóbídío cue díga o tíllena? Uáfueña ona dáítícue: nai átava úríñeniadi, dacaiñoámani cuena jáanoitio, —daide.

14

Jesús, Moo Juzíñamuimo jaira io

¹ Omoi comeci zúucaíñeno. Juzíñamuimo ñno; daje izói cuemo ñno.

² Cue Moo jofomo aillo illánuiái ite. Bífue táínofue íadi, raire ómoímo llóitícue; íadi jaca uafue. Mei jira omoi illino fínuaídícue.

³ Omoi illino cue fínuailla mei, abído ómoína uáíbitícue, cue illínomo dáanomo omoi íllena.

⁴ Cue jáíllinona onódiomoi afe io díga, —daide.

⁵ Jira Tomás daide:

—Ocuíraíma, o jáíllinona onóñedicaí. ¿Ñie izói afe iona ónoíticaí? —daide.

⁶ Jira Jesús uai ote:

—Cue iódícue. Cue uáfuedícue. Daje izói cue cáatatinodícue. Ie jira daa cuedo Moo illánomo dúcirediomoi.

⁷ Cuena omoi onóíadi, daje izói cue Moona ónoítiomoi. Ja biruimo íena onódiomoi. Ja íena ciódiomoiiza, —daide.

⁸ Jira Felipe daide:

—Ocuíraíma, Moo Juzíñamui caímo cíota. Afedo figo baite, —daide.

⁹ Jira Jesús uai ote:

—Felipe, ja are omoi díga itícue, ¿nai cuena onóñedio? Cuena cíodímie daje izói cue Moona ja cíode. ¿Níbái mei Moona cíotalle cuemo jícadío?

¹⁰ ¿Moomo cue íllana nai íñoñedio? ¿Daje izói cue Moo cuemo íllana íñoñedio? Nana cue daínáfuiái dama cue comeci izói daíñedícue. Cuemo ite Moo dama ie táíjina finode.

¹¹ Cue Moomo cue íllana ñno; afe izói Moo cuemo íllana ñno. Ménaíllinoi dáanomo itícocoza. Daíí omoi íñoiacañenia cue finócafueña ñno.

¹² Uáfueña dáítícue: cuena ínotímie cue finócafue izói fínioite. Nane afe baímo aillo jíáfue fínioite, cue Moo illánomo cue jailla jira.

13 Nana omoi cue mámecido jicaca raa fínoiticue, Moo ebírenafue ie Jitó ácatallena.

14 Naga cue mámecido jicalle raana fínoiticue, —daide.

Jesús Ñuera Joreño oréllena uafue llote

15 Cuen a omoi izírui, mai cue ocuícafuiai cacáfireiri.

16 Iemo omoi canóraima, omoi fíraraima jícaiticue. Moo ómoimo íena oréllena íemo izire jícaiticue. Bítimie uafue Joreño. Afe Ñuera Joreñona jícaiticue omoi diga ninomo íllena.

17 Enie imaci íena llínonidiaioi, afémiena ciónidimaci jira; daje izói afémiemona ónoñedimaci jira. Mei íadi íena ja onódiomoi, omoi diga illa jira. Ua uire jaca ómoiri dájena íite.

18 Omoína zóofeñeiticue. Abido bíticue omoi diga íllena.

19 Nano nígarui íanori íllamona comini ja cuena cíõñeitiaioi, mei íadi cuena cíoitomoi. Afe jira omoi cáaitomoi, cue caana jira.

20 Aféruído cue Moomo cue íllana ónoitiomoi. Daje izói cuemo omoi íllana ónoitiomoi; daje izói ómoimo cue íllana ónoitiomoi.

21 Cue uaina onódime, íemo jíai afe uaina jeire otímie uáfueña cuena izírui llana cíotote. Jira cuena izírui timie cue Moo daje izói izírui te. Cue daje izói íena izírui ticue; ie mei afémiemo cuena cíotaiticue, —daide.

22 Iemo Judas (íadi Iscarióteñedime) íena daide:

—Ocuíraima, ¿nibái énie comínimo ácatañeno, daní caimo o abina ácataitio? —daide.

23 Jira Jesús uai ote:

—Cuen a izírui timie cue daí nafue jeire ote, ie jira cue Moo íena izírui te. Afe llezica cue Moo cue diga bíticoco afémie diga íllena.

24 Cuen a izírui ñedime cue daí nafue jeire oñede. Omoi cacana úrillafue dama cúeieñede. Afefue Moo Juzíñamui, cue orédime ifue.

25 Omoiri cue illa dino aféfuiaína ómoimo lloticue.

26 Mei íadi Moo cue mámecido Ñuera Joreño óreite, ómoína canóllena, ómoína fírallena. Ná gafuiaína omoi llófueite. Nana ómoína cue daínana uíbicaítaite.

27 Comeci caimare uái illifue ómoimo fiédicue cue jailla jira. Cue comeci caimare uái illifue ómoimo iticue, mei íadi énie comini comeci illifue izóiñede. Omoi comeci zúucaíñeno. Jacíruiñeno.

28 Jáiticue, cue daínana cacádiomoi za. Daje izói meine bíticue ómoiri cue íllena. Uáfueña omoi cuena izírui a, cue Moomo cue jáillifue omoi fidínamona cáimacaitomoi, mei afémie cue baimo illa jira.

29 Jira áfena uícodo ómoimo lloticue, afefue fínuaruimo omoí iínollena.

30 Omoíri ja aillo úriñeiticue, bie éniemo ocuídime ja billa jira.

31 Mei íadi afémie cuena ocuínide. Daí írede, énie comini Moona cue izíruillana íaíoi onóillena. Daje izói Moo cue ocuilla raana cue fínuaana ónoítiaíoi. Mai náidacai. Benómona cai jáilleza, —daíde.

15

'Vid' daina jíricono izoide rao ícairuai rafue

1 Afe mei nane Jesús úrite; daíde:

—Uafue 'vid' daina jíricono llizítate rao izóidicue. Cue Moo afe rao úiñotimie.

2 Llízíacañede rao ícairo jaitade. Nana llízíacade ícairo ie ícoí jáicoide, áfemona jamánomo llizíllena.

3 Omoí cue llófuiáfuedo jae ñue dóficaidiomoi.

4 Mai cuemo dáanomo omoí jainairi ómoimo cue jainaina izói. Daa ícairo fia daingo llizínide. Daje izói cuemo dáanomo omoí jaináñenia, ñúefuiai omoí comécimona comuítanidiomoi.

5 'Vid' daina jíricono llizítate rao izóidicue; afe rao zitaca ícairuai izóidiomoi. Cuemo dáanomo jaináidime, íemo dáanomo cue jainaila llezica, ua jamánomo aite. Mei íadi cue iñédicuenia minícana finónidiomoi.

6 Cuemo jaináñedime jino faille. Fáiamona zafénaite, rao rábiai izói. Afémacina iráida iraimo jobaica.

7 Cuemo ñue omoí jaináidi, daje izói cue llogáfueña omoí féitañenia, o jitaiga raana jicari. Iemona áfena ómoimo líticueza.

8 Aillo llizilla izoide ñúefue omoí finóadi, cue Moomo ñúefueña nítaitio. Afedo cue uáfueña llófuegamacina omoí íllana ácataitiomoi.

9 Cue Moo cuena izíruilla izói, afe izói ómoína izíruiticue. Omoína cue izíruiticueza; áfedo dinomo omoí jairi.

10 Cue ocuícáfuiaina jeire omoí óiadi, daí cuedo izíruilliomoi. Daje izói cue Moo ocuícáfuiaina jeire oticue. Iemona afémiedo izíruigacue.

11 Cue daí úriticue cue dibénedo caimare omoí íllena. Daí íobillafueña oruíbicaítiomoi.

12 Bie cue ocuícáfue: Omoína cue izíruilla izói come ie conímana izíruiri.

13 Dáamie jamánomo izíruillafuedo ie abí ie nabáñiaimo fecárede. Afe baimo iere izíruillafue íñede.

14 Cue ocuícáfue omoí finóadi cue nabáñiaidiomoi.

15 Ja jaiénicina ómoína mámeñeticue, jaiénici ie ocuídime finuafuena ónoñena jira. Cue nabáiñiaina ómoína mamédicue, nana cue Moo cuena daináfuiái omoi cue onota jira.

16 Omoi cuena nizéñediomoi, mei íadi cue nizécamacidiomoi. Iemona ómoína ocuídicue, aillo llízie izoide ñúefuiaina omoi finóllena. Afe llízie are íllana ocuídicue. Ie jira daí nana cue mámeçido omoi jicaca raana cue Moo ómoímo fécaite.

17 Jira bifue ómoína cue ocuíllafue: Naga come ie conímana izírui, —daide.

Enie comini Jesuna éoide ie comini diga

Jesús nai úrillano daide:

18 —Enie comini ómoína éoiadi, nano fueñe cuena íaioi éoillamo omoi uíbicaíri.

19 Enie comínina omoi íadi, afémaci íaioi comínina izíruiilla izói ómoína izíruiíaioi. Mei íadi énie imácimona ómoína nizédicue. Ie jira énie imaci ómoína éoidiaíoi, éniemo íaioi jainaina jira.

20 Ómoína cue daináfueмо uíbicaíri: “Nie jaiénici ocuídime baimo iñede.” Cue duere finóllena íaioi racáoíadi, daje izói ómoína rácaítiaíoi. Cue llófueinafuena jeire íaioi óiadi, ómoiena jeire óitiaíoi.

21 Nana aféfuiái cue ícoínia ómoímo fínoítiaíoi, cue orédimiena onóñena jira.

22 Iaióimo úrizabiñedicuena íaioi ícoínia iñede. Mei íadi birui íaioi fiénidifue ícoínia jae ite.

23 Cuena éoidime daje izói cue Moona éoide.

24 Jaca bu jíaimie íaioi cigiri cue finua izói finóñede; mei íadi afe jíaimie finófinide raana ja íaioi cigiri finódicue. Ie jira íaioi ícoínia íteza. Mei uáfueña aféfuiaina ja ciódiaíoi. Mei íadi afe emódomo cuena éoidiaíoi. Afe izói cue Moona éoidiaíoi.

25 Afefue daí jaide, íaioi cuela ocuícafuiái uai fuitállena. Afe Cuegáuai daide: “Nífueninanomona cuena éoidiaíoi.”

26 Mei íadi Móomona cue oréllime, afe Ñuera Joreño bíadi, cueri úrite. Afe llezica ómoína cánuano náirecaítaite.

27 Omoi daje izói cueri úritiomoi, nanómona cue diga omoi illa jira.

16

¹ Aféfuiái ómoímo lloticue, fiénidifueмо omoi báiiñellena.

² Juzíñamui uai llófueriracomona ómoína jino dótaitiaíoi. Ua uire jamánomo fieni illíruiño dúçite. Aféruíllaido ómoína fáitimaci, “Ómoína fallífuedo Juzíñamui táijinana fínoíticaí” daí daina ínoítiaíoi.

3 Aféfuiaina finoitiaioi Moona jaca ninomo onóñena jira, daje izói cuena onóñena jira.

4 Afena ómoina dáitícue, aféruillai dúcillemo, cue daínáfuemo omoi úbicaillena, —daide Jesús.

Ñuera Joreño finóllifuiái

Jesús nai úrillano daide:

—Aféfuena nanómona ómoimo lloñédícue, omoi diga cue illa jira.

5 Mei íadi biruímona cue orédímie dinomo jáitícue. Omoimona buna cue jáillinona jicánoñediomoi.

6 Mei íadi bie cue ómoina daínáfueri iere zúucaidiomoi.

7 Iadi uáfueña dáitícue: cue jaille ómoimona iere ñuera. Cue jáiñenia, ómoina canoda fíraraima bíñeite omoi diga íllena. Mei íadi cue jaía íena óreitícue.

8 Ie billíruido éniemo itino íaioi fiénidifuiaina uáfueña onótaite. Daje izói dama daa jaícina ñúfuedo cai jáilliona onótaite. Daje izói Juzíñamui íaioina duere finóllena onótaite.

9 Afémaci fiénidifuiáiredímaci, cuena íinoñena jira.

10 Afe jaícina jáilliona ónoitiaioi, Moo illánomo cue jailla jira. Afe cue jailla mei cuena cíoñeitiomoi.

11 Juzíñamui facátallifuena ónoitiaioi, bie éniemo ocuídímie jae duere finóbilla jira.

12 Cue ómoimo llollífuiaí nai aillo ite; mei íadi nai onónidiomoi, náinidiomoi.

13 Uafue Joreño bille llezica ómoimo nana uáfuiaina afémie llóite. Dama ie comeci jítaina izói úriñeite, mei íadi ie cacana izói dáite. Uire íitífuiaina ómoina onótaite.

14 Cúeiemona llínuano ómoina onótaite; onótamona ñúfueña cuemo nítaite.

15 Nana Moomo ite raa daje izói cueie. Ie jira dáitícue: Ñuera Joreño cúeiemona llínoite, áfedo aféfuena ómoina onótaite.

Zúurenafue cáimafuena méidolle

16 Nano íanori íllemona cuena cíoñeitiomoi. Mei íadi jabo bai diga iruillai íllamona, nane meine cuena cíoitíomoi, mei cue Moo illa dine cue jáillaza, —daide.

17 Iemona ie llófuegamacimona dáarie jofo conímamo jicánote: —¿Afe nie izói daínáuai? Caina daide nano nie dino íllamona íena cíoñeíticai. Ie mei nane caina daide, báifenemo diga iruí íllemona meine íena cíoitíicai, mei ie Moo illánomo ie jáillaza.

18 ¿Nie izói aféuai daide: “Nie dino íllamona?” Afémie nífuedo úriteza onóñedicai, —daidíaioi.

19 Jesús íaioi íemo jicánoiacagafuena onóillano daide:

—Cue daidicue nié dinó illemona cuena cíõñeitiomoi. Nane ie baímo diga iruí illemona meine cuena cíõitiomoi. ¿Afe fue conímamo jícanotiomoi?

²⁰ Uáfueña dáiticue: omoi éeitiomoi. Zuure ítíomoi; mei afe llezica énie comíni caímare ítiaioi. Mei íadi omoi zúunaillafue cáimafueña méidoficaite.

²¹ Ringo úrue jócácania izínaillari zúucaite, afengo izínaillaruímo dúcidez. Mei íadi úrue jócua méifodo afe izírenamo úbicaiñede, úrue éniemo jócínari ie íóbilla jira.

²² Daí biruí omoi izire zúucaitíomoi. Mei íadi ómoímo cíõizáibitícue. Iemona omoi coméciai cáimafueña óruite. Afe cáimafuíai bu ómoímona báiroñeite.

²³ Aféruído minícana cuemo jícanoñeitiomoi. Uáfueña ómoína dáitícue, nana cue mámecido omoi jícala raa, cue Moo ómoímo fécaite.

²⁴ Biruímo cue mámecido minícana nai jícañediomoi. Mai jica omoi llínollena, áferi comeci cáimafueña oruíbicaillena.

Jesucristo, Juzíñamuina éoidinona anáfenodimie

²⁵ Bífuíai aillo daje izóidífuíaido ómoímo llotícue, mei íadi daruína daje izóidífuíaido ómoímo úriñeítícue. Aféruímo ja áinozide. Aféruído uáfodo Moodo ómoímo úritícue.

²⁶ Aféruíllaido omoi cue mámecido jícaítíomoi. Moomo ómoíri izire cue jícallena daíñedicue,

²⁷ mei dama Moo ómoína izíruilla jira. Iemo jíái cuena omoi izíruilla jira, ómoína izíruite. Moo dínená cue bíllana omoi ínua jira, afémie ómoína izíruite.

²⁸ Moo illánomona bíllano bie éniemo bitícue. Biruí énie fiénocáillano meine Moo díne abido jáitícue, —daide.

²⁹ Jira ie llófuegamaci daide:

—Ja biruí daje izóidíuaido daíñeno, jino uáfodo úritío.

³⁰ Biruí naga rafue o onóigana onódicai. Ja jíáimie omo llúana jítaíñede. Mei jira Juzíñamuimona o bíllana ínnoticai, —daidíai.

³¹ Jira Jesús uai ote:

—¿Biruí cuemo ja daí ínnotíomoi?

³² Omoi enénorie júdaizíllíruímo áinozide. Ja biruí aferuí. Omoímona nágamie oni eneno júdaízite. Dama cuena fiénocaitíomoi. Mei íadi damáñedicue, cue Moo cue diga illa jira.

³³ Nana bífuíai ómoímo llóitícue, cuemo ínnuano omoi comeci uái íllena. Afe bie éniemo duere zéfuitíomoi. Mei íadi, jabí omoi mameri! Ja Juzíñamuina éoidinona anáfenodímiedicueza, —daide.

17

Jesús ie llófuegamaciri Juzíñamuímo jícade

1 Aféfuiai daina méifomo, Jesús caifo monamo érocaillano daide:

—Moo, cue írairuimo ja dúcide. O Jitomo ñúefuena nitari, afe izói o Jitó omo ñúefuena nítaiteza.

2 Aillo ríino o Jitomo jae o iga, nana comini náamatalena; daje izói nana cuemo igámacimo zíiñona cáaillinona íaioimo cue íllena.

3 Zíiñona cáaillino comini ona íaioi onónamona llínotiaioi. O dama uafue Juziñamuidio. Daje izói zíiñona cáaillino, o orécamié Jesucristo íena onónamona llínotiaioi.

4 Bie éniemo cue illa llezica ebírenafue jae omo nitádicue. Cuemo o ocuícáfue jae fuitádicue.

5 Moo, nauti o diga cue illáruimo cue ebírenafue dájena birui o uícori meine cuemo ine. Afe ebírenafue nai énie íñena llezica nauti cuemo ite.

6 Enie imácimona doce dígamie otio cuemo íllena. Afémacina búdioza jae onótaticue. Afémaci óie. Cuemo o igano. O úrilla uaina ínotiaioi.

7 O nana cuemo igáfuiai ómona bitífuiaina onódiaioi.

8 Jira o cuemo iga úrilla uai bimácimo lloticue. Aféfuena jeire otíaioi. Uáfuena ómona cue bíllana onódiaioi. Daje izói o cue óriana ínotiaioi.

9 Afe cuemo o igámaciri izire jicádicue. Enie imáciri izire jicáñedicue. Dama cuemo o igámaciri izire jicádicue, ómacina jira.

10 Nana cueie óie diga. Afe ibana nana óie cueie. Afémacimona cue ebírenano ácataficaide.

11 Cue ja éniemo fiébiñeiticue; mei íadi afémaci afe éniemo fiébitiaioi. Cue o diga íllena jáiticue. Jamánomo ñuera Moo, cuemo o igano o ríinodo uíñori, nana dájena cuemo ñue jaináillena, omo cue jainaina izói.

12 Bie éniemo afémaciri cue illa llezica, o ríinodo íaioina úiñoidicue. Íaioi abi ríidoticue. Íaioimona buna féiraiñede. Mei íadi dáamie jaca féiraitimie, Cuegáuai fuitállena. Afémie nanómona féiraitimie.

13 Jabe o illánomo jáiticue. Mei íadi nai éniemo cue illa dino aféfuiaina llóllodidicue, cuemo ite íóbillafue afe izói afémaci ñue íóbicaillena.

14 O úrilla uai íaioimo iticue, mei íadi énie imaci íaioina éoidiaioi, énie imaciñena jira. Daje izói cue jíai énie ímieñedicue.

15 Eniemona íaioi o óllena jicáñedicue, mei íadi Taifémoma íaioi ríidollena jicádicue.

16 Enie ímieñedicue; afe izói énie ímaciñediaioi.

17 Íaioina uáfuedo dama óiena rairuirí. O úrilla uai uafue.

18 Enie imaci cigímo cue o ória izói, daje izói énie imaci cigímo íaioina orédicue.

¹⁹ Afémaci ícoinia cue dama abi rairuídícue. Daií finódícue, uafue uaido afémaci daje izói íaiói rairuíllena.

²⁰ Daa afémacimo omo izire jicáñedicueza, mei íadi bimaci úrilla uaina cacáillano cuemo ínotinomo izire jicádícue.

²¹ Nana afémaci dájena jaináillena omo jicádícue. Ua Moo, afémaci dájena cócomo jaináillena jicádícue. Uáfueña o cuemo itio, nane uáfueña cue omo itícue. Afe izói íaiói cócomo íllena jicádícue. Afémaci dájena jainaille jitáirede, énie comini cue o óriana íinollena.

²² Cuemo o iga ebíredífue izói, afémacimo jae cue iga, dájena íaiói íllena, o diga dájena cue illa izói.

²³ Afémacimo cue íllena jicádícue, nane o cuemo íllena jicádícue, nana afémaci dájena íficaillena. Daií íaiói íllena jitáirede, énie comini cue o óriana fidíillena. Nane áfedo énie comini cuena o izíruilla izói, bimácina o izíruillana ónoítiaíoi.

²⁴ Moo, bimaci cuemo itio. Cue illínomo cúeoiri íaiói íllena jitáidícue, cuemo o iga ebíredífueña íaiói cíoiillena. Nai énie fínoñenia uícomo cuena izíruitio.

²⁵ Moo, jaícina ñue jónetimiedio. Enie comini ona onóñediaíoi, mei íadi cue ona onódícue. Bimaci cue o óriana onódiaíoi.

²⁶ Búdio, jae íaióina onótaticue; íemo nai onótaoicaitícue, o cuena izíruilla íaiói comécimo fiébillena; daje izói cue dama afémacimo fiébillena, —daide.

18

Jesús maiáno úinafue

(Mt 26.47-56; Mr 14.43-50; Lc 22.47-53)

¹ Aféfuiai daina méifodo, Jesús ie llófuegamaci diga jino jailano Cedrón illétue ruica jáidiaíoi. Dinomo ite ocózinairabirimo jofo jáidiaíoi.

² Judas afébirina onode, Jesús ie llófuegamaciri, diga ícaíño afénomo gáirifirena jira.

³ Jira dinomo Judas fuiríraini diga dúcide. Afe llezica dáarie gairíraco llaizíraini Judas jicácamací bitíaiói. Afémaci fariséuaimona lletáiraini illáinimona oreca. Lloéfaillai diga jacire abi mamédiaíoi. Unéruairi bitíaiói, daje izói lámparaíairi.

⁴ Mei íadi Jesús afémiemo fínuailífueña onóillano, jino bilano íaióimo jicánote:

—¿Bu jenódiomoi? —daide.

⁵ Jira afémaci uai ote:

—Jesús, Nazaret ímie jenódicai, —daidíaíoi.

Jesús uai ote:

—Níimíedicue, —daide.

Afe llezica éoidimacimo fecádimie, Judas dinomo afémaciri ite.

⁶ Jesús “Níimiedicue” daína llezica, jinófecaifona éniemo baiídiaioi.

⁷ Ie mei Jesús dáanomo nane jicánote:

—¿Bu jenódiomoi? —daide.

Jira afémaci:

—Nazaret ímie, Jesús, —daidiaioi.

⁸ Mei jira Jesús daide:

—Jae níimiedicue daidicue. Cue omoi jenóadi, bie jiáimaci fáicanocai íaioi jáilleza, —daide.

⁹ Afe daií daide Jesús dama ie daínafue fuitállena. Afe daínafue lloste: “Cue Moo cuemo igámacimona buna dáamie féiraiñede.”

¹⁰ Iemo Simón Pédro daa lloefai ite. Otá Malco daínámie jefo nabefo ñetade. Malco lletáriraini illaíma jaiénici.

¹¹ Jira Jesús Pédrone daide:

—O lloefai ie icomo abido meine joone. ¿Cue Moo cue duere zefuitajana llínoñeiticueza, daií o comeci facádio? —daide.

Lletáriraini illaíma uícomo Jesús uitíaioi

(Mt 26.57-58; Mr 14.53-54; Lc 22.54)

¹² Ie mei fuiríraini íaioi ocuiraíma diga Jesuna llaitádiaioi. Nana bimaci judíuai llaiíziraini diga Jesús maiáno oni uitíaioi.

¹³ Ie meífomo Anás jofomo íena uitíaioi. Anás Caifás jifai. Afe fimona llezica Caifás lletáriraini caifóidillaíma.

¹⁴ Bie Caifás nauí judíuaina bie izói daidímie: “Daa come nana cai nairai ícoínia tíllena cai baimo ñue jaide.”

Pedro Jesuna jáanote

(Mt 26.69-70; Mr 14.66-68; Lc 22.55-57)

¹⁵ Simón Pedro jiáie llófuegamie diga nai Jesudo jaide. Jiáie llófuegamie lletáriraini caifóidillaíma onóigamie. Jira caifóidillaíma jofo ibírímo afémie jofo jaide Jesús diga.

¹⁶ Mei íadi Pedro jino naze fuemo fiébicaide. Ie jira lletáriraini caifóidillaíma onoíga llófuegamie jino jaillano, naze úiñoraímamo jicánuaide Pedro jofo oréllena.

¹⁷ Iemo naze úiñoraíma Pédro daa jicánote:

—¿O báimie llófuegamieñedio? —daide.

Pedro uai ote:

—Jíi, cúeñede, —daide.

¹⁸ Aféruído rozírena jira, jaiénizai llaiíziraini diga irai bonódiaioi. Dinomo naidáillano irai fuemo agáidiaioi.

Lletáriraini caifóidillaíma Jesumo izire jicánote

(Mt 26.59-66; Mr 14.55-64; Lc 22.66-71)

¹⁹ Lletáriraini caifóidillaíma Jesumo jicánuaillano daide:

—¿Nimaci o llófuegamacina? ¿Nífuiaina llófuetio?

²⁰ Jira Jesús daide:

—Cue nana comini uícomo uáfodo úriticue. Juzíñamui uai llófueriracuaimo jaca llófuefiredicue. Daje izói Juzíñamuimo gairíracomo llófuefiredicue. Jaca afénomo judíuai gairifirediaioi. Daií báinino nífuena lloñedicue.

²¹ ¿Níbái mei cuemo jicánotiomoi? Cue uaimo cacádinomo jícano. Afémacimo cue dáinana jícano. Cue íaioina dáinana onódiaioiza, —daide.

²² Jesús daií daina llezica, daa dino ite gairíraco llazíriraíma Jesús uíeco pútanona daide:

—¿Níbái daií lletáriraini caifóidillaíma uai otio? —daide.

²³ Jira Jesús uai ote:

—Fiénidífue cue lloía, áfena cuemo llone; mei íadi cue daina uai ñuera íadi, ¿níbái mei cuena putádio? —daide.

²⁴ Iemona Anás Caifamo íena maitá orede. Caifás lletáriraini caifóidillaíma.

Pedro nane dáanomo Jesús jáanote

(Mt 26.71-75; Mr 14.69-72; Lc 22.58-62)

²⁵ Due jiza bai jáidemo, Pedro nai náidaillano irai fuemo agaide. Afénomo itino íena daidíaiioi:

—¿O báimie llófuegamaci iéñedio? —daide.

Pedro jáanuano daide:

—Jii, iéñedicue, —daide.

²⁶ Dinomo Pedro jefona jaitácamié come ite. Afémie jíaié lletáriraini illaíma jaiénci. Afe iima Pédro mo jicánote:

—¿Báimie diga dinomo ocózinairabirimo ona cióñedicue? —daide.

²⁷ Pedro dáanomo nane jáanote. Afe llezica átava úrite.

Jesús Pilato uícomo uiga

(Mt 27.1-2, 11-14; Mr 15.1-5; Lc 23.1-5)

²⁸ Iemona Caifás jofómona oni romano jabóidillaíma áillocomo Jesuna uitíaiioi. Ja monáiacademo. Judíuai jofó afécomo jáiñediaioi, íaioi íaicaiñellena. Mei íaicaigamací páscuamo güilláfuena güinidiaioi.

²⁹ Ie jira Pilato jino íaioimo úrizailano daide:

—¿Minica ícoínia bímiemo nitádiomoi? —daide.

³⁰ Jira afémaci uai otíaiioi:

—Afémie fiénidimieñedena omo izájiñedicaí, —daidíaiioi.

³¹ Jira Pilato daide:

—Íena omoi úi. Omoi ocuícáfue izói afémie omoi riire jicánori, —daide.

Judíuai ie uai otíaiioi:

—Cai judíuaidicaí, dani buna titánidicaí, —daidíaiioi.

32 Daií Jesús ie tíizaillinona daina izóidiuai fuitade.

33 Pilato áillocomo jofo meine jaide. Jaillano Jesús jíirillano jicánote:

—¿O nii judíuai illáimana? —daide.

34 Jira Jesús daide:

—¿Afefue dama o comeci jítaina izóí jicánotio? ¿Nibai jíáimaci cueri ona daina jicánotio? —daide.

35 Jira Pilato úrite:

—¿Cuena judío daidio? O náiraímona lletáriraini illaini cuemo ona fecádiaioi. ¿Minica ñetio? —daide.

36 Jira Jesús uai ote:

—Cue illáimana illano bie énie íeñede. Daií ítenia cuedo jáicadino nia fuirídiaioi, cuena judíuaimo fécañeillena. Mei íadi cue illáimana illano benó íeñede, —daide.

37 Jira Pilato daide:

—¿Jii, o daií illáimadio? —daide.

Jira Jesús uai ote:

—Ílláimadicue, o daina izóí. Cue, bie éniemo jéiciaibigacue uafue uai llóllena. Nana uáfuemo cacáfredino, cue dainana cacádiaioi, —daide.

38 Jira Pilato jicánote:

—¿Minica uafue uaina? —daide.

Jesús tíillinomo maméritiaioi

(Mt 27.15-31; Mr 15.6-20; Lc 23.13-25)

Afe jicánua meífodo, Pilato meine jino judíuaimo jaillano úrizaide. Iaioina daide:

—Jaca nífuena bie ímamo baiñédicue.

39 Mei íadi ómoimo cue fínofiregafue ite. Naga pascua ráfuemo ómoiri daa maigámie zuitafiredicue; mei jira ¿judíuai illáimana ómoiri cue zuitállena jítáidiomoi? —daide.

40 Iemona nana meine caillíoidiaioi:

—¡Afémiena zuitáñeno iri! ¡Barrabás zuitari! —daidiaioi. Afe Barrabás meríriraíma.

19

1 Ie mei Pilato Jesús llínuano zechétatade.

2 Iemo fuiríraini ifo icuifoí eegi nínacuífoí Jesumo jítádiaioi. Afe llezica ráífide illaíma iníroina íemo jítádiaioi.

3 Daií ñiano íemo áinozillano, báíñuano daidiaioi:

—¡Judíuai illaíma, are ii! —daidiaioi.

Iemona ie uieco fácoidiaioi.

4 Pilato meine jino billano daide:

—¡Bímiemo eroi! Afémiemo nífuena baiñédicue. Ie jira jino bené cue ógaza, aféfuena omoi onóillena, —daide.

5 Jesús eegi icuifoi ifomo jínari jino bite. Ráifide illaíma iníroina jítaca naari jino bite. Jira Pilato daide:

—¡Benó afe iima ite! —daide.

6 Afémie cióillano, lletáriraini illaini, llaizíraini diga caillíoidiaioi:

—¡Le corai! ¡Le corai! —daidíaioi.

Iemo Pilato daide:

—Mai íena uillánona omoi corai, mei íadi afémiemo fiénidifuena baiñédicueza, —daide.

7 Mei ie jira judíuai uai otíaioi:

—Caimo ite daa ocuica uai. Afedo afémie tíllena jítáirede, dama “Juzíñamui Jitódicue” ie daína jira, —daidíaioi.

8 Afena cacáillano Pilato jamánomo jacínaificaide.

9 Aillocomo nane jofo jaillano Jesumo jicánote:

—¿O ninó ímiedio? —daide.

Mei íadi Jesús jaca uaina oñede.

10 Jira Pilato daide:

—¿Cue uaina fairíoñedio? ¿Cuemo ite o tílle ríino onóñedio? ¿Cuemo ite o zuitalle ríino onóñedio? —daide.

11 Jira Jesús uai ote:

—Juzíñamui omo iñénia, o cue ocuille ríino iñede. Ie jira omo cue fecádino o jinomo afémaci íaifueredino, —daide.

12 Afe llezícamona Pilato, “Nie izói Jesús cue zuitalle” daínano, áfena jenode; mei íadi judíuai caillíoidiaioi:

—Afémie o zuitáadi, romano jamánomoidillaímamo nábaiñeítio. Naga illáimana íacadimie caifóidillaíma dibénedo éoidimiena jáite, —daidíaioi.

13 Mei jira áfena cacáillano, Pilato Jesuna otátate. Ie mei comini riire jicánoranomo Pilato ráinazaide. Afeno hebreo imaci uaido Gabátana mameide. Jiáimaci daína Empedrado, mei nófiái ie finoína macáranona íllaza.

14 Jae pascua uícodirui jaíciri ítemo. Jira Pilato judíuaina daide:

—¡Benomo o illaíma ite! —daide.

15 Mei íadi afémaci caillíoidiaioi:

—¡Dama tíideza, oni ui! ¡Iena corai! —daidíaioi.

Jira Pilato íaioína daide:

—¿Omoi illáimana córaiticue? —daide.

Jira lletáriraini illáicomini uai otíaioi:

—Jiáie illáimana caimo iñede; dama romano jamánomoidillaíma, —daidíaioi.

16 Afemona Pilato íena íaioímo ite, afémiena coráíllena. Mei jira íena uitíaioi.

*Coráinafue**(Mt 27.32-44; Mr 15.21-32; Lc 23.26-43)*

17 Iemo Jesús jino jaide. Ie coráillibici rocáoicaide Calavéramo; afe daíacade come ifócorai. Hebreo imaci uaido daina Gólgota.

18 Afénomo íena coráidiaioi. Afe llezica nágafene jáimie íaillinoi coráidiaioi; Jesuna cígiide.

19 Pilato afémie mámecei ibícimo cuetá ie coráinabícimo jóonetade. Afébicimo cueda daide: “Jesús Nazaret Imie, Judíuai Illaima.”

20 Aillo judíuai afe cuedábici facádotiaioi, Jesús coráinano jofue áinori illa jira. Afébicí daámani comini uáillaído cueda, hebreo, griego, latín diga.

21 Ie jira judíuai lletáiraini illaini Pilátona daide:

—Judíuai illaima daí cueñoeno. Mei íadi “Judíuai illáimadicue daidímie” daí cúeiri, —daidíaioi.

22 Jira Pilato uai ote:

—Jae cue cuedáuai, dama daí ite, —daide.

23 Fuiríraini Jesús coraia mei, ie inícuero llínuano cuatro fidi tizaruano fecádiaioi. Afe izói ie caifóferoi llínuano “Iere ñúeraroí,” daidíaioi. Ua aferoi dájena tifoca, zotáinanona íñede. Caifona aná fuizájide.

24 Jira fuiríraini conímana daidíaioi:

—Dama ite, cúatañeiticai. Bai ñue onótaraji cai dotalle bumo jíiteza, —daidíaioi.

Daí Cuegáuai daina fuitátatiaioi. Aféuai daide: “Cue inícuero dani fecádiaioi. Afemo onótaraji dotádiaioi.” Jira mei fuiríraini daí finódiaioi.

25 Jesús coráinabici áinomo ie ei ite afengo ebuño diga. Dáanomo Cleofas ai, María ite, María Magdalena ingo diga.

26 Jesús ie eina cióillano, iere izíruiga llófuegamie diga, ie eina daide:

—Ei, batí o jitona como maméidímie ite.

27 Iemo afe llófuegamiena ibana daide:

—Afénomo o eina como maméidingo ite, —daide.

Mei aféruillaído afe llófuegamie afengo ie jofomo ñue llínnote.

*Jesús tíllafue**(Mt 27.45-56; Mr 15.33-41; Lc 23.44-49)*

28 Afe mei Jesús naga rafue fuitáinana fidide. Fídiano Cuegáuai fuitállena daide:

—Jiróacadicue.

29 Afe dinomo iciru rochírede vínona oruítaga rainaca. Ie jira jainoi fíllícide raa afe rochíredijina riáitatiaioi. Iemo razi ícoimo jóoniano ie fuemo dutádiaioi.

30 Jesús afe rochíredii jirode. Jíruano daide:

—Nana ja fuite, —daide.

Daina mei, ifo ana jíjicailla llezica tíide.

Fuiríraimie ie ducírirado Jesús ciraigi faitade

31 Ja pascua uícodirui. Judíuai ocózinaillarui mo coráicano íaioi abi coráinabicimo fiébillana jítaiñediaioi. Bie ocózinaillarui iere áillue. Ie jira Pilátomo jicádiaioi coráicano idai ditátallena. Iemona íaioi abi dinómona oni óllena jicádiaioi.

32 Jira fuiríraini jaillano nánoramie idai ditádiaioi. Jiáimie, Jesús diga coráicamie daje izói íena finódiaioi.

33 Ie mei Jesumo ánozillano jae tídena ciódiaioi. Ie jira ie ídaina ditáñediaioi.

34 Mei íadi fuirírainimona dáamie ducírirado ie ciraigi faitade. Iemona jainoi die diga tóide.

35 Bifue llotímie áfena ciódimie. Uáfueña daide. Afe uáfueño uai nabaide, omoi daje izói ínollena.

36 Aféfuiai daí íficaide Cuegáuai daina ñue fuitállena. Afe uai daide: “Bu ie ícuruna dítaiñeitiaioi.”

37 Jiáinomo Cuegáuai daide: “Íaioi bofécamiemo éroitiaioi.”

Jesús raiáfomo jóonetiaioi

(Mt 27.57-61; Mr 15.42-47; Lc 23.50-56)

38 Afe meífodo José, Arimatea jofue ímie, Jesús abi uíllena Pilátomo jicade. Afe José Jesudo jáicadimacimona, mei íadi judíuaina jacíruillano báinino jaide. Iemo Pilato fairíote; íemona José jaillano Jesús abi uite.

39 Daje llezica nauí Jesumo naióna úrizaiibitímie, Nicodemo dúcide. Afémie treinta kilos dieze mérede zíochoa atide. Aféchoma mena zióredena ímuica.

40 Daí José Nicodemo diga Jesús abi uillano, áreroi ínóroido ie abi junide. Aferoi ziórena, mei diga zióredena fáigaza. Daí tíidino judíuai ráifirediaioi.

41 Jesús coraia áinori ocózinairabíri ite. Dinomo daa comue raiáfo, come nai ráiñenafo ite.

42 Aféfomo Jesuna jóoneaidiaillinoi, áinori illa jira. Ua dinomo íena jóonetiaillinoi, judíuai ocózinaillarui tainéacana jira.

20

Jesús meine abido cáadimiena jaide

(Mt 28.1-10; Mr 16.1-8; Lc 24.1-12)

1 Semana nanóidiruido Magdalena ingo María jítiramoicana raiáfomo jaide, ua nai jítireoidemo. Dúciillano raiáfo ibaina nofici íñénana ciode.

² Ie jira aizícana jaide Simón Pedro illánomo. Dinomo jáie llófuegamie Juan ite. Afémie iere Jesús izíruigamie. Iaillinoína daide:

—Jae raiáfomona cai Ocuíraima comini bairódiaioi. Ie íaioi jóoniano onóñedicaí.

³ Iemona Pedro jáie llófuegamie diga jino jaillano raiáfo dine jáidiaillinoi.

⁴ Dájena aizídiaillinoi, íadi jáímie Pedro baimo iere rairede; jira uícomo raiáfomo dúcide.

⁵ Ie abi ana jíjillano raiáfo eromo eroide. Eróillano juníllaroina ciode, mei íadi jofo jáíñede.

⁶ Iemo Simón Pedro afémie óodana dúcide. Dúciillano raiáfomo jofo jaide. Abi juníllaroi dino jóoinana nane ciode.

⁷ Iadi Jesús ifo íbáinaroi ie juníllaroi dáanomo jóoiñede. Afe ifo íbáinaroi jabínota oni eneno jóonega.

⁸ Iemo jáie llófuegamie, raiáfomo uícodo dúcidimie, jofo jaide. Afe finócafuena ciode. Cióillanona áfemona ínote.

⁹ Mei Cuegáuai dánana nai figo onóñediaioi. Aféuai daide: “Jesús tíllanomona meine abido cáadimiena jáite.”

¹⁰ Iemona afe llófuega íaillinoi jofomo jaide.

Jesús Magdalena ingo Maríamo cíocaide
(Mr 16.9-11)

¹¹ Mei íadi María jino raiáfo áinomo éecana ráiide. Eeia llezica abi jíjide raiáfo eromo éroillena.

¹² Dinomo mena Juzíñamui abi ímie íaillinoi ángeles dainámaci úzeroi jitádena ciode. Ua naui Jesús abi illánori ráidiaillinoi; dáamie ifo illánori, jáímie idaí illánori.

¹³ Iemo Juzíñamui abi ímie íaillinoi jicánote:

—Ringo, ¿nibái éedio? —daide.

Jira afengo daide:

—Cue Ocuíraima oni ninomo íaioi uilla jira. Iaioi jóonianona onóñedicueza, —daide.

¹⁴ Afe daina llezica afengo gírecaillano Jesuna ciode; íadi íena onóñede.

¹⁵ Jira Jesús jicánote:

—Ringo, ¿nibái éacadio? ¿Bu jenodio? —daide.

Afengo comeci facade, afémie afébiri úíñoraima; jira íena daide:

—Íima, afémie oni jáínomo jae o úiadi cuemo llone, meine cue uájilleza, —daide.

¹⁶ Jira Jesús aféngona daide:

—¡María! —daide.

Afengo ñue gírecaillano hebreo uaido daide:

—¡Raboni! —daide. Afe uai dobáicana daide, Llófueraima.

17 Iemo Jesús daide:

—Cue abi jetáñeno iri. Cue Moo illánomo nai caifo jáiñedicueza. Mei íadi cue ámatiaimo llujiri: “Cue Moo illánomo, daje izói omoi Moo illánomo caifo jáitícue. Ua cue Juzíñamui, omoi Juzíñamui dine jáitícue.” Daií íaioimo lloiri, —daide.

18 Ie jira Magdalena ingo María llófuegamacimo llujide. Afengo Ocuíraimana cíoilana llote, nana bie afémie aféngona daináuai diga.

Jesús ie llófuegamacimo cíocaide

(Mt 28.16-20; Mr 16.14-18; Lc 24.36-49)

19 Aféruído, semana nanóidiruido afe naio llófuegamaci gairídiaioi. Naze ibáillano judíuaina jacíruillamona itíaioi. Iemo Jesús jofo eromo cíocaide. Iaiói cígímo náidazaide. Iaiói uáiduano daide:

—Omoimo comeci caimare uái iri, —daide.

20 Daií dainano, ie onoi, ie ciraigi diga íaioimo ácatate. Llófuegamaci íaioi Ocuíraimana cíoilano íóbicaidiaioi.

21 Iemo Jesús dáanomo íaioina daide:

—Omoimo comeci caimare uái iri. Moo cue ória izói daje izói ómoína óreitícue, —daide.

22 Afe mei íaioimo jágíilli fúunuano daide:

—Ñuera Joréñona mai omoi ono.

23 Naga come ie fiénidino omoi fáicanocaiadi fáicanocaite; mei íadi omoi fáicanocaiñeniadi dóñega izói fiébite, —daide.

Tomás meine abido caade Ocuíraimana cíode

24 Iadi Tomás, guarámiena maméidimie, doce dígamiedemona, Jesús cíocallaruido íñede.

25 Ie mei jíaie llófuegamaci íena daide:

—Ocuíraimana ja cíódicai, —daidíaioi.

Mei íadi Tomás íaioina daide:

—Ie ónoimo ite boafe, puntilla meifo, cue cíóñenia, cue onocai aféfodo ñuitáñenia, cue onoi ie ciraigi méifodo ñuitáñenia, íñoñeitícue, —daide.

26 Ocho dígamona íllamona llófuegamaci meine gairídiaioi. Afe llezica Tomás afémaciri ite. Iemo jaca naze ibaica íadi, Jesús jofo eromo cíocaide. Iaiói cígímo náidajano uáiduano íaioina daide:

—Omoimo comeci caimare uái iri, —daide.

27 Iemo Tomásna daide:

—Benomo o onocai ñúitaibi. Cue ónoimo éroi. O onoi cue ciráigimo ñúitaibi. Jáanocaiñeno iri. Ínori, —daide.

28 Jira Tomás uai ote:

—¡Cue Ocuíraima! ¡Cue Juzíñamui! —daide.

29 Jira Jesús daide:

—Tomás, ja cuena ciónamona íinotio. Jamánomo ióbidino cuena cióñedino íadi íinotiaioi, —daide.

Bibénico nibái mei cuega

³⁰ Bífuiái baimo Jesús aillo jíáie cíofinina raa ie llófuegamaci uícori finode. Aféfuiái bibénicocomo cúeñega.

³¹ Mei íadi ja bie llogáuai cuega, Jesús Crístonana omoi íinollena; daje izói afémie Juziñamui Jitona omoi íinollena. Ua jae cuega, omoi íinuamona cáaillino ómoimo ie mámedido íllena.

21

Jesús siete diga ie llófuegamacimo cíocaide

¹ Afe mei Tiberias jorai fuédamo Jesús ie llófuegamacimo meine cíobicaide. Bie izói cíocaide.

² Ie llófuegamaci dáanomo ítiaioi. Dinó ite Simón Pedro, Tomás níimie jíáfodo mameina Guarámie, Galilea jofue Caná ímie Natanael, Zebedeo jító íaillinoi, jíái mena llófuegamie diga.

³ Simón Pedro íaioina daide:

—Fácuaidicue, —daide.

Jira daidíaioi:

—Mai nana cai fácuaili, —daidíaioi.

Iemo nocáe eromo caifo jáidiaioi. Afe naio chámuniaina oñédiaioi.

⁴ Jítiramo monáiacademo, Jesús ja jorai fuédamo náidaide. Mei íadi “Jesús” daíñediaioi, llófuegamaci íena íaioi onóñena jira.

⁵ Iemo Jesús daide:

—Omoi, ¿chamuna oñédiomoi? —daide.

Uai otíaioi:

—Jíi, oñédicai, —daidíaioi.

⁶ Jira Jesús afémacina daide:

—Nocáe nabézimo llóiji omoi dota, afe llóijimo jíiteza, —daide.

Jira daí finódiaioi. Ie fínuamona llóijina jáinoimona caifo zonónidiaioi, iere aillo chámuniái íllaza.

⁷ Iemo Jesús izíruiga llófuegamie Pédrona daide:

—¡Baie cai Ocuíraima! —daide.

Simón Pedro, Jesús ite dáinana cacáillano, ie jínofecuiro jítade, nauí duiñoca jira. Jítanona jóraimo tícacaide Jesumo jaillena.

⁸ Jíái llófuegamaci chámuna oruítaga llóijina oni zocana no-caedo uitíaioi. Afe mei afémaci jorai fuédamo dúcidiaioi, nai are íaioi íñena jira. Afémaci cien metros dinó bai ítiaioi.

⁹ Eniemo dúcillano, chamu pan diga iraimo ruícana cíodiaioi.

¹⁰ Jesús íaioina daide:

—Jae omoi oga chámuniaimona atiri, —daide.

11 Simón Pedro nocaemo jaillano, afe llóijina ari guamáemo zote. Ja ciento cincuenta y tres jéerie chámuniaina orútaga, mei íadi afe llóiji cuáifede, nii aillo chámuniái illa íadi.

12 Iemo Jesús íaioina daide:

—Mai omoi güizáibiri, —daide.

Llófuegamacimona buna ¿Búdio? daínide. Afémie Ocuíraimana onódiaioiza.

13 Ie mei Jesús áinozillano afe pan llínota íaioimo fecade. Daje izói chámuna fecade.

14 Daií Jesús tíllanomona meine abido cáadimiena jáillamona dacaiñoámani ie llófuegamacimo cíocaide.

Jesús Simón Pédro mo úrite

15 Güilla méifodo, Jesús Pédro mo jicánote:

—Jonás jító, Simón, ¿baimaci baimo cuena izíruitio? —daide.

Pedro uai ote:

—Jii, Ocuíraima, ona cue gáinana onódio, —daide.

Jesús íena daide:

—Mei jira cue ovéjatiruai o ecari, —daide.

16 Jesús meine dáanomo íemo jicánote:

—Jonás jító Simón, ¿cuena izíruitio? —daide.

Pedro uai ote:

—Jii, Ocuíraima, ona cue gáinana onódio, —daide.

Jesús daide:

—Mei jira cue ovéjaiai uíñori, —daide.

17 Ja dacaiñoámani Jesús meine abido íemo jicánote:

—Jonás jító Simón, ¿cuena gáidio? —daide.

Pedro jae zúucaide, Jesús bie íraicaiño íena gáinana jicánua jira. Jira íena daide:

—Ocuíraima, o nana onódioza. Ona cue gáinana onódio, —daide.

Jesús íena daide:

—Mei jira cue ovéjaiai o ecari.

18 Uáfueña ona dáititue, iere o jítócomena llezica, jaca o comeci jítaina izói iníroina jítafiredio. Daje izói nana o jáiacananomo jáifiredio. Mei íadi o eímaile llezica o onoi oni zítaitio, jáíimie o inícuuro jítátallena, daje izói jáíimie o uíllena o jáiacañenanomo, —daide.

19 Afe dánado Pedro nie izói tíitena Jesús daií onótate. Afe ie tílledo Juzíñamuimo ñue ebírenafue nítaite. Ie méifodo íena daide:

—Cuedo biri, —daide.

Izíruiiga llófuegamie

20 Pedro gírecaillano Jesús iere izíruiiga llófuegamie Juana ciode. Afémie óodana bíllana ciode. Afémie nauí íraicaiño

güilláruido Jesús abimo ráiidimie. Afémie, “Ocuíraima, ¿bu o fecalle?” daidimie.

²¹ Pedro Juaana ciona llezica Jesumo jicánote:

—Ocuíraima, ¿báimie nie izói iite? —daide.

²² Jira Jesús uai ote:

—Afémie cue billíruimo caadi cue óiacaia ¿ómona mei nibai? O cuedo bi, —daide.

²³ Jira Jesús jaináidinori taino daináfueña fidíbicaidiaioi. Afefue daide, “Bie llófuegamie tíñeite.” Mei íadi Jesús afémie tíñeiteza daiñede. Fia dáideza, “Afémie cue billíruimo caadi cue óiacaia ¿ómona mei nibai?”

²⁴ Bímie llófuegamacimona aféfuiai uáfueña llotimie. Aféfuiai cuetímie. Afémie daina uai uáfueña onódicaiza.

²⁵ Jesús jiáie finócafuiái nai aillo ite. Nana aféfuiai dámierie cúeiai jamánomo aillo rabénicuaina zúite. Ua nibai afe rabénicuái jónellino nániena báíñeite. Jae nie.

JESÚS ORÉCAMACĪ FINÓCAFUIAI

Los Hechos de los Apóstoles

Ñuera Joreño billifue uícodo llogáuai

¹ Cue izíruiga Teófilomo nane omo cueticue. Cue nánoidibemo nana Jesús bie éniemo illa llezica nanómona ie llogáfuiyai ie finócafuiyai diga omo cueticue.

² Ua ie monamo jáillarui mo finócafuiyai cueticue. Nai monamo ie jáiñena llezica ie orécamacina nizede. Níziano Ñuera Joreñodo íaioina llote nie izói finóllena.

³ Ie tíilla meífodo, Jesús dáamie cómena íaioimo cíocaide. Cuarenta dígarui uáfori cíocaifirede. Afe ciónanuedo ie cáanano ñue uáfueña daítate. Afe llezica Juzíñamui illáimana illíruido íaioimo úrite.

⁴ Orécamaciri illa llezica, Jesús íaioina rairuide Jerusalémona oni jáiñeillena. Iaioina daide:

—Cue Moo uafue uai llote: “Ie Ñuera Joreño ómoimo fecáacade.” Afe fecállirui omoi úiñori, nauí ómoimo cue llua izói.

⁵ Uáfueña Juan fia jáinoido báutizade. Mei íadi íanori íllamona Ñuera Joreño óitiomoi, —daide.

Jesús caifo monamo jáillafue

⁶ Jesumo gairíllano jicánotiaioi:

—Ocuíraima, ¿ua birui Israel nairai illáimaillena meine caimo itátaitio?

⁷ Jira Jesús uai ote:

—Moo afefue finóllirui ómoimo ónonide. Dama afémiemo ríino afefue finóllena ite.

⁸ Mei íadi Ñuera Joreño ómoimo bíadi, ríino óitiomoi. Iemona cuedo úrizaitiomoi, ua Jerusalem, nana Judea éniemo Samaria énie diga. Ua jamánomo jica ite itínuiamo llujáitiomoi, —daide.

⁹ Daí daina meífodo, nana íaioi éroillamo, afémie caifo ráiñuano monamo uiga. Iemo mona ero úillie íena ferínote. Iemona jaca íena cíóñediaioi.

¹⁰ Jesús caifo jáidemo monamo eróioidiaioi. Afe llezica mena come úzecuiro jitada íaioi abimo cíocaide. Juzíñamui abi íaillinoi.

¹¹ Daídíaillinoi:

—Galilea íñiai, ¿nibái mei monamo eróioidiomoi? Dámie Jesús, afe ómoimona caifo úilliedo jáidímie, afémie ie jáillana omoi ciona izói daje izói meine ana biite, —daide.

Judas meifo méidollena Matías nizédiaioi

12 Ie mei Olivo ídumona oni jáillano abido Jerusalem bitíai. Jerusalén áinori afe idu ite. Ua ocózinairuido macácana jailla daa kilómetro dieze izói ite.

13 Afe jófueмо dúcillano caifófecomo íai. ífirenenoма jáidiaioi. Bie íai. mámeciai: Pedro, Santiago, Juan, Andrés, Felipe, Tomás, Bartolomé, Mateo, Alfeo jitó Santiago, Iere Járidotimacimo dúidimie Simón, Santiago ama Judas.

14 Nana afémaci dáanomo gairífirediaioi Juzíñamuimo úrillena. Afénomo Jesús ámatiai gairífirediaioi, ie ei María diga naa jíáie ringóniari.

15 Aféruillaído Pedro afe ámatiai dainámaci cígiri caifo náidaillano úrite. Afe ámatiai ciento veinte dígamiede. Afémacina daide:

16 —Amatiai, Ñuera Joreño Cuegáuaimo Davido llote: “Judas meifo cai cígiri méidolle jitáirede,” daide. David cuegáuai uícodo llote: “Judas Jesús lláitaitimaci ífoite.”

17-18 Mei jíi, afe Judas dani cáimona. Bie cai táijina afémie dibénemo ite. Mei íadi afe meífodo cimoi cúinano ágüicaillano caifona ifo dinena éniemo baíde. Baíillamona ie jebe bójicaide. Afemona nana ie eromo itínui. jino cocide. Afe mei ie fiénidifue iba úcubedo ja ie raillíbiri ibádiaioi.

19 Jerusalem itímaci áfena íai. fídiano, afébirina “Acéldama” jitádiaioi. Afe mámecei íai. uaido dibénedo “Die illábiri” dáiacade.

20 Mei jírari Salmos ibénicomo daí daide:

Dai o jofu zóofefiteza

Buna afécomo íñeilleza.

Jiáífuedo daide:

Afémie táijina jíáima ólleza,

—daide.

21 Cai Ocuíraima Jesús nana cai diga illáruillaído cairi macádino birui cai cígimo itíai.

22 Jesús báutizaruimona, ie monamo jáillaruimo cairi jáicadiaioi. Mei jira afémacimona dáamie cai dájellena jitáirede, Jesús meine abido cáaillafueмо uai nabáillena.

23 Jira dainámacimona mena come oni naidánetaioi. Dáamie daámani mámeceirede: José Barsabás Justo. Jíáimie Matías.

24 Ie mei Juzíñamuimo úritiaioi; daidiaioi:

—Cai Ocuíraima Juzíñamui, nana comini comeci onódimiedioza. Bíailinoimona o nizécamie caimo onótari orécamie táijina finóllena.

25 Afe táijinamona Judas ie fiénidifue ícoinia oni baíde. Baíillano dama ie zefuinaillinomo jaide.

26 Iemo onótaraji dotádiaioi. Jae Matíasmo níjide. Afe llezícamona afémie once orécamiimo dájena jaináicaide.

2

Ñuera Joreño billafue

1 Pentecostés irui ráfue mo jae dúcide. (Afe fue güille jofo óinarui rafue.) Afe rafue dúcidemo jae nana dáanomo gairídiaioi.

2 Ie mei rairéfeicana minica izóí ficire monámona cácaicaide. Jairifo riire jáiñua izóí cácaicaide. Nana íaioi ráinaco eromo cácaizaibite.

3 Iemona íifiaí izóí iráiciaí íaioimo cíocaide. Nana illa dígamierie íaioimo níjzaibitiaioi.

4 Afe llezica nana Ñuera Joreño úicaigaiaioi. Iemona jáie náiraiaí uáillaído como úritiaioi; mei afe Ñuera Joreño íaioi úritade.

5 Aféruillaído Jerusalemo aillo judíuai náganuiaimona bitíaioi. Ua íaioi Juziñamuimo jitáirede finóllifuaí finuaibitiaioi.

6 Afe riire ficirenana cacáillano comini dáanomo ofidiaioi. Níie izóí comeci fácana onóñediaioi nágazie dani íaioi uáillaído íaioi cacana jira.

7 Abi fáigacaidiaioi; daidíaioi:

—¿Nana bie úiraini Galiléamona bitímaci; uáfueñede?

8 Nágamierie dani cai uaido íaioi úrillana ¿níie izóí cacáfiredicai?

9 Benomo nágaziai ite: Partía imaci, Media imaci, Elam imaci, Mesopotamia imaci, Judea imaci, Capadocia imaci, Ponto imaci, Asia énie imaci,

10 Frigia imaci, Pamfilia imaci, Egipto imaci, Africa illánie Cirene batífenemona bitímaci díga. Afe dáanomo áinori ite romano imaci gairídiaioi. Bie románomana dáarie judíona jococa. Jáí romano imaci judíuai Juziñamuimo ínuaafuena jeire otíaioi.

11 Afe llezica Creta imaci bitíaioi Arabia imaci díga. “Mei íadi Juziñamui caimare llogáfuaí ñue finócafuaí díga, nágamierie dani cai uáillaído cacádicai,” daidíaioi.

12 Nana fáigacaidiaioi. Iaioi comeci fácana onóñediaioi; jira jicánotiaioi:

—Nana bie caimo comuídifue, ¿níie izóí caína daiíacade? — daidíaioi.

13 Mei íadi jáíimaci íaioi uai áfeduano daidíaioi:

—Bimaci jifáidiaioi, —daidíaioi.

Comínina Pedro daínafue

14 Ie mei Pedro once díga orécamaciri náidaillano comínimo riire úrite; daide:

—Judea comini naa Jerusalemo itinuiairi cácarei. Bie ráfueña omoi onoiri. Dáiticueza ñue omoi cacáreiri.

¹⁵ Bie íñiaí jifáñedimaci omoi comeci faca ízoi. Jitoma nai fuiri dáidemo. Jítiramo dibénemo comini jaca jifáñidiaíoi.

¹⁶ Bifue jáífodo ite. Afe bifue uai lloraima Joel jaiaí uícodo llogáuai. Afémie daide:

¹⁷ Juzíñamui ómoína daide:

“Tirairuillaído cue Joreño nana náiraiaína, jainoi tua izói fáicanocaiñeno íaioína úcaitaiticue.

Omoi jítótiaí jízatíaí diga cuedo úritiaíoi.

Jítócomini nicaido ciónafuiaí izói cíotiaíoi.

Einamací ñuera nicaido nicáiritiaíoi.

¹⁸ Aféruillaído cue Joreño cue táijitagamíiaína naa cue táijitaga ringóniaíri ñue úcaitaiticue.

Iemona cuedo úritiaíoi.

¹⁹ Caifo monamo jacínaitadinona cíotaiticue;

Aféruimo ana éniemo onótajafueña fínoíticue.

Afe onótajafue díena cíotaite; iraina cíotaite, jamánomo irai úilliena cíotaite.

²⁰ Afe monado jitoma jítireficaite, fuí die izói jáite.

Daí íite cai Ocuíraíma Jesucristo billíruimo nai dúciñenia.

Afémie billirui iere ebíreitirui.

²¹ Nana Juzíñamuimo íaíoi canóllena íemo jicádino jíllobicaítiaíoi.”

Aquíe izói Juzíñamui Joeldo daide.

Iemo Pedro nai úrillano daide:

²² ‘Mei jii, Israel nairai cue daíllifuemo cácarei. Nazaret ímie Jesús omoi uícori Juzíñamui ñue facácamié. Uafue aillo fáigatate ráaniaído ñue facátaga. Daí Juzíñamui omoi cígiri afémiedo finode. Aféfuiaína ñue fidídiomoíza.

²³ Mei íadi afémie omoi fecállíruimo maíano uitá fatíomoi, Juzíñamui jaiaí uícodo comécíitífuiaí onótafuiaí diga daína izói. Uafue fiénidimacido íena coráitatiomoi.

²⁴ Mei íadi Juzíñamui afe tílla cuinaca raa zuita izói, zúitano íena meine cáatate. Mei tíllafue jaca íena anáfenonide.

²⁵ Mei illaíma David Jesudo úrillano daide:

Ocuíraimana cue uícori cíófredicue.

Afémie cue nabézimo izói ite, minícana cue jácicaíticue.

²⁶ Ie jira cue comeci cáimafueña iere ite, afe llezica cue fuemo ite cáimafuiaído úriticue.

Afe jira daje izói cue íeizi ñue ocózínaitaiticue, mei tíllamona meine cue abina cáataítio.

²⁷ Mei jii cue joréñona tídinomo fiénocaiñeítio.

Afe izói o izíruiga táijitagamié abi rifáillana ráiruitio.

²⁸ Cáatatínomo jóoide io cue llófuetio.

Cue diga o íllado, cáimafuena cue oruítaitio, —daíí daide David.

²⁹ ‘Amatiai, cácarei. Cai jáiairagima David tíide raiga uáfodo onórede. Afe raiáfo nai cai diga íteza.

³⁰ Mei afe David uai llórami. Jaiái Juzíñamui uícodo uafue llóllena ríifuedo íena daide:

—O emódoidiziemona dáamie Cristoite. Afémie o illáimana illánomo ráinaite, —daide.

³¹ Jira daíí David, uícomo ciona izóí Cristo meine abido cáailafuedo úrite. Afe izóí daide:

—Cristo joreño tíidinomo fiébiñeite. Ie íeizi rifáillana rairuícaza, —daide.

³² Mei jii Juzíñamui afe Jesuna meine abido cáatate. Aféfuemo nana cai uai nabáiraimacídicaí.

³³ Daíí Juzíñamui nabézimo Jesús naidánega; naidánia meífodo Móomona uícodo lloga Ñuera Joreño fecállifue llínnote. Llínnuana nana bie omoi ciona, omoi cacana raa finode. Nana aféfuíai afémiemona bite.

³⁴⁻³⁵ Mei David monamo jáiñedimie, mei íadi dama David daíí daina:

“Caífoide Ocuírami cue Ocuíramana daide:

—Cue nabézimo rainai, o éoidino cue anáfenolliruimo, —daide.”

³⁶ ‘Nana Israel nairai, mai comeci jizíñeno omoi onoiri: bie omoi coraica Jesús Juzíñamui Ocuíramana itátate: Crístona itátate, —aci dinó Pedro daide.

³⁷ Aféfuena cacáillano, iere comeci llícitagaiaioi. Afemona Pédro mo jícanotiaioi jáíie orécamací diga:

—Amatiai, ¿níie izóí ñéiticaí?

—daídíaioi.

³⁸ Ie jira Pedro uai ote:

—Omoi illafue Juzíñamui uícomo meídori. Omoi nágamierie Jesucristo mámecido báutizatari. Omoi íaífuíai oni dófilleza. Daíí Juzíñamui ie Ñuera Joreño ómoína úcaiteza.

³⁹ Afe bie uícodo llogáuai ómoie. Daje izóí o jítótiai ie. Daje izóí nana jícarie itino ie; ua aféuai nana cai Ocuírami Juzíñamui uáidogamací íena, —daide.

⁴⁰ Aféuailaido dáanomo jáíie uáillaido Pedro íaioi lluano daide:

—Bie duere finóbitimacimona omoi jíllori, —daide.

⁴¹ Mei daíí afémie úrilla uaina jeire otino diga báutizagaiaioi. Aféruído Jesumo ínotimacimo tres mil dígamíai dáaziena jáinacaidiaioi.

⁴² Nana bimaci orécamací llófuiafuemo jáícina jáidiaioi. Afe daíí conímamo ñue comécidiaioi. Afe llezica Juzíñamuimo úrifrediaioi, ie mei gairíllano Jesús jae íraicaíño güilla izóí finódiaioi.

Nano fueñe ñnotino illafue

43 Aféruillaído nana jáicaidiaioi; mei aillo cíoraininafuiái naa onótate raa diga orécamací finódiaioiza.

44 Jae nana ñnotino ñue dájena itíaioi, íemona íaioi ráaniai conímamo jeruñeno ífirediaioi.

45 Mei jii íaioi illábiri jáíe ráifide raa diga fecádiaioi. Fécanona afe úcube nágamiái imaci jitailla izói jofo conímamo fecáfirediaioi.

46 Nágaruillaído gairíracomo gairídiaioi. Iaioi jófuego pan fécano dáanomo cáimafuedo, comeci mánainafuedo güitíaioi.

47 Juzíñamui íóbitaoidiaioi. Afe llezica nana comini afémacimo ñue comécidiaioi. Afe daíí cai Ocuíraima nágaruído afe ñnotimacimo jáíe jíllloizaibitimaci dáamacina itátate.

3*Aidaima jíllotate*

1 Jáíruido jitoma ana ítemo Pedro Juan diga gairíracomo jáidiaillinoi. Afe Juzíñamuimo comécido úrioina llezica.

2 Nágaruillaído jocóinamona aidaima dinomo ífiredo. Ie comini gairíracomo íena úfirediaioi. Uillano afémiena nazemo ie ráinaifirediaioi, jofo jáioidinomona dúecaillano fecaca úcube jicállena. Afe naze mámece Ebíredize.

3 Aidaima Pedro Juan diga gairíracomo jofo jáillana cíoillano dúecaillano fecaca úcube íaillinoimona jicade.

4 Mei jira Pedro Juan diga íemo érocaidiaillinoi. Pedro íena daide:

—¡Caimo érocail!

5 Iemona afémie náicaide. Comeci anado daide: “Ñibai minícana cue iite.”

6 Iemo Pedro íena daide:

—Cue úcubenicue; óronidicue; mei íadi cuemo ítena o íiticue. Nazaret ímie Jesucristo mámeceido náidacai. Maca, —daide.

7 Iemo Pedro onoi nabézido íena naidánete. Afe daíí fínua llezica ie ídaí mairíbicaide, ie ídácoñuái diga.

8 Iemona aidaima caifo tícaide. Caifo náidaillano macade. Afémie íaillinoído ja jofo gairíracomo jaide. Tícatiacana jaide. Juzíñamuimo íóbitaoido.

9 Nana comini ie mácana cíodiaioi.

10 Aferi iere jacínaficaidiaioi naa abi fáigacaillafue diga, afémie daíí náidacaillari. Afémiena onódiaioiza. Afémie Ebíredize mámeceidizemo ráifiredimie, gairíracomo úcube jicáfiredimie.

Pedro comínimo Salomón jinófenemo macáranomo llófuete

11 Jíllotaga aidaima Pedro Juan diga íaillinoído níjinijicaide. Aféfuere fáigacaillano nana comini gairíraco dibénemo jáidiaioi.

Salomón jinófenemo macáranomo Pedro, Juan, aídaima diga illánomo afe comini aizícana jáidiaioi.

12 Pedro áfena cíoillano comínina daide:

—Israel nairai, cácarei. ¿Omoi minícari fáigacaidiomoi? ¿Nibái mei cócomo erózaibitíomoi? Bie iima dama coco rínodo jílloano macátaticoco, nibai daí comécido daidíomoi. Daje izói coco Juzíñamuimo ñue comécinafuedo afefue finódicoco, daí nibai cócona comécido daidíomoi. Iadi aféfuiaido finóñedicoco.

13 Mei íadi jáífodo joide. Cai jáiairagima Abraham, Isaac, Jacob diga, íaioi Moo Juzíñamui ie Jitó Jesumo baimo ñúefuena nitade. Afe Jesús ríimacimo omoi fecácamie. Pilato ie zuitáacana llezica áfena ráiruítomoi za.

14 Aféruído jáicina nífuenidimie zuitátajana jicáñediomoi, mei íadi jáífodo jicádiomoi. Come fatímie zuitátatiomoi.

15 Afe daí cáatatio fecádimie titádiomoi. Mei íadi Juzíñamui afémiena tíllanomona meine abido cáatate. Aféfuemo uai nabáiraímadicoco.

16 Bie dáamie Jesús mámecido, ie mámecimo ínuafuedo omoi ciona, omoi onoiga aídaima jae mairíbicaide. Afe Jesumo ínuafue íena ñue jáicina jílloate, omoi uiécomo cíocaidimie illa izói.

17 ‘Amatíai, onódicueza, mei omoi naa omoi illáiniri Jesuna fáiacana llezica omoi finócafueña onóñeno íena fatíomoi. Uáfueña omoi finócafueña onóñenano finódiomoi.

18 Mei íadi Juzíñamui ie uai lloráimado uícodo daína uai bie izói fuitade. Aféuai daide: “Ie Cristo duere zefuúllí fue jítáirede.”

19 Mei ie jira omoi mácafuiái méidori. Omoi illafue Juzíñamuimo ñue jáicina jóoneri. Omoi íaífuiái oni muiñólleza. Iemona cai Ocuíraíma Jesús caina cánuafuiái mánainaruillai izói caímo orérede.

20 Aféruímo nano uiécodo ómoiena mamécamie Jesucristo Juzíñamui óreite.

21 Mei íadi birui Jesucristo monamo fiébirede, Juzíñamui naga rafue jáicina nai jóoneiñeilleza. Afe daí jáiáidíruillaimo ite ñuera uai lloraini daidíaioi.

22 Mei daí Moisés cai jáiairagimana daide: “Cai Ocuíraíma Juzíñamui omoi ámatíaimona nahí uai lloráimana ómoímo óreite, Juzíñamui cue ória izói. Afémie ómoína nana daínáfuiái jeire omoi oíri.

23 Mei afe uai lloráima daínana jeire oñédino Israel náiraímona oni tánoquite. Uáfueña ífícaite.” Daí daide Moisés.

24 ‘Mei daí nana uai lloraini, Samuélmona batine ite lloraini diga bie íraíruillaído úrite.

25 Juzíñamui ie uai lloráinido uícodo daínáuailai ja birui ómoíri jino llotátaga. Juzíñamui cai jáiáiragímacimo íbana ñuera

raa finóllifue llote ñue omoi íllena. Afefue Abrahamo llote. Daide, “Nana énie nairai o emódomo comuídinodo ñue caimare íficaitiaioi,” daide.

²⁶ Mei Juziñamui ie Jitó caata meífodo nano fueñe ie Jitó ómoimo orede caimare omoi íllena, ómoimona nágamiiai ie íaifue fáicanocaillena, —daide.

4

Pedro Juan diga ríiredino uiécomo uiga

¹ Pedro Juan diga nai comínimo úrioidemo, lletáriraini gairíraco úiñotino illaíma diga bitíaioi. Daje llezica saduceo comini bitíaioi.

² Pedro Juan diga comini llófuetiaillinoi. Iaiaina daide: “Comini tíllanomona cáatafue Jesudo ácataga.” Daií llófuiari como bitímaci ríicaidiaioi.

³ Iemona íaillinoína llaitádiaioi. Lláitano íaillinoína llavéracomo jítiramoidiruiamo íbáidiaioi, ja nauízaila jira.

⁴ Mei íadi aillo afe úrillauai cacáдино íñotiaioi. Afena íñotimaci dani íñiaí facádua cinco mil áinomo dúcide.

⁵ Afe jáíruimo Jerusalemio judíuai illaini, éinamaci, naa ocuícáfue llófuerainiri gairírdiaioi.

⁶ Afe llezica afénomo lletáriraini illaíma Anás ite. Afe dáanomo ite Caifás, Juan, Alejandro naa lletáriraini illaini comíniri.

⁷ Iemo Pedro Juan diga atítatiaioi. Atiano íaioi cígimo naidáneta jicánotiaioi:

—¿Nie ríinodo bífuiái finódiomicoi? ¿Bu mámecido bífuiái finódiomicoi?

⁸ Mei jira Pedro, Ñuera Joreño úicaigamienaza daide:

—Nairai illaini, Israel éicomini, omoi cácarei.

⁹ Mei afe baie iráredimiemo como finoca ñúefuena jicánotiomoí. Mei ñie izói afémie jíllotaga daií daidíomoí.

¹⁰ Mei jira omoi uiécomo jino uáfodo llóiticoco, nana Israel nairai fidíillena. Afémie omoi uiécori Nazaret ímie Jesucristo mámecido, omoi coráicamie mámecido íocire ite. Afe coráicamie (Jesucristo) tíllanomona Juziñamui meine abido cáatate.

¹¹ Bie Jesús omoi jofo níraini oni dotaca jofocai izóidimie. Mei íadi afecai uálliraina jáizaide.

¹² Nie jáímiemo jíllonafue íñede. Jesucristo jáíe daiítade jíllotaraimana caimo íñede, afémiedo cai jíllóillena. Ua nana éniemo daiítade jíllotaraimana íñede, —jaca dinori Pedro daide.

¹³ Iemona ríimaci Pedro Juan diga méaicaiñeno úrillafue cacáillano, íaillinoi llófueñegaiaillinoi íllana fídia llezica, iere

fáigacaidiaioi, jamáimieillinoi illa jira. Iemona riímaci bíailinoi Jesudo macádino daií íaillinoimo úbicaidiaioi.

14 Afe emódomo jíllotaga aidaima dinomo íaillinoi abiri naidaide. Ie jira aféfuena jáanoicana daiínide.

15 Mei jira gairídinomona íaillinoina oni orédiaioi, dani jofo conímamo íaiói úriacana jira.

16 Daidíaioi:

—¿Bie iima íaillinoina nie izói ñéiticaí? Mei jii, nana Jerusalemo bitino bie cíorainina onótate raa íaillinoi fínuafuena onódiaioi; mei aféfuena jáanonidicaí.

17 Mei íadi mai íaillinoi cai jácidolle, afefue comínido jamánomo jalléiñellena. Afedo íaillinoina ráiruiticaí, Jesús mámecido ja benómona batine úriñellena, —daidíaioi.

18 Mei jira íaillinoina jíritiaioi. Iaillinoi dúcidemo ocuídiaioi:

—Jesús mámecido jii mai due jiza úriñeno iri. Afe daií llófueñeno iri, —daidíaioi.

19 Mei íadi Pedro Juan diga uai ote:

—Juzíñamui uícomo níifue baimo ñuena comeci omoi faca: omoína ñue cai cacárellena, nibai jíáifo Juzíñamuina ñue cai cacárellena.

20 Mei jii cai cíonafue cai cacánafue diga aféfuemo úrillana fáicanidicaí, —daide.

21 Mei jira riímaci íaillinoina jácidotiaioi. Ie mei íaillinoina zuitádiaioi. Iaillinoi duere finóllifue baiñédiaioi; nana comini afe finua jira Juzíñamuimo ióbioidiaioiza.

22 Afe cíoraininafuedo jíllotaga aidaima, afémiemo cuarenta fimona baimo ite.

Finotino méaicaiñenafue comeci ríino diga jicádiaioi

23 Pedro Juan diga íaillinoi zuitaina mei íaillinoi nabáiñiaí illánomo jáidiaillinoi. Dinomo afémacimo nana lletáriraini illaini éinamaci diga íaillinoina dánana llotíaillinoi.

24 Aféfuena cacáillano nana dáanomo Juzíñamuimo úritiaioi. Daidíaioi:

—Cai Ocuíraíma, O Juzíñamuina; mona, énie, monaillai naga ráaniaíri finódimiedio.

25 O Ñuera Joréñodo, o táijitagamie Davido daidio:

¿Níbái mei náiraíai caillíoidiaioi?

¿Níbái mei comini táinofuiaímo comeci facádiaioi?

26 Enie illaini Juzíñamuina ie Cristo diga anáfenuaíbitiaioi.

Daje izói jofue illaini Juzíñamuimo ofídiaioi ie Cristo diga áfedo afémiemo fuiríllena, —daide.

27 Uafue bie jófuemo Herodes, Ponico Pilato diga o nífuenide Jitomo fieni gairídiaioi. Afénono jicánemaci Israel comíniri

fieni gairírdiaioi, mei íadi omo jaináidimie Jitó illáimana ja jáitatio.

²⁸ Afe fieni íaioi gairíllafuedo nana o uícomo uaido finócafuiaimo dáinana finódiaioi. Afe daí íficaillena jitáiretadio.

²⁹ Cai Ocuíraima Juzíñamui, mai birui cai íaioi jáciduamo eroi. Jae o táijitagamacidicai. Afemona ñue méaicaiñenafue caimo fecari, o úrillauai jino jácicaiñeno cai llóllena.

³⁰ Afe llezica omo ite ríinodo comíni íaioi dúicomona ñue jíllotari. Afe izóí o níífuenide Jitó mámecido ciórainina onótate raa finori, —dinori daidíaioi.

³¹ Juzíñamuimo íaioi úrilla fúillamona afe íaioi gairíllano docáiricaide. Afe llezica nana Ñuera Joreño úcaigaiaioi. Iemona Juzíñamui úrillauai méaicaiñeno jino llotíaioi.

Ínotimaci íaioi ráaniaina jeruíñeno “Nana caie” daidíaioi

³² Afe aillo íraica ínotimaci dáaziena nana ñue jaináidiaioi. Ua daje izóí dájemo comeci facáoidiaioi; daje comeci jitailla uai íaioimo ite. Buna afémie ráaniaina “Dama cueie” daíñede, mei íadi nana comíni íaioi ráaniaina “Nana caie” daidíaioi.

³³ Orécamací Ocuíraima Jesús cáanafuemo aillo ríinodo uai nabáioidiaioi. Juzíñamui nana comínina iere caimátaitade.

³⁴ Íaioi cígiri jitáiredena ráanidimie íñede. Nana íbácana énieredino jofóredino diga áfeniai fécano afe oga úcube atídiaioi.

³⁵ Atiano orécamacímo izájidiaioi. Iemona orécamací nágamiერიemo íaioi jítaina dieze fecádiaioi.

³⁶ Afe izóí íaioi cígiri Leví izíe ímie finode. Afémie mámecí José. Monáillai zafedu Chípremo jocócamie. Orécamací íena jíáie mámecina jitádiaioi. Afe mámecí Bernabé daína Fíradimie.

³⁷ Afémie ie illánie fecade, fécano afe íba úcube orécamacímo izáíbite.

5

Ananías Safira diga finoca íaifue

¹ Mei jíáimie Ananías, ie ai Safira diga, daa illánie fecádiaillinoi.

² Bímie nano baa nieze úcubena jeruide. Jíáie dájeze úcubena nana ñue ite ízoi orécamacímo izájide. Aféfuena ie ai nana ñue onode.

³ Jira Pedro íena daide:

—Ananías, ¿níbái mei Taife o comécina féitate, Ñuera Joreño o taino o llóllena? ¿Níbái mei o illánie nano nieze feca íba úcubena abímo maiñódio, daí jífueridíio?

⁴ ¿Nano fueñe afe énie óieñede? Jíí, óie. ¿Afe o fécaja mei afe úcube óieñede? Jíí, óie. ¿Níbái mei daí afe finóllena comeci

facáδιο? Comínimo taino lloñedio, mei íadi Juzíñamui taino llotio, —daide.

⁵ Ie jira áfena cacáillano, Ananías éniemo baiíllano tíbicaide. Nana afefue fídiaibitino iere jacínaitiaioi.

⁶ Mei jira nano ba niga jitócomini bite. Ie abi jabínota ie raiájidiaioi.

⁷ Afe mei tres horas íllamona Ananías ai jofu bite. Nai ie ini tíllana fidiñede.

⁸ Jira Pedro jicánote:

—Cuemo llone, ¿afe ómicoi daina dieze afe énie fecádiomico?

Jira afengo daide:

—Jii, áfeze.

⁹ Jira Pedro daide:

—¿Nibái mei dáafueritiomico, Juzíñamui Ñuera Joreño o ico facátallena? Jino batí o ini raiájidino bitiaioi. Jabe daje izói ona úitiaioi.

¹⁰ Afe llezica afengo Pedro anamo baiíllano tíbicaide. Jitócomini jofu billano afengo tíllana cíozabitiaioi. Mei jira jino uillano ie ini abimo íena raiájidiaioi.

¹¹ Nana Juzíñamui ínotino nana aféfuiaina fidídimaciri iere jacínaitiaioi.

Aillo cíorainina raaniai onótate raa diga

¹² Aféruillaído comini cigiri orécamací aillo onótate raa, cíorainina ráaniai diga finódiaioi. Nana Salomón jinófenemo macáranomo gairídiaioi.

¹³ Buna jiáimacimona íaioi diga daane gairíllana jacíruitiaioi; mei íadi comini íaioimo ñue izire comécíidiaioi.

¹⁴ Aillo comini íñiaí ringóniaí dájeze Ocuíraima Jesucrístomo ínuaibitiaioi.

¹⁵ Uafue jamánomo ínotiaioi. Mei jira iráredino jofu abi íuemo, naa íaioi bíralluairi jino biródiaioi. Aféno Pedro áfedo jaille llezica afémacimona nano dámerie, Pedro jana anamo itábicaítiaioi. Afedo jíllozítiaioi.

¹⁶ Afe llezica aillo áinomo ite jofue comini Jerusalemo bitiaioi. Iaioi iráredinuaí atídiaioi fiénide jóriaído áifedogamací diga. Nana jíllotagaíaoi.

Ríimaci illaini Pedro Juan diga duere finóllena llaitátatiaioi

¹⁷ Iemona lletáriraini illaíma, afémieoíri ite saduceo imaci iere úradoizaidiaioi.

¹⁸ Ie jira orécamacina llaitada afe jófuemo ite llavéracomo íbáizaidiaioi.

¹⁹ Mei íadi Juzíñamui abi ímie naio llavéraco naze tuizáibite. Jino íaioi uánona daide:

20 —Gairíracomo omoi jai. Dinomo naidáillano comínimo nana bie comeci cáataite uáillaído úrizairi, —daide.

21 Aféfuena cacáillano, afe jáírui monáidacademo jofogairíracomo jáidiaioi. Jáillano llófuiaide.

Afe llezica lletáriraini illaíma afémiemo itínori, Nahíllaini gairíranomo gairírdiaioi. Afe Nahíllaini Israel nairai éicomini. Gairíllano llaveca orécamaci atítatiaioi.

22 Mei íadi llavériraini llavéracomo dúciillano orécamacina baiñediaioi. Daa fia afefue abido lluaíbitiaioi. Daidíaioi:

23 —Llavéraco ñue riire ibaide naa naze jinófene úiñotinori eróediaioi baizájidicaí. Mei íadi cai zuitádicaimo afeco eromo buna iñena, —daidiaioi.

24 Aféfuena cacáillano lletáriraini illaíma, gairíraco úiñoraini illaíma, íemo nanoide lletárirainiri ifo júdaizite; jicánotiaioi:

—¿Bífuiai ninomo jica jálleite?

25 Afe llezica daa íima daízaibite; íaioina daide:

—Llavéracomo omoi íbaicogamíai jae gairíracomo comini llófuetiaioi, —daide.

26 Iemona úiñoraini illaíma naa llavérirainiri íaillinoi uájidiaioi. Mei íadi duere finóñeno íaillinoina atídiaioi, “Comínina nófiena cai níjite” dainano jacírutiaioi.

27 Iaillinoi átianona, Nahíllaini uícomo íaillinoina naidánetaioi. Iemo lletáriraini illaíma íaillinona daide:

28 —Afe mámecido ómicoi llófueñellena jamánomo riire rairuídicaí. ¿Ja minica finódiomicoi? Nana Jerusalén comínimo ómicoi llófuiafuiai jica jalleide. Afe llezica afe íima tílla ícoinia caimo nitáacadiomicoi, —daide.

29 Mei jira Pedro jíáie orécamaci diga uai ote:

—Juzíñamui uai jeire cai olle comini llogáuai baimo ñuera.

30 Cai jáiairagima Juzíñamui Jesuna tíllamona cáatate. Bie Jesús coráirabícimo agüíneta omoi fagámie.

31 Juzíñamui caifo monamo uano nabézimo íena rainade. Afe llezica afénomo lláimana jónete. Dáanomo Jíllotaraimana jónete. Daí Juzíñamui Israel náiraimo íaioi illafue méidollirui jónete, íaioi íaífuiai dóllena.

32 Aféfuemo uai nabáiraimadicaí. Daje izói Ñuera Joreño aféfuemo uai nabaide. Nana ñue cacáredimacimo afe Ñuera Joreño Juzíñamui iga, —daide.

33 Aféfuena cacana llezica, ríicadiaioi. Iaillinoina fáiacadiaioi.

34 Mei íadi ríimaci cígiri fariseo ímie ite. Afémie mámecí Gamaliel. Afémie ocuícáfue llófueraima. Nana comini íemo ñue comécidiaioi. Afémie náidaillano ocuide:

—Nano dáallegoi bimaci oni jáínomo ui, —daide.

35 Afe ifodo ríimacina daide:

—Israel comini, cacai. Baimácimo omoi finóllifue abí omoi rairuiri.

³⁶ Jiáifuemo omoi úbicairi. Naui nígarui íllamona Teudas dúcizaibite. Dúciillano daide: “Jamánomoidimiedicue. Illáimaiticue,” daide. Iemona cuatrocientos dígamie afémiedo jáidiaioi. Mei íadi íena fatíaioi. Nana afémiedo jáidino ráidozinaidiaioi. Iemona afefue niné táinocaide.

³⁷ Afe mei comini mámecei cuiájillaruimo, Galilea ímie Judas dúcizaibite. Aillo comini íedo jáidiaioi. Daje izóí íena fatíaioi. Afe izóí nana íedo jáidino ráidozinaidiaioi.

³⁸ Ie jira bimácina omoi fáicanocai; afémacina áifedoñeno. Mei bifue íññiai íeza, fuizájite.

³⁹ Mei íadi Juzíñamui ífue, táinocaitanidiomoi. Abi omoi rairuiri, Juzíñamui diga omoi fuirízaiñelleza, —daide.

⁴⁰ Nana jae jiéruificaidiaioi. Mei jira orécamací jírítiaioi. Iaiói dúcinamona íaioina zechénotiaioi. Afe meífodo Jesús mámeceido úrillana íaioina rairuídiaioi. Afe mei íaioina fáicanocaidiaioi.

⁴¹ Orécamací ríimací uícomona jino jáidiaioi. Ióbioicaidiaioi, mei Juzíñamui íaioimo ñue comeci facáoillaza. Jesudo jaináinamona méaifuedo duere zefuídiaioi.

⁴² Ie mei nágaruido Jesudo úritiaioi. Afe izóí llófueoidiaioi. Gairíracomo, comini jófuedo daje izóí llófuiaidiaioi.

6

Juzíñamui uai llotino canórainina siete dígamie mámecega

¹ Aféruillaído ínotino aillo jebuíoideaioi. Griego imaci judío imácina zúucaillafuedo jitádiaioi:

—Nágarui güille fécanomo cai fecínguai figo íñégaiái, —daidiaioi.

² Mei íemo doce diga orécamací nana ínotinori dáanomo iráidiaioi. Iaioina daide:

—Juzíñamui úrilla uai jino llófueredicaí. Afena cai fáicanocaillena dani omoi güille cai fecállena figóñede.

³ Mei jira, ámatiai, omoi cígimona siete dígamie nize. Nana comínimona ñue comécidimie izóidena jitaide. Ñue onódimiena jitaide. Ñuera Joreño úicaigamiena daje izóí jitaide. Ie mei daítadimñiai güille fecárainina mai jóneri.

⁴ Mei cai dani Juzíñamuimo comeci facáoiticaí. Afe llezica Juzíñamui úrilla uaido llófueiticaí.

⁵ Nana aféfuemo ñue comécidiaioi. Iemona Ñuera Joreño úicaigamie Esteban nizédiaioi. Afémie Juzíñamui uaina iere ínofiredimie. Daje llezica jiáimñiai nizédiaioi: Felipe, Prócoro,

Nicanor, Timón, Parmenas, Antioquía ímie Nicolás, nauí nano afémie judíuai íaioi íinoga uaimo dáafueriacadimie.

⁶ Ie mei orécamací illánomo afémacina atídíai. Atia mei orécamací íaioimo onoi bíitano Juzíñamui úritíai. Afe llezica güille fecárainina mamécaíai.

⁷ Iemo Ocuíraima Jesucristo úrilla uai comínido oni móonaioicaide. Jerusalemo ínotino aillo jebuídíai. Afe llezica aillo judíuai lletáraini aféfuemo ínotíai.

Esteban llaítadíai

⁸ Esteban Juzíñamui izói ríinoredimie Juzíñamui ézicigamie. Ie jira comíni cígimo aillo cíorainina raa onótate raa diga finode.

⁹ Ie jira Rairuíñegamací llófueriraco ímíaimona dáarie Estébamo como fueñe ie finócafue júfiduaidíai. Afe llezica Cirénemona dáamierie, daje izói Alejandríamona, daje izói Asia éniemo ite Cilcíamona: nana afémaci Estébamo afefue júfiduaidíai.

¹⁰ Mei íadi íena anáfenonidíai. Ñuera Joreño íemo iga úrillana fibíllafuedo úriteza.

¹¹ Ie jira taino lloraini íbajidíai. Afémacina llotíai:

—Mai omoi daíri: “Esteban Moisená Juzíñamui diga fiéniduaina dáinana cacádíai,” —daí daítatíai.

¹² Aféfuemo comínina éinamací diga fáillifaíllíneítadíai, daje izói ocuícafue llófueraini. Iemona cirínuano íena llaítadíai. Lláitano Caifóidíllaini uíe como íena uítíai.

¹³ Afe izói taino uaíllai nabáiraini jenódíai. Afémaci daide:

—Bímie caí ñue rairuírede gairíracomo báíñuano fáicanocaitañede. Jaca báíñofirede, daje izói ocuícafue.

¹⁴ Afémie dáinana cacádíai. Afe dáina daide: “Baie Nazaret ímie Jesús afe gairíracó júdaitaite. Moisés caimo iga finóllífuíai meídotaite,” —daí daídíai.

¹⁵ Iemona ríimaci naa díno ráiedinori, Estébamo eróillano, ie uíeco Juzíñamui abí ímie uíecona eróidena cíodíai.

7

Esteban abí ie ríiduafue llote

¹ Mei jira lletáraini illaíma Estébamo jícanote:

—¿Meita nana bífuíai uáfuíai?

² Jira afémie uai ote:

—Ñue coméide amátíai, móotíai diga, cue úrillamo cácarei. Caí ebíredinoredimie Juzíñamui caí jaiái nanóidimie Abrahamo cíocaide. Ua Abraham Mesopotamia éniemo illa llezica, afémie nai Haramo jaiániñena llezica,

³ Juziñamui íena daide: “O illánie fiénocai naa o comíniri. Afemona omo cue llole éniemo o jairi.”

⁴ Mei jira Abraham Caldea éniemona oni jaide; jáillano, Harán jófuego nano nie dino ite. Dinomo ie moo tilla. Iemona Juziñamui Abraham afe bie omoi illíniemo atide. Ja birui aféniemo itíomoi.

⁵ Mei íadi niie feci raana nai afémie Juziñamui íena iñede. Afe izói due jiza ie macálliniena íemo fecáñede. Mei íadi Juziñamui uícomo uáfueña daide: “Bie énie óieite. O tilla meífomo o jitótiai íeite.” Mei íadi aféruillaído Abraham nai jitónide.

⁶ Nane dáanomo Juziñamui íena daide: “O uícoidigima jáimaci éniemo onínemaci izói íitiaioi. Dinomo afémaci rairuícamacaci izói íitiaioi. Dinomo cuatrocientos fimona duere finólliaioi,” daide.

⁷ Mei íadi nane dáanomo Juziñamui daide: “Omoi rairuícamacina finódizie íaioi fiénidifuiái cue jicánolle mei, afémacina duere zefuítaiticue. Ie meífomo o comini afénomona oni jáitiaioi. Oni jaillano, bíniemo cuemo ñue caimare táijizaíbitiaioi,” daide.

⁸ Juziñamui Abrahamo daínauai ibana finóllifue llote. Afe llezica ie jitótiai bacano icoi quetállena ocuillado afe finóllifue uáfueña onótate. Ie jira ie jitó Isaac jócua mei ocho dígarui íllamona, Abraham ie jitó bacano icoi quetade. Daje izói Isaac ie jitó Jacobona finode. Afe izói Jacob nana ie jitótiaina finode. Afe jitótiai Israel doce diga nairai moona jáidiaioi.

⁹ ‘Bie Jacob jitótiai cai nánoragimaciai. Afémaci ie ama Josemo úradoidiaioi. Afemona afémiena fecádiaioi, Egipto éniemo úillena. Mei íadi Juziñamui Joseri ite ie canóllena.

¹⁰ Nana ie zefuínaillamona zuitade. Ñue úrillana fibíllafue íemo ite. Faraón uícomo ñue coméciidimiena Juziñamui Joseña itátate. Afe Faraón Egipto nahíllaima. Afe Faraón Joseña Egipto jabóllaimana mamede. Afe llezica daje izói dama Faraón jofo illáimana mameca.

¹¹ ‘Iemona júbietaillafue nana Egipto éniemo baite aillo zefuínaillafue diga. Daje izói Canaán éniemo ite. Ie jira cai móotiai güíllenidiaioi.

¹² Mei íadi Jacob Egíptomo trigo íllana fídiano afénomona ie jitótiai orede. Afémaci cai jáiairagíma. Bifue íaioi fueñe güille uájillafue.

¹³ Ie mei dáanomo nane jáidiaioimo, José ie ámatiai ie abina onótate. Afe llezica José ie ámatiai Faraómo cíotate afémie íaioina onóillena.

¹⁴ Iemona José ie moo Jacob naa ie comíniri atítate. Afémaci setenta y cinco dígamiede.

15 Afe daií íaioimo íficaide Jacob Egíptomo jaiánillena. Dinomo afémie tíide; daje izói afénomo cai jáiairagimamona dárie tíide.

16 Afe meífodo íaioi ícuruai Siquém illánomo uitá raiájidiaioi. Afe dinomo Hamor jitótiaimona Abraham ie comini ícuruai railínuai ibade. Jira afénomo raiájidiaioi.

17 ‘Jaiái ninomo Juzíñamui Abrahamo uire ñue íaioi íllena rírede uaido uáfueña llote. Afe uícodo daináuai fuizáillirui ánoziacademo, Israel nairai Egíptomo ñue jebuídiaioi; ua iere áillue náiraina jáidiaioi.

18 Afe llezica Egíptomo jáie Faraón illáimaizaide. Afémie Josena onóñede.

19 Aféllaíma cai náiraina jífuede; cai jáiairagimacina duere finode. Cai como jococa úruiaína zóofetade íaioi tíllena.

20 Aféruillaído Moisés jococa. Afémie ie dúeza illáruimona Juzíñamuina ióbitade. Afe izói ie moona ie ei diga ióbitade. Afe íaillinoi daámani fui jofomo íena móonaitadiaillinoi.

21 Mei íena zóofetarui dúcinamona Egipto illaíma nahí jiza íena abímo ote. Afengo jitó izói afézana comúitate.

22 Ie jira afe Moisés Egipto comini nana onóigafueña llófuegamie. Iemona ie daináuailai rírede. Afe izói afémie finócafuiái jamánomoide.

23 Ja afe mei cuarenta fimona illa llezica, Moisés ie nairai israelita comini méiñuaiacade.

24 Afénomo Egipto ímie Israel náiraimona dámie duere finóinana Moisés cíozaide. Ie jira Moisés ie nairai ímie ríiduaíbillano Egipto ímie fate afe iba óllena.

25 Moisés comécido daide: “Cue ámatiai israelita comini Egíptomona fáicanocaillifue onódiaioi. Ua Juzíñamui íaioi cuedo fáicanocaitafueña fidídiaioi,” daide. Mei íadi áfena fidíñediaioi.

26 Afe jítiramoidiruido Moisés Israel ímiiailinoi fúirienailana cíode. Íaillinoi fúiríllafueña llíicaitaacanano íaillinoína daide: “Omícoi daje ámadíomícoi. ¿Nibái conímana duere finódiomícoi?” daide.

27 Ie jira nabai duere finódímie Moisés oni ñuitade. Oni ñuita mei íaillinoimona dámie Moisená daide: “¿Bu o cai cígímo illáimana jóonegao? ¿Bu cai fiénidifue jicánoraimana jóonegao?”

28 ¿Nauiri Egipto ímie o faaja izói birui cuena fáiacadió?” daide.

29 Daií dainana cacáillano, Moisés botade. Bótano Madián éniemo jaide. Dinomo jicánemie izói ite. Afénomo mena jitórede.

30 ‘Cuarenta fimona méifomo, Moisés amena figo íñénazicímo mácajide. Sinaí idu áinomo ite. Afénomo Juzíñamui

abi ímie boode iázaifedínamo cíocaide. Afe irai bóoidínomo cíocaide.

³¹ Afena cíonamona Moisés jabo fáigacaide. Afena ñue cíoillena áfemo jofo ánozide. Ainozillano Ocuíraima Juzíñamui úrillana cacade. Afe uai daide:

³² “O nánoidímaci Juzíñamuidicue. Ua Abraham, Isaac, Jacob dieze Juzíñamuidicue,” daide. Jira Moisés jágieri cuidíricaide. Iemona dáanomo áfemo eróillana jacíruite.

³³ Iemona Ocuíraima Juzíñamui íena daide: “O eiba ico duiño, benó o naidáillano cue illaza jamánomo ñúenoza.

³⁴ Cue comini Egíptomu duere zefuíllana cíódicue. Iaiói eehe cáilliana cacádícue. Jira ana íaióina zúitabitícue. Jira cue dáiñana cacai. Egíptomu ona óreitícueza,” daide.

³⁵ ‘Ja nano fueñe nana comini Moisesa jámairuitiaíói. Iena jaiái daízáidiaíói: “¿Bu illáimana mamécao, caimo jicánoraimana o illena?” Mei íadi bóodínamo cíode Juzíñamui abi ímiedo Juzíñamui Moisesa zúitaitimíena orede, íaiói illáimana.

³⁶ Jira Moisés cai jáiairagimaci Egíptomu jino bairódimie. Afémie bie éniemo cíórainina raa onótate raa díga finódimie. Afe izói Jiáirede Monáillaimo cíórainina dáiñamona comuide raa finode. Afe izói cuarenta fimona illamona zaféredizicimo íaiói illa llezica cíórainina raa finófirede.

³⁷ Afe dáamie Moisés Israel comínina daidímie: “Juzíñamui daní omoi ámatiaimona uai llórainana ómoimo óreite, cue ie ória izói. Afémiemo jeire omoi oíri.”

³⁸ Afe Moisés zaféredizicimo comíniri itímie. Afe Moisés Sinaí ídumo itímie. Dínomo Juzíñamui abi ímie íemo úrizaibite. Afemona Moisés cai jáiairagimamo aféuai jino llotímie. Afe Moisés cáatatuauillai llínnote, afe uáillaina caimo fiénocaillena.

³⁹ ‘Mei cai jáiairagimaci íemo cacáreacañediaíói. Iena ruifíruillano, meine Egíptomu jáiacadiaíói.

⁴⁰ Jira Aarona daidiaíói: “Cai uícodo ífoite juzíñamuillaina caimo finóllena jitáidicai. Baie Moisés Egípto éniemona cai otímie, íemo itífuena onóñedicai,” daidiaíói.

⁴¹ Ie jira juráreto jiza jana finódiaíói; jiáie rílleniai fatíaíói afe jízato jánaraina finócamo fia fecállena íena íóbitallena. Mei íaiói ónoído finoca raamo caimátaíoidiaíói.

⁴² Ie jira Juzíñamui íaióimona oni jaide. Afemona Juzíñamui íaióina fiénocaide mona úcuaimo íaiói comeci facáoillena. Mei daí uai llóraini rabénicomo cuezáuai daide:

¡Israel comini, omoi cacai!

¿Cuarenta díga fimona illamona zaféredizicimo rílleniai fatíomoi cuemo fia fecállena?

⁴³ Ieñede. Jiáifodo finódiomoi.

Taino juziñamui Moloc ráicaillacoji abimo máiñuano úioicaidiomoï.

Afe llezica jáie taino juziñamui Renfán ucúduna eroide jánaraimo jeire otíomoï.

Afe jánarai dani omoi finoca íóbitalle jánarai.

Ie jira omoi éniemona omoi otá Babilonia batífenemo ómoína óreitícue, daide.

⁴⁴ ‘Cai jáiairagimamo Juziñamui gairíraco ite. Afénomo nofícomo cuega ocuica uaillai éenotíaiioi. Afe gairíraco Juziñamui Moise mo oçuilla izóí niga. Nano fueñe Juziñamui éna daide: “O ciónaco omo cue ácata izóí o nitátari,” daide.

⁴⁵ Cai jáiairagimaci afe gairíraco feci raa izóí llínotíaiioi. Ie mei Josué diga bitino jáie nairai énie báirua llezica afeco atídíaiioi. Afe éniemo itínuiái Juziñamui oni jiude, íaiioi meífomo ie comini illino finóllena. Afeco daí dinomo ite David illáruillaído.

⁴⁶ Illáima David Juziñamuina íóbitade. Iemona Juziñamui afe Davidna canófirede. Aféruillaído ie jáiairagima Jacob ínoga Juziñamui illico nitátaiacade.

⁴⁷ Mei íadi ie jitó Salomón Juziñamui jofo ua nitátatímie.

⁴⁸ Mei íadi jamánomo caifoide Juziñamui, comini ónoído niga gairíracuaimo ífinide. Afe izóí uai lloraima daide:

⁴⁹ Caifo bie mona ua cue illáimana ráirano izoide.

Ie mei bie énie cue idai bitáoinanie izoide.

¿Ñie izóidico cúeiena nitátaitio?

¿Nee cue ocózinairano?

⁵⁰ ¿Ua meita nana bie ráaniaína cue ónoído finódícue? Jii finódícue, —daí Ocuíraima Juziñamui daide.

⁵¹ Nai Esteban afémacimo úrioicaide. Daide:

—Mei íadi omoi comeci jaca Juziñamuina rairuífirede. Juziñamuina onóñedimaci izóí jefónidiomoï. Juziñamuimo coméñedimacidiomoï. Ñuera Joreño llétáfue jaca jeire onédiomoï. Omoi jáiairagima izóidimacidiomoï.

⁵² ¿Ua meita omoi jáiairagima ñii uai llórainina duere finódíaiioi? Nana íaioina duere finódíaiioi. Nii fígomie bíllana uícodo llotínona titádíaiioi. Afe fígomie jae dúcide. Iena fécano fatíomoï.

⁵³ Omoi Juziñamui abi ímiaído llogámacidiomoï, mei íadi ñue cacáreñediomoï, —daí dinori Esteban daide.

Esteban tíllafue

⁵⁴ Aféfuiaína cacáillamona, ríicaidiaioi. Estébamo fuedo gugúricaidiaioi.

⁵⁵ Mei íadi Esteban Ñuera Joreño úicaigamie. Afe llezica monamo érocaide. Dinomo Juziñamui ebírenafuena ciode. Afe llezica Jesús Juziñamui nabézimo naidáinana ciode.

⁵⁶ Ie jira daide:

—¡Ero! Mona túinana ciódicue. Nanoide hima Jitó Jesús Juziñamui nabézimo naidaide, —daide.

⁵⁷ Mei íadi afémaci jefo íbáidiaioi. Ríirerie caillíoicana illíñana íemo caízaidiaioi.

⁵⁸ Jófueмона oni uitá nófiena ie níjidiaioi. Níjídino íaioi emódodiroillai jitócome Sáulona maméidimiena úiñotadiaioi.

⁵⁹ Nai ie íaioi níjia llezica, Esteban Juziñamuimo úrillano daide:

—Ocuíraima Jesús, cue joreño oni llño, —daide.

⁶⁰ Ie mei ana dújullano, riire caillide. Daide:

—¡Ocuíraima! Bie fiénidífue ícoinia bimácimo jitáñeno iri, —daide.

Daí daína meífodo tíbicaide.

8

Saulo Jesudo gairírani racade

¹ Fatímaci izói Saulo afémacimo comécioide.

Aféruimona Jerusalemite Jesudo gairírani duere finóllena como fueñe judíuai júnuaidiaioi. Ie jira nana ínotimaci Judea énie fuédado ráidoizitiaioi; daje izói Samaria éniedo. Dani doce dígamie orécamací Jerusalemite fiébitaioi.

² Iemona Juziñamui raana duéruitimaci Esteban raíájidiaioi. Ieri aillo éediaioi.

³ Afe llezica, Saulo gairíramacina nai racáoide. Nágacuaído jenode. Afécuaimona íñiaí ringóniaí diga jino zónuano íaioina llavétate.

Jesucristo ñuera uai Samáriamo lluájidiaioi

⁴ Ja birui Jerusalémone oni jáiredino, Cristo jíllonafue íaioi jáillanuaimo lluájidiaioi.

⁵ Afémacimona dámie Felipe Samaria jófueмо jaide. Dinomo Cristo ráfuedo íaioimo úrizaide.

⁶ Afe comini gairíllano Felipe dáinamo ñue cacáreidiaioi. Felipe finoca cíorainina onótate ráaniaí ciódiaioi.

⁷ Mei jira aillo fiénide jóriaímona jíllotagaiaioi. Afémacimona fiénide jóriaí caillícana oni jaide. Afe llezica aillo tízitaitimíai aídáimaíai diga jíllotagaiaioi.

⁸ Aferi afe jofue comini iere caimátaioidiaioi.

⁹ Mei íadi dámie Simona mámeciredimie afénoño ite. Afémie úcoidiruillaído aimana jaide. Afe jofue comini jífue. “Jamánomoidimiedicue” daífiredimie.

¹⁰ Nana comini jabóidinomona ua nahíllaimamo dieze íemo iere cacáreidiaioi. Daidíaioi:

—Bímie caifoide Juziñamui ríinona igámie, —daidiaioi.

¹¹ Iere are ie aimánafuedo afémacina jífuate; ie jira íemo jeire otíaioi.

¹² Mei íadi Felipe Juzíñamui illáimana illirui uai Jesucristo mámece diga, íaioimo llote. Aféuailaina cacáillano áfemo ñue ínotiaioi. Íññiai ringóniari dájerize ínotiaioi. Ínuano báutizagaiaioi.

¹³ Afe dama Simón ínuano báutizaga. Iemona afémie Felipe nabaina jaide. Afémie Felipe finoca áillue ciórainina raa onótate raa diga, áferi fáigacaide.

¹⁴ Jae Samaria comini Juzíñamui úrillauai jeire otíaioi. Afe íaioi jeire uáfueña Jerusalemo ite orécamaci fidídiaioi. Fídiano afénomo Pedro Juan diga orédiaioi.

¹⁵ Dúciillano Samáriamo ite ínotinori Juzíñamuimo jicádiaioi, Ñuera Joreño íaioi llínollena.

¹⁶ Mei afémacimona ñímiemo Ñuera Joreño nai biñede. Dama Ocuíraima Jesús mámece bántizaga.

¹⁷ Afemona Pedro Juan diga íaioimo onoi bitade. Iemona daíí Ñuera Joreño úicaigaiaioi.

¹⁸ Orécamaci bimácimo onoi bitamona Ñuera Joreño bíllana Simón ciode. Ciónamona úcube orécamie íaillinoimo íoicana ¹⁹ daide:

—Jadí ríino cuemo ine. Afe izói nie cómemo cue onoi cue jóneadi Ñuera Joreño íemo bílleza, —daide.

²⁰ Jira Pedro íena daide:

—¡Naa o úcube diga o táinocairi! Juzíñamui fecaca raa úcubedo íbárede daidio; daíí comeci facáidio.

²¹ Bífueмо o dúíñedio. Bie coco táijinafueмо jaináíñedio, o comeci jaícina Juzíñamuimo jóoiñena jira.

²² Bie o fiénidifue o fáicanocai. Juzíñamuimo izire o jicari o fiени comécido daíñafue iba omo óñeilleza.

²³ Ja onódicueza o comeci fílliru izói eríredeza. Afe íaífuiaido cuinácamie izói itíoza.

²⁴ Jira Simón uai ote:

—Ocuíraimamo cuedo jicari, nana o cuena daíñafuiaimona dafue cuemo níjiñeillena, —daide.

²⁵ Afénomo Crístoño ñúefue nitádiaioi. Daje izói Juzíñamui uáillaído úritiaioi. Ie meífodo, orécamie íaillinoi Juzíñamui jíllollíuái aillo Samaria duera jófuiaimo llófuiaidaillinoi. Ie mei Jerusalemo meine bitáillinoi.

Felipe Etiopía ímiemo úrite

²⁶ Afefue meífodo Juzíñamui abi ímie Felípena daíízaíbite:

—Náidacaillano, fuiri batí Jerusalemona Gaza jófueмо jódiido o jairi, —daide.

Afeo zaféredizicido jóidio.

27 Iemona Felipe náidacaillano áfeodo jaide. Dinomo uiécodo jaide Etiopía ímie éidajide. Afémie illaingo abi ríimie. Afémie Etiopía illaingo Candace úcube úñoraima. Afe llezica afémie óinima. Naui uécodo afémie Jerusalemo Juzíñamuimo cáimaduaide.

28 Afémie abido ie éniemo jáizaide. Ie caballo zonóicaiga ráiralloicimo ráiicana Juzíñamui uai lloraima Isaías cuegáuai facádote.

29 Afe llezica Ñuera Joreño Felípena daide:

—Jadílloicimo áinozillano afénomo nabairi, —daide.

30 Ainozillano, Felipe afémie Isaías cuegáuailai facáduana cacade. Iemona íemo jicánote:

—¿O facádoga uaina meita onódio? —daide.

31 Jira afémie uai ote:

—Cuemo jino llóitimie iñédeza, ¿niie izói ónoiticue? —daide.

Iemona Felípemo caifo ie diga dáanomo ráillena jicade.

32 Juzíñamui Cuegáuaimona afémie facádoga uai áfena daide:

Oveja izói tíizaillinomo uiga.

Oveja jiza abi cuidódino uiécomo úriñedimie izói táide,

afe izói afémie jaca níifuedo úriñede.

33 Afémie iere jámairuigamie; jáicinaidifuena íemo rairuídiaoí.

¿Ie ñue illáfuedo mei bu úrille?

Mei ie cáajano bie éniemona niné táinocaide, —daide.

34 Jira illaingo abi ríimie Felípemo jicánote:

—Cuemo llone, ¿bumo úrite uai lloraima? ¿Ñibai dama íemo úrite? ¿Ñibai jáimieemo úrite? —daide.

35 Jira Felipe afémie facádoga Cuegáuaimona Jesús úrillauai íemo jino llote.

36 Jainoi illánodo jailla llezica ríimie daide:

—Benomo ite jainoi. ¿Birui áfejido cue báutizanidicue? —daide.

37 Jira Felipe daide:

—Nana o comécido o ínoiadi báutizarellio, —daide.

Jira afémie uai ote:

—Jesucristo Juzíñamui Jitoza áfemo ínoticue, —daide.

38 Iemona jáiralloici mozíñota ille diné jáidiaillinoi. Dinomo Felipe ie báutizade.

39 Illémona ari abido jáidiaillinoimo, Juzíñamui Ñuera Joreño Felípena oni uite. Iemona ríimie íena jaca nane cíóñede. Mei dama ie éniemo caimare jaide.

40 Felipe nane Azoto jófuego cíocaizaide. Dinómona naga jófuedo jíllonauai llócade. Ua ba Cesarea jófuego fuizájide.

9

*Saulo comeci jíáifodo méiduafue
(Hch 22.6-16; 26.12-18)*

¹ Afe llezica Saulo Jesumo íñotinona fáiacanafuedo úrioido. Ie jira lletáriraini illáimamo jícánuaide.

² Daide:

—Llavétallibiaina cue ine, Damasco jofue gairíracomo cue jáilleza, Jesús uaimo íñotino cue jénuailleza. Afemona íñiaia naa ringóniairi maitá Jerusalemo cue atilleza, —daide.

³ Mei nai iodo jailla llezica, Damasco jófuego áinozidemo, monámona bite úzefo nágafene ie abimo úzere egáñoaide.

⁴ Iemona Saulo éniemo baíide; baíilla llezica Jesús íena daínana cacade:

—Saulo, Saulo, ¿nibái mei cue racáidío? —daide.

⁵ Mei jira Saulo uai otá jícánote:

—Ocuíraima, mei o ¿búidío? —daide.

Jira aféuai ote:

—Cue Jesúsicue. Dama o racácamiedicue. Aillue juráreto zaitáacademo jáiredizimo jüide. Afe izóí ízitagamedío.

⁶ Mei íemona Saulo jágieri cuidide; daide:

—Ocuíraima, ¿ona nie izóí finóredicue? —daide.

Jira Ocuíraima uai ote:

—Náidacaillano baie jófuego mai jofu jai. Dinomo o finóllifuenta omo llóitiaoiza, —daide.

⁷ Sáulodo jaide comini aféuaina cacádiaioi íadi mei buna ciónediaioi. Aferi iere jacínaitiaioi.

⁸ Ie meífodo Saulo éniemona caifo ráinacaillano, érocaide. Mei ui botáicaide íadi éroinide. Mei jira daíí ónoído jainátacana Damasco jófuego íena uitíaioi.

⁹ Dinomo daruíamani uina cióñede. Afénomo minícana güiñede, jiróñede.

¹⁰ Afe Damasco jófuego íñotimie Ananías illa, níimiemo Ocuíraima nicáirilla izóidedo cíocaide. Iena daide:

—¡Ananías! —daide.

Afémie uai ote:

—Ocuíraima, benó iticue, —daide.

¹¹ Jira Ocuíraima íena daide:

—Náidacaillano, Deréchana mámeciredo iodo jairi. Dinomo Judas jofomo jícanori: “¿Ninomo ite Sáulona mámeciredimie, Tarso jofue ímie?” O dúcina llezica afémie Juzíñamuimo úrite

¹² Ie úrioina llezica nicáirilla izóidedo ie uimo onoi bítaibitimie, Ananías mámeciredimiena ciode; áfemona nane ie ui ñue cíoite, —daide.

¹³ Afe uaina cacáillano Ananías daide:

—Aillo comini baie ímana cuemo llotíaioi. Afe llezica omo ínotinuiamo nana Jerusalem o ie fiene finócafuiai cuemo llotíaioi.

¹⁴ Ja birui afémie benomo bite. Lletáriraini illaini llavétallibiai diga bite nana o mámedido jicáfiredino maitá úillena, —daide.

¹⁵ Jira Ocuíraima daide:

—¡Mai jai! Afe ímana jae cue nizeca jiáie náiraimo cuedo úrillena naa íaioi illáiniri.

¹⁶ Afémie aillo cue náiraimo llóite. Afémie aillo cue ícoinia duere zefuállana íemo ácataitcúe, —daide.

¹⁷ Iemona Ananías Saulo illácomo jaide. Jofu jáillano íemo onoi bitajano daide:

—Ama Saulo, Ocuíraima Jesús o billa iomo omo cíocaidimie cue o ui meine abido cíoilena ocuide. Afe dáanomo afémie Ñuera Joreño ona cue úcailtallena cuena daide, —daide.

¹⁸ Afe daií dáinamona, chamu icogi izoide ie uímona cúcoizite. Iemona nane ie ui meine cíoide. Afemona Saulo náidacaillano báutizatata.

¹⁹ Afe meífodo güillano, ie ríino meine comúitate. Afe meí nano nígarui Damáscómo ite ínotinori fiévide.

Saulo Damasco jófuego jino llófuerite

²⁰ Ie meífodo Saulo garíracómo jino llófuerizaide. Afénomo daide: “Jesús Juzíñamui Jitó.”

²¹ Nana afémiemo cacádino fáigacaillano daidíaioi:

—¿Ua meita bie nímiende, nauí Jerusalem Jesús mámedido jicáfiredino racádimie? ¿Ñiie nauí benomo bitímie lletáriraini illáinimo cai maitá úillena? —daidíaioi.

²² Mei íadi Saulo jamánomo riire jino llófuerite. Jesús Crístonana jino uafodo ciótate. Mei jira Damáscómo ite judúuai Saulo ifona íritagaiaioi.

Saulo judúuaimona jillode

²³ Diga iruillai jailla meífomo, judúuai dáanomo comeci fácana Saulo fállena maméritiaioi.

²⁴ Mei íadi aféfuena afémie fidide. Naa mona naio diga jofue jino jáirazemo úiñoidiaioi ie fállena.

²⁵ Mei íadi ínotimaci áillue cirígaimo íena jóonetiaioi. Jóoniano afe jofue jinófene cirínuailla jinomo naio íena agúínetiaioi. Afe daií afémie botade.

Saulo Jerusalemo illafue

²⁶ Saulo Jerusalemo dúcillano, Juzíñamuimo ínotinori gairíacade, mei íadi nana afémiena jacírúitiaioi. Afémie ínogafuena nai jeire oñédiaioi.

27 Mei íadi Bernabé íena uáidote. Iemona orécamiíaimo íena ácatajide. Afemona Saulo iomo Ocuíraimana cíónafue íaioimo llote. Ie mei Saulo Damasco comínimo méaicaíñeno Jesús mámecido úrillafue íaioimo llote.

28 Jira Saulo Jerusalemo diga irui ite. Dinomo ínotimaci diga macácaide.

29 Ocuíraima mámecido méaicaíñeno úrite. Griego uaido úritino judíuaimo úrite. Conímamo jicánua uai ua daíí úrite. Iemona ie fállena mamédiaioi.

30 Jáíie ámatiai afefue fidiano, Saulo Cesaréamo uitíaioi. Dinómona Társomo íena orédiaioi.

31 Ie meífomo nana Judea éniemo ite Jesús mámecido gairídino fírazitiaioi. Ja íaioi ínogafuemo caimare náireoicaidiaioi. Afe izói Galilea éniemo Samaria énie diga ite ínotino fírazillamona riire náireoicaidiaioi. Ocuíraima Jesús ñúefueri jácicaidiaioi. Ñuera Joreño íaioi cánuamona jebuioicaidiaioi.

Eneas jae jíllotaga

32 Pedro jáíie ámatiai uáidualla llezica, daje izói Lida jófuemo ite ínotino éroizaide.

33 Dinomo Enéasna maméidimiena cíoizaide. Afémie ocho diga fimona bíramo biide ie tízitailla jira.

34 Iena Pedro daíízaide:

—Eneas, Jesucristo ona jíllotaiteza. Náidacaillano o bíira ñue fino, —daide.

Afemona Eneas raire jíllobicaide.

35 Lida jofue nairai aféfuena nana cíodiaioi naa Sarón náirairi. Iemona jaiái nano íaioi ínogafuiaí fáicanocaillano Ocuíraima llogáfuemo ínotiaioi.

Dorcas tíide meine abido cáanafue

36 Aféruillaído Jope jófuemo ite ínotingo. Afengo mámecei Tabita. Afe mámecei griego uaido Dorcas. Afe ringo ñúefuedo jáicade. Jitáidinona canófirede.

37 Aféruillaído afe Dorcas iráreizaide. Iemona tíide. Ie abi jócua meífodo oni caifóidicomo jóonetiaioi.

38 Lida áinori ite Jope. Aféruimo Pedro afénomo nai ite. Ínotino afénomo íllana fídiamona, ménamie orédiaioi íena daííllena:

—Jópemo jizíñeno raire biri, —daide.

39 Iemona Pedro afémie íaillinoído jaide. Pedro dúcinamona, Tabita abi jóoinanomo íena uitíaioi. Nana fecíngotiai abido ífoina naidározillano éediaioi. Afe llezica nana Dorcas nauí ie caana llezica tifócaquiruai íemo ácatatiaioi. Emodo íroillai naa jáíie iníroillairi íemo ácatatiaioi.

⁴⁰ Afécomona Pedro nana jino íaioi orede. Ie mei caiñici ifodo dújuillano Juzíñamuimo úrite. Tiídingomo eróillano daide:

—Tabita, mai caifo náidacai, —daide.

Iemona afengo ui botáicaide. Pédromo érocaillanona caifo ráinade.

⁴¹ Onoído llínota ie caifo naidánete. Afe mei ailli jino oreca fecíngotíai íemo ámatíai dainámaci diga abído jíríte. Iemona afengo caade íaioimo izájide.

⁴² Afefue nana Jope jófuego jállecaide. Iemona aillo comini Ocuíraimamo ínotíai.

⁴³ Afe mei Pedro diga irui afe jófuego fiébide. Igorai ídiai jinítaraima Simón jofomo ífirede.

10

Pedro Cornelio uáiduafe

¹ Afe Cesarea jófuego Cornéliona maméidimie ite. Afémie fuíríraíni áillogüelli illaíma. Afe áillogüelli mámece Italiano.

² Afémie naa dama ie comíniri Juzíñamuimo comece fácajano caimare úrite. Afe llezica Juzíñamuimo ñue jacíruioidé. Daje izóí aillo úcubena judíuaímo fecáfírede íaioi canóllena. Iemo Juzíñamuimo nágarui úrifírede.

³ Ie mei daarui jítoma ana ítemo nicáirilla izóí ciode. Afe nicai anado Juzíñamui abí ímie uáfodo cíode. Afe abí ímie jofe Cornelio illánomo jaide; jáillano íena daide:

—¡Cornelio! —daide.

⁴ Cornelio afe Juzíñamui abí ímiemo jacíruiocana érocaillano jicánote:

—Ocuíraíma, ¿bie minica?

Iemona abí ímie íena daide:

—O jicánua Juzíñamui jae jeire ote. Daje izóí jitáidino o cánuaíuaína jeire ote.

⁵ Mei jira Jope jófuego íññíai ore, Simón jírizaíllena. Afémie jíáfodo mameína Pedro.

⁶ Afe Pedro jíai Simón igorai ídiai jinítaraima. Afémie jofe monáíllai fuédamo ite. Afe Simón Pedro o finóllifue omo llóite, —daíí daide.

⁷ Afe íemo úrite Juzíñamui abí ímie jáidemo, Cornelio mena táíjitagamie jíríte. Ie mei ie abí ímíiaímona daa ñúefuego ínofírede fuíríraíma jíríte.

⁸ Nana Juzíñamui abí ímie íemo llogafue llua meífomo Jópemo íaioína orede.

⁹ Afe jítíramoidíruimo, nai afémaci iodo jaílla llezica, Jópemo áinozidiaímo, Pedro jaíciri illa llezica jofe emodo íbánimo Juzíñamuimo úrizaide.

10 Aillo jufínaillamona güíacade. Mei íadi nai güille íaioi fínua llezica, nicáirilla izoide ciode.

11 Afe nicai anado mona tújicaillana ciode. Afénomona áillue iniroi izóidena nágafene zicai ícoinoga ana éniemo agüínana ciode.

12 Afe agüínega iníroimo naga táide rílleniai ite, jaióniai féedinuiai diga.

13 Iemona daa uai dáinana cacade:

—Pedro, náidacaillano fatá ríi, —daide.

14 Jira Pedro uai ote:

—Jíi, Ocuíraima, ríñeiticue. Bácaca ríllena jaca ríñédicue. Daje izói íáirede ríllena ríñédicue naa rairuica rille diga, —daide.

15 Afe uai nane dánomo íena daide:

—Naga Juzíñamui doga izói finoca rílleza íáire maméñeno iri, —daide.

16 Afefue dacaiñoámani íemo íficaide. Ie meífomo afe iniroi meine abido monamo jaide.

17 Nai Pedro afe nicáirillafuemo comeci facáoide. “Afe cue ciónafue nie izói daiíacade,” dáidemo, Cornéliomona orécamiiai nazemo náidazabitíai. Simón jofo jicánotíai.

18 Dúciillano aillo uaido jicánotíai:

—¿Simóndimie bicomio ite? Afémie jíáfodo mameina Pedro, —daidíai.

19 Nai Pedro nicáirillamo comeci facáoidemo, Ñuera Joreño íena daide:

—Cacai, damieámani o jenódíai.

20 Náidacaillano ana billano jizire úriñeno íaioido jai, mei cue omo orécamiiaiza, —daide.

21 Mei jira Pedro jofo emódobanimona ana billano Cornelio orécamací, nazemo náidaidinona daide:

—Cue omoi jenócamiedicue. ¿Nibái mei bitíomoi? —daide.

22 Jira afémaci uai otíai:

—Hlaíma Cornelio cai ória jira bitíai. Afémie ñúefuena nitácamié. Afémie Juzíñamuimo ñue jacíruioidé. Nana judíuai íena ñue llínotíai. Iena iere izíruiúai. Juzíñamui abi ímie íena daide: “Jópemo comini oreri Pedro uáidollena, afe mei o jofomo Pedro bílleza.” Jira o uáibitíai. Dinomo Cornelio íena o daiíacallífueña cácaite, —daidíai.

23 Ie jira Pedro jofo íaioina ote. Afe nai ie diga fiébidíai. Afe jíáiruido Pedro afémaci diga jaide. Afe llezica Jópemo ite ámatíaimona íena nabáioicaidíai.

24 Afe jíáiruido Cesaréamo dúcidíai. Dinomo Cornelio íaioina úiñote. Afénomo bíllena ie llogámaci ie comínimona, ie gaiga nabáíñíaimona dáanomo gairídíai.

²⁵ Afécomo Pedro dúcia llezica, Cornelio jino íena llínuaibite. Jino billano Pedro anamo dújude, ie cáimadollena.

²⁶ Mei íadi Pedro íena náidacaitano íena daide:

—Náidacai. Cue o izói énie ímiedicue, —daide.

²⁷ Nai afémie diga úrioína llezica, jofo jaide. Jáillano aillo gairídinona cíozaide.

²⁸ Jira Pedro daide:

—Jae onódiomoi, judío ímie ie ínuafulaído jíáizie ímie diga nabáirinide. Daje izói ie jofomo jaille rairuírede. Mei íadi Juzíñamui jae cuena llófuate. Buna jíáimana comécina íáiredímie daínide. Daje izói rofóciredímie jíáimana daínide.

²⁹ Ie jira orécamiái cue jíirilla llezica nie izói daíñeno jarire bitícueza. Mei jira nibái mei cue uáidotioza onócadicue, —daide.

³⁰ Ie jira Cornelio uai ote:

—Jae nagaámarui jáidemo, afe bie daje hóramo, benó cue jofomo güíñeno itícue. Aféruimo jítoma ja ana ítemo Juzíñamuimo comeci faiticue. Comeci faiano quenírede ínícuro jítáoidímie cuemo cíocaide.

³¹ Afémie cuena daide: “Cornelio, o jícanogafuiaina Juzíñamui cacade. Afe llezica jítáiredinomo o cánuafuaimo Juzíñamui coméciide.

³² Jope jófue mo ore Simón uájillena. Afémie jíáfodo mameina Pedro. Afémie jíáie Simón jofomo biruido ite. Jáie Simón igorai ídiai jinítaraima. Ie jofo monaillai fuédamo ite. Pedro dúcia o diga úrizaita,” daide.

³³ Daí raire ona jenótaticue. Jira o bille ñuera. Birui nana benomo Juzíñamui uiécomo iticai. Nana Juzíñamui omo llotátagauai caimo o daíllena cacáacadicai, —daide.

Pedro Cornelio jofomo llófuateza

³⁴ Jira Pedro ja úrillano daide:

—Ja birui Juzíñamui jíáimana daa úradotatañedeza onódicue.

³⁵ Mei íadi nizíemo itino íeri jácicaillano ñúefuedo úritinona Juzíñamui íaioína llínofirede.

³⁶ Israel cómogimacimo Juzíñamui úrite. Jesucristodo comeci caimare uái illafue íaioimo llofe. Afémie nana nairai Ocuíraima.

³⁷ Nana judío éniemo comuídifuena ñue onódiomoi. Juan Bautista jino llujilla mei, comini báutizailla meímodo afefue Galiléamo como fuéñe taineca.

³⁸ Nazaret ímie Jesumo Ñuera Joreño ríino Juzíñamui ígaza onódiomoi. Afe Jesús ñúefue finócana jáillana onódiomoi. Afe izói nana Taife ríino anamo duere zefuídinona ie jíllotafuiaina onódiomoi. Aféfuiaina daí finode Juzíñamui ie diga jáicana jira.

³⁹ Nana Jesús judío éniemo finócafuiai uai nabáiraimacidicai. Daje izói Jerusalén jófueмо ie finócafuiai uai nabáiraimacidicai. Ie meífomo cruzmo íena coráiano íena titádiaoí.

⁴⁰ Mei íadi Juzíñamui daruíámani íllamona abído íena cáatate. Ie mei afémiena caimo cíocaitade.

⁴¹ Nana comínido cíocaitañede mei íadi dani caimo cíocaide, Juzíñamui uícomo nizeca uai nabáiraimacidicaiza. Afe mei afémie tíllanomona meine abído cáanamona ie meífomo, afémie diga güiticaí; ie diga jiródicaí.

⁴² Afémie Jesucristo rafue jino comínimo caina llotátate. Afe izói jiáífue caina ua nabáiritade. Afefue daide: “Juzíñamui afe Jesús tíidino cáadino diga íaioí fiénidifuiái jicánoitimiena ocuide. Cai aféfuemo uaina nabáitagamacidicai.”

⁴³ Daje izói jaiai ninómona nana uai lloraini Jesudo úritiaioí. Daídiaoí: “Nana afémiemo ínotino íaioí íáiredifuemona ie mámecido ñue dóficaitiaioí,” daídiaoí, —daide.

Judúuaiñedino Ñuera Joreño como fueñe úicaigaiaioí

⁴⁴ Nai Pedro úrioina llezica, ie úrillauaimo cacáreidimacimo Ñuera Joreño nana íaioimo ana bite.

⁴⁵ Jira Pédrodo bite ínote judúuai fáigacaidiaioí. Ñuera Joreño judúuaiñedinomo daje izói úicaigafueri fáigacaidiaioí.

⁴⁶ Jae jiáizie uáillaído íaioí úrillana cacádiaioí. Afe llezica Juzíñamuimo íaioí íóbioinana cacádiaioí.

⁴⁷ Mei jira Pedro daide:

—¿Birui bu mei ráiruille bimaci báutizallena; mei daa cai izói Ñuera Joreño úicaigaiaioí? —daide.

⁴⁸ Iemona Jesucristo mámecido íaioí báutizazigaiaioí. Ie meífodo Pédroмо izire jicádiaioí: “Nano nígarui cai diga iri,” daídiaoí. Daí íena jeruídiaoí, nano nígarui íaioí diga íllena.

11

Pedro Jerusalemo ite ínotinomo llogafue

¹ Judéamo ite orécamaci ámatiai diga, cómoicana jiáífueña fidídiaioí. Afefue daide: Judíoñedimaci Juzíñamui úrillauaina jae jeire otíaioí.

² Pedro meine Jerusalemo jáidemo, judúuaimona dámierie ínotino Pédrona zanódiaioí.

³ Zánuaño daídiaoí:

—¿Ñibái judíoñedino uáiduaidio? ¿Ñibái íaioí diga güitio? —daide.

⁴ Ie jira Pedro afefue nanómona nana ie finócafuiai llote; daide:

⁵ —Jope jófueмо cue íadi, Juzíñamuimo úrifiredicue. Afe llezica nicaí anado cíódicue. Afe nicaí anado áillue iniroi

izóidena monámona ana bíllana ciódicue. Aferoi nágafene zicaimo ícoinoga. Daií cue illánomo dúcide.

⁶ Afemo ñue eróidicue ie eromo itínuiaina onóillena. Iemona afe eromo ite táicaide rílleniaina ciódicue. Afe dáanomo jacírede rílleniaina ciódicue. Daje izóí afénomo jáizai, íemo féedinuiái diga íllana ciódicue. Nana afe ciona rílleniái bácaziga.

⁷ Iemo daa uai cuena dáinana cacádicue. Daide: “Pedro, náidacaillano afe ríllemona fatá rii.”

⁸ Mei jira daidicue, “Ocuíraima, dama ite. Jaca nanómona cue fúedo íáiredena ríñédicue bácaie diga.”

⁹ Ie mei afe monámona cacaide uai dáanomo cuena daide: “Juzíñamui dogá rílleza íáirede daiíño o iri.”

¹⁰ Afefue dacaiñoámami meine íficaide. Afe meífomo dáanomo nana monamo meine jaide.

¹¹ Afe llezica daamieámami cue illánomo dúcide. Afémaci Cesaréamona cue jenóllena orécamaci.

¹² Ñuera Joreño afémacido cuena orede: “Due jiza jizíño afémacido jairi,” cuena daide. Daje izóí baie seis ámatiai cuedo jáidiaioi. Nana cai daaco jofomo jáidicai.

¹³ Afémie Juzíñamui abi ímiena ie jofo eromo ie ciónafue caimo llote. Afe Juzíñamui abi ímie náidacillano íena daide: “Jope jófuego nano nígamie ore, Simón jírizaillena. Dáamie jáífodo mameina Pedro.

¹⁴ Afémie ona dáíteza, nie izóí o nana o comini diga jíllotioza,” daide.

¹⁵ Cue fueñe íaioimo úrizaila llezica, Ñuera Joreño imaci acónimo bite, nano fueñe cai acónimo billa izóí.

¹⁶ Mei íemona Ocuíraima daínáfuego úbicaidicue. Afefue daide: “Uáfueña Juan fia jáinoído báutizade, mei íadi Ñuera Joreño úcaigamacina ítíomoi.”

¹⁷ Mei jii Ocuíraima Jesucrístomo cai ínuano Juzíñamui caimo iga Joreño, bimácimo Juzíñamui íacade. Afena fidíillano Juzíñamuido jarifeicana úriacañédicue. Jamai cómedicueza, — Pedro daií daide.

¹⁸ Mei ie jira Jerusalemo ite ámatiai aféfuíaina fídia llezica, lícaidiaioi. Lícaillano Juzíñamuimo caimátaidiaioi. Daidíaioi:

—Ua afe izóí judíoñedimacimo íaioimo fienu itifue méidollena jae Juzíñamui íaioimo fecade. Afemona daií jaca zíñoña cáaillinona íaioimo ite.

Antioquíamo ite Juzíñamuimo ínote gairídino

¹⁹ Esteban íaioi faa llezica, jíaie ínotimacimo duere finótatiaioi. Dáarie Fenicia éniemo botádiaioi; jíaimaci

Chípremo Antioquía diga botádiaioi. Dinomo afe ñúefue dani judíuai namácimo llotíaioi. Jáíamacimo llóñega.

²⁰ Mei íadi dáarie Chipre imaci, Cirene imaci diga íinotino Antioquía jófueмо dúcidiaioi. Dúciillano judíoñedinomo úritiaioi. Afemona Ocuíraima Jesús úrillauai íaioimo llote íaioi jíllloillena.

²¹ Afe llezica Ocuíraima ríino íaioimo ite. Mei daí aillo comini nano íaioi jaiái íinogafuiaí fáicanocaillano Ocuíraima Jesumo íinotiaioi.

²² Afefue Jerusalemo ite íinotinomo jállecaide. Iemona afémaci Bernabé Antioquíamo orédiaioi.

²³ Bernabé dúciillano, Juzíñamui cáimadogamací izói ciode. Aferi afémie iere ióbicaide. Nana íaioi llófuete; daide:

—Nana cai Ocuíraimana fáicanocaiñeno ie llogáfuemo jáicina omoi coméciiri, —daide.

²⁴ Afe Bernabé comécina fígomie, Ñuera Joreño úicaigamie. Afémie Jesucristomo izire íinofiredimie. Daí aillo comini Ocuíraima Jesucristo íena náamatade.

²⁵ Afe meífodo Bernabé Társomo Saulo jénuaide. Baillano Antioquíamo íena úite.

²⁶ Dinomo daa fimona namónaze íinotino cígimo ñue fuitádiaillinoi. Afénomo aillo comini llófuete. Afe Antioquíamo íinotino como fueñe Crístomo jaináidinona ja mamécaiaioi.

²⁷ Aféruillaído dámierie Juzíñamuimona llínoga uailai lloráimaci Jerusalémona Antioquíamo jáizaide.

²⁸ Afémacimona dámie Agábona mámeciredimie. Nana íinotino cígiri náidaillano daide:

—Nana bie éniemo aillo jamánomo júbie biite, —daide.

Ñuera Joreño ie comécimo llúamona afefue jino llote. Afe júbie daí bite Claudio illáimana illáruillaído.

²⁹ Ie jira Antioquíamo ite íinotino comeci facádiaioi Judéamo ite ámatiaí canóllena. Naga come íaioimo ite úcube díerize bai jóonetiaioi.

³⁰ Afe daí ñeta, Bernabé Saulo íaillinoído afe iraica úcube Judéamo ite íinotino illáicomínimo orédiaioi.

12

Santiago tíillafue Pedro llavéinafue diga

¹ Aféruillaído Juzíñamuimo jaináidino duere finóllena illaima Herodes nane jénuaide.

² Iemo Herodes Juan ama Santiago lloéfaido titátate.

³ Afémie titátari judíuai iere ióbidiaioi. Aféfuena Herodes fidínamona nane Pedro lláitajide. Ja birui iráizillarullaí. Afe iráizillarullaído fáitañega pan güitíaioi.

⁴ Pedro llaitada mei Herodes llavéracomo íena íbaicuaide. Dinomo cuatro díggagüelli íena úiñotiaioi. Naga afe güéllimona cuatro dígamiríe llaizíriraini ite. Herodes comeci facade pascua rafue meifodo Pédrona jino comínimo cíotallena.

⁵ Ie jira Pedro llavéracomo llaveda ñue úiñoga. Mei íadi Juzíñamuimo gairídino íemo izire Juzíñamuimo jicáoidiaioi.

Juzíñamui Pédrona llavéracomona jino oreca

⁶ Herodes Pedro jino comini uiécomo óiacanarui uícodo, afe naio Pedro llavéracomo inide ñue úiñoga. Nágafene onoi llóejina maiga úiñoraima íaillinoi jaináoigari inide. Afe llezica jíaie úiñoraima íaillinoi jino llavéraco naze úiñoide.

⁷ Iemo Juzíñamui abi ímie raire cíocaizaibite. Afe llezica llavéraco ero úzerecaide. Juzíñamui abi ímie Pedro ciraigi teténote íena cazítate. Cazítano íena daide:

—Mai raire náidacai, —daide.

Iemona llóejillai Pedro ónoimona ana cocide.

⁸ Afe Juzíñamui abi ímie íena daide:

—Mai o ciraigi tirínorafe jofo riire tirino.

O éiba ico jita, —daide.

Pedro daí abi finua llezica Juzíñamui abi ímie íena daide:

—O emodo jítaca áreroi jítada, cuedo bi, —daide.

⁹ Iemona Juzíñamui abi ímie óodana Pedro jaide. Afe abi ímie finócafue Pedro onóñedeza; ñibai uafue ñibai táinofue. Comeci facáoide: “Ñicai anado ciona izóidifuenta cíódicue.”

¹⁰ Mei íadi fuéñeide jóonetimimona bai jújicaillano báifeicana jóonetimimo dúcidiaillinoi. Ie mei afémiemona jújicaillano bai nazemo dúcizaidiaillinoi. Afe naze íbaira lloébani. Dúcidiaillinoimo afe naze íbaira daingo túijicaide. Jino jáillano bai iodo daallu macádiaillinoi. Ie mei Juzíñamui abi ímie ie fiénocaide.

¹¹ Iemona Pedro ñue onócaillano daide:

—Íco iere uáfueza. Juzíñamui abi ímie cuemo orede Herodes cue llavéinamona cue zuitállena. Afe izói nana judíuai cue duere finóacanafuemona cuena zúitaibite, —daide.

¹² Aféfuemo comécillano Juan ei María jofomo jaide. Afe Juan jíáfodo mameide Marcos. Afécomo aillo comini Juzíñamuimo iere úrillena gairídiaioi.

¹³ Pedro afeco abi íbiri llaveca nazemo náidazaide. Náidaillano jofo ero imaci jíríte. Iemona Ródena mámecirede ringoza bu billa daíllena eróizaide.

¹⁴ Mei íadi Pédrona uáimona onóillano, nazena tuiñoñoeno, íóbicaillano meine jofo aizida lluájide:

—Pedro nazemo dúcina, —daízaide.

¹⁵ Jira íena daidíaioi:

—¡Uáiritaidio!

Mei íadi afengo daide:

—Uáfuenta ñue lloticue; uáfuenta Pedro dinomo ite, —afengo daiíoi. Mei íadi afémaci iinoñoeno daidíai:

—Pédroñedeza; fia ie joreño, —daidíai.

16 Mei íaii úrioina llezica, Pedro nazemo nai jírrioi. Afe meífomo naze tuiñoda íemo érocaidiai. Erocaillano jacínaitiai:

—Ua meita Pédroi, —daidíai.

17 Mei íadi ónoido:

—Mai omoi úriñoeno, llicai, —daide. Iemona Juzíñamui llavéracomona ie zúitafue llote. Iemo íaiiina daide:

—Bífue Santiágomo llujiri nana jáie ámatiairi, —daide.

Ie meífodo jino jaillano oni jáinomo jaide.

18 Jae monáizaidemo, llavécano úiñorainimo aillo riire júfidotiai, mei onóñediai; daidíai:

—Benó cai úiñoga Pedro ¿niné jaide? —daidíai.

19 Herodes Pédróna íaiiina jenótate. Iena íaii baiñenamona, nana úiñorainimo jicáicanode. Ie mei Herodes afeúñoraini fatátate, Pedro íaii botata jira. Afe mei Herodes Judéamona jae oni Cesaréamo jaíanite.

Herodes tíllafue

20 Jae Herodes Tiro comini Sidón comini diga íaiiri icírrioi. Mei íadi afémaci dani comeci facádiai ie uícomo cíozabillena. Illaíma Herodes jabóidillaíma Blasto. Afémiena fairíotarediai íaiiri ñue nabáirillena. Afémiedo ñue caimare illifue Heródemo jicádiai. Ua izire jicádiai, íaii gülleniai, illaíma Herodes éniemona íaii ófirena jira.

21 Ie jira Herodes íaiimo úrizailirui íaiimo llote. Aféruimo ebírede illaíma iniroi jítano illaíma ráiranomo ráinade. Daiñiano are íaiimo úrite.

22 Mei íemona comini caillíocana íena daidíai:

—Bie úritimie fia cómeñedeza, afémie juzíñamui, —daidíai.

23 Afe llezica Juzíñamui abi ímie Heródena iráretade Juzíñamui ñuefuenta nitátañena jírari. Iemona afe Herodes aiáide tílla.

24 Iadi Juzíñamui lloga uai oni jalléicaide. Afe jalléinamona náganerie fidíai.

25 Bernabé Saulo diga íaillinoi afe úcube fiaillano meine abido Jerusalémona bitíailinoi. Aféillinoi bite dáamie, Juan daínámie. Dáamie mámecí Márcona.

13

Bernabé Saulo diga como fueñe nágagobai llócaidiaillinoi

1 Antioquíamo ite gairíracomo nano niga uai jino llóraini ite naa llófueraniri. Afémaci mámeciai: Bernabé, Simón,

Cirene ímie Lucio, Manaén, Saulo dígamiediaioi. Simón jíáifo mameina Negro. Galilea illaíma Herodes Manaén diga, dáanomo comuídiaillinoi.

² Aféruillaido afémaci güiñeno Juzíñamuimo caimátaidiaioi. Iemo Juzíñamui Ñuera Joreño íaioina daide:

—Bernabé Saulo diga oni eneno nizeri, cue ocuica raa íaillinoi jetállena.

³ Güiñeno Juzíñamuimo úrilla meífodo éinamaci íaillinoína ónoído ézicita, daidíaioi:

—Mai, ómicoi jairi, —daidíaioi.

Orécamaci Chipre éniemo llófuiaidiaioi

⁴ Ie mei daí Ñuera Joreño íaillinoímo lluájillamona oni Antioquíamona Selúciamo jáidiaillinoi. Dinómona áillocaedo monaillai cigi záfedu Chipremo jáidiaillinoi.

⁵ Salamina ígobemo dúczaidiaillinoímo judío llófueriracomo Juzíñamui uailai jino llotíaillinoi. Afe llezica Juan íaillinoi canócana nabázaide.

⁶ Nana Chipre éniemo llócadiaioi. Iiraínomo Pafó jófuemo dúcíaioi. Dinomo judío aima Barjesuna mámeciredímie baizájidiaioi. Afe aima táinona llófuefiredímie. Afémie daífiredi:

—Juzíñamui dibénedo úriticue, —daide.

⁷ Afe aima ocuídillaíma Sergio Paulo dígamie dáanomo itíaillinoi. Afe Sergio ráfuena ñue onódimie. Aféllaíma Bernabé Saulo diga jíritade Juzíñamui uailai cacáillena.

⁸ Mei íadi afe aima Bernabé Saulo diga llogáuai uáitano zanode. Ocuídillaíma íinuana aima rairuíacade. Afe aima jíáifodo mameina, Elimas.

⁹ Saulo jíáifodo mameina Pablo. Afe Pablo Ñuera Joreño úicaigamie. Aima dáinana cacáillano íemo riire érocaillano

¹⁰ daide:

—¡Jíáíma jífuetimiedio! Íáiba Taife jítódio. Nana ñúfuiaína uáitaraimadio. ¿Ñibái mei ñuera Juzíñamui lloga uai oni cáitano féitaacadio? ¿Ñibái mei o táinofuiaína fáicanocaiñeno jino llóllodio?

¹¹ Mei jabe Ocuíraíma Jesucristo riire ona duere fínoite. O ui nírite. Nano nígarui jitoma egáíñuana cióñeitio, —daide.

Daí dáinamona ie ui niríbicaide. Jae jítidine táino mellécade. Dáamie íena ónoído jainátacana úite, ie ui cióñena jira.

¹² Ocuídillaíma Sergio Paulo áfena cióillano, llogáuaina ñue íinote, mei Juzíñamui llófueinamo jacíruiocana aféuaimo ñue eroide.

Pablo Bernabé diga Pisidia éniemo ite Antioquía jófuemo jáidiaillinoi

13 Pablo ie nabáñiaia diga nocaedo Pafo jófuemona jáidiaioi. Dinómona Panfilia éniemo ite Perge jófuego jáidiaioi. Afénomo Juan íaioina fiénocaillano abido Jerusalem jaide.

14 Pablo ie nabáñiaia diga afe Pérgemo dúciillano, Pisidia éniemo ite Antioquía jófuego arido jaícina jáidiaioi. Dinomo ocózinaillarumo llófueriraco eromo ráinazaidiaioi.

15 Ocuícafuiaia illánicomona fueñe facádotiaioi. Ie mei Juziñamui uai jino lloránicuaimona facádotiaioi. Afe facádua fúillamona llófueriraco illaini íaillinoina daidiaioi:

—Amatiai, ómicoi cacai. Omicoi llóiacagafuiaia íadi comini cacáilleza jino ómicoi llóoiri, —daide.

16 Mei íemona Pablo náidacaillano, ónoído comínina llíicaitade. Afe mei íaioina daide:

—Israel nairai, omoi cácarei. Daje izói Juziñamuina jacíruoidino, omoi cácarei.

17 Israel nairai Juziñamui cai jáiairagima nana íaioina nizede. Iemona Egipto éniemo ónoñegamacina íaioi illa llezica, aillo náiraina afémie jebuítate. Afe mei aféniemona dama íemo ite ie ríinodo íaioina oni ote.

18 Ua mei Juziñamui comeci jitáinafue nai figo fuitáñediaioi, mei íadi afe táizicimo cuarenta diga fimona Juziñamui íaioina zófeñeno úiñote.

19 Afe mei Canaán éniemo ite siete nairai Juziñamui niné táinocaitaga, afe énie cai jáiairagima maiñóllena.

20 Afe meífodo diga riire jicánoraini cuatrocientos cincuenta fimona ocuícaciaioi. Ua ocuícaciaioi uai llóraima Samuel illáruimo.

21 Ie mei íaioina ócuite ríillaima jicádiaioi. Jira Juziñamui Saúl cuarenta fimona afémaci illáimana jóonete. Afe Saúl Cis jitó, Benjamín nairai ímie.

22 Afe mei Juziñamui Saúlna oni orede. Oni óriano David illáimana ie meífomo jóonete. David ífuedo Juziñamui úrite; daide: “Cuená íóbitadímie David baiticue. Afémie Isaí jitó. Nana cue jitaiga raana jetáfireda,” daide.

23 Afe David cómogimamona Jesús jococa. Afe Jesús Juziñamui uícomo daínauai izói Israel nairai jíllotaitimiena íaioi cígiconi Juziñamui comuítate.

24 Jesús comínimo nai abi báifitañenia Juan nana Israel náiraimo jino llote; daide: “Nana omoi báutizarediomo. Omoi comeci ífuiaia mai ñúefuena méidoziri.”

25 Juan uícodo llófuiaillafue fúiacademo, daide: “Omoi comeci fácamieñedicue. Jamáimiedicue. Mei íadi cue meífodo bitímie cue baimo baitadímie. Afémie idai ico igaina zuitánidicue, (jiba jamáimiedicueza),” daí Juan daide.

26 ‘Cáimaci, omoi cácarei. Abraham nairai urúciديوويزا; mai cácarei. Omoimona Juzíñamuina jacíruidino, omoi cácarei. Bie ñue jíllotaituai ómoie.

27 Mei Jerusalemo itino íaiói illáiniri Jesús nahí ífuenta fidíñediaói. Daje izói naga ocózinairuimo facádoga uai llóraini llogáuallaina cacádiaói, mei íadi aféuai daináfuenta onóñediaói. Aféuallaina íaiói onóñenado Jesús duere finótatiaói. Daií jaiái ninomo mamécafuiái afémiemo fuitádiaói.

28 Afe Jesús fatátallifuenta due jiza jaca baiñediaói; mei íadi Pilátomo ie fatátallena jícadiaói.

29 Afe mei nana afémiedo Cuegáuallaimo jaiái ninomo lloga uallai fuitádiaóimo, crúzmona íena ana otá íena raiájidiaói.

30 Mei íadi Juzíñamui tíllanomona íena meine cáatate.

31 Afe mei diga irui íllamona Galiléamona Jerusalemo ie diga jáicadinomo Jesús íaióimo cícaide. Afe iedo jáicadino ja birui comínimo afémie llócaigafue llotíaói.

32 ‘Juzíñamui cai jáiairagimamo uícomo llogáuaido úrite. Ñúefuedo úrite. Ja birui afe ñúefue ómoimo lloticai.

33 Ja cai bie afémaci cómogimadicaí. Ie jira afémie uícodo llogáuai ja caimo fuilla. Afe uai daide: “Jesucristo tíidena meine abido cáataticue.” Daií rúanicomo cuega; segundo ruamo cuega; llote: “Cue jítdío. Birui ona cáataticue.”

34 Diga ícaíño Juzíñamui ie cáailifuenta llote. Ua tíllanomona íena cáataite, ie íeizi jaca ninomo rífaíñeillena. Juzíñamui aféfuena jaiái ninomo Cuegáuallaido daide. Afe uai ie jíto Jesuna daide: “Davidmo uícodo cue uafue lloga ñue cáimafuiái nahí omo jainaide.”

35 Ie jira rúanicomo jáírúado daide: “O izírúiga ñue canódimie íeizi ráiruitio ie rífaíñeillena,” daide.

36 Afe David ie llezica ígimana ñue canode, Juzíñamui ie ocuilla izói. Afe meífomo David tíllano ie uzútiaí cígimo íena raiájidiaói. Iemo ie íeizi rifaide.

37 Mei íadi Juzíñamui cáatagamie íeizi rífaíñede.

38 Cáimaci, omoi cacai. Afe bie rífaítañeno cáatagamie Jesudo omoi fiénidifuiái iba óñeillifue ja ómoimo jino lloga.

39 Afémiedo nana íena ínotino nana íaiói fiénidifuiáimona dófcaitiaói. Mei íadi Moisés ocuicafuiái cai fiénidifuiáimona caina zuitáñede, mei cuinaca izói jáinaídicaí.

40 Ñue abi omoi rairuiri uai jino llóraini cuega mamécafuiái ómoimo báíñeillena. Afe mamécafue daide:

41 Ínoñeno uáitaoidino, omoi cácarei; cacáillano áferi omoi jacínaificairi.

Iemona niné táinocaitiomoiza, aféruillaído jamánomo ñue
jáicfue cue finua jírari.

Aféfuena dámie ómoimo lloía, íadi áfena íinoñeitiomoiza, —
daide.

42 Pablo ie nabáñiari judío garíracomona jino jáidiaioi.
Jáidiaioimo judíoñedino jocócaiaioi íaioimo aféfuena meine
abi do íaioimo lluáibillena jicádiaioi. Afe úireite ocózinaillaruimo
meine lluáibillena jicádiaioi.

43 Afe llófueriracomo íaioi gairilla záillamona aillo judíuai Pablo
llogafue jíeruitiaioi. Iemona Pablo Bernabé diga íaillinoído
jáidiaioi. Daje izói aillo judío onóigafuena jeire otino íaillinoído
jáidiaioi. Pablo, Bernabé diga íaioimo llote:

—Mai Juzíñamui caina izíruillafuemo nágarui aféfuemo ñue
omoi coméciiri, —daide.

44 Siete dígarui íllamona ocózinaillaruimo, nana jofue comini
dáanomo gairídiaioi, Juzíñamui uailai cacáreillena.

45 Mei afénomo aillo comini gairíllana judíuai cíóillano, úrioina
izói itíaioi. Afénomo Pablo uailai uáitano íena báíñotiaioi.

46 Ie mei Pablo Bernabé diga abi mámano íaioina daide:

—Judíuai, bie Juzíñamui uai fueñe ómoimo lolle iere
jitáirede; mei íadi ja aféfuena óiacañediomo; afe ícoinia zíñona
cáallinona llínoñeitiomo. Ie jira ja birui judíoñedinomo
jáiticaí.

47 Mei jira Juzíñamui daí caina llotátate; Juzíñamui daide:

Cuedo náiraina fidítaraimana o mamédicue.

Nana énie íiraino imaci ñuera jíllonafue llóraimana íitio.

48 Aféfuena cacáillano judíoñedino íóbicaidiaioi. Íaioi úrilla
fueñe táinia llezica:

—Juzíñamui uáillaina jamánomo ñuera, —daidiaioi.

Afémacimona aféfuena ínotino aillo ite. Zíñona cáatatinona
llínoitinona mamécaiaioi.

49 Iemona Juzíñamui uailai nana afe énie náiraído jae ñue
jalleide.

50 Afe jófuemo Moo Juzíñamuimo izire jaináiacade
ringóniaimona dáingorie ite. Afe ringóniai illaingo
izóidingotiai. Judíuai afe ringóniaimo úrite, Pablo afe jófuemona
oni oréllena. Daje llezica judíuai afe jofue illánimo daje izói
úrizaidiaioi. Íaioi comeci fieni finua jira, jáie Páblona duere
finóacanafue comuízailla, Bernabé diga. Afe jófuemona oni
íaillinoi orédiaioi.

51 Afe ória meífodo afe íaillinoi eiba ico íaie íaioimo teténote;
afe teténuafue baimaci comeci íaifuaímo íteza, daíacade.

Daí ñiano Iconio jófuemo jáidiaillinoi.

52 Mei íadi Jesús llogáfuemo ínotino iere íobioidiaioi. Afe
llezica Ñuera Joreño úicaigaiaioi.

14

Pablo Bernabé diga Icóniomo itíaiillinoi

¹ Icóniomo dúciillano judío llófueriracomo daane jofó jáiiaillinoi. Dinomo jamánomo ñue úritiaillinoi. Afemona aillo judíuai Jesumo ínotiaioi; judíoñedinomona daje izóí aillo afefue ínotiaioi.

² Mei íadi ínoacañede judíuai jíáie judíoñedino comeci íaire finódiaioi. Daíí Páblona Bernabé diga éoicana eróidiaioi.

³ Ie jira dinomo diga irui ñue jaícina jacíruiñeno Ocuíraíma Jesús mámeçido llófuetiaillinoi. Afe llezica Juzíñamui dama íe ñue riino íaillinoímo fecade. Afemona onótate ráaniai cíorainina ráaniai diga finódiaillinoi. Aféniaido íaillinoi lloga Juzíñamui caina izíruillafue Juzíñamui ñue comínimo fidítate.

⁴ Mei íadi jofue comini bózietaidiaioi. Dáarie judíuai dibénemo jaináiacadiaioi. Jíáimaci Pablo Bernabé diga dibénemo jaináiacadiaioi.

⁵ Afe meífodo ínoacañede judíuai jíáie judíoñedino diga naa íaioi illáiniri noficiaína íaillinoi níjiacadiaioi. Daíí íaillinoína duere finóacadiaioi.

⁶ Mei íadi aféfuena orécamaci uícodo fidídiaioi. Fídiano Pablo Bernabé diga Licaónia éniemo botádiaillinoi. Dinomo ménagobemo macáoidiaillinoi, Litra Derbe diga naa afe áinori itíniaido.

⁷ Dinomo ñue jíllonafue llotíaillinoi.

Lístramo Pablo nofícina níjidiaioi

⁸ Iemo Lístramo macáñede aidaima ite. Ie jocóinanomona tízitaité izóí macáñede. Jaca íe macánina jira dinomo ráíide.

⁹ Afémie Pablo daináfuemo ñue cacáreide. Iemona Pablo íemo érocaillamona, tízitaitímie ñue ínuana Pablo comécido fidíde. Ie ínuamona afémie jíllorede.

¹⁰ Iemona Pablo íena riire daíde:

—O ídaido caífo jaícina naidai, —daíde.

Afénomona afémie tícacaillano náidacaide; náidacaillano como fueñe mácajide.

¹¹ Daíí Pablo finócafuena cíoillano, nana comini Licaónia uáillaído caillíoicana daidíaioi:

—Juzíñamuillai jamai comini izóí ana cai cígímo billa! — daidíaioi.

¹² Bernabena Júpiter juzíñamui daidíaioi; Páblona Mercurio juzíñamui daidíaioi, jamánomo ráfuiái llotímiena jira.

¹³ Júpiter gairíracó naze fueri ite. Afeco úíñotímie juráretuai atide naa amena záfiaíai diga. Afémie naa comini

íaiillinoimo cáimadoacadiaioi. Juráreto fáillemona íaiillinoína íóbitaacadiaioi.

14 Mei íadi orécamaci Pablo Bernabé diga fidídiaillinoi. Aféfuena fidínamona, ínícuro cúatacaillano, comini cígimo jáidiaillinoi. (Afe iniroi cuata daífacade íaiillinoi comeci jamánomo rícaide.) Jaillano caillíoicana daidíaillinoi:

15 —¡Nana omoi, cácarei! ¿Níbái bie izói finódiomoi? Coco omoi izói jiba cómedicoco. Ñúefue ómoimo atídicoco. Afe bie táinofuiai omoi fáicanocaillena lluíbiticoco. Fáicanocaillano, ua caade Juzíñamui dine omoi jáillena daí lluíbiticoco. Afémie mona, bie énie, monáillai dieze finode naa íaioimo itínuiari.

16 Jáiairagima illa llezica nana nairai íaioi comeci jitáillafodo macáoidiaioi. Aféruillaído Juzíñamui íaioína lletáñede.

17 Mei íadi Juzíñamui ñúemie ífuena ñue ómoimo finócafuaído ómoína fidítafirede. Ua ñue nocina ómoimo bítafirede. Nana aménaiai llizillajiaína ómoiri llizítate. Afedo omoi güille ñue ite, omoi comeci íóbillena, —daí úrite Pablo.

18 Mei nana afe daínauaillai daína íadi, nana comini íaiillinoiri juráretuai nai fáiacadiaioi. Iadi ícoimo afétuai íaioi faana féitadiaillinoi.

19 Afe mei Antioquíamona Icóniomona dáarie judíuai dúcizaide. Listra comínimo júfiduano Pablo fállena mamédiaioi. Iemona Páblona noficiaina níjdiaioi. Níjiano jofue jinófenemo íena zonócaidiaioi. Comécido daidíaioi: “Níbái tíide,” daide.

20 Mei íadi ínotino íemo gairídiaioimo Pablo náidacaillano meine jófuemo jaide. Afe jítiramoidiruido afémie Bernabé diga Dérbemo jáidiaillinoi.

21 Dínomo jíllona uaillai jino llotíaillinoi. Afe jófuemo aillo comini Jesumo ínotiaioi. Afe mei meine abido Lístramo, Icóniomo íemo Antioquíamo dieze jáidiaillinoi.

22 Nana afénuiyai jofue ínotinuiyai ñue caimare íociretadiaillinoi. Ñue jáicina ínuafuedo íaioi jáillena llófuetiaillinoi. Iemo íaioína daidíaillinoi:

—Juzíñamui illáimana illíruimo cai jáillena, aillo afe facátafuiai iere caimo jitáirede, —daide.

23 Afe llezica naga gairíracuaimo ócuite illáinina mamédiaillinoi. Afe mei güíñeno Juzíñamuimo iere úrilla meífomo nana como ocuídillainina mamécamiyai Juzíñamui úíñuamo jónetiaillinoi, Juzíñamuimo ñue íaioi ínua jira.

Pablo Bernabé diga íaillinoi nano billánomo abido jáidiaillinoi

24 Afe meífodo Pisidia éniemona jaillano Panfilia éniemo dúcidiaillinoi.

25 Perge jófuego jíllo nafue llotí aillinoi. Afe llua méifomo Atalia jófuego jáidiaillinoi.

26 Dinómona Siria éniemo ite Antioquía jófuego nocaedo ruica jáidiaillinoi. Naui afe jófuego ite ínotino íaillinoína Juzíñamui jónetiaioi. Daií finódiaioi jíáie nairai ñúefuena llófuaillena. Ja birui afe táijina fuilla.

27 Antioquía mo dúcidiaillinoimo, nana ínotino Juzíñamui garíracomo gairídiaioi. Gairídiaioimo Pablo nana Juzíñamui íaillinoido finócafuaí jino íaioimo llote. Afe llezica judíoñedino Juzíñamui ñue jílloille io como túíña llotí aillinoi. Afe izói áfemo afémaci ínorediaioi.

28 Afe méifomo Pablo Bernabé diga ínotino cígimo are diga irui ití aillinoi.

15

Ínotino illaini Jerusalem gairídiaioi orécamaci diga

1 Aféruillaído dáarie íñiaí Judea éniemona Antioquía mo ite ínotino llófuaí bite. Íaioína daidíaioi:

—Moisés ocuica íza bacano ícoi quétafuena omoí finóñenia, jílloñeitiomoi, —daidíaioi.

2 Ie jira Pablo Bernabé diga íaioimo riírede uáillaído úritiaillinoi aillo júfiduafuaí diga. Iemona Antioquía mo ite ínotino Pablo, Bernabé, jíáimaci diga nizédiaioi, Jerusalem ite orécamacimo aféfuena jícanuaillena; daje izói Jerusalem ite Juzíñamui gairídino illáinimo jícanuaitiaioi.

3 Mei daií nízia mei Antioquía ínotino afe nizécanona orédiaioi. Afe oréinamona, Fenicia éniédo Samaria énie diga jáidiaioi. Jaillano judíoñedino íaioi jiaí llóinauailai féitano Juzíñamui dibénedo jáillafue llotíaioi. Nana ámatiaí aféfuena cacáillano iere íobidiaioi.

4 Pablo Bernabé diga Jerusalem dúcidiaillinoimo, Juzíñamui gairídino caimare uáidogaiaillinoi. Daje izói orécamaci naa gairídino illáiniri íaillinoína caimare uáidotiaioi. Dinomo Juzíñamui íaioiri finócafuaí íaioimo jino llotí aillinoi.

5 Mei íadi fariséuaimona dáarie ínotino caifo naidáillano íaioína daide:

—Ínote judíoñedino afe cai izói quetáinafue jitáirede. Afe emódomo Moisés ocuífue ñue ínollena jitáirede, —daidíaioi.

6 Iemona orécamaci naa ínotino illáiniri aféfuena ñue onóillena gairídiaioi.

7 Aféfuai are íaioi júfidua méifomo, Pedro caifo náidaillano daide:

—Amatiaí, omoí cácarei. Naui Juzíñamui cuemo finócafue onódiomoi. Juzíñamui omoí cígimona cue nizeda judíoñedino

cígimo orede. Ua cuena nizede afémacimo ñue jílloñafue uaillai cue llujillena; áfemona afémaci aféfuiaina ñnotiaioi.

8 Cai comécina onode Juziñamui cuemo llote: “Afe judíoñedinona ñue llínoiticue,” daide. Afemona Ñuera Joreño íaioimo fecade caimo ie feca ízoí.

9 Juziñamui cáimona afémacimo jiáifodo finóñede. Iaioi ñnuado íaioi comeci íaifue Juziñamui oni dote caie ie dua ízoí.

10 Mei birui ¿ñibái mei Juziñamui finócafue jeire onédiomoi? ¿Ñibái mei baie ñnotino jamánomo riire ocuácadío? Afe ocuínafuena cai, cai jáiairagima diga finónidicai.

11 Mei íadi jiáifodo ñnoticai, cai jílloillena. Ocuíraima Jesús caimo dúecaide. Afemo cai ñnuamona íbáñeno jíllobicaidicai. Afe izói judíoñedino Jesumo ñnuamona íbáñeno jíllobicaidiaioi, —daide.

12 Mei jira afémaci llícaidiaioi, Bernabé Pablo diga llogáfuemo cacáreillena. Nana judíoñedino cígimo Juziñamui finócafuiái llotíailinoi. Dinomo íaillinoído uaido finoca onótate raa ciórainina raa diga Juziñamui finode. Aféfuiaí jino llotíailinoi.

13 Iaillinoi llogafue fúillamona, Santiago daide:

—Amatiai, cue dánamo cácarei.

14 Simón Pedro jae Juziñamui judíoñedinona como fueñe íaioina izire canóñafue caimo jino llote. Juziñamui jae judíoñedimacimona dáazie como níziaibite dama ie náiraina.

15 Afefue ua Juziñamui jaiái uai llóraini cuezáfuiáimo jáicina dájena jóobide. Afe Cuezáuai daide:

16 Bifue mei, meine bíitícue.

Ua David jaiái nairái, júdaizitaga íadi, meine dáaziena jofu gairítaitícue.

Aféziemona due fiébidino jaiái íaioi ízaina izói meine jebuítaitícue.

Riínidimaci jofu dánamo otátaitícue, ñue riírediziena íaioi íllena.

17 Afe daíí fínuaibitícue nana jiáímaciaí Juziñamuimo comeci fácajano íaioi ñnollena.

Daíí fínoitícue nana cuena náamarede judíoñede náiraiái cuemo comeci facada ñnollena.

18 Ua jaiái ninómona aféfuiaí onótate Juziñamui daíí daide.

19 Te jira bifue llotícue. Afe como Juziñamuido jáiacade judíoñedino mai, cai íaioina áifedoñeiticai. Jae íaioi jaiái ñnoga tánofuiaí fáicanocaidiaioi Juziñamui llogáuaina íaioi ñnollena.

20 Due llétafue íaioimo cai cúellena ja dieze figo baite. Afe bífuiaí íaioimo llóitícai. Mai jánaraimo fia fecaca güíllena omoi jetáñeno iri. Mai jiruífuemona abí omoi rairuiri. Dama

áiredimie ie ai diga illa ñuena. Mai cimoina cigínoga rílleniai riñeno iri. Afe izói coró baitaga rílleniai riñeno iri. Daje izói díena omoi jíroñeno iri.

21 Daí judíoñede como ínotimacimo lletá dicaiza, nibai nanómona nana jófue mo Moisés ocuícafue llófueraini ite. Naga ocó zinaillaruido llófueriracomo afe Cuegáuai jino facá dotiaioi. Aci dino Santiago llote.

22 Iemo orécamací gairídímaci, nana íaioi illaini diga, “Jii,” daidí aioi. Iemoná íaioi cigímona dá mierie nizé llena mamé rítiaioi, Antioquíamo oré llena Pablo Bernabé diga íaillinoi nabá illena. Judas daínámie nizé diaioi; afémie jíáfodo mameína Barsabás. Daje llezica Sílasna nizé diaioi. Afe íaillinoi ámatiaí cigíri illaíma izó diaillinoi.

23 Iaillinoído cuegabe oré diaioi. Afé bemo daide:

“Cai Antioquíamo ite judíoñede ámatiaímo uai oré dicaí. Afe izói Siria éniemo ite ámatiaímo, Cilicia éniemo ite ámatiaí díeze nana ómoímo uai oré dicaí. Nana orécamací, Juzíñamuímo gairídino illaini, benó ite ámatiaí diga, ómoímo uai oré dicaí.

24 Cáimona ómoímo nauí bitino finócafue jae fidídicaí. Caimo lloñeno oni jáidiaioi. Cai óreñegaí aioi. Dani imaci uá illaído jae omoi ífoci írinuaidiaioi. Daí ómoína áfeduaidiaioi. Omoi bacano ícoi quetá llifuaí llujá diaioi; jíaíe Moisés llogáu aillai ómoímo ocuízaidiaioi.

25 Ie jira caí comécido ñue jaide caí cigímona mena come mameda ómoímo oré llena. Afé fuena nana jíéruiticaí. Bie nizé caillinoi Pablo Bernabé diga omoi éroizaí bitiaioi. Pablo Bernabé diga caí iere izíruiga ámaillinoi.

26 Cai Ocuíraíma Jesucristo ñúefue íaillinoi llua ícoína, jaci cácatagaillinoi.

27 Daí Judas Silas diga ómoímo oré dicaí. Afé illinoi ómoímo jofo úritiaillinoi nana bífuiaí jino ñue lló llena.

28 Mei cáimona ñue cioide; afe izói Ñuera Joréñomona ñue cioide rírede rafue ómoímo caí mámeñe illena. Dama jítaíredí fue mámeíticaí.

29 Já naráímo fia fecaca rílleniaína omoi riñeno iri. Daje izói díena jíroñeno iri; cimoina cigínoga ríllena omoi riñeno iri. Nana jíruífuemona abí omoi rairuiri. Dama áiredimie ie ai diga illa ñuena. Bífuiaímona abí omoi rairuía dí, ñue ítiomoi. Jae níie.”

30 Daí Jerusalemo ite ínotino íaioína Antioquíamo oré diaioi. Antioquíamo dúc diaioímo, dinomo ite ínotino dánomo gairítiaioi afe rabe fecá llena.

31 Afebe ámatiaí facá duamona iere íó bidiaioi. Ua afe caimare létafuéri íó bidiaioi.

32 Judas Silas diga Juzíñamuimona oga rafue jino llórediaillinoi. Ie jira íaillinoi uáillaído afe ámatiai ñue náirecaitadiaillinoi. Afe llezica íaioina ñue comeci firazitadiaillinoi íaioi caimare íllena.

33 Dínomo diga irui íllamona, Antioquíamo ite ámatiai comeci jacínaiñenafuedo íaioina játatiaioi. Daí íaioina uáidonocaidiaioi meine íaioi orécamaci diné jáillena.

34 Mei íadi Silas Antioquíamo fiébicaillena mamérite.

35 Afe izói Pablo Bernabé diga Antioquíamo fiébidiaillinoi. Afe meífodo, aillo jáíe llóraini diga, llófueritiaioi. Cai Ocuíraima Jesucristo uaillai jino llotíaioi.

Pablo dánomo nane jáizaide ñúefue llujáillena

36 Diga irui illa meífomo Pablo Bernabena daide:

—Mai dánomo meine coco jai, nauí coco llófuegano coco uáiduailli. Nana íaioi jófuedo Jesucristo uaillai llófueticoco, ie jira afémaci nie izói itíaioiza coco eróizai, —daide.

37 Bernabé Marcos úiacade íaillinoi jaille dine. (Marcos jáífodo mameina Juan.)

38 Mei íadi Pablo íena úiacañede, nauí Panfilia éniemo íaioina fiénocaila jira. Iemo íaillinoi táijicanado jáíñede.

39 Afefue jamánomo íaillinoi riire júfidua meífodo, dárie enénorie oni jáidiaillinoi. Ie mei Bernabé Marcos uite. Daí ñiano, nocaedo Chípremo jáidiaillinoi.

40 Afe llezica Pablo dama íeiena Silas nizada ote. Nízia mei, afénomo ite ámatiai Juzíñamui íaillinoi izíruillena caimare jicádiaioi, daje izói Juzíñamui íaillinoina nabáirillena. Daí jica meífomo, oni jáínomo jáidiaillinoi.

41 Siria énie, Cilicia éniendo jáidiaillinoi. Afénomo Juzíñamuimo gairide ámatiai náicaitadiaillinoi.

16

Timoteo Pablo Silas diga nabázizaide

1 Derbe, Lystra jofue diga dínomo Pablo, Silas diga dúcidiaillinoi. Afénomo daa Juzíñamuimo ínotimie baizájidiaillinoi. Ie ei judúuaimona Juzíñamuimo ínotingo. Mei íadi ie moo griego ímie.

2 Lystramo ite ámatiai afémiedo ñue úritiaioi naa Icóniomo ite ámatiairi.

3 Pablo Timotéona ie nabaina úiacade. Ie jira ie bacano icoi quetátate, íaioi jáillinomo ite judúuai afémiedo comeci fiени fácañeillena. Mei afémaci ie moo griego ímienana ñue onódiaioiza.

4 Nana íaioi jáillado ite jófuedo lletáinafue llotíaioi. Afe lletáinafue Jerusalemo ite orécamaci ocuide éinamaci diga llotátatiaioi.

⁵ Daií Juziñamuimo garídimaci íaiói ñnuafue ñue oni móonaioicaide. Afemona nágarui aillo jebuíoicaidiaíoi.

Pablo Macedonia ímiena nicai anado ciona izói cide

⁶ Asia éniemo Ñuera Joreño ñúefue íaiói lluájillana ráiruide. Ie jira Frigia énie, Galacia énie diga afe éniemo oni lluájidiaíoi.

⁷ Ie mei Misia énie fuédamo dúcidiaíoi. Dinómona Bitinia éniemo jáillana comeci facádiaíoi, mei íadi Jesús Joreño dinomo íaiói jáillana rairuide.

⁸ Ie jira jica Misia énie fuédado jáidiaíoi. Dinómona Troas ígobemo jáidiaíoi.

⁹ Dinomo afe naío Pablo nicáirilla izói cide. Afe nicáirilla izói Macedonia énie ímiena cide. Afémie náidaicana Páblona izire jicade; daide: “Bené Macedóniamo cai cánuabi,” —daide.

¹⁰ Daií Pablo nicai anado izói cionamona Macedóniamo cai jáillena mamériticai. Jae Juziñamui cai jírillaza ua onódicai dinomo ñúefue cai lluájillena.

Pablo Silas diga Filipos jófuego illafue

¹¹ Iemona Tróasmona nocaedo monaillai cigi idu Samotráciamo jaícina jáidicai. Ie jítiramo Neápolismo dúcidicai.

¹² Dinómona Filipos jófuego jáidicai. Afe Macedonia fueda Filipos jamánomo jalléidigobe. Romano comini afe jofue nauí nitátatino. Dinomo nano nígarui iticai.

¹³ Afe ocózinaiaruimo afe jofue jinomo jáidicai. Ua imani fuemo íaiói Juziñamuimo iere úrizafirenonomo jáidicai. Dinomo ráinaillano ñúefuedo gairídingotiaimo úriticai.

¹⁴ Aféngotiaimona daango Lidia mámeçiredingo. Afengo Tiatira jofue ingo. Afengo jiáire jítirede ñuera iníroi fecáraingo. Afe ringo Juziñamuimo áinozioidingo Juziñamuimo caimare úrillena. Iemona afengo afe ñúefuena cacáreacade. Jae Juziñamui afengo comécina tuiñode, Pablo llogáuailai jeire óllena.

¹⁵ Afengo naa ie comíniri báutizagaiaíoi. Báutiza mei izire jicada caina daide:

—Comeci anado omoi daiíadi, Juziñamuimo ua ñnotingodicue, mai cue jofomo omoi bi, —daide.

Iemona aféngodo jáidicai.

¹⁶ Afe Juziñamuimo úrizairanomo cai jailla llezica, fiénidena jóriarede ringoza baizájidicai. Afe fiénide jóriaido come ónoñega éicina raire onófirede. Afengo izire jeruícango. Afe eici báillado aillo úcubena ie náamatiai íena ófirediaíoi.

¹⁷ Afe ringoza Pablo diga caido jáizaide. Caillícana jaide; daide:

—Bimaci caifoide Juziñamuimo dúidiaíoi. Omoi jílloille io ómoimo llotíaiói, —daide.

18 Diga iruillai daií afengo caillide. Are ie caillícana ícoimo, Pablo zefuínaite. Meine gírecaillano aféngomo ite fiénide jóriaina daide:

—Jesucristo mámeçido aféngomona ona oni orédicue, — daide.

Daií daina llezícamona afe fiénide jóriai aféngona fáicanocaillano jaide.

19 Afe ringoza náamatiai daií ie finóinana ciódiaioi. Iemona:

—Jae aféngodo úcubena óñeiticai, —daidíaioi.

Daií dainano Pablo Silas diga llaítada ríimaci uícomo aillo gairírabirimo uitíaioi.

20 Riire jicánorainimo íaillinoína izájidiaioi. Daidíaioi:

—Bíaillinoi, judío ímiai cai jófuemo comínina ríicaitaíbite.

21 Caimo llúaíbigafuíaína jeire ónidicai. Afe izóí cai ínidicai, cai bie románodicaiza, —daidíaioi.

22 Iemona afeno comíni íaillinoímo ríicaidiaioi. Riire jicánoraini íaillinoi ínícuirona duiñoda rázido íaillinoína fatátate.

23 Iaillinoi aillo fáina meífomo, llavéracomo íaillinoína lláviaidiaioi. Afe llavéraco úíñoraima riire ocuidiaioi íaillinoína ñue rairuállena.

24 Afe riire ocuínafuena cacánamona llavéraco úíñotimie llavéraco jamánomo jofóidicomo íaillinoína orede. Dinomo come idai jíitara íredamo íaillinoína jíitate.

25 Afe naió dáaferuimo Pablo Silas diga Juzíñamuimo úrillano Juzíñamui ruai rotíiaillinoi. Afécomo jíaíe llavécamiiai afe rúana cacádiaioi.

26 Iaillinoi rua llezica afe énie raire iere riire docáiricaide. Nana afe llavéraco jáillirai izóí riire mozide nofciaí jaidínocaiga izóí íficaide. Afe llezícamona llavéraco náziai túicoizite. Afemona nana llavécamiiai llójeuai tícoizite.

27 Iemona llavéraco úíñoraima cazide. Cazídemo jae nana náziai túienana ciode. Comeci anado daide: “Nana llavécamací jae níbai botádiaioi.” Ie jira lloefai ota ie abi faitáacade.

28 Mei íadi Pablo íemo caillide:

—¡Dama o abina fiéni finóñeno iri; nana benó itícaiza! — daide.

29 Mei jira llavéraco úíñoraima bobaie jicade. Iemona Pablo diné aizícana bite. Dinomo afe jágeri abi cuidírioicana, Pablo Silas diga íaillinoi anamo dújude.

30 Ie meífomo íaillinoína jino jíáinomo uillano, jicánote:

—Pablo, ¿cuemo ite fiénidífuemona cue jíilloillena nie izóí ííticue? —daide.

31 Jira aféillinoi uai ote:

—O jíilloillena cai Ocuíraíma Jesucrístomo íino. Iemona o dama jíllobicaitio. Daje izóí o ai nana o úruiai diga íñuamona jíllobicaitiaioi, —daide.

³² Iemona Juziñamui uailiai íemo llotíallinoi naa ie jofu ero itínuáiri.

³³ Mei íadi daje naio llavériraima íaillinoi fáina boáfiai jocode. Afemona afémie naa íaillinoi úruiairi báutizaigaiaioi.

³⁴ Afe mei aféillinoina ie jofomo uillano ecade. Afémie naa ie comini diga Juziñamuimo ínuari caimare íobidiaioi.

³⁵ Afe jítiramo riire jicánoraini jíáie llavériraini llavéracomo orede, Pablo íaillinoi zuitállena.

³⁶ Iemona llavéraco úiñoraima Páblona daide:

—Riire jicánoraini ómicoina cuena zuitátate. Mei ja birui ómicoi nífuenino uái íllena jino jáirediomicoi, —daide.

³⁷ Mei íadi Pablo llavérirainina daide:

—Romano ímedicoco, mei íadi cócomo jicánoñeno razido cócona fatíomoi. Faano cócona llavétatiomoi. ¿Mei íadi ja birui báinino cócona zuitátatiomoi? Mei íeñedeza. Coco llavétatino mai coco zúitaibiri, —daidiaillinoi.

³⁸ Afefue llavériraini jicánorainimo llujáide. Lluájillamona jicánoraini jacínaitiaioi, aféillinoi romano ímienari.

³⁹ Ie jira Pablo Silas diga íaillinoimo jícajidiaioi:

—Caimo ómicoi dúecai, —daízaidiaioi.

Iemona íaillinoi jino uano, íaioi jófueмона oni jáillana izire jicádiaioi.

⁴⁰ Afe llavéracomo jino billano, Lidia jofomo jáidiaillinoi.

Amatiana cóillano íaioina ñue nácaitadiaillinoi. Daí ñiano jíainomo oni jáidiaillinoi.

17

Tesalónicamo comuide aillo úrioinafue

¹ Pablo Silas diga íaillinoi jaillano Anfípolis jófuedo jáidiaillinoi. Ie mei Apolonia jófuedo jáidiaillinoi. Afe mei Tesalónica jófueмо dúcidiaillinoi. Afénomo ite judúuai llófueriraco.

² Pablo ie fibilla izói, afe llófueriracomo jofu llófuerizaide. Daámani ocózinallaruido íaioimo úrite.

³ Juziñamui jaiái Cuegáuai jino íaioimo llóollode. Aféuaimona Cristo duere finóinafue jítaírede, daí íaioimo jino llote. Daje izói Cristo tíida meine cáallena jítaírede daí jino íaioimo llote. Íaioina daide:

—Be ómoimo cue llogámie Jesús dámie Crístona, —daide.

⁴ Mei íemona judúuaimona dámierie aféuemo ínotiaioi. Afemona Pablo Silas íaillinoi dibénemo itábicaidiaioi. Afe izói aillo Juziñamuimo jaináiacade griego ímiai iere ñue ínotiaioi. Afe izói aillo illaingo izóidingotiai aféuaina ínotiaioi.

⁵ Mei íadi ínoñede judúuai aféueri úradoilla izói itíaioi. Iemona cállemo ite fiénide ráiraiedinomo gairidiaioi. Ie mei

judúuai cállemo ite itínori aillo úrioinafue finódiaioi. Daií jofue comini comeci fieni iciritadiaioi. Jasón jofomo ite Pablo Silas diga llaitállena, afeco cirínotiaioi, aféillinoi llaitada afeno comínimo izájillena.

⁶ Mei íadi íaillinoina baiñédiaioi. Ie jira Jasón zocana uitíaioi, jiáie ámatiai diga. Jofue illaini uíecomó íaioina uitíaioi. Daií caillídiaioi:

—Bíaillinoi nágagobiaido fieni faillíñeinafuiai finódino ja benomo dúcia.

⁷ Ie mei Jasón ie jofomo íaioina llínote. Nana afe bie bitino cai caifoide romano illaíma ocuífafuiai uáitaocana daide: “Jiáie ua cai illaíma ite, Jesús,” —daidíaioi.

⁸ Aféfuena cacáillano ríimaci naa comíniri faillíñeidiaioi.

⁹ Jasonmo daidíaioi:

—Cai o jífuéñellena uícomo o úcube caimo ine. Uire aféillinoi o oréadi o úcube meine omo íitícaí, —daidíaioi. Ie jira afe úcube íaioimo fécamona ja Jasón jiái ámatiai diga zuitádiaioi.

Pablo Silas diga Berea jófuego dúcide

¹⁰ Afemona afe naio ámatiai Pablo Silas diga Beréamo raire orédiaioi. Dinomo dúciillano judúuai llófueriracomo jáidiaillinoi.

¹¹ Bie judúuai Tesalónicamo ite judúuai baimo figomaci. Caimare afe úrillauaina jeire otíaioi. Nágaruí Juzíñamui Cuegáuailaimo jénofirediaioi, íaioimo llogáuailaina uafue daíllena.

¹² Afemona aillo afémacimona ínotiaioi. Daje izói griéguaímona ínotiaioi. Dájerize íñiaí íemo jiái ñue caimare jacíruigangotiai ínotiaioi.

¹³ Mei íadi Tesalónicamo ite judúuai Pablo Beréamo Juzíñamui llogáuai llófueillana fidíillano, dinomo nane comini fieni faillíñaitaitiaioi.

¹⁴ Mei íadi ámatiai dama Páblona raire aféruido monáillai fuédamo orédiaioi. Ie mei Silas Timoteo diga Beréamo fiébicaide.

¹⁵ Pablo nabaina jáidino Atenas jófuego íena izájídiaioi. Iaiói meine jáidínodo Silas Timoteo diga Pablo íaillinoímo uai orede. Daide: “Cue diné iere raire ómicoi biri, dánomo cai gairílleza,” daide.

Pablo Aténasmo illafue

¹⁶ Nai Pablo Aténasmo Silas, Timoteo diga úíñua llezica, afe jófuedo macade. Macádemo aillo íaioi jánaraiái cióizaide. Aferui Pablo comeci iere zúucaide.

¹⁷ Mei jira llófueriracomo judúuari úrite; daje izói jiáie Juzíñamui jaináiacadínori. Nágaruí jofue gairírabirimo itínuiamo llote.

18 Dárie “epicuro” daina llófueinafue facádotino como Pablo diga úrizaidiaioi. Daje izói, dárie “estoicos” daina llogáfuiái facádotino Pablo diga úrizaidiaioi. Dámierie daidíaioi:

—Bie aillo úrifiredimie, ¿nífue caimo llóite? —daidíaioi.

Mei íadi jíaimaci daidíaioi:

—Nibai jíáie juzíñamuillai llotímie, —daidíaioi.

Daí úritiaioi, Pablo Jesús úrillauai, ie meine cáanafue diga íaioimo llóiacana jira.

19 Ie mei Areópago daina illánomo íena uitíaioi. Dinomo gairífrediaioi llófueinafueña cacáillena. Dinomo íena jícanotiaioi:

—O atica cómue llófueinafueña cai onóacadicaí.

20 Mei ónoñegafuiái caimo llotio. Afe bífuiái dainana onóacadicaí, —daidíaioi.

21 Nana Atenas imaci naa afénomo ite onínemaciri, cómue ráfuiaina cacáillena járitaitiaioi. Afe izói cómofuiái llóllena járitaitiaioi. Jíáie táijinamo járitañediaioi.

22 Ie jira Pablo Areópago comini cígimo náidaillano daide:

—Atenas imaci, omoi cácarei. Aillo juzíñamuillaido iere jaináidinodiomoi. Daí omoi íllana ciódicue.

23 Omoi juzíñamuillai áinozillena finócafuiái illánuiáido éroicaidicue. Dinomo daa omoi juzíñamuillaimo comeci facáranó ciódicue. Afénomo cuega uailai daide: “Bie cai ónoñega juzíñamui ie.” Bie omoi onóñeno jaináiacana Juzíñamui, ua birui ómoimo cue lluíbigamie.

24 ‘Afe énie finode Juzíñamui naa éniemo itínuiáiri, afémie bie énie Naama, mona diga. Afémie comini nigácomo íñede.

25 Afémiemo cai nífueña finónidicaí. Nífueña llónidicaí. Mei jira dama afémie nana comínimo cáatatinona fecáfiredé; daje izói afémie jáfaicina cai ite. Ie emódomo nana ite ráaniaina afémie caimo iga.

26 ‘Naga náiraíai fueñe dáziemona Juzíñamui comuítaga, naga illa dígano íaioi éniemo íllena. Iemona dájena diédicaí. Nana íaioi illínuiái mamede. Daje izói nano nié dino íaioi illíruillai mamede.

27 Daí afémie finoca afe Juzíñamui íaioi jenóllena, nibai are illa ícoínia ie íaioi báillena. Mei íadi uáfueña Juzíñamui cai illa dígamie mona jica íñede.

28 Mei Juzíñamuido cáadicaí. Afémiedo cai jetácaga raana jetádicaí. Afe izói afémiedo iticaí. Afe daje izói ómoimona dárie rua finua izoide llote: “Juzíñamui comuítagamacidicaí; ie izíedicaí.”

29 Iemona afe Juzíñamuina fia oro finoina jánarai daí comeci omoi facáñeno iri, mei Juzíñamui comuítagamacidicaiza. Afe izói afémiena plata finoina jánarai, ebírede nofici finoina

jánarai, daií comécido omoí daiíñeno iri. Nana bie jánaraiaina daní comíni comeci faca izóí finódiaioi.

³⁰ Nauí jaiáidiruillaído comíni abina onóñediaioi; daií íllaza Juzíñamui íaioimo nai ibana oñede. Mei íadi birui náganomo itímíiaina Juzíñamui ocuícana daide: “Omoimo fiéni itífuiaína méidori,” —daide.

³¹ ‘Nana comínimo itífuiaí izire jicánollirui Juzíñamui jae mamede. Aféruillaído afémie nizécamiédo jaícina caimo izire jicánoite. Juzíñamui afe nizécamiéna nana comínimo ñue jino uáfueña onótate; tíllanomoná íéna meine abido cáatanado nana comínina uáfodo jino fidítate, —daií Pablo llote.

³² Afe tíidimaci meine cáanafueña cacáillano, dárie itínomona Pablo jifánodoídiaioi. Jiáimaci íéna daidíaioi:

—Íco jiaíruido aféfuéña meine nane dánomo ómona cácaíticai, —daidíaioi.

³³ Iemo Pablo íaioi cígimona oni jaide.

³⁴ Mei íadi dáarie íedo jáidiaioi. Jaillano ínotiaioi. Afe ínotimacimona dámie Dionísio. Afémie Areópago nimáiranimo jaináidímie. Afe ínotimacimona Dámaris mámeciredingo ite, nai bai jiáimaciri.

18

Pablo Coríntomo illafue

¹ Afe meífodo Pablo Aténasmona oni Corinto jófuemo jáizaide.

² Dinomo dúcia meífomo Aquila mámecirede judío ímie baizájide. Afémie Ponto énie ímie. Afe Aquila aí Priscila. Afe íaillinoi cómoicana Itáliamona botádiaillinoi; romano caifóidillaíma Claudio nana judíuaí Roma jófuemona oni íaioi oréina jira. Dinomo Pablo Aquila uáiduaide.

³ Aquila íe aí diga jédaciede iniroi tífuano bizáinicaiife nitíaioi. Afe íaioi nillado úcube otíaioi. Pablo afe táijinana fibídímie. Íe jira Pablo afe íaillinoíri fiébicaide, dájena íaioi táijillena.

⁴ Naga ocózinaillaruímo llófueriracomo Pablo llófuiaífirede. Afemona judíuaimona dáarie ínotiaioi. Afe dájerize judíoñedimacimona ja ínotiaioi.

⁵ Jae Macedonia éniemona Silas Timoteo diga dúcíaiaillinoímo, Pablo íe bizáinillai nilla fáicanocaillano, dama Juzíñamui ñúfue jino llóllena íere izire llocana uite. Judíuaina uáfodo daide:

—Jesús omoí úíñogamíe Cristo, —daide.

⁶ Mei íadi judíuaí íéna uáitaoidiaioi. Iemo fiénide uaillai nitádiaioi. Íe jira Pablo íe inícuíro íaioímo faiánote. Afe faiánua

daide: Iai oi íaire finócafue ícoinia afémie ícoiniañedeza, dani íai oi ícoinia.

Pablo íai oina daide:

—Dani omoi ícoinia timáritiomoi. Jae ómoiri nífuenidimedicue. Biruímona judíoñedimacimo llujíticue, —daide.

⁷ Llófueriracomona jino jaillano, Justo maméidimie jofomo jaide. Justo Juzíñamuimo ánozillano caimare úritimie. Afémie jofu llófueriraco abimo ite.

⁸ Afe llófueriraco illaíma Crispo. Afémie naa ie comíniri Ocuíraíma Jesucrístomo ínotiaíoi. Afe llezica aillo Corinto jófuego itino, Pablo lloga ñúfuiaina cacáillano áfemo ínotiaíoi. Ínuamona báutizagaíoi.

⁹ Afe mei Juzíñamui Páblona nícaí anado daide:

—Jacíruiñoeno iri. Mai ñúfue llícaíñoeno lloíri, mei o diga itícueza.

¹⁰ Fiénidifue na bu omo jíritanide. Nai bie jófuego aillo cuemo ínoitinona ite, —daide.

¹¹ Iemona Pablo Coríntomo nai daa fimona átuedo Juzíñamui uaillai comínimo llófullofuede.

¹² Mei íadi Galióna mámeciredimie, Acaya éniemo illáimana illáruido nana judíuai Páblona uáitaocana gairídíaíoi. Iemona íena lláitano, ríimaci uíécomo uítiaíoi.

¹³ Illáimana daidíaíoi:

—Bímie comíni cígido llófuericaide. Jiáifodo Juzíñamuimo ánozilli uaillai llófuecaide. Iemona afe uáillaímo cacáreidiaíoi. Mei íadi afefue caímo ocuica uaillai uáitaocaiide, —daidíaíoi.

¹⁴ Pablo como úrizaidemo, illaíma Galión judíuaina daide:

—¡Judíuai, cue omoi áfedoñoeno iri! Bímie aillo fiénidifue ícoinia íadi, cómena fáfafue izói, come merírinafue izói, ua afémie daí íadi ómoímo cacáreiticue.

¹⁵ Mei íadi fia omoi uáillaído, omoi mámeciaído júfidotiomoi, ómoímo judíuai ocuífuaíai diga. ¡Mai dani jáícina omoi finori! Aféfuíaimo izire jicánoraimana íacañedicue, —daide.

¹⁶ Ie mei afémie nana íai oina jino jicánoracomona orede.

¹⁷ Iemona nana griéguaí Sóstenes maméidimie llaitádiaíoi. Sóstenes llófueriraco illaíma. Iena lláitano, ríillaíma Galión uíécomo íena fáfadíaíoi. Mei íadi Galión afe finócafuiaina raa daíñede.

Pablo Antioquíamo meine jaide dinómona ja dacaiñoámani nane llujíide

¹⁸ Dínó Coríntomo Pablo diga iruillai ite. Ie jáiacanaruimo, ámatiaí íraicaíño íena facádonocaidiaíoi. Afe mei Pablo nocaedo Síria éniemo ruica jáizaide. Águila ie ai Priscila diga Páblori jáizaidiaíoi. Nai Cencrea ígobemona nai jáíñediaíoi, Pablo ie

ifo cuidode. Daií finode, jae ie nauí Juziñamuimo llogáuai fuilla jira.

¹⁹ Ruica jáillano jae Efeso jófuego dúcidiaioi. Dinomo Pablo, Aquila Priscila diga fiénocaillano, llófueriracomo jaide. Afénomo gairide judíuaimo Pablo úrizaide.

²⁰ Afémaci ie íaioi diga are íllena izire jicádiaioi, mei íadi Pablo fairíoñede.

²¹ Iiraicaiño íaioina uáidonocaillano íaioina daide:

—Ja Jerusalemo íacade iráizillafuemo raire jáiacadicue, mei íadi Juziñamui óiacania dáanomo abido ómoína érozai biticue, — daide.

Iemona nocaedo Efésomona oni monáillaido jaide.

²² Cesarea jófuego dúciillano, Pablo arido Jerusalemo jaide, dinomo ite Juziñamuimo gairídino uáidollena. Afe mei oni Antioquíamo jaide.

²³ Diga iruillai dinomo illa meífomo, meine nane nana Galacia jófuego Pablo oni jáizaide, Frigia jofue diga. Naga jófuego dágoberie llófuecade. Daií Pablo nana Juziñamuimo ínotimaci comécina ñue náirecaitate.

Apolos Efésomo ñúefue jino llote

²⁴ Aféruillaido judío ímie, Apólona maméidímie Efésomo dúcizaide. Afémie Alejandría jofue ímie. Afe íima uai jino llúana ñue fibídímie. Afémie Juziñamui Cuegáuaina ñue onode.

²⁵ Ocuíraima Jesucristo llogáuailaina afémie llófuegamie. Aféfuiai jino llúana iere méaicaiñeno caimare llote. Jino uáfodo Jesús ífuiaido llófuerite. Mei íadi dama Juan íaioi báutizafuena onode. Afe izói Juan Jesudo llogáfuena Apolos onode.

²⁶ Apolos llófueriracomo comeci jáicaiñenado úrizaide. Mei jira Priscila Aquila diga Apolos llófueillana cacáillano, ie eneno uitíailinoi, Juziñamui uillai baimo ñue jino jáicina llóllena.

²⁷ Afe mei Apolos Acaya éniemo jáiacade. Iemona ámatiai ie abina jafue oñeno, ñue íena náicaítadiaioi. Daje llezica uícomo rabe afénomo ite ínotinomo cuetíaioi, íaioi afémiena ñue llínollena. Afémie Acáyamo dúciillano, afénomo ite ínotinona ñue canode. Juziñamui jae íaioimo dúecaillano íaioina ínotade.

²⁸ Nana comini eróicana judíuai lloga taino uai Apolos íaioimo cíotate. Afémaci Apolos jamánomo ñue jáicina jóidiuaina jáanonidiaioi. Afémie Juziñamui Cuegáuailaido nii íaioi úiñoga Cristo dámie Jesuna jino íaioimo uáfodo llóteza.

19

¹ Apolos nai Coríntomo illa llezica, Pablo Galacia éniemo jailano, íduai íllado jaide. Jáillano Efeso jófueмо dúcide. Dinomo ite Juziñamuimo ínotimacina cíoizaide.

² Iaiοimo jicánote:

—¿Meita omoi ínuamona Ñuera Joreño úicaigaοmoi? —daide.

Jira afémaci uai otíaioi:

—Afe Ñuera Joreño íllana, jaca due cacáñedicai, —daidíaioi.

³ Mei jira Pablo nane jicánote:

—¿Mei bu mámeçido báutizagaοmoi? —daide.

Jira afémaci uai otíaioi:

—Juan mámeçido báutizagacai, —daidíaioi.

⁴ Jira Pablo íaioina daide:

—Juan lloga báutizainafue comini comécimo ite fiénidifuiαι méiduana jino náiraimo cíotate. Mei íadi Juan meífodo bitímiemo ínorediοmoi ómoina daidicue. Afe bitímie Jesús; afe Jesús Juziñamui Nizécamie Cristo, —daide.

⁵ Aféfuena cacáillano cai Ocuídímie Jesús mámeçido báutizagaiaioi.

⁶ Pablo íaioimo onoi bitamona, Ñuera Joreño íaioimo bite. Iemona afémaci jíáimaci uáillaído úritiaioi. Juziñamuimona oga úrilla uaillai jino llotíaioi.

⁷ Afémaci nibai doce dígamiediaioi.

⁸ Pablo afe llófueriracomo daámani fiui jáicade. Dinomo comeci jáicaiñeno jino íaioimo llófuerite. Juziñamui illáimana illáfuedo izire íaioimo jino llote íaioi ínollena.

⁹ Mei íadi dámierie comeci rairuúllano aféfuena ínoacañede. Comini erócana Juziñamui ñuefuiaido fieni úritiaioi. Iemona Pablo íaioi cígimona oni jíáicomo jaide. Jaillano Pablo afe Juziñamuimo ínotinona jíáie comini llófueracomo uite. Afe llófueraco naama Tiranno. Dinomo Pablo nágaruillaído llófuiaide.

¹⁰ Dai dínomo mena fimona llófuerite. Iemona nana Asia énie nairai Ocuíraima Jesús llogáfuiaimo cacáreidiaioi. Judúuaimona nano diga ímiai ínotiaioi. Afe dájerize judíoñedinomona ínotiaioi.

¹¹ Juziñamui diga áillue cíorainina ráaniai Páblodo finode.

¹² Uiéco dóraroillai Páblomo atídiaioi jinófene jitáraroillai diga. Aféroillai Pablo jétanona iráredimacimo uitíaioi. Afe jetácaroi íaioi llínuamona jíllobicaidiaioi. Daje izói jíáimacimo ite fiénide jóriai oni jáizitiaioi.

¹³ Afe mei macáraini judúuai dárie dúcidiaioi. Afémaci:

—Fiénide jóriaiai cominimona oréredicai, —daidíai. Ja Ocuíraima Jesús mámecido afe fiénide jóriaiai jino oréacadiai. Jiáimacimo ite jóriaiaina daidíai:

—Pablo lloga Jesús mámecido ja birui ómoina jino orédicai, —daidíai.

¹⁴ Afe izói judío ímie Esceva siete diga jitótiai daidíai. Afe Esceva lletáriraini illaíma.

¹⁵ Afémie jitótiai daií dáinamona afe fiénide jóriai íai. Uai ote:

—Cue Jesuna onódicue. Daje izói Páblona onódicue; mei íadi omoi mei ¿búdiomoi? —daide.

¹⁶ Daií daina mei, fiénidena jóriairedimie riire íaioina llaitade. Nana íaioina anáfenuano iere duere íaioina finode. Ja iere jamánomo duere íai. Finóinamona, afécomona émuromaia. Naa boáfiairi jino botádíai.

¹⁷ Nana Efésomo ite comini, judíuai naa judíoñedinori aféfuena fidiillano iere jacíruitiaí. Iemona Ocuíraima Jesús mámecina jamánomoideza daidíai. Afemona aillo ñúefue Jesumo nitádíai.

¹⁸ Aillo áfemo ínotimacimona jai. Íai. Finoca fiénidifuaí uáfodo jino llotíaí.

¹⁹ Daje llezica aillo nauí aiñíniaí uaimo fibídino, íaioimo ite fiénino úrilla rabénicuai átiano nairaí eróicana jobáidiaí. Afe jobáicanicuai comécido facádíai. Jamánomo ráifide izoide, daidíai. “Cincuenta mil úcubetunillaí dieze ráifide,” daidíai.

²⁰ Daií Juzíñamui lloga uaillaí jamánomo oni móonaioicaide. Afedo Juzíñamui ríino jino ciotaioicaide.

²¹ Afe meífodo Macedonia éniemo Acaya énie diga dino comini uáiduallena Pablo mamérite. Afeno comini uáidua meífomo, abido Jerusalemó jái. Zaillena Pablo comécido daide. Afe emódomo daide:

—Jerusalemó cue jaille mei, dinómona Rómamo jáiacadicue, —daide.

²² Mei jira Macedóniamo mena ie canóraíma Timoteo Erasto diga uícodo orede. Mei íadi Pablo nai Asiamento nano nígarui fiévide.

Efésomo fiénidifuedo faillíñeidaí

²³ Aféruillaído Jesús lloga ñúefuaíri aillo fiéni faillíñeidaí.

²⁴ Afe faillíñeinafue Demetrio como fueñe taineca. Afémie aillo ebírede ráaniaí plátamona finóraíma. Juzíñamuina íai. Mamécango Artemisa, nofíci finoina jánarai. Aféngomo gairíracó izói, plátamona ráiracójina finoda, Demetrio fecáfirede. Afedo afémie ie diga táijiraímaci íena aillo úcube otíaí.

²⁵ Iemo Demetrio naa jáie daje izói táijinana fibídinori dánomo gairídiaí. Dinomo íaioina daide:

—Cáimaci, omoi cácarei. Bie cai táijnado ñue ráaredicai, onódiomoi.

²⁶ Mei íadi baie Pablo llócaigafuena cacádiomoiza. Afémie daide: “Comini finoca juziñamuillaina ieñede,” daide. Ie llogáfue mo Pablo aillo comínina ínotade. Daa benó Efésomoñede daí ínotade, mei íadi nana Asia éniédo ínotaacade.

²⁷ Afefue iere jacire cacaide. Afedo cai fecácaiganiaina táinocaitaibite. Daje izói cai áillue juziñamui cai ñainango Artemisa gairíracó jalléinafuena féitaite. Afe izói bie juziñamui ñainango jamánomo ebírenafuena jámairuitaibite. Nana Asia énie naa jíáie éniári aféngomo ánozifrediaioi, —daí Demetrio daide.

²⁸ Aféfuena cacáillano, iere comécido rícaidiaioi. Iemona caillíoicana daidíaioi:

—¡Cai Efeso imaci juziñamui cai ñainango Diana, jaca ninomo záíñeno iri! —daidíaioi.

²⁹ Iemona nana afeno jófuedo aféfuiai iere riire júfidotiaioi. Aillo afeno comini ífo írinote. Afe llezica mena Pablo nabaide íaillinoi llaitádiaioi. Afe íaillinoi mámecei Gayo Aristarco diga; Macedonia ímie íaillinoi. Iaiói llaita mei afémaci nairai uícomo íaioi gairíracómo íaillinoína zocana uitíaioi.

³⁰ Pablo afeco jofomo comínimo úrizaiacade, mei íadi ñúefuena ínotino afe jofó jáillena rairuídiaioi.

³¹ Afe llezica Asia ríimaci Pablo diga caimare úriraini, Pablo afeco jofó jáíñeillena uai íemo oré diaioi.

³² Iaiói gairilla llezica, dárie jíáfodo llotíaioi; jíáimíai jíáfodo jíriocana llotíaioi. Mei aféfuiairi jamánomo fieni faillíñeidiaioi. Ja nabénairai aféfuena onóñediaioi, nífuerei gairírdiaioiza.

³³ Mei íadi gairídino cigimona dámerie jino Alejándromo aféfuiai llotíaioi. Afe Alejándrona judíuai, afeno comini uícomo judíuai abi ríduafuedo úrillena, bai íena naídánetaioi. Bai náidaillano ie ónoído íaioína, “Mai omoi llícaí,” daide.

³⁴ Mei íadi afémie judío ímienana íaioi comécido onónamona, mena hora nana caillíoicana daidíaioi:

—¡Cai Efeso nairai naango Artemisa, jaca ninomo záíñeno iri! —daidíaioi.

³⁵ Iemona afeno jofue jabóllaima ícoína comini llícaítade. Llícaítano íaioína daide:

—Efeso nairai, omoi cácarei. Naga énie náiraiai cai iere jalleide juziñamui ñainango Artemísamo gairíracóna úíñotagamacídicaí, afe cai úíñuafuena onódiaioi. Afe daje izói aféngona mameca monámóna ana baíide jánaraina úíñotagamacídicaíza onódiaioi.

³⁶ Mei bifue buna jaca jáanonideza, mai omoi llícaí. Comeci facáñeno níifueña lloñeno iri.

³⁷ Mei bie omoi atíca íaillínoí, omoi juzíñamui dainango Artemísari fiénidífueña úriñediaillínoí. Aféngona ríicaitañediaillínoí.

³⁸ Demetrio zúucaíllafue níimiemo íadí, mai jicánoraimamo llujíri. Daje izóí afémieri táijiraini zúucaíllafue íadí llujíri. Jaca ríimaci uícomo meine abido óllena afémaci llórediaíoi.

³⁹ Mei jáífodo omoi jicánoiacaniadi, mai ríimaci daina izóí omoi gairíri.

⁴⁰ Ja birui jácifueño baízaidicaíza. Birui omoi finócafue ícoínia, illaíma anáfenuafueña caímo nítaítiaíoi. Bie omoi faíllíñeíafue caímo íaíoi jicánoíadi, íaíoi uai caí ollífue jaca due íñede, —daíde.

⁴¹ Daí daina meífodo, afénoño gairídino oni raínode.

20

Pablo Macedóniamo Grecia díga díne jáíllafue

¹ Afe íaíoi faíllíñeíafue llícaílla meífomo, Pablo Juzíñamuimo ínotino ñue llófuellena jíritade. Daí íaíoi llófuía méífomo íaíoi llínuano íraícaíño uáidonocaíde. Uáidonocaíllano Macedóniamo jáízaíde.

² Nana afénoño itígobíai comíni uáíduaíde. Ie uáíllaído afénoño ite ámatíai náícaítade. Afe mei Pablo ja Grecia éniemo dúcíde.

³ Dínoño daámani fíui llófuete. Dínoño nocaédo Síriamo jáízaidemo, judíuai íena llaitáacanafueña fidíde. Ie jíra arí éníedo Macedóniamo abido jáíllena comeceí facade.

⁴ Dínoño ie nabáídino: Berea ímie Sópater; Tesalónica ímie íaillínoí Aristarco Segundo díga; Derbe ímie íaillínoí Gayo Timoteo díga; jáíe Asia énie íaillínoí Tíquico Trófimo díga.

⁵ Afe bie ámatíai uícomo Troas jófuemo caína uíñuaidiaíoi.

⁶ Fáítara jóneñega pan güílla iráízilla meífomo, Filípomona nocaédo ruica jáídicaí. Ja cinco dígarui íllamona Tróasmo dúcídicai. Dínoño daa semana itícaí.

Pablo Troas comíni uáíduaíde

⁷ Semana nanóídíruido gairídicaí pan dítda fecállena. (Afe pan dítda güíllamona Jesucristo íraícaíño güíllamo úíbicaídicaí.) Güílla mei Pablo Jesumo ínotino llófuete. Afe jítiramo afémie ja jáíacade. Ie jíra úríoidemo ja dááferui ite.

⁸ Caífo jíca ite caífóneco ero ícomo gairídicaí. Afe dínoño aillo unérachecoí bóotatíaioi.

⁹ Dínoño ite daa jítócome, Eutícóna maméídímie. Afémie jíno eróírafomo ráíide. Pablo íere are úríllamona, afe jítócome

jamánomo ínietaide. Icoinia izire íniamona, caifona ana baíide. Afécomo dabaniámani ite. Dinómona ana éniemo baíide. Tíide caifo llínotiaioi.

¹⁰ Mei jira Pablo ana afémiemo jáillano, ie acónimo dújuillano íena menínote. Afe mei ámatiaina daide:

—Cáadeza, omoi jacinaiño, —daide.

¹¹ Daií daina mei Pablo meine caifo jaide. Caifo meine dúcillano, pan ditada güillano nai íaioimo nane úrite. Da úritemo monaide. Monáillamo oni jaide.

¹² Afe baíidimiena ñue caade uitíaioi. Iemona nana comini ñue caimare íficaidiaioi.

Pablo Tróasmona Milétomo jáillafue

¹³ Ie meífomo Pablo Asonmo iodo jáiacade. Ie jira cai jáíimaci nocaedo uícomo Asonmo jáidicai dinomo Pablo otá cai úillena.

¹⁴ Afémiena Asonmo cai báillamona, dinómona cai nocaedo nana Mitilénemo jáidicai.

¹⁵ Dinómona jáillano jítiramoidiruido Quío jofue áinodo jáidicai. Afe jáíruido Samos ígobemo zíjidicai. Dinómona Trogíliomo ocózinaidicai. Afe jáíruido Milétomo dúcidicai.

¹⁶ Pablo Asia éniemo are íacañede. Ie jira Efésomo meine jáíacañede. Mei íadi Pablo raíre Jerusalemo dúciacade, afénomo íacade Pentecostés ráfuenta cíoillena, íadi nibai cíoiñeite.

Pablo Efeso éinamacimo úrillafue

¹⁷ Nai Mileto jófuego cai illa llezica, Efésomo Juzíñamuimo gairíraini éinamací jíritate.

¹⁸ Iaioi dúcinamona Pablo íaioina daide:

—Nano fueñe Asiamo cue dúcinamona cue ífirenana ñue onódiomoi.

¹⁹ Nágaruillaido comeci mánainafuedo éeiafuedo omoi cígiri iticue. Daií cai Ocuíraíma Jesumo táijifiredicue. Afe llezica judíuai íere aillo duere cuena finóacadiaioi. Afedo aillo facátafuaii cuemo nitádiaioi.

²⁰ Mei íadi fáicanocaiño nana ómoimo ñue illífuena llófuefiredicue. Daií uáfodo omoi gairíracomo ómoimo llófueriticue. Daje izói naga omoi jofomo llófuefiredicue.

²¹ Judíuaimo lloticue; daje izói judíoñedinomo lloticue. Nana íaioina daidicue: “Omoi fiénidifuii ñúfuiaina Juzíñamui comeci jitailla izói omoi meídori. Iemona cai Ocuíraíma Jesucrístomo omoi íinori,” daií íaioina daidicue.

²² Mei birui benómona Jerusalemo jáiticue; afénomo cue jaille Juzíñamui Ñuera Joreño cue ocuilla izói. Dinomo cuemo cómitifuenta ónoñedicue.

23 Dama dafue cue comécido onóigafue: nana cue jailla jófuedo Ñuera Joreño cue llavébillifue aillo duere cue finóbillifue diga cuena fidítate.

24 Mei íadi aféfuena due lloñédicue. Ocuíraima Jesús cuemo jónega táijinafuena ñue ícoimo cue fuitáadi cue cáanano cúemona ráifiñede. Afe táijinafue Juziñamui ñue caina izíruillafue comínimo llócadicue. Ua comini áizia izóidinomona cue táijina ícoimo caimare ñue dúcítaiacadicue.

25 ‘Omoi cígido Juziñamui illáimana illafue llócaidicue; mei birui ua onódicueza, ómoimacimona buna cuena meine cíoñeite.

26 Ie jira biruido daiíacadicue, ja ómoimona nífuenidimedicue.

27 Mei jira nana Juziñamui caimo llófuegafuiai ómoimo uáfodo lloticue. Nífuena báinino lloñédicue.

28 Ie jira afe izói dani abi omo rairuiri. (Jae einamácidiomoi za.) Daje izói nana Juziñamuimo gairídina úiñori, mei jira Ñuera Joreño íaioina úiñotade. Ua Ocuíraima Jesumo gairídino úiñotagaomoi. Afe gairídina Jesús dama ie tíllado, ie die tóillamona dama ie comínina meine maiñode.

29 Cue jailla mei jíáimaci Juziñamuimo gairídina jífueridino bíitiaioi. Ua riírede jicóniai ovéjaina fázia izói Juziñamuimo omoi ínogafuena féitatabítiaioi.

30 Daje izói omoi cígiri táinofuiai llóitina iite. Afémaci uáfuena féitajano táinofuiai ómoimo llóitiaioi, ínotino afe uai jeire otátallena.

31 Mei jira abi omoi rairuiri. Naui omoi diga cue illáfue omoi uibíoiri. Dafimonaámani, mona naio diga éebicaillano izire ómoimona nágamiaimo fáicanocaiñeno ómoimo jino lloticue.

32 ‘Mei cue ámatiai, ja birui Juziñamuimo ómoina jóoneiticue, omoi úiñollena. Daje izói Juziñamui caina izíruilla uaimo omoi comeci uibíoillena jítaidicue. Afe uai ómoina nárecaitaite. Afe daje llezica, aféuaido Juziñamui dibénemo ñue rairuícamacina ja itíomoi naa jíáie ie rairuícacaciri. Mei afe rairuícacaci Juziñamuido ñue finócamacidiomoi.

33 Jíáimie mo ite úcubiariri íaioimo ite iníroillairi dama cúeiena jaca úradoiñedicue.

34 Mei íadi jíáifodo, dama cue jitailla raa óllena dama cue ónoido táijidicue. Daje izói cue diga itino íena oticue.

35 Daií omoi táijillena lloticue. Afe izói raana jítaidino omoi canóllena ómoina llófueticue, Ocuíraima Jesús daina uaimo comeci omoi facáocaillena. Afémie daina uai daií daide: “Fia

iga raa llínotimie baimo, fecáfiredimie jamánomo ióbide,” — daide.

³⁶ Daií íaioina daína meífodo, Pablo cañici ana dújuillano Moo Juzíñamuimo nana afémaciri úritiaioi.

³⁷ Iemona nana éenaitiaioi. Afe llezica Páblona meníñuano ñitada cáimadotiaioi.

³⁸ Afe llezica Pablo “Ja meine abido cuena cíõñeitiomoi” daínari iere zúucaidiaioi. Afe mei fei nocaemo íraicaiño íena nabáidiaioi.

21

Pablo Jerusalemo jáillafue

¹ Amatiai fuénocaillano, Cos jófuemo nocaedo jáicina jáidicai. Afe jítiramo Rodas jófuemo jáidicai. Dinómona Pátara jófuemo jáidicai.

² Afe Pátaramo Feníciameo jáiacade nocáe baiticai. Dinómona afécaedo jáidicai.

³ Jaillano, monaillai cigi idu Chíprena jicana ciódicai. Afe éniena jarífezi dibénemo fíianona Siria éniemo jáidicai. Afe cai jáillacaemo Tíromo fielle ráaniai illa jira afégobemo zíjidicai.

⁴ Afégobemo ite Juzíñamuimo ínotinona cióizaidicai. Dinomo siete dígarui íaioi díga iticai. Dinomo Ñuera Joreño llogáiaioi. Ie jira Páblona daidíiaioi:

—Benómona Jerusalemo jáiñeno iri, —daidíiaioi.

⁵ Mei íadi afe siete dígarui illa meífodo jáidicai. Cai jáizailla llezica nana Juzíñamuimo ínotino, íaioi ringóniai naa úruiairi jofue féimo caína nabáidiaioi. Dinomo ite guamáximo ana dújuillano Juzíñamuimo iere úriticai.

⁶ Ie mei meníñota íraicaiño íaioi facádonocaidicai. Daií ñiano nocaemo caífo jáidicai. Afémaci íaioi jófuemo meine jáidiaioi.

⁷ Tíromona biticai Tolemáidamo dúcina. Dinomo ite ámatiai uáidollena darui nabáidicai.

⁸ Afe jítiramo Pablo naa íedo jáidinori dinómona Cesarea jófuemo dúcidicai. Dinomo ite ñúefue llóraíma Felipe jofomo jáidicai. Afémie siete dígamiede güille fecárainimona Juzíñamuimo gairáraco tájiráíma. Dinomo afémie jofomo iticai.

⁹ Afe Felipe jiza nagaámazade. Nai ínindiaioi. Aféngotiai Juzíñamuimona cacana uaillai jino llotíaioi.

¹⁰ Afénomo díga irui iticaimo, uai jino llóraíma Agabo Judéamona cai uáiduaibite.

¹¹ Afémie Pablo ciraigi ife zuitáicaillano dama ie idai onoi díga maiano daide:

—Ñuera Joreño daide: “Jerusalemo judíuai bie ciraigi ife náamana bie izói máite. Maiano íena jicánemacimo fécaitiaioi,” daide, —daií Agabo lluaíbite.

12 Aféfuena cacáillano, Cesarea imaci naa cairi, Pablo Jerusalemo jáiñeillena íemo izire jicádicaí.

13 Mei jira Pablo uai ote:

—¿Nibái cuena zúucaitatiomoi? ¿Minícari éediomoi? Cue íaiói maille baimo comécido mamériticue. Juziñamui jítáiadi Jerusalemo cai Ocuíraíma ícoínia tíiticueza, —daide.

14 Afémie mámiafuena jáanonidicaí. Ie jira afefue fáicanocaillano daidicaí:

—Juziñamui comeci jitailla izói omo íficaiteza, —daidicaí.

15 Afe meífodo, Jerusalemo jáillana finóbidicaí.

16 Cesaréamona dárie Juziñamuimo ínotino caina nabaide. Afémaci cigimona daa Chipre ímie Mnasón ite. Afémie jae diga fimona Juziñamuimo ínote. Afémiemo ite Jerusalemo dúciracomo jáidicaí.

Pablo Sanatiago uáiduafue

17 Jerusalemo dúcidicaímo dinomo ite ámatiaí caimare caina llínotiaíoi.

18 Afe jítiramo Pablo naa cairi Santiago uáiduaidicaí. Daje izói nana illáicomini afénomo itíaiói.

19 Pablo íaiói uáidote. Uáiduano Pablo nana iedo judíoñedinomo Juziñamui finócafuaí jino illa dígafuaí íaióimo llote.

20 Iemona aféfuai na cacáillano Juziñamuimo caimátaíoidiaíoi. Jira Páblona daidíaiói:

—Míi, o llogáfuaí iere ñuera, mei íadi judíuaimona diga mil comini afe ñúefuemo ínotiaíoi ciódioza. Nana afémaci Moisés ocuica uai izói cai íllena iere jítáirede daidíaiói.

21 Mei íadi dáarie o nana jica jíainomo ite judíuaimo llogáfue na lluaíbitiaíoi. Afe íaiói cacánafue daide: “Moisés ocuica uaina jeire omoi oñeno iri.” Afe izói íaiói jítótiaí bacano icoi quetátañedio, daidíaiói. Ie emódomo cai fibíllafuaína finótañedio, daidíaiói.

22 Iemo bifuaína cai dibénedo ¿nie izói llóitio? ¿nie izói ñéiticaí? O billáfuena comini fidíillano ua dáanomo gáiritiaíoi, —daide. Iemo Santiago nai úrillano íena daide:

23 —Cai daináuai jeire o úamona aféuai izói o finolle jítáirede. Cairi benomo ite nagaámamie. Afémiíai uícomo Juziñamuimo nauí íaiói llogáuai fuitácadiaíoi.

24 Bimaci o uíri. Uillano nana omoi comécimo íaifue múiñuafue mai omoi finuairi. O úcubemona omoi ífue cuidótalle íbari. Iemona daní cuidótaitaíoi za. Afe daí o finuamona, benó ite ínote judíuai, o ñue ífirena izói ónoitiaíoi. Moisés ocuífue jeire o úana fidítiaíoi. Daje izói ja ónoitiaíoi nana o rafue benó comínimo jíamaci lluaíbiga táinofuaí.

25 Mei íadi íinote judíoñedinomo jiáifodo jae cueticai. Aillo judíuai finócafuiaimo íaiói jíruiñeillena lloticai. Daa bifue íaioimo lloticai: “Jánarai izóidemo fecaca llíciaina omoi riñeno iri. Díena jiróñeno iri, daje izói cimoina cigínoga rílleniaina riñeno iri. Mai nana jiruífuiaimona abí omoi rairuiri; dama áiredimie ie ai diga illa ñuena,” —dinóride Santiago llogafue fuilla.

Pablo gairíracomo llaitáinafue

26 Ie mei Pablo afe nagaámamie uite; uillano afe jítiramo, íaioi comécimo ite íaifuiái múiñuafue finódiaioi. Afe meífodo jofo Juzíñamuimo gairíracomo jáidiaioi. Dinomo íaioi comécimo ite íaifuiái muiñóilliruillai fuillírui llujídiaioi. Afe daí íaioi llúamona illa dígamierie íaioi raa fia íaioi fecállirui llotíaioi.

27 Afe siete dígarui ja fúiacademo Asia éniemona bite judíuai Páblona Juzíñamuimo gairíracomo cíozai bitiaioi. Iena cíozai billano nana afeno comínina fiene faillíñaitadiaioi. Iemona Pablo llaitádiaioi.

28 Lláitano caillíoidiaioi:

—¡Israel nairai, cai cano! Bímie nágagobiaido nana comínaimo cai nairai uáitaoicana llófuecaide. Daje izói Moisés ocuífafuena uáitaoide. Bie cai Juzíñamuimo gairíracona uáitaoide. Ie emódomo jae mena griego ímie íaillinoi jofo uite. Daí bie Juzíñamuido ñue finócaco ero bácaja bite, —daidiaioi.

29 Naui Pablo afe jófuedo judíoñedimie Trófimo diga nabáirillana íaioi ciónamona daí daidiaioi. Afe Trófimo Efeso ímie. Afémaci comeci facádiaioi, nibai Pablo Trófimona gairíracomo jofo uite, daidiaioi.

30 Iemona nana afeno comini aféfuiai júfidotiaioi; aféfuerei fiene faillíñaidiaioi. Afe llezica nana comini áiziaizi bitiaioi. Billano Pablo llaitádiaioi. Lláitano gairíracomo jinomo zocana íena uitiaioi. Daí ñiano afe llezica gairíracomo náziai íbáidiaioi.

31 Ja íena titáacadiaioimo, soldados igüelli illaima ja afe aillo comini fiene faillíñainana fidide. Daje izói Pablo ja íaioi titáacanafuena fidide.

32 Mei jira afe illaima ie jabóidillaimaiaí naa ie llazírainiri jírrite. Jírillano afe comini illánomo aizícana jáidiaioi. Iemona nana comini llazíraini illaima naa ie llazírainiri bíllana cíóillano, Pablo fáajana fáicanocaidiaioi.

33 Afe mei afe illaima Páblomo áinozide. Ainozillano Pablo llaitádiaioi. Lláitano mena llóejina íena maitátate. Afe mei illaima íena daide:

—O mei ¿búdio? ¿Níifue finódio? —daide.

³⁴ Mei íadi comini jamánomo jáífodo caillíoidiaioi. Jiáimíai jáífodo daidíai. Illaima ifona jamánomo írinote. Jaca jefomo uibíñede, jamánomo íaiói úrioinaza. Jira illaima llazíraini gairíracomo íena uitátate.

³⁵ Afeco caifo jáirabicimo íaiói dúcina llezica, llazíraini Páblona caifodo rocádíaiói, comini íena llaitada íaiói fáiacana jira.

³⁶ Afémie uilla óodana caillícana daidíaiói:
—¡Pablo dama tíideza! —daidíaiói.

Pablo ie abi ríidollifue comini uiécomo llote

³⁷ Afécomo íena uizájidiaioimo, Pablo afe llazíraini illáimamo griego uáillaído jicánote:

—¿Meita comínimo úriredicue? —daide.

Jira aféllaima uai ote:

—¿O griego uai úrillana ónodío?

³⁸ ¿Mei o egipcio ímieñedio? Afémie nauí jiáie illáimana benó jóneacade. Táizicimo cuatro mil come fáraíni uite, —daide.

³⁹ Jira Pablo íena daide:

—Tarso jófuemo jococa judíodicue. Cilicia éniemo ite ñue onórede jofue ímiedicue. Comínimo cue úrilleza cuemo izire cácarei, —daide.

⁴⁰ Iemona afe illaima Páblona fairíote. Iemo Pablo afe caifo jáirabicimo náidaillano comínina ónoído llíicaitade. Íaiói úrioina llíicailamona Pablo afémaci uáillaído íaioimo úrite. (Afémaci úrilla uai ‘hebreo’ daina.) Íaioina daide:

22

¹ —Cai comini naa illáicomini díga, omoi cácarei. Cue abi ríiduafue jino llóiticueza, —daide.

² Hebreo uaido íaioina dánana cacáillano, iere tí daidíaiói. Iemona Pablo íaioina daide:

³ —Cue judíodicue. Cilicia éniemo ite Tarso jófuemo jocócacue. Mei íadi benó Jerusalem comuítagacue. Afe mei Gamaliel llófuegacue. Cai jáiáidígima ocuícafuíai llúana iere áfemo jíéruiticue. Jaca Juzíñamuimo táijnafuemo comeci cue facai izói naa cue rínodo iere járitaifiredicue. Ua ja birui Juzíñamui ocuícafuemo omoi járitailla izói jaiái daí járitaifiredicue.

⁴ Jaiái Jesumo ínotinona daje izói fállena racádicue. Afe dáruido íñíai ringóniáiri llavéracomo llávaiadicue.

⁵ Lletáiraini illaini nauí comini cue llávafuemo uai nabáiraini ítiaioi. Daje izói nana illáicomini rábiai cue fécamo uai nabáiraini. Afe rábiaído Damáscómo ite cai ámatiai judúuai

jénuaidicue. Dinomo ite Jesumo ínnotino jénuaidicue, atida Jerusalemo íaioina duere cue finótallena.

*Pablo íemo ite fiénidifue méidua jino llote
(Hch 9.1-19; 26.12-18)*

⁶ ‘Mei íadi Damasco iodo jáidicuemo, ja jaíciri ítemo afe jófuemo dúciacadicue. Afe llezica monámona jamánomo riire cuemo egáíñoaide.

⁷ Iemona éniemo baiídicue. Afe llezica monámona cuena daina uai cacádicue; aféuai cuena daide: “Saulo, Saulo ¿nibái mei cue racádicue?”

⁸ Mei jira jicánoticue: “¿O mei búdicue?” Jira afémie cuena daide: “Nazaret ímie Jesús dicue. Daa o racácamiedicue,” daide.

⁹ Cuedo jáidino afe egáíñuana cióillano jacínaitiaioi; mei íadi cuemo úrite uaina cacáñediaioi.

¹⁰ Jira íena daidicue: “Ocuíraima, ¿mei ñie izói íiticue?” Jira afémie cuena daide: “Náidacaillano o jailla Damasco jófuemo jai. Dinomo o finóllifuiaina omo llóitiaioi,” daide.

¹¹ Afe riire egáíñua cue ui dúitaga. Ie jira cue nabáíñiai Damáscómo ónoido jainátaoicaigacue.

¹² ‘Afénoimo ite Ananíasna mámeciredimie. Afémie iere Moisés ocuícafuemo ínofirede. Nana Damáscómo ite judúuai ñúefuena íemo nitáfirediaioi.

¹³ Iemo afe Ananías cue uáiduaibite. Billano cuena daide: “Cue ama Saulo, o ui meine nane cíoiteza,” daide. Daií daina llezica meine cue ui ñue cíoide. Afémiena cíódicue.

¹⁴ Mei jira afémie cuena daide: “Cai jáiairagima Moo Juzíñamui nizécamedio. Afémie jaiái ninómona ona nizede íemo o tájillifuiái jino omo llóllena. Ua dama Jesús fuémona ie úrilla uáillaina cácaítio. Afe llezica jaícina ñue finófiredimiena Jesuna cíoitio.

¹⁵ Mei o cacánaíuiai o cíónaíuiai diga nana comini uícomo jino llóitio.

¹⁶ Mei birui ¿minícari jizidío? Náidacaillano o báutizatari. Ocuíraima Jesús mámecimo ñue ínori. Afedo o fiénidifue jae muiñócaza,” dinori Ananías daide.

Pablo Judíoñedínoimo ie orécaíue jino llote

¹⁷ Pablo nai úrite. Iaioina daide:

—Jerusalemo meine cue billa llezica, Juzíñamuimo gairíracomo úrizaidicue. Dinomo nicai anado cíódicue.

¹⁸ Cai Ocuíraima Jesuna cíódicue. Afémie cuena daide:

—Jerusalémona mai raire oni jai. Afémaci cuedo o úrillana jéruíñeitiaioi, —daide.

¹⁹ Jira Ocuíraimana daidicue:

—Nana afémaci omo ínotinona llófueriracomo cue lláitainafuena onódiaioi. Llavéracomo íaioina fácana cue uilláfue mo uibíoidiaioi.

²⁰ Esteban o mámeçido úrite táijitagamie. Afémie tíide die tota llezica afénomo iticue. Aféfuemo “Jii” daidímiedicue. Ie emódomo Esteban fatímie inícuirona oni llíidicue, —daidicue.

²¹ Mei íadi Ocuíraima cuena daide:

—Mai jai. Judíoñedino cigimo jica ona óreiticue, —daide.

Pablo llazíraini illaïma anamo illafue

²² Afe ñinó afeno comini íanori tii daidíaioi. Mei íadi dánomo nane caillíoicana daidíaioi:

—¡Bie ñima dama tíideza! ¡Afémie cáaillinona íñeitel! — daidíaioi.

²³ Nai are caillíoidiaioi. Iere icírillano dani íaioi inícuiruai cúacoidiaioi. Afe llezica eníchomaiaia caifo táinomo júcoidiaioi.

²⁴ Ie jira llazíraini illaïma Páblona íaioi gairíracomo orede. Oriano ñinomo zechénotade ie finócafue jino llóllena, comini riire íemo ñeni caillíoinafuena onóillena.

²⁵ Ja maitá fállena naidánega, íemo Pablo ñinomo ite jabóllaimana daide:

—¿Jicánoñeno romano ímiena fáredíomoi? —daide.

²⁶ Afena cacáillano jabóllaima llazíraini illáimamo llujjide; llujjillano daide:

—Bímiemo o duere finóacanafue o jírícañeno iri; afémie romano ímieza, —daide.

²⁷ Jira afe llazíraini illaïma Páblomo jicánuaibite; daide:

—¿Ua romano ímiedio?

Jira Pablo:

—Ie mei, —daide.

²⁸ Jira afe illaïma daide:

—Aillo cue úcube baílla baimo romano ímiena jáidicue, — daide.

Iemo Pablo daide:

—Cue jaca romano ímiena jocócacue, —daide.

²⁹ Afe daíi ie dáinamona, ie zechénotino afémiemona oni raíidiaioi. Nana afémaci naa aféllaïmaoiri jacínaitiaioi ie íaioi llaitari; afémie romano ímienana íaioi fidínamona.

Pablo judíuai Nahí Ríillaini uícomo naidánetaioi

³⁰ Afe jíáiruido afe llazíraini illaïma Páblomo íaioi jítacafuina ñue jáicina onóiacade. Ie jira lletáriraini illaini naa íaioi ríillainiri dánomo gairítate. Afe mei Pablo llaveina llóeji zúitano íaioi uícomo bai naidánete.

23

¹ Dinomo Pablo Nahí Riillainimo éroicaillano daide:

—Cue ámatiai, cácarei. Jaca birui comeci mánainafuedo Juzíñamui uícori caimare iticue, —daide.

² Ie jira lletáriraini illaíma Ananías Pablo abimo itino fúena putátate.

³ Jira Pablo íena daide:

—¡Afe izóí Juzíñamui ona fátaite! Jae jinóidiuaido ñue úritio, o comeci fiénide íadi. ¿Jadí ráiidio ocuica uai daina izóí cuemo jicánollena? Iemona ¿ñibái mei ocuícáfue uáitano cue fúena putátatio? —daide.

⁴ Iemona afénori itino íena daidíaiói:

—¿Ñibái daíí Juzíñamui caifoide lletáriraimana báíñotio? —daidíaiói.

⁵ Jira Pablo daide:

—Amatiai, afémie caifoide lletáriraima ie íllana onóñedicue. Onódicueza Cuegáuailai daide: “O jofue ríimacina báíñoñoeno iri,” —daide.

⁶ Iemona Pablo Nahí Riillaini cígimo itínona fidide. Afémacimona dáríe fariséuaimo jaináidiaíói. Jáíimaci saducéuaimo jaináidiaíói. Ie jira íaíoi na riire daide:

—Amatiai, cue fariséodicue. Afe emódomo fariseo ímie jítódicue. Ja birui cuemo jicánotiaíói, mei tíidimaci meine abido cáailiruimo cue úíñua jira, —daide.

⁷ Daíí daina meífomo, fariséuai saducéuai diga conímamo jofu afefue riire júfidotiaíói. Iemona afénomo gairídino dázierie bozíetaidiaíói.

⁸ Afe saducéuai tíidinona meine cáañeite daidíaiói. Afe emódomo Juzíñamui abi imácina íñede, daje izóí jóríaiaina íñede daidíaiói. Mei íadi fariséuai nana aféfuiaimo íntotiaíói.

⁹ Nana caillidiaíói. Ie mei dáríe ocuícáuai llófueraini naidáidiaíói. Afémaci fariséuai dibénemo jaináidiaíói. Caifo naidáillano daide:

—Bímie fiénidifuiaina caido llócaíñede. Nibai joreño íemo úrilla; nibai Juzíñamui dibénedo úaitañeíticai, —daidíaiói.

¹⁰ Afe júfiduafue riire anado jaide. Iemo llazíraini illaíma Pablo íaíoi tibéruari jacínaite. Ie jira aféllaíma íaíoi cígimona Páblona llazírainina oni uitátate. Uillano meine íaíoi gairíracomo íena orétate.

¹¹ Afe jáíie naio Ocuíraíma Jesús Páblomo cíocaillano daide:

—Pablo, jacíruiñoeno, abi mame. Benó Jerusalemo cuedo o úrilla izóí, daje izóí Rómamo úrizaitio, —daide.

Pablo fállena mámiafue

12 Afe jíáiruido judúuaimona dáarie Pablo fállena maméritiaioi. Dani íaioi abi faidódiaioi. Jira fiénide uáillaído daidíaioi:

—Páblona nai cai fáñeille dino güññeiticai, jíroñeiticai, — daidíaioi.

13 Afe daíí úritimíiai cuarenta baimo jaide.

14 Iemona afémaci lletáriraini illáinimo naa judúuai éinamaciri jáidiaioi. Dinomo daíízaidiaioi:

—Dani cai abi fiéni daináfuedo faidódicai. Pablo cai fáñeille dino güññeiticai, jíroñeiticai.

15 Mai omoi naa jíáie Nahí Ríillainiri llaizíraini illáimamo Pablo uire jiti atíllifue jica. Fia daíí íemo lloíri, meine nane íemo itífue izire omoi jicánollena. Afémie nai dúciñeite, afe atica llaítada íena títaíticai, —daidíaioi.

16 Mei íadi Pablo comoma afe Páblona íaioi fáiacanafuena fidízaibite. Iemona afémie llaizíraini gairíracomo Páblona llúájide.

17 Mei jira Pablo jabóllaíma jíirillano daide:

—Bie jitócome llaizíraini illáimamo úi. Afémiemo llolífuena íteza, —daide.

18 Afe jabóllaíma íena uillano, llaizíraini illáimana daide:

—Afe llaveca Pablo cue jíirillano bie jitócome benó cue atíllena jicade, afémiemo da llolífuena íteza, —daide.

19 Afe llaizíraini illaíma afémie ónoído oni eneno jicánollena uite; daide:

—¿Níifue cuemo llóiacadio? —daide.

20 Jira afémie daide:

—Judúuai jae nana dáfuerrillano meine comeci facádiaioi. Uire jiti Pablo Nahí Ríillaini uícomo meine o atítallifue jícaítiaioi, meine íemo izire íaioi jicánollena.

21 Mei íadi íaioi jicállifuemo ínoñeno iri. Afémacimona cuarenta baimo dígamie báinino Pablo fállena jónetiaioi. Afe fáiacadino dani íaioi abi faidódiaioi. “Pablo nai cai fáñeille dino, güññeiticai; daje izói jíroñeiticai,” daidíaioi. Ja birui afémie fállena ñue finóbidiaioi. Mei íadi o uai ollífuemo nai úiñoídiaioi, —daide.

22 Iemona afe llaizíraini illaíma afe jitócomena:

—Mai o jairi, —daide. Afe íemo ie llúaíbigafuena jíáimacimo “Lloñeno iri,” daide.

Caifóidillaíma Félixmo Páblona orédiaioi

23 Mei jira afe llaizíraini illaíma mena jabóidillaíma uáídote. Uáiduano íaillinoína daide:

—Mai doscientos diga llaizíraini mácaítinona finóbitari. Afe llezica setenta dígamie cabállodo jáítinona finóbitari. Afe

emódomo doscientos dígamie zídaiairi jáitinona finóbitari. Nana afémaci nauilla baido Cesaréamo jáitiaioi, —daide.

²⁴ Afe llezica Pablo jaille cabállona finóbitade. Daje llezica Pablo ñue fañeno cáanori caifóidillaíma Félixmo uitátate.

²⁵ Afémacido cuegabe orede. Afe cuegabe daide:

²⁶ “Cue Claudio Lisias mamécacue. Jamánomo cáimafuerede caifóidillaíma Félix, o uáidotícue.

²⁷ Judíuai bímie lláitano duere finótaacadiaioi. Iena fáiacadiaioi. Mei je romano ímie íllana cue fidínamona cue llaiízirainido íena riiduaidícue.

²⁸ Iemo íaioi jítácafueña onócadícue. Ie jira judío Ríillaini uícomo íena uitátaticue.

²⁹ Ie mei aillo íemo júfidogafue záilla meífomo íemo nífuena baiñédícue. Dani íaioimo ocuica uai ie jeire ie oñena íemo nitádíaoi. Mei íadi ie cue fallífuena íñede. Daje izóí ie cue llavéllífuena íñede.

³⁰ Dani afémie íaioi nane fáiacanafueña cue fidínamona, íena omo orédícue. Afe llezica nana íemo fiénidífuiaí nitádinona daidícue: Mai Páblomo nífue o nitáadi caifóidillaíma Félix uícomo o daiízairi. Mai, jae ñíe.”

³¹ Mei jira nana llaiíziraini íaioi illaíma ocuilla izóí Pablo uitíaioi. Afe naio Antípatris jófuemo íena uitíaioi.

³² Afe jítiramo eíbado jaide llaiíziraini meine íaioi iníracomo bitíaioi. Ie mei cabállodo jáidino Páblooiri nai Cesaréamo jáidiaioi.

³³ Dínomo afe Cesaréamo dúcillano, afémaci uiga cuegabe caifóidillaímamo izájidiaioi. Daje izóí Pablo íemo fecádiaioi.

³⁴ Afebe facádua meífodo, caifóidillaíma jicánote:

—¿O nino ímiedio?

Pablo uai ote:

—Cilicia énie ímiedícue, —daide.

³⁵ Ie jira íena daide:

—Omo fiénidífuena nitáдино bíadi ona cácaítícue, —daide.

Afe mei Félix Páblona Herodes illaíma illaco áillocomo rairuítatinona uitátate, afécomo íena íaioi ñue rairuíllena.

24

Félix uícomo Pablo abi riiduafue

¹ Jubécuiro dígarui illa meífodo lletáriraini illaíma Ananías Cesaréamo bite. Afémiedo dárie éinamaci bitíaioi. Dáruido, caifóidillaíma uícomo raire úritímie bite. Afémie mámece Tértulo. Nana afémaci caifóidillaíma Félix uícomo Páblomo jítácafuiái nítabitíaioi.

² Pablo íaioi átia llezica, Tértulo íemo jíidífué riire nítade. Félixna daide:

—Cai izíruga caifóidillaíma, ori ióbiacadicaí. Ñue záillafue caimo ite; íemo caimare llícaillafuemo iticaí. O fibíllafuedo nana ñue ocuícacaí.

³ Nana bífuiari nágagobiaído ióbioídicaí. Félix o iere jamánomo figomiedio.

⁴ Mei íadi are o cue áfedoñeilleza cai úrillamo o cacáreillena omo izire jicádicue.

⁵ Bímie fiénide duico billa izói bíllana ciódicaí. Naga éniiaído llócaide judíuai oni énenorie bozíetaillena. Afémie Nazaret ímie Jesumo ínotino ifódimie.

⁶ Icoimo cai Juzíñamuimo gairíraco ero bácajide. Ie llaitádicai ñue afémiemo cai ocuina uai daina izói jicánollena.

⁷ Mei íadi llazíraini illaíma Lisias aféfuemona caina rairuide. Iemona cai anámona íena ríifuedo oni baírode.

⁸ Afe emódomo caina daide: “Bie cómemo bífue jítádino odo bírediaíoi.” Dama o afémiemo jicánorena, nana íemo cai jítácafue uáfueíteza. Daíí áfena uáfueña onóitio, —daide.

⁹ Afénomo jaide judíuai nana aféfuiaína uáfuiái daidíaíoi.

¹⁰ Jira Pablo úrillena caifóidillaíma ónoído llote. Jira Pablo daide:

—O uícori cue abi ríiduafue jino caimare llóiticue. Jiaí digá fimona bie nairai o jicánoraímana o íllana onódicueza.

¹¹ Ja doce dígarui íllamona Jerusalemo Juzíñamuimo ánozillano íemo caimare úrillena dúcidicue. Aféfuena dama o jicánorena, ñue o ónoillena.

¹² Bumo riire cue úrillana cacáñediaíoi. Daje izói Juzíñamui gairíracomo comínina fiéni faillíñaitañedicue. Iemo jíái Juzíñamui llófueriracomo daje izói júfidogafuiái finótañedicue. Daje izói nairai jófuedo nífuena lloñedicue.

¹³ Nana bimaci cuena nitácafuiaina bu áfena uafue daínina.

¹⁴ Mei íadi dafue jino llóiticue. Judíuai fiéni mameca fiénidiodo jáidicue. Afe como Jesús lloga iodo cue jáillamona cai uzútiaí Moo Juzíñamuimo tájidicue. Mei nana cuega ocuica uáillaina ínoticueza. Afe daje izói nana uai jino lloraini Cuegánicuaimo ite uáillaina ínoticue.

¹⁵ Iaíoi Juzíñamuimo úñoinafue daide: “Tíidino ñuemaci fiénidimaci díga meine abído cáaitiaíoi.”

¹⁶ Ie jira Juzíñamui uíecomo nífuenidimíena cue íllena jaca nágarui cue comeci ñue finófiredicue. Afe izói comíni uícomo nífuenidimíena íacadicue.

¹⁷ ‘Ja díga fimona jíáinuiaimo cue maca meífomo, meine cue éniemo Juzíñamuimo fia fecaca úcube izáibiticue. Afe izói dúeredimacimo dúecaillano úcubena fécaibiticue.

¹⁸ Afe daíí cue fecá llezica, cue comécimo ite íaífuiaí cue múñuafuemo nícidoticue. Daíí cue comeci nícidua meífodo afe

³ Jerusalemo abido Pablo oréllena izire jicádiaioi. Pablo io anamo íaioi fallífuena maméritiaioi.

⁴ Mei íadi Festo íaioi uaimo daide: Pablo nai Cesaréamo llaveca. Nano íanori íllamona afénomo nane jáitícué.”

⁵ Jira íaioina daide:

—Íe jira omoi cígiri ite ríimaci mai cuedo Cesaréamo jairi. Afémiemo nífue íadi dinomo íemo nítajirediomoi, —daide.

⁶ Festo afe Jerusalemo nano ocho níbai diez dígarui illa meífodo meine Cesaréamo bite. Afe jíáíruido ie ríire jicánoranomo ráinazaide. Páblona atítate.

⁷ Pablo afénomo jofo jáidemo, Jerusalémona como dúcide judíuai íemo áinozidiaioi. Áinozillano aillo fiénide ráfuiái íemo nitádiaioi. Mei íadi aféfuiáimo ínollífuena íñede.

⁸ Mei jira Pablo ie abi ríiduafuena daide:

—Cue nie fiénidífuena finóñedicue. Judíuai ocuífufuiái uáitaoíñedicue. Iaioi gairíraco ero bácañedicue. Daje izói romano caifóidíllaima uáillaina uáitaoíñedicue, —daide.

⁹ Mei íadi Festo judíuai cígiri ñue íacade. Jira Páblomo jicánote:

—¿Jerusalemo abido jáiacadio omoi nitácafuiái dinomo cue jicánolleza? —daide.

¹⁰ Jira Pablo uai ote:

—Ja birui romano illaima uícomo náidadicue. Ja benomo cuemo nitácafuiái jicánorede. Mei judíuáimo nífuenidimíedicueza ñue onódio.

¹¹ Cue títaite fiénidífue cuemo íadi, áfemona abi jáanoñeíticué, mei íadi nana cuemo íaioi nitácafuiái táínofue íadi, buna íaioímo cuena ríífuedo izájinide. Dama romano jamánomo ocuídíllaima cuemo jícano daidícué, —daide.

¹² Iemo ie fidítatimíaimo úrilla meífomo, Festo daide:

—Mei “Jamánomo ocuídíllaima cuemo jícano” daidíoza, ie jira afe jamánomo ocuídíllaimamo ona óreitícué, —daide.

Pablo illaima Agripa uícomo illafue

¹³ Diga irui illa meífomo illaima Agripa ie ai Berenice diga Cesaréamo Festo uáiduaide.

¹⁴ Afénomo diga irui itíaillinoimona, Festo Pablo rafue Agrípamo llote. Iena daide:

—Félix fiénocaiga llavécamié nai benomo ite.

¹⁵ Naui Jerusalemo cue jailla llezica, lletáriraini illaini, naa judíuai éicomíniri íemo íaioi nitácafuiái cuemo llotíaioi. Ie duere cue finótallena cuemo jicádiaioi.

¹⁶ Jira íaioi uai otícué. Iaioina daidícué: Romano ríimaci íaioi fibilla izói, afefue nitádimíe íemo nitácamié uícomo conímamo jofo eróicana nai úríñenia, nitácamiéna fañédiaioi. Afe daí táínofue nitácamié ie abi ríiduafuena finórede.

17 Ie jira afémaci benomo billa llezica, raire afe jáiruido cue jicánoranomo ráinazaidicue. Ráinazaillano afe cómena atítaticue.

18 Mei íadi afémiemo nitádino cue comeci daina izói nitáñediaioi.

19 Daa íemo íaioi nitácafue fia íaioi íinogafuiaimo jaináidifue. Daje izói da Jesudo úritiaioi. Afémiena tíide daidíaiioi; mei íadi Pablo “Caade” daide.

20 Mei aféfuena onóñedicueza. Nie izói aféfuena níbaíticue, daidicue. Jira Páblomo jicánoticue: ¿Jerusalemo meine jáiacadio dinomo omo nitácafuaiai ñue jicánollena?

21 Mei íadi afémie jamánomo ocuídillaíma Augusto íemo jicánollena jicade. Ie jira nai íena zuitáñedicue. Iena rairuídicue jáiruido afe caifóidillaímamo ie cue oréllena, —daide.

22 Jira Agripa Féstona daide:

—Cue jái daje izói afe íima uaimo cacáreacadicue, —daide.

Jira Festo uai ote:

—Uire jiti cácaítio, —daide.

23 Afe jítiramo, Agripa Berenice diga dúcillano, áillue gairíraco nana jofo jáidiaioi, naa llazíraini illáiniri, naa jofue ríimaciri. Ua aillo ebire finóbillano jofo jáidiaioi. Dinomo Festo Pablo jírítate.

24 Afe mei Festo illaíma Agrípana daide:

—Illaíma Agripa, nana cairi benó gairídinori, omoi cácarei. Bímiemo omoi eroi. Aillo judíuai afémiedo cuemo úritiaioi. Benó Cesaréamo cuemo úritiaioi; daje izói Jerusalemo izire cuemo jicádiaioi. Jaca fáinocaiñeno ie titácanafuena cuemo llotíaioi.

25 Mei íadi afémiemo comeci facádicue, íadi ie cue titállifuena íñede. Mei caifóidillaíma Augusto íemo jicánollena dama jicade. Jira afémiemo íena oréllena mamédicue.

26 Mei caifóidillaímamo afémie rafue cue cuellífuena íñede, ¿níífue mei cúeiticue? Ie jira, Agripa, bímie o uíécomo atídicue íemo omoi jicánollena. Afedo caifóidillaímamo cue cuellífuena ónoíticue.

27 Mei cue comeci daide: Da llavécamie cue oréadi, íemo íaioi nitácafueña ónoñenia, níbai afefue táinofue, —daide.

26

Illaíma Agripa uícori Pablo abí ríiduaí fue llote

1 Jira afe Agripa Páblona daide:

—O dama o abí ríiduaí fueña llórena, —daide.

Iemona Pablo como fueñe íaioímo úrite; daide:

2 —Illaïma Agripa, cue abi ríidollifue o uícomo cue llólleri íóbídícue. Nana judíuai cuemo nitaca táínofuíai jino jaícina llóítícue.

3 Nana judíuai fibíllafuíaina ñue onódioza. Daje izói conímamo cai úrillafuena onódio. Aferi iere íóbídícue. Ie jira fíaicana cue úrillamo o cacáreillena jicádícue.

Pablo íemo itífue méiduafue uícomo finócafúiai

4 ‘Nai cue úruenamona dama cue éniemo, daje izói Jerusalemo íaíoi cígiri nana judíuai cue illáfúena onódiaíoi.

5 Daje izói cue jítócomenanomona fariseo ímiena cue íllana onódiaíoi. Afémaci jitaia aféfuena jino llóredícue. Cai ínogafuíaimo afe fariséuai jamánomo riire jaináidino.

6 Iaíoi ínogafue izói Juzíñamui tíidino meine abido cáatallífúemo ínotícue. Juzíñamui daje afe cáallífue cai jáiairagímamo llote. Afefue ícoínia birui bie jicánollífúemo cuena atídiaíoi.

7 Cai Israel doce nairai afe uícomo llogáuui fuizájillinomo úiñoidiaíoi. Ie jira mona naio diga Juzíñamuimo ánozillano caimare úritiaíoi. Afe izói íemo táijidiaíoi. Illaïma Agripa, afe bie daje úiñogafue ícoínia, judíuai fiénidífuiai birui cuemo nitádiaíoi.

8 ¿Nibái mei daíí comeci facádiomoi? ¿Nibái mei afe Juzíñamui tíidino meine abido cáatallífúemo buna ínonide, daidíomoi?

Pablo nauí Jesucrístomo ínotino rácafue

9 ‘Nazaret ímie Jesús mámecimo jaináidino duere cue finótallena, nauí aféfuemo comeci facáoidícue.

10 Iemona Jerusalem imácina duere finótaticue. Lletáriraini illaini ríibiaído aillo Jesumo ínotinona llavéracomo íbaicotadícue. Comini afe llavécamací titáacana llezica aféfuena fairíoticue.

11 Diga icaiño íaíoina duere finódícue, íaíoi ínogafue féitallena. Afe duere finótáfue naga llófueriracuaido daíí finódícue. Afe ínotinona jamánomo fiéniruidícue. Ie jira afémacina onínemaci jófuemo racádícue.

*Pablo íemo itífue méidoinafue nane llote
(Hch 9.1-19; 22.6-16)*

12 ‘Bie daíí comeci mamérillafuedo Damasco jófuemo jáidícue. Lletáriraini illaini ríibiaído comini llaitállena orécacue.

13 Mei íadi jaíciri ia iodo jáidícuemo, jamánomo monámona riire cuemo egáiñoacide. Afe egáiñua jítoma egáiñua baimo meáirede. Cue abimo egáiñoacide naa cuedo jáidinori.

14 Iemona nana éniemo baídicaí. Hebreo uáillaído monámona cuena daínana cacádícue; cuena daide: “Saulo, Saulo, ¿nibái mei cue racádí? O dama o abi fiéni finódío. Aillue juráreto jíúrainomo ite jáirede razi. Afe rázimo juráreto záitacailla jilla izóí, afe izóí dama abi daí finódío” daide.

15 Jira uai oticue: “Ocuíraíma, ¿mei o búdí?” Jira aféme cuena daide: “O racácamie Jesúsícue.

16 Mai náidacaillano macácana jai. Jae cuedo o táijillena omo cíocaidícue. Afemona birui o ciónafuemo uai nabáiraímana ítío. Ie meífomo jíáíruido jíáífuiaí omo ácataíticue. Aféfuiaímo nane uai nabáiraímana ítío.

17 Ja júdíuaimona jíáie jícáneziemo ona orédícue. Dinomo ona lláitaitiaíoi íadí ona jíllotaiticue.

18 Dinó afeno imácimo ona orédícue, íaíoi comeci o zuitállena. Afemona, jítifodo íaíoi macáñeno úzefodo íaíoi macállena o orédícue. Daje izóí nana íaíoiimo ona orédícue Taife íaíoi náamatañellena, mei íadí Juzíñamui dibéfomo íaíoi jaináillena. Afe izóí íaíoiimo ona orédícue cuemo íaíoi ínollena. Iemona íaíoiimo ite fiénidífuiaí dóficaite. Afe fiénidífuiaína dóficaidino íaíoi feci raa máíñoítiaíoi naa jíáie Juzíñamui ñue finócamaciri,” daí Jesús cue ocuide.

Nicaí anado Jesús íemo ocuícuaí Pablo jeire ote

19 ‘Mei jira, illaíma Agripa, monámona cue cacánafluena jámairuíñedicue; mei íadí áfena jeire uano fueñe Damasco imácimo afe úrilla uai jino lloticue.

20 Afe meífomo Jerusalén comínimo daje izóí nana judea éniédo llócaidícue. Afe izóí jíái júdíñoñedinomo llócaidícue. Nana íaíoiimo itífuiaí íaíoi meídollena riire lloticue. Iemona Juzíñamui dibénemo íaíoi íficaillena íaíoi llófueticue. Ñúefuíaído íaíoi macállena lloticue íaíoiimo ite meídogafue jino ácatallena.

21 Afe bífuiaí cue llua ícoínia, júdíuaí Juzíñamuimo gairíracomo cuena llaitada fáiacadaíoi.

22 Mei íadí Juzíñamui cue cánuado nai biruimo ñue jáicadicue. Naga cómemo, illáicomíni naa jamai comíniri Juzíñamuido úricaidícue. Moisés llua izóí lloticue. Jaiái uai jino llóraini llua izóí llófueticue. Nana íaíoi lloga caímo ífcaitífuiaí jino lloticue.

23 Jaiái ninomo uícomo llotíaíoi: “Cristo duere finólleza,” daídíaíoi. “Afe meífomo tíite; tíillano meine abído cáate. Afe daí fueñe tíidímiemona meine abído cáaitimíena maméllimíeite.” Daí aféfluena daídíaíoi. Afe emódomo jíáífue daide: “Cristo cáaillemona, comíni jíllóillíufue jino llóite. Ua caí náiraímo llóite. Daje izóí jíáie náiraíaina fidítaite,” —díno Pablo úrite.

Pablo Agripa Jesucristo dibénemo jaináillena llote

24 Daií Pablo afe abi ríiduafue llua llezica, Festo caillíoicana daide:

—¡Pablo, o uáiritaidio! Aillo rábiai o facáduamona o ifoci uáiritaide, —daide.

25 Jira Pablo uai ote:

—Fígomie Festo, cue uáiricoiñedicue. Mei jáífodo cue daináuai ñue comécido facádorede. Aféfuiai uafue.

26 Benori illaíma Agripa ite, bífuiaína ñue onódimie. Ie jira comeci mánainafuedo afémie uíecori úriticue. Afémie nana bífuiaína ie onónana ñue onódicue. Afémie nana bífuiai báinino izúgumo lloñégaza onode.

27 Illaíma Agripa, ¿uai jino llóraini llogáuaimo ínotio? O ínuana onódicue, —daide Pablo.

28 Jira Agripa daide:

—¿Jesucrístomo afe dibénemo cue jaináillena raire cuena ífcaitaacadio? —daide.

29 Jira Pablo íena daide:

—Raire Crístomo jaináidimiena o ífcaiaidi, o are íllamona Crístomo jaináidimiena o ífcaiaidi, nai birui Juzíñamui uailai ñue jeire o ollifue jicádicue. Afe izói dama óieñedeza mei íadi cue Jesucrístomo ínuua izói nana cue úrillamo cacáreidino Crístomo ñue ínotinona jitáidicue. Mei íadi llójeina cue máina izói ómoína maitátaacañedicue, —daide.

30 Pablo aféfuiai llua meífomo, illaíma Agripa caifo náidacaide, afe caifóidillaíma Festo diga. Afe llezica ie ai Berenice nana dinó ráiedino diga caifo náidacaidiaioi.

31 Náidacaillano bai eneno jáidiaioi aféfuiaido úrillena. Dinomo jofo conímana daidíaioi:

—Baie cómemo ie titállifuenta íñede. Daje izói llavéracomo ie llavéillinona íñede, —daidíaioi.

32 Jira Agripa Féstona daide:

—Bímie nauí jamánomo ocuídillaíma íemo jicánollena jicáñeniadi ja birui zuitárede, mei íadi báillaimamo jicádeza zuitánide, —daide.

27

Pablo Rómamo oréinafue

1 Pablo Itáliamo oréillifue mo maméritiaioi. Iemona Pablo naa jáie llavécamiari jabóidillaíma Júliomo izájidiaioi. Afémie Augusto llazíraini igüéllimo jainaide.

2 Iemona Adramitio ígobemona áillue nocaedo jáizaidicai. Afecae nana Asia énie ígobiaido zójicana ja jáizaide. Daje llezica Tesalónica ímie Aristarco caido jaide. Tesalónica Macedonia énie jofue.

3 Afe jítiramoidiruido Sidón ígobemo dúcidicai. Afégobemo Julio iere caimare Páblomo úrite. Iemona Páblona rairuíñeno

ie onóigamiiaina uáiduajitade. Afe daií ie onóigamiiaina Pablo jitaica raana fecárediaioi.

⁴ Sidón ígobemona jáidicai. Jaillano monáillai cigi idu Chipre jarífezimo fiéicaidicai, mei jairifo jáífodo cai ñuitáocaillamona.

⁵ Dinómona Cilicia énie áinodo Panfilia énie diga baído monaillai cigido jaitádicai. Afe mei Licia éniemo ite Mira ígobemo zíjidicai.

⁶ Dinomo llaizíraini illaíma Alejandríamona bite, Itáliamo jáizaide áillue nocaena cíozaide. Afécaemo afémie caína nana jofo orede, afénomona afécaedo cai jáillena.

⁷ Dinómona diga irui fíaicana juare jáidicai. Icoímo Gnido jofue féifenemo dúcidicai. Mei jairifo nai jáífodo oni cai ñuitáocaillamona monaillai cigi idu Salmón féifenedo jáidicai. Ie jira monaillai cigi idu Creta onido nefícana jáidicai.

⁸ Afe monaillai fue áinodo fíaicana juare jáidicai. Icoímo Buenos Puertos mámeciredinomo dúcidicai. Afégobe Lases jofue áinori ite.

⁹ Jae diga iruillaí fia fíaicana jáidicai. Iemo ja uáicimo áinozidicai. Iemona monaillai cigido cai jaitalle jamánomo jacírede. Ie jira Pablo íaioína izire llote;

¹⁰ daide:

—Cuemo úrillamo omoí cácarei. Bie cai ruica cai jaille onódicueza iere jacíreite. Cai uiga ráaniai niné táinocaite. Cai jaille nocáe daje izóí táinocaite. Daje izóí cai nibai coróbaizaiticai, —daide.

¹¹ Mei íadi llaizíraini illaíma nocáe naama jáiacanafue Pablo daínafue baimo jeire ote. Daje izóí afecae illaíma daína uai llaizíraini illaíma jeire ote.

¹² Afégobe uáiciai úiñollena figo jínoinede. Ie jira nana comécido daidíaioi: “Nibai Fenice ígobemo jáidicaina figura izoide,” daidíaioi. Afégobe Creta énie mona icoí dibénemo ite. “Afe dinomo uáici záillena úiñoiticai,” daidíaioi.

Monáillaimo jamánomo riírede jairifo noci diga jáiñuafue

¹³ Afe jáíruido mona áttue dinena jairifo fíaicana fúuoide. Jira áfemo ínotiaioi ruica íaioi jáitallena. Afemona jáizaidicai. Afe Creta énie áinodo jáidicai.

¹⁴ Mei íadi due afe meífodo riírede jairifo cai jailla nocáe riire ñúitaibite. Ua afecae riire aiñóicaide.

¹⁵ Mei cai jáiacananomo jáinina jira, “Dama jairifo niné uigacai,” daidíaioi.

16 Iemona duera monaillai cigi idu Clauda jinófenedo jáidicai. Dinomo jairifo caina riire fúuoifñede. Ie jira cai abido uiga dúecae, fíaicana juare caifo bitádicai.

17 Dúecae bita meífomo, áillocae jéerie ñécigaído riire jofo mozidicai. Afe mei guamáeaimo íaioi bíjizai dáii jacíruiítiaioi. Afe guamáeai mámecei Sirte. Afe jágiedo íaioi ñuite vela daina áillue iniroi ana zúicoidiaioi, cai nocáe fia jairifo fíaicana úillena.

18 Afe jáíruido afe jairifo riire jaiñode. Ie jira íaioi uiga ráaie como fueñe afécaemona monáillaimo dócoidiaioi.

19 Ja daruiámami íllamo nocáe ero táijina ráaniai dani cai ónoído monáillaimo fádoidicai.

20 Aféruillaído diga irui jitoma naa úcuai diga cióñena. Dinomo afe riirede jairifo llavécamiiai izói duere cai finode. Iemona nana jílloillena cai comécinafuiai niné táinocaide.

21 Ja diga iruillai güiñeno iticai. Ie jira Pablo íaioi cigimo naidáillano daide:

—Nana omoi cácarei. Naui Crétamona jáiñeíticai cue daina uaina jeire oñédiomoi. Afe cue daina uaina ñue ínotiomoinia bie izói duere zefuífñedicai. Daje izói nana cai atica ráaniai niné táinocaiñede.

22 Mei íadi, birui omoi jacíruiñeno iri. Bie nocaena niné táinocaite mei íadi ómoimona buna tíñeite.

23 Mei ja naio Juziñamui oreca ie abi ímie cuemo daízaibite. Afe Juziñamuimo jaináidimiedicue. Afe izói íemo tájidimiedicue.

24 Afe oreca abi ímie cuena daide: “Pablo, jacínaiñeno iri. Romano jamánomo ocuídillaíma uícomo náidazaitioza. Ie jira o illa ícoínia nana nocaedo odo jáidinona Juziñamui tíllinomona jílloítaite.” Dinó Juziñamui oreca ie abi ímie cuena daide.

25 Ie jira abí omoi mameri. Juziñamui uaimo ínoticueza. Ie oreca ie abi ímie cuena daina izói bie cai duere zefuíllafuemona ñue jino jáiticaíza. Afe bífuena ñue onódicue.

26 Mei íadi benómona daa monaillai cigi ídumo jairifo caina nétaite, —daide Pablo.

27 Mena semana cai jailla meífodo daa naio Adria monaillai cai illa llezica, riirede jairifo meine abido caina úioicaide. Iemo dáaferui illa llezica, marinéruai éniemo cai ánozillana comécido onódiaioi.

28 Jira nié dinó afórede dainano facádiaioi. Facádiaioimo treinta y seis metros afórede. Nane afe baímo dánomo facádiaioi. Ja veintisiete metros afórede.

29 Noíciáimo íaioi ñáijizaillana jacíruillano moi dibécaemona cuatro diga nocáe cuinara lloéloici monaillai anamo

dotádiaioi. Afe mei comeci jacíruiocana mona monaille úiñotiaioi.

³⁰ Afe llezica afecae marinéruai “Bie áillocæmona mai cai botalli” dani conímana daidiaioi. Afe daií íaioi botácanamona emódomo bitaca dúecæ ana jáinoimo agüñetiaioi. Afe llezica jáímacina jífueacana daidiaioi: “Bie dúecaedo áillocæ ifo dibécaemo jáíe cuinara lloéloici dótaiticai,” daidiaioi. Daií afe nocæ ana agüñiado jífuercadiaioi.

³¹ Mei jira Pablo llaizíraini illáimamo naa ie llaizírainiri llano daide:

—Baimaci bie nocaemo fiébiñeno botáadi ómoimona buna jílloneilleza, —daide.

³² Ie jira llaizíraini dúecæ agüina ñécigai jaitádiaioi, afecæ illemo baíllena.

³³ Afe monáidemo Pablo íaioina daide:

—Mai omoi güiri. Ja mena semana güiñédiomoiza; iníñédiomo.

³⁴ Izire ómoína güitátaticue. Afe omoi güille jitáirede ñue omoi jílloullena. Uafue ómoimona buna córobaiñeite. Daje izói omoi abímona mínícana due jiza báiiñeite.

³⁵ Daií daínano, Pablo daa pan línuano nana comini eróicana Juzíñamuina “Iere figura” daide. Daií ñiano afe pan ditade güite.

³⁶ Afemona nana náreficaidiaioi. Afe daje llezica jáino güitíaioi.

³⁷ Afe áillocæmo doscientos setenta y seis dígamiedicai.

³⁸ Ja íaioi güíacaga güille güilla meífodo, fiébide trigo illemo dotádiaioi, afecæ féecocaillena.

Afecæ buíllafue

³⁹ Jae monáidemo, afe éniena onóñediaioi, mei íadi guamai díga ñue itízuguaina ciódiaioi. Onóñegaza afénomo íaioi zíjizaillena maméritiaioi.

⁴⁰ Iemona afecæ cuinaina lloéloici igai jaitádiaioi. Afe lloéloici monáillai anamo fiébicaide. Afecæ datara jairábiai zuitádiaioi. Afe mei afecæ uite iniroi ifófecaemo caífo jairífono jóonetiaioi. Iemona afecæ oni guamáemo áinozioicaide.

⁴¹ Mei íadi mena meine ábiedo totíñuaimo dúcidiaioi. Iemona afecæ afénori ite guamáemo bíjide. Ifófecæ afe guamáemo jamánomo riire bíjide. Mei íadi móifecæ nai ñue fairídemo, monaillai bagua niné llaizéraga.

⁴² Jira afécaemo ite llaizíraini llavécamiiai fáiacadiaioi, “Ihíi bótaitiaioi” daínano.

⁴³ Mei íadi afe llaiziraini illaïma Julio Páblona jílloaacade. Mei jira íaïoïna fatátañede. Jiáifodo ocuide nana íïana onódino illedo ícana raïre uícomo dúcïllena.

⁴⁴ Jiáïmaci íïana onóñedino afe nocáe lláicoïzillabïci emódodo jáitate. Daií nana oni fuédamo dúcïdiaïoï. Afe daií ñue jíllo diaïoï.

28

Pablo monaillai cigi idu Máltamo dúcïnafue

¹ Nana ari éniemo ñue jíllobicaïdicaïmo, afe monaillai cigi idu, comïni cai llúamona Máltana mámecirenana onódicaï.

² Afedu nairai ñue caina llínotiaïoï. Aillue irai bonódiaïoï noci jáiñua rozírena jira. Aferai bónuana nana caina: “Mai omoi agáizaïbi” daïde.

³ Afe llezica Pablo záfegai llínota aféraïmo jóoniaïde. Aferai uzire cácanamona titade jaïo jino billano Pablo onoi ainide.

⁴ Afedu nairai afe jaïo ie ónoïmo agüñnana cióïllano, conímamo llotíaïoï:

—Nibai baïe ïma come fáñredïmie. Meiti monáïllajmona ñue jillode íadi, Juzíñamui jaïcïna jóïdïfue nana comïnïmo onótaiacanamona íena raamo jiritate ie jílloïñeïllena, —daií daïdiaïoï.

⁵ Mei íadi Pablo afe jaïo iraimo jaidínota dotade; íena nñe izói nibáíñede,

⁶ Nirui íena fáitaite daïnano áfemo nana ocuïrdiaïoï. Jiáifodo nino llezica íena ana dotada títaite daïdiaïoï. Mei íadi íena ja are úiñodiaïoïmo nie izói íena nibáíñede. Ie jira nano comécïdo íaïoï daïnauai jiáifodo meïdotiaïoï. Iemona bie Pablo Juzíñamui izóïdïmie daïdiaïoï.

⁷ Afe áinori afedu illaïma Publio illánuaïaï ite. Dinomo daruiámani afe Publio caina ñue llínote. Cai jitaica raana ñue caïmo fecade.

⁸ Aféruillaïdo afe Publio moo irárede. Bírallumo diga irui bíïfirede, ie abï cuaríllari. Iemo jamánomo lluide. Afénomo Pablo íena uáïduaïde. Dinomo Juzíñamui íena jicade. Daií ie jica mei Pablo onoi íemo bitade. Iemona afémie jíllobicaïde.

⁹ Afena íaïoï fidínamona nana afédumo ite iráredinuaïaï Páblomo atídiaïoï. Iemona nana jíllozitiaïoï.

¹⁰ Aferi íóbillano aillo ñúfuaïaï caïmo nitádiaïoï. Afe mei nane dánomo cai jáiacanaruïmo, nana cai jitaica ráaniaïaï caïmo atídiaïoï.

Pablo Rómamo dúcïnafue

¹¹ Afe monaillai cigi ídumo dauíamani iticaï. Afe meïfodo, jáïe nocaena cióizaidicaï. Afecae nauï bie ídumo uáïci zaille dïno úiñote. Dinómona afecae jáillado ruica jáïdicaï. Afecae Alejandría jófuemona bite. Afecae ífomo mena taïno juzíñamui

uiecona cueda. Afe íaillinoi mámece Castór Pólux. Afecae aféillinoína náamaredena mameide.

¹² Dinómona Siracusa ígobemo dúcidicai. Afégobemo daruíamani iticai.

¹³ Dinómona fueda áinodo Regio ígobemo jáidicai. Afe jáíruido jairifo mona átue dinena bíllamona Régiomona jáidicai. Ja ménarui íllamona Puteoli ígobemo dúcidicai.

¹⁴ Afénomo ite ámatiai cióizaidicai. Iaiói diga da semana cai íllena jicádiaioi. Afe mei ja Rómamo jáidicai.

¹⁵ Jae Rómamo ite ámatiai cai billáfueña uícodo fidídiaioi. Ie jira io anamo conímamo caimo dúcillena uícomo bitíaiói. Conímamo íaiói dúcinano “Foro de Apiona” mameide. Jáífodo daína, Apio iomo ite fecáriraco. Jáíino mámece “Tres Tabernas.” (Afe mámece dobáíñuano daína Daámani Dúcirachupi.) Afénuiamo Pablo éroicaillano Juzíñamuimo “fere figura” daide. Iemona Pablo comeci caimare íficaide.

¹⁶ Ie mei Rómamo dúcidicaimo llazíraini illaíma Julio ie uiga llavécano rairuídino illáimamo izájide. Mei íadi Pablo oni eneno dama ícomo uiga. Afénomo daa llazíraima íena rairuide.

Pablo Rómamo Juzíñamui uai jino llote

¹⁷ Rómamo íaiói dúcinamona daruíamani íllamona Pablo Roma judíuai illaini jáiritade. Iaiói gairilla llezica Pablo íaioína daide:

—Amatiai, judíuaimo fiénidífue lloñédicue. Afe izói cai jáiáidigima fibíllafueña uáitaoiñédicue. Mei íadi Jerusalemo romano comínimo lláitano izájigacue.

¹⁸ Dinomo cuemo íaiói jicánua mei, cuena zuitáacadiaioi cue íaiói titállifue íñena jira.

¹⁹ Mei íadi judíuai jáífodo cuena zuitáañediaioi. Ie jira romano jamánomo ocuídillaíma cuemo jicánoreña daidicue. Mei íadi afe llezica cue náiraimo cue jitállifueña íñede.

²⁰ Mei jira omoi diga cue úrillena jáiriticue. Mei cai bie daje Israel náiraidicai. Daje cai Mesías billífueño comécidicai; daje izói meine abido cai cáaillifueño úiñoidicai. Afe cai úiñoigafue ícoiniadi birui benó llavécamié cue llavéinana ja ciódiomoiza.

²¹ Jira íena daidíaiói:

—Jaca daabe o finócafuiái lluabe caimo dúciñede. Daje izói afénomona bite ámatiai judíuai o mámece fiénidífuiaina nítaibiñediaioi.

²² O comeci fácafuiaimo cacáreacadicai. Mei náganíaimo afe bie comue Jesumo jaináidinona onódicaiza uáitaoidiaioi, —daí íena daidíaiói.

²³ Ie jira meine íai*oi* cacáillirui mamédia*oi*. Afe maméinaruimo aillo nairai Pablo illácomo nane garízaibitia*oi*. Jítiramona ua nauízaidemo Pablo Juzíñamui illáimana illafue íai*oi*mo llote. Moisés ocuica uáillaído Pablo Jesús dibénemo íai*oi*na ínotaacade. Afe llezica Juzíñamui uai jino llóraini cuega uáillaído Jesumo íai*oi*na ínotade.

²⁴ Dárie Pablo llogáfuemo ínuaidia*oi*, ie mei jáimaci ínoiacañedia*oi*.

²⁵ Mei íadi nana dáafuemo coméciiñenamona raiízitia*oi*. Como raiíacadia*oi*mo Pablo íai*oi*na daide:

—Ñuera Joreño cai jaiáidigimacimo uai jino lloraina Isaíado ñue úrite. Afémie daide:

²⁶ Baimácimo bifue llujiri, daide:

Omo*i* uafue aféfuena cácaitiomoi íadi áfena ónoñeitiomoi.

Omo*i* uáfuena cíoitomoi íadi ñue fidiñeitiomoi.

²⁷ Mei bie comini comeci meine fieni riirenamona bie ñúefuena óiacañedia*oi*.

Iai*oi* ífoci jáiainamona fieni cacádia*oi*.

Iai*oi* uíjiai nitáoidia*oi* dani íai*oi* uído áfena íai*oi* cíoi dáii.

Daje izói íai*oi* jefodo cácañeillena jefo ibáidia*oi*.

Afe izói comécido cacáacañedia*oi*.

Daje izói meine cuemo bíacañedia*oi*, íai*oi* cue jíllotallena, —daí Isaías daide.

²⁸ Bifue omoi onoiri: biruímona bie Juzíñamui lloga jíllotallena fue judíoñedimacimo llujiga. Aféfuemo afémaci ñue cacáreitia*oi*, —daide.

²⁹ Pablo daí dánamona, judíuai aillo conímamo úricana jáidia*oi*.

³⁰ Afénomo Pablo ie ibaca jofomo mena fimona fuitade. Nana íemo ráfuiai jicánuaibifiredinona ñue caimare líinofirede.

³¹ Aféruillaído Pablo Juzíñamui illáimana illafue jino uáfodo comínimo llote. Afefue ie jino lolle rairuide cómena íñede. Daje izói Ocuíraima Jesucristodo diga irui llófuerite. Aféruillaído ie llófuerilla buna llótaidoñede. Mai. Jae ñie.

ROMA COMINIMO SAN PABLO ORECABE

La Carta del Apóstol San Pablo a los Romanos

Pablo Rómamo ite Jesumo ínotinomo cuete

¹ Cue Páblodicue; Jesucristo ocuífíregamiedicue. Juzíñamui cuena uáiduano eneno cuena nizede ie jílloña uai jino llóllena. Ua afémie orécacue; Juzíñamui mamécamedicue.

² Afe bie jílloñafue Juzíñamui jaiái ninomo uícodo ñuera Cuegáuaimo, ie uai llórainido jino llotátate.

³ Afe jílloñafue cai Ocuíraíma Jesucristodo úrite. Afémie Juzíñamui Jitó. Iemo jíái afémie cai come izóidimie. Afe Jesucristo jaiái illaíma David méifoidigimamona jocócamie.

⁴ Mei íadi Ñuera Joreño dibénemo afe Cristo uáfodo ríinorede Juzíñamui Jitona cíotaga, mei dama tíllanomona afémie meine cáatateza.

⁵ Juzíñamui Jesucristodo, ñúefuena cuemo itátate. Aferi iere ióbídicue. Afefue cuemo illano, iere cuena canode, ie mámecido oni jíáinomo ie orécamiéna cue íllena. Bie cue ióbíllafue ie mámecido oni jíáinomo cue oréllena. Afe cue oréinamona naga náiraíaido aillo Jesumo ínotinona iite. Daje izói ie uaina jíéruitinona iite.

⁶ Afémacimona Crísto ínotinona itíomoiiza. Ie jira Jesucristo íeíena omoi íllena, Juzíñamui eneno omoi nizede.

⁷ Mei jira nana ómoímo cueticue Roma jófueмо itínodiomoi. Juzíñamui izíruigamacídiomoi. Afémiemo omoi ñue jaináíllena eneno uáidogamacídiomoi. Iemo ite caimátaíllafue, naa comei caimare uái illafue diga ómoímo fécaíteza. Nana bífuíai cai Moo Juzíñamui cai Ocuíraíma Jesucristo diga, ómoímo mámeíteza.

Pablo Rómamo macáacade

⁸ Nana ómoírí fueñe Jesucristodo “Íere figura,” cai Juzíñamuina daífíredicue. Ua daíí daídicue mei nágagobiaído ómoímo ite ñuera ínogafuedo úritiaíoi.

⁹ Jaca nana cue comécido Juzíñamuimo táíjidicue, ie Jitó ñuera uai jino comínimo llóllena. Nane daje izói Juzíñamuimo comécido cue úriadi, ómoímo uibíoífredicue. Aferi Juzíñamui cue uai nabáidimie.

¹⁰ Bie ícoí iruimo ómoímo cue jáíllena Juzíñamuimo jíacífredicue. Ua Juzíñamui comei jitaía, níbai níbéfodo ñue cuena óreite, ómoímo cue mácajillena.

11 Mei ómoína cióacadicue, Crístomo omoi ínogafuiai cue cánuamona, ñue riire jaícina omoi íllena.

12 Ua bie ínogafue cuemo íteza ja ómoimo ite. Afe Juzíñamui cai ínogafuedo conímamo cai úrillamona, conímaiaina comécina caimare náiretaicai.

13 Juzíñamui ínote ámatiai, diga icaiño omoi diné cue jáiacanafue ómoína cue cióillena, ómoimo fidítaacadicue; mei íadi nai jaca jáinidicue. Omoi diné jáiacadicue ómoimona jáíamacina Jesumo jáináitallena. Ua jeede ria llízie jofo ua izói, afe izói Jesús uaimo ínotinona itátaacadicue. Oni jáíagobiaimona dáarie cue itata izói, daje izói, ómoimona itátacadicue.

14 Mei cue naga cómemo ñúefuena cue llóllena iere jitárede. Ua iere baitádinomo llóredicue; daje izói abina onóñedinomo daa fiéñeno llóredicue.

15 Iemona afe izói cue dibénedo nana afe jílloilluui ómoimo jino ñue lluáibiacadicue, jica Rómamo itíomoi íadi.

Ñúefue riirede

16 Bie ñúefue uai jino cue llólleri méairuíñeiticue, mei aféuaimo ite Juzíñamui riino nana áfemo ínotino jílloillena. Nano fueñe judúuaina jílloitaite, ie mei daje izói judúuainédinona jílloitaite.

17 Bie jíllo nauai Juzíñamui anamo ñue jaícina cai íllena caina fidítate. Dama Jesumo cai ínogafuiaiido Juzíñamui anamo ñue jaícina íticai. (Abi diné jáíiena íñede.) Jaiiai Cuegáuai daí daide: “Ínogafuedo Juzíñamui anamo ñue jaícina itímie, zííñona cáaité.”

Nana énie nairai íaioi fiénidifuiái ícoínia ite

18 Mei monámona bite Juzíñamui iere izire duere fínuafue nana fiénidinomo, naa comécina jaícinaíñedinomo jaiiai zúillana, ja birui fidídicaí. Dani íaióimo ite íaifuedo ua ráfuena ónuana rairuícaiaíoi. Daje izói afémaci jáíamacina ua ráfuena onóillena jeruídaiíoi.

19 Cai onóiga Juzíñamui dibénemo itífuena daje izói ñue onódiaíoi; mei dama afémie íemo itífuena nana caimo cíotateza.

20 Juzíñamui ite ie cióñena raa, ie finócafuiáiido caimo ónorede. Jaca énie fínuaruimona afémie nahí Juzíñamui nana uáfodo ónorede. Daje izói afémie jaca riínoredeza uáfodo ónorede. Bífuiaina comini náfueñediaíoi; íemona dani íaioi ícoínia daí ite.

21 Mei Juziñamuina onódiaioi íadi, íemo nitárede ñúefuiaina íemo nitáñediaioi. Daje izói íena “Figora” daifinidiaioi. Mei jiáfodo ráfiñede raamo comécidiaioi. Iaioi abina onótatañede comeci jítifomo fiébicaide.

22 “Nimáirainidicaí” daífirediaioi íadi, abina onóñedinona jáidiaioi.

23 Ziiño Juziñamuimo ite ebíredifuenta ziiñoñede come jánaraina méidotiaioi. Afe baimo figóñede jánaraina finódiaioi. Féedinuai jánaraina finódiaioi. Jaizai jánaraina finódiaioi. Táicaide rille jánaraina finoda jeire otíaioi.

24 Ie jira Juziñamui íaioimo ite fiени comeci óiacanafuemo íaioina zóofete. Daí afémaci dani jofo conímamo méaifuiái finódiaioi.

25 Juziñamuimo ite ua ráfuenta íinoño tainofuiái jeire otíaioi. Afe emódomo ie finoca raamo ñúefue nitádiaioi, mei íadi fueñe afe finode Juziñamuimo ñúefue nitáñediaioi. Daje izói ie finoca raamo caimare áinozoidiaioi, mei íadi nahí Juziñamuimo cáimadoñediaioi. Bie Juziñamuina jaca ninomo cáimadoaredicaí. Daí íteza.

26 Mei jira Juziñamui jiáie meáire comeci óiacanafuemo íaioina zóofete. Ringóniai daa íaioi ini diga íllana féitatiaioi; féitano aillo méaifuiái jiáinori otímaci. Juziñamui ringóniai jóonia izói íacaño afe jóoniafuenta uáitatiaioi.

27 Daje izói íññiai daa ringo diga ñue íllana féitatiaioi. Féitano fiени illáfuedo íaioi abi bóobicaide, conímaíaimo fiени finóllena. Afe íññiai conímamo méaifuiái finódiaioi, íemona dani afémaci abímona comuídifueri duere zefuídiaioi. Bie izói Juziñamui íaioina duere finótate, dani íaioi comeci ífue jaícina jóiñena ícoinia.

28 Ja mei Juziñamuina onóacañediaioi, jira íaioi comeci jaícina jóiñenafuemo Juziñamui zóofegaiaioi, Juziñamui rairuícafuiái finódimaci íaioi íllena.

29 Afémaci naga íaifuiáimo itíaioi; comeci jaícinaíñenafuemo itíaioi. Daje izói jiruírenafuemo itíaioi; fiени jítainafuiáimo itíaioi; naga ráaniaina óiacanafuemo naa fiénidifuiái diga itíaioi. Daje izói afémaci úradorifiredino; come titáfiredino. Fuiríllafuedo úritiaioi. Jífuemarifirediaioi; ñúeodo jáiñedino. Táinona conímamo fiени úrifiredino.

30 Afémaci jiáima jánana fiени úritiaioi. Juziñamuina éoidiaioi. Daje izói ríimacimo náfueñediaioi. Táinofuiáimo comécidino. Daje izói fiени abi ínotino. Fiénidifuiáimo comeci facada finófrediaioi. Iaioi úruiai móotiai ocuícafuenta jeire oñediaioi.

31 Afémaci abina onóacañediaioi. Iaioi daina izói finófinidiaioi. Buna duéruiñediaioi. Caimare uáiduano

iba óñellena onóñediaioi. Daje izói afémaci jiáimamo dúecaiñediaioi.

³² Juzíñamui ocuíllana ñue onódiaioi, íadi óiacañediaioi. Afe nana bie fiénidifuiaimo itino jaca ziiñona duere finólliaioiza, áfena jiái onódiaioi. Onódiaioi íadi aféfuaiaina féitañeno nai uícadiaioi. Nane bie emódomo jiáimaci afe fiénidifuiái finua llezica, íaioina: “Caimare bie izói cai illi,” daidíaioi.

2

Juzíñamui nahí uafue daína izói comínimo riire jicánote

¹ Jiáima fieni illafue riire o jicánollena iñede. Naga come “Cue nífuenidicue” daiñidiaioi. Nana omoi dáafuemo itíomoi. Mei jiáimamo ite fieni illafue riire o jicánua llezica, dama o abi duere finótaitio. Aféfuena riire jicánotio íadi, o jiái dáafuiaimo itio.

² Mei jii, bífuiaimo itino Juzíñamui duere finótaja llezica, afémie nahí uafue daína izói riire jicánoteza, áfena onódicai.

³ Mei o, jiáima fieni illafue riire o jicánua llezica, o jiái daje izói dáafuiaimo itio. Daií o illa llezica “Juzíñamui ie duere finóllifuemona nibai cuena jíllote,” ¿daidio? jíllonheitio!

⁴ ¿Juzíñamui omo ziiñona fuiñede dúecaillafuena jámairuitio, naa omo ie járitañenafue diga? Afe bie Juzíñamui omo dúecaillafuedo, afémie o comeci ífuena ñúefue dibénemo méidotaacadeza, ¿afe jaca o comécimo úbicaiñedeza, ero ua?

⁵ Mei o, comécina iere riiredioza. O comeci ífuena méidoacañedio. Iemona o duere finóllifuiaina aillo ofítaoicaidio. Ua Juzíñamui cíocaizabilliruimo o jaícina jóoide duere finuafue jino omo llóite.

⁶ Aféruído naga come dani íaioi finócafuiái izói, íaioimo íbátaite.

⁷ Aféruído ebíredifue jenódinomo, ziiñona cáataitino íaioimo iite. Daje llezica, nana Juzíñamui íaioimo ñúefue nitállena jenódinomo, naa ziiñona illa raa jenódino diga, Juzíñamui ziiñona cáataitino íaioimo fécaite. Aféfuaiaina jenódiaioi, mei nágarui féitañeno ñúefue dibénemo ífirediaioi.

⁸ Mei íadi aféruillaído nana fieni abi ínotinona, Juzíñamui duere fínoite. Daje izói nana ua ráfuena jeire óiacañedinona Juzíñamui ie riífuedo duere fínoite, fiénidifuiái jeire íaioi ua jira.

⁹ Nana fieni mácafiredinomo aillo duere zefuillifue iite, naa jamánomo íaioi comeci zúunaillifue diga. Nano fueñe daií judíuaimo iite; ie mei jiái daje izói judíuaiñedinomo cómuite.

¹⁰ Mei jiáifodo ñúefuiái finódinomo, Juzíñamui íemo ite ebírenafue íaioimo iite, naa comeci caimare uái illafue diga.

Daje llezica Juzíñamui íaiοimo ñúefue nítaite. Nano fueñe daií judíuaimo iite, ie mei jíái daje izóí judíuainedino cómuite.

11 Comínimona dámie jíáie come baimo Juzíñamui gáigamie iñede.

12 Nana fieni itino Moisés ocuífafuena nai onóñena llezica, ico nine táinocaitiaioi, aféfuena nai onóñenano. Daje izóí nana jíáie fieni itino Moisés ocuífafuena onódiaioi íadi, afe daje bie ocuífafuedo riire jicánolliaioi.

13 Mei ocuífafuena táinona cacáđino Juzíñamui anamo ñue jaícina iñediaioi, mei íadi ocuífafuena jeire otino Juzíñamui anamo ñue jaícina itíaioi.

14 Dáarie ocuífafuena onóñede judíuainedino afe ocuilla daina izóí dani íaioi comécido jeire otíaioi. Iemona afémaci dani abi lletáđinona itíaioi.

15 Mei jii, íaioi ñue mácafuedo íaioi comécimo ocuica uai cúeinana ácatafirediaioi. Afe llezica íaioi comeci úrilla uai ñue íaioi uaina nabaide. Daje llezica íaioi ifoci úrillafue fiénidifue íaioi finóadi, áfena íaioimo llóite. Fiénidifue nai íaioi finóñenia,

16 Juzíñamui comínimo riire jicánolliruimo íaioi ifoci úrillafue íaioina ráiruute. Aféruillađo naga comini báinino finoca raana Jesucristodo Juzíñamui riire jicánoite, cue lloga jílloilluiai daina izóí.

Judíuai Moisés ocuífafuemo figo náfueñediaioi

17 Mei ja birui, “Judío ímiedicue” dađdio. O jílloillena, Moisés ocuífafuemo ínotio; o Juzíñamui dibénemo fieni abina ínotio.

18 Juzíñamui comeci jítáinafue onóđio; afe ocuífafue omo llote: “Nana o nícidogafuemo ñuera diga o nizeri”.

19 “Uínidino izóidino ifóllena, ñue uáfueña onóđicue,” dađdio. “Daje izóí jítifodo macáđinona ñue egáíñollena onóđicue,” dađdio.

20 “Abina onóñedinona llófueredicue,” dađdio. Daje izóí, “Urue izóidinona jaícina llófueredicue,” dađdio. “Ua nahí ráfueña onótate uai afe cai ocuífafuemo ite,” daiífiredio. Afe izóí, “Nana ifócido onóigafue caimo ite,” dađdio.

21 Mei jíáimana llófuetio íadi, ¿ñibái mei dama o abina lletáñedio? Omoi merírriñeno iri daićadıo íadi, ¿ñibaí mei merírifiredio?

22 Omoi jiruíreñeno iri, dama daićadıo íadi, ¿ñibái mei jiruiredio? Jánaraiaina éoidio íadi, ¿ñibái mei íaioi illácomo ite ráifide ráaniai o mériano ráaredimiena jáidio?

23 Ocuilla uai dibéfodo iere abi ínotio; mei íadi Juzíñamuina jámairuitio, afe daje ocuífafuena jeire o oñena ícoinia.

24 Meita Cuegáuai ñue daide: “Judíuainedino omoi ícoinia Juzíñamuina fieni úritiaioi.”

25 Moisés ocuícáfue jeire o oíadi omoí finófirena bacano icoí quétáfue uáfueña omo ráifite. Mei íadi afe uai figo o ñnoñeniadi, jaca quétañegamie izóí íitio.

26 Mei jíáifodo, daa bacano icoí quétañegamie ocuícáfue daña izóí jeire oíadi, afémie bacano icoí quetácamié izóí facádoga, quétañega íadi.

27 Afe bacano icoí quétañegamie, mei íadi ocuícáfue jeire otímie, ona riire jicánoite, bacano icoí quetácamiéna o íadi, daje izóí cuela ocuícáfue omo ite íadi, mei áfena jeire oñédioza.

28 Judíona jáillena dama jinófenemo cíoi de ráaiñede. Daje izóí bacano icoí quetácamiéna jáillena fia abimo cíoi de ráaiñede.

29 Mei íadi nahí ráfuiái jíáifodo jóide. Nahí jáidimie ie comécimo áfena jaide. Daje izóí nahí bacano icoí quétáfue comécimo dúide. Cuela ocuilla uaimo jaináñede; mei íadi come joréñodo ie comécimo ite. Bie izóí íitimie comínimona jíeruiñegaza, mei íadi Juzíñamui jíeruiga.

3

1 Judío ímiéna cue íllemona ¿minica mei baímo óiticue? ¿Bacan quétáfue mei nibénemo ráifide?

2 Judío ímiéna cue íllamona áillofuiái ícoínia ñue íiticue. Daje izóí quétafuemo aillo ráifinafue ite. Nano fueñe Juzíñamui ie comeci úrilla uai Judíuaimo orede.

3 Iaióimona dáarie íaióí ñnogafuena féitatiaíoi. Féitatiaíoi íadi, Juzíñamui lloga uai jáanonide, mei afe Juzíñamui jaca féitafinidimie.

4 Ie íaióí féitaja íena nie izóí nibáñede. Mei jíáifodo íteza: nana comini taino llófredino ille llezica, Juzíñamui nana ie jetáacaigafuena nai uáfueña jaícina finode. Daí Cuegáuai úrite:

O daña uáillaimona jaícinaidimieña o íllana ónoítiaíoi.

Riire o jicánua mei, comini ñue ñnogamiéna íitio.

5 Mei caimo ite fiénidifuedo Juzíñamui jaícinaidimie illáfueña jino uáfomo cíotaiadi ¿nie izóí dáiticaí? ¿Mei Juzíñamui cai duere finóllena jaícinañedimie? (Jamai come úrilla izóí úriticue.)

6 Mei íeñedeza. Mei Juzíñamui comécina jaícina íñeniadi, ¿nie izóí nana énie comini riire jicánoite? Afémie jaca ninomo comécina jaícina jóidimienamona, nana náiraina riire jicánorede.

7 Mei cue tánofuiáido Juzíñamui uafue nai jamánomo cue ebíruiadi, ¿nibái mei fiénidimiedicue izóí Juzíñamui riire cuemo jicánote?

8 Bie uáfuenia, ñúefue bíllena nibái mei fiénidifuenia finóñedicaí. Afe bie izóidifue llófuiana dáarie caimo jitádiaioi. Bifue caimo jitáдино comeci fieni jítainafuedo úritiaioi. Bie izói itino duere finólliaioi.

Nana caimo ite fiénidifue ícoinia

9 ¿Mei níifue? ¿Cai bie judíuai jíáie comini baímo ñuera? Mei ua íeñede. Ja como fidítaticai judíuai naa jíáie comini diga riírede fiénidifue anamo itíaioi.

10 Jaiaí Cuegáuai daí daide:

Buna jaca íaifuenidimiena íñede.

Jaca ninó daa ñúemiena íñede.

11 Daje izói jaca ninó ñúefuena onóacadimiena íñede.

Daje izói Juzíñamui daa jenódimiena íñede, ie diga íllena.

12 Nana Juzíñamuimona onido jáidiaioi.

Afémaci daní fiénidimacina jáidiaioi. Buna ninó ñúefue finóñena.

Jaca ninó daa íñede.

13 Iaioi úriragoi íbaiñega raiafo izoide, mei iere íaire úritiaioiza.

Iaioi fuedo jífuemarifirediaioi.

Iaioi fuemo ite úrilla jaio aifoí izoide, mei jíáima jánana iere fieni úritiaioiza.

14 Afémaci daa faidórafuiaido úritiaioi, naa íairede uáillaído.

15 Come titállena jarire áizicaidiaioi.

16 Iaioi fieni illáfuedo aillo jíáimaci táinocaitadiaioi.

Daje izói comínina zúunaitadiaioi.

17 Afémaci comeci caimare uái illáfueña onóñediaioi.

18 Daje izói afémaci Juzíñamui ñue jacírenafuemo due jiza comeci facáñediaioi, —daí jaiaí Cuegáuai daide.

19 Nana jaiaí ocuícáfue daína uaina, afe ocuícáfue anamo itínomo dúide. Bífuena ñue onódicaiza. Daí Juzíñamui mamérite, nana comini úrillana llícaitallena; daje izói naga nairai Juzíñamui riire jicánollifue anamo íaioi itábicaillena.

20 Ocuica uai jeire cai úado, buna Juzíñamui anamo ñue jaícina íñeite. Ocuícáfue caina jíllotañeite; daa caimo ite fiénidifuiaina caina onótate.

Jíllollifue cai ínogafuedo comuide

21 Mei biruí, jácara ocuícáfue oni eneno fíiano, Juzíñamui anamo ñue jaícina cai íllena afémie cómofuena caimo onótate. Bie cómofuena uai llorainí cuegánico facádoiadi ónorede. Daje izói ocuilla uai cúeinanicomona jíái ónorede.

22 Juzíñamui anamo ñue jaícina cai illifue bífuedo ite. Dama Jesucrístomo cai ínuado bie izói íiticaí. Nana ie uaimo

ñinotinona afémie daje izói fínoite; dáamie jáímie baimo gáñeno nana dájerize jáícina jóoneite.

²³ Mei naga come fiénidifuiarede; jílloaite Juzíñamuimona nana jica itíai.

²⁴ Mei íadi Juzíñamui caimo dúecaillanona, fia íbátañeno ie anamo ñue jáícina caina itátate. Mei dama ie jitó Jesucristodo caina jílloaite.

²⁵ Cai finoca fiénidifue íbana Juzíñamui Jesucristo tiállamo dane ote. Iemona íaifuenta dogo izói itícai. Bie múíñuafue cai ñinogafuedo caimo dúciite. Bifue daí íficaide Juzíñamuina jáícinaidímie daíllena. Mei jaiai finoca fiénidifuiái íbana raire otátañede; afémie comécina járidoñedímie.

²⁶ Daje izói daí íficaide birui Juzíñamui jáícinaidímie daíllena. Nana Jesumo ñinotinona Juzíñamui nai birui afémie anamo ñue jáícina itátate. Iemona Juzíñamui nai jáícinaidímiena íoicaite.

²⁷ Ie mei ¿come abí ínuafue mei nie izói ite? Afe abí ínuafue oni eneno fiébicaite. Ocuícafuiai jeire íaií uádo nai fiení abí ínuafuemo itíaií. Mei íadi Jesucristomo ñinogafuemo fiení abí ínollifuenta íñede.

²⁸ Nana cai llogáfuiamona bifue jino llúana ñue baite. Dama Jesumo ñinotímie Juzíñamui anamo ñue jáícina írena. Ocuica uailai afémie jeire ua oni jíáfodo joide. Afena Juzíñamui náfuñede, dama íemo ínuana náfuete.

²⁹ ¿Meita Juzíñamui dama judíuai íena? Ieñede. Daje izói afe Juzíñamui judíuaiñedino ie.

³⁰ Mei jí Juzíñamui damade. Afémie baimo jíáiiena íñede. Afémie nana íemo ñinotinona ie anamo ñue jáícina itátate. Afémaci bacano icoi íaií quétajana náfuñede. Daje izói quetáñenana náfuñede.

³¹ Ie mei nibai dámie jícanoite. ¿Meita cai ñinogafuedo ocuilla uaina uáitaitícai? Ieñedeza; úaitañeítícai. Mei jíáfodo Jesuna cai ínuado afe ocuilla uaina uáfuenta jíéruitícai.

4

Abraham Juzíñamuimo íñua izói cai ínollena cai onótate

¹ Mei áfemona cai jaiáidígíma Abraham dibénemo jíáfue jícanoítícai. ¿Afe Abraham mei nie ñúefue ote? Daina uai jeire ie ófirenamona abí díne nífuena oñede.

² Mei Abraham ie finócafuiaido Juzíñamui anamo ñue jáícina ie itábicaíadi, afémie abí ínorede. Mei íadi Juzíñamui uícori

afémie abi ñnonide. Ie finócafuiaido Juzíñamui anamo ñue jaícina itátañega.

³ Mei jááfodo Cuegáuai daina izói, “Abraham Juzíñamuimo ñnote.” Iemona Juzíñamuimo ie ñnuado Juzíñamui íena “Íaifuenidimiedio” daide.

⁴ Da come táijíadi, afe táijina iba fia íemo dúecaillano ñnega; afe táijitatimie íena ibárede. Mei íadi cai jílloillifue cai táijicanado iba llínua izói llínnonide.

⁵ Mei jááfodo, dámie jílona táijina finóñeno, ie jílloillena dama Juzíñamuimo ñnorede; mei Juzíñamui íemo ñnote íaifuiaredimiena llínnofiredeza. Mei íemo Juzíñamuimo ie ñnuado, Juzíñamui íena: “Íaifuenidimiedio,” dáite.

⁶ Dama David come cáimafuiaido úrite. Dámie ie úcodo finócafuiaina Juzíñamui náfueñede. Ua náfueñede, mei íadi íemo ie ñnuado Juzíñamui íaifuiainide dainámiena afe ñnotimie jaide. Afe daiítadimie iere caimare ite.

⁷ David daináuai daide:
Iaioimo ite fiénidifuiaina Juzíñamui dogánona iere íóbidiaioi.
Daje izói íaifuiaina oni féitagamíai iere íóbidiaioi.

⁸ Daje izói íaioimo ite fiénidifuenta náfueñegano iere caimare itíaioi.

⁹ ¿Meita bie cáimafuiái dama bacano ícoi quetaca judíuaimo duide? Ieñedeza; nana comíni íena mameide. Jira bacano ícoi quétañega judíuaiñedimacimo daje izói afe cáimafue íaioimo duide. Jae llotícueza Abraham Juzíñamuimo ñnuado Juzíñamui íena: “Íaifuiainidimiedio,” daide.

¹⁰ Mei íadi ¿ññruido daí íena daina? ¿Bacano ícoi quetaa mei daí daina? ¿Ñibai quétañenia daí daina? Jii, uáfueza, nai quétañena llezica daí íena daina.

¹¹ Afe: “Íaifuenidimiedio,” daina méifodo, Abraham bacano ícoi quétafuena Juzíñamui ocuide. Bie quetaínafue onóillena jóonega raa izoide, Juzíñamui ja bímie ie ñnuafuedo íaifuenidimie daíillena. Daí Abraham nai quétañena llezica Juzíñamuimo ie ñnuamona, nana judíuaiñede ñnotino moona jaide. Iemona Juzíñamui daje izói nana afémacina: “Íaifuenidíomoi,” daide.

¹² Uáfueza. Abraham nana afémie dama ie ñnua izói ñnote quetácano moo. Mei nanoide cai moo Abraham ie bacano ícoi nai quétañega ia, ñue Juzíñamuimo ñnoteza.

Juzíñamui jica ia raire llogáuai comíni ñnuamona ñue ícoimo fuitaca

¹³ Mei jii, Juzíñamui Abrahana ñuera jica ia raire fidítauai daide. Aféuai llote: “O nana o erófene igímaíari nana éniena

máinoitiomoi.” Abraham Juzíñamuimo jaiái uícodo ñnua jira, Juzíñamui bíuai íemo llote. Fia ocuilla uai ie jeire úado Juzíñamui daí íena daíñede. Ua, dama Juzíñamuimo ie ñnuado Juzíñamui íena: “Íaifuenidimiedio,” daide.

14 Mei dani ocuilla uai jeire otino ññefuena íaioi maiñóadi, íemona ñnogafue comínimo figo jinoñede. Daje llezica Juzíñamui jica ia raire llogáuái ráifinano niné feide. Mei íadi daíñañedeza jíáfodo joide. Juzíñamuimo cai ñnuafuedo ie caimo lloga ññefuena maiñóredicai.

15 Ocuilla uai llóina meífodo aféuai jeire oñédino duere finótalliaioi. Mei íadi ocuilla uai nai lloñena llezica, aféuai náfuenide.

16 Afe Juzíñamui Abrahamo jica ia raire llogáuái, Juzíñamui ñue riire mamede, nana ie erófene igímaiai afe ññefue jeire íaioi óllena. Mei jira, afe Juzíñamui lloga ññefue, fia fecaca raa izói comíni Juzíñamuimo ñnuado íaioimo írede, mei áfena íaioi ñéfiná cígimona ónidiaioiza. Bifue daíacade, Juzíñamui uícodo raire llogáuái daa ocuilla uai jeire otino íeñedeza, mei íadi nana Abraham ñnua izói ñnotino ie.

17 Iemona Abraham Juzíñamui eróicana nana cai moona jaide. Abraham afe Juzíñamuimo ñue ñnote. Jaiái Cuegáuaido Juzíñamui Abrahana daí daide: “Aillo náiraiai moona ona jóneticue.” Afémie daí daírede, mei Juzíñamui tíidinona meine abido caátaitaredeza. Daje izói íñede ráaniaina Juzíñamui itátarede.

18 Aféfuiaimo Abraham fáicanocaiñeno ñnoide. Ua comíni daína izói Abraham jamánomo jónaiteza, ja úruenide. Abraham daí úruereillinona úiñonina llezica nai Juzíñamuimo ñnuano úiñnoide. Afe daí Juzíñamui íena daína izói, Abraham “aillo náiraiai moona” jaide. Juzíñamui bie izói íena daide: “O uícoide erófene igímaiai aillo jébuitaioi,” daide.

19 Abraham cien fimónamo ánozide íadi, ie ñnogafue jaca féñede. Afémie jónailla izói ie ai jónaillana onode. Ua afengo iere jónaillamona tíiacade. Jae úruena comútanide.

20 Mei íadi afe llezica Abraham jizíñeno Juzíñamuimo ñnofirede. Juzíñamui jica ia raire llogáuaina ruiñruiñeno nai íemo ñnoicaide. Mei jíáfodo Abraham áfena féitañeno iere izire ñnote. Jaca comeci rairuíñeno Juzíñamuimo úrioicaide. Juzíñamuimo íóbioicana úrite.

21 Afémie daide:

—Nana jaiái Juzíñamui jica ia raire cuemo lloga rafue Juzíñamui uáfuenta cuemo zúitaite, —d-aide.

22 Iemona, íemo ie ínnuado Juziñamui íena daide: “Íaífuenidimiedio,” daide.

23 Bie Juziñamui Abrahana daína “Cuemo o ínnuado jae íaífuenidimiedio” daa Abrahamo cúeñegaza,

24 mei íadi nana caimo cuega cai ínnollena. Mei jira tíllanomona cai Ocuíraíma Jesús cáatate Juziñamuimo birui ínoticai. Iemo cai ínnuado caina: “Íaífuenidinodiomoí,” dáite.

25 Afe Jesús caimo ite fiénidifue ícoínia duere finótagamiena jaide. Afe mei Juziñamui anamo ñue jaícina nífuenino cai íllena afémie cáataga.

5

Juziñamui “Níífuenidimiedio” daína méifomo ñue cai illifue

1 Mei afe jira, dácaíño Juziñamui anamo ñue jaícina nífuenino cai illa mei, meine abído Juziñamuina jáciruíñeiticai. Afe comeci caímare uái illafue cai Ocuíraíma Jesucristo ie tíllado cáiena ote.

2 Mei jíi, cai ínnuado bie afémie cai cánuafue dibénemo jónegacai. Aferi izire jaináidicai. Iemona íóbifredicai, mei Juziñamuimo ite ebíredemona cáiena oni máíñoiticaíza. Afemo ocuíríticai.

3 Daa bie cai ocuírillamo íobiñeiticai, mei daje izói duere cai zefuíllifueimo íóbíticai. Mei onódicaíza duere cai zefuíllifue cai comeci járitañenafue caimo comuide.

4 Iemo afe comeci fígomie dáinana caina jáítate. Iemo fígomie dáinana mei Juziñamui cáimafuemo úiñoifireíticai.

5 Iemo bie úiñoínafue caina zúucaitañeite, mei Juziñamui caina ie izíruíllafue ñue caimo llóteza. Bie caina ie izíruíllafuena ie oreca Ñuera Joréñodo onódicai.

6 Dani cai ñéfina cígimona jíllonidicai. Daíí cai illa llezica, Juziñamui jica ía mamécaruimo, Jesucristo nana fiénidíno ífomo tíizaíbite.

7 Bíníemo comécina jaícina jóidímie tílla ífomo tíitímiena íñede. Mei níbai jamánomo fígomie ífomo, daa tíirede.

8 Mei jíaífodo cai fiéni illa llezica, Cristo cai ífomo cai jíllloíllena tíizaíbite. Afedo Juziñamui caina ie izíruíllafue caimo cíotate.

9 Iemona ja birui Cristo tíllamona Juziñamui anamo ñue jaícina itícaíza, ie jira íraíruiimo ite duere fínuafuemonona, Cristo cai rairuíllado, jamánomo oni eneno íredicai.

10 Nai afémie bacáuai ímácina cai illa llezica, ie Jító cai ícoínia tíide. Daíí ie tíllamona, Moo Juziñamui comécina jáciruítañegacai. Ja birui cai comeci íena jáciruíñenamona,

birui ie cáanado jamánomo ñue jílloredicai. (Ua caade Cristo Juzíñamui uícomo caído úrite. Afe daií ie úrioinado, ico bite duere cai finóllifuemona jíllloiticai).

11 Daa bífueñedeza, nane bie emódomo cai Ocuíraima Jesucristodo Juzíñamuimo ióbioiticai, mei afe Crístodo Juzíñamuina cai jacíruiñenafuena otícaíza.

Nanoide Adán caimo comuítagafuemona Juzíñamui caína éoicaide; mei jiáifodo Cristo caimo comuítagafuedo Juzíñamui caimare caído eróicaide

12 Mei onóigaza, dáamiemona fiénidifue nana comínido jaide. Ie mei afe fiénidifuemona tílllafue daje izói naga cómemo comuide, mei naga come fiénidifuiairedeza.

13 Moisés ocuilla uai nai iñena llezica, fiénidifue jaca comínido ite. Mei íadi ocuilla uai nai iñena llezica, afe fiénidifue comínimo nítañega.

14 Mei íadi jaiái Adán illáigimamona Moisés illáigimamo fiénidifuiái finódino tícoizifirediaíoi, mei titade ríino anamo itíaióiza. Juzíñamui jónega íaióí comeci ñue úrilla uaimo náfueñediaíoi. Daií náfueñenamona íaióí fiénidifue comuide. Mei jiáifodo Adán fiénidifue Juzíñamui uáfodo lloga rairuica uai jeire ie oñenamona comuide. Mei íadi bie Moisés uícodo itino fiénidifue jiánodo comuide. Adán finoca fiénidifue izói comuíñede. Afe Adán uire biite Cristo jana.

15 Adán náfueñegafue Juzíñamui caimo fia iga cáimafue izóiñede. Mei dama Adán náfueñegafuedo nana comini timáritiaíoi. Mei íadi Juzíñamui raiñóñeno caimo fecaca jíllonafue jamánomo baimo ñuera. Dama Jesucristodo aillo comini canócaiaíoi.

16 Dáamiede finoca fiénidifue jaca Juzíñamui caimo fecaca jíllonafue izóiñede. Mei afe daade Adán náfueñegafuemona cai duere finóbillifue zúide, mei jiáifodo Juzíñamuimona caimo lloga jíllonafuedo, Juzíñamui raiñóñeno aillo comínina ie dibénemo ñue jaícina itábicaitate, aillo íaióí náfueñegafuiái íaióimo ite íadi.

17 Mei jii, daa come náfueñenamona titáfirede ríino anamo nana comini are ninomo itíaióí. Mei jiáifodo dáamiede Jesucristodo nana Juzíñamui anamo raiñóñeno ñue jaícina jónegano, jamánomo baimo ñuera zíiñona íaióí ille ríino óitiaíoi.

18 Mei dáii Adana náfueñegafuemona duere finóbillafue nana comínimo comuide. Daje izói Jesucristo nífuenide comécimona tíizaibillafuemona, duere finóbiñenafue nana comínimo zuide. Daje llezica zíiñona cai illifue caimo comuide.

19 Bie daide: dáamiede jeire óñegafuemona nana comini fiénidifuiaredinona jáidiaioi. Mei íadi dáamiede Jesucristo jeire ogáfuemona aillo comini Juzíñamui anamo nífuenidinona ñue jóonegaiioi.

20 Mei jaiai Juzíñamui cai ocuilla uai caimo lloga, caimo ite fiénidifue jino uáfodo cai onóillena. Ua, ocuilla uai llua mei caimo ite fiénidifuiái aillo jebuide. Mei íadi daje llezica Juzíñamui caimo dúecaillafuiái daje izói afe fiénidifuiái baimo aillo jamánomo jebuide.

21 Iemona, fiénidifue caimo íllamona afe riírede fiénidifue caina titárede. Daje izói Juzíñamui caimo izire dúecaillano, Juzíñamui anamo nífuenino ñue jaícina cai illa llezica, cai Ocuíraima Jesucristodo, afémie caina ziiñona cáatarede.

6

Comini fiénidifuiaimo íllamona tíidino izóidiaioi, mei íadi daje llezica afémaci Crísto mo ínuamona cáadiaioi

1 Nana bie caimo llógamona ¿nie izói dáaiticai? ¿Mei nibai fiénidifue finócana uiticai, Juzíñamui jamánomo caimo ie dúecaillafue caimo ácatallena?

2 ¡Mei íeñedeza! Cai bie ja fiénidifue dibénemo tíidinodicaiza ¿mei nie izói, fiénidifuemo nai íocaiticai?

3 ¿Nai bífuena onóñediomoi? Nana cai ie báutizaillaruumona Jesucristomo uáfuenta jainaina llezica, dáaruido afe Cristo tíilla dibénemo jaináitagacai.

4 Mei jii, cai báutizaillaruumona Cristo diga dáafomo raigacai izóidicai. Iemona aféruimo tíidinona maméidicai. Ua tíidinona mamécacai, áfemona Cristo ie tíillanomona meine abido cáadimiena jailla izói, birui cáadena cai jáillena. Daí cai jaillano cómfuemo íocairedicai. Mei jii, Cristo ie Moomo ite jamánomo ñuera ríinodo meine cáadimiena jáitaga, íemo daje izói afe daje ríinodo cómfuemo íocairedicai.

5 Uáfuenta dáaiticue, Cristo tíilla izói tíidinona jae mamécacai. Iemona daje izói ie meine abido cáadimiena jailla izói, dani cai tíillanomona meine cáataga izói cómfuiaimo íredicai.

6 Cristo cruzmo coraica llezica nauí fueñe cai illafue dáanomona titácaza onódicai. Uafue, afefue titaca, nanómona cai comécimo ite fieni gáinano caina anáfenoñellena. Iemona fiénidifue dibénemo rairuícana íñeiticai. Daje izói riire táijitatimie mo jainaina izói, fiénidifuemo jáinaiñeiticai.

7 Mei jii, Cristo diga tíidimie ja íaifuemona oni jirecaide.

8 Iemona dácaíño Cristo tíilla izói dáanomona afémie diga, cai comeci fieni óiacanafue tíide izói féitaga. Nauí daí ie diga

cai tíllamona, daje izói biruúllaido afémie diga cai íllana ua onódicai.

⁹ Mei onódicaiza, Cristo dácaiño tíllanomona meine abido cáadimiena jaide. Daíí meine jaillano ja meine abido dánomo tíñeite. Afémie ja ménacaiño tínide.

¹⁰ Mei Cristo ie tíllaruimo, fiénidifue dibénedo dácaiño tíide, jaca ninomo nane tíñeillena. Mei íadi afémie meine cáadena jaillano ie cáanano Juzíñamuimo duide.

¹¹ Daje izói, mai fiénidifue dibénemo tíidino izói omoi iri. Mei jíáifodo Juzíñamui íena cáadinona mai omoi iri. Afemo izire comécimo mai omoi facáoiri, mei cai Ocuíraima Jesucrístomo dájena jaináidiomoiza.

¹² Ie jira fiénidifuena omoi abina náamatatañeno iri; afefue omoi zíñona iñena abí ana úillemona abí omoi rairuiri. Mei Taife comuítaga caimo ite íaifue cai abí fiéni jítainafue jino déillena ocuíoideza. Afemona izire abí omoi rairuiri.

¹³ Dani omoi abina fiénidifuena finótañeno iri. Mei jíáifodo dani omoi abina Juzíñamuimo omoi jaináitari; ua, tíllanomona meine cáadena jaide izóidino afémiemo omoi abí jaináitari. Ie jira nana omoi abina Juzíñamui ñúefue finóllena, omoi jaináitari.

¹⁴ Ja benómona fiénidifue ómoína ana úiñeite. Mei ocuilla uai anamo ja íñedicaiza; mei jíáifodo Juzíñamui cairi dúecaillafuemo itícaiza.

Comini jacire riire rairuúllaruimona daa ráfuena caina onótate

¹⁵ Ie mei ¿nie izói íiticaí? Mei ocuilla uai anamo íñédicaiza mei jíáifodo Juzíñamui cairi dúecaillafuemo itícaiza; íemona ¿meita fiénidifue finóredicai? Ieñedeza, finónidicai.

¹⁶ Ñue onódiomoiza, ómoimona nágamíai riire ocuídillaimamo fecaca llezica, aféllaima ocuúllana ñue jeire órediomoi. Daje llezica aféllaimamo izire jaináidiomoi. Bie izói caimo ite fiénidifuíai, jacire ocuídillaima ana uilla izói, nana caina ana uite. Afemona tíllafue naga cómemo comuide. Mei íadi Jesumo cai ínua llezica jíáie cai ocuídillaima Juzíñamuimo dúidicai, comécina jaícina ñue jóidimacina nágarui cai íllena.

¹⁷ Mei íadi ómoiri Juzíñamuina: “Iere figura,” daidicue. Mei nauí fiénidifueimo izire rairuícana omoi illa llezica, ómoimo lloga llófueinafuena ja ñue jeire otíomoiza.

¹⁸ Afe fiénidifueimona oni omoi jírecailla mei, jíáie ocuíraima Juzíñamui rairuícana jáidiomoi. Iemona comécina jaícina ñue jóidinona nágarui írediomoi.

¹⁹ (Ua omoi onoíga comini ráfuíaido úriticue, mei omoi ifoci déiñenamona bífuíaina ñue cacánidi omoi.) Nauí fiéni

illáfuiaimo omoi abina jaináitafirediomoí. Nane afe baimo jiáie jamánomo fieni abi finuamo abina finótadiomoí. Naui daií abina omoi finota izóí, mai birui comecei jaícinainafuemo abí omoi jaináitari, dama Juzíñamui íena oni eneno ñue mamécanona omoi íllena.

²⁰ Nai fiénidifuiaimo riire rairuícana omo illa llezica, comecei jaícina jóinafuemo jaináiñediomoí.

²¹ Naui omoi illáfuiaina birui meáiruitiomoí. Mei aféfuiaimona ¿nie cánuafuiái otíomoí? Oñédiomoíza; tíllafue diné jaca ómoína uite.

²² Mei íadi fiénidifuemona oni eneno omoi jirecaillamona, ja birui Juzíñamui rairuícanaodiomoí. Iemona birui afémiemo ñue jaináidiomoí. Bie izóí omoi íllamona, Juzíñamui íbana ñue caimare ómoína cánoite, Ua afémie íeiena ómoína oni eneno ñue finoite. Iemona afe ícoímo zíiñona illáfuena óitiomoí.

²³ Fieni cai íllamona daa tíllafue óiticaí. Mei íadi Juzíñamui raiñóñeno fia caimo iga raa, cai zíiñona illífue. Bie zíiñona cai illífue dama cai Ocuíraíma Jesucrístomo dájena cai jaináinamona caimo iga.

7

Iima áireinamona ringo iníreinamona daa ráfuena cai onótate

¹ Amatiai, onódiomoíza, da come dama nai ie tíiñeniadi, ocuilla uai nai íemo dúide.

² Ja omoi onóigafue jino llóiticue, áfedo jiáifuena omoi onóillena. Da inírede ringo, ie ini caana llezica, ocuilla uaido ie inimo cuinaca izóí jainaide. Mei ie ini tílla mei, afe íemo jaináitate ocuilla uáimona afengo jae oni jirecaide.

³ Afe llezica afengo jiáie ímamo inírena ñuera. Afengo daií iníreilla jiruíreñede. Mei íadi ie ini nai ítemo afengo jiáie íma diga illa afengo iere jiruírede.

⁴ Cue amatiai, birui Jesucristo abímo dájena jaináidicaí; ua iníredíngo inimo jainaina izóí jaináidiomoí. Afe Crístomo omoi jaináinamona, ie tíllado tíidinona mamécaomoí. Ie jira ocuilla uai dibénemo tíidino izóí iticaí. Fueñe bie ocuilla uaimo, ringo inimo jainaila izóí, jaináidicaí. Mei íadi ja birui tíidino izóí cai íllamona afe ocuilla uaimo jaináiñedicaí. Dama tíllanomona meine abido cáadimiena jaide Crístomo jaináidicaíza. Afe bie Crístomo cai jainánana Juzíñamui caimo comuítate. Ua comuítate caído ie comecei jítáinafue ñue ícoímo cai fuitállena.

⁵ Mei nanómona comini comécimo itífue dibénemo cai ífírena llezica, afe ocuilla uai cai abímo ite fieni óiacanafuiaína cazítate. Aféfuiai caina ana tíillinomo uite.

⁶ Mei íadi ja birui afe ocuilla uai dibénemo tíidino izóidicai. Fueñ afe ocuilla uai anamo riire iticai, mei íadi ja birui afe uáimona ñue oni jirecaidicai, Ñuera Joreño cómuena méidoga caimo itífuedo Juzíñamui ocuícamacina cai íllena. Jaiai cuega ocuilla uaido Juzíñamui ocuícamacina ínidicai.

Cuomo ite íaifue cue caimare illafue llótaidote

⁷ Iemona ¿mei nie izói dáititicaí? ¿Ocuilla uaina fiénidifue daíredicai? ¿Daínidicai! Mei íadi afe ocuilla uaido fiénidifue na onótagacue. Afe uai nai jino lloñena llezica fiénidifue na onóñedicue. Ja omoi onóigafue jino llóiticue, áfedo jáífue na omoi onóillena. Ocuilla uai nai cuena dáíñeniadi, aino come raana óiacanana onóñedicue. Mei íadi afe daí llua mei fiene óiacanana onódicue.

⁸ Afena cue onónamona, bie ocuilla uai llúado, cue comécimo ite naga fiene jítainana uáfodo cazítaga. Mei ocuilla uai nai cuemo lloñena llezica, fiénidifue tiide izói uái illano figo onóñedicue.

⁹ Naudíruimo, ocuilla uai cúemona nai oni eneno illa llezica, cue comeci úrilla caimare ite. Mei íadi ocuilla uai ja lluaíbillado fiénidifue meine abido comuide. Afefue meine comuillamona fállena cue orede.

¹⁰ Dinómona bie izói cuemo zúide. Daje cuena ñue zíñona illífuemo úirede uailai, ñue illífuemo cuena uíñede. Mei jáífodo cue dibénemo, cuena ana tíillanomo uite.

¹¹ Mei jii, fueñe fiénidifue cuemo iñede daidicue. Mei íadi ocuilla uaina cue fídiamona, cuemo ite fiénidifuiaina onódicue. Afe ícoinia Juzíñamui fáiacagamiena iticue.

¹² Afemona onoiga, afe ocuilla uai iere ñuera. Daje izói lletara uai jamánomo ñuera. Afe uai ñue jáicina jóidiuai.

¹³ ¿Meita bie ñuera ocuilla uai cuena ana tíillanomo úirede? Ñue onóigaza, únide. Mei jáífodo cuemo ite fiénidifuedo ana tíillanomo uigacue. Afemona uáfue na cíotagaza, bie fiénidifue ua nahí fiénideza. Afe cuena ana uillafue ñúefuedo finoca. Daí Juzíñamui ocuilla uai, nana fiénidifuiái jamánomo íaire nana caina onótate.

¹⁴ Afe ocuilla uai Juzíñamui Ñuera Joréñomo dúidifue. Afena onódicaiza. Mei jáífodo nanómona cue comécimo itifue Ñuera Joréñomo dúíñede. Mei izire rairuícamié izói íaifue finuanamo fecácamié izóidicue.

¹⁵ Birui cuemo íficaidifue na onóñedicue. Ñue cue comeci jítainafue na finóñedicue, mei íadi cue comeci éoillafue na áfena finóñedicue.

¹⁶ Mei cue comeci jítaiñenafue cue finóadi, afe cue finócafue fiéninana onódicue, mei Juzíñamui Ocuilla uai cuena áfemona rairuúdeza. Iemona afe bie ocuilla uaina nahí ñuera daidicue.

17 Mei daií áfena dama finóñedicue, mei jiáifodo cuemo ite íaifue aféfuemona comuide.

18 Mei onódicueza, dama cuemo ñúefuena iñede. Bíedo daiíacadicue, nanómona cuemo itifue ñúeñede. Mei jii, cue comeci ñúefue finóacade, mei íadi áfena jaca finónidicue.

19 Cue jitaiga ñúefuena finóñedicue; mei íadi cue jítaiñega fiénidifuiaina finócadicue.

20 Iemona cue finóacañega fiénidifue cue finóadi, dama cúeñedeza, cuemo ite fiénidifuemona comuide.

21 Daií jaca bie izói cuemo íoicaide: mei ñúefue cue finóacania, áfena baiñeno dama cuemo ite íaifuiái báifiredicue.

22 Mei jiáifodo cue comécido Juziñamui ocuilla uaina gáidicue.

23 Mei íadi afe llezica cue comécimo ite jiáie niné cue úiacade uaina comécido onódicue. Afe uai cue ifoci úrilla ñúefuena niné féitaoide. Afe bie fiéni cue rairuíoide uai cue abimo ite. Afe uai cuena llavéoide.

24 ¡Nai iere íóbiñedimiedicue! Bie ana tállamo cue uite abímona, ¿bu oni cue jirecaitalle?

25 Dama Juziñamui ie Jitó cai Ocuíraima Jesucristodo bífuemona cuena oni jirecaitarede. Iemona, ja birui Juziñamuina “Iere figura” daidicue. Iemo cue illafue bie izói ite: Juziñamui ocuilla uai anamo cue itábicaillena dama Juziñamui jóonega cue comeci ñue úrillado finóredicue. Mei íadi dama cue abi dibénedo nanomo cuemo itífuedo llavécaigacue. Dinómona fiénidifue cuemo íoicaide. Ioicaillamona fiénidifuiaina jaca finóicaidicue.

8

Juziñamui Ñuera Joreño úicaigamie illafue bie izoide

1 Mei ja benómona, nana Jesucristomo dájena jaináidinomo duere finótaiti uai jaca iñede. Afémaci Juziñamui Ñuera Joreño riínodo afe Joreño illa izói ífirediaíoi. Dáanomo afémaci nanómona comécimo itífuiái izói comécíñediaíoi. Daje izói nánorafuiaina náfueñediaíoi.

2 Juziñamui Ñuera Joreño cai rairuilla uai, dájena Jesucristomo cai jaináinamona, caina ñue cáataite. Afe llezica caina rairuide Ñuera Joreño uai, afe nanómona cue rairuilla fiénide uáimona cuena oni jirecaitade. Afemona fiénidifue ana tállinomo cuena úiñeite.

3 Moisés ocuica uáimona finónidifuenta, Juziñamui daade ie Jitó ana óriano áfena finode. Afe caimo ite fiénidifuemona oni cai jirecaillafue Moisés ocuilla uáimona finónide, mei nanómona cai comécimo fiénidifuiái íllado, afe uai riínonideza. Iemona afe uai figo jinoñede. Ie jira Juziñamui cai oni

jírecaitallena, daade ie Jitó jamai cómena bie éniemo jéicitade. Afe mei, cai fiénidifuiái ícoinia cai ifomo Juzíñamui ie Jitó fatátate. Bie izói daina daiíacade, bíniemo ite fiénidifuiairedino comínina íaioi illa izói, afe izói Juzíñamui ie Jitó ana bíniemo orede. Afe bie izoide ória mei, afémie abi, cáie izói eroide, mei íadi afémie íaifuenide. Afe izói ie íllamona afémie bíniemo ua nífuenedimiena jáicaillado nana caimo ite fiénidifuiaina anáfenode.

⁴ Mei ocuica uai jeire cai óllena, afémie nana bie izói finódeza, mei ja nano cai comécimo comuídifuiaimo comécíñedicaiza. Afena ja náfuñedicaí. Mei jáífodo Juzíñamui Ñuera Joreño ífuiaimo comécíoidicaí; aféfuiaína ñue náfueticaí.

⁵ Nano comécimo fieni comuídifuiaimo comécíidino, daa bie cai abi ífuiaimo izire comécido llícíoidiaioi. Mei jáífodo Ñuera Joreño ífuiaimo comécíidino afe Ñuera Joreño daináuaimo izire comeci fáioidiaioi.

⁶ Da bie cai abi ífuiaimo comeci izire cai llícioia, ana tíllinomo caina uite. Mei jáífodo Ñuera Joreño daináuaimo izire comeci cai fáioia, zíñona illífuemo caina uite. Iemo daje izói caina caimare uái illínomo uite.

⁷ Daje bie cai abi ífuiaimo izire comeci llícíoidino, Juzíñamui uáitatímacina jáidiaioi, mei afémaci, nana comíni Juzíñamui ocuilla uaina gáíñediaioiza. Afémaci áfena gáíñenamona afe uai anamo ínidiaioi.

⁸ Ie jira nano cai comécimo comuídifuiaimo jaináidino Juzíñamuina íóbitanidiaioi.

⁹ Mei íadi Juzíñamui Ñuera Joreño ja ómoimo íllamona, comécimo fieni itífuiaimo, cuinaca izói, izire jaináíñediomoi. Mei jáífodo Ñuera Joreño dájena iere jaináídiomoi. Cristo Ñuera Joreño ina íñédímie Cristo íeñede.

¹⁰ Cristo ómoimo íllamona ómoimo ite joreño caade. Ua, Juzíñamui anamo ñue jáícina itábicaillamona omoi joreño cazítaga izoide. Mei íadi afe llezica caimo ite fiénidífue cai abina ana tíllinomo uite.

¹¹ Mei jáífodo Jesucristo tíllanomona Juzíñamui Ñuera Joreño do meine abido cáadimiena jáitaga. Iemo afe Cristo cáadena jáitate Juzíñamui omoi tíífírena abina nane meine cáadena jáitaita. Ua ómoimo ite Juzíñamui Ñuera Joreño do Juzíñamui cáadena jáitagamacina ómoína fínoite.

¹² Amatiai, mei daií cai comécimo fieni ífiredifuiaimo comécííñellena, izire ocuícánodicaí.

¹³ Da bie omoi abi ífuiaimo omoi comécíioiadi, tíllinomo ana ómoína uite. Bie cai comécimo itífue jaca fiénidífue na caina

finótate. Mei íadi afe ómoina finótate fiénidifue Ñuera Joreñoodo omoi anáfenoiaidi jaca ninomo cáaitiomoi.

14 Nana Juzíñamui Ñuera Joreño ifócamaci, Juzíñamui úruiai.

15 Mei jii, ómoimo iga Ñuera Joreño, jacire ráiruite joreñoñede. Daje izói ómoimo ite Ñuera Joreño ómoina meine jaciruitañede. Mei íadi afe ómoimo iga Ñuera Joreño Juzíñamui jitótiaina ómoina mamede. Afe Joreño Juzíñamuina “Cue Móodio” caina daiítate.

16 Da bie Ñuera Joreño caimo ite joreño diga, dájena nabáizaibite “Juzíñamui jitódicai” caina daiíllena.

17 Afe daií ie jitótiaina cai íllamona, Juzíñamui raire uícodo caimo lloga feci raa izoide cáimafue maiñóredicai. Afe cáimafue dama Cristo ie, mei afémie Juzíñamui nahí Jitoza. Mei íadi ja birui áfena daane afémieoiri maiñóredicai. Afe Cristo duere zefuilla izói, daane birui duere cai zefuíadi, Juzíñamui caina cíoitte. Iemona Juzíñamui ebíredifueña íemo nitalle izói, afe izói caimo nítaite.

18 Iemona ja biruillaído duere cai zefuilla figo ráañenamo comeci facádícue. Afefue ráañenari íobidícue. Ua afe ail-lóñedeza áfena lloñédícue: mei afe uire caimo cómuite ñue ebíredifue jamánomoideza. Afe ebíredifue duere zefuillafue baímo jamánomoideza, afe duere zefuillafuena úibiñoñeiticai.

19 Nana Juzíñamui finoca cómena maméíñedinuiai, Juzíñamui jitótiai meine cáadino jaillano jino cíotallirumo iere izire úiñoidiaíoi.

20 Ua comínimo ite fiénidifue ícoínia, nana afe Juzíñamui comuítaganuiai zuure fiállifuemo mamécaiaíoi. Dani íaíoi jítainamona aféfuemo mámeñegaiaíoi. Mei íadi Juzíñamui daií íaíoina mamede; afe ie comeci jítaina ízoi mamécaiaíoi.

21 Mei afémie nana ie finócanona riire ocuícafuemona oni jirénoiacade. Daje izói ie finócanona niné táinocaitifuemona oni jirénoiacade. Afe íaíoi jirénollifuemo Juzíñamui ñue coméciide. Daií íaíoi oni jirecaitaite, Juzíñamui jitótiaíoiri ebire jaícina joide cáimafuena íaíoi maiñórrillena.

22 Onódicaíza, jaíai fiénidifue bíniemo tainéinanomona, nana Juzíñamui finoca cáadinuiai abi izírenari murífrediaíoi. Ua jaíaímona nai biruimo, ringo úrue jocóacana llezica izínaila izói, nana ie comínina mámeñega comuítaganuiai izi cácadiaíoi.

23 Daa afémaci izi cácañenaza; daje izói cai izi cácaillano, afe caina jaícina ñúeitalliruido izire ocuíticai, Juzíñamui Ñuera Joreño caimo ite íadi. Juzíñamui ícoí aillo caimo fecalle caimátaillifuiaímona, bie Ñuera Joreño fueñe raire uícodo caimo iga. Mei íadi nai bíniemo iere zuure murífredicai; mei Juzíñamui jitótiai maméidicai íadi, móonidíza jíáie come íena

náamataja izói, cai ie náamatalliruimo ocuíríticaiza. Aféruimo nana fiénidifuiamona, naa jáie cai rairuíoide íaifuiari, Juzíñamui cai abina oni jirecaitate.

²⁴ Afe bie cai jílloifuemo úiñoidicai. Jesucristo daí caimo llogáuaimo afe jeire cai úamona, áfemo úiñoidicai. Afemo daí izire cai úiñoinado jíllogacai. Cai úiñoga raana cai ciónamona, jae áfemo úiñoñeiticai, mei jae íteza.

²⁵ Mei jáifodo cai ciónena raamo cai úiñoiadi, ja áfemo raire járitaño úiñoredicai. Iemona Juzíñamui Ñuera Joreño, Juzíñamui jítotiaina cai maméinamo uaina nabaide.

²⁶ Daje izói Juzíñamui Ñuera Joreño mei nifue Juzíñamuimona cai jicállena ñue caina cánuaibite. Juzíñamuimona jaícina ie jitailla izói cai jicajana onóñedicai. Mei daí cai illa llezica, Ñuera Joreño come uaido jino llónide murilla uaido Juzíñamuimo caido izire jicade.

²⁷ Juzíñamui naga come comeci ífueña ñue onóillena izire jicánofiredimie. Afemona Ñuera Joreño caido daíacanana Juzíñamui ñue onode, mei Ñuera Joreño, Juzíñamuimo jaináidinodo Juzíñamui comeci jitailla izói izire íaioimo jicádeza.

Nana zuure íaifuiamona caifófeficairedicai

²⁸ Onódicaiza, Juzíñamui nana cómemo ífcaítifuiaina ñue jaícina mamede, nana íena izíruitino ñue íllena. Ua Juzíñamui comeci jítaina izói, ie jíriganano ñue íaioi íllena, Juzíñamui illa dígamie mo cómuitifuiaina ñue jaícina zúitafirede.

²⁹ Mei Juzíñamui nana ie uícodo onóigano nanómona mamede, ie Jitó illa izói íaioi íllena. Bie izói íaioi íllamona Juzíñamui Jitó ámatiaina itaioi. Afemona aillo ite ámatiai cígimona Jesucristo dama námiena jaide, Juzíñamui jaiái uícodo mámia izói.

³⁰ Nana daí ie mamécanona, daje izói íaioina jíríte. Nana ie jíriganona, daje izói ie anamo ñue jaícina itábicaítate. Daje izói, nana daí ie anamo ñue jaícina itábicaítaganomo Crístomo nitaca ebíredifueña afe izói íaioimo nitade.

³¹ ¿Bífueña nie izói dáíticai? Juzíñamui cai dibénemo íadi, ¿mei bu caina anáfenolle? ¿Cai anáfenoitena íñede!

³² Juzíñamui dama ie daade nahí Jitona cáimona rairuíñede. Mei jáifodo nana ñue cai jílloillena, ie daade Jitó titállena jeruíño fecade. Iemona onódicaiza, nana jáie cai jitailla ríiduana naa ie Jitóoiri nágarui caimo fecáfireite.

³³ Juzíñamui nizécamacimo, ¿bu fiénidifueña nitárena? Afe izói nitaitimie íñede, mei afémaci nífuenidinona Juzíñamui jae jino uáfodo llógaza.

³⁴ Afe Juziñamui nizécanona, ¿mei bu duere finótarena? Iaioina duere finótaitimie jae iñede, mei Jesucristo íaioi ícoinia tíizabiteza. Afe baimo Jesucristo tíillanomona meine abido cáadimiena jaillano, Juziñamui nabézimo ráinazaide, dinómona Juziñamuimona cai ie canóllifuena izire jicállena.

³⁵ Cristo cai ie izíruillana, ¿bu mei féitarena? ¿Meita duere cai zefuíadi, Cristo caina izíruillana féitaite? Féitanide. ¿Meita llotáiredifuiái caina ie izíruillana féitaite? Féitanide. ¿Meita fieni caina finóacadino caina ie izíruillana féitaite? Féitanide. ¿Meita júbietailafue caina ie izíruillana féitaite? Féitanide. ¿Meita inícuironinafue caina ie izíruillana féitaite? Féitanide. ¿Meita jácifuiái caina ie izíruillana féitaite? Féitanide. ¿Meita tíizailafue caina ie izíruillana féitaite? Féitanide.

³⁶ Juziñamui Cuega Uai bie izói dáideza:

Nágaruillai o ícoinia tíillanomo ánozitagacai, mei íadi tíiñedicai.

Daje llezica caina titalle ovéjiaí izói mamédiaíoi.

³⁷ Mei íadi nana bie zúuredifuiáimona, caina izíruitimie Jesucristodo, caifófeficaidino baimo ñue jino jáidicai.

³⁸ Iemona ñue onódicueza, Juziñamui cai ie izíruillana ráruitena iñede. Naga raamo cai jíriadi Juziñamui féitañeno caina izíruioide. Cai tíillifue Juziñamui caina izíruillana cáimona feitañeite. Daje izói bíniemo cai cáanafue caina ie izíruillana cáimona rairuínide. Daje izói Juziñamui abi imaci caina ie izíruillana cáimona rairuínide. Daje izói fieni ríinorede joríaí caina ie izíruillana cáimona rairuínide. Daje izói biruido comuídifuiái caina ie izíruillana cáimona rairuínide. Daje izói uire cómuitifuiái caina ie izíruillana cáimona rairuínide.

³⁹ Daje izói Juziñamui abi imácimona ríillaini caina ie izíruillana cáimona rairuínide. Daje izói Taifemo jaináidino ríillaini caina ie izíruillana cáimona rairuínide. Ua nana Juziñamui finócanuíaímona buna Crístodo caimo jino cíotaga izíruillana cáimona rairuínide.

9

Juziñamui jaiái uícodo Israel nairai nizede

¹ Ja birui jáífue ómoimo llóiticue. Crístomo cue jaináinamona táinona llóñeiticue. Daje izói Juziñamui Ñuera Joreño nabáioicaigacueza cue comeci urilla uai ñue jino deide. Afedo bie cue lloñifue nahí ua ráfueza, onódicue.

² Be ñie: nana cue nairái comíniri iere zúuruiticue. Afémaci Crístomo ñnoñenamona zúufueri comécina cuidíridicue.

³ Iemo mei cue dánamona nibai afémacina jíllotareniadi, Juziñamuina, “Mai fieni cue faido,” nibai raire dáititcue. Mei

Íadi cue daina izóí Juzíñamui cue faidódena, cue nairai imácina cánoñeite.

⁴ Afémaci jaii Juzíñamui nizécamie Israel, méifomo comuícana jáidino. Daje izóí afémacina Juzíñamui daide:

—Bimaci cue nairai, —daide. Afe mei íaioi cígimo ie íllado íemo ite áillue ebírede ríino Juzíñamui íaioimo jino ciótate. Daje izóí íaioina ie ñuera finóllifuii Juzíñamui íaioimo llote. Iemo Juzíñamui Moisédo ocuica uaina llogáiaioi. Daje izóí Juzíñamuina nahí caimátaitajana onótagaiaioi. Daje izóí Juzíñamui lloga caimare íaioi illíuai íaioimo íteza.

⁵ Bimaci mámecina jica jalleide judíuai jáiáidigimamona comuítagano. Íirainomo íaioi náiraimona Cristo cómena jócuai biga. Bífuiaimona Juzíñamui naga ráfuii jamánomo ocuállana onódicai. Iemona nana náiraiaimona illa dígamíai Juzíñamuina jaca ninomo fáicanocaiño onóbitarediaioi. Mai daí íteza.

⁶ Diga ñúefuii cue náiraimo duide; mei íadi Crístona náfueñediaioi. ¿Mei níbai? ¿Níbai Juzíñamui uícodo lloga Israelna ñuera daináuai figo déizaibiñede? Daí daíñedicueza. Jáífodo jóide. Nana Israel náiraina maméidinomona dáarie Juzíñamui nízeñegano.

⁷ Daje izóí Abraham méifomo comuídino dáarie ie nahí úruiaíñediaioi. Jaii uícodo Juzíñamui Abrahana daide:

—Dama Isáacimona cómutino o uáfuenta méifomo comuídina jaille, —daide.

⁸ Bie uai jáífuenta cai onótateza: Dámie ñuera náiraimo jócuado, dama áfede “Juzíñamui jítódicue” daínide. Mei jáífodo Juzíñamui uícodo daina uai fúitamona jocócana, dama afémaci ie uáfuenta méifomo comuídina mameina.

⁹ Juzíñamui Abrahana uícodo daina uai be ñie: “Uire afe nauí cue mamécaruimo meine bíticue; íemo o ai Sara jító jócoite,” daide.

¹⁰ Iemo nai jáífuenta ite. Rebeca jító íaillinoi dáamiena móorediaillinoi. Íaillinoi moo cai jáiáidigima Isaac. Afe jító íaillinoi guarázaillinoi.

¹¹⁻¹² Mei íadi íaillinoi nai jocóñeniadi, afe ménaillinoi nai nífuenina illa llezica, Juzíñamui Rebécana daide: “O jító nánoramie ie méifoide ama anamo jabóidimiena íte.” Juzíñamui daí daide, bífuenta cai onóillena: Afe íaillinoimona dáamiena Juzíñamui nizéllena dama Juzíñamui comeci jítaina izóí mamede. Afe Juzíñamui íaillinoimona dáamie níziafue íaillinoi finócafueмона comuñede. Dama Juzíñamui mámiamona íaillinoimona dáamie nizécamiena jaide.

¹³ Juzíñamui Cuegáuai bie izóí daide: “Jacob cue nizécamie, íemona cue izíruigamie, mei íadi Esaú cue ruifruigamie.”

14 Iemona dáarie nibai dáitiao: “Juziñamui daií dáamiena fia ruifruillano jáimie nizada máiñua jáicina jóiñede.” Mei íadi bie comini daináuai uáfueñede; jáicina jóiñedifuenta Juziñamuimo jaca iñede.

15 Mei Juziñamui Moisená ja dáideza: “Daa cómemo cue dúcaiacaniadi, afémiemo dúcaiticue. Daje izói daa cómena duéruillano riire ibana cue óiacañeniadi, íemo ibana óñeiticue.”

16 Bie Juziñamui daina uáimona onódicaiza: Juziñamui dáamie eneno nízia afe come óiacanamona daingo comuíñede. Daje izói afe come riire fínuamona Juziñamui níziafue comuíñede. Juziñamui afémie nízia dama cómemo Juziñamui dúcaiacanamona comuide. Daje izói afe ímana ie canóacanamona comuide.

17 Mei jíi, Juziñamui ie Cuegáuaido, Egipto illáimana daide: “Ja illáimana o jóneticue, cuemo ite áillue ríino jáimacimo odo jino cíotallena. Afe llezica iere duere o cue finólledo cue mámece naga náiraiaido jica jalléitaitio,” daide.

18 Ie jira onódicaiza: Juziñamui dama ie óiacana izói, daa cómemo dúcaite; íemo Juziñamui dama ie óiacana izói jáie come comécina riireitaite.

19 Bífuiamona daa come nibai cuena jicánoite: “Mei Juziñamui afe ie óiacana izói finófiredeza, jáifodo ínicai. Iemona ¿nibái mei fiénidifue ícoinia caimo nitáfirega? ¿Bu mei Juziñamui óiacanafuena uáitarena?”

20 ¡Aci! ¡Daií dainámie cacai! ¿O iere ua ímiedicue daidio, Juziñamuimo riire júfidollena? Mei nana Juziñamui comuítagacaiza bie jáifuemo coméciri. ¿Mei nibai nogo, afe nogo niráingona dáite: “¿Nibái mei cuena bie izói nitio? ¡Dáiñeite!

21 Nogo niraingo daingo ie comeci óiacana izói afe nogóraina nírede. Afe daje nógorafella átuedo daa ebire eroide icíruna nírede, íemo daje nógorafella enéfenemona jamai nogócirina nírede.

22 Iemona daje izói Juziñamui finócafuai ñúeraza, onódicai. Afémiemo ínoñedinona Juziñamui duere finótaacade, íemo ite fiénidifuenta gáñenana jino ácatallena. Afe llezica íemo ite aillo ñuera ríino jino comínimo onótaiacade. Mei íadi afémaci fiene illafue ibana raire otátañede. Ie icírafue anamo itínomo, Juziñamui raire comeci járitañede. Iaióimo dúide niné táinocaitallifuenta nai are ocuíñede.

23-24 Daje izói Juziñamuimo ite jamánomo ñuera ebíredinona comínimo jino onótaiacade. Iemona Juziñamui dáarie judíuai, daje izói dáarie judíoñedinona nizada íaióimo dúcaide. Dúcaillano íaióí fiene illafue ibana oñeno íaióí jíllotate. Afe

ie dúecaillado nizécanodícaí. Afémie jaíai uícodo, íemo ite ebíredífue mona afe cáiena oni caí maiñóllena caina mamede. Daíí fínuamona, íemo ite jamánomo ñuera ebíredífuíai Juzíñamui caímo jino fidítate.

²⁵ Jaíai Juzíñamui uai jino llórainma Oseas cuezgánicomo Juzíñamui bie izóí daíde:

Cuemo jaínáiñede comínina “Cúeiena” náamataíticue.

Daje izóí nauí cue izíruiñega náiraina “Cue izírui gamacina” mámeíticue.

²⁶ Daje izóí batí jíáie éniemo itínona Juzíñamui daina “Cue comíníñedi moi,” afénomo itínona “Cáataíte Juzíñamui jítótiaína mamélliaíoi,” —daíí Oseas daíde.

²⁷⁻²⁸ Mei íadi Israel nairai dibénemo Isaías daíde: “Israel comíní iere aillo jebuídíaíoi, ua monáillai fuédamo ite facádonide guamájaíai izóí, jamánomo áillomaci. Mei aillo jebuídíaíoi íadi, afe náiraimo Juzíñamui raire duere finótalle mei, daa dúemacina fiébitiaíoi. Dani afe dúemaci jíllóitíaiíoi. Mei jíí, Juzíñamui ie daina uai izóí náiraina duere zefuúllifue jino zuítaíte.”

²⁹ Dáamie Isaías afe duere zefuúllifue uícodo llote:

Mei jamánomo ríinorede Juzíñamui, caina due méífomo cómuitínona níiríñeniadi, Sodoma íemo Gomorra díga jofue nairai niné táinocailla izóí niné táinocaitícaí, —daíde.

Jesucristo caí jíllotalle ñúefue daje izóí Israel comínímo dúide

³⁰ Caí lloga uailíai bie izóí daííacade. Be ñie: Judíoñedíno Juzíñamui anamo ñue jaícina íaíoi illínona figo jenóñediaíoi, mei íadi Juzíñamuimo íaíoi íñnuamona, Juzíñamui anamo ñue jaícina itátagaíaiíoi.

³¹ Mei jíáífodo afe Israel nairai, (judíuaina maméidíno) Juzíñamui anamo ñue jaícina íaíoi itátáíte ocuilla uáillaina jenódiaíoi, mei íadi afe uáillaina ñue ícoímo figo dúcítañediaíoi.

³² ¿Níbaí mei afeno baíñediaíoi? Mei Juzíñamuimo íñnuado íaíoi comeci ñue jaícina jóillifuena jenóñediaíoiíza. Dani íaíoi nícidogafuíaímo comécíidiaíoi. “Níbaí aféfuíaido Juzíñamui anamo ñue jaícina íítícaí,” daídíaíoi. Ie jira Juzíñamui oreca jíllotaitímiemo, ñie Jesumo, uíeco ríire finódiaíoi; fínuano Juzíñamui anamo ñue jaícina íñediaíoi. Come íodo jáiadi éícitáilla izóí, Jesumo éícitáidiaíoi. Afémie íomo éícítáitate nofící izóídimie mei afémie ñúemie, mei íadi ruifíruigamie.

³³ Juzíñamui Cuezgáuai afémie dibénedo bie izóí úrite: Omoí cácareí, judíuái íomo éícítáitate nofící izóídimiena jónetícue.

Afemo comini éicitaillano oni nibéfodo báititai.oi.
Mei íadi nana íemo ínotino íena méairuñeitiai.oi.

10

¹ Cue ámatiai, nane ómoína dáititue: Cue nairai israelitas imaci jílloillena, nana cue comécido izire óiacaditue; íemo áfena Juzíñamui jicáfireditue.

² Bie ñúfue afémacimo nitáreditue: Juzíñamui comeci jítainafuemo nágarui iere járidofireditai.oi. Mei íadi áfena ñue jaícina íai.oi fidíñenamona daí táinomo járidotitai.oi.

³ Comini Juzíñamui anamo ñue jaícina ie itátallifuenta, íai.oi ifócimo ñue denóñede. Mei jíáfodo Juzíñamui anamo itábicañeno dani íai.oi mameca comeci ñue jaícina jóitaitifueno járidotitai.oi. Ie jira Juzíñamui lloga ñue jaícina itátaitifuenta maíñóñeditai.oi.

⁴ Mei jí, Cristo billano nana íemo ínotino Juzíñamui anamo ñue jaícina itátagaia.oi. Ie jira comini Juzíñamui eróicana ñue íai.oi íllena, Moisés ocuica uaimo dani íai.oi níciduafuenta Cristo jae féitate.

⁵ Ocuica uai jeire úado Juzíñamui anamo ñue jaícina cai illifue dibénemo Moisés bíena daide: “Nana ocuica uailai dáamie ñue ícoimo fuitáadi, áfede afémie are iite.” Mei íadi afe uáillaina ñue jeire otímiena íñede.

⁶ Mei jíáfodo, Jesumo cai ínogafuedo Juzíñamui anamo ñue jaícina cai illífuena Juzíñamui Cuegáuai bie izói daide: “O comeci anado bífuena daí jicánoñeno iri: ¿Bu mei caifo monamo jaille, Cristo ana cai jíllotatabillena?”

⁷ Daje izói bie jíáfue daíñeno iri: ¿Bu mei ana tíidino illánomo jaille, afénomona Cristo caina caifo jíllotatabillena?”

⁸ Juzíñamui Cuegáuai bie izói daide. Be ñie: “Aci, Juzíñamui jíllotaja uaina ja cacádiomoi. Ie llógamo ja comécidiomoi.” Bie uailai ómoimo cai lloga omoi ínollifue. Be ñie:

⁹ O fúedo jino comínimo “Jesús cue nahí Ocuíraima,” o daíadi, nane daje llezica afémie tíllanomona meine abido cáadimiena Juzíñamui jáitagamiemo o comécido o ínoiadi, ua jíllotio.

¹⁰ Mei Juzíñamui anamo ñue jaícina cai itábicaillena, afémiemo comécido ínoredicai; ie mei Jesucrístomo nahí cai jaináinafuena, cai fúedo jino comínimo llóredicai, áfede ñue cai jíllloillena.

¹¹ Juzíñamui Cuegáuai daide: “Nana íemo ínotino íena méairuñeite.”

12 Jesucristo nana náiraimo daje uaido úrite. Judíoñedinona énenoruiño daje uaido íaioimo úrite, naa judíuai diga. Nana nairai Ocuíraima daade Jesucristo; nana afémiemo jicádinomo afémie jaca dúecaifirede. Ja ie jira íemo ite jamánomo ñúfuiaimona íaioimo fecáfírede.

13 Mei Juzíñamui Cuegáuai daí dáideza: “Nana cai Ocuíraima Jesucristomo jicaitino jílloítiaioi.”

14 Mei íadi Crístomo nai íaioi íñoñeniadi, ua afémiemo jicánidiaioi. Daje izói afe jílolle uai nai íaioi ñue cácañeniadi áfemona nai ínonidiaioi. Iemo afe uai jino llóraima nai íñeniadi, afe uaina ua cacánidiaioi.

15 Afe izói, uai jino llóraimana nai íaioi ocuñeniadi, afe ñúfue uaina ua jino llónide. Jira Juzíñamui Cuegáuai bie izói llote: “Núfue lluaíbitimie billa iere ñuera.”

16 Mei íadi nana cue nairai imaci, Cristo daina ñúfueña jeire oñediaioi. Jaiái uai llóraima Isaías dama bie izói daide: “Ocuíraima, cai lluaíbigafuena jaca buna íñoñena!” daide.

17 Aféfuiaimona bie izói onódicaí: ñúfue fidínamona comini ínotinona jáidiaioi. Iemo dáamie Cristo daina uai jino lluaíbillamona, comini afe ñúfueña fidídiaioi.

18 Mei íadi jicánoticue: ¿Mei nibai nana judíuai afe ñúfueña fidíñediaioi? ¡leñede! Ja fidídiaioi. Juzíñamui Cuegáuai daje izói llote:

Afue llóraini úrilla uai nana énie náiraiáido cácaide. Íaioi daináuailai nana énie fuédamo jica itínuiaimo ñue jalleide, daide.

19 Dánomo nane jíáifuena jicánoticue: ¿Mei nibai afe cacánafue Israel comini ífócimo nai figo déíñede? Dáamie Moisés, Juzíñamui dibénedo fueñe uai ote. Moisedo Juzíñamui daide:

Ua comíñedimacimona ómoina úradoitaiticue. Daje izói abina onóñede nairai ícoinia ómoina íciritaiticue, daide.

20 Afe mei Isaías jacíruiño Juzíñamui dainafue llote. Be ñie: Cuena jenóñedino ja cuena baitíaioi.

Cuena jicánoñedinomo dama cue abina ja onótaticue, daide.

21 Israel nairai dibénemo Juzíñamui daináuai Isaías llote. Be ñie: “Nágaruillaído cue uaina náfueacañedinona uáidotícue. Mei íadi fairíoñediaioi. Daje izói cuena uáitaoidinona uáidotícue, mei íadi náfueñediaioi,” daide.

11

Israel náiraimona dáarie jílloítiaioi

1 Iemona nane jicánoticue: ¿Ja nibai Juzíñamui ie nizeca Israel náiraina ruífrua? ¡Jaca íeñede! Mei cue dama Israel

nairai ímiedicue. Daje izói Abraham izíedicue. Iemo Benjamín comínimona comuídicue.

² Jaiai ninomo uícomo íeiena onoiga Israel comínina birui ruífiruiñeite. Uáfueza, uai llóraíma Elías daina uaina onódiomoi. Aféuai Juzíñamui Cuegánicomo ite. Juzíñamuimo Elías jícaja llezica, Israel nairai fiени finócafuiyai íaioimo riire jitade. Daide:

³ “Cue Ocuíraíma, o uai jino llórainina fatíaioi. Daje llezica o íóbitalle illánuiaina niné táinocaitatíaioi. Afemona dama cue fiébilla. Iemo daje izói nane cuena titáacadiíaioi,” daide.

⁴ Mei íadi Juzíñamui ie uai fairíote: “Siete mil dígamaci eneno cúeiena ja níiriticue. Afémaci afe taino juzíñamui Baal jánaraí anamo caiñici ifodo dújuñediaíoi, ie íóbitallena,” daide.

⁵ Ie jira daje izói birui judíuaimona ínote dúemacina eneno mamécaíaioi. Juzíñamui nana comínimo dúecaillano daa bimácina oni eneno nízedo.

⁶ Bie níziafue Juzíñamui caimo dúecaillamona comuide. Iemona come finóacanamona comuñede. Mei íadi cai níziafue come finóacanamona comuideniadi, Juzíñamui caimo dúecaillafue nahí caimare dúecaillafueñede.

⁷ Bie daináfue ¿mei nífuena cai llote? Be níie: Israel comini íaioi jenoca Juzíñamui anamo ñue jaícifuena baiñediaíoi. Mei íadi Juzíñamui nízecca dúemaci afe íaioi jenócana otíaioi. Ie mei baiñédimaci Juzíñamui íaioi comécina ríiretade.

⁸ Juzíñamui Cuegáuai daí daide: “Bimácina Juzíñamui comécina tíidino izói finode. Uina cíoiñedino izói íaioina finode. Daje izói jefona cacáíñedino izói íaioina Juzíñamui finode. Nai afémaci jaca biruíllaimo bie izói itíaioi.”

⁹ Iemo jíai David Juzíñamuimo jícajano daide: Juzíñamui íóbitallena íaioi finoca güilláfuiyai táinona finódiaíoi. Afe jira Juzíñamuina daidicue: Mai duere íaioi finoiri. Iemona aféfuiai tácofo izói íaioimo jáíteza; daje izói llójeji izói jáíteza.

Afe táinona finócafuiaimo éicitailano izói duere finólliaíoi.

¹⁰ Daje izói uina nirídino izói mai mei íaioi jáilleza, Juzíñamui ñúefuiyai íaioi ónoñeilleza.

Iemo nágarui iere baizídaitaganona íitiaíoi, daide.

Judíoñedino jíllotafue

¹¹ Ja birui nane jícanoticue: ¿Ja níbai judíuai íaioi éicitailamona niné nana táinocaitalliaíoi? ¿Jaca íñédeza! Mei jíáfodo judíuai Juzíñamui lloga uaina cacáacañena llezica, judíoñedino aféuai cacáillano íaioi jíllóillifue maiñódiaíoi. Afe íaioi máíñua Israel comínina úradoitate, afe jíllonafue otino illa izói íaioi íllena.

12 Iemona judíuai íñoñenafue írainomo nana náiraiaina canode. Afe judíuai ícoimo fuitáñeno zóofenocailafue, judíoñedinona ñue canode. Mei íadi judíuai meine abido Jesumo ínuaille llezica, nana náirai jamánomo ñue ézicilliaoi.

13 Ja birui judíoñedinomo úriticue. Mai omoi cácarei. Mei judíoñedinomo ñúefue llujillena Juzíñamui orécacueza, afe bie cue llócaillifue mo iere járitaifiredicue.

14 Nibai áfemo riire cue táijinamona, cue nairai comini, omoi illa izói íacaitiaoi; afe izói íaioi íllena jitáidicue. Afemona afémacimona dáarie ñue jíllobicaitiaoi.

15 Mei Juzíñamui judíuai ruifruillamona nana jíáie nairai Juzíñamuimo comeci caimare uái illáfue na llogáiaoi. Iemo uire judíuaina íaioina Juzíñamui caimare daánomo uáidua llezica, iere jamánomo caimare nana íiticaí. Ua aféruimo tíide meine abido cáadena caimare illa izói caimare íiticaí.

16 Mei jíi, Abraham Juzíñamuimo dúinamona, nana ie anamo comuíoicaidino Juzíñamuimo dúidiaoi. Daje izói da amena jáinao Juzíñamui íeiena maméiadi, daje izói nana afe amena ícairuai Juzíñamuimo dúide.

17 Mei íadi dáarie Abraham anamo comuídino íaioi íñoñenamona Juzíñamui comínina íñeillena ruifruigaiiaoi; íemo ie uai jeire omoi úamona Juzíñamui comínina itátagaomoi. Afe ruifruigamaci ífomo jae jóonegaomoi; jóoneficaillano Juzíñamui Abraham imácimo lloga ñúefuai daje izói llínorediomoi. Ie jira judíuai ñuera olivo amena naa ie ícairuai diga izóidiaoi. Iemo omoi nano fueñe jazici amena ícairuai izóidiomoi, mei judíoñediomoiza. Jae judíuaimona dáarie íaioi íñoñenamona amena ícairo jaitaina izói jaitácaiaoi. Afe mei omoi ínuamona afe jaitácacairuai méifomo jóonegaomoi. Ua, jaiái jaitaca ícairuai jíáie aménamona méifomo zicóllena jóonegano izóidiomoi. Birui daje moi ícoraimo jaináidiomoi. Afe ñuera olivo íjido cáadiomoi.

18 Ie jira abina íñoñeno iri. “Olívomona jaitaca ícairuai izóidimaci baimo ñúeracue” daíñeno iri. Afe izói daínídiomoi, mei ñuera olivo moi ícoraiaina cáatañediomoiza; dani jíáinamona zicóllena jóonega ícairuai izóidiomoi. Mei uáfueza, dani Juzíñamui nizeca comínimo birui omoi jaináinamona ie lloga ñúefuai llínorediomoi.

19 Nibai dáamie dáite: “Dáarie afe ñuera olivo ícairuai jaitácaiaoi, afe méifomo cue jóonellena”.

20 Jíáinamona ñuera olívomo zicódiomoinia ñuera, mei íadi jaitaca izóidimaci jíáifo joide: Juzíñamuimo íaioi íñoñenamona jaitácaiaoi. Dani omoi ínogafuemona jóonegaomoi. Iemona

áfedo dani abina ñnonidiomoi. Mei jiáifodo omoi jaitábiza abina ñue omoi rairuiri.

21 Mei Juzíñamui nano nizécanona figo íaioi ñnoñenamona jiziñeno íaioina ruifruite, afémie daje izói omoi figo ñnoñeniadi, amena ícairo jaitaina izói, jiziñeno raire ómoina ruifruiteza.

22 Mai bífuego omoi coméciri. Juzíñamui daí omoi jóniano iere ñuera. Afedo afémie ómoimo dúecaifirenana fidídiomoi. Mei íadi nane afémie iere riire jaícina ocuídime, mei ie uaimo náfuenedimacina afémie iere duere finode. Mei jiáifodo afémie ómoiri dúecaifirede. Iemo fáicanocaiño ie uaina jeire omoi oíadi, ie dúecailla dibénedo ífireitiomoi. Afefue jeire omoi óñenia, jiái ómoina afémie jáitaite.

23 Mei jiáifodo judíuai nane abido ñnoia, afémaci abido dáanomo jofo jónelliaoi. Mei Juzíñamuimo meine íaioi jónelle riino ite.

24 Mei omo judíoñediomoiza, jica ite onínemaci izóidiomoi; Juzíñamui comínimo due jiza dúíñediomoi. Daí omoi illa llezica Juzíñamuimo omoi ñnuado, afémie ie comínina ómoina itátate. Ie jira nano fueñe ie nizécamacimona oni nibéfodo baídino íaioi ñnoiadi, abido daje ie comínina itátallena, Juzíñamui dibénedo jamánomo juánide.

Iirairuillaído Israel nairai jilloitiaoi

25 Amatiai, omoi cacai. Afe olivo amena ráfuenta ja ómoimo lloticue, uáfodo ónoñega Juzíñamui mamécafuena comécido omoi onóillena. Juzíñamui nanómona comécido mamérrillafuena ómoina fidítaiacadicue. Aféfuena óoillano Juzíñamui comínina omoi itátagafuedo abina ñnoñeitiomoi. Juzíñamui mamérrillafue bie izói joide: Juzíñamui Israel nabémacina comécina riire finode, mei íadi nano íanori íaioi comécina riiretade. Íaioi comeci riireta mei, Juzíñamui nana jiáie náiraina caimare uáidote, íaiomona nana Jesumo ñnotino nizéllena.

26 Nana Juzíñamui óiacana dieze íemo ñnotimaci ofille mei, nana Israel nairai jilloizitiaoi. Mei Juzíñamui Cuegáuai daí daide:

Cai Jílotaraima dani cáimona cómuite.

Afémie Jerusalén jófueмона biite. (Afe jofue jiáifodo Sióna nameide.)

Jacob meifo igímaiai íaifuiaina afémie múiñoite.

27 Íaioi fiénidífuiai oni cue dolle mei nana uícodo cue lloga ñúefuiai ñue fuite, daide.

28 Nana comini jilloille uai dibénedo judíuai fairíoñediaoi. Iemona judíuai Juzíñamui ruifruigaza, ie bacáuai imácina jáidiaoi. Ie bacáuai imácina íaioi íllamona Juzíñamuimo cai

nabáirillino comuide. Mei íadi Juzíñamui nai íaioina izíruite, íaioi jaiáidigimaiai ie nízia jira.

²⁹ Mei uáfueza. Juzíñamui ja ie fecaca raana abido bairóñede. Daje izói cai ie uáiduafuena jaca jiáifodo méidoñede.

³⁰ Naui Juzíñamui uaina ínoñediomoi; mei íadi jiái birui judíuai daje izói íaioi ínoñenamona Juzíñamui ómoiri dúecaizaide.

³¹ Ja birui nano áinori judíuai Juzíñamui uaina ínoñediaioi, Juzíñamui ómoimo dúecailla izói íaioimo dúecaillena.

³² Bie uáillaímona bífuena onódicai: Nana jiáie comini ie uaina dájerize ínoñediaioi. Ie uaina cai ínoñenamona fiénidifuiái finófredicai. Iemona Juzíñamui nana caina dájerize cai gaiga fiénidifuiaimo llaveca izóidinona jónete. Afémie bie izói caina daide, afe méifomo afémie nana caimo dájerize dúecaillena.

³³ ¡Diga Juzíñamui ebírede comeci ífuiái caimo ie dúecaillena, naa ie onóigafuiái diga! ¡Afémie iere ráfuena baitádimie! Uícodo ie mamérrillafuiaina cai jino llónidicai. Daje izói eneno dáarie comínina ie níziafuiaina, onóñedicai.

³⁴ Cai Ocuíraíma comeci úrillafuiaina buna onóñede. Daje izói afémiena bu llófuetimie iñede.

³⁵ Iemo jiái cai Ocuíraímamo raana izájitimie iñede, afe raa iba llínollena.

³⁶ Mei nana ráaniai Juzíñamui comuítaga. Nana afémie finoca; daje izói íeiena nana finode. Jaca zíñona Juzíñamuina íobioitaredicai. Aquíe izói íteza.

12

Juzíñamuimo ñue jaícina cai dúina uai

¹ Cue ámatiai, birui Juzíñamui caina dúecaillamona, ómoimo izire jicádicue. Dani omoi mai Juzíñamui anamo itábicairi. (Dani omoi comeci gáinafue finóñeno, mai Juzíñamui comeci jítainafue omoi finori, cai ie ocuilla izói.) Juzíñamui íóbitalle rille jaiái íemo jaiái feca izói, nai omoi caana llezica, Juzíñamui anamo dani omoi mai ñue itábicairi, íena ie ñue facátagamacina omoi íllena. Afe llezica dama íeiena eneno ñue finócamaci omoi íllamona, omoi ie ocuilla uai, mai jeire omoi oíri. Nana bífuiái ñue cai fínuamona, cai joréñodo Juzíñamuina caimátaitadicai.

² Biniemo ite comini comeci táinomo facáoidiaioi. Mai, afe izói omoi iñeno iri. Mei jiáifodo, omoi comeci ífuiái, mai jiáifodo méidori. Daíí omoi comeci ífuiái omoi méiduamona afe izói Juzíñamui nana o illafue cómfuena méidoite. Afemona Juzíñamui comeci ñue jítainafue ónoiticai. Daje izói ie jitaina ñúefue ónoiticai, naa ie cai íóbitallifuiairi. Daje izói ie ciona jaícina jóidifuiaina ónoiticai.

³ Juziñamui cuena dúecaillano cuemo jóonegafuedo, nana ómoína dáitícue. Juziñamui cai fibítajafuemo da comécina facáredicai. Afedo abí cai ínolle ñuera. Mei íadi afefue baimo táinodo ínnonidicai. Iemona nana ómoímona dámie, afefue baimo dama ie abina ínnoñeno iri. Mei jiáifodo illa dígamie comécina ñue jaícina facárede, Juziñamui íemo lloga ie comécimo Juziñamui comuítaga ínuaafue daína izói.

⁴ Da come abimo aillo táijide ráaniai ite. (Onoi jiáifodo táijide. Daje izói idai táijina jiáifoide. Daje izói fue táijina jiáifodo joide. Daje izói jefo táijina eneno jiáifodo joide.) Mei íadi daade cai abi íadi. Naga cai abimo ite raa eneno jiáidofodo caina canode. Daje tájinamo inédiaioi.

⁵ Daje izói, áilloziena Jesumo ínnoticai. Aillo cíoidicai íadi, daade abi izóidicai. Ua, Crísto mo dájena cai jaináinamona, dáamiede abina iticai. Dáamacidicai. Afe llezica dáamiedicai abimo ite táijide raa izói, dani conímamo dájena jaináidicai.

⁶ Naga cómemo Juziñamui jóonega tájinana fibíllafue jiáifodo joide. Juziñamui comeci óiacana izói, afémie naga cómemo fecade. Bie tájinana fibíllafue ñue jeire óredicai. Dáamiemo Juziñamuimona onoiga uailai jino llóllena fibítaga. Afemona áfena afémie rairuíño jieruirede. Nano ie ínogafue íllaze jino llófuere de.

⁷ Jiáimaci cai canófireille fibíllafue Juziñamui caimo jóoneiadi, áfede rairuíño canóredicai. Daje izói llófuiana fibítagamie, afe ie llófuefirenamo ñue járitairede.

⁸ Afe izói jiáima comécina náiretallena fibítagamie, áfemo afémie ñue járitairede. Daje izói comini canolle raa fécafiredimie, afe íbana ie maiño llemo comécinide. Fia íaioimo dúecaillano fecádenia ñuera. Afe izói comini jetállifuenta ocuídime caimare abi rairuíoicana ocuírede. Duéredino canófiredimie, caimare íaioína canórede.

Jesumo ínnotino finórede uai

⁹ Táinona lloño conímama izírui. Íafue bai oño iri, mei íadi ñuefue jeire omoi óiri.

¹⁰ Jiáimana caimare nahí ama izói izírui. Afémiemona raire uícoficaiño iri, mei jiáifodo méifomo fiéño raire íena o uícodo o otátari.

¹¹ Ráiraieño jiere omoi iri. Ñue naire cai Ocuíraimamo omoi tájiri.

¹² Cai ocuírinafue mona caimare omoi ífireiri. Duere omoi zefuíadi, áfemo raire járitaiño, fíaicana caimare úriri. Juziñamuimo úrillana jaca féitaño iri.

¹³ Jesumo ínnotino jitaila raana, íaioi canóllena jeruíño fecari. Nana omoi jofomo uáiduaíbitinona caimare uáidori.

14 Omoi fieni finódinona ñue caimátaitari. Iaiói ibana fieni faidóñeno, íaiói cáimafuiai Juzíñamuimona jicari.

15 Caimátaidino diga caimare omoi iri. Daje izói raamo jiridinomo omoi dúecairi. Eedino diga omo eeri, íaiói fírallena.

16 Conímana úradoiñeno iri, dájena illa dígamíemo ñue coméciri. Daje izói fieni abina íinoñeno iri, mei jíáfodo comécina mánaidino izói omoi iri. “Iere baitádimíedicue” comécido daiíñeno iri.

17 Da come fieni omo finóadi, afe ibana afémiena fieni finóñeno iri. Mei jíáfodo, nana comini eróicana iba oñeno ñue o finori.

18 Omoi illa dino, nana comini comeci jacíruiñenafuedo caimare uái omoi iri.

19 Cue izíruiğa ámatiai, fiénidifue comuíadi, ibana omoi oñeno iri. Mei íadi aféfuena fáicanocairi. Afémie Juzíñamui duere finólleza. Mei jii, Juzíñamui Cuegáuai daide: “Duere finóllifue cuemo dúideza. Daje izói cue iba ólleza. Daií cai Ocuídímie daide.”

20 Nane dánomo daide: “O bacáuai ímie jufírui, icíñeno íena ecari. Iemo afémie jiróacaniadi, ie o jirótari. Bie izói ie o fínuamona, izire íena méaicaitaitio,” Juzíñamui Cuegáuai daií daide.

21 Fiénidifue omoi anáfenuamona abí omoi rairuiri. Mei jíáfodo ñúefue jeire omoi úado, fiénidifuena mai omoi anáfenori.

13

1 Nana comini omoi jamánomo ocuídillaima ocuica úiñotillaini anamo ñue omoi itábicairi, mei nana ocuídillaini Juzíñamui jóonegaza. Afémie jóoneña ocuídímiena íñédeza.

2 Iemona afe úiñotillaimana uáitaoidímie Juzíñamui jóonegamiena uáitate. Nana daií uáitatino, afe ie uáitaja ícoinia afémacina Juzíñamui duere finótaite.

3 Mei jii, ñúefuena jeire ófiredino ocuídillainina jacíruiñeitiaíoi; mei jíáfodo fieni finódino jacíruiñena jóonegaiíoi. ¿Meita ocuídillaimana jacíruiñedímiena íacadio? Mai ñúefuena jeire o oíri. Iemona aféllaima “Facátagamíedio” ona dáite;

4 mei afémie Juzíñamui tájitagamíeza, ñúefue dibénemo o jaináillena canóllena. Mei fiénidifue o finóadi, aféllaimana jacíruiñedio, mei afémie duere finótalle riino táinomona íñegaza. Uafue, afémie Juzíñamui tájitagamíe nana fieni itino duere finótallena. Nana íaiói fieni finócafue íllaze ñue jaícina íaióina duere finótaite.

⁵ Ie jira ocuídillaini anamo itábicairedi omoi, daa duere omoi fínobiñeillena, mei íadi daje izói Juzíñamui jóonega omoi comeci úrilla uai jeire omoi óllena.

⁶ Afe bie izói ñue omoi íllena, ocuídillaini lloga gobiérmomo íbárede úcubena íbáfiredi omoi. Mei jii, aféllaini Juzíñamui táijitagano. Afe íaioi táijinamo izire járitaoidiaioi.

⁷ Iemona naga cómemo dúide raana, mai jeruñeno ñue íemo ine. Gobiérmomo cai jaináinamona, íaioi ocuica úcube llínoraima lloga gobiérmomo dúide úcubena mai omoi fecari. Daje izói gobierno caimo jicana oga raa, emódomo raiñócana áfena mai omoi ibari. Naga ocuídillaimamo dúide ñúefuedo jacírui oinafue, áfedo ñue íena omoi jacírui. Daje izói naga jamánomoidillaimamo dúide ñúefuena, mai áfena íemo omoi nitari.

⁸ Omoi zaitaiñega íbállifue na bumo itáteñeno iri; jáífodo daa ñue íbállifue ite. Afefue jáíamano cai izírui llifue. Afemona dani conímaiaina izírui redicai. Mei naga conímano izírui timie, áfedo Juzíñamui ocuica uaina ñue jaícina fuitádeza.

⁹ Jaiái Juzíñamui ocuica lletara uailai daide: “Jiruífue na finóñeno iri, cómena titáñeno iri, meríríñeno iri, jáíamamo táinona lloñeno iri, jáíamie mo ite ráaniairi úradoiñeno iri.” Mei íadi bie ocuica uailai naa jáíe lletara uáillairi daa bie dáinamo dájena itíaioi: “Dama o abina o izírui lla izói, afe izói o abi cómena izírui.”

¹⁰ Izírui timie ie abi cómemo fiénidifue na finóñede; íemona izírui llafuedo Juzíñamui ocuilla uailai ñue jaícina jino zuitárede.

¹¹ Nana bífuiaimo jeire omoi ua llezica, birui cai illáruillaimo ñue mai cai uibíoilli. Ja iere abi cai rairuillirui mo ja dúcidicai. Afemo ñue omoi comécioiri. Mei Jesucristo caina jllotajano uire jáíruido caina uáibiteza. Afe ie cai uáibillirui mo ja ánozide. Fueñe Jesús uaina cai ínua llezica, afe cai ie uáibillirui bai jica ite, mei íadi birui ja aféruimo itícaiza.

¹² Bie énie fiénidifue árera naio izoide. Afe bie árera naio ja monáiacade. Jítinomo finoca fiénidifuiái finuana ja fáicanocairedicai. Fuiríraima ie abi riidua llojeco jítaja izói, afe izói íaifue cai fínoñeillena cai comeci rairuillafue na jeire óredicai. Ie mei ñúefuedo, úzefomo itino izói macáredicai.

¹³ Ua, úzefomo itino izói, mai ñue jaícina cai macalli. Jifáifirena fuemo mai cai íñeilli, naa fiénide aillo güillárenafuiari. Afe izói nana jiruífuiaimo mai cai íñeilli, naa jáíe comeci meáire óiacanafuiari. Daje izói dájena coméciiñedimaci izói íñeno omoi iri. Iemo jáíe fiénide júfidogafuedo mai cai úriñeilli, naa úradoillafuiari.

14 Mei jáífodo Jesucristo ñue illa izói, ie cánuado afe ñue illáfuemo mai omoí iri. Omoí comécimo ite fiene óiacanafuemo, áfemo mai omoí coméciñeno iri. Daje izói, afefue omoí finóllemo mamériñeno omoí iri.

14

O ama jánana fiene úriñeno iri

1 Juzíñamui uai como fueñe jabo ínotimiena, ñue jofu omoí cígimo llínori. Afémie ínogafuena féitaiacaniadi íena caimare uáidori. Ua, ie ínoga onóñega uáillaimo aillo omoí úridoñeno caimare íena omoí uáidori.

2 Mei jí, “Naga raana íairuiñeno güíredicai,” daíífiredinona ite. Daje izói dáarie Juzíñamuimo jabo ínotino “Rillena riñeno da ria llizíllana güíredicai,” daíífrediaíoi.

3 Ie jira naga raana güítimie mai afe rillena fímairitimiena jámairuiñeno iri. Afe izói, fímairitimie, mai naga raana güítimie comece fiene facáñeno iri. Mei Juzíñamui afe íaillinoí, íemo ínuamona, ie comínina caimare íaillinoína uáidoteza.

4 Afémaci Juzíñamui ocuícamaciza, íaíoiña fiénidifuedo jicánonidio, mei afémaci óieñedeza. Dani íaíoi ocuídimiemo uai orédiaíoi. Íaíoi illafue riire jicánollena dama íaíoi ocuídimiemo dúide. Ocuícamie illafue ñúenia, ie ocuide Juzíñamui uícomo méairuiñeno náidaite. Ie illafue fiénia, ie ocuide Juzíñamui duere íena fínoite. Mei íadi afémie ñúefue dibénemo féitañeno íite, mei cai Ocuíraíma Jesucristo ríinoredeza, afémiena ñúefuemo jáicina jáináitallena.

5 Daje izói, dáamie nágaruillai baímo daa illirui eneno rairuide, Juzíñamuina caimátaillena aferui judíuai ráfuena jira. Jáíamaci naga mona daje izói ñúeruillai, daídíaíoi. Illa dígamie dama ie comece úrillafuena ñue onótaredeza.

6 Daruína eneno ráiruitimie, cai Ocuíraíma íóbitallena íeiena íllamona, aféruina eneno rairuide. Daje izói nana raana güítimie cai Ocuíraíma íóbitallena íairuiñeno güífirede, mei afémie afe güíleri Juzíñamuina “Íere figora” dáideza. Daje izói cai Ocuíraíma íóbitallena fímairitimie fímairillano Juzíñamuina “Íere figora” daide.

7 Nana cáimona buna dama ie comece íóbioillena ínide; daje ízoi buna dama ie comece íóbillena tíñede.

8 Cai caana llezica cai Ocuídimiemo jáináidicai. Daje izói cai tíadi, nai íemo jáináidicai. Iemona cai caana llezica, mei nibai cai tíilla llezica, jaca cai Ocuíraíma íédicai.

9 Mei jira Cristo tíizaibillano, meine abido cáadimiena jaide, cáadino náamata izói, daje izói tíidinona náamatallena.

10 Mei íadi comínina náamañedio. Iemona ¿nibái mei o ama jánana fienu úrillano íena riire jicánotio? ¿Nibái mei íena izíruiñeno jámairuitio? Mei jii, nana cai Cristo uíecomo ácatallícaí. Afénomo afémie caimo itífueña riire jicánoite.

11 Juzíñamui Cuegáuai llote:

Uáfueña jaca ninomo cáadimíena cue íllana onódiomoiiza; afe izói uáfueña nana comíni cuemo eróicana íaiói cañici ífodo dújuzai bitiaíoi.

Daje izói nana comíni jino uáfodo ñúefueña Juzíñamuimo nítaitiaíoi, daide.

12 Iemona jae onódicaíza, cáimona illa dígamie dama ie illáfueña afe Juzíñamuimo jáanoñeno jino íemo llórede.

O ámana ñúefueña oni nibéfodo baiítañeno iri

13 Ie jira benómona mai conímaíaina comécido fienu úriñeno iri. Mei jíáfodo, nágarui omoi finócafuiáido conímana fiénidífueño omoi baiítañeno iri afemo mai ñue omoi mamériri. Daje izói omoi illáfuedo afémíena fienu facátañeno iri. Afemona abí omoi rairuiri.

14 Jae onódicueza, nana güille naa rílleniáiri, dama íainideza. Ua, cai Ocuíraíma Jesumo cue ínuamona, ie daína izói, cómena íáiruitaite güille íñédeza, ñue onódicue. Daa “Bíena cue güíadi cuena íáiruitaite” comécido daidímíemo, afe raana afémie güíadi íena íáiruitarede.

15 Mei jíáfodo, o ama comécilla rairuica güille o güíllamona o ama o rítaiadi, íena ja figo izíruiñedio. Mai daade o güíacaga güíllado, Jesumo o ínote ama íaífueño féiraitañeno iri; mei afémie jíllloillena Cristo tíizaíbiteza.

16 Omo ite ñue finócafuiáido jíáimacina fienu úritañeno iri.

17 Mei jii, daa cai güiga raado Juzíñamui comínimo jáináíñedicaí; daje izói daa cai jiroca raado afémacimo jáináíñedicaí. Mei jíáfodo Juzíñamui anamo ñue jáicína cai íllamona Juzíñamui comínimo jáináitagacaí. Daje izói Ñuera Joreño caimo comuítaga caimare comeci uái illáfuedo, afe díbenemo jáináitagacaí. Daje izói íeri cai íóbioíllafuedo, dájena ie comínimo jáináitagacaí.

18 Cristo lloga iodo jailla llezica, nana bífuiáina jeire otímie Juzíñamuina íóbitade. Afe llezica afe izói finófiredino comíni ñue facátagamací.

19 Iemona, naga come conímana caimare uái itátatífuiáina nágarui mai cai jenófireílli. Daje izói conímana Juzíñamuimo baímo izire jáináitaja raa, mai cai jenófireílli.

20 Daa o óiacaiga güíllado, daní omoi cígiri Juzíñamui comuítaga caimare dájena omoi jáináinana, mai fia táinomo

fáifitaño iri. Uafue, nana Juzíñamui finoca güille güirede, mei ja ñúeraza. Mei íadi daa o güiga güilledo jiáimana ñuera íomona oni nibéfodo o baiítaiadi, afe fiénide.

21 Daje izói rille o ríamona jiáimana fiénidifuemo o baiítaiadi, ríllena o ríñeille, afe baimo ñuera. Afe izói vino o jíruamona íena ie ínogafue o uáitaiadi, vínona o jiróñena afe baimo ñuera. Daje izói nana o fínuafuiaimona jiáima ínogafue jabo o féitaiadi, afe o finócafue fiénide. Mei íemona afefue o finóñedionia jamánomo ñuera, o ama ínogafue o féitañeillena.

22 Iemona bie güillafue, nibai güíñenafue dibénedo o ñuera ínogafue fáicanocaiño, Juzíñamui eróicana dama óiena ñue o mameri. O comécido mamérimona finóacagafuai dibénedo ñuera o daiñeniadi, áfedo caimare itio.

23 Mei íadi dámie Juzíñamuimo figo ínoñenamona ie güille jízireoicana güíadi, afémie fiénidifuemo báide. Mei Juzíñamuimo ínuamona cai onoiga íena íóbitallifue cai finoca ñuera, mei íadi nana aféfuiai jinomo cai finócafuai fiénideza.

15

Dama o abina íóbitaño o ínote ámana ñue íóbitari

1 Nane Jesumo ínotinuiamona dámerie ñue ríinorede. Jiámaci figo comécina náinidiaioi. Cai ja comécina ríinoredinodicai, íemona nai comécina ríinidinona canóredicai. Afefue caimo llonódacaigafue. Afedo dani cai abina íóbitanidicai.

2 Cáimona illa dígamie ie ínote ámana íóbitarede, afémie ñue íllena. Daje izói íena Juzíñamuimo aillo ínotaredicai.

3 Mei Cristo dama ie abiri íóbillena jenóñede. Mei jiáfodo Juzíñamui Cuegáuai íemo zúilla. Afe uai daide: “Afe báíñoridino Juzíñamui jiáima báíñoia cuemo baite.”

4 Nana jaiadi uícodo Juzíñamui Cuegáuailai cai llófuellena ciega. Aféuaimo cai comeci fírajaja uai baiticai. Afe izói bíuai cai facáduamona comeci járitañenafue caimo comuide. Iemona Juzíñamuimo íco cai nabáirizailliruimo ocúridicai.

5 Juzíñamui afe comeci járidoñenafue llotímie. Daje izói afémie, cai comeci fírajano caina náiretade. Iemona omoi ie canóllena afémiemo jicádícue, illa dígamie jiáimaiari dájena caimare omoi íllena. Mei Cristo Jesús dai caina dáideza.

6 Afe llezica, dájena omoi comécillena íemo jicádícue, cai Ocuíraima Jesucristo Moo Juzíñamuina dáauaido omoi caimátaitallena.

Judíoñedinomo Juzíñamui ñúefue jae llujiga

7 Mei daíi Cristo caimare cai uáidua izói, afe izói conímana caimare omoi uáidori, Juziñamuimo ebíredifue nitállena.

8 Mei bie cue daina uai: Cristo judíuai ñue finuaibite. Nana Cristo táijina fueñe judíuaimo dúide, cai nanóidigimana daina uai ñue fuitállena. Afedo Juziñamui ie méidoñega llogáuaina caimo jino ácatate; mei Juziñamui afe ie daina uai jaca jiáifodo méidofinideza.

9 Daje izói judíoñedino Juziñamuimo ióbillena Cristo ana bíniemo bite. Iemona Juziñamui íaioimo dúecaillari ióbidiaioi. Juziñamui Cuegáuai jaiái uícodo daíi daide:

Ie jira afe izói judíoñede náiraiái cígiri omo caimátaiticue.

Omo ñúefue cue nitalle rua afémaci cígimo róiticue.

10 Ie mei jiáinomo Cuegáuai daje izói daide:

Judíoñede náiraiái mai omoi cáimacairi, naa Juziñamui imáciari.

11 Nane jiáinomo Cuegáuai daje izói daide:

Naga judíoñede náiraiái, cai Ocuíraima ióbiri.

Mei afe Juziñamui jamánomoidimieza, íemo omoi ióbiri.

12 Mei daje izói Isaías cuete:

Isaí (illaíma David moo) ie méifomo comuídigimamona jamánomoidillaíma cómuite.

Afémie nana judíoñedino cígiri illáimaite.

Afe comini afémiemo ocuírítiaioi, daide.

13 Juziñamui caina íemo ocuírítaita. Ie jira íemo omoi íinuamona ñue cáimafue jeire omoi óllena, afémiemo jicádícue, daje izói omoi comeci caimare uái illafue jicádícue. Afe llezica Juziñamuimo omoi nabáirizaillena birui jabo ocuírídiomoi. Afemona Ñuera Joreño ríinodo ñue izire omoi ocuírillena Juziñamuimo jicádícue. Mai mei daíi Juziñamui ómoína ñue éziciiteza.

14 Cue ámatiai, ñue onódicueza, ñúefuiaina jeire otíomoi naa omoi fibítainafuiari. Daje llezica illa dígamie jiáimacina caimare llófuiana onódiomoi.

15 Mei íadi bie cue cuegábedo, bíuailai ómoimo iere jino uáfodo cueticue, afe uáillaina omoi féitañeillena. Juziñamui cuemo dúecaillano cuemo jónenocaigafue jino llotícue.

16 Bie cue táijinafue: Juziñamui lloga cai jílloillifue ómoimo cue llujállena. Afefue ómoimo llotícue, Juziñamui íena omoi maméillena, mei judío imáciñediomoiza. Ie mei, Juziñamui ómoína caimare uáidoite, mei omoi ja Ñuera Joreño ñue finócaomoiza.

17 Mei daíi dama Jesús cue íinuamona, Juziñamuimo cue táijinafuerei ióbillano caimare iticue.

18 Dama Cristo cuedo finócafuiari llócaiticue, mei áfedo judíoñedino Juziñamui uaina jeire otátaticueza. Jiáimie

tájinafuena jaca jino llócañeiticue. Afe íaioi Juzíñamui uaillai jeire ua, cue daina uáillaído jino ñue ícoimo fuitádicue. Daje izói cue ñue tájinado íaioina ñue jaícina ñnotadicue.

19 Afe izói jino cue ciotaga uaido comuítaga ciórainina ráamona íemo jíáie onóillena finócafuiari, íaioina ñue jaícina ñnotadicue. Daje izói Ñuera Joréñomo ite ríinodo íaioina ñue jaícina ñnotadicue. Bie izói cue finuamona Jesucristodo cai jilloillifue llujillena ja ñue ícoimo fuitádicue. Ua Jerusalemona oni jica nágobiaído aféfuena llócaidicue. Ua ícoimo Ilírico éniemo záitajidicue.

20 Afe daí, nai jaca Cristo mámecina cacáñedinuaimo, afe ñuera cai jillonafue llócaidicue. Daí oni jicado llócaidicue, jíáima jae llógamo dáanomo nane cue llóñeillena.

21 Mei íadi Juzíñamui jaiai Cuegáuai daina izói: Juzíñamui ífuena nai lloñéganuai afémiena ñue ónoítiaioi. Daje izói jaca íena cacáñedino nane aféfuena como fídítiaioi, daide.

Pablo Rómamo jáillena comeci facade

22 Diga icaiño omoi uáiduallena comeci facáfiredicue, íadi jaca jáinidicue. Mei como ómoimo cue lloga oni nágobiaído cue llócaigafuemo záitaiacadicueza; bínidicue.

23 Mei ja birui bígobiaído cue tájicana ja fuitádicueza. Jaiai diga fimónaiái omoi diga íacadicue.

24 Ja birui Españamo cue jáizailla llezica ómoína méiñuaibiacadicue. Omoi cígiri cue illa llezica, iere caimare íiticue. Afe mei Españamo cue jáiacana llezica, omoi cue canóllena jítaiticue.

25 Mei íadi birui fueñe Jerusalemo ite ámatiaí canolle raa úiticue.

26 Macedonia énie imaci, naa Acaya énie comíniri, Jerusalemo ite dúredino canolle úcube ofítallena maméritiaioi. Afe íaioi ofítaga úcube cuedo Jerusalemo óreitíaoi.

27 Afe bie úcube oréllemo ñue comécíidíaoi. Mei jíi, afe-fue ñue jaícina joide. Uafue benó ítimaci afémacimona aillo comeci cáimafuiaí íbáñeno itíaoi. Iemona birui Jerusalemo ite ñnotinomo raire íballe ite. Ua judíuaimo ite Jesumo ñnotino, íaioimo ite comeci cáimafuiaí, jae judíuaiñedinomo dájeze fecádíaoi. Iemona benó Macedóniamo ite ñnotino naa Acaya ñnotinori, judíuaimo ite ñnotinona, afe íbana íaioimo ite úcubedo canóacadiáioi.

28 Bie íaioi afémaci cánua mei, afe izói íaioi jóonega úcube cue izájille mei, Españamo jáitícue. Ua omoi uáídocana afénomo jáitícue.

29 Ñue onódicueza, omoi cígiri cue dúcille llezica, nana Cristo uáimona comuide cáimafuiai ómoimo llófuere dicue.

30 Amatiai, cai Ocuíraima Jesucristo mámecido izire ómoimo jicádicue. Daje izói Ñuera Joreño caimo comuítaga izíruillafuedo izire ómoimo jicádicue. Mai, cue diga dájena omoi iri, Juzíñamuimo dájena cai úrilla. Juzíñamui cue canólleza, mai izire omoi jicari.

31 Dinó Judea éniemo ite ínoñedino cue íaiói llaitáacanamona cue ie zuitálleza izire Juzíñamuimo jicari. Afe llezica bie cue uiga Jesumo ínotino canolle úcube caimare íaiói llínolleza, daje izói Juzíñamuimo omoi jicari.

32 Bie Juzíñamuimo omoi jicáfireillifuiai ómoimo jóonenocaidicue, Juzíñamui comeci jítaina izói omoi illánomo caimare cue dúcillena. Afe mei omoi cígiri nano áinori cue ílledo cue comeci ñue náireite.

33 Mai, comeci caimare uái illáfueña fecade Juzíñamui omoi ñue nábaiteza. Daiítadeza.

16

Pablo ie onóigamací uáidote

1 Birui cai Jesumo ínote miringo Fébena, ómoína caimare uáidotadicue. Afengo Cencrea jófuemo ite Juzíñamuimo gairídímaci canófiredingo.

2 Cai Ocuíraima mámecido aféngona caimare omoi llínori. Mei nana Jesumo ínotino illa dígamie jíáimana daií caimare llínofiredeza. Daje izói nana afengo jitailla raana aféngomo omoi fecari. Afedo aféngona canóredíomoiiza, mei afengo jaiái aillo comínina canófiredeza. Iemo jíái daje izói cuena canódeza.

3 Iemo Aquílamo ie ai Priscila diga, uai orédicue; mei afe íaillinoi Cristo Jesús uaimo cue táijicana llezica cuena nabáidiaillinoi.

4 Jácinomona cue íaillinoi jíllotado íaillinoi illafue jacire fiévide. Aferi afe íaillinoína “Iere figura” daidicue. Dama cue daií daiíñenaza, nana judíuainedínomona gairífirede ámatiai daje izói “Iere figura” daidíaiói.

5 Daje izói Aquila Priscila jofomo gairífirede cai ámatiai uáidori. Daje izói cue izíruiga nabai Epeneto uáidori. Afémie fueñe Acaya éniemona Crístomo ínotímie.

6 Afe izói ómoido iere táijifiredingo María omoi uáidori.

7 Iemo llavéracomo cue llaveina llezica, cue diga llaveca cue nabai Andrónico, Junias diga, daje izói afe íaillinoi omoi uáidori. Cáizie ímie íaillinoi. Jesús orécamacimona mámecina

jica jalleide íaillinoi. Afe íaillinoi nai Crístomo cue ínoñenia, raire uícodo Crístomo ínotiaillinoi.

⁸ Afe izói cue izíruiga nabai Amplias uáidori, mei cue izói cai Ocuíraimamo jaináideza.

⁹ Iemo Cristo Jesumo cue táijina llezica, cue nabai Urbano uáidori. Daje izói cue izíruiga Estaquísmo uai orédicue.

¹⁰ Afe izói Apeles uáidori, mei diga ícaíño Crístomo ie ínogafuena afémie jino comínimo cíotateza. Daje izói nana Aristóbulo comíni uáidori.

¹¹ Cue nairai ímie Herodiómo daje izói uai orédicue, naa cai Ocuíraimamo ínote Narciso comíniri.

¹² Daje izói Trifena ie ai Trifosa diga uáidori. Afe íaillinoi cai Ocuíraima táijinamo táijifirediaillinoi. Daje izói cai izíruiga miríngo Pérsida uáidori, mei afengo cai Ocuíraima táijinamo táijifiredeza.

¹³ Iemo mámecina jica jalleide Ocuíraimamo ínotímie Rufo uáidori, naa ie ei diga. Afengo aillo cuena ie izíruillado cue ei izoide.

¹⁴ Daje izói Asíncritomo uai orédicue. Iemo Flegonte, íemo Hermas, íemo Patrobas, íemo Hermes, daje izói íaioiri ite ámatiaí uáidotícue.

¹⁵ Daje izói Filólogo, Julia, Olimpas, Nereo, naa ie miríngooiri uáidori. Iemo nana íaioiri ínote ámatiaí uáidori.

¹⁶ Mai, illa dígamie Crístomo izíruillamona conímána caimare uáidori. Daje izói benó Juzíñamuimo gairíracuai imaci ómoímo uailai orédiaioi.

¹⁷ Amatiaí, bifue jeire omoi óllena izire jicádicue. Conímaiaína éoitadinomona abí omoi rairuiri. Afémaci jíáimana fiéni écitailla izói finódiaioi, omoi ñue ínogafue féitallena. Baimáci jíáimana énenoruitaitiaioi. Bie íaioi lloga uai, nauí omoi cue llófuiafuenta uáitaacadeza. Afémacimona oni jicado omoi iri.

¹⁸ Afe izóidino cai Ocuíraimo comeci jítaina izói íñédiaioi. Dani íaioi comeci gáinanomo táijidiaioi. Afe llezica íaioimo ite caimare ebírerie urilla uaido, comécina nífuenidinona jífuetiaioi.

¹⁹ Nana jíáie comíni Juzíñamui uai jeire omoi úana fidídiaioi. Iemona áferi íóbídicue. Iemo ñúefue dibénedo iere baitádimacina omoi íllena jítáidícue. Mei jíáifodo fiénidifue fínua dibénedo nífuenide onóñedimacina omoi íllena jítáidícue.

²⁰ Mei onódicaíza, comeci caimare uái illafue llote Juzíñamui Taife uaina anáfenoíteza, omoi ie áfedeñoíllena. Mei cai Ocuíraima Jesucristo ómoína ñue ézicíteza.

²¹ Cue diga táijiacade nabai Timoteo ómoimo uai orede. Daje izói cai nairai ímilai Lucio, íemo Jason, íemo Sosípater diga ómoimo uaillai orédiaioi.

²² Pablo ocuica rabe cúeraimadicue; cue mámecei Tercio. Daje izói Jesumo cue jaináinamona uai ómoimo orédicue.

²³ Benó ite Gayo ómoína uáidote. Birui afémie jofomo iticue. Daje izói nana Juziñamuimo gairíacadinomo íaioi dúcillena, afécona nano íanori íaioimo fiende. Daje izói cai jófuego ite úcubemo tájidimie Erasto, uai ómoimo orede. Iemo cai ama Cúartona mámeceiredimie uai ómoimo orede.

²⁴ Mei cai Ocuíraima nana ómoína ñue íllena éziciiteza. Daiítadeza.

Iraicaiño Juziñamuimo caimátaillafue Pablo úrite

²⁵ Juziñamuimo mai cai caimátailli, mei afémie omoi ínogafuena iere izire ínotaredeza. Cue ómoimo jino lloga cai jílluille uai daií dáideza. Daje izói Jesucristodo omoi cue llófuiáfue daií dáideza. Juziñamui jaijai ie comécido mamérilla izói, ja birui judíoñedino comécina ñue náiretade. Ua, bínie nai cómuifñenia, bífuena jica ia daií comécido mamede. Ja diga fimona jaide íadi, aféfuena báinino íteza, nai jino comínimo uáfodo llóñega.

²⁶ Mei íadi ja birui Juziñamui uai llócaidino cáiena fieca Cuegáuaido, afefue jae jino denoca. Bifue ziiño Juziñamui ocuilla izói caimo íficaide. Bie fueñe báinino Juziñamui comécido mamérillafue, ja birui nana náiraiamo jino cíotaga, aféfuena íaioi onóillena. Daje izói afefue jae jino íaioimo cíotaga, comécido ínota afe uaimo ñue jeire íaioi óllena.

²⁷ ¡Daade jamánomo baitade Juziñamuimo ebírede ñúefuijai nítaicaiza! ¡Daií afémiemo Jesucristodo zííñona jaca ninomo llóiticaiza! Mei daiítadeza; jae ñie.

NANOIDE SAN PABLO CORINTO

IMÁCIMO ORÉCABE

Primera Carta del Apóstol San Pablo a los Corintios

Coríntomo ite Jesucristomo ñnotinomo Pablo cuete

¹ Cue Páblodicue. Ñúefue llujillena Juzíñamui comeci jitaina izói Jesucristo jónegamedicue. Bie izói daína Jesucristo orécamedicue.

² Cue, cai ama Sóstenes diga, Corinto jófuego ite Juzíñamuimo gairífiredino uáidotico. Afe llezica bibe ómoimo cueticue. Omoimo Jesucristomo dájena jaináinamona Juzíñamui iédiomoi. Juzíñamui íena omoi jáillena afémieoiri ómoína jíríte. Nágagobiaimo ite cai Ocuíraima Jesucristo mámeçido jicáfiredino, daje izói Juzíñamui íeiena uáidogaiaioi. Afe Ocuíraima Jesucristo afémaci ie, daje izói cáie.

³ Cai Moo Juzíñamui, cai Ocuíraima Jesucristo diga, íaillinoína ñue uái illifue dibénemo ómoína jóoneiteza. Daje izói afe íaillinoi ómoína ñue éziciiteza.

Jesucristomona comuide caimare illafue

⁴ Nágarui ómoiri Juzíñamuina iere figura daiífiredicue, mei Juzíñamui Jesucristodo ñue caimare ómoína itátate.

⁵ Mei jii, Jesucristomo dájena omoi jaináinamona, Juzíñamui nana ie cáimafuiaí ómoimo orede. Nana ie caimare úrillafue Juzíñamui ómoimo llote. Daje izói ie onóigafuiaína ómoína onótate.

⁶ Mei daí Juzíñamui Crístodo daína uai ja ómoimo bie nahífuena ite.

⁷ Bíemona cai Ocuíraima Jesucristo cíocaizaíbilliruimo nai dúciñena llezica, nana Juzíñamui lloga uaina ómoimo íteza; abí diné jíáie uaina jítaiñeitiomoiza.

⁸ Afémie ico íirairuimo ómoína náiretaite. Iemona cai Ocuíraima billiruimo dúcille dino buna ninó fiénidifuenta ómoimo nitáñede.

⁹ Juzíñamui uícodo ie dáinana jaca ñue ícoimo fuitáfiredo. Afe ñnofirega Juzíñamui ie jító Jesucristomo cai nabáirillena caina uáidote. Afe Jesucristo cai Ocuídime.

Crístomo gairífiredino dájena íñeno oni eneno coméçidiaioi

¹⁰ Amatiai, omoi cacai. Cai Ocuíraima Jesucristo mámeçido izire ómoimo jicádícué. Dájena omoi jainairi. Daje izói eneno omoi bozíetaíñeno iri. Mei jíáifodo jíáimana énenaruíñeno ñue

dájena omoi iri. Daje izói dáafuemo comeci fácaitiomoiza, íemo daje izói dáafuemo omoi maméritiomoiza.

11 Cue ámatiai, bifue ómoína daídícue, mei Cloé comínimona dáarie cuemo llotíai, omoi cigiri jiáimana ruifruillano oni enénorie itíai, daí daídíai.

12 Bie izói cue cacánafuedo ómoína daííacade. Omoimona illa dígamíai jiáifodo úritiomi. Dáarie cue Pablo iédícue daide, jiáimaci cue Apolos iédícue daide, jiáimaci cue Pedro iédícue daide, jiáimaci cue Cristo iédícue daide.

13 Mei íadi nana omoi Cristo abi izóidinodiomi. ¿Meita afe Cristo abi énenorie fecaca? Daíítañede. ¿Meita Pablo omoi méifomo cruzmo coraica? Córaiñega. ¿Meita Pablo mámeçido omoi báutizagaomi? Daíítañede.

14 Cue mena come Crispo Gayo diga báutizadícue. Omoimona abi díne jiáimacina báutizañedícue. Aferi Juzíñamuina “Figora,” daídícue.

15 Iemona ómoimona buna “Cue bie Pablo mámeçido báutizagacue,” daíñide.

16 Iemo jiái daa Estéfnas comini báutizadícue, mei íadi cuemo úibicaíñedeza, abí díne jiáimacina báutizañedícue.

17 Mei Cristo cuena “Comini o báutizari,” daííñede. Cuena “Cue ñuera jíllona uai o llócairi,” daide. Mei íadi cue abi ínotade comini bacácido cuena llotátañede, Cristo cruzmo tíllana cue ráifitañellena.

Cristo llogáfuemo Juzíñamui ríino ite naa ie baitácafuiari

18 Afe bie Cristo cruzmo tíllafue, nana nine táinomo báitino dibénemo ráifíñede taino uallai izoide. Mei íadi ñue jíllotino dibénemo, Cristo cruzmo tíllado cai comeci illafue méidorede, mei afe uaimo Juzíñamui ríino íteza.

19 Jaiai Juzíñamui Cúegáuaido afémie bie izói daide:

—Iere baitádino onóigafuiaina niné táinocaitaicue.

Daje izói fibídino fibíllafuena ráifitañeiticue, —daide.

20 Ja bíniemo fibídime ¿mei níifuemo cánoite? Comini comeci ífuena ñue méidoñede. Daje izói fia fibíllafue llófueraima canóñede. Afe izói bínie ráfuiái júfidotime canóñede. Mei nana bíniemo fibíllafuiái Juzíñamui ja jiáifodo méidoga. Ráifíñede taino uáillaina méidoga.

21 Juzíñamui nana ie finóllifuiaina onófirede. Iemona “Fia bínie comini baitajafuedo cuena ónoñeitiomi,” afémie daííñocaide. Mei jiáifodo Juzíñamui íaiommo lloga uallai íaioi ínuado afémacina jíllotaacade, afe bie lloga uai jiáimacimo ráifíñede taino uai izoide íaiommo cíocaide íadi.

22 Iemo Judíuai fia dánamona comuide cíorainina ráaniaina cíocadiaoi. Iemo judíñedino iere baitajafue jenódiaoi.

23 Mei cai, cruzmo coraica Cristo rafue jino llófredicaí. Ie mei judíuái afefue llófuiana meáiruítiaíoi. Iemo judíoñedino aféfuena “Ráifíñede taino uailai,” daídíaíoi.

24 Mei jiáifodo Juzíñamui jíllloillena maiñócano dibénemo afe Cristo cairi tilla llogáfuemo Juzíñamui ríino ite. Daje izói afémaci íena afe llogáfuemo Juzíñamui baitaca uai ite. Daa Juzíñamui jírrigamie judío ímie íadi, bifue afémiemo ráifide. Daje izói Juzíñamui uáidogamie judíoñedimie íadi, bifue dájerize íaillinoimo ráifide.

25 Mei jí Juzíñamui lloga uai, ráifíñede taino uai izói comínimo cíoide, mei íadi afe uai énie comini baitácafue baimo iere baitade. Daje izói Juzíñamui finócafue ríinonina izói comínimo cíoide, mei íadi comini máirie baimo jamánomo rírede.

26 Amatíai, mai Juzíñamui omoi jírrillafuemo uibíoicairi. Omoimona baitádinona figo íñede, mei íadi nai ie comínidiomoi. Daje izói ómoimona ríillainina figo íñedeza. Iemo ómoimona jica jalleide comínina figo íñede, mei íadi nai Juzíñamui izíruigamacidiomoi.

27 Mei jiáifodo, bínie comini daina abina onóñedino Juzíñamui jae nizeca, ráfuiaína baitáдино méaicaillena. Daje izói bínie comini daina ríinidimaci Juzíñamui jae nizeca, nana “Mairídícue” daídino meáicaillena.

28 Iemo bíníemo ite jica jalléíñedino naa jámairuigamací diga Juzíñamui jae nizede. Nana bie Juzíñamui nizécano jamai comini. Juzíñamui bie izói jamai comini nizede, abí íinota “Aillomíedícue” daídino ríinitallena.

29 Iemona buna Juzíñamui uícomo abina íinonide.

30 Mei dama Juzíñamui ómoína Cristo Jesumo dájena jaináitate. Daje izói Juzíñamui, Jesucristo cai ifoci déitatimíena jóonete. Iemo Crístodo, Juzíñamui anamo ñue jaícina cai íllena, afémie caimo jóonete. Afe llezica Juzíñamui íeíena Crístodo caina ñue finode. Afe bie Crístodo daí jíllodicaí.

31 Afémie daí finode, Juzíñamui Cuegáuai daina izói jaícina jino fuitállena. Afe uai daide: “Dámie abí íinoiacania, cai Ocuíraimado abí íinori,” daide.

2

Dama coraica Cristo rafue Pablo comínimo llote

1 Biruí ómoimo cue llua izói, afe izói nauí Juzíñamui ua rafue ómoimo cue lluaíbillaruido, cue baitaca féirede uaido ómoimo úríñedícue, “Íere ráfuiaína baitádimíedio” cuena omoi daííñeillena.

2 Mei naui omoi cígiri cue illa llezica daa Jesucristo ráfuenta naa ie coráiafue diga, abi diné jiáifuenta ómoína onótaacañedicue.

3 Aféruillaído ómoiri ríinidimie izói iticue. Ie jira benena cue jácieri cuidíridicue.

4 Omoimo jino cue llua llezica fia énie come baitaca uaido ómoína jiéruitañedicue. Mei jiáifodo Juzíñamui Ñuera Joréñodo jiéruitadicue. Daje izói Juzíñamuimo ite ríinodo: “Bífuenta omoi jiéruiri,” daidicue.

5 Daií ómoína daidicue omoi ñnogafue, Juzíñamui ríino dibénemo illena; daje izói omoi ñnogafue bínie comini onógafuemo jáinaiñeillena.

Juzíñamui da ie Ñuera Joréñodo onoiga

6 Mei íadi ómoimona Juzíñamuimo ñnogafuemo ñue móonaitinomo cue baitaca uaido úriticue. Bie cue baitaca uai bínie comini íeñede. Daje izói bínie uíñote ríillaini uáiñede. Afémaci naa íaioi uáillairi niné cíocaiñeitiaioi.

7 Jaiái uáfodo ónoñega Juzíñamui fibíllafuiaído úriticai. Afémie jaiái énie comuíacana uícodo báinino mamérillafuedo úriticai. Aféruillaído caimo zíiñona fuíñeite jíllollifue caimo mamede.

8 Nana bínie uíñote ríillainimona bífuenta buna onóñede. Bífuenta onódiaioína cai ñuera Ocuíraima Jesucrístona coráíñediaioi. (Aféfuena íaioi onóñenado íena coráidiaioi.)

9 Mei íadi Juzíñamui cáiena mamécáfue ie Cuegáuai daína izói ite. Afe uai daide:

Bínie comínimona jaca buna cíóñena ñuera raa Juzíñamui íena izírunitino íaioiena jóonete.

Afe izóidena comini jaca cacáñediaioi.

Daje izói áfemo jaca buna comeci facáñena.

10 Afe bífuiaina Juzíñamui ie Ñuera Joréñodo caimo llotátate, mei afe Ñuera Joreño nana Juzíñamuimo ite uáfodo ónoñega ráfuiaina onóillena izire jicánofiredeza. Iemona afémie cai fidítate.

11 Bíniamo ite comínimona, ¿mei nímie jiáima comeci ífue onona? Dama afémiamo ite joreño ie comeci ífuenta onona. Afe izói dama Juzíñamui Ñuera Joreño Juzíñamui comeci ífuenta onona.

12 Bínie comini fiéni comécíillafuiaí úicaiñegacai, mei íadi Juzíñamui caimo oreca Ñuera Joreño úicaigacai. Juzíñamui ie Ñuera Joreño caimo orede, aillo jeruíñeno caimo ie fecaca ráfuiaina cai onóillena.

13 Juzíñamui Ñuera Joreño caimo llófuega uáillaído afe bífuiaido ómoimo úriticai. Dani cai fibíllafuemono cai onoiga

uáillaído ómoimo úriñedicaí. Afe daíí Ñuera Joreño úicaiganomo Ñuera Joreño lloga ua ráfuiái jino ñue lloticaí.

14 Mei jii, Juzíñamui Ñuera Joreñona úicaíñegamie afe Ñuera Joreño lloga ráfuiaina jeire oñede. Mei afémiemona bífuiái ráífiñede taino uallai izóideza. Aféfuai afémiemo jánaide, mei bífuiái cómemo dama Juzíñamui Ñuera Joreñodo llófuegaza.

15 Mei íadi Juzíñamui Ñuera Joreñona igámie naga ráfuiaimona nifue ñuena, nifue fiénina daírede. Mei jááfodo Ñuera Joreñona íñegamie afe izói daíñide. Iemona Ñuera Joreñona íñegamie Joreñona igámie jaca nífuena jicánonide.

16 Mei Juzíñamui Cuegáuai daide: “¿Bu mei cai Ocuíraima comeci fácafue onona? ¿Mei nímie Juzíñamuina llófuerena?” Mei íadi ie Ñuera Joreñodo Cristo ifoci úrillafue caimo ite.

3

Dájemo táijidino izói Juzíñamui ocuica uai llujállena canódicaí

1 Amatiai, bie lloga Cristo comeci fácafue nai ómoimo figo jóbiñede. Iemona Ñuera Joreño úicaigano izói nai ómoimo úrinidicue. Mei jááfodo Ñuera Joreñomo nai figo jaináñedino izóidiomoi. Cristomo jaináidino dibénemo nai figo onóñede úruiaí izóidiomoi.

2 Iemona nauí ómoimo féinino llófueticue. Nai monoi jirode úruiaí izóidiomoi; jáiaide güille nai ómoimo dúíñede. Iemo afe izói ñue baitácafue nai ómoimo jaca dúíñede. Nai aféfuena jeire ónidiomoi.

3 Mei nai Ñuera Joreñomo jaináñena llezica jamai come izóidiomoiiza. Nai birui jááimana úradoidiomoi, íemo icírafuena jenófirediomoi, íemo nai jááimana énenoruidiomoi. Iemona bíniemo ite Juzíñamui Joreñona nai íñegano izóidiomoi. Nana íaioi eneno bozíetaillafuiaina nai jeire otiomoi.

4 Omoimona dáarie “Pablo iédicue,” daide. Jáímaci “Apolos iédicue,” daide. Bie izói omoi illa, nai bíniemo ite Juzíñamui Ñuera Joreño úicaíñega comini izóidiomoi.

5 ¿Mei nímie Páblona? ¿Mei jáí nímie Apólona? Coco bie daa Juzíñamui ocuícamedicoco. Daa cócodo cai Ocuíraimamo ínotiomoi. Cai Ocuíraima cuemo jónega táijinamo táijidicue. Daje izói Apolos dama íemo jónegamo táijide.

6 Cue bie fueñe ritímie izóidicue. Ie mei Apolos afe rigaji jáinoina riáitatimie izoide. Mei íadi afe rigaji zicótatimie daade Juzíñamui.

7 Iemona cue bie fia ritímiedicue. Iemo Apolos fia riáitatimie. Bie coco jabóidimedicoco. Mei íadi Juzíñamui jamánomoidimie, mei afémie afe rigaji zairítaiteza.

⁸ Nana ido ritímie, afeji jáinoia riáitatímie nágaillinoi daje Juzíñamui ocuícamié íaillinoi. Mei íadi illa dígamie nano ie táijina dieze Juzíñamui íbaite.

⁹ Coco bie dama Juzíñamui jetácamo dájemo táijidicoco. Ie mei omoi Juzíñamui riga jacafai izóidiomoi.

Nane jáie raa izóidiomoi. Juzíñamui como nicana uiga jofu izóidiomoi.

¹⁰ Cue bie jofu níraíni ocuídímiedicue. Juzíñamui cue ocuilla izói, bico jáillirai riire naidánetimie izóidicue. Iemo jáímie afe jáillirai acónimo ticáidímie izoide. Ie jira naga tícaítímie rairuídícue, fiéni ie ticáíñeno ñue ie ticáilleza.

¹¹ Mei jii, abi diné jáímie riire naidaide jáilliraina naidánenide. Afe jae riire naidánega jáillirai izóidímie Jesucristo.

¹² Mei naga come bie jáillirai caifófemo ie illínona nírede. Afe bíena daírede mei naga come illafue bie nillico izóideza. Dámie afe jáilliraina mameide Jesucristo caifófemo oro izóidedo ie illínona nírede, jáímie quenírede llojefe izóidedo ie illínona nírede, jáímie ráifide nofíciái izóidedo ie illínona nírede, jáímie amena iedo ie illínona nírede, jáímie fia uifzaido ie illínona nírede, jáímie zicicái izóidedo ie illínona nírede.

¹³ Iemo ico jáíruido Cristo comínimo itifue riire jicánuaibilliruiamo naga come ie nigano uáfori cíoite. Aféruido Juzíñamui cai táijina fácaite. Irai izóidedo naga come nigánuaí Juzíñamui fácaite.

¹⁴ Irai cúaritañega raado nitímie Juzíñamui ie táijina íbaja raana jírídoite.

¹⁵ Mei jáífodo cúarirede raado nitímie minícana jíridoñeite. Nana ie táijina niné táinocaíteza; dama táinori llégáite. Mei íadi dama afémie jíllóite. Ua, jofu bóoamona nana raaie uzilla mei, dama come jíllona izói, afémie jíllóite.

¹⁶ ¿Omoi bie Juzíñamui jofu izóidiomoi nai onóñediomoi? ¿Daje izói Juzíñamui Ñuera Joreño ómoimo íllana onóñediomoi?

¹⁷ Afe bie Juzíñamui ico íaifuenidico. Iemona ómoimona dámie bie Juzíñamui jofu eneno botáadi, afe cómena Juzíñamui jái niné táinocaitaite. Omoi bie íaifuenidico izóidiomoi.

¹⁸ Nane daa come dama abi jífueiza áfemona abí omoi rairuiri. Omoimona dámie “Bínie ráfuenta iere baitáidímiedicue,” daíadi, afémie meine abido íñoñedino daína izói ráfuenta baitáñedimiena jáirede, Juzíñamuimo ite nahí rafue baitállena.

19 Mei bínie comini baitácafuiai Juzíñamuimona ráifiñede taino uaillai. Ie Cuegáuai daide: “Iere baitádinona Juzíñamui daní íaioi bífueinamo írebaimo jiilla izói jíitate.”

20 Nane dáanomo daide: “Baitáдино começi fácafuiai ráifiñenana cai Ocuíraima onode.”

21 Ie jira jíaimamo jaináillado jaca buna abina ínonide. Afe omoi dáamiemo jaináilla uai jíáfodo jóide. Nana omoi canódino ómoimo jainaide.

22 Daa cómemo jainaiñeno nana bimaci ómoimo jainaide: Pedro, Apolos diga ómoimo jainaide, cue jíái Páblodicue ómoimo jaináidicue. Daje izói nana biniemo ite ráaniai Crístodo ómoiena Juzíñamui mamede. Daje izói Crístodo Juzíñamui ómoína cáatate. Iemo omoi tíadi, Crístodo afe tíillana jáciruiñetiomoi. Iemo biruillaído Crístodo caimare írediomoi. Iemo uire jíáruído ómoimo ífcaitifuemo Crístodo jáciruiñetiomoi. Nana bie ñúefuiai ómoie.

23 Iemo Cristo iédiomoi, ie mei Cristo Juzíñamui ie.

4

Jesucristo orécano táijnafue

1 Iemona Cristo canódino omoi caina daiírediomoi. Daje izói uáfodo ónoñega Juzíñamui lloga uaillai jino comínimo llófuetino omoi caina daiírediomoi.

2 Mei jíi, táijnana jóonegamie ie ocuídímie ínofirenana afémiemo jino cíotarede; ie ocuállana ñue ícoimo fuitárede.

3 Mei íadi cúemona, omoi cuemo itifue jícanodoiari járitañedicue. Daje izói dáarie cuemo itifue jícanodoidino cuena dáinana figo náfueñedicue. Afe izói cue itifue dama cue jícanoíadi áferi járitañeiticue.

4 Mei cue começi úrilla níifuena cuemo nitáñede. Mei íadi afe izói cue começi úria, nai ua Juzíñamui eróicana ua nífuenidímiedio cuena daiíñede. Mei cuemo itifue jícanotímie dama Jesucrístoza.

5 Mei jira, Cristo nai biñena llezica jíáima táijnafuena riire omoi jícanodoiñeno iri. Daa cai Ocuíraima jícanuaibillirui omoi ocuíriri. Aféruído afémie jítifomo báinino itínona bai úzefomo uáfori cíotaite. Daje izói aféruído cai Ocuíraima naga come começi mamérrillafuiai uáfodo onótaite. Iemona Juzíñamui naga come nano ba íemo dúide dieze ñúefuiai íemo fécaite.

6 Amatai, mei ñue omoi íllena bífuiaído omoi o úriticue. Omoi canódimie Apolos ífue dama cuefue diga jae ómoimo lloticue, omoi ñue dájena comécíillifue uáfodo omoi onóillena. Bífue ómoimo lloticue ómoimo coco cíotagafuiaído Juzíñamui Cuegáuai baimo omoi comécíiñeillena. Afe uai caina daide:

Dáamie dibénemo gáifiñeno omoi iri. Daje izói jiáimiena jámairuñeno dájeze nana íaioimo omoi íinori.

⁷ ¿Mei nie come jiáimaci baimo ómoína ñue fínua? Nana omoi onoiga ñúefuiai Juzíñamui fecácaza. Jaca Juzíñamui fecáñegana iñede. Iemona ¿nibái mei dáamiedo abina íinofirediomoi? Abina íinofiredimie: “Cue comeci jítaina izói cuemo fecácaza,” daíífirede. Mei íeñedeza. Omoi dani fécañegaza. Mei jira áfedo abina íinonidiomoi. Nana caimo ite ráaniaimona dani cai ocuilla izói iñede. Nana Juzíñamui caimo fecaca.

⁸ Birui ja “Nana Juzíñamui caimo fecáacagafuiai ja cai ógaza,” daí comeciidiomoi. Nana omoi jitaica ráaniai nibai ja omoi oga. Nana omoi onóacaga ífuiaina nibai ja ñue baitádiomoi. Nibai ómoína cai canóñenado ja illáicomínina jáidiomoi. Mei íadi táinodo abi íinotiomoi. Iemo afe llezica cai bie jalléiñedicaí. Mei íadi ómoína: “Ua illáicomínina omoi ii,” daídícue. Afe daí cai bie omoi díga dájena illáimaiticaí.

⁹ Cai bie Cristo orécamiái jino íirainomo Juzíñamui fiécacaí. Cai bie lláviano títino izóidicaí. Jira cai bie nana énie nairai acárilla raa izóidinona jáidicaí. Iemona nana comini naa Juzíñamui abi imáciri caimo éroitiaíoi, mei afémaci abi fáiacaitadinodicaíza.

¹⁰ Cristo rafue cai llócaillamona caina jiáimaci “Abina onóñediomoi,” daídíaíoi; mei afe llezica “Crístodo ráfuiaina baitáidinodicaí,” daídíomoi. Omoi ríiredinona illa llezica, cai bie ríínidinodicaí. Caina comini jámairuilla llezica ómoína ñue jacírúitiaíoi.

¹¹ Mei jaíai nai biruimo júbieri duere zefuídicaí. Daje izói cai jirolle jainoi iñénari jiái duere zefuídicaí. Daje izói figo inícuironidicaí. Daje izói comini caina fieni finódiaíoi. Uái cai illino iñede.

¹² Aillo cai táijinamona iere llégidicaí. Iemo comini cairi jainónaitimaci; mei íadi íaioína Juzíñamui canolle uaido fairíoticaí. Caina fieni finóllena racádiaíoi; mei íadi ocuídicaí.

¹³ Cairi fiénidífuedo úritiaíoi; mei íadi afe comínina comeci mánainafuedo fíaicana llófueticaí. Afe llezica oni dotaca íáirede raa dota izói, afe izói caina ráífiñedinona caina mámico náfueñediaíoi. Nai biruimo cuidoda oni faíga íáirede raana caina mamédiaíoi.

¹⁴ Bífuiaina omoi meáidaillena cueñédícue, mei jiáifodo omoi ñue íllena rairuíllano, llotícue, mei cúemona izíruíga jítótiaí izóidiomoiíza.

¹⁵ Mei cómemona facádonide Cristo ráfueña llófuetino ómoimo ite íadi, nai omoi íinogafue tainédimie daade. Cristo Jesumo

omoi ñnollena, omoi moo izói omoi comuítatimedicue, mei cai jállona uaina ómoimo llotícueza.

16 Ie jira ómoimo cue cíotaga cai ñue illífuedo omoi jáillena, izire jicádicue. Daje izói cue llogáfuedo omoi jairi daidícue.

17 Afedo omoi jáillena, Crístomo cue ñnotaga Timoteo ómoimo orédicue. Afémie cue izíruiga jító izóidimie. Afémie, Crístomo cue ñnuamona cue lloga ñue cai illáfuenta ómoimo úbicaitaite. Afe bie afémie ómoimo lluájillifue izói, afe izói nágagobiaimo ite Juzíñamuimo ñnotimacimo, cue jíái llófuefiredicue.

18 Omoimona dáarie abina ñnuano, daidíaiói: “Pablo caina éroizabiñeite,” daidíaiói. (Afe izói dáiñado cue uaina uáitaacadiaíói.)

19 Mei íadi cai Ocuíraima Jesucristo comeci jítaiadi raire omoi cue méiñuaillena ocuírídícue. Iemo cue billíruimo afe abina ñnotimaci ñe ñúefue jíáimacimo finódiaíoiiza, afefue cue onóillena fácaítícue. Afedo íaiói ñuera ríino ite, ñibai iñédeza, ónoítícue. Aillo íaiói úrilla uaina náfueñeítícue.

20 Mei jíi, fia cai úrilla uaido, Juzíñamui illáimana illáruimo jaináitañegacai. Mei jíáifodo Juzíñamui Ñuera Joreño ríinodo cai comeci itifue méiduano ie illáimana illáruimo jaináitagacai.

21 ¿Mei ñe izói óiacadiomoi? ¿Mei ñibai ómoina duere cue finuaíbillana óiacadiomoi? ¿Ñibai izíruillafuedo comeci mánainafuedo ómoimo cue éroizabiñllana óiacadiomoi?

5

Pablo fiénide meáifue finódimie duere finóllena llote

1 Ja birui omoi cígimo ite iere fiénide jiruífuenta comini cue fidítatiaíói. Omoimona dáamie ja ie moo ogango dama ie aina ote. Afefue iere jamánomo meáirede. Afe izoide fiénidífuenta Juzíñamuina ónoñedimaci jaca rairuídíaiói.

2 Mei íadi bie izói ómoimo illa llezica jñai omoi iere abina ñnofirediomoi! (Afe izói omoi illa iere figóñede.) Mei jíáifodo áferi iere zuure írediomoi. Daje izói áferi meáidarediomoi. Bie izói jiruíredimie omoi cígimona mai oni ore.

3 Náamiena omoi diga dama cue iñédícue, mei íadi afefue dibénemo cue comeci facáoinana ñue onódiomoiiza. Ie jira afe bie jiruíredimie ie duere finóllena jae cai Ocuíraima Jesucristo mámecido ocuídícueza.

4 Iemona Jesucristo mámecido dáanomo omoi gairízailla llezica, íemo cue comeci facáoinamo ñue omoi uibíoicailla llezica, íemo jíái cai Ocuíraima Jesucristo omoi cígiri ríinorena llezica,

5 mai afe íimana ómoimona jino dótano Taifena náamataga comínimo íena omoi zóoferi, ie abi fiéni jítainafuiai ñiné

táinocaitallena. Afemona cai Ocuíraima Jesús billíruimo afémie joreño jíllobicaiteza.

6 Afe íaifue nai ómoimo illa llezica omoi ñue íáinina illa izói abí ínotiomoi. Afe abí ínuana figóñede. “Mei daa cómemo ite íaifue aillo ie abímo itímacina íáiretaiteza.” ¿Comini daína uaina onóñediomoi? Afe uai daide: “Pan finóadi afe aillo fáitate raa tamédiaioi. Due jiza fáitatena jóonega íadi, nana afe magáfecina aillo fáitate.” Afe izói daa come finoca íaifue aillo ie abímo itímacina íaire finode.

7 Iemona ómoína fiéni finode come ómoimona oni jica oreri, mei afémie jácaie pan fáitara izóidímieza. Ie jira afe fiénide méaifue ómoimona ñue muiñori, ñue jáicina íaifuenidímacina omoi íllena. Iemona fáitatena jóoneña comue pan izóidinona íitiomoi. Ja onódicueza, afe bie izóidino ua itíomoi, mei Cristo nana cai ícoinia fagámiena jáideza. Afémie cai ífomo fatá Juzíñamui fecaca oveja jiza izóidímie, caimo ite íaifue oni dóllena. Afémie pascua rafue illa llezica cai uibíoigamie. Ie jira bie íaifue oni omoi fáinocai; mei íaifuemona muiñócanona cai íllena, Cristo tíideza.

8 Iemona nágarui cai illáfuemo táinona úriñede comécido mai cai illi. Daje izói ñúefuiairede comécido mai cai illi. Afe izoide comeci fáitate raa jóoneña comue pan izoide. Mei jíáfodo íairede comécido cai íadi, daje izói éoicaide comécido cai íadi, afe izoide comeci jácaie pan fáitate raa izoide. Afe izói mai cai íñeilli.

9 Naui ómoimo cue ciegábemo ómoína daidicue: “Bie izói jiruírede comínimo nabáiriñeno iri.”

10 Bíníemo jaca jiruiredino ite, daje izói iere ráanaiacadino ite, íemo merírifiredino ite, íemo jánarai íóbitadino ite. Bimaci díga omoi nabáiriñeilla lloñédicue. Aféfuena rairuídícua bíníemo oni járedíomoi. Mei íadi afe izói ocuñédicue. Mei íadi onódiomoiza, afémaci illa izói ínidiomoi.

11 Mei ómoína cue daíacanafue jíáifo jóide. “Crístomo ínote omoi ámadicue” daidímie íadi afémie jiruíreniadi, afémie díga nabáiriñeno iri. Daje izói afémie iere ráanaiacania afémie díga nabáiriñeno iri. Iemo dáamie jánarai íóbitaadi, íemo afémie jíáimana fiéni úrífíreia, íe jífaíreia, íemo íe merírífíreia, afe izoide “Crístomo ínote omoi ámadicue” daidímie díga nabáiriñeno iri. Iemo jíái bie izoide come díga omoi güíñeno iri.

12-13 Bíníemo ite ínoñede fiénidinomo itífue ríire cue jícánolle cuemo dúíñede. Mei íaioimo fiéni itífuiaí dama Juzíñamui ríire jícánoteza. Mei jíáfodo omoi dani ómoimo jáináidinona

riire jicánorediomoí. Ie jira afe bie fiénidifuiaredimie omoi cígimona oni oreri.

6

Juzíñamuimo ñnotino júfidogafuiái oni ñnoñedinomo lluájínide

¹ Dani ómoímona dámie jiáimamo júfidogafue comuíadi, ¿nibái mei oni jiáimacimo afefue záitallena jáidiomoí? mei afémaci cai ñnogafuemo jaináññedimaci. Dani omoi cígiri ite Juzíñamuimo dúidinomo jicárediomoí, o júfidogana jaícina záitallena.

² ¿Nai onóñediomoí Juzíñamui iédino nana bínie comini itífuenta riire jicánoitiaíoi? Mei uire bínie comini riire jicánoitiomoíza, ¿nibái mei omoi cígiri ite dúefuiaina raire záitanidiomoí?

³ Iemo jiái, ¿nai onóñediomoíza Juzíñamui abi imaci, ángeles daínámaci, itífuiaina riire jicánoiticaí? Mei uafue Juzíñamui abi imaci itífuiaina riire jicánoitiomoíza, ómoímo ite bínie ífuiái raire záitallena ómoímona juánide.

⁴ Bie cai illáfueмона comuide júfidogafuiái ómoímo comuíadi, ¿mei nibái mei Juzíñamuimo gairídino dibénemo iñédinomo lluájifirediomoí, afefue jaícina ómoímo finóllena?

⁵ Bie izói ómoína daidicue omoi méaicaillena. ¿Mei nibái omoi cígiri ámatiaímo comuídifuenta jaícina finuana baitádimie iñede?

⁶ Ja birui da ama jiáimamo júfidogafue comuíadi, Juzíñamuimo ñnoñede jaícina finóraíma uícomo lluájifirediomoí. ¿Meita bie izói írede? ¡Inide!

⁷ Uáfodo onóigaza, nanómona daa júfidollifue omoi cígiri comuíadi, jiáie o ñue illáfuenta táinomo fáifitaite. (Daje izói o júfidogafue Juzíñamui ífuenta jámairuitade.) Daa cáímona dámie fiéni o finóadi, afe iba o óñeille baímo ñuera. Daje izói daa come cue raa jífuiano baíróadi afe meine cue óñeille iere baímo ñuera.

⁸ Mei jiáífodo fiénidifue fáicanocaiñeno, dani omoi ámatiaímo fiéni finódiomoí, íemo jiái omoi ámatiaína jífuiano raana baírófirediomoí.

⁹⁻¹⁰ ¿Nai onóñediomoíza? nana jiáimana fiéni finódino Juzíñamui illáimana illíruimo dúciñeitiaíoi. Omoi jífuefiñeno iri, mei naga fiénidino Juzíñamui illáimana illíruimo jáinaíñeitiaíoi. Daje izói áireiñeno jiáie ringo jetáidino dúciñeitiaíoi, íemo jánaraina íóbitadino, íemo jiruífueredino, íemo jiáie íma diga fiéni itímiái, íemo merírifiredino, íemo iere ráanaíacadino, íemo jífáifiredino, íemo jiáimamo fiéni

úritino, íemo jífueta bairófiredino; nana éniemo ite bie izoide comini Juzíñamui illáimana illíruimo dúciñeitiaioi.

11 Naui ómoimona dáarie bie izoide. Mei íadi ja birui Jesucristo ñue íainino finócaomoi. Daje izói Juzíñamui íeiena ñue mamécaomoi. Afe izói Moo Juzíñamui Ñuera Joreño, íemo jíai cai Ocuíraima Jesumo omoi íinuado Juzíñamui anamo ñue jaícina itábicaidiomoi.

Cai abi Juzíñamui eróicana iere ñúeraza áfena íaidonidicai

12 Comini daiífrediaioi, “Cue bie cue comeci jitailla izói íredicue.” Afe uafue, mei íadi naga íaioi comeci gáinafue íaioina ñue finóñede. Uáfueza daa come dama ie comeci jitailla izói írede, mei íadi afe comeci jitáillafue íena anáfenotanide.

13 Mei uáfueza: cai güille, cai jébevoi ie; daje izói cai jébevoi güille íena finoca. Mei íadi jíáiruido Juzíñamui nágaillinoi güille naa jébevoi diga jíáfodo méidoite. Mei íadi “Bie cai abina jiruifue íena mameca,” daiñide, dáarie daií daiífrediaioi íadi jmei afe uáfueñede! Bie cai abi cai Ocuíraima ie. Afe íbana cai Ocuíraima cai abimo dúide, cai ñue rairuíoicaillena.

14 Íemo Juzíñamui cai Ocuíraima Jesús cáadimiena jáitate. Afe daií ie fínua izói, afémie dama ie ríinodo cáadimacina caina mámeite.

15 ¿Onóñediomoiza ómoimona illa dígamie ie abi dama Cristo abimo dúide? ¿Meita Cristo abimo dúidimie jiruíredingomo dájena jóneredicue? ¡Jaca jónenide!

16 ¿Mei níbai jíáifue onóñediomoiza, dáamie jiruíredingo diga íadi afémie abi daa afengo abi izóicaide? Mei jíi Juzíñamui Cuegáuai áirenafue dibénemo bie izói daide: “fima ie ai diga afe íaillinoi dámienna ja mameide.”

17 Afe izói dáamie cai Ocuíraimamo dájena jáináidi, afémie dájena joreño redimiena jaide.

18 Íemona mei jiruífue mona oni omoi iri. Nana jíáie cai finoca fiénidifue cai abina figo íáiñede, mei íadi áireiñeno jíáie ringo diga jiruifue cai finóadi, cai abina bácadicai.

19 ¿Mei onóñediomoiza, omoi abi Juzíñamui caimo iga ie Ñuera Joreño illano? Íemona afe Ñuera Joreño jaca omoi diga íteza. Omoi abi dani ómoieñedeza, Juzíñamui ie.

20 Mei omoi abi Juzíñamui jamánomo ráifidena íbácaza. Mei jira cai abido Juzíñamuina íóbitaredicai, íemo jíai daje izói caimo ite joreño íena íóbitaredicai, mei afe bie cai abi naa cai joreño diga Juzíñamui íeza.

7

Pablo come áirenafue llófuete

1 Ja omoi cuemo jicánoga uaillai afe ibádiuai lloíticue. Uáfueza dámie áireiacañenia dama illa figura.

2 Mei íadi aillo jiruifue íteza, naga iima áirede. Daje izói naga ringo inírede.

3 Airedimie dama ie ai afémie diga íacana dieze, afémie írena. Iemo daje izói iníredingo ie ini afengo diga íacana dieze, afengo írena.

4 Iníredingo “Cue abi daingo cuemo dúide,” daiínide. Afengo abi ie ini íeza. Daje izói áiredimie “Cue abi bie dama cuemo dúide,” daiínide. Ie aimo jaináideza.

5 Iima ie ai diga íacania ráiruiño jírui. Daje izói ringo ini diga íacania ini ráiruiño jírui. Mei íadi nibai jáiruido da come ie ai diga nano nígarui iere Juzíñamuimo íaillinoi comei facáacana llezica, aféruillaído dájena íñédiaillinoína ñuera. Afe mei nane raire meine dájena írediaillinoi. Mei are dájena íaillinoi jáicañenia, abi jitáinafuena ocuíninamona fiéni íllena Taife íaillinona facátaiteza.

6 Bífuiái caimare ómoie íllena lloticue. Raire lletara uai daína izói lloñédicue.

7 Cúemona nana comini cue áinino cue illa izói itíaioina, ñuera. Mei íadi Juzíñamui illa dígamiaimo jáífoide ocuilla riino fecade. Dámie áinino dama illa ocuírede. Jáímie áinino dama illa ocuínide.

8 Ja birui áinidinomo naa fecínguai diga úriticue. Damádimie dama cue illa izói itíaioina ñuera.

9 Mei íadi dámie ie abi jitáinafuena ócuiñenia afémie raire áirede. Daa come ie abi jitáinafue íena anáfenoa fiénide, íemona raire áirena ñuena.

10 Mei íadi áiredino iníredino diga afémacina bie izói ocuícicue. Iníredingo ie inina jaca dotánide. Bie ocuilla uai dama cúeieñedeza, cai Ocuíraíma Cristo ie.

11 Mei íadi iníredingo ie ini dotáadi afengo daingo írede; mei jáífodo afengo afe dai íacañenia, afengo meine ie ínimo abído bírede. Daje izói áiredimie ie aina jaca fáicanocainide.

12 Iemo jáífue dibéfodo cai Ocuíraíma úriñedeza, dama cue ñue fibíllafuemono úriticue. Daa Jesumo ínotimiemo nai íñoñede ai íadi, íemo afengo nai afémie diga íacana llezica, afémie afengo diga írede. Afémie afe ie aina dotánide.

13 Daje izói daa Jesumo ínotingo ie ini nai Jesumo íñoñede íadi afémie afengo diga íacana llezica afengo afémie diga írede. Afengo afe ie inina dotánide.

14 Mei jii, Jesumo íñoñede áiredimie Jesumo ínote aimo jaináillamona Juzíñamui ñue finócamiena jaide. Daje izói Jesumo íñoñede iníredingo ie Jesumo ínotimiemo jaináillamona, Juzíñamui ñue finócanogona jaide. Afe izói íñeniadi, omoi jitótiai

ñinoñedino úruiai izói itíaiói. Mei íadi afe izói jóoiñede. Afémaci Juzíñamui ñue finócaiaíoi.

15 Mei íadi Jesumo ñinoñedimie izire ie aina oni oréacania, dama daiítadeza; orérede. Daje izói Jesumo ñinoñedingo izire ie ini fáicanocaiacania, dama daiítadeza; fáicanocairede. Aféfuena júfidoñeno iri, mei Juzíñamui “Nágarui uái omoi ífireiri,” caina dáideza. Bie izói ífciaíadi Jesumo ñinote ama naa ñinote miringo diga rairuínino afe ñinoñedimie mo jaináitanide.

16 Mei íadi Jesumo ñinote iníredingo cácarei. Nai ónoñegaza nibai odo o ini jílloite. Daje izói Jesumo ñinotimie cácarei. Nai ónoñegaza nibai odo o ai jílloite.

17 Iemona illa dígamie dama Juzíñamui íemo jóonia izói, afe izói nágaruillai írede. Iemo, fueñe Juzíñamuimo cai ñnua llezica aféruimo cai táijina izói, afe izói nai birui táijiredicai. Bie izói nana Jesumo gairídinona ocuídícue.

18 Dáamie Juzíñamuimo ñnua llezica ie bacano icói quetátañenia, dama daiítadeza; quetátañeno iri. Daje izói jíáimie Jesumo ñnua llezica jaiái quetácaza dama daiítadeza; jíáifodo júfidoñeno iri.

19 Dáamie ie bacano icói quetaca nibai quétañega áfena náfueñeno iri. Mei jíáifodo Juzíñamui comeci jítainafue jeire cai olle iere ráifina.

20 Illa dígamie fueñe Juzíñamuimo ie ñnua llezica aféruimo ie illa izói, afe izói nai birui írede.

21 Aféruimo jíáima jeruícamiéna o ia, áfemo járitañeno iri. Mei íadi afe ímamaña oni o jáillino o báia, áfena maiñori.

22 Mei jíi, dáamie como fueñe Juzíñamuimo ie ñnua llezica, aféruído afémie jíáima ocuífíregamie. Ja ie ñnua mei Juzíñamui dibéfomo afémie bu ráiruiñegamiéna jaide, cai Ocuíraíma táijinafue ie finóllena. Mei daje izói jíáimie como fueñe Juzíñamuimo ie ñnua llezica, aféruído afémie bu ráiruiñegamie. Ja ie ñnua mei Cristo izire ocuífíregamiéna jaide.

23 Juzíñamui iere ráifidena íbácaomoíza. Iemona jíáima riire ocuífíregamiéna omoi íñeno iri.

24 Amataí, omoi cácarei, ómoímona illa dígamie como fueñe Juzíñamuimo ie ñnua llezica, nanómona ie táijina izói, Juzíñamui eróicana áfemo táijífireiri.

25 Mei birui nahí áinidino naa inínidingotíai diga afémaci ífue llóitícue. Afémaci cue lletalle uaina cai Ocuíraíma cuemo lloñede, mei íadi cue fibíllamona cue onoíga uai llóitícue. Mei Juzíñamui cue cánuado cue lloga uaina ñnoredéza.

26 Mei birui iere jacíredíruillaíza, cúemona bifue ñue cioide: daa come birui ie illa izói jíáifodo méidoñeno írede.

27 Mei birui ja áiredio, afe mei áinidimiena abina maméñeno iri. Mei daje izói, birui nai áinidioza, mai ringona oñeno iri.

28 Mei íadi o áirenia, afefue fiénidifueñedeza. Daje izói daa jitaingo inírenia, fiénidifueñedeza. Mei íadi biruillaído naga áiredimie naa iníredingotíai diga íaiói illafue áinidimaci baimo iere juárede. Afe bie júaredifuiaimona ómoína rairuíacadícue.

29 Amatai, ómoína cue daiíacanafue bie izói jóide. Bíníemo Juzíñamuina cai ióbitallirui aréiñede. Ja benómona cai illífuena jíáfodo maméredicai. Birui áiredimie, áinidimie izói írede, raire jíaimaci jacíredifuemona cánuaillena.

30 Daje izói come tíllamo zúunaitino birui zúunaiñedino izói íredíomoi. Daje izói caimare irázizaidino ja birui caimátaiñedino izói íredíomoi. Daje izói nana ráaniai íbáritino ja birui íaiói íbaca raana “Cáieñede” daiífredíomoi.

31 Iemo bíníe ráaniai fecáfiredino, daje izói afe ráaniairi caimátaidino ja birui afe ráaniaimo figo járitainidíomoi. Mei bie cai ciona énie naa ie ráaniairi ja fúioicaideza.

32 Omoi gágudifuiaimona oni ómoína óiacadícue. Dáamie nai áinina llezica, cai Ocuíraima ífuiaimo járitairede, cai Ocuíraima ióbitallena.

33 Mei jíáfodo áiredimie ie ai ióbitallena, bíníe ráaniairi járitaifírede. Iemona afémie mena ocuídímie anamo ite izóidemona, ie finóacagafuiaina finónide.

34 Ringóníaimo jíái daje izóidifue ite. Nai inínidíngo cai Ocuíraima ífuiaimo járitaite. Afengo joreño naa ie abi diga Juzíñamui íena iere íacade. Mei íadi iníredíngo ie ini ióbitallena bie énie ráaniairi járitaide.

35 Ñue omoi íllena bífuiái ómoimo llóitícue. Omoi áireiacanafuena rairuíacañedícue. Mei jíáfodo comini eróicana ñue jaícina omoi illífuena jitáidícue. Iemo jíái cai Ocuíraima Jesús ocuífue jíízíñeno jeire omoi óllena, bífuiái ómoimo llóitícue.

36 Mei ómoimona daa come comécido daiía: “Cue jícanogango dibénedo ñue jaícina finóñedícue,” íemo afe llezica afengo are dinó jitáíngoñeiteza, afémie comeci ñue faca izói, izire ie áireiacana izói áirede. Ie jícanogango ie olle fiénidifueñedeza, afe íaillínoi áirena rairuínide.

37 Mei íadi jíaimie jíáfodo comeci facáadi, mei afe ñuera. Ie jícanogangona ie aina ie óiacañenia daje izói afefue jíái ñuera; mei afémie ie jícanogango raire óñeillena ie comeci ñue daína izói, jica ia ñue mamédeza. Afe izóidifue íafueñede.

38 Nana búuailaimona bie izói onódicai. Jícanogango otímie ñúefue finode, íemo jícanogangona oñédímie afe baimo ñúefue finode.

³⁹ Iníredingo, ie ini nai caana llezica, ie inimo cuinaca izói jainaide. Mei íadi ja ie ini tilla mei, afengo bumo jaináñede. Jesumo innote afengo gáigamiemo iníreirede.

⁴⁰ Mei íadi cue comeci faca izói, afengo meine nane iníreiñeden a baimo caimare iite. Bie uai ómoimo cue llua llezica, Juzíñamui Ñuera Joreño cuemo ite izoide daidícue.

8

Jánarai éna mameca ríllenai ifue San Pablo llote

¹ Ja birui omoi jicánoga jíáifue llóiticue. Jánarai íóbitallena fia fecaca rille ifue llóiticue. Iere uáfueza, bífuiaimo fibídicaiza. Mei íadi cai onóigafuemon a cai abi fieni inuana aillo comúitate. Mei jíáfodo jíáimana cai izíruillafue nana comínina náirecaitate.

² “Baitádimiedicue” daidímie Juzíñamui ie onótaacanaze nai onóñede. Nai abina onóñede.

³ Mei dáamie Juzíñamui izíruia, afe ibana Juzíñamui ñue afémiemo éroite.

⁴ Mei ja birui jánarai íóbitallena fia fecaca rille ifue llóiticue. Omoimona dáarie bie izói daidíaiói: “Afe ríllenai a riíri” daidíaiói. Jáimaci “Ríñeno iri” daidíaiói. Fueñe bífuiaimo omoi cácarei. Mei ñue onóigaza bie jánarai nahí ráañede, ráifíñede fia raaza. Daje izói ñue onóigaza jíáie Juzíñamui jaca iñede. Juzíñamui jaca daade.

⁵ Mei comíni, monamo aillo ite juzíñamuillai daííadi, daje izói bíniemo jíái aillo juzíñamuillai ite íaiói daííadi, íeñede.

⁶ Mei íadi cámona cai Moo Juzíñamui jaca daade. Afémie baimo jíái juzíñamui iñede. Uáfueza comíni juzíñamuina mameca taino juzíñamuillai aillo ite. Daje izói íaiói mameca Juzíñamui jabóidillaini aillo ite. Mei íadi cai onóiga daade Moo Juzíñamui naga ráaniai finódimie. Iemo bie cai afémie éna iticai. Iemo jíái cai Ocuídímie daade; afémie Jesucríston a. Afémiedo naga raa comúitaga. Cai jíái daje izói afémiedo comúitagacai.

⁷ Mei íadi nana comíni nai bífuiaina onóñediaíói. Dámierie nai jánaraina íóbitajana fibídicaíói. Afémacimona taino juzíñamuimo fecaca güllena, “Bie güille cai juzíñamuillai ie” comeci anado daidíaiói. Daí íaiói comécilla mei áfena ritíaiói. Iemona afe taino juzíñamuillai güllado íaiói ifoci úrillana bácadiaíói, mei íaiói inogafuena nai figo baitáñediaíoiza.

⁸ Mei uáfueza, fia cai gügado Juzíñamui caimare caina uáidoñede. Cai güia, nıbai cai güñeniadi áfena Juzíñamui lloñede. Cai güíadi, afémie éna caina caimare fínoñeite. Daje izói güñeiticai íadi, caina fieni fínoñeite.

⁹ Iemona ja onódicaiza rairuñeno güüredicai. Mei íadi áfemona abí omoi rairuíoicairi, mei dáarie íaioi íinogafuena nai figo baitáñediaoiza. Jánaraimo fecaca rille o ríana íaioi fidíadi, afémacina fiénidifuemo baiítatio. Afemona abí omoi rairuiri.

¹⁰ Afe bie güille ráiruñegaza onódio. Iemona jánaraimo dúide güirácomo güizájidio. Afe llezica íinogafuena nai figo baitáñedimie o güíllana cióadi, afémie dáíte: “Cue jíai cue güizájiticue,” dáíte. Mei íadi afémie dibénemo, taino juzíñamuillaina jacíruillano afémacimo fecaca güille güite. Daí ie íllamona dama ie comeci úrilla bácade.

¹¹ Iemona o ñue onóigafuedo, figo baitáñede o ama fiénidifue diné féiraitadio. Mei íadi Cristo jíai afémie jíilloillena tíide. Jira o afémie féiraitalle fiénide.

¹² Afe jira, íinogafuena nai figo baitáñedimie fiénidifuemo afémie o ifóadi, áfedo Cristo fiéní finódio.

¹³ Ie jira rille cue ria ícoinia cue ama fiénidifuemo cue baiítaiza, ja benómona jaca ríllena ríñeiticue. Daí cue illa jamánomo ñuera, afémie fiénidifuemo cue báítañeillena.

9

Jesucristo orécamie buna ráiruñega

¹ Ñue onóigaza, nana jíaie Jesús jíainomo orécamiaí izóí, rairuínidicue. Mei cai Ocuíraima Jesuna afémaci íena ciona izóí, íena jíai ciódicue. Iemo jíai omoi dani Jesumo íinogano cai Ocuíraimamo cue táijinamona comuide.

² Jíaimaci, “Bie Pablo Jesús óreñegamie” nibai cuena dáítiaioi. Mei íadi afe izóí cuena daínidíomoi, ómoína cai Ocuíraimamo ja ínotadicueza. Iemona omoi dani Jesumo íinuamona, cuena bie uáfueña Jesús orécamie daítaite.

³ Omoimona cue uáitatino uaina bie izóí óíticue.

⁴ Juzíñamuimo gairídino cuemo fecaca güille naa jirole diga áfena cue llíinolle bu cúemona rairuñede.

⁵ Daje izóí jítaidicuenta jíaie Jesús orécamie fínua izóí, Jesumo íinotíngona cue aina óredicue, cue diga jáicaillena. Iemo afengo jítaílle güille daje izóí ómoimona llíinoredicue. ¿Ero ua? Ua, cai Ocuíraima Jesús ámatiaí naa Pedro diga, ringo ua izóí, cue jíai afe izóí ringona óredicue. Iemona afengo ómoimona ecárede.

⁶ ¿Mei omoi nie izóí comeci facádíomoi? ¿Nibai coco dáaíllinoi cue nabai Bernabé diga, nanómona coco ónoído táijnafuena fáicanocainidicoco, ñúefue coco lluájillena? Mei íeñedeza.

⁷ Mei daje izóí ¿nie fuíríraima dama ie güille diga jáirena? Jáinide. Jaca afénomo ecácaza. ¿Nie come jíricona ríadi áfemona afe llizíllajina afémie riéñede? Jaca afe izóidimie íñede; jaca

afémie aféjaina riéfirede. ¿Mei nie ovéjaiai úiñotimie ie úiñoga oveja monoi omida afémie jiróñede? Jaca afémie áfeji jirófirede.

⁸ Fia come daina izói bífuiai cue llua daí omoi coméciñeno iri, mei jaiai Moisés cai ocuilla uai daje izói dáideza.

⁹ Afe ocuilla uai cuiánicomo daide: Arroz izoide trigo, juráreto gájirillena záizia llezica, áfemona íaioi güilleza fue maiñeno iri. Ñue onóigaza, bífuena Juzíñamui dama juráreto jíicana daíñedeza,

¹⁰ mei jíáifodo biedo Juzíñamui cai lloste. Bie ocuilla uai cai ñue íllena cuega. Mei jíi, jacafai tiéraima afénomona llizide raana otá güirede. Daje izói trigo gájirillena juráreto zaizítatimie áfemona otá güirede. Afemona afe íaillinoi güillena caimare ocuírídiailinoi.

¹¹ Iemo ritímie rífirega izoide Juzíñamui uaillai ómoimo fueñe lloticue. Ie mei birui ómoimo ite bínie ráaniai abido cue maiñolle figura. ¿Mei níbai ómoimona bie áillue izói cíoide?

¹² Mei jíáie llófueraini ómoimona íaioi güillena ófirediaioiza, ie mei bie cai afémaci baimo fia ecáregacai.

Mei íadi bie daina izói cai güillena ocuíñedicai. Mei jíáifodo ómoimo ñúefue lluaíbiticue. Nana cue jitaiga ráaniai dama cue íbaca. Omoimona minícana fia oñédicue, cue lloga Cristo daina uaina omoi ruíffruiza daí.

¹³ Mei jíi, jíáifue ñue onódiomoiza, nana Juzíñamuimo gairíracomo tájifiredino afeco ie güíllado írediaioi. Bífue bie izói daííacade; nana Juzíñamui íóbitallena fecaca rille jobáiranomo tájifiredino, afénomo fecaca rillemona come jitáillaze otá rírediaioi.

¹⁴ Mei birui cai Ocuíraima daje izói ocuide. Nana jíllona uai llócaidino, íaioi llófuega comínimona güillena otá güirediaioi.

¹⁵ Mei íadi cue bie daina izói jaca finóñedicue. Daje izói bie cue ciegábedo ómoimona minícana fia jicáñedicue. Güille ómoimona cue jicáñenamona júbieri tíidicuenta, afe figo cuemo ráííñede. Raiñóñeno bie ñúefue cue llujáiri íere íóbidicue. Afe bie cue íóbillafue cue tílla baimo jamánomo ráífide.

¹⁶ Jíllona uai cue llócaillado abina ínonidicue, mei afe llócaillena jóonegacueza. Bífue llócaíñedicuena jñi duere cue zefuilla!

¹⁷ Ie jira, dama cue comeci jitailla izói bífuena cue llócaíadi, Juzíñamuimona jirídoredicue. Mei íadi afe izóiñedeza. Juzíñamui cue níziano bie ñúefue cue llócaillena cue jóonete. Afena cue jaca jámairuinidicue.

¹⁸ Iemona daí cue llócailla jirídua jíáifodo jóide. Nie afe cue jirídoga daítana fia cue íóbillafue; mei raiñóñeno bie ñúefue

cue llujáillari iere ióbídícueza. Nana cuemo dúide tájinana ibátañédícue. Uai llóraima izói cue tájinamona, cuemo dúide ráaniai ómoimona raiñoñoeno fia oñédícue. Aferi iere ióbídícue.

¹⁹ Mei comínimona buna ráiruiñegacue, mei íadi nana comini ocuúllimíena abí mamédícue, baimo aillo comínina Crístomo cue jaináitallena.

²⁰ Judíuai cígimo cue illa llezica, judío ímíena abído jáidícue, afémaci Crístomo cue jaináitallena. Bie izói daina, Moisés ocuica uai anamo itínona Crístomo cue jaináitallena, afe Moisés lloga uai anamo abí jónetícue. Mei íadi uáfúena afe ocuica uaimo dúíñédícue.

²¹ Iemo jáínomo, afe Moisés ocuica uai anamo iñédinona Crístomo cue jaináitallena, íaiói izóidimíena jáidícue. Mei íadi uáfúena Cristo uai anamo cue íllamona Juzíñamui uai anamo itícue.

²² Juzíñamuimo íinogafúena nai figo baitáñédino cígimo cue illa llezica, afémaci izói abi mamédícue, afémaci Crístomo íaiói íinogafue cue móonaitallena. Bie izói daina, nana comínimona illa dígamíe íaiói illa izói íacadícue, mei níbai jáíáfodo íaióimona dáarie cue jíllotallena.

²³ Nana bífuiaina finófiredícue cai jíllona uai jica jalléillena. Daje izói bífuiái finódícue, ñuera cai jíllotate uai caimo onótaga núefuiaina cue maiñoñleza.

²⁴ Ja onódiomoiza, jáíamacimona aillo comini áizia, illa dígamíe fia jirídoga raana oñede. Dáamíe jirídote. Mai riire omoi aizi, jiríдолle raa omoi jiríдолleza.

²⁵ Nana jífánuafuemo maméritino, jífánoiacana uícodo abina náinitade raana fímaidiaíoi. Afémaci iere abina fímaidiaíoi, riire zábífírede raa íaiói jiríдолlena. (Mei aféruillaido íaiói jirídogá rábiai finoina ífo icuífoi are iñeno riire etúdeza.) Mei íadi jáíamacíri fuíríenailla izói, riire nícidotícai, jaca ninomo zábínide raa cai maiñoñleza.

²⁶ Cue dibénemona uínjímíe izói ebena aizíñédícue. Iere níciduano, come jana fatímíe izói táinona fañédícue, mei íadi comini ñue íinotallena riire nícidotícue.

²⁷ Mei jáíáfodo abi fímailla izói cue abina duere finódícue. Daí abi cue rairuúllamona dama cue abina ñue jíeruitadícue. Bie izói finóicaídícue, jáíamací cue llócailla mei, ruífíruillano Juzíñamui jino cue dótañeillena.

10

Jánaraimo caimátaífiredíno lleta uai

¹ Cue ámatíai, bífúena ómoína fídítaacadícue. Nana cai jáíaidígíma Juzíñamui jóonega mona uíllíena eroide raa anado

jáioicaidiaioi. Daje izói nana afémaci Jáirede Monáillaina ruica jaitádiaioi.

² Daií íaioi jáillamona afe mona uílliedo, daje izói monáillaido dájena Moiséoiri jaináitagaiaioi.

³ Daje izói nana afémaci Juzíñamui monámona cocítaga güille güífirediaioi.

⁴ Iemo nana afémaci afe Juzíñamui nofícimona totátaga jainoi jirófrediaioi. Mei íaioi jáioicailla llezica afe íaioi nabáioicaide jamánomo rírede nofici llócuca jiródiaioiza. Afe nofici daína Cristo.

⁵ Mei íadi afémaci nabézie Juzíñamuina ióbitañede. Iemona zaféredizicimo tícoizitiaioi.

⁶ Nana bífuiai cai onóillena daií íficaide, afémaci gaiga fiénidifuiaina cai gáíñeillena.

⁷ Afémacimona dámierie jánaraimo caimátaila izói omoi caimátaiñeno iri. Juzíñamui Cuegáuai íaioi finócafueña bie izói daide: “Afe comini fia ráinaillano güífirediaioi, jirófrediaioi. Afe mei náidacaillano rafue finoda záifirediaioi.” (Daií íaioi jánaraimo caimátaitaioi.)

⁸ Afémacimona dáarie jiruirena izói, mai cai íñeilli. Daií íaioi jiruirenayona afémacimona daje monado veintitrés mil dígamie titácaiaioi.

⁹ Afémacimona dáarie Juzíñamui afémacimo raire járitañenafueña náfueñeno, fiéni íena facátataioi. Afemona díga comini Juzíñamui oreca jaio ainica íaioi tilla. Mei jira, afémaci Juzíñamui fiéni facátaja izói mai íena cai fácatañeilli.

¹⁰ Daje izói Juzíñamuimo omoi ríiriñeno iri. Mei afémacimona dáarie Juzíñamuimo ríirillano úrioidino titade Juzíñamui abi ímie titácaiaioi.

¹¹ Nana bífuiai cai jaiáidigimamo íficaide, áfena cíoillano comini bífuiaimona ñue abi cai rairuillena. Afe mei, cai onóillena Juzíñamui afe bífuiai ie Cuegánicomo cuetátate, afe izóidifuiamona cai bigímaiai ñue abi cai rairuillena. Mei ja birui lírairuillaimo itícaiza.

¹² Mei áfemona, “Ñue ínoticue” daidímie daiítadifueyona ñue abi rairuiri, afémaci izói cai báíñellena.

¹³ Omoimo comuide facátaina duere zefuúllafuiai, daje izói nana jáímacimo comuide, dani ómoíñedeza. Mei íadi Juzíñamui jaca ínofiregamie. Mei onódicaiza, Juzíñamui caimo ite máirie baimo, rírede facátafuedo caina fácatañeite. Mei jáífodo facátafue comuilla llezica Juzíñamui áfemona omoi jilloille iona ómoína onótaita. Afemona afe facátafueña ja ñue ocuirediomoi.

14 **Ie jira, cue izíruiga ámatiai, jánaraimo caimátaillamona oni omoi jírecairi.**

15 **Ráfuena baitádinomo úrilla izói ómoimo úriticue, íemo ómoína cue daiíllifuemo dani ñue comeci omoi facari.**

16 **¡Cácarei! Cai Ocuíraima tíillamo cai úbicaillena, ñue finoca comunióon illácurimona cai jiróadi, Cristo díena dájena caimare mamécacai. Daje izói afe illa dígamíemo fecaca comuniómo jainaide pan, cai güíadi, Cristo abina dájena caimare mamécacai.**

17 **Aillomaci cai íadi, daje pan cai güíllamona daade come abina iticai.**

18 **Mai Israel nairai finoca ráfuiamo comeci omoi facari. Juzíñamuimo fecaca rílleniai ritino, afe fecaca rílleemo dájena mamécaiaíoi.**

19 **Bie cue dáinamona jánarai ua raaza dáiaicañedicue. Daje izói, afe jánaraimo caimátaillena fecaca rille, jíáie rille baimo ráifideza dáiaicañedicue.**

20 **Cue daina bie izoide: Juzíñamuina onóñedino fia iga raa afe jánaraimo íaíoi feca llezica, afémaci Juzíñamuimo fecáñediaíoi; mei fiénide joríaimo fecádiaíoi. Afe fiénide joríaí anamo dájena caimare omoi itábicairi, daiíñedicue. (Daiítademono ómoína rairuíacadícue.)**

21 **Fiénide joríaí ichécoimona omoi jírúa llezica cai Ocuíraima ichécoimona jirónidiomoi. Daje izói fiénide joríaímo mameca rílleniai omoi ría llezica, cai Ocuíraima mameca comunióna güínidiomoi.**

22 **¿Meita cai Ocuíraimana ríicaitaacadiomoi? Jaca daií íacañedicai. ¿Meita cai Ocuíraima baimo ríirediomoi, afémie duere omoi finoñellena? Jaca daií ríinidicai.**

Crístomona comuide conímana cai izíruillafue cai rairuíinafue baimo ñuera

23 **Uáfuena daina. Dámie ie comeci jítaina izói fínuana rairuínide. Mei íadi afe izói illa cómena canóñede. Mei uafue, dámie ie comeci jítaina izói írede, mei íadi afe ie comécina mánaítallena ñue canóñede.**

24 **Dani omoi ñue illifue jenóñeno, jíáimaci ñue illifue jenórediomoi.**

25 **Fecáriracomo nana fecaca güílleniai jíáifodo o ifoci úrillado jicánoñeno uái daií omoi güiri.**

26 **Mei nana bínie Juzíñamuimo dúideza naa áfemo ite rílleniairi.**

27 **Mei jíáiruido Juzíñamuimo íinoñedimie ona: “Güizaíbi” daiíadi, jaillano jíáifodo ifoci úrillado jicánoñeno nana o ie écajana uái daií güiri.**

28 Mei íadi dáamie: “Bie llíciái jae jánaraimo fecácaza,” ona daiíadi, áfena riñeno iri; daií daidímie comeci fienni o finoiza. Daje izói afémie ifoci úrilla o úaitañelleza.

29 O ifoci úrillana lloñédicueza, afémie ifoci úrilla o zánoñeillena, daií daidícue.

Mei nibai dáamie jicánoite: “¿Nibái mei jiáie come ifoci úrillado rairuícacue?”

30 Nana cue güigari Juzíñamuina: Figura cue daiía, nibái mei jiáima cue güíllari fienni úrite,” daií afémie dáite.

31 Iemona bizóidifue ñuera: Omoí güilla llezica, omoí júra llezica, nana omoí jetáacaigafue jeta llezica, mai nana afe omoí finóacaigafuiaina Juzíñamui ióbillena finori. Afe daií aillo ñúefue íemo nítaitiomoí.

32 Ninó jiáimana oni nibéfodo fiénidifue mo o illáfuedo baiítañeno iri. Ua, judíuaina baiítañeno iri, daje izói judíoñedinona baiítañeno iri. Iemo Juzíñamuimo íinotínona baiítañeno iri.

33 Cue dibénemona, nana comínina nana cue finócafuiaido ióbitaacadicue. Dama cue ñue illifue jenóñedicue, mei jiáifodo nana jiáimaci ñue illifue jenódicue, ñue íaioí jíllloillena.

11

1 Cristo ciótaga ñúefuedo cue jailla izói, ómoimo cue ciótaga ñue illáfuedo omoí jairi.

Juzíñamuimo cai caimátaifirena llezica, ringóniaí jaca jiáimacina lletánidiaioí

2 Cue ámatiaí, ómoimo ñúefue nítaiticue mei cuemo uibíoifirediomoiza. Daje izói omoí cue llófuiana jeire uano áfedo jáifirediomoí.

3 Mei íadi ja birui jiáifuena omoí onótaacadícue. Bifue bie izoide. Cristo nana íñiaí ifoci izói Ocuídímie. Iemo nana ringo ie ini ocuica; afémie afengo ifódimie. Afe izói Juzíñamui Cristo ifode.

4 Iemona dáamie Juzíñamuimo úrilla llezica, ie ifoci ibaia, afe ie ifócina meaire finode, mei ifoci ibailla jiáie come ocuilla anamo íllana llóteza. Daje izói Juzíñamuimona onoiga uai afémie llua llezica, ifoci ibailla ie ifócina meaire finode.

5 Mei jiáifodo, daa ringo Juzíñamuimo úrilla llezica, íemo Juzíñamuimona onoiga uai llua llezica, afengo ie ifoci ibáiñenia, afe afengo ifócina meaire finode. Afe ibáiñena afengo ifo itirai nana cuidoca izoide.

6 Daa ringo ifoci íbaiacañeniadi mei dáaruido nácina cuidórede. Mei nácina cúidocana, ifoci ibáiñena daje izói meáirede. Mei íadi ringo ie ifoci naado cúiduana meáiruadi, afengo ifoci ibáirede.

7 Hññiai íaiói ifócina ibáinidiaioi, mei iima Juzíñamui jánana eróideza. Daje izói iima Juzíñamui ñue ocuilla riinona jino cíotatimieza. Mei íadi ringo iima ñue ocuilla riinona jino cíotaite. Uáfueza, Juzíñamui iññiai anamo iñena izói, afe izói iññiai ringóniai anamo iñede.

8 Mei iima Juzíñamui fínua llezica, ringómona finóñedeza. Mei jiáifodo ringo ímamona finócaza.

9 Iima jitailla jira ringo finoca; mei íadi ringo jitailla jira iima finóñega.

10 Afe jira ringóniai ifócina ibáirede, afengo ie ini ñue ocuícana anamo illa daiíllena. Daií írediaioi mei Juzíñamui abi imaci eróicana itíaióiza.

11 Mei íadi Crístomo cai jainaina dino iima ringónino ínide. Daje izói ringo ímanino ínide.

12 Mei uáfueza ringo ímamona finoca, daje izói uáfueza naga iññiai ringo jéiciga. Iemo nana Juzíñamui comuítagacai.

13 Bie mona ¿nie izói comécidiomoi? conímamo omoi daini. Ringo ifoci ibáiñeno Juzíñamuimo úriadi, meita figura, nibai figóñede. Mai daini.

14 Nanómona omoi izóidino griego imaci onóigaza: Iima ifótiirena baiñede; meaire cíoideza.

15 Daje izói afe abina cai onónafue jiáifuena dáanomo cai llote. Ringo ifótiirena ñue baite, mei áfedo aféngomo ñúefue nítaitaioi. Jaca afe ringo ifoci ibáiillena, ie ifóti áretiina comuítaga.

16 Mei dáamie bizóidifue júfidoacaniadi, bie cue llógamo mai cacai, mei Cristo orécamaci cue diga jiáifoidifuená náfueñedicai. Daje izói Juzíñamuimo ínotino bifue baimo jiáifo maméñediaioi.

Cai Ocuíraimamo cai uibíñoga güilla rafue jiáimaci bácaca

17 Bie izói cue dainado ómoimo ñúefuena nítañeticue, mei omoi gairíllafuaimo ñue iñeno, conímama fiene finódiomoiza.

18 Fueñe bifue llóiticue. Dámierie omoi illáfuena cue fídítatiaioi. Juzíñamui cáimacaillena omoi gairilla llezica, jiáimana énenoruidiomoi, daidíaiói. Afémaci cuemo llógana jabo ínoticue.

19 Afe eneno bozíetaillafue comuífiredeza, nibézie Crístomo nahí ínotinona, nibézie ínoñedinona jino uáfodo daiíllena.

20 Conímama omoi énenoruillamona, bie izói zúide. Gairíllano omoi güillafue omoi bácacaza, ja birui áfena cai Ocuíraima íeñede.

21 Mei güizájillamo dúcina llezica, illa dígamie dama ie atica güille güizájillena jaritafirede. Iemo dáarie jufíruilla llezica, jiáimaci jifáizaibitiaioi.

22 ¿Meita birui omoi jofónidiomoi, afénomo güitá omoi jiróllena? Bie izói omoi illado Juzíñamuimo nahí iinotina jámairuitiomoi. Afe dáaruído güillenidinona meáruitadiomoi. ¿Mei nie izói ómoína dáitícue? ¿Mei ómoimo ñúefuena nitáredícue? ¡Aferi ómoimo ñúefuena nitánidícue!

*Cai Ocuíraima íraicaiño güillamo cai uíbicaillafue
(Mt 26.26-29; Mr 14.22-25; Lc 22.14-20)*

23 Uáfueza, cai Ocuíraimamo cai uíbíñoga güillafue fiéni omoi fínuamona, ómoimo ñúefue nitánidícue. Mei nauí ómoína cue daina izói, bie omoi cue llófuiafuena dama cai Ocuíraima llotátacueza. Afefue be ñíie: Cai Ocuíraima Jesús afe ie Judas fécaja naió, pan llínote.

24 Llínuano Juzíñamuina: “Íere figura” daide. Daina méifodo fécano daide: “Mai omoi güi. Bie cue abi; omoi ñue íllena ditaca izói ómoimo cue fecácaza. Bífuedo cuemo omoi uíbicaifireiri,” daide.

25 Daje izói íaíoi güilla méifomo, jiróracuri llínota daide: “Afe bie jiróracuri eromo ite íji, ómoimo cue comúitalle cómofuena ómoína onótate. Afe bie Juzíñamuimo dájena omoi jainátalle cómofuena cue die uáfueña íficaitate. Diga ícaíño bie íjmona omoi jiróadi áfejido cuemo omoi uíbicaifireiri,” daide.

26 Nana bífuiái jira, Jesucristo nai meine ana biñena llezica, nágaruillái bie pan omoi güíadi, íemo bie jiróracuri ero íji omoi jiróadi, áfedo Jesús cai ícoínia tíllana jino uáfodo llóitíomoi.

Afe bie cai Ocuíraimamo cai uíbicaillafue jaca ñue coméciillamona finórede

27 Mei jira, nie come bie paana Juzíñamuimo ñúefuena nitáñeno güíadi, daje izói afe jirócaji afémie fiéni jiróadi, afémie cai Ocuíraima abi naa ie die diga fiéni finode.

28 Ie jira, illa dígamie nai afe pan güiñena llezica ie ífoci úrillana ñue onórede; daje izói áfeji ie jiróacana llezica áfena onórede.

29 Mei onóigaza afe pan Cristo abina caina onótate. Dáamie aféfuena ñue náfueño ebena güíadi, afe daí íe güillamona dama Juzíñamui íena duere fínoite. Daje izói dama Juzíñamui íe duere finóllíji jírua izoide.

30 Daí omoi íllamona ómoimona aillo írárediaíoi. Jíáíe comíni náinidiaíoi. Iemo daje izói dáarie tíidiaíoi.

31 Mei jíáfodo dani cai ífoci úrillana ñue cai náfueia Juzíñamui caimo riire jícanoñeite.

32 Mei íadi cai Ocuíraima riire caimo jícanoíadi, afe jícanuado afémie izire caina lletade bíniemo ite Juzíñamuimo íñoñedíno diga cai duere fínobiñeillena.

³³ Mei cue ámatiai, bie izóideza: Comunióñ güitállena omoi gairíadi, dámie raire güiñeno dájena omoi güitálleza conima omoi úiñori.

³⁴ Dámie ie jufíruiadi dama ie jofomo güizájirede, fieni omoi gairílledo Juziñamui duere omoi finoiza dai. Ico omoi cue eróizaille llezica, omoi jicaca jiáifuiai jaícina jóoneitícue.

12

Juziñamui Ñuera Joreño illa dígamie Juziñamuimo cai táijinana fibíllena caimo fecade

¹ Amatai, Juziñamui Ñuera Joreño illa dígamie mo fecaca Juziñamuimo táijinana fibíllena ómoína fidítaadicue.

² Ñue onódiomoiza, nai Juziñamuina omoi onóñena llezica, úrinide jánarai anamo íllena cuinada zonóicaigaoi.

³ Iemona: “Bífueña omoi onoiri,” daidícue. Jesuna faidódime jaca Juziñamui Ñuera Joreñodo úrinide. Daje izói Juziñamui Ñuera Joreñodo úriñedime jaca uáfueña, “Cue Ocuíraima Jesús” daiñide.

⁴ Illa dígamie mo afe fecaca jiáiforie Juziñamuimo táijinana fibíllena ite. Mei íadi aféfuiai daade Juziñamui Ñuera Joreño fecácaza.

⁵ Illa dígamie jiáiforie conímána canóredicai, Juziñamui ocuícamacina cai íllena. Mei íadi daade cai Ocuíraima anamo iticai, ie cai ióbitallena.

⁶ Illa dígamie mo cai illafue ñue jaícina jóoíllena, Juziñamui díga jiáiforie caina ocuíoide. Mei íadi daade Juziñamui nana comínina ocuíoide.

⁷ Juziñamui Ñuera Joreño caido jáicanana cai ónoíllena facáfírena raana illa dígamie mo Juziñamui fecade, nana jiáimaci cai canóllena.

⁸ Ie jira Juziñamui Ñuera Joreño dáamie iere baitádimiena jáíllena íena fibítate, jiáimaci llófuellena. Iemo jiáimiena daje Ñuera Joreño nimáiraima úrifírena izói úrillena íena fibítate.

⁹ Iemo jiáimaci afe daade Ñuera Joreñodo jamánomo Juziñamuimo ínotagaiaioi, áfedo jiáie Juziñamuimo ínotino ñue canóllena. Ie mei jiáimaci iráredino jíllotaraimana fibítagaiaioi.

¹⁰ Iemo dáarie uaido dánamona comuide raa fínuana fibítagaiaioi. Iemo jiáinona Juziñamui daina uai uáfodo jino llóllena fibítagaiaioi. Iemo jiáimacina nie ua Ñuera Joreñodo úrillana daje izói nie taino jóriaido úrillana onóíllena Juziñamui fibítate. Iemo jiáimacina nai llófueñega jiáiforiende uáíllaido úrillana onóíllena fibítagaiaioi. Iemo nai jiáimaci afe daina uailai ñue jino dobáiñuana onóíllena fibítagaiaioi.

11 Mei íadi nana bífuiai daade Juzíñamui Ñuera Joreño fecaca. Ua dama ie óiacana izóí, illa dígamíemo jíáíforiede fibíllafuiai na fecade.

Nana cai bie dáamie abímo dúidicai

12 Bífuiai nana bie izóí jóide, mei Cristo íemo ínotino díga, daade abí izóideza. Afe daade abímo jaináidinuiaina aillo ite. Mei aillo ite íadi, nai afe abí daade.

13 Afe izóí aillo jíáífoidinona cai íllamona, níbai judíodicai, níbai griégodicai afe jaca mámeñega. Mei daade Ñuera Joreñodo nana cai daade abina jaináitagacaíza. Daje izóí níbai rairuícanodicai, níbai ráiruñíeganodicai daje abina iticai. Ua daade Juzíñamui Ñuera Joreño daade abina finócacai. Afe daade Juzíñamui Ñuera Joreño úicaitagacai.

14 Cai abí daje izóíñede, mei díga ráaniai daade abímo jaináinaza.

15 Mei jíi, come eíba: “Cue bie ónoñedicueza daje abí íñédicue,” daííadi, daíí dáínado daje abímo ie jaináinana uáitanide.

16 Daje izóí come jefo: “Cue bie uíjñedicueza daje abí íñédicue” daííadi, daíí dáínado daje abímo ie jaináinana uáitanide.

17 Mei cai abí nabáinino daa uíj íadi ¿nie izóí cácaiticai? Daje izóí cai abí nabáinino daa jefo íadi ¿nie izóí jálliana cácaiticai?

18 Mei íadi nana cai abímo jaináidinuiaina, afe abímo ñue baitínuiaímo, Juzíñamui ie comeci jítaina izóí jóonete.

19 Nana cai abí dáadeniadi afe nabáíñiaí illino íñede. Ua abí íñede.

20 Mei íadi ja onódiomoíza, dáamíemo jaináidinuiaina aillo ite, íadi jaca ie abí daade.

21 Daje izóí nane jíáífue, cai ui ónoína: “Ona jítaíñedicue” daíínide. Daje izóí ífoci eíbana: “Ona jítaíñedicue” daíínide.

22 Mei jíáífodo cai abímo ite mairíñedino iere jamánomo jítaírede.

23 Daje izóí cai abímo ite figo comécíñegano áfena iere ñue uíñotícai. Iemo cai abímo jino uáfodo cíotanidínona, áfena íníroido ebire finode.

24 Mei íadi cai abímona uáfori cíoidíno cíotanidíno izóí ebire finónidiaíoi. Bie izóí Juzíñamui cai abímo itínuiaína dájemo jofó ñue zorode, cai figo comécíñeganomo ñúefuena jamánomo cai nitállena.

25 Juzíñamui daíí zorode, cai abímo itínuiaí conímána énenoruíñeillena. Mei íadi jíáífodo illa dígano conímamo comeci úírede.

26 Come abimo itínuaiaimona daano izi cácana llezica, nana jiáinuiaí daje izói duere zéfuitiaíoi. Daje izói dáanomo ñúefue nítano caimare íadi, nana jiáinuiaí dájena caimare itíaíoi.

27 Mei jira bie izói nana omoi Cristo abídiomoi. Omoi mona illa dígamiaí daa ie abimo itínuaí izóidiomoi.

28 Afe jira Juzíñamui jiáífodo táijinana dáarie íemo ínotinomo jóonete. Nano fueñe Cristo orécamaci jóonete. (Afémaci jiáífo mameina ie apóstoles.) Afe mei jiáinona Juzíñamuimona ogáfuaí uáfodo jino llotino jóonete. Afe mei nane jiáinona ie uai llófueraini jóonete. Iemo uaido dáinamona raana comuítatino jóonete. Iemo iráredino jíllotaitino jóonete. Iemo jiáímacina canófredino jóonete. Iemo jiáímacina ocuífireitino jóonete. Iemo nai llófueñega jiáízie uáillaido úritino jóonete.

29 ¿Meita cai nana Cristo orécanodicai? Ieñedicai. ¿Meita nana cai bie Juzíñamuimona ogáfuaí uáfodo jino llotínodicai? Ieñede. ¿Meita nana cai ie uaina llófuetinodicai? Ieñede. ¿Meita nana cai bie uaido raana finódinodicai? Ieñede.

30 ¿Meita cai bie iráredinona jíllotaredicai? Jíllotanidicai. ¿Meita cai bie nana nai llófueñega jiáízie uáillaido úritinodicai? Ieñedicai. ¿Meita cai bie nana aféuai dobáiñuano jino uáfodo llóredicai? Jaca nana llónidicai. Dámierie dobáiñorediaíoi.

31 Mei ie jira, nana bie fibíllafuiaimona baimo ñuera fibíllafuiaína Juzíñamuimona omoi óllena afe omoi nícidori. Mei íadi afe fibíllafuaí baimo, jiáíe ñúefuena ómoimo llófueitícue.

13

Jiáimana cai izíruillafue

1 Mei uáfueza, nai llófueñega jiáízie uáillaido úrillana cue fibíadi, íemo afe baimo Juzíñamui abí imaci úrilla izói úrillana daje izói fibídícue ia, mei íadi jiáimana cue íziruiñeniadi, fia taino ficírede juaí izóidícue. Iemo jiáíe taia ficírede lloéturu izóidícue.

2 Daje izói Juzíñamuimona ogáfuaí jino llúana cue fibíadi, íemo nana nai uáfodo onóñegafuaí llúana cue fibíadi, íemo jamánomo nimáiraimana cue jáiadi, íemo idu jáinua Juzíñamuimo ínogafue cuemo íadi, mei íadi jáimana cue íziruiñenia, táinomo fáífitícue.

3 Daje izói, nana cuemo ite ráaniaí jiáímaci canóllena fia cue fecáadi, íemo Juzíñamui íóbitallena dama cue abí cue jobáitaiadi, mei íadi afe llezica jiáimana cue íziruiñenia, nana cue finócafuaí cuemo ráííñede.

4 Mei jiáífodo, jiáimana izíruitímie jaca járitaiñede. Afémie dúcaífirede. Daje izói úradoifinide, íemo afémie uícofiñede, íemo fiene abí ínoñede.

⁵ Daje afe jáimana izíruifiredimie meáiredifuená jaca lloñede, íemo afémie ie abina jacire maméñede, íemo afémie jaca riicaifinide. Jáíma fiénidifue íemo finóadi, fiéni coméciñeno raire féitate.

⁶ Afe jáimana izíruitimie jáímaci fiénidifuiái fínuari zúureite, mei jááfodo ua ñúefueri íóbifirede.

⁷ Nana íemo comuídifuiáiri caimare ocuide. Raire járitaiñeno aféfuiaimo ñue úiñoode. Juzíñamuimo izire ínuano aféfuiairi jacínaiñeno ñue ocuírde.

⁸ Izíruillafue ziiñona jaca záíñeite. Mei íadi Juzíñamuimona uícodo onóiga ráfuiái záite. Daje izói jáímaci uáillaído úrilla líicaite; íemo daje izói ifócido onóigafuiái záite.

⁹ Mei biruillaído cai ifócido onóigafuiái ñue ícoimo baitáñedicaiza, jabo onódicaí. Daje izói Juzíñamui uícodo onóiga ráfuiáimona due jino lloticaí, mei due onódicaiza.

¹⁰ Mei íadi uire Juzíñamui nana ráfuiái caimo baitálliruimo afe ícoimo ñue báitañegafuiái fáicanocaille.

¹¹ Nai cue úruena llezica úruiaimo itífuiáido úriticue. Urue comeci fácaja izói, comeci facádicue, íemo úrue ifoci úrilla izói iticue. Mei íadi ja cue móonaila llezica, úrue illa izói cue illáfuiaina fáicanocaidicue.

¹² Daje izói birui Juzíñamui dibénemo cai onóigafuiái jaicuíbicaide. Dámie jáiara acáranimo figo cíoiñena izói afe izói Juzíñamui ífuiaina birui figo baitáñedicaí. Mei íadi ico jáíruido nana ñue báitaiticaí. Birui cue ifoci úrilla figo déiñedeza, jabo onódicue, mei íadi aféruido nana ñue ónoiticue. Ji, Juzíñamui cuena onona izoi ñue jaícina ónoiticue.

¹³ Mei daí Juzíñamuimo ínogafue, íemo jáí ocuírinafue, íemo jáí izíruillafue jaca ziiñona féiñeite. Bie daámanidemona izíruillafue iere jamánomoide.

14

¹ Mei ie jira, afe izíruillafue iere jeire omoi oiri. Afe ua llezica Juzíñamui Ñuera Joreño fecaca jáíforie táijinana fibíllena izire omoi jenori. Omoi jenolle llezica, Juzíñamuimona onóiga uai jino llua baimo izire jicari.

² Mei íadi dámie nai llófueñega jáízie uaido úriadi, dama Juzíñamuimo úrite. Comínimo úriñede; mei afémie úrillana buna canóñenaza. Afe ónoñega uaido úritimie Ñuera Joreñodo úrite, mei íadi afémie daina uai uáfodo onóñena báinino jóoide.

³ Mei jááfodo afe Juzíñamuimona onóiga uai llotimie, comínimo úrite íaiói joreño dibéfuemo íaiói ñue móonaitallena; daje izói ñue íaiói náireillena, íemo jáí íaiói caimare fírallena.

4 Afe jiáizie uaido úritimie dama ie joreño dibéfuemo móonaite; mei íadi afe Juziñamuimona onoiga uai llotimie, Juziñamuimo jaináidinona ñue móonaitaite.

5 Afe nai llófueñega jiáizie uaido úrillana nana ómoiena jitáidicue. Mei íadi Juziñamuimona onoiga uai jino omoi llóllena iere baimo jitáidicue, mei afe onoiga uai jino llua, jiáizie uaido úrilla baimo ráifide, Jesucristomo inotino aillo móonaitallena. Mei íadi afe jiáifoide uaido úritimie úrilla dobáñoraíma íadi, afefue ñuera; mei áfedo nana Juziñamuimo jaináidino dani íaioi joreño dibéfuemo daje izói ñue móonaitaioiza.

6 Ie jira ámatiaí cácarei. Uire omoi cue uáiduaibia omoi cigiri Ñuera Joreño úritate jiáizie uaido cue úriadi, cue úrilla ómoimo due jiza ráifiñede. Mei jiáfodo Juziñamui caimo onótagafuiaido cue úriadi afefue ómoimo ráifide. Daje izói omoi ifoci ua uaina cue déitaiadi afefue ráifide. Iemo daje izói Juziñamuimona onoiga uai ómoimo jino cue lloia afefue jiái ráifide. Daje izói omoi cue llófuia ráifide.

7 Mai nana omoi rúado taiga raamo ñue coméciiri, áfemona ñue onóillena. Afe raa jaca comécinideza. Be totíbacui, íemo arpa, íemo juai diga caimare ficire úrite, mei íadi jiáíma fieni taia, áfena cacáidino afe úrilla uaina ónoñeitiaioi.

8 Daje izói comini jobáiriacana llezica, uáidua juai táíñeniadi comini figo áfemo mámeriñeitiaioi.

9 Afe izói ómoimo íficaide: dáamie jiáifoide ónonide uaido omoi llófueia ie dáinana bu onóñena. Afémie táinomo úrite.

10 Uáfodo onóigaza; bie éniemo diga jiáie nairai uaillaí ite. Afe uáillaína onóidinomo nana aféuallaí ñue baite.

11 Mei íadi cuemo úritimie uaina cue ónoñenia, afémiemona jicánemiedicue. Daje izói afémie cúemona jicánemie.

12 Ie jira, afe Ñuera Joreñomona fecaca táijinana fibíllena omoi iere gaina llezica, mai Juziñamuimo jaináidinona ñue móonaitallifuiaina iere izire omoi jicari.

13 Afe jira nai llófueñega jiáizie uaido úritimie afe ie daína uaina ñue jino llúana fibíllena Juziñamuimo jicárede.

14 Mei jiáizie uaido Juziñamuimo cue úriadi, ua cue joreñodo úriticue, mei íadi cue ifoci úrilla, táijiñeno oni eneno ite izoide.

15 Mei íemona ¿ñifue fínoiticue? Cue joreñodo naa cue ifoci úrillado Juziñamuimo úiredicue. Daje izói cue joreñodo naa cue ifoci úrillado afémiemo róredicue.

16 Mei jii, dama o joreñodo Juziñamuimo o úriadi o áinori ite, áfemo fibítañega cacáreidimie, Juziñamuina figura o daífírenafue dibénemo ínide. Mei o dáinana onóñedeza.

17 Mei nibai Juziñamuina figura o daífírena Juziñamuimo ñue cacaide, íadi jiáímana dama ie joreño dibénedo ñue móonaitañede.

18 Nana omoi baimo jiáizie uaido úriredicue. Aferi iere Juzíñamuina figora daidicue.

19 Mei íadi Juzíñamuimo jaináidino gairífirena llezica, ónoñega jiáifodo jóide uailai baimo, jubeba diga ñue onoiga uai cue dainana gáidicue, jiáimaci cue llófuellena. Mei íadi diez mil féirede jiáizie uai afémaci cígimo cue úrillana gáñedicue.

20 Amatiai, úruiai comeci faca izói, afe izói comeci omoi facañeno iri. Mei jiáifodo éicomini izói comeci omoi facari. Mei íadi fiénidifue dibénemo jézainidino izói omoi iri.

21 Jaiai cai ocuilla uai cugánicomo Juzíñamui íemo cacácañede Israel náiraina bie izói daide:

—Bie náiraina jiáie uáillaído úritinodo duere finoiticue; onínemacido íaioi llétaiticue.

Mei íadi afe bie uaido nai cuena náfueñeítiaioi.

Daíí cai Ocuíraima daide, —aquíe izói ie uai lloste.

22 Mei daíí afe jiáizie uaido úrillana fibíllafue Juzíñamuimo íñoñedinomo dúide, jiáie onótate raa izói íaioina onótallena. Ínotinomo dúíñede. Mei íadi Juzíñamuimona onoiga uai jino llúana fibíllena Juzíñamuimo ínotinomo dúide, jiáie onótate raa izói íaioina onótallena.

23 Mei jira nana Juzíñamuimo jaináidino dánomo gairilla llezica, íemo nana omoi jiáizie uaido omoi úriadi ie mei áfemo fibitañega íñoñedinomo omoi cígimo bíadi, nibai “Uáiritaidino izóidíomoi,” dáíítiaioi.

24 Mei jiáifodo Juzíñamuimona onoiga uai jino omoi llua llezica, íemo fibitañega íñoñedinome omoi cígimo bíadi, ie comécimo ite fiénidifuenta uáfodo ónoite. Nana omoi dainana cacáillano afémie dama ie comécina méíñotaite.

25 Afe daíí dama ie comeci onóigafuiai jino cíocaillamona, cañícido ana dújullano Juzíñamuina cáimadoite. Iemona: “Uáfuenta, Juzíñamui omoi cígiri íteza” dáííte.

Omoi gairilla llezica nana omo llollífuiyai jaicuñeno jaícina lloiri

26 Mei jira, ámatiai, omoi gairíllífuiyai bie izói írede: Omoi gairilla llezica ómoimona dáarie Juzíñamuimo rollírúa jino llóiacade. Iemo jiáimie llófueacade, íemo jiáimie Juzíñamui íena onótagafue jino llóiacade, íemo jiáimie jiáifoide uaido úriacade, íemo jiáimie afe jiáizie uaido úrilla jino dobáiñoiacade. Nana bífuiai ñuera. Mai bífuiai daíí íteza, Juzíñamuimo jaináidino ñue móonaillena, daje izói íemo nai íñoñedinomo ínotallena.

27 Jiáizie uaido omoi úriadi mena come dáaruído úrinide. Jiáimie úrilla llícailla méífomo úriri. Daámani come daíí úrrede. Naga come jiáifoide uaido úrilla fuíllamo ie lloga uai dobáiñorede.

28 Mei íadi uai dobáiñoitimie íñeniadi, mai nie izói jíáifoide uaido daiíño iri. Dámie úriacania dama ie comécido Juziñamuimo úriri.

29 Daje izói afe Juziñamuimona onoiga uai llotinomona damieámani úrerede, íadi daje llezica úrinidiaioi. Llotímie fuilla méifomo íemo cacáreidino fairíorediaioi, ie dainana ja Ñuera Joreñomona comuide, nibai íeñede daiíllena.

30 Mei íadi dámie uai jino llua llezica, Juziñamui jíáie ana ráidimiemo jíáifue íena onótaiadi afémie raire fueñe úritarede. Nano fueñe úritimie ie úrillana fáicanocairede.

31 Afe daií nana omoi Juziñamuimona onoiga uai llotino llórediaioi. Uafue dámierie jino llórediaioi, áfedo nana omoi onóicaillena; daje izói áfedo nana omoi comeci náirecaillena.

32 Nana afe Juziñamuimona onoiga uai llotino dani íaioi joreñona rairuirediaioi, nai jíáimie úrilla fuiñena dino.

33 Mei Juziñamui caimare uái illifue comuítatimie; íemo, úrillana féitate gáguana afémie comuítañede.

Nana jíáinomo ite Juziñamuimo jainaide gairídino fínua izói birui ómoína finótaiticue.

34 Juziñamui íóbillena omoi gairilla llezica, cígimo ite ringóniai úrilla rairuiredede, íñiaína ie llófuellena. Juziñamui ocuilla uai daina izói, aféngotiai iima anamo caimare írediaioi.

35 Aféngotiai daa rafue onóacania, jino jofomo íaioi inimo jícanorede. Daa ringo comini gairilla cígiri úria meaire cioide.

36 Mai cácarei, ¿Meita Juziñamui uai dani ómoimona comuide, daií comeci facádiomoi? ¡Daiíñede! Daje izói aféuaina dani ómoimo llógaza comécíño iri; mei diga jíáimaci íena, daje uaina jae llogáiaioiza.

37 Daa come Juziñamuimona onoiga uai jino llotímiedicue daiíadi, bie ómoimo cue ciegáfuiái cai Ocuíraíma Jesucristo cai ocuilla uai afémie daiírede. Daje izói daa come Ñuera Joreñodo úritímiedicue daiíadi, afémie cue cueda dibénemo Jesucristodo cai ocuilla uai daiírede.

38 Iemo afe cüegana ailli cue daina bie izói daiíacañedimiemo omoi náfueño iri.

39 Cue ámatiai, bíemona Juziñamuimona onoiga uai jino llua jeire omoi oiri. Iemo da come jíáizie uaido úria, rairuñeno iri.

40 Mei íadi afe llezica, omoi lloíluaina jaicuíño daje fuémoma jíáimamo meaire cíotaño lloiri. Daje izói nana omoi jetaca raana jaicuíño ñue jaícina maméfireiri.

15

Jesucristo tiilla meine abido cáadimie illafue

1 Cue ámatiai, ómoimo cue lloga jállona uai ómoína uibíñotaacadícue. Afe uaina jae jeire otíomoi. Iemo bie uaido ñue itíomoi.

2 Daje izói cue lloga uai omoi náfueia bie Juzíñamui uai omoi úado jállotagaomoi. Mei íadi naui nibai táinona omoi íñoia jae jíllonediomoi.

3 Cue onoiga jamánomoidífue naui ómoimo llotícue. Juzíñamui Cuegáuai daina izói, Cristo cai fiénidífuiaí muiñóllena tíllafuena jae omoi llófuetícue.

4 Iemo nane afe Cuegáuai daina izói, Cristo raiga daruíamani íllamona meine abido cáadimíena jáillana ómoína llófuetícue.

5 Iemo afe Cristo Pédro mo cíocaide; afe mei nana jíáie ie orécamacimo cíocaide.

6 Nane afe mei dáaruido quinientos baimo íemo ínotinomo cíocaide. Afémacimona aillo nai itíaiói, íadi dáarie jae tídiaíói.

7 Nane afe mei Santiagomo cíocaide, íemo nane nana ie orécamacimo cíocaide.

8 Nana jíáimacimo cíocailla mei, írainomo afémie cuemo cíocaide. Iemona úrue jíáfodo jocoina izóidimíedicue, mei Crístomo cue dóbaicaillafue jarire cuemo íficaideza.

9 Mei Jesús orécamacimona jofófenemo ráifidimíedicue. Juzíñamui jaináidino fállena cue racáfírenamona, naui ie orécamie cuena daínide.

10 Mei íadi Juzíñamui ñue cuemo íllado, bie izói itícue. Afémie cuemo dúecaillano afémie cue cánuana táinomo fáífitañedicue. Mei jíáfodo jíáie ie orécamaci baimo, iere riire táijidícue. Mei íadi afe izói dama táijinidícue. Juzíñamui cuemo dúecaillano cue diga jáicaillado daí táijiredicue.

11 Mei birui, afe ñúefue nibai cue lloga, nibai afémaci lloga, afe llúafuena náfueñedicue. Mei íadi bie ñúefue ja ómoimo cai llogafue, daje izói afefue omoi ínogafue.

12 Mei bie ómoimo cai llogafue Cristo tíllamona meine abido cáadimíena jailla. Afe llogafue bie izói ítena, ¿mei nie izói ómoimona dáarie: “Tíidinomona buna meine abido cáadinona íñeite,” daidíaiói?

13 Meita íaiói daina izói tíidinomona buna cáañenaza, daje izói meita dama Cristo cáañeite.

14 Iemo meita Cristo cáañedeza cai llócaiga uai ráifíñede. Daje izói omoi ínogafue ráifíñede.

15 Iemo afe baimo, cai bie Juzíñamui dibénemo taino llotínodícai, mei Juzíñamui Cristo meine abido cáatate daidícaiza. Meita tíidino meine cáañenaza, daje izói Juzíñamui Cristo meine cáatañeite.

16 Mei tíidino meine abido cáañeniadi, meita afe Cristo cáañeite.

17 Iemo meita Cristo cáañedeza, omoi únogafue ómoína ñue finóñede. Nai ómoimo ite fiénidifuiamo nai jaináicaidíomoi.

18 Meita íaioi daina izói Cristo cáañedeza, Crístimo únote tíidino táinomo fáifidiaioi.

19 Meita Crístimo cai ocuúrinafue daa biruúllaido bíniemo cai illa llezica caimo dúideza, nana comini baimo cai duere finócanodicai.

20 Mei íadi afe izóiñede. Cristo tíillanomona meine abido cáadimiéna jailla ñue onóigaza. Amena llizíllajimona jotáiritiji fueñe uailla izói, Cristo nana tíidinomona meine abido caadino ifódime.

21 Mei bie izói daa cómemona, Adán dainámiemona tíillafue fueñe bíniemo comúideza; daje izói tíidino meine abido cáaillifue daa cómemona comuide. Afémie Jesucristo.

22 Afemona nana comini Adamo jaináideza, tíitiaioi; íemo daje izói nana Crístimo jaináidino meine abido cáaitiaioi.

23 Mei íadi nana nairai daje llezica meine abido cáañeitiaioi. Nágamiái íaioimo dúide dieze, íaioi cáatalliruido cáaitiaioi: raire uícodo oga llizíllaji óina izói, Cristo fueñe meine abido cáadimiéna jaide; afe mei Cristo billíruimo dama Cristo iédino cáaitiaioi.

24 Iemo íirairuimo dúciite. Aféruimo Cristo nana bíniemo ite riírede illaini naa monamo ite riínoredinuiari niné táinocaitaite. Afe mei nana ie illáimana illa riino naa ie anamo itínuiari ie Moo Juzíñamui fécate.

25 Mei jii, Cristo nai illáimana írede, Juzíñamui nana íena éoidino Cristo anamo itábicaitalle dino.

26 Come tíillafue caina anáfenoacade caina éoidime izoide. Mei íadi afe cai titade riinona Cristo íirainomo niné táinocaitaite. Afe mei jíáie táinocaitallimiéna íñeite.

27 Mei Juzíñamui nágafulaína Cristo anamo jóonete. Cristo ñue afémaci ocuúllena. Juzíñamui Cuegáuai bie izói daíadi, Juzíñamui Cristo anamo iñénana uáfodo onóigaza, mei Juzíñamui naga raa Cristo anamo jóonetimieza.

28 Iemo nágafulai Cristo anamo itábicailliruimo, dama afe Cristo Juzíñamui Jitoza ie Moo anamo itábicaiteza. Juzíñamui nágafulai Cristo anamo itábicaítimie. Aféruimo bífuaido naga ráaniai dibénemo Juzíñamui jamánomoidimiéna íite. Naga ráfuai naa ie comúitaga ráaniairi ñue jaícina afémiemo dúite.

29 Nane jíáfue “Tíidinona meine cáañeite” daífiredinona daíitcúe. Dáarie tíidino dibénedo báutizatino ite. Meita tíidino meine cáañeitiaioiza, ¿nibái mei daíi báutizatíiaioi? Iemo tíidino dibénedo báutizafue ¿minícamo ráífide?

30 Iemo cue, cue nabáiñiai diga, Juziñamui ñúefue ícoinia, nágaruillaído iere caina titáacade jácifuemo ífredicai. Meita tíidino meine abído cáañeiteza, daí cai íadi ¿minica caimo ráifilla?

31 Nágarui cue titállena mamédiaioiza jácinomo iticue. Uáfuenta daí iticue. Cue ámatiai, cai Ocuíraima Jesucrístomo omoi ínuari uáfuenta iere íóbídicue. Afe uáfuenta cue íóbilla izói, daje izói uáfuenta nágarui titáacagacue. Iemona tíidino meine abído caalle uáfodo onóigaza.

32 Iemo meita tíidino meine cáañeiteza, jamai cómena cue illa, Efésomo ite illáirede rille izóidimaci diga nauí cue fuiríllamona ¿minica cuemo ráifilla? Mei afe izói cue illa cuemo ráifíñede. Meita uáfuenta tíidino meine cáañeiteza, afe taino llotino ñue jáicina daidíai. Afémaci daina bie izói jóide: “Mai raire cai güilli, güillano cai jirolli; mei úreitiruímo raire tíiticaiza afe mei nine íñeíticai,” daidíai.

33 Jiáimamo omoi jífuefíñeno iri. Abina ñue onona uai uáfodo jóideza: “Fiénide nabáiñiai ñue illáfuiaina niné táinocaitate.”

34 Mei jíáfodo, ñue abina omoi onoiri. Omoi illafue ñue jáicina jóneri. Fiénidífuenta finóñeno iri. Mei ómoimona dáarie Juziñamui nai figo onóñedeza. Omoi méaicaillena bie izói ómoína daidídicue.

Tíidino meine abído cáadinona íllena abí Pablo llote

35 Nibai birui ja dáarie jícanoite: ¿Mei nie izói tíidino cáaitiaioi? ¿Mei afémaci abí nie izói éroite?

36 Afe izói jícanua abina onóñedimie úrilla izoide. Mei daa rííregají cai ríadi, afejí tíide izói énie anamo fiébirede, áfemona íe írocí zicóllena.

37 Eniemo riga raa, afénomona zicódirociñede, mei jíáfodo dama íe íjí ríina. Iemo diga jíáíforiede íjiaí ríina: bellají ríina, íemo mazácají ríina, íemo arroz íjí daje izói ríina.

38 Afe rínají zícua llezica íe ciona izói Juziñamui comúitate. Dani aféjiaí dúina izói zicótate. (Bellájimona bellarí zócaja, íemo mazácajimona mazácari zócaja.)

39 Mei afe izói naga cáadinuiai abí jíáíforie eroide. Come abí jíáífoide, íemo rille abí jíáífoide. Daje izói féedino abí jíáífoide, íemo chámuniaí abí jíáífoide. Nana daje izói eróíñede.

40 Iemo jíái monamo ille abí ite, íemo jíái éniemo illa abí ite. Bíníemo illa abí ebírede, mei íadi monamo ille abí ebire eroína jíáífoide.

41 Jitoma egáiñua fíui egáiñuana eróíñede; jíáfodo egáiñote. Daje izói ucudu egáiñua izóíñeno, jitoma jíáfodo egáiñote. Iemo jíái daa ucudu jíáie ucúduimona egáiñua jíáfodo cíoide.

42 Tíidino meine cáailifue bie izóí jóide. Rífaite íeizi éniemo raiga, íemo tíiñeitinona meine abido cáate.

43 Jámairuiga abi éniemo raiga, ie mei ebire cíoitaga abi meine cáate. Daje izóí nane ríinide abi éniemo raiga ie mei ñue íocirede abi cáate.

44 Bíníemo cai jocoina abi éniemo raiga, ie mei mona dibénemo dúide abi cáate.

45 Mei daí Juzíñamui Cuegáuai llotte: “Nanóidimie Adana cáadimiena íficaide. Iiraie Adán daina Cristo zíiñona cáatatena joréñoredimie,” daide.

46 Juzíñamui dibénemo cai comuítatimie nano fueñe cómuitañega, mei jáífodo bíníemo cai nanóidimie Adán fueñe comuítaina. Afe méifomo Juzíñamui dibénemo cai comuítatimie cíocaide.

47 Nanóidimie énie ie finóinaza éniemo dúide. Méifoide Adán daina Cristo mona ie. Afémie cai Ocuíraima.

48 Afe énie finóinamie izóí, nana bínie comini ie abi izóidiaíoi. Daje izóí Jesumo ínuamona monamo dúidino afe monámona bitimie izóidiaíoi.

49 Iemona énie ie finócamiena cai eroina izóí, afe izóí mona ímiena éroiticai.

50 Amatiai, omoí cacai, ómoína daíticue, nana bínie dúide cai abi die diga jaca Juzíñamui illáimana illánomo jofo jáinide. Daje izóí raire táinocaitaitifue zíiñona illínomo dúíñede.

51 Mei íadi nanómona uáfodo onóñega ráfuenta ómoína onótaacadíicue: nana tíiñeiticai; mei íadi nana jáífodo méidoficaiticai.

52 Uáfuenta, Juzíñamui íraie vudugoí fúunua llezica, jarire ui bótacailla izóí raire jáífodo méidoficaiticai. Afe vudugoí ficire cáacaillamona tíidino meine abido jaca tíiñeillena cáatalliaíoi. Afe llezica cáimona cáadimaci jáífodo méidoficaiticai abido tíiñeillena.

53 Mei caimo ite raire féitífue zíiñona féiñeitifuenta méidoficairede. Daje izóí cai tíite abi zíiñona tííñede abina méidoficairede.

54 Iemo afe bie caimo ite raire féitífue zíiñona féiñeitifuenta méidoficailla llezica Juzíñamui Cuegáuai daina ñue jaícina zúite. Daje izóí cai tíite abi zíiñona tííñede abina méidoficailla llezica afe Cuegáuai ñue jaícina zúite. Afe Cuegáuai daina bie izóí jóide:

Caímo ite tíillífue,

caina éoidimie anáfenoína izóí, anáfenoga; ja táinocaide.

55 Cai tíitaitífue caina izi cácatafirena ríino jae íñede.

Caina nie izóí níbaiñeite,

mei ie molleroí izoide raa ja birui íñédeza.

56 Nana comínimo fiénidifuiái íllamona, títaitifue caina jacíruidade. Iemo jaiái Juzíñamui cai ocuilla uai llúamona cai fiéni finócafuái, duere finórede. Iemona tíillifue cai anáfuenuana jaca jacíruidicái.

57 Mei Juzíñamui cai Ocuíraíma Jesucrístodo áfemo caina anáfenotañenamona íena iere figura daiífiredicái.

58 Ie jira, cue izíruiga ámatiai o ínogafuena jíáifodo méidoñeno ñue jeire omoi oiri. Juzíñamui ocuica táijinafuemo nágaruillai iere omoi náfuefireiri. Mei ñue onódiomoiiza, cai Ocuíraímamo dájena cai táijinafue, jaca táinomo fáífiñeiteza.

16

Dúerede cai ámatiai canóllena úcube eneno ofítafue

1 Crístomo ínote ámatiai canóllena úcube omoi jicánoga eneno ofítallifue llóiticue. Galacia éniemo ite Juzíñamuimo jaináidino cue llófuia izói, afe izói omoi ofítari.

2 Naga semana táiniaruimo, ómoimona illa dígamie omoi oga úcubemona due jiza Juzíñamui íena oni eneno jóneri. Nano omoi llínua dieze oni eneno jóneri. Daií úcodo omoi ñue eneno énofireiri, cue billíruimo afe úcube ómoído cue íraíñeillena.

3 Uire cue bille llezica omoi nizeda dani baillímiedo afe úcubena Jerusalémo óreiticue. Afe llezica omoi cuelle úitímiaí mámece illábedo íaioina óreiticue. Afe bie izói omoi ofítaga úcubena Jerusalémo ite ámatiaimo óreiticue.

4 Onoñegaza, cue jíeruia afémaci diga dane jáiticaí.

Pablo jíáinomo jáillena mamérite

5 Cue jáiadi Macedonia éniédo jáiacadicue. Afe méifodo daií Coríntomo dúciiticue.

6 Mei nibai nano nié dino omoi cígiri íiticue. Nibai ónoñegaza bie rozírediruillaina omoi cígiri záitaiticue. Afe mei oni jíáinomo cue jaille llezica cuena canórediomoi.

7 Mei ómoimo fia jarire érocaillano jáiacañedicueza, cai Ocuíraíma comeci jítaia, omoi cígiri are íacadicue.

8 Mei íadi Pentecostés rafue dúcille dino, benó Efeso jófuemo íiticue.

9 Mei iere ñue Juzíñamui uaimo cue táijilliruimo itícueza. Aillo comíni biruí aféuaimo jíeruicadiaioí. Mei íadi afe llezica aillo afe uaina uáitatino ite.

10 Timoteo ómoimo bíadi, mai omoi cígiri caímare íena omoi itátari. Afémiena omoi áfedoñeno iri. Mei afémie daa cai Ocuíraíma ocuícamo cue izói táijideza.

11 Ie jira ómoimona buna afémiena jámairuiñeno iri. Mei jíáfodo cue ie éroizaibilleza caimare afémiena omoí canori. Mei naa jíáie ínote ámatiaíoiri íena ocuídídicue.

12 Cai ama Apolos dibénemo llóitídicue. Nauí íemo izire jíádídicue, jíáie ámatiaíoiri omoí éroizaillena. Mei íadi afémie birui jáiacañede. Uire ie jáiacalliruimo jáite.

Iraicaiño uáidonocailla uai

13 Mai abina ñue omoí onoiri. Crístomo omoí ínogafue jíáfodo méidoñeno jeire omoí oiri. Jacíruiñeno ñue íociredímie izóí omoí iri.

14 Nana omoí jetáacagafuiai, conímana izíruillafuedo finori.

15 Amataí, birui onódiomoiza, Estéfnas mámediredímie comini, nano fueñe Acaya éniemo ñúefuemo dóbaicaídino. Dóbaicaillano jíáie Crístomo ínote ámatiaí canóllena ja maméritiaíoi.

16 Jira afémaci, naa jíáie afémaci izóidínorí anamo omoí caimare itábicaillena iere jítaídídicue. Daje izóí jíáinona canófredino, naa jabo ocuídínorí anamo mai caimare omoí itábicaíri.

17 Ja Estéfnas, Fortunato, Acaico díga bíllari iere íóbídicue, meí cúemona jica itíomoiza cuena canónidíomoiza. Mei íadi afémaci ómoimona féiredífue cuemo finódiaíoi.

18 Afémaci cue comécina iere náiretadiaíoi; daje izóí ómoína náiretadiaíoi. Afe izoide comínimo ñue omoí jíéruiri.

19 Benó Asia éniemo ite Juzíñamuimo jaináidino ómoímo uaillai orédiaíoi. Daje izóí Aquila ie aí Priscila díga naa íaillinoímo gairídínorí, cai Ocuíraíma mámedido uai ómoímo orédiaíoi.

20 Nana benomo ite ámatiaí oreca uaillai, mai omoí llínorí. Daje izóí conímana caimare uáidori.

21 Cue Páblodídicue. Dama bie cue ónoído cueda uai ómoímo orédídicue.

22 Ninó dámie cai Ocuíraíma Jesucrístona izíruíacañedímie Juzíñamui faidólleza. ¡Cai Ocuíraíma, mai raire biri!

23 Cai Ocuíraíma Jesucrísto ómoína ñúefuena ézicíteza.

24 Nana omoí Jesucrístomo jaináinado, ómoína cue izíruilla uai orédídicue. Daítadeza. Jae ñie.

MÉIFODO SAN PABLO CORINTO

IMACIMO ORÉCABE

Segunda Carta del Apóstol San Pablo a los Corintios

Coríntomo ite Juzíñamuimo jaináidinomo Pablo cuete

¹ Páblodicue. Juzíñamui começi jítaina izóí Jesucristo orécamiedicue. Timoteo cue diga illa llezica, Coríntomo ite Juzíñamuimo jainaide ámatiaimo bibe cueticue. Daje izóí Acaya éniemo ite nana Juzíñamuimo dúidinomo bibe cueticue.

² Cai Moo Juzíñamui, cai Ocuíraima Jesucristo diga ómoína ñue éziciiteza. Afe llezica ñue uái illano dibénemo Juzíñamui Jesucristo diga ómoína jóoneiteza.

Pablo duere zefuállafue

³ Cai Moo Juzíñamuina ióbitaredicai, mei afémie caina dúeruite Mooza. Daje izóí afe Juzíñamui iere caimo dúecaifirede. Afémie cai Ocuíraima Jesucristo Moo.

⁴ Nana duere cai zefuilla llezica, afémie caimo dúecaifirede. Afémie caimo dúecaide, afe izóí jíáie duere zefuáidinomo cai dúecaillena. Afemona Juzíñamui caimo lloga dúecaillafue jíáimacimo llóredicai.

⁵ Mei Cristo duere zefuállafue dibénemo cai nabaia izóí, afe izóí Crístodo caimo iere ie dúecaillafue jeire óiticaí.

⁶ Ie jira, nibai dama duere cue zefuía, bie ómoína cue canóllena. Iemo nibai Juzíñamui cuemo dúecaíadi, áfedo daje izóí dúecaillafue, naa jíllonafue diga óitiomoi. Iemona daje cuemo comuide duere zefuállafue ómoimo comuíadi, raire járitaiñoeno áfemo fia ocuírerediomoi.

⁷ Omoi dibénemo uáfodo onóigafuemo ñue ínoticue, mei ñue onódicueza daje zefuállafue dibénemo omoi illa dieze, afe izóí Juzíñamui fecaca dúecaillafue óitiomoi za.

⁸ Amataí, Asia éniemo cuemo comuide féiredifuiaina ómoimo fidítaiacadicue. Afénomo cuemo comuide riírede facátafue iere jamánomoideza, áfena ocuínidicue. “Nibai bífuemona jíllonoeno benó tíiticueza,” daiífredicue.

⁹ Aféruimo méinellena llavécamié abi izóí cue abi çacaide. Mei íadi tíidino meine abido cáatate Juzíñamuimo cue ínuana cue onóillena, afe zuufue cuemo comuide. Dama cue abí ínoñeillena cue llófuete.

¹⁰ Aféruimo Juzíñamui afe iere jacírede tíillafuemona cuena jíllotate. Afémie nai birui jaca cuena jíllotaocaide.

Daje izói úreitiruillaído afémie aféfuemona cue jílotallemo ocuírcaidicue.

¹¹ Uáfuenta, cuedo Juziñamuimo omoi jicáfíreiaí afémie cuena jílotaite. Aillo comini cuedo Juziñamuimo úriadi, aillo íena íóbitaitiaí. Juziñamui cue ézicia ñúefuiaíri íena íóbitaitiaí.

Pablo Coríntomo jáiñenafue llote

¹² Daa cue comécido onóigafueri iere íóbidicue. Afefue bie izói jóide: cue comeci úrilla uai nífuenino bíniedo cue mácajana llote. Daje izói Juziñamui eróicana jáimana jífueñoeno cue mácaja llote. Omoi cígiri bie izói riire iticue. Juziñamui caimare cue cánuado daí iticue. Dama cue fibíllafuedo daí íñédicue.

¹³ Omoimo cue cuezábiaimo báinino lloga uaina íñede. Omoi facádoia onuille raa ja uáfodo cuega.

Nane jáífuenta ñue omoi onóillemo ocuírídicue.

¹⁴ Aféfuena jabo onódiomoi. Afefue bie izói dáiacade: Cai Ocuíraima Jesús billíruimo ómoiri caimare abí cue ínua izói, afe izói cueri caimare abí ínoitiomoi.

¹⁵ Nana bífuaí iere cue jíeruillamona, omoi eróizaillena fueñe mamériticue. Daí ménacaiño omoi cue éroizailleri íóbitiomoi.

¹⁶ Macedonia éniemo cue jaille llezica omoi jarire cue méiñonocaillena comeci facádicue. Afe mei Macedóniamona abído cue bille llezica nane dáanomoi omoi cue éroizaillena mamériticue. Afe daí afe méifomo judéamo cue jaille llezica cuena cánoitiomoi.

¹⁷ Bie cue mamériffufuaí comeci cue faca llezica, ¿cuena nibaí jáífodo raire méidofíredimie izoide daídíomoi? Bie éniemo ite fiénidino mamérilla izói nibaí cuena mamérite daídíomoi. Afémaci “Jii” daídíaí; íemo méifodo daje llezica “Dama ite” daíífrediaí.

¹⁸ Mei íadi Juziñamui uáfuenta daíífredimie illa izói, afe izói táinona “Jii,” íemo “Dama ite” dáaruído ómoína daíífinídicue.

¹⁹ Mei Juziñamui Jitó Cristo Jesús jaca táinona “Jii,” íemo “Dama ite” dáaruído daíífinideza. Iemo Silvano, Timoteo, íemo cue, Cristo dáina uailaí omoi cígiri llotícaí. Nana Cristo lloga uai táinoñedeza, ua uai. Ie dánana méidofínide.

²⁰ Mei afémiedo nana Juziñamui uícodo llogáuai ñue jáicina zúideza. Ie jira Juziñamuina cai íóbitaja llezica, Cristo Jesudo “Daíítadeza” daíífredícaí.

²¹ Iemo jáí Juziñamui ómoína naa cairi Críntomo riire jáináitate, nana cai ínogafuemona oni jáífodo cai báííñeillena. Daje izói afémie ie táíjinafuemo ñue caina jóonete.

²² Juziñamui ie Ñuera Joreño caimo íllado caina dama íeiena mamede. Afe ie Ñuera Joreño caimo íllamona íco jáíruido Juziñamui caimo fecállífuenta cai líínollena uáfodo onódícaí.

23 Mei jíáifuemo omoi coméciiri. Omoína duéruiticueza, ómoína duere cue finoñeillena, uícodo cue mamérilla izói nai ómoímo biñédicue. Juzíñamui afe bie cue uaina nabáíllena jicádícue, aféuai uafue daiíllena. Cue daina uai uáfueñenia, Juzíñamuina abí fatátaiticue.

24 Omoi íinogafuena riire ocuíaacañedicue, mei omoi íinogafuedo Jesucrístomo ñue riire jaináidiomoíza. Mei jíáífodo conímamo táijina izói, omoi iere aillo ióbíllena ómoína canóacadicue.

2

1 Ie jira omoi cue zúucaitaibiñellena mamériticue.

2 Mei omoi zúucaitadicuenia ¿mei bu cuena ióbitalle? Cue zúucaitadino daní cuena ióbitalle, mei íadi cue dinena ómoína zúucaitaacañedicue.

3 Ie jira nauí ómoímo cue cuezábemo cue daina izói cueticue. Omoína zúucaitaibiacañedicue. Mei jíáífodo cuena ióbitarediomoí. Mei nauí aféruimo uáfueña onódicueza, cue caimare illarui omoi caimare ítiomoíza.

4 Omoímo nauí cue orécabe cue cuia llezica, iere cue comeci zúurenari éedicue. Mei íadi omoi zúucaillena afébena cueñedicue. Mei jíáífodo ómoína iere cue izíruillana omoi onóíllena cueticue.

Fieni finófiredimie ie illafue múñua mei, meine caimare uáidua

5 Mei íadi ómoímo riire úriacañedicueza bie izói dáíticue. Dámie fieni illa dama cuena zúunaitañedeza, mei jíáífodo cue baímo nana ómoína zúunaitade. Daií daídícue iere riífueña jáíñeilleza.

6 Omoi gairilla llezica afe cómemo omoi mameca duere finóllifue ja figo báiteza.

7 Mei benómona afémiemo jíáífodo úrirediomoí. Nauí ie finoca fiénidífue omoi féitano caimare íena omoi uáidori. Daje izói íena dúecairediomoí, aillo ie zúunaillamona afémie jamánomo anado fieni jáíñeilleza.

8 Ie jira ómoímo izire jicádícue, afémie omoi izíruilla meine abído íemo omoi onótallena.

9 Nauí uícodo bifue dibénedo ómoímo cueticue. Nauí omoi cue llófuiana nibai jeire óitiomoí, nibai jeire óñeitiomoí; afena cue onóíllena ómoímo cueticue. Daje izói, omoi comeci ífue onóíllena afébedo ómoína facátaticue.

10 Mei ja benómona, ómoína fieni finódimie omoi caimare uáidoia, cue daje izói caimare íena uáidotícue. Meita afémie fieni finuado cúemona nino féitalle fiénidino íadi, aféfuena féitaticue. Uáfueza ñue ómoína canóíllena Cristo eróicana aféfuena féitaticue.

11 Mei afe zúunaitagamie raire abido íena caimare uáidoredicaiza, afe zúufuedo Taife raire íena ana úiñeillena. Mei Taife comínina bífuefirena uaillai ñue onódicaiza.

Pablo Tróasmo uái iñénafue

12 Jesucristo lloga uai Troas jófuego jino cue llúaíbilla llezica, cai Ocuíraíma áillomaci cuena jíeruitajamona Juzíñamui cue ocuilla táijinafuena uáfodo caimare fuitáredicue.

13 Mei íadi Coríntomona bíacade cue ama Tito afémie cue cióñenamona cue comeci uái iñede. Mei jira Troas imácina facádonocaillano, oni Macedonia éniemo íena jénuaidicue.

Jesucristo cai jaináinamona buna anáfenoñegacai

14 Juzíñamuina iere figura daiífredicai; mei Cristo nana éoidinona anáfenua izói, Juzíñamui dáfeodo, Cristo diga, nágaruillaído caina úicaiteza. Afe llezica ziórede raa caimare jállia izói, afe izói Juzíñamui Crístona onóillifuena caído nágagobiaído jica jalléitate.

15 Cristo Juzíñamui fecaca ziórede uguci izóidinodicai. Nana jíllaitinomo jallédicai, daje izói niné féiraitinomo jallédicai.

16 Afe niné féiraitinomo titade jucui izói íaire jállecaide. Mei íadi jíllaitinomo caimare íocire cáatate jállia izói jállecaide. Bie Juzíñamui ebire mamérrillafue, ¿bífuena bu mei ñue llínorena? Juzíñamui cuena cánua izói canóñenia jaca buna figo llínonide.

17 Juzíñamui uaillai jíáimacimo fécano úcubena llínoñedicue. Afena jaca raiñoñeno llócaidicue. Jíáimaci úcube óllena afe uai jíáifodo méidua izói méidoñedicue. Mei jíáifodo Juzíñamui orécamié izói, afémie eróicana jíáima jífueñeno uáfodo úriticue.

3

Juzíñamui comue ñue finóllifue bie izói daide

1 Bie izói cue úrilla, ¿ómoimona nie izói cacaide? Nibai ¿dama cue abi ínollena meine dáanomo ñue úriticue? Mei íadi daiítañede. ¿Nibai cue ñue illánona onótatibiai ómoimo izájirede? Mei nibai jíáimaci finua izói, ¿ómoimona cue ñue illánona onótatibiai jicárede?

2 Mei daiítañedeza. Dani omoi cue ñue illánona onótatibe izóidiomoi. Omoi baimo jíáie onótatibena jítañedicue. Cue comécimo joide come ñue illánona onótatibe izóidiomoi. Aféuaina nana comini cúemona onórediaíoi.

3 Dama Cristo cueda onótatibe izóidiomoi. Cuedo cuedábiai izóidiomoi, mei cuedo ñúefuena llotátagaomoi. Jamai tintado cueda izóiñediomoi; mei jíáifodo caade Juzíñamui Ñuera Joréñodo úicaiganodiomoi. Daje izói Moisés noficomo cuedáuai

fia comini eróicana jeire oñédiomoi, mei íadi omoi comeci úrillado Juziñamuina ióbitaacadiomoi.

4 Nana afe bie ñuera cue dáinana jacíruiño daíredicue, mei Crístodo Juziñamuimo daa uai fiéño inofiredicueza. Uáfueza, nana cue dáinana afémie ómoimo zúitaita.

5 Mei íadi nana cue jetáacagafuiai finolle ríno dama cúemona comuñedeza; mei jíáfodo nana cue finócafuii Juziñamuimona comuide.

6 Ie lloga comue finóllifue mo cue táijillena, afémie ñue cuena ríno retade. Afe Juziñamui comue finóllifue, jaii cueda ocuífue jeire cai úado caimo zuitánide. Mei jíáfodo Ñuera Joreño comuítaga cai comeci zúñona cáatino caimo ílado, Juziñamui comue finóllifue caimo zuitárede. Afe cueda cai ocuilla uai cai titállena lloite, mei íadi Ñuera Joreño cai comécina cáataite.

7 Afe Moisés lloga ocuilla uai nofici finóinabimmo cueda. Aféuai lluíbilla llezica, iere ríre ebíredifuiido lloga. Aféruído Israel nairai, mei Moisés uíeco jíáfodo iere quenire eróideza, afémiemo eróinidiaioi. Mei íadi afe ríre ebíredifue fáicana dúioicaide. Iemona afe íoimo cai titalle ocuilla uai lluíbilla llezica iere ebíreia,

8 Ñuera Joreño caimo lluíbiga uai, ua afe titade uai baimo jamánomo ebírede.

9 Bífue bie izói dáiacade: mei cai fiénidifuiimona cai titállena lloite ocuilla uai iere ebíreia, birui aféuai baimo nífuenino cai íllena Juziñamui llogafue jamánomo ebírede.

10 Afe ocuilla uai nau iere ebírede, mei íadi Juziñamui como finoca jamánomo ebíredifue comuíllamona, afe nanoide ocuilla uai jae figo ebínide; ja birui ráañede.

11 Iemona nau lloga are íño raire záitífue ebíredenia, afe zúñona záíñeitífue nau llogáu baimo jamánomo ebírede.

12 Ie jira afe bífue mo ocuírillano, jacíruiño caimare úriticue.

13 Mei íadi cue bie Moisés fínua izói finóñedicue. Afémie uíeco quenire cioina are íñedeza féibicaide. Ie jira afe quenire cíoide dúillana Israel nairai cíoiñeillena, Moisés ie uíeco iníroina íbaide.

14 Mei íadi dama Moisés uíeco íbaina llezica afe nairai, uina cíóñedino izói, íaioi ífoci úrilla figo déíñede. Birui afe jaii llogafue íaioi facádua llezica, afe íbaille iníroi izóidífue íaioi onóillifue na jánaide; mei afe íbaille iníroi izóidífue nai oni óñegaza. Afe jízítatífue dama Cristo oni órede.

15 Nai biruimo Moisés cuedánicuai íaioi facádoia, afe íbáiraroi íaioi ífoci úrillana féitaoicaide.

16 Mei íadi dáamie cai Ocuíraimamo ínoia, afe íbáiraroi oni oga.

17 Cai Ocuíraima afe íaioina zíiñona cáatate Ñuera Joreño. Afe ie Ñuera Joreño mo jíeruitimie fiénidena fínuamona ráiruiñegamiena jáite. Daje izói afe Ñuera Joreño do cai Ocuíraimamo ínote come, Moisés ocuica uáimona ráiruiñegamiena jaide.

18 Mei íemona cai uíeco íbáillaroi izóidífue íñeđeza, uáfóri cíoiđe acárani izóidinodicaí. Afemona, cai Ocuíraima ebíredífueña acárani egáiñua izói, jáímamo ja cíotaticai. Afe daí cai bie Cristo izóioicaídicaí, mei nágaruillaído ie ebíredífueña jamánomo náamatafiredicaíza. Bífue cai Ocuíraima fínócafue. Afémie Ñuera Joreño.

4

1 Afemona cue bie jaca comécina náinidino izóíñedicue, mei Juzíñamui cuena dúecaillano bie táijinafue cuemo jóoneteza.

2 Báinino jáíma jífuefírenana ruífíruiticue naa jáie meáiredífuaíari. Daje izói jáíma caimare bífua uaido úriñedicue. Afe llezica Juzíñamui uaina méidota jáífodo lloñedicue. Mei jáífodo jaca uáfuedo úriticue. Afedo Juzíñamui erócana nana comini comeci ñue úrillado afe cue lloga ua uaina íaioina jíeruitadicue.

3 Mei íadi cai llócaiga jíllona uai comínimona nano nígamie mo nai ónonino cacaide. Afefue daí ite, mei afémaci dani nine íaioi táinocaillífue mo jáideza.

4 Mei afémaci Juzíñamuimo íñoñenamona bínie naama Taife, ui nirilla izói, íaioi ífoci úrilla uaina féitate, cue lloga comini jíllotade ebírede Cristo ñúefueña íaioi óñoñeíllena. Afe ñúefue ñue úzere egáiñote raa izoide. Iemo afe Cristo Juzíñamuina jino uáfodo ñue onótate cáadimie.

5 Jino cue llócaína llezica, dama cue abi íena lloñedicue, mei jáífodo afe Jesucristo cai Ocuíraima llócaídicaí. Iemo cue dibénedo Jesuna cue izíruillamona ñue omoi íllena canódimiedicue daífiredicue.

6 Mei Juzíñamui énie comuítaja llezica, afémie “Mai batí jíitino egáiñuairi” daide. Afe daí daídímie, cue comécimo ie ñúefue egáiñua izói jóonete. Afémie daí cuemo jóonete, Crístodo cuemo ácataga Juzíñamui ebírede cáimafueña ñue cue onóíllena.

Juzíñamuimo ñue cai íñuado cai illafue

7 Mei íadi afe Juzíñamui ráífide cáimafue cue zíiñona íñeite abido onótagacue. Bie cue abi are íñeite énie niina íciru izoide; mei íadi afe ñúefueña méidotarede íino bie cue jamai abimo jóonega, afe ríino dama cúemona comuíñenana omoi

onóillena; íemo jíáifodo afe ríino Juzíñamuimona comuállana omoi onóillena.

⁸ Daií cue íllamona diga féirede finónidifuiái cuemo comuíadi, jaca Juzíñamui cánuado aféfuiái ñúeite. Daje izói aillo ónonidifuiái zuure cuemo comuíadi, jaca nai ocuíríñedimie izói íñédicue.

⁹ Mei jíáimaci cuena duere finóllena cuemo racáadi, jaca zóofeñegacue. Fáinamona ana dotaca izói iticue íadi, jaca niné táinocaiñedicue.

¹⁰ Náganuiaimo cue jailla llezica, Jesús íaioi fállena mámia izói maméfiregacue. Nágaruillaído afe titállena mamécamié izói cue illa llezica, afémie ñue cuena náiretade, birui ie cáananona jino comínimo cue onótallena.

¹¹ Mei nai cue caana llezica, nágaruillaído Jesús ícoinia jacire titállena mamécacue, Jesús cáanana, are íñeno tíite cue abído cíotafireillena.

¹² Daií cue zefuállamona cue dibénedo títaigamiéna jáitícue, mei íadi omoi dibénedo dáaruído omoi cáataganona jáitíomoi.

¹³ Juzíñamui Cuegáuaimo dáamié duere ie zefuúbicailla llezica daide: “Juzíñamuimo íñoticue ie jira úritícue.” Mei daií cue jíái afémie íñua izói íñoticue, ie jira Juzíñamui ñúéfuedo úritícue.

¹⁴ Ñue onódicueza, afe tíide Cristo meine abído cáatate Juzíñamui, afe cáataga Jesúsíri nane cuena cáataite; íemo daane cue, naa ómoiri, ie illánomo úite.

¹⁵ Nana bífuiái ñue omoi íllena daií íficaide. Iemona nai aillo jíáie comínina Juzíñamui ñue éziciite. Aillo ie ézicia izói afe díeze aillo comíni jamánomo ñúefue íemo nítaitiaioi.

¹⁶ Mei íemona cue jaca comécina náinidino izói íñédicue. Meita cue abi náinioicaide íadi, cue comeci dinena jaca nágarui náireioicaide.

¹⁷ Mei íemona bíniemo cue caana llezica duere cue zefuállafuiái figo ráañede. Raire líicaite. Ie méfomo afe zuufue baimo ite aillo ninomo fúíñeite ebírede cáimafuiái cuemo cómuite.

¹⁸ Ie jira uído cue cíónamo ébicaiñedicue; mei íadi cue cíóñenafuiaimo ébicaifiredicue, mei afe ciona raana are íñeno raire táinocaitéza. Mei íadi afe cíóñena raa jaca zííñona íite.

5

¹ Ja ñue onódicueza, cue caana abi are íñeno zabide jofó izoide. Iemo jíái onódicueza, bie cue abi táinocaille llezica, Juzíñamui cúeiena monamo zííñona zábíñeitíco ja nite; afeco come ónoído níñega.

² Uáfueza, cue caana abído cue illa llezica, monamo itícomo iere cue jáiacana comécido éfiredicue.

³ Afénomo jaiáníacadicue, mei afeco iniroi come abi jífua izói, cue joreñona ñue jífoiteza. Afemona come abímo ñede joreñona íñeiticue.

⁴ Bie jofona mameca abímo cue illa llezica iere zúunaillano comue abína izire óiacadicue. Mei, bie cue jácaie abína, iniroi come abímona duíñua izói, cue joreñomona duiñoacañedicueza; jífoñega joreño izói íacañedicueza. Mei jíáfodo iniroi jita ízoi, comue cue abi cue joreñomo jítaacadícue. Daí cómuena méidoacadícue, bie cue táinocaite abi, comue cue cáaillinodo ñine féitallena.

⁵ Dama Juzíñamui bie izói abi cue méidollena cuena mamede. Iemo birui ie Ñuera Joreño afémie cuemo fecade. Afe ie Ñuera Joreño cuemo íllado ñue onódicueza, nana Juzíñamui cuemo fecalle ñue llínoiticue.

⁶ Mei áfemona, comue méidoga abi cue llínollena áfena ñue cue onónamona caimare ocuídícue. Nai bie abído cue illa llezica, onódicueza, monamo cue illícomona jino itícue. Bie izói daina cue Ocuíraíma díga íñédícue.

⁷ Afe llezica birui fia cue ciónafuedo ínidícue, mei jíáfodo Juzíñamui mo cue ínogafuedo íredícue.

⁸ Mei jira uáfueña cue llínollena ñue cue onónamona caimare ocuídícue. Bie cue illa abína fáicanocaiacadícue, monamo jaillano caí Ocuíraíma díga cue íllena.

⁹ Ie jira bie éniemo afémie díga cue íñena llezica, daje izói afémie díga cue illa llezica, jaca íena cue íóbitallena jamánomo nícidotícue.

¹⁰ Mei comíni finócafue Cristo riire jícanoranomo nana caí afénomo ácataredícaíza. Afénomo illa dígamie bíniemo illa abído íaíoi fínua díeze, ñibaí ñúefue ñibaí fiénidí fue, áfeze jíridoítiaíoi.

Juzíñamui meine caína caimare uáiduafue

¹¹ Ie jira afe naga come Juzíñamui riire jícanollemo ñue jacíruióicana comeci facadícue. Afemo cue comécíllamona naga cómena Juzíñamui llógamo jíéruítaacadícue. Mei íadí cue illáfueña Juzíñamui onode. Afe izói cue ñue illáfueña omoí onóillemo ocuídícue.

¹² Dáanomo dama ñue cue illáfuedo úriñedicue. Mei jíáfodo cuedo caimare omoí úrillena bie izói ómoína daídícue. Afemona jínoídí fue abí ínotíno uai omoí ollíuai íteza. Afémaci jofo comécimo ití fueña ná fueñediaíoi.

¹³ Mei ñibaí comínimona dáarie cuena daina izói, uáiritaidímie izói itícue íadí, Juzíñamui íena daí itícue. Mei jíáfodo uáiritaiñedicueza ñue omoí íllena canódícue.

14 Mei ñue onódicaiza dama Cristo dainámie nana comini meífomo tíide. Afe caina ie izíruillamo comécillano, nana afémiemo ñnotino íaioi fiénidifuiái tíidena mámano áfena fáicanocaidiaioi. Afemo cue comécillado Cristo caina izíruilla ñúefuena cuena izire llócaitate, ñue omoi íllena. (Daje izói bie Cristo caina izíruilla, ñue illáfuedo cue jáillena cuena ocuíoideza.)

15 Uáfueza, Cristo nana comini meífomo tíide, nana cáadino dani íaioi jitailla izói íñeillena; mei jáífodo, afémaci dibénedo tíllano meine cáadimie Cristo comeci jitailla izói íaioi íllena.

16 Ie jira bínie comini jínoidifuedo comeci faca izói, ñino bumo comeci facáñedicue. Mei nauí uícodo Crístomo bínie comini comeci faca izói, comeci facádicue, mei íadi ja biruí daií afémiemo comeci facáñedicue.

17 Mei daií, Crístomo dájena jaináitagamie comue cómena jaide. Jaiai ie illáfuiái fiénocaillano nágafuiái cómofuiaina méidoga.

18 Nana bífuiái Juzíñamui mámiama Juzíñamui dama afémiemona Crístodo meine caimare cuena uáidote, íemo jáí nana comini afémiemo meine caimare úritallena cuena ocuíñocaide.

19 Bie izói daiíacana: Juzíñamui ie Jitó Crístodo nana comínina íena meine caimare uáidotade. Aféruimo, comini finoca fiénidifue féitango caimare íaioina uáidote. Afe dáruido Juzíñamui meine comínina caimare uáiduafue oni llujállena cuena jóonenocaide.

20 Afemona Cristo íena uai llotínona ómoimo biticue. Ie jira biruí ómoína cue daina uai, dama Juzíñamui ómoimo cuedo jicaca uai izoide. Mei jira Cristo dibénedo ómoimo izire jicádicue. Mai, meine abído Juzíñamui caimare uáidori.

21 Afe Cristo jaca íaifuena finóñede. Mei íadi cai meífomo Juzíñamui afémiena fiénidifuiáiredimie izói duere finode. Daií íena finode, Juzíñamui anamo ñue jaícina illáfueмо cai íllena; mei ie ñue illa izói cai íllena Juzíñamui jítáideza.

6

1 Afe daií Juzíñamui táijinamo afémiena nabáidicue. Ie jira afémie ómoimo lloga ñuera cáimafuiái táinomo omoi fáifitaño iri.

2 Mei Juzíñamui ie Cuegáuaimo daide:

Comínimo caimare cue uáidollena cue mamécaruimo ona cacádicue.

Daje izói jállonaruímo ona canódicue.

Ja biruí Juzíñamui caimare o uáiduaruí. Daje izói biruí o jállonaruí.

3 Iemona Juzíñamuimo cue táijina llezica, buna llótaidonicue, cue táijnafuemo fiēni íaiōi úriñeilla.

4 Mei jiáifodo nana cue jetáacagafuiaido Juzíñamuimo táijidimie cue íllana ácatacadicue. Duere zefuídicue íadi comécina raire járidoño fia ocuídicue. Afedo Juzíñamui íēna cue íllana jino ácataticue. Daje izóī cue jitaica raa íñēna llezica, íēmo llotáiredifuiāi cuemo comuilla llezica áferi járidoño ocuídicue.

5 Daje izóī cuena zechénuano llavé diaiōi. Cue duere finóllēna jacire lléjellejedino cígiri iticue; íēmo iere riírede táijnamo iticue. Diga ícaíño raire íniana onóñedicue; daje izóī jiái jufíruiticue.

6 Daje izóī íáinidimiena cue íllado Juzíñamuimo ñue táijidimiena cue íllana ácataticue. Íēmo diga jiáifuiaido daií cue íllana ácatafiredicue. Uafue uaina cue onónado ñue cue illáfueña cíotaticue. Íēmo cue járitañēnafuedo naa cue dúcaifirenafuiaido áfēna cíotaticue. Íēmo jiái Ñuera Joreño cuemo íllado, naa jiáimana jífueñēno cue izíruifirenado Juzíñamui íēna cue íllana ácatafiredicue.

7 Íēmo ua uai cue llócaillado, naa Juzíñamui riíno cuemo íllado: nana bífuiāido Juzíñamuimo ñue táijidimiena cue íllana ácatafiredicue. Afe llezica jaícina joide illáfuedo jáifiredicue, mei áfedo fiēnide uáillaína oni caitáredicueza. Daje izóī áfedo cue abina riídoredicueza.

8 Daruírie ñūefuiāi cuemo nitá diaiōi, mei jiáiruīdo fiēnidifue cuemo jtá diaiōi. Daje izóī jiáiruīdo cuēdo ñue úritiaioi, íēmo jiáiruīdo cuēna íáiruítiaioi. Íēmo dárie cuēna comínina bífuetimiena daidíāioi; mei íadi jaca uáfueña úricaidimie iticueza.

9 Íēmo dárie cuēna “Bu ónoñegamiedio” daidíāioi; íēmo jiáimaci “Ñuera cai cómedio” daidíāioi. Daruírie titácamiē izóī iticue, íadi nai cáaoicaidicue. Iere duere finócacue íadi méineñegacue.

10 Zuure iticue íadi jiáifodo jaca íóbidicue. Mei ráanidimiedicue íadi, aillo jiáimacina ráaredino izóī ráanaitadicue. Dúredino jofófemo dúredimie izóī cue íadi, nai ráaredimie izóī nana ráaniairi íóbidicue.

11 Coríntomo ite cue ámatiaī omoī cacai. Omoī diga báinino úriñedicue, jaca uáfodo úrifiredicue. Cue comécimo itífueña uáfodo jino ómoimo lloticue.

12 Omoína iere duéruillano rairuíñēno ómoína camare uáidofiredicue. Mei íadi omoī dinēna cuēna ñue izíruillana ráiruítioimoī.

13 Urue Moo, ie úruēna izire jica izóī, afe izóī ómoína izire jicádicue. Omoimo uáfodo jino cue llua izóī, afe izóī

omoi comécimo itífueña jino uáfodo cuemo omoi llóllena izire jicádícue.

Caade Juzíñamui illaco izóidícaí

¹⁴ Juzíñamuimo ínoñedinomo dájena omoi jaináíñeno iri. Omoi jaináíadi, dájena jaícina iñénafue comuúdeza; ómoína jiaífodo itátaite. Mei ¿nie izói jaícinaidífue fiénidífue diga dáanomo jaináírede? ¡Jaca jaináínide! ¿Mei úzefo naa jítífo diga dájena nabáírede? ¡Nabáínide!

¹⁵ ¿Taife meita Cristo diga dájena caimare írede? ¡Jaca ínide! Juzíñamuimo ínotino ínoñedino diga ¿níífue dájena íaioimo dúina? Dáanomo dúitífue íñede.

¹⁶ Mei dama Juzíñamui dáina izói caade Juzíñamui illaco izóidíomoi. Afémie daide:

Iaioimo ítíticue; íaioi cígido macácáitícue.

Cue be íaioi Juzíñamuitícue.

Afe izói cue comínina ítítíaoi, daide.

Iemona Juzíñamui illaco jánarai diga ¿níífue dájena íaioimo dúina? Dáanomo dúitífue íñede.

¹⁷ ¡E jira caí Ocuíraíma bie izói daide:

Juzíñamuimo ínoñedino cígimona oni omoi jai, afénomona oni omoi íi.

Íairedífuíai dibénemo íñeno iri.

Iemona ómoína caimare uáidoitícueza.

¹⁸ Afe llezica omoi Móoitícue.

Iemo dáaruido omoi cue úruíaina ítíomoi.

Afe bífueña jamánomo ríírede caí Ocuide Juzíñamui daíí daide.

7

¹ Cue izíruíga ámatíai, Juzíñamui jaiái uícodo lloga cáimafuíai bie izói joide. Afe daíí caimo íllamona nana jíáíforiede caí íaífuíaimona muiñócana izói oni íredícaí. Abí íaífueña daje izói caí joreño íaífueña fáicanocairedícaí. Juzíñamuína ñue jacíruíllano caí comeci íaininafue ie eróicana jaícina jóoneredícaí.

Corintio imaci comeci méidua

² ¡Mai cuena caimare omoi uáidori! Cue bie jaca buna fiéní finóñedicue. Daje izói buna íáíre finóñedicue. Iemo ómoímona jaca buna jífueñedicue.

³ Bie izói cue dáinado ómoína íáíre finótañedicue. Mei nauí ómoína cue dáina izói, nai cue caana llezica, nágarui ómoímo cue comeci fáíoidícueza. Uáfueña dájena cue tíllíruímo ómoímo cue comeci fáíoidícueza.

⁴ Ómoína íere caimare ínotícue; daje izói ómoírí ñue abí ínotícue. Iemona diga duere zefuíllafue cuemo comuilla

llezica cue comeci jaca náirede, íemo jiái jamánomo caimare iticue.

⁵ Mei daíí nauí cuemo comuídeza. Nauí Macedonia éniemo cue jailla llezica afénomo uái cue illirui jaca íñede. Mei jiáífodo náganuíaído féiredifuiái cuemo comuide. Cuena uáitatino nágafene cue ciríoidiaíoi, íemo diga jiáífuiáiri comécido jacínaioicaídícue.

⁶ Mei íadi comécina náinidinona náicaitafírede Juzíñamui cuemo dúecaide; cuemo dúecaillano Tito dúcinado ñue cuena náicaitade.

⁷ Daa ie dúcinari íóbiñedicueza, mei dáanomo omoi méidoga ñue illáfuedo afémiena omoi náicaitari íóbídícue. Afémie omoi iere cuena cióacanafue cuemo llote. Iemo jiái nauí omoi cígimo comuídifueri omoi iere zúunaillana Tito llote. Daje izói cueri omoi comeci llícitaillari, naa cuemo omoi jíeruicanari íóbídícue. Bífuiaina cue fidínamona jamánomo íóbídícue.

⁸ Mei nauí ómoímo cue orécabe ómoína zúucaitate íadi, birui áferi zúucaíñedicue. Mei níbai nauí áferi zúucaídícue, mei íadi birui Tito cuemo llua izói afebe are ómoína zúucaitañenana fidídicue.

⁹ Iemona birui íóbídícue. Omoi zúucaillari íóbiñedicue, mei jiáífodo afe omoi zúucaillafuedo omoi comeci ífúena méiduari íóbídícue. Bie zúucaillafue ñue omoi ocuíllado Juzíñamuina íóbitade. Iemona ómoímo riire cue ciegabe ómoína fiéni finóñede.

¹⁰ Mei uafue, Juzíñamui íóbilla ñue cai ocuíoiga zúucaillafuiái cai comeci ífue ñúefuena méidotade. Iemo afe ñúefuena méiduado jíllóiticaí. Mei íadi bíniemo ite íñoñedíno zúucaillafue íaioína ana tíllinomo úite.

¹¹ Omoímo comuide zúucaillafue ñue omoi ocuíllari Juzíñamui íóbide. ¡Iemo birui omoi cígimo ñue comuídifuiáimo omoi éroi! Afe zúucaillafue nauí ómoímo ite fiénidífúemo riire ómoína ñue comécítade. Iemo afe zuufue omoi finoca fiénidífúena jino uáfodo llotátate. Daje izói afe zuufue dani ómoína riicaitade; íemo ómoína jacíruitade. Afe méifomo iere cuena cióacadiomoi. Afe llezica omoi cígiri ite fiéni finódimiema duere finótaiacadiomoi. Nana bífuiáimo omoi nífúeninana jino ñue cíotatiomoi.

¹² Mei daíí afe orécabe cue cuia llezica afe fiéni finódimiemo figo comécíñedicue. Daje izói duere zefuídimiemo figo comécíñedicue. Mei jiáífodo ñue omoi illífúemo comécíidícue, cuemo omoi comeci ñue fáiana, Juzíñamui eróicana, omoi onóillena. Ie jira afebe ómoímo cueticue.

¹³ Iemona bífuiáido cuemo caimare dúecaídiomoi.

Mei íadi omoi cuemo dúecailla baimo Tito iere caimare íllari jamánomo íóbídícue. Mei nana omoi afémie ñue uái íllena íena

canódiomoiza.

¹⁴ Naui omoi dibénedo Títomo cue úrilla uai meáiruñeno jaca ñue cuemo baite. Omoi abi cue ñnuana afémiemo lloticue. Ja birui, nana ómoína cue daina uai uáfuena jailla izói, afe izói ómoi Títona cue daina uai uáfuena jaide. Iemona nau afémiema cue daina uai táinomo omoi fáifitañenari iere ióbidicue.

¹⁵ Ja birui Tito ómoína iere izíruite, mei nana ómoimo ie dáinado cue ocuífafuiai jeire omoi úamo afémi caimare uibíoideza. Daje izói jacíruioicana caimare ie omoi llánuamo nai coméioide.

¹⁶ Iemona ómoína jaícina ñue cue ñnuari ióbidicue.

8

Jeruñeno fecáredicai

¹ Amatiai, birui Macedonia éniemo ite Juzíñamuimo jaináidinomo afémi dúcafirenamona íaiói jeruñeno diga raa fecáfirenafue ómoimo llóiacadicue.

² Mei íaióimo comuide féiredifuiái iere íaióina jacire facátate íadi, caimare itíaiói. Daje izói iere duérediaíói íadi, ráaredino izói raana jeruñeno fecáfirediaíói.

³ Mei dani íaiói comeci ñue jítaina izói nana íaióimo ite dieze jeruñeno fecádiaíói, íemo afe íaiói írede úcube baimo nane fecáfirediaíói. Aféfuemo uaina nabáidicue.

⁴ Bie Macedonia imaci Judéamo ite ámatiai íaiói canóllena cuemo izire jicádiaíói.

⁵ Iaióimo comeci cue faca baimo fecáfirediaíói; mei fueñe Juzíñamui comeci jítaina izói, “Juzíñamui ocuilla raire fínoitcai,” dainano afémiemo ñue ñnotiaíói. Afe mei daje izói “O ocuilla raire fínoitcai,” cuena daidiaíói.

⁶ Afémaci daí daina jira, Títomo izire jicádicue, afémi naui omoi cígiri taineca omoi jeruñeno fecaca úcube iráiafue birui ñue ícoimo fuitállena.

⁷ Mei nágafuiai dibénemo iere ñue finódiomoi: ñnogafue dibénemo jamánomoidiomoi. Iemo ñue llófuiana jamánomo baitádinodiomoi, naa ifoci úrillafuiai. Daje izói ráiraieñeno íocirenafue dibénemo jamánomoidiomoi, naa cuena omoi izíruillafueri. Daí omoi íllamona, mai bie jeruñeno raana fécafue dibénemo daje izói jamánomoidinona omoi iri.

⁸ Bie fécafueña ómoína finótañedicue. Daa jíáimaci raire raana fecáfirenafueña omoi onótaacadícue, áfena omoi fidínamona íaiói feca dieze raire omoi fecállena. Afe daí raire omoi fecácanado omoi izíruillafueña jíái uáfuena dáitiomoi.

⁹ Mei cai Ocuíraima Jesucristo caimo dúcaillana ñue onódiomoiza. Afémi fueñe monamo illa llezica bínie comini ráanailla baimo jamánomo ráaredimie. Mei íadi bíniemo bíllamo

caina izíruillano dama abina dúeredimiena finode, ie dúerenado Juzíñamui dibénemo caina jamánomo cai ráanaitallena. Mei uáfueza, naui Cristo monamo illa izói, afémie caina itátaiacade.

10 Bie jiáimacimo fecáfirenafue dibénemo omoi ñue íllena, cue comécimo ite cue fácaja ñuera uai llóiticue. Naui jaide fimónamona nai biruimo afe jeruíñeno fécafueña ñue tainédiomoi. Daa due jiza fécaítino izói, tainéñediomoi, mei jiáífodo íocire caimare fecáfirediomoi.

11 Jira benómona mai ñue ícoimo omoi fuitari. Nano fueñe omoi táinia llezica, omoi íocire caimare fecáfireña izói, afe izói áfena ñue ícoimo fuitari. Omoimo ite dieze, jeruíñeno fecáfireiri.

12 Dámie uáfueña Juzíñamuimo fecáacania, afémie Juzíñamuimo fecaca raa Juzíñamui caimare llíinoite. Mei uáfueña comínimo ite dieze Juzíñamui caimare llíinofiredeza. Afe baimo cómemo íñédena afémie táinona jicáñede.

13 Jiáimaci omoi canófirenado ómoína dúeredinona finóacañedicue.

14 Mei jiáífodo illa dígazie dájerize omoi ráareri, daidicue. Jiáiziena jamánomo baimo ráareri, daiñedicue. Birui íaioi jitailla raana omoi ñue fecárediomoi. Iemo uire omoi jitailliruimo omoi jitailla raana afémaci ómoimo fecárediaioi. Afe bie izóidemono afémaci naa ómoiri jaícina dájerize ráareitiomoi.

15 Jaiai afe monámona Juzíñamui oreca maná daina pan izóidena dibénedo Juzíñamui ciegáuai daje izói daí dáideza: “Aillo ofítatimie mo minícana fiébiñede. Iemo figo ofítañedimie mo ie jitaica raana íñede.” Iemona nana dájerize ráareitiomoiza.

Tito naa ie nabáñiairi

16 Ja jiáinodo Juzíñamuina “Figora” daífiredicue. Mei omoi ñue íllena ómoimo cue comeci úina izói, afe izói Juzíñamui Tito comécina ómoimo jóonetadeza.

17 Afémiemo cue jóonenocaigana afémie ñue jieruite. Iemo dama ie comeci ómoimo jaritafirenamona, ja birui dama ie comeci jítainado omoi eróizaide.

18 Tito diga daa ñue mámecina jica jalléidimiena orédicue. Nana gairífiredi Juzíñamuimo jaináidinodo ie mámecí jica jalleide. Jíllona uaimo afémie iere ñue táijinado ie mámecí jica jalleide.

19 Daa bífueñedeza, mei jiáífodo Juzíñamuimo jaináidino afe bie cai ama nizédiaioi cue diga jáillena. Daje izói cue canóllena afe ñue ínotimiena nizédiaioi. Afe jiáimacimo omoi dúecaille úcube cue fecállemo afémie cuena cánoite. Cai Ocuíraimamo

ñuera uai nitállena bie izói finódicue. Daje izói íemo jiái omoi íocire comínina canóacanána ácatallena, bie izói mamédicue.

²⁰ Bie úcube cue iráiamo buna fieni úriñeillena bie izói finódicue.

²¹ Bie izói ñue jaícina uáfodo canóacadicue, Juzíñamui eróicana ñue cue íllena. Dama Juzíñamui eróicana daí íñédicueza, daje izói jiái comini eróicana daí íticue.

²² Afe íaillinoído jiáie cai izói ínote ámatiaimona dáamie orédicai. Afémie íocire ie mamérillana diga jiáfuiuido ácatate. Iemo birui ómoimo iere ñue ie ínuado, ie íocire mamérillana jamánomo jino ácatate.

²³ Daa come “¿Mei bu Títona?” daíadi, “Jadíe omoi cue cánuamo cue nabáifiredimie,” omoi daíiri. Iemo afe Títodo jaide íaillinoímo comini jicánoyadi, “Cristomo jaináidinomona orécaiaillinoí,” omoi daíiri. Afe llezica “Bie come íaillinoí ñúefue Cristomo nitáfirediaillinoí,” omoi daíiri.

²⁴ Iemona bie oreca íaioímo, uáfuenta íaioína omoi izíruifirenana ñue íaioímo ácatari, nana Juzíñamuimo jaináidino onóilleza. Afe izói bie orécamací ñue omoi llínuado, ómoído abí cue ínuana, uafue daíítaitíomoi.

9

Amatiai íena úcube iráica

¹ Juzíñamuimo ínotino, cai ámatiai izóidino íaioíena úcube iráia dibenedo, ómoímo uáfuenta cúenidicue,

² mei omoi fecállena raire mamérifirenana ñue onódicueza. Omoi Acaya énie imácidiomoi. Nauide fimónamona omoi fecalle raamo raire mamérifirenana Macedonia énie comínimo jaca caimare llófredicue. Macedonia comínimona nabézie, omoi íocire mamérillana fidíillamona comécido náicaidiaioí.

³ Mei íadi bie úcube iráia dibenedo ómoído cue lloga ñúefue táinomo fáifíñeillena, bie cai ámatiai ómoímo orédicue. Daí íaioína uícodo orédicue, nauí cue daina izói áfemo ñue omoi finóbilla.

⁴ Macedonia imácimona dárie cuedo jaia, nai omoi finóbiñenana baizájillena gáíñedicue. Daí omoi íllana íaioí baizájadi, afe cuena meáidaitade, mei áfedo nano uícodo omoi ñue cue ínuana táinomo fáífitaitíomoi. Iemo jiái afémaci daí omoi íllana cíocaizaibiadi daje izói dani ómoína meáidaitaite.

⁵ Afe bíemona nano uícodo ómoímo bie cai ámatiai cue orelle iere jítáiredeza, daí comeci facádicue. Iemo daje izói afémaci nauí uícodo omoi mameca aillo úcube iráiana ñue ícoímo fúitana cánoítiaioí. Bimaci omoi cánuamona afe úcube iráiana fúitano, afe úcube caimare omoi fecállemo ñue finóbítomoi.

Iemona afe omoi fecalle cue riire ocuínidicue. Dani omoi comeci ñue jítainana ácataitíomoi.

⁶ Ja cue llollífuemo omoi uibíoiri. Due ritímie jaca due jofo ote. Iemo daje izói aillo ritímie aillo jofo ote.

⁷ Ie jira illa dígamie ie comeci caimare mamérilla izói ie úcube írede. Jeruíllano éoinamona fecánide. Daje izói jíáima ocuíoillamona ínide. Mei Juzíñamui caimare fecáfiredimiena izíruiteza.

⁸ Cai Moo Juzíñamui nana jíáifoide omoi cáimacaitade ráaniai iere aillo íteza, facádoñeno jamánomo ómoimo fecárede. Daií nana dani omoi jitaica ráaniaina ómoimo nágarui ífireite. Mei íadi dani ómoieñedeza, mei jíáifodo ómoimo aillo ite ráamona, nana jíáiforiede raado jíáimacina jeruíñeno canórediomoi.

⁹ Juzíñamui Cuegáuai bie izói daide:

Dúeredinomo afémie jeruíñeno aillo fecade.

Comínimo afémie ñue finócano jaca are iite.

¹⁰ Iemo afe daade Juzíñamui omoi ríllena jíáie ríamo llizítano ómoimo fecáfiredede. Daje izói afe riga zícuaamona, Juzíñamui áfemona omoi güille raana comuítano ómoimo fecáfiredede. Iemona nana omoi jitailla ríllena afémie ómoimo fécaite; íemo dáanomo omoi rigánuaiaina jamánomo aítátaite; áillamona jamánomo aillo ótiomoi. Daií omoi jamánomo óllemona jíáimaci canolle raa diga icaiño ómoimo íteza.

¹¹ Afemona diga jíáiforiedena ráareitiomoi, jíáimacimo jeruíñeno aillo omoi fecáfireillena. Iemo cue uire omoi orelle úcube cue izájillamona jíáie cai ámatiaina Juzíñamuina “Iere figura” dáitaite.

¹² Mei jira afe bie cánua Jerusalemo ite cai ámatiaimo cai fecallezica, daa íaiói jitaica ráaniai íaióimo fecáñedicaiza, mei íadi afémacina Juzíñamuina “Iere figura” daiítaticai.

¹³ Iemona dani afémaci Juzíñamuido ñue úritiaíoi, mei bie cánua Cristo ñuera uaina omoi jíeruillana íaióimo jino ácatate. Daje izói afémacimo íemo naa jíáimacimo jeruíñeno aillo omoi fécajana íaiói ciónamona, Juzíñamui ñuera uaina jóoneitiaíoi.

¹⁴ Iemona ómoina iere duéruillano, afémaci afe ibana ómoiena Juzíñamui jícaitiaíoi. Juzíñamui ómoído jino cíotaga aillo dúecaifirenmona afémaci ómoído Juzíñamui úrifireitiaíoi.

¹⁵ Ie jira Juzíñamui afe caimo lloga áillo dúecaifirenana jamánomo ñuénamona, fia iga raa izóideza, áfena jino uaido jaícina llónidicaiza. Afe caimo dúecaifirenari Juzíñamuina “Iere figura” mai cai daílli.

10

Cristo orécamiena íllamona Pablo ocuilla ríino ite

¹ Cue Páblodicue. Cristo caímo dúecaífiredeza, íemo jíái afémie iere cáimamieza cue daje izói izire ómoímo jícaíticue. Omoímo riire cue úrizabiñeillena ja birui jícadícue. Dáarie cuena uáitatino bie izói cue dibénedo daiífirediaíoi: “Pablo omoi cígiri illa llezica afémie iere comécina mánaídímie, mei íadi afémie jica jíainomo illa llezica afémie abido riire ocuídímiena dóbaicaide,” daídíaíoi.

² Mei jíáífodo, omoi cue erózaibilla llezica, riirede uaina ómoímo cue úrizabiñeillena izire jícadícue. Mei ómoímona dáarie cuemo fiénide uai jíatádino ite. Afe íaíoi jíitaca uai bie izói joide: “Nana ie finócana daa bínie comíni jíitaina izói finoca,” daí daídíaíoi. Iemona afémaci cue úritaja, riirede uáillaído íaíoi úriredícue. Mei íadi afe izói cuena úritaño iri.

³ Mei uáfueza, ua cómedícue, mei íadi bínie comíni fuirífírena izói fuiríñedícue.

⁴ Fiénidífuaí oni cue caitalle raa, bínie comíni fuirilla raa izóiñede. Mei jíáífodo cue fuirilla raa Juzíñamui ríinona ríinorede, abi ríidollena riire finócauai izóidena cue táinocaitallena.

⁵ Mei áfedo cuemo fiéni jíatácana oni caitádícue; daje izói cuena íaíoi cáitajana oni féitatadícue. Nana uáitaiacadino íaíoi abi ínuano jíáímaci Juzíñamuina raire onóñeillena jíitafirediaíoi. Ie jira nana íaíoi comeci faca uallaí Cristo anamo itátaitícue, afe Crístona íaíoi comeci jíeruillena.

⁶ Cue llógana omoi jíeruilla ñue ícoímo dúcille llezica, nana jíaíe uáitafiredinona duere fínoíticue, íaíoi jíeruíñena ícoínia.

⁷ Daa jínofene cioide ráaniaímo eróídiomoi; uáfueza, náinidímiena cue eróinamo eróídiomoi. Nínó dámie “Uáfueza cue bie Cristo iédícue,” daííadi, bífueмо afémie uíbicaítarede: Cristo íena ie illa izói, daje izói cue Cristo iédícue.

⁸ Mei díga icaiño, cuemo ite ríinodo cue llóíadi nai áferi méaidaiñeíticue. Mei caí Ocuíraíma afe ríino cuemo jónete, áfedo Juzíñamui dibénemo ñue omoi cue móonaitallena. Omoi niné cue táinocaitallena cuemo íñega.

⁹ Fia rabedo ómoína jíacídotímie izói íacañedícue.

¹⁰ Dárie cue cuezabíaído daídíaíoi: “Jamánomo riire ocuífírede; mei íadi afémie comíni eróícana úrilla llezica, afémie ríímieñede. Afe llezica ie úrilla uaina iere jáimairuiredé,” daídíaíoi.

¹¹ Afe izói úritímie bie izói onótarede: Jicana rabedo riire cue úrilla izói, afe izói omoi cígiri cue ille llezica riire úritícue. Nane afe dáaruido afémacina riire ócuíticue.

¹² Afémacimona dáarie dani íaioiena ñue caimare úritiaioi. Táinomo abí ínuado úritiaioi. Afémaci illa izói jaca mamériñedicue. Dani táinomo íaioi comécillado conímamo comécidiaioi. Ñuera come daíillena dani conímamo facádiaioi. Daíí fácajama abina onóñedimacina jáidiaioi.

¹³ Cuemo dúíñede raado abina ínoñeiticue, uai cue llócaillena mózizaillinona llotímie, Juzíñamui. Afémie ñuera uaillai cue llócaillena omoi illánomo cuena dúcite. Uáfueza Corinto dínomo cuena jáitate.

¹⁴ Ie jira cuemo dúide táijinafue baimo jáíñedicue. Mei nauí Cristo ñúefue fueñe ómoimo jino dénuai biticueza. Iemona afe omoi cígiri cue táijille cuemo dúide. Nano fueñe lluáibiñedicuenia afe táijille cuemo dúíñede; mei íadi daítañede.

¹⁵ Jáíimaci táijinana cúeiena abímo maiñóñedicue. Afedo abina ínoñedicue. Mei jáíifodo Juzíñamuimo omoi ínogafue ñue móonaille dínori, omoi cígiri jamánomo cue táijillemo ocuúridicue. Mei íadi cuemo dúide táijinafuedo táijifireiticue.

¹⁶ Iemona afe méifomo omoi illa batífenemo jica itínomo jílona uai lluájiredicue. Mei íadi afe llezica jáíima taineca táijinamo táijíñeiticue, ie táijinado abí cue ínoñeillena.

¹⁷ Mei jáíifodo daa come abí ínoiacania, cai Ocuúraimado abí ínoiteza.

¹⁸ Dama ie abído ñue úritímie, ñuera come daíífirenamiena jáíñeite; mei jáíifodo daa Juzíñamui ñue úrillámie, ñuera come daínámiena jaille.

11

Cristo óreñega taino llotino Pablo díga

¹ Abina onóñedímie izói due jiza úriticueza. Raíre cue uai oñeno fáicana cue úrillamo ómoína cacáretacadicue. Mai fáicana abí cue ínuamo omoi cácarei.

² Ómoína íere uríoifiredicue. Afe omoi cue uríoilla Juzíñamuimona comuide. Dámie íe áreiacania jétañega jítaingo óllena jica ía mámano jicánote. Afe jicánogango daa afémiemo ínreirede. Mamécaruimo afengo moo aféngona izájite. Afe izói Crístomo ómoína cue izájillena ja Crístodo mamédicue. Ie jira ómoiri íere uríoídicue.

³ Mei comíni nánoidingo Evana jaio bífuiano jífuia izói, afe izói jáíimaci ómoína bífuiana jacíruiticue. Afemona figo abí omoi ráiruñenia jífuefitiomi. Iemona Crístomo ñuera comécido omoi comécillana oni jáíifodo féitaitiaioi. Daje izói Crístona nahí omoi izíruillana féitaitiaioi. Afena jacíruiticue.

⁴ Cue llócaiga Jesús izoíñedimiena ómoimo llotíaioi. Afemo fáicana caimare ñue cacáreidiomoi. Afemo nibai omoi ñinollena jacíruiticue. Iemo nauí ómoimo cue lloga o maiñoca Ñuera Joreño izoíñedena jiáifoide joréñona abimo maiñódiomoi. Iemo jiái uícodo cúemona omoi cacana ua jíllona uai izoíñedena jiáifoide uai jeire otíomoi.

⁵ Birui baie omoi cígido jáillamaci “Cai bie Cristo orécamací baimo ñúemacídicaí,” daídíaioi. Mei íadi afémaci jofófenemo ráifiñedimiedicue, daí comécioídicue. Iemona ¿nibái mei cuemo cacáreñeitiomoi?

⁶ Mei nibai cue úrilla uai figo jínoñeniadi, nai cue onoiga rafue jino llúana dibénedo iere baitádimiedicue. Nana ómoimo cue llócaillado afe bie cue onógafuíaína jaca nágarui jino ómoimo ácatafiredicue.

⁷ Jíllona uai ómoimo raiñoñeno cue llúado, omoi anamo cue abina itátaticue. Daí iticue cue baimo ñúefuedo omoi jalléillena. Daí cue illa ¿nibai fiénide? Daítañede.

⁸ Jiáie Juziñamui jaináidino omoi cue canolle úcube ibádiaioi. Omoi cígiri cue íllena afe úcube cue llínua afémacimona cue bairoca izoide.

⁹ Omoi cígiri cue illa llezica, cue jitaica raana ite. Mei íadi áfena jaca ómoimona raiñoñedicue. Aféruillaído Macedóniamona bite cai ámatiaí, cuemo iñede raana fecádiaioi. Afe daí cue abina rairuídicue, omoi cígimo nana cue finócafuiaí ómoimo juare zúñeillena. Iemo nauí cue illa izoí, afe izoí omoi cígiri jaca daí ífireititue.

¹⁰ Cristo ñúefue ua cue onona izoí, afe izoí nane jiáifuena ua onódicue. Afefue bie izoí daide: Nana Acaya éniédo raiñoñeno táijifireititue. Afe cue táijina cue raiñoñenari cáimacaiticue. Iemo afe cuemo ite cáimafue buna cúemona báiroñeite. Afena uáfodo onódicueza.

¹¹ ¿Nibái mei daí úriticue? ¿Nibai ómoína cue gáñenado daí úriticue? ¡leñede! Omoina iere cue gáinana Juziñamui ñue onode.

¹² Mei íadi jaca cue fínua izoí finócaititue, cuena uáitatino abí ñinotañeillena. Jaca ómoimo raiñoñeno táijifireititue, baie abí ñinotino íaioi abi ñinua raa cue bairóllena. Afémaci úcubena ómoimona izire jicáfirediaioi Cristo ua orécamiéna cue illa izoí íaioi íllena. Mei úcube íaioi ófirenamo ñinotiaioiza, áfedo “Cristo orécanodicaí” daííllena. Ie jira afe íaioi ñinoga uai oni caitáacaditue. Iemona jaca raiñoñeno ómoína canófireititue.

¹³ Baie afémaci Cristo óreñega iere taino llotino. Daje izoí afémaci jiáimacina jífuefiredino. Iemo jiái afémaci come jifeia jiáifo eroína izoí, Cristo orécamacina comínina íaioimo comécitaacadiaioi.

14 Afe bie jiáifodo afémaci eróinafue cáimona jánaiñede, mei dama Taife egáiñote Juzíñamui abi ímiena eróillena méidoficaideza.

15 Ie jira, Taifemo táijitagano ie méidoficailla izói méidoficaifirediaioi; afe jiáifoide raa ízoiñede. Iemona jifeide come eroina izói bimaci ñue ite comínina eróillena abina jiáifodo méidotiaioi. Mei íadi íaioi finócaiga fiénidífue dúina dieze afémaci táinocaitiaioi.

Cristo orécamiena ie íllamona Pablo duere zefuide

16 Nane dáanomo ómoína dáitícue: Bie jabo abi cue ínuamona cue úrillamona bu cuena “Uáiritaidimedio” daíñeno iri. Mei íadi daa come daí comécido daíñadi, dama uáiritaidimie izói úriticueza fia omoi eroiri, áfedo jabo abí cue ínollena.

17 Afe bie abí cue ínuua uaina, cai Ocuíraimamo ite rínodo cuena daí daítañede. Mei jiáifodo dama uáiritaidimie izói úriticueza.

18 Mei dani íaioi daina ñuera uaido abí ínotinuiaí aillo íteza; afe íaioi taino abi ínuana izói, afe izói abí ínoitícue.

19 Omoi zánuaño dáitícue, omoi jamánomo baitádinodiomoiza, mai uáiritaidimie izói cue úrillamo caimare fíaicana omoi cácarei.

20 Mei ómoína baie riire táijitatinona caimare fíaicana cacáreidiomoi. Iemo jiái ómoimo ite raana báiruaibitino uaimo caimare fíaicana cacáreidiomoi. Iemo jiái ómoína námataibitino uaimo fíaicana caimare cacáreidiomoi. Iemo jiái omoi jámairuitinomo caimare cacáreifrediomoi. Iemo omoi uiécona fatade izóidino, afe ñí ómoína fiéni úritinomo fíaicana caimare cacáreidiomoi.

21 Bie izói cue daina cuena meáiruitade, mei íadi dama cue jámairuillado dáitícue, cue bie afémaci ínuua izói, cue finóllena figo ríinidicue.

Mei íadi aillo jiáie comini jacíruiñeno daífirena izói, cue jiái jacíruiñeno dáitícue, mei íadi áfedo uáiritaidimie izói úritícue.

22 ¿Meita afémaci hebreo imaci? Cue jiái daje izóidicue. ¿Meita afémaci Israel nairai iédiaioi? Cue jiái daje izóidicue. ¿Meita afémaci Abrahámona comuídino? Cue jiái afémaci izóidicue.

23 ¿Meita afémaci Cristo táijitagano? Cue bie afémaci baimo Cristo ocuícamedicue. (Bie izói cue dáinado uáiritaidimie izói úritícue.) Cue bie afémaci baimo jamánomo táijidicue. Cue bie afémaci baimo zéchedogacue. Daje izói afémaci baimo llavécacue. Iemo diga ícaíño titáacagacue.

24 Cinco dígacaiño judío nairai duere cue fínua llezica, cuena zechénotadiaioi. Nágari duere cue íaioi fínua dáruido treinta y nueve dígacaiño cuena zechénotiaioi.

25 Iemo dacaiñoámani cuena ragüízido fatíaioi. Iemo dácaño noficiaina cuena níjidiaioi. Iemo dacaiñoámani cue jailla áillue nocáe buide. Iemo dácaño cai buíllamona daa naio daa mona díga afórede monaillai cígimo iticue.

26 Dáanori uái iñeno iere macáfiredicue. Iemo díga imani jacíredinuiamo iticue, íemo jacírede merírifiredino cígimo iticue, íemo dama cue comíniri jacíredifuiái cígiri iticue naa jicánemaciri. Iemo áillue jofue cígimo ite jacíredifuiái cígimo iticue. Daje izói áillue nairai jinomo ite jacíredifuiái cígimo iticue, íemo jíái monáillaimo jaci cácadicue. Iemo jíái taino ámatiaí cígimo jaci cácadicue.

27 Daje izói juárede tájinamo iticue naa féiredifuiári. Díga ícaño mona naio díga iníñeno tájidicue. Daje izói iere jufi cácadicue, íemo jíái jainoi iñénari duere zefuídicue. Díga ícaño Juzíñamuimo comeci fácano güiñeno jáicadicue. Daje izói rólliemo duere zefuídicue. Daje izói inícuironino jáicadicue.

28 Nane bífuiái baimo jíáfuiái cuemo comuide. Nágaruillaído náganuiaiimo ite Juzíñamuimo jaináidinomo cue comeci úicaide. Iaioina abíoidicue izói duere zefuídicue.

29 Iemona daa come figo Juzíñamuimo ie íñoñenamona duere zefuádi, afe cuena duere zefuítate. Daje izói dámie íaifuemo comeci nine féiacaniadi, cue comeci niné féizailla izoide. Iemona afe cuena meáidaitade; daje izói cuena ríicaitade.

30 Mei afémaci táinodo cuena abí ínotaadi bie izói dáíiticue: Cue mairíñenana jino ácatate raado ñue cue úrillena baimo gáidicue.

31 Cai Moo Juzíñamui bie cue daína ua uaina onode. Afémie cai Ocuíraima Jesucristo Moo; íemo jíái afémie jaca ninomo íóbioitaregaza.

32 Naui Damáscomo cue illa llezica afe nairai jabóidillaíma naga nazemo úíñorainina jóonete, llaitada cue llavéllena. Afe nairai nahíllaima Areta mámeciredimie.

33 Mei íadi jíáie Juzíñamuimo ínotino, eróirafomona cirígaido cuena ana agüínetiaioi; mei afe jofue onífene cirínua raa caífo jicado íteza. Daí afémacimona botada jíllodicue.

12

Juzíñamui Páblomo nicai anado ua ráfuedo úrite

1 Dáamie dama abído caimare úria minícana oñede. Ie úrilla jíáie raamo ráíñede. Afefue ñue onódicue ía, cai Ocuíraima

nicaí anado cuemo ácataga raa jino llóredicue. Afe llezica uícodo nai buna ónoñegafuiai cuemo llote.

² Afe cuemo ácataruimona ja catorce fimona jaide. Aféruimo Crístomo cue jaináinamona caifo tercera monamo Jesucristo illámonamo uigacue. Onóñegaza nibai caana abido uigacue, nibai íeizinino uigacue. Afe dama Juzíñamui onoiga.

³ Cue úinaruimo nibai abí diga uigacue, nibai daa cue joreño úina, áfena onóñedicueza; dama Juzíñamui onoiga.

⁴ Juzíñamuimo ínnote tíidino jáillinomo uigacue. Afénomo Juzíñamuimona dama cuemo duide ebírede uáillaina cacádicue; afe uáillaido Juzíñamui rairuídeza birui úrinidicue.

⁵ Afe cuemo ácataga raado abina ínoredicue, mei íadi áfedo abina ínnoñeiticue. Dama cue abina ínnoñeiticue. Mei jáífodo cue mairíñenado ñue cue úrilla iere gáidicue.

⁶ Mei dama abido cue úriacaniadi, afe abina onóñeno úrilla izoíñede, mei jáícina uáfuena úriticue. Mei íadi áfedo úriñeiticue, mei cue ciona izóí comini cuemo comécillena jitáidicueza. Afe izóí cúemona íaioi cacana izóí áfeze cuemo íaioi comécillena jitáidicue. Afe baimo aillo jáíforie cuemo íaioi comécillena jitaiñedicue.

⁷ Afe cuemo jino onótaga raa iere jamánomo ebire cioide. Ie jira áfedo jamánomo abina cue ínnoñeillena, duere zefuítagacue. Afe duere cue zefuilla come abimo eedo llúina izoide. Afe eedo, Taife come izi cácatate raa izóí, cuena duere fínuaibite.

⁸ Bie duere cue zefuilla raa cai Ocuíraima oni oréllena da-caiñoámani íemo jicádicue.

⁹ Mei íadi cai Ocuíraima cuena daide: Cuemo ite o cue cáimadofirena nana omo comuide duere zefuilla o ocuúllena ñue cánoite. Mei daa come náinina llezica, cuemo ite ñuera riino afémiedo ñue jino ácatarede,” daide. Ie jira cuena náinitade raari ióbidicue, afe daí Crístomo ite riino cuedo jino ácatallena.

¹⁰ Mei jira cue náininari ióbidicue, íemo comini cuena báíñuari ióbidicue. Daje izóí raana cue jitáillari ióbidicue. Afe izóí cue duere íaioi finóacanari ióbidicue. Iemo Cristo ícoínia féiredifuiiai cuemo comuúllari ióbidicue. Mei jamánomo íaioi cuena uáitaacana llezica, afe llezica Juzíñamui cue cánuado comécina jamánomo íociredimiena jáidicueza.

Coríntomo ite Juzíñamuimo jaináidinomo Pablo comeci úicaiñirede

¹¹ Dama cue abi ífuedo cue úricaillamona uáiritaidimiena jáidicue; mei íadi daí cue úrilla cuena ocuíoide izóí itiomoi. Mei dani omoi ja birui cuedo ñue úriredimoi; mei ráifiñedicue

ia, omoi cígido jaide Cristo óreñega jamánomoidino jofófenemo ráifiñedicueza.

12 Naui omoi cígido járitaiñeno fíaicana táijidicue. Afe cue táijicaillarumo jiáiena onótate raana finódicue naa ciórainina ráaniairi. Afe dáaruído ebire cáimacaitate ráaniaina finódicue, nana bífuiaido Cristo ua orécamiedicue daiíllena.

13 Jiáie Jesumo jaináidino cígiri cue illa llezica, cue jitaica raana raiñódicue; mei íadi omoi cígiri afe izói iñédicue. Daa bífuedo jiáie ínotino jofófenemo ómoimo comécidicue. Afe ómoimo cue raiñóñena dibénedo ómoimo fiene cacáiadi áfemona meine caimare cue uáidori.

14 Ja birui dacaiñoámani omoi cue eróizaibillena finóbidicue. Iemo omoi cígimo cue íllena ómoimo juare fínoñeiticue; mei ómoimo ite úcube cúeiena máiñuaibiñeiticueza. Mei jiáifodo dani omoi Juziñamuiño ñue jaináitallena bíiticue. Mei uafue, éicomini úruiai íena úcubena ofítarena. Uruiai ie moo íena ofítanide.

15 Omoi comeci ñue íllena dama cuemo ite diga caimare fúitaiticue. Daje izói ómoiri cuemo ite máiriena jeruñíeno fúitaiticue. Omoína jamánomo cue izíruiaidi ¿afe ibana meita omoi jofófenemo cuena izíruirediomo? Daiñañede mei íadi birui afe izói ómoimona dáarie cuena daií finódiaioi.

16 Nana ómoína cue llótaihuaibiñedicue. Afena ñue fairiótiomo; mei íadi afe méifomo dámierie jiáifodo daidíaioi: “Irebaimo jiita izói caina bífuiano úcube ote,” daidíaioi.

17 Naui ómoimo cue orécamacimona, ¿meita cuemo izájillena dámie ómoína bífuiano úcube ote? ¡Oñede!

18 Omoi méiñuaillena Tito izire jicádicue. Afémiedo daa jiáie ama orédicue. ¿Meita afe Tito úcube óllena ómoína jífue? ¡Daiñañede! Tito, ie nabai, íemo cue, cue macáfírena izói, daje izói nana macádicaí, ¿ero ua? Dájena ñue comécillado táijifiredicaíza, ¿ero ua?

19 “Caido abi ríidotio,” nibai caina comécido daidíomo. Mei íadi afe izói jóiñede. Mei jiáifodo Juziñamui eróicana Crístomo jaináitagamié izói úriticaí. Mei cue izíruiga ámatiaidiomoíza, nana bie izói cue daina omoi comeci Juziñamui dibénedo ñue móonaillena lloticue.

20 Mei omoi diné cue bille llezica cue comeci óiacana izói iñédiomo; cue cíoizaibillena jacíruiticue. Iemo afe ibana omoi comeci óiacana izói iñédicue cue omoi baizájillena jacíruiticue. Iemo dájena ñue omoi jaináiñenamo jacíruiticue. Daje izói omoi íiradoifírenamo jacíruiticue; íemo jiáimana omoi ícifírenamo jacíruiticue. Iemo afe llezica jiáimana duéruíño dani abí omoi úcificaiillari jacíruiticue. Iemo jiáima uaita uai omoi llófírenari jacíruiticue. Iemo jiámaci jánari omoi úrifírenari

jacírruiticue. Daje izói fienu abí omoi ñnofirenari jacírruiticue. Iemo ocuícana ná fueñedino izói fienu ebena omoi ífírenari jacírruiticue.

²¹ Iemo jiái uire omoi cue éroizabille llezica omoi daí íllari cue Juzíñamui ómoído cuena meáidaitalleri jacírruiticue. Iemo afe llezica nibai aillo ómoiri cue éeiari jacírruiticue, mei jai-iai ninómona diga fiénidifuiái omoi fínuari éedicueza. Mei ómoimona aillo nai íaióimo ite íaifuiái féitañediaíoi. Daje izói íaióimo ite jiruífueña fáicanocaiñediaíoi, íemo íaióí comécina jírioi de fienu finócafuiái oni nine féitañediaíoi.

13

Pablo íraicaiño íaióí uáidua uai, íaióimo llonódacaiga uai diga llote

¹ Naui ménacaiño omoi méiñuaidicue. Ja birui nane meine omoi méiñuabiticue. Onódiomoiza, naga júfidoga rafue mena, nibai daámari uai nabáiraini daje izói úriadi, afe júfidogafue ñue záide.

² Naui méifodo omoi cue méiñuabilla llezica, nana naui uícodo fienu itínona duere cue finóllena llonódacaidicue. Birui benó jica cue illa llezica dáanomo naui ómoína dama cue dáinana llóiticue: “Uire nane omoi cue méiñuabibia naui uícodo fienu itínona naa ómoiri dúecaiñeno duere fínoiticue,” daidicue.

³ Iemona omoi jenoca Cristo cuedo úrilla onótafirena raana ñue ónoitiomoi, mei áfena jenófirediomoiza. Omoiri Cristo náinidimie izóiñedeza, afémie ríinorede, Cristo omoi diga jífanoñedeza, ríiredimieza. Omoína ñue rairuíoide. Omoi cígiri íemo ite ríino jino cíotate.

⁴ Uáfueza, Cristo náinidimie izói cruzmo coraica, mei íadi birui afémie Juzíñamui ríinodo caade. Afe daí Cristo náinina izói dájena náinidicue, mei íadi dájena afémiemo cai jaináillado Juzíñamui ríinodo íiticue, omoi ñue cue finófireillena.

⁵ Mai daní ñue abina omoi onoiri. Afemo, mai ñue comeci omoi facari, Juzíñamuimo ñue ñnoga uai iere jeire omoi úana omoi onóillena. Omoi comeci ífue facada ñue jónefireiri. Jesucristo ómoiri íllamo ¿meita afemo comeciñediomoi? Mei nibai jíáifodo jóide. ¿Meita táinona ñnotiomoi? ¡Afe daí íñeiteza!

⁶ Mei uáfueza, cai bie táinona llotímieñedicue. Afemo ñue omoi comécioicaillemo ocuúridicue.

⁷ Iemo afe llezica fiénidifue omoi fínoñeillena Juzíñamuimo jícafiredicue. Daa ñúefue dibénemo omoi íllena jícadicue. Mei íadi ñue jaícina llófuefiredimie cuena daíllena jícañedicue.

Dámie “Jaícina lloñedio” dáiiadi áfena llóñeiticue. Ñúefuemo omoï ille comini cueri dáinana baiño ráifide.

⁸ Jaca ua uai jeire omoï oíadi úaitañeiticue; ómoïna lletánidicue. Mei jiáifodo afe uaina nabáiredicue.

⁹ Ie jira ómoïna cue lletáninamona nánina cue cíoiadi, áferi caimare ióbidicue, mei afe llezica omoï ñue comécina náirediomoïza. Iemo nífuenino ñue jaícina omoï íllena jaca jicáoiñeiticue.

¹⁰ Nai omoï cue méiñuaibiñena llezica, bibe uícodo ómoïmo cueticue, uire ómoïmo cue bíadi omoï diga riire cue íñeillena. Uáfueza, omoï riire cue lletalle ríino Juzíñamui cuemo iga. Mei íadi omoï cue táinocaitallena cuemo íñega. Mei jiáifodo Juzíñamui dibénemo omoï comeci ñue cue móonaitallena cuemo iga.

¹¹ Cue ámatiai, ñue ítiomoïza. Dani nífuenino jaícina omoï illínomo omoï coméciiri. Bie ómoïmo cue lloga uai náfuiano, conímana omoï náicaitafireiri. Conímamo dájerize caimare omoï coméciñeireiri. Daje izói jiáí dájena ñue uái illífuemo omoï iri. Iemo cai uái illífue comúitate Juzíñamui omoï diga íñeireite, íemo ómoïna ie izíruiñeirena ónoitiomoï.

¹² Caimare conímana omoï uáidori.

¹³ Nana benó ite dájena Juzíñamuiño ñinote cai ámatiai ómoïmo uai orédiaioï.

¹⁴ Ja birui cai Ocuíraima ómoïna ñue fínoiteza. Daje izói Juzíñamui ómoïna izíruiñeireiteza. Iemo Ñuera Joreño ómoïna nabáioicaiteza. Daiñtadeza. Jae ñie.

GALACIA ENŪE IMACIMO SAN PABLO ORECABE

La Carta del Apóstol San Pablo a los Gálatas

Pablo, Galacia éniemo ite Juziñamui uaimo ñnofiredinomo cuete

¹ Cue Páblodicue. Juziñamui ñúefue llujilla orécamiedicue. Dani comini cuena jóoniamona llujillañedicueza. Daje izói comini cue óriamona llujitagamiñedicue. Mei íadi dama Jesucristo llujitagamiedicue. Daje izói afe Jesús tíidinomona meine abido cáatate Moo Juziñamui llujitagamiedicue.

² Nana Galacia éniemo ite Juziñamuimo gairífiredimacimo bibe cueticue. Daje llezica nana cue diga ite ámatiai uai orédiaioi.

³ Moo Juziñamui fecaca comécina uái illafue dibénemo mai omoi iri. Cai Ocuíraima Jesucristo afe bífuiai daje izói caimo llote. Aféfuiai dibénemo mai omoi iri.

⁴ Mei afémie, cai fiénidífuiai dóllena, titállimiena dama ie abina izájide. Daíí cai Moo Juziñamui jítaina izói, afémie ie abina izájide, bie fiénidiruillaímona oni cai jírecaitallena.

⁵ Juziñamui daíí cai jíllojamona, afémiena “Jamánomo cáimamedio” mai cai daíilli. ¡Afémie jaca daíí íteza! ¡Mai!

Abí dine cai jílloille uaina jaca ñede

⁶ Juziñamuina raire omoi zóofiailla uai, cuena fáigacaitade. Zóofiano, ja jíáie táinomona lloga jíáfodo joide fia daina jíllo uaimo íacadíomoi. Aferi fáigacaidicue. Mei Juziñamui, Cristo caina izíruillado omoi jílloillena, jae caimare ómoína uáidoteza.

⁷ Uáfueña dáiticue: abí diné jíáie jíllo uai jaca ñede. Mei íadi dáarie ómoína áfedotimaci, cai bie Crísto ñnuamona cai jíllo uaina, jíáfodo feire méidoacadiaioi.

⁸ Mei íadi jíáie come afe cai jíllo uaina uáitajano, jíáfoidifue ómoimo llóyadi, mei dama Juziñamui afémiena fáidoiteza. Nibai dama cue daíí jíáfodo llóyadi, Juziñamui faidóllícueza. Daje izói monámona biite Juziñamui abí ímie daíí llóyadi, mei Juziñamui íena fáidoiteza.

⁹ Naui ómoimo cue llua izói, birui nane daje izói daidicue: Díno omoi jíáfodo llófueacadino cáimona omoi cacana jílloafueña afémaci uáitaiadi, mei afémaci Juziñamui faidólliaioiza.

¹⁰ Bie riire cue dánado ¿mei nibai comini bífueticue cue íaioi cáimadollena? ¡Mei íeñede! Dama Juziñamuina íóbitaacadicue. ¿Mei nibai comini uícori figomiena íacadicue? ¡Daje izói

ieñede! Comini uícori fígomiena nai cue íacaiadi, mei Cristo táijitagamiena ínidicue.

Pablo Juziñamui ñúefuena llujítimiena jáillafue

11 Mei ámatiaina ja maméidiomoiza, ja bífuena nane omoi uíbitaticue: Cue lloga jílona uai comínimona comuñede.

12 Daje izói aféuaina comínimona cacáñedicue. Ua áfena bu llófueñegacue. Mei jáífodo aféuaina dama Jesucristo onótagacue.

13 Naui judíuai ínogafuaimo cue jainaina lezica, cue illáfueña jae onódiomoi. Aféruido Juziñamuimo gáirifiredinona iere duere íaioi cue finóllena riire cue rácajana fidídiomoi. Daje izói nana íaioina niné cue táinocaitallinona onódiomoi.

14 Afe lezica, cue uzútiai daináuailaimo iere izire cue jaináiacanamona, judíuai ínogafuemo baimo baitádimiena jáidicue. Aféfuemo comécina iere fígomiena jáidicue. Ua aillo cai judíuaimona, daane cue comuílagimamona baimo fibídimiena jáidicue.

15 Mei íadi nai cue jócoñenia, Juziñamui cuena nizede. Daí níziano, iere cuena ie izíruillamona, cuena uáidote. Cue ie uáidua mei, ie óiacana izói, ie Jitona cue onótate.

16 Ua, ie Jitona cue onótate, afe Jitó cue onónamona Juziñamui ñuera jílona uai judíoñedino cígimo cue llujíllena. Daí Juziñamui cue uáidotemo, bumo nífuena “Mai cue llofue” jicáñoño, dama oni Arabia éniemo raire jáidicue.

17 Ua, Jerusalemo ite nano cue uícomo uáidoga Jesús ñúefue llujítinomo úrizaiño, raire oni Arábiamo jáidicue. Diga irui dinomo cue illa mei, abido Damáscomo biticue.

18 Afe lezica Jerusalemo are nai jáiñedicue. Dafimonaámani dinomo cue fuita mei, Jerusalemo jáidicue, Pedro diga cue úrilla. (Afémie jáífo mameina Cefas.) Aféruimo dama Pédrona ñue onódicue. Quince dígarui ie diga nabáiricadicue.

19 Aféruillaído jáíe Jesús ñúefue llujítimacimona dámie códicue; afémie Santiago, cai Ocuíraima ama.

20 Juziñamui eróicana úriticue: Bie ómoimo cue cuela nahí uáfueza, daidicue.

21 Afe méifodo Siria éniemo naa Cilicia énie diga jáidicue.

22 Judea éniemo ite Crístomo gáirifiredino nai cue uíecona onóñediaioi.

23 Dáafuena fidídiaioi. Afefue bie izói daide: “Jaii cai fállena cai racádimie, ja birui cai ínollifue llocana uite. Jaii jáíruido aféfuena afémie nine táinocaitaacade.”

24 Iemona cuedo Juziñamuimo ñúefue jónetiaioi.

2

Jiáie Jesús orécamaci ja Pablo caimare uáidotiaioi

¹ Catorce fimona fuilla mei, Bernabé diga meine Jerusalemo jáidicue. Afe dáaruído Tito uiticue.

² Juzíñamui cuena daina izói dinomo jáidicue. Dño Jerusalemo Juzíñamuimo ínnotino ocuífiredede jalléidino dáarie ite. Iaioiri oni eneno fueñe dáanomo gairídicue. Dinomo judíoñedinomo cue llófirega jállona uai íaiοimo jino lloticue. Bie izói íaiοimo llujáidicue, nana cue llócaigafue táinomo fáifñeillena; daje izói birui jino cue llogafue táinomo fáifñeillena.

³ Aféruido cue nabai Títona judíuai lloga uai izói, finóñediaioi; afémie judíoñedino íadi, ie bacano icoi quetátañediaioi.

⁴ Afe llezica dáarie táinona llote ámatiai, báinino cai cígimo dúcidiaioi. Afémaci Tito bacano icoi quetáacadiaioi. Afémaci cai cígimo uñnodoimaridiaioi, rairuínino cai íllana onóillena. Mei ja birui Jesucristomo cai jaináinamona, Moisés ocuica uáimona uáfodo jirénogacaiza. Afémaci nane abido áfemo caina izire rairuícano izói finóacadiaioi.

⁵ Mei íadi íaiοi llógana naado jeire oñédicai, mei oni íaiοi taino llujáfue abina uitátañedicaiza. Daí íaiοina jieruñedicaizai, mei ua jállona uai jaca jeire omoi óllena, iere jitáidicaiza.

⁶ Mei íadi afe Jerusalemo ite ocuífiredede jalléidino comue jiáifuena cuemo lloñediaioi. Afémaci jalléinafuena figo náfueñedicue, mei onódicueza: Juzíñamui, fia jinofe ífuena riire jicánoñede. Mei jiáifodo afémie naga cómemo dájerize ñue jaícina jicánoite.

⁷ Ua, jiáie cómofuena cuemo lloñeno, dama cue llujáigafue ñue jieruitiaioi. Ñuera jállona uai, judíoñedinomo cue llócaillena Juzíñamui cuemo jóoniana como fidídiaioi. Afe uícomo daje ñuera jállona uai judíuaimo Pedro jino llócaillena fidídiaioi. Afe táijina Juzíñamui Pédro como jóonete.

⁸ Mei uáfueza, Pedro ória izói, cue jiái orécacue. Daje Juzíñamui Pedro judíuai cígimo oreca. Ie mei daje Juzíñamui judíoñedino cígimo cuena orede.

⁹ Aféruillaído Santiago, Pedro, Juan diga nanoide ocuídino. Bie ñuera táijnafue Juzíñamui cuemo jóoniana íaiοi fidínamona, cócona Bernabé diga caimare uáidotiaioi. Daí cócona finódiaioi, ja nana dáamacidicai daíillena. Iemo, afémaci judíuai cígimo táijizailla llezica, coco jiái oni judíoñedino cígimo táijizairedicoco. Daí cócona daírediaioi.

10 Daa rafue cócomo jicádiaioi: “Mai jaca féitaño, duéredinomo comeci ómicoi uíbifireiri,” daidíai. Afefue cue finólleña jaca járitaifiredicue.

Antioquía jófuego Pablo Pédróna lletade

11 Mei jáiruido Pedro Antioquía jófuego dúcia mei, íemo eróicana íena riire lletádicue, mei rairuíredifue ie finua jira.

12 Fueñe afémie judíoñedino diga güizájifrede. Mei íadi Jerusalemo ite Santiágo jaináidino dúcina llezica, afe Pedro judíoñedino diga dáanomo abido güizáiñede. Íaiomona jirecaillano oni eneno ífirede; mei Jerusalémóna bite bacano icoi quétafue llotínóna Pedro jacíruiteza.

13 Afénomo Jesumo ínote jáie judíuai ite. Pedro oni eneno jáillana íaioi cíoillano, afémaci daje izói judíoñedino cígimona oni jirecaidiaioi. Iirainomo jái Bernabé íaioi fiénide oni jirecaillamona daje izói jirecaide. Afefue jáimacina jífueoicaide.

14 Mei íadi, ñuera jíllona uai ua daína izói íaioi iñénana cue cíoillano, nana dáanomo gairídino eróicana Pédróna daidicue:

—O judío, mei íadi benomo judíoñedino illa izói itio. Benomo judío illa izói iñedio. ¿Ñibái mei birui judíoñedínóna judíuai illa izói jóoneacadio? —dino Pédróna lletádicue.

Nana jáie comini izói, judíuai Crístomo íaioi ínogafuedo jíllorediaioi

15 Cai bie jaca jocóinanomona judíuaidicai. Juzíñamuimo comeciifiredicai. Judíoñedino Juzíñamuimo comécina facáñediaioi. Iemona fiénidifuiairedínóna itíaioi. Cai afémaci izóiñedicai.

16 Mei íadi onódicaiza: Moisés ocuica uai iere ñéfinamona, buna Juzíñamui anamo ñue jaícina ínide. Mei dama Jesucrístomo dániríe íaioi ínuado illa dígamie daí jaícina írede. Iemona judíoñedino izói, cai daje izói, Jesucrístomo ínoticai, afe íemo cai ínogafuedo Juzíñamui anamo ñue jaícina cai íllena. Uafue, Moisés ocuilla uai iere ñéfinamona buna ñue jaícina ínide.

17 Birui cai judíuai cígimona dámie Crístomo ie ínogafuedo Juzíñamui anamo ñue jaícina íacaniadi, bie izói daírede: “Judíoñedino izói fiénidimíena iticue” daírede. ¿Meita bífueomona “Cristo fiénidimacina caina itátate” daírede? ¡Daínide! Mei Cristo jaca buna fiénidimíena itátañedeza.

18 Mei jáífodo, nauí niné cue tánocaitaga Moisés ocuicafue, meine abido jeire cue óiacaiadi, ua cue fiénidena uáfori jino

ciótaiticue. (Mei afefue iere cue ñéfinamona Juzíñamui anamo ñue jaícina ínidicueza.)

¹⁹ Afe Moisés ocuícáfue ja cuemo dúíñede. Da afe uai jeire cue oñenamona cuena titade izói finode. Afe Moisés uaimo cue dúíñenamona, ja Juzíñamui dibénemo, tíllanomona meine cáadimie izói iticue.

²⁰ Cristo nauí cruzmo coraica tílla izói, ja birui tíide izói finócamiedicue. Iemona ja birui cue cáanano dama cúeieñede; Cristo cuemo íllado cáadicue. Afe bie éniemo ite bie cue cáanano, dama Juzíñamui Jitomo cue ínuado ófiredicue, mei afémie cuena izíruillano, dama ie abina cue meífomo cruzmo tíizaideza.

²¹ Juzíñamui cue jílloilena caimare cue cánuafuena jaca ruifruicañedicue. Mei dámie Moisés ocuica uai jeire úamona Juzíñamui anamo ñue jaícina ítenia, Cristo tílla ráifiñede.

3

Moisés ocuica uai comini ínogafue abido joide

¹ Aíi, Galacia comini, iere abina onóñedinona itíomoi. ¿Bu aima izói omoi bífuia, ua uaina omoi jíruíñeillena? Nauí ómoimo cue llúaruido, coraica Jesucristo jino uáfodo ómoimo fidítaticue.

² Mai bifue cuemo omoi lloíri: ¿Nífuedo afe Ñuera Joreño ómoimo ite? ¿Meita Moisés ocuica uai jeire omoi úado ómoimo ite? ¡Iñega! Mei jíáfodo, ¿omoi cacana uai omoi ínuado afe Ñuera Joreño nibai ómoimo ite? Jíi, áfedo ite.

³ ¿Níbái mei iere abina onóñedinona itíomoi? Jesumo omoi ínua mei, Juzíñamui Ñuera Joreño nanómona ñue omoi canode. Afémie ómoina canode ñue jaícina omoi íllena. ¿Meita ja birui afe cánuana zóofiano dama ómoimo ite ríinodo nibai ñue fúitaitíomoi? ¡Jaca fuitánidiomoi!

⁴ ¿Nana omoi duere zefuíllafue jaca ómoimo nibai ráifiñede? ¿Níbái taino abiri aféfuiai ómoimo daí íficaide? Aféfuiai táinona íllamo comécíñedicue, mei daítañedeza.

⁵ Nauí Juzíñamui ie Ñuera Joreño ómoimo fecade. Iemo Juzíñamui omoi cígiri uaido finoca cíórainina raana comúitate. ¿Mei nibái bífuiaina Juzíñamui ómoimo finode? Ocuica uai jeire omoi úamona, afémie aféfuiaina finóñede. Mei jíáfodo dama cúemona omoi cacana uai omoi ínuamona afémie bie izói finode.

⁶ Abraham Juzíñamuimo ínote; íemo ie ínuamona comécina ñue jaícina jóidimiena Juzíñamui íena caimare uáidote.

⁷ Ja bífuemona onórediomoiiza: Nahí Abraham erófene ígímaiai Juzíñamuimo ínotino.

⁸ Juziñamui nana uire ie finóllifuiaina raire uícodo onode. Iemona ie Cuegáuaido aféfuiaina afémie jino llote. Nana íemo uire ínotino judíoñedino íadi, Juziñamui anamo ñue jaícina itátaillifuena Juziñamui raire uícodo onode. Afena ie onónamona bie ñúefuiai jaiái uícodo Abrahana daide: “Naga náiraiái ómona ñúefuemo ézicilliaíoi,” daide.

⁹ Mei daí nana Juziñamuimo ínotino dájena Juziñamuimo ínote Abrahámoiri ñúefuemo ézicilliaíoi.

¹⁰ Nana íaiói jílloillena Moisés ocuica uaimo ínotino ja fieni faidócaiaíoi. Mei daí Juziñamui Cuegáuai dáideza: “Nana Cuegánicomo ite ocuica daináfueña, nágarui ñue fuitáñedino ua fieni faidócaiaíoi.”

¹¹ Bífueмона ñue onódicaiza: Ocuica uai iere ñéfinamona buna Juziñamui anamo ñue jaícina jóoneña. Mei jáífodo Juziñamui Cuegáuai daide: Juziñamuimo ie ínogafuedo Juziñamui anamo ñue jaícina jóonegamiena jáidimie, afe daa ie ínogafuedo are zíñona íite.

¹² Afe Moisés ocuica uai comini ínogafue abido joide. Búuailaina ñue ícoimo fuitáacadimie, aféuailaido írede.

¹³ Ocuica uai cai faidóllifueмона Cristo caína oni jírecaitade, mei afémie cai ícoinia faidóbideza. Juziñamui Cuegáuai bie izói daide: “Naga aménamo agüñeta fagámie faidócaza.”

¹⁴ Bífue daí íficaideza, judíoñedino ñúefuemo ézicillena. Ua Juziñamui Abrahamo lloga ñuera ézicirafue daí Jesucristodo judíoñedinomo fecaca. Bífue daje izói íficaideza, Juziñamui uícodo lloga Ñuera Joreño cai ínogafuedo caimo íllena.

Moisés ocuica uai, Juziñamui Abrahana dainana oni caitánide

¹⁵ Cue ámatiai, naga come onóigafueмона dafue ómoimo llóiticue: Dámie contrato llínoiadi, ie mámece afébemo cuega, íemo afe ja cúegana buna oni caitánide. Daje izói afe cuega baimo buna jáíuaina zotánide.

¹⁶ Ja onódicaiza: Afe ñuera uícodo lloga uailai Abrahamo Juziñamui jaiái llote; daje izói Abraham erófene ímiemo lloga. Aillo ie erófene igímaiaimo Juziñamui Cuegáuai daíñede, mei jáífodo “O erófene ímiemo llóiticue” daide. Afe dainámie Cristo.

¹⁷ Cue llogafue bie izói joide: Juziñamui riirede méidoñega uai Abrahamo llote. Afe llezica afefue féíñeillena Juziñamui afe uaina riire jónete. Afe lloga uai contrato izóidíuái; jáífodo méidonideza. Ie jira cuatrocientos treinta diga fimona záilla méifodo Moisés lloga ocuica uai, uícodo Abrahamo lloga uaina oni caitánide. Daje izói méifodo ocuica uai, uícodo Juziñamui lloga uaina ráifitanide.

18 Juziñamui dáinamo ie ñnuamona Abraham jíllode. Afe bie méidonide Abraham jíllouilluaina Juziñamui raiñoñoeno íemo fecade. Iemona afe jíllona uai, Moisés ocuica uaimo jaináíñede. Moisés ocuica uaimo jaináíadi, aféuai ja uícodo lloga jaca raiñoñoeno iga raa izóíñede.

19 Iemona, Moisés ocuica uai ¿niemo ráifide? Afe ocuica uai méifodo bai nabaica, comini íaioi finoca fiénidifuiaina onótallena. Afe nabaica uai are íñede. Núefuena lloga Abraham erófene ímie Cristo bíllamo, afe nabaica uai záide. Afe ocuica uai monámona Juziñamui abi imácido lloga. Iemo íaioi llua mei, Moisés aféuaina jino comínimo llote.

20 Juziñamui Abrahamo úrilla llezica jíáimado Abrahamo lloñede. Dáamie daíí uáfodo úriadi, jíáie llóitimiena jítaiñede. Bie Abrahamo úritimie daade Juziñamui.

Moisés ocuica uai ¿nié izóí comínina canode?

21 ¿Mei nibai bifue daííacade Moisés ocuica uai, Juziñamui lloga ñúefuiaina uáitaacade? ¡leñedeza! Uáitaacañede. Mei cáataite ocuilla uai ígadenia, aféuai jeire cai úado Juziñamui anamo ñue jáicina íredicai.

22 Mei jíáfodo Juziñamui Cuegáuai daina izóí, nana fiénidifueмо llavécanodicai. Daíí Juziñamui uícodo mamede, nana Jesucrístomo ñnotino jíllobicaillena. Uafue, Juziñamui afe bie izóí mamede Crístomo ñnotino íaioi ñnogafuedo Juziñamui lloga ñuera jíllonafuena íaioi óllena.

23 Jesumo cai ñnogafuena nai jino déíñena llezica, ocuica uai caina llavécanona finode. Aféruillaído Jesumo cai ñnollifue jino déillemo ocúridicai.

24 Iemona Juziñamui afe ocuica uaina caimo mamede, cai ñue rairuállena. Ua úruiai ñue fibítatimie izóí caina rairuide. Daíí afe ocuica uai caina úíñoide; nai Cristo bíñeille dinó. Afe daíí Cristo bílleмо afémiemo cai ñnuado, Juziñamui anamo ñue jáicina íredicai.

25 Birui ja Jesumo cai ñnollifue déideza, ja afe Moisés lloga fibítatíuui dibénemo dúíñedicai.

26 Mei Jesumo omoi ñnogafuedo, ja omoi nana Juziñamui úruiaídiomoi, ja Cristo Jesumo dájena jaináídiomoi za.

27 Omoi mona báutiza mei Cristo Jesumo dáena jainaide dieze, nana omoi afémie comeci ífuena ja jeire otíomoi.

28 Ja biruímona cai cígiri bie judíona dainámiena íñede, bie Griego dainámiena íñede. Daje izóí llavécamienna íñede. Oni eneno jirénoga dainámiena íñede. Afe izóí ringo íma diga oni jíáfodo mámeñega. Ja Cristo Jesumo cai jaináinamona nana cai dáamacidicai.

29 Ja Cristo íediomoiza, Abraham erófene igima izóidinona jáidiomoi. Iemona Juziñamui Abrahamo uícodo lloga ñuera jilloillifueña, feci raa máiñua izói, máiñoitiomoi.

4

1 Bie izói cue daiíacanafue: Daa come jitó móonaillano, ie moo tílla mei, moo raana náamatarede. Mei íadi afémie nai úruena llezica maiñónide. Afémie nai jofo eromo ocuífirégamie izoide, afémie nana afeco raana maiñóreite íadi.

2 Afémie nai úruena llezica, íena úiñoitino ite, ie moo jáífodo ie úiñotinomona oni olle dino. Daje izói ie jetállifue ocuídino ite.

3 Jaca bie izói caimo comuífirrede. Cai jilloilluiai nai déiñena llezica, nai úrue illa izóidicai. Aféruillaido aillo bínie comini nícidogafuiai anamo, izire ocuícano izói, iticai. Dáarie cómemona ocuica uáillaido llavécacai.

4 Mei íadi nana Juziñamui mamécafuiai ñue zuilla mei, jaiai uícodo ie mámiarui dúciamu, Juziñamui ie Jitó Jesús orede. Afémie ringómona jococa. Moisés ocuica uai anamo judío izói comuízaibite.

5 Afémie daií bite, nana Moisés ocuica uáillaido llavécano aféuaimona oni jirecaitallena. Daií cai jirecaillamona Juziñamui dama ie jitótiaina cai jáillena cai mámano, caimare caina uáidoite.

6 Iemona, ie jitótiai omoi íllana omoi onóillena, Juziñamui ie Jitó Jesucristo Joreño omoi comécimo orede. Afe caimo oreca ie Joreño riire daiífirrede: “¡Cue Moo!” daide.

7 Mei daií o ja Juziñamui jitódio. Ja riire ocuícamiñedio. Ie jítóna o íllamona, ie uícodo lloga ñúefuiaiina Juziñamui Crístodo omo fécaite.

Pablo Juziñamuimo ñnotimacimo comeci úide

8 Naui Juziñamuina nai omoi onóñena llezica, taino juziñamuillaimo izire ocuífiréganodiomoi. Afe omoi llaveina juziñamuillai ua juziñamuiñede; fia jífuia juziñamuillai.

9 Mei birui ja ua nahí Juziñamuina onódiomoi. Mei jáífodo ñue daina, Nahí Juziñamui ja ómoina onode. Ja íena omoi onónamona, ¿né izói meine abido afe ríinide jilloñenafuiaiina jeire óiacadiomoi? Dáanommo íaioi llavéinanommo ¿meita abido jáirediomoi?

10 Diga iruillai oni jáífodo nai coméçifirediomoi. Daje izói diga fiuillai eneno jáíifo coméçifirediomoi, naa diga fimónaiari.

11 Nibai nana omoi cigiri cue táijiacana táinommo jifánofide izóideza áfena jacíruiticue. (Afe cue comécina lícioido.)

12 Amatai, izire jicádicueza: Cue começi ifue illa izói, mai meine afe izói omoi iri. Mei cue omoi illa izói jae itícueza. Mei omoi cuemo minícana fiénidifuena finóñediomoiza.

13 Cue omoi cígiri nano illáfueña onóñediomoiza. Aféruillaído, cuemo comuide duícori duere cue zefuillamona afe jílona uai jino ómoimo lloticue.

14 Afe cuemo ite duico cue facátaina, mei íadi afe jira cuena jámairuñediomoi. Daje izói cuena ruifíruñediomoi. Mei jiáifodo Juziñamui abi ímie izói caimare cuena líñnotiomoi. Ua Jesucristo omoi líñnolle izói cuena caimare líñnotiomoi.

15 ¿Nee mei afe omoi cacana cáimafuiaí? Afe cue irárenaruimo cuena iere izíruillano, dani omoi uíjina jirénota cuemo fecácadiomoi, íadi fecánide. Afe ñúefue omoi dibénemo nitáredicue.

16 Ja ua uai ómoimo cue llúamona ¿Meita ja birui omoi bacáuai ímiena jáidicueza? ¡leñedeza!

17 Afe baie jicana bite comini ómoimo iere caimare coméçidiaíoi. Mei íadi começi ñue jítaillamo coméçíñediaíoi. Omoi bifuellena caimare úritiaíoi. Afémaci cúemona ómoína bairóacadiaíoi, uire íaíoiimo omoi jaináillena.

18 Jiáimacimo ñue íllena caimare coméçillana ñuera. Mei íadi cue illa llezica daje izói cue iñena llezica come começi ñue jítaillamo daí coméçirede. Daítadeza. Naui omoi cígimo cue illa llezica, afe onínemacido daí jífuefiñediomoi; mei íadi birui omoi cígimo cue iñena llezica nágarui jaca daí jífuegaomoi.

19 Cue úruiaí, ringo úrue jocóacania duere zefuilla izói, nane ómoiri duere zefuidicue. Ua Cristo começi ifue nai omoi ñue óñoñeille dino, nai ómoiri duere zéfuiticue.

20 Birui izire omoi cígiri íacadicue, jiáifodo ómoimo cue úrillena. Onóñedicueza, níe izói ómoiri coméçiticue.

Abraham ai Sara, ie oga jiáingo Agar íainguai ñúefueña caina onótate

21 Ja birui Moisés ocuica uai anamo íacadinomo úriticue. Mai bifue cuemo omoi llone: ¿Afe ocuica uai dánana cacáñediomoi?

22 Afe uai daide: Abraham mena jitórede. Daa jitó ie táijitafiregango ie. Jiáie jitó ie nahí ai ie. Afengo buna ócuiñegango.

23 Ocuífiregango jocócato nana bíniemo ite úruiaí jócua izói jococa. Mei jiáifodo nahí ai jocócato Juziñamui uícodo daínáuai fuitállena jococa.

24 Bifue cai onoiga ráamona Juziñamui cai fidítafue. Afe mena ringo mena contrátomo táijina izóidiainguai. Íainguaimona daa Sinaí idu ie contrato izoide. Afe

ocuífíregango jitótiai ocuífíreillinona jocócaiaioi. Afe ocuífíregango mámecei Agar.

²⁵ Afe Agar Juzíñamui Sinaí ídumo lloga uai izoide. Afe Sinaí idu Arabia éniemo ite. Afénomo Juzíñamui contrato comínido finode. Biruillai Jerusalén jofue afe jaiiai Sinaí idu izoide, (mei Moisés dibénemo íacadino afénomo gairífirediaioiza.) Ie ocuica uai anamo llavécana itíaiioi, naa aféfuemo jaináiacadinori. Ocuífíregango Agar úruiai izóidiaioi.

²⁶ Mei íadi monamo ite Jerusalén comini lláveñegaiaioi. Afe jofue cai ei izoide, mei cai bie afe Jerusalemo jaináidinodicaiza.

²⁷ Juzíñamui Cuegáuai bie izói daide: Oiniño, úruenidío íadi, mai caimare o iri; Urue jócua izírenafuena onóñedingo, mai caimare o róiri. Mei úrue jocóñena jira dotácango, ñue ogángo baimo jitótiaireitio, daide

²⁸ Amatiai omoi cácarei, cai bie Sara jitó Isaac izóidinodicaí. Juzíñamui uícodo lloga jitótiaidicaí.

²⁹ Mei jaiiai aféruillaimo íaillinoi illa izói, birui afe izói iticaí. Aféruimo come comecei jítainamona jocócamie Ismael, afe Juzíñamui Joreñodo jocócamie Isaacina fiénidifuena racade. Biruillai afe izói iticaí.

³⁰ Mei Juzíñamui Cuegáuai ¿nié izói daide? Afeuai daide: “Afe jofo ero ocuífíregangona ie jitó diga oni oreri. Mei ocuífíregango jitó, afe ócuiñegango jitó diga dájena jofo naama feci ráaniaina maiñónideza.”

³¹ Amatiai, bífuemona onódicaiza: Cai bie ocuífíregango jitó izóíñedicaí, mei jíáifodo cai bie buna ócuiñegango jitó izóidicaí.

5

Izire ocuífíreña dibéfuemo omoi ífireiri

¹ Cristo afe ocuica uáimona oni eneno jirénogacai, lláveñeganona cai íllena. Afe dibéfuemo ñue jaícina omoi iri. Meine dáanomo izire ocuilla uai anamo abina maitátaiñeno iri, mei lláveñeganona itíomoiza.

² Cuemo omoi cacáreiri. Omoi llotímie Páblodícue; jira ómoína dáitícue, bacano icoi quétafue jeire omoi óiadi, Cristo ómoimo ráifíñeite.

³ Nane ómoína dáanomo daiíacadicue: Omoimona dámie ie bacano icoi quetátaadi, nana jíáie Moisés ocuica uáillaina ícoimo fuitárede.

⁴ Moisés ocuica uai jeire omoi úamona Juzíñamui anamo ñue jaícina omoi íacaniadi, jae Cristo dibénemo dúíñediomoi. Daje izói Juzíñamui caina izíruillafuemona oni eneno itíomoi.

⁵ Mei cai jiáifodo onódicaiza: Juzíñamui Ñuera Joréñodo, daje izói ie uai ñue cai ínuado, Juzíñamui anamo ñue jaícina cai illífuemo úiñoidicai.

⁶ Iemona daí Jesucrístomo ñue jaináidicai. Iemo cai jaináidi, afe quétafue caimo ráifiñeite. Cai quetátaidi, níbai cai quetátañeniadi, daje izói ráifiñeite. Mei jiáifodo afémiemo cai ínogafue ua ñue ráifide. Afe bie cai ínogafue jiáie cómena naa Juzíñamui diga cai izíruillena canode; áfemona Juzíñamuimo cai ínogafue iere ráifide.

⁷ Fueñe Juzíñamuimo ñue ínofirediomoí. Mei íadi birui, ¿bu afe ua uaina ómoína fáicanocaitaga?

⁸ ¡Juzíñamui áfena ómoína fáicanocaitañede! Afémie ómoína caimare uáidofiredeza.

⁹ Bífueña féitañeno iri: Pan finóadi afe aillo fáitate raa tamédiaioí. Due jiza fáitate raa jóonega íadi, nana afe magáfecina aillo fáitate.

¹⁰ Juzíñamuimo cue ínuano, afémie ómoína ñue rairuúllena onódicue. Ja onódicueza, cue daináfuemona oni jiáifodo comeci fácañeitiomoíza. Bífueмона omoí comécina oni nibéfodo féitaitimiena Juzíñamui duere finoiteza. Afefue llotímiena Juzíñamui raa dáiiñeite, afémie níbai illaíma, níbai jamáimie.

¹¹ Amatiai, cúemona jiáifue llóiticue. Mei bacano quétafuena nai ocuídicuena judíuai níbai cuena fállena rácañeitiaioí. (Mei íadi cue íaioí fállena rácana onódiomoí.) Afe izói cue llóidi, Cristo cruzmo tilla ñuera rafue íaioína ríicaitañeite.

¹² Mei íadi afe onina bite omoí gáguabitino dani íaioí jñíjina, comini meróniai ie ñetaina izói ñétaitiaioíza. (Afémaci méaicallena Pablo daí daide.)

¹³ Amatiai, mei jiáifodo uáidogamacidiomoí, ráiruñeganona omoí íllena. Ua ja birui ráiruñeganona itíomoíza, mei íadi afe o rairuñenamona, comécimo fiени itífuiaína finóñeno iri. Mei jiáifodo afe ómoímo ite izíruillafuedo ñuera ocuífíreganona omoí iri; daí conímana cánoitiomoíza.

¹⁴ Mei nana jiáie ocuilla uaillai daa bie ocuica uaimo dájena itíaioí. Be núuai: Dama o abina o izíruilla izói, afe izói o abí cómena izíruiri.

¹⁵ Mei íadi ómoímona dani conímana fue erodo omoí éoia, daje izói úradoillano conímamo omoí ríicaiadi, ómoína niné tánocaitaiteza; afe izóidemona abí omoí rairuiri.

Come comécimo fiени itífuiaí Juzíñamui Ñuera Joréñomona jiáifodo jóide

16 Omoína cue dainafue bie izói jóide: Juzíñamui Ñuera Joreño dibénemo mai áfemo omoi illafue jónefireiri. Afedo omoi comeci fieni finóacanafuiái finoñeitiomoi.

17 Mei daní cai comécimo comuide fieni finóacanafuiái Juzíñamui Ñuera Joreño uáitafirede. Nane abido dájena Juzíñamui Ñuera Joreño cai comeci fieni finóacanafuiái uáitafirede. Afe ménafue jaca conímána uáitaoifirede. Iemona omoi comeci jitaina izói figo finónidiomoi.

18 Mei íadi Juzíñamui Ñuera Joreño ifócaomoi íadi, Moisés ocuica uai anamo íñeitiomoi.

19 Comini comécimo fieni itífuiái dibénemo jaináidino íaiói finócaigafuiái jino uáfodo onórede. Be nífue: Afémaci jiruífue íemo íaifue finófrediaíoi; jáíe fiénidifue rairuilla uaina náfueñediaíoi.

20 Afémaci jánaraimo caimátaifrediaíoi. Daje izói fue boréfueña finódiaíoi; daje izói jáímána éoifrediaíoi. Dájena caimare íñediaíoi; úradoifrediaíoi; ráaiñederi raire iere riicaifrediaíoi. “Fueñe dama cúeiena fínoiticue” daifrediaíoi. Comínina bozíetaitaíoi; jáímána énenoruidiaíoi.

21 Afémaci jáíma raari úradoifrediaíoi. Daje izói afémaci cómena titáfrediaíoi. Jáifrediaíoi; fieni jéerie íaiói güilla llezica conímamo riire lléjellejediaíoi. Bizóidifuiái afémaci jaca finóicaide. Nauí uícodo omoi cue lloga rairuilla izói, nane biruí ómoína ráiruiticue. Bie izóidifuiái finódino jaca Juzíñamui illáimana illáruimo jáinaiñeitiaíoi.

22 Mei jáífodo Juzíñamui Ñuera Joreño cai comécimo bífuiái cómuite. Aféfuái bie izói jóide: Izíruillafue, íóbillafue, comeci uái illifue, comeci mánaicana úrillafue, comeci cámafue; jeruíño fecáfirede. Jáíma dánana raire jeire ófirede.

23 Aféme comeci mánaifirede; comeci daina izói ie abi járitaiño ñue fíaicana ocuífirede. Bífuiái rairuide ocuilla uaina íñede.

24 Nana Crísto ja jaináidino, íaiói comécimo nanómona itífuiái, faga izói, féitataíoi, naa íaiói comeci fieni finóacanafuiái.

25 Iemona Juzíñamui Ñuera Joreño íredicái. Daí cai íllamona, mei nana cai jetáacagafuemo, afe Ñuera Joreño aféfuemo caina ífoiteza.

26 Cai bie abina fieni ínonidicái. Afe izói cai íadi, conímái díga ícíticái, mei íadi afe izói mai cai íñeilli. Daje izói jáímari úradoíño cai illi.

6

Conímana omoi canófireiri

1 Amatiái, ómoimona dámie fiénidifuemo baiízaidenia omoi cióadi, ómomona Ñuera Joreño dibénemo izire jaináidino afe baiídimiena omoi canori, meine ñúefue dibénemo ie illeza. Jaca comeci mánaínafuedo íena canori. Naga come áfemo baiíredeza, ie jira illa dígamie afe baiífirenafuemoná abina rairuírede. Taife cai facátáfue naga cómemo comuífiredeza.

2 Illa dígamíai conímana canófireiri, áfedo jíámamo zuufue comuíadi ie comeci náirecailleza. Bie izóidedo Cristo ocuilla uaina ñue ícoimo fúitaitiomoi.

3 Jamáimie illa llezica dámie abi ínota “Jamánomo ímedicue” daíadi, afémie dama ie abi jífueete.

4 Omoimona illa dígamie dama ie abi áadori. Mei aféfuena o jíeruadi, dama o abi ífuedo íóbitaitio; mei o illafue ñuera daíllena jíáima illafue dibénedo abina fácañeitioza.

5 Illa dígamierie dani caimo itífuiaimo náfuefireiticaí.

6 Juzíñamui uáillaina llófuegamie nana íemo ite ñuera ráaniaina dieze, meine ibana afe ie llófuetimíemo írede.

7 Mai jíáfueri omoi jífuefiñeno iri; jaca Juzíñamui buna baiíñuano jífueñegaza. Naga come ie rífirega raa ríadi, afe lízillana dama jofo óite.

8 Nanómona cai comécimo itífuiaí íóbitaitífue cai finóadi, afe cai comécimo itífuiaímona cai tíllífue óiticaí. Mei jíáfodo Juzíñamui Ñuera Joréñona cai íóbitaadi, afe Joréñomona zíñona cai illífue óiticaí.

9 Ie jira ñúefue cai finuana, mai cai zefuíruíñeilli. Mei áfemo fáicanocaiñeno comécina náiredinona cai íadi, uire Juzíñamui mamécaruimo riga ófirena izói, ñúefuena maiñóriticaíza.

10 Afe jira, ñúefue finua llezica nana comínimo, nana cai abi ie máriedo ñúefuena finóredicaí. Iemo Juzíñamuimo ínote cai ámatiaimo, baimo aillo ñúefuena finóredicaí.

Abí rairuíllauai, íraicaiño uáiduafue diga

11 Mai ómoimo bie jéerie cue cúegamo omoi eroiri. Afe bie dama cue ónoído cue cuela.

12 Afe quétafuena omoi ocuídino ñúefuedo lloñédiaioi. Dama comini uícomo ñue íaioi íllena daí daídíaioi. Daí ómoína ocuídiaioi, Cristo tílla ícoínia jíáimaci afémaci rácaíza daí.

13 Mei afe quétacano, nana Moisés ocuica uai ñue ícoimo fuitáñediaioi. Mei íadi ómoína quétataacadiaioi, omoi íaioi quétatafuedo abi íaioi ínollena. Afe quétano omoi abimo íllado iere abi ínotiaioi.

14 Mei cúemona dama cai Ocuíraima Jesucristo tíllado abi íinoticue. Abi diné jíáifodo abi cue íinollena íñede. Mei Cristo cruzmo tíllado, nana bíniemo ite fiénidífuiaí faga izóí cuemo dúíñede. Afe íbana cue aféfuiaímo faga izóí jaináíñedicue.

15 Mei Crístomo dájena cai jaináinamona, ja afe quétafue ráifiñede. Daje izóí íemo cai jaináinamona quetañenafue jíái ráifiñede. Mei jíáifodo cómuena meine abido jocócamiena cai illa, iere jamánomo ráifide.

16 Bie izóí daináuai jeire otínomo comeci caímare uái illafue íteza. Daje izóí Juzíñamui ómoímo dúecaillafuemo íitiómoíza. Bie izóí daináuai jeire omoi óiadi, Juzíñamui ua comínina jáitiomoi. Mai mei, Juzíñamui ie ua comínina ñúefuemo éziciíteza.

17 Ja biruímona buna cuena áifeduaíbiñeno iri, daídícue. Cue abímo ite boáfiaí méífuai, cai Ocuíraima Jesús táijitagamiéna cue íllana onótate.

18 Daje Juzíñamuimo íinote cue ámatiaí, cai Ocuíraima Jesucristo nana ómoína ñue éziciíteza. Mai daítadeza. Jae ñíe.

EFESO IMACIMO SAN PABLO ORECABE

La Carta del Apóstol San Pablo a los Efesios

Pablo Efésomo ite Juzíñamuimo ñnotino rabedo uáidote

1 Cue Páblodicue. Juzíñamui comeci jitaina izói Jesucristo orécamiedicue. Bie izói daina ñúefue llujillena, ie ocuícamedicue. Efeso jófuemo ite Juzíñamuimo jaináidino bie rabedo uáidotícue. Afémaci Jesucristomo ñue ñnotino.

2 Cai Moo Juzíñamui ñue éziciga dibéfuemo omoí iri. Daje izói ie caimare illáfuemo omoí iri. Cai Ocuíraima Jesucristo daje izói ómoína bie ñúefuiaiimo jóneiteza.

Crístomo cai jaináinamona cai comécina náiretatífuiái Pablo jino llote

3 Cai Ocuíraima Jesucristo Moo Juzíñamuina ióbitaiticai, mei Jesucristomo dájena cai jaináinamona, afémie monámona nana cai comécina náiretate ñúefuiaiina jae caina éziciteza.

4 Nai énie comuíñena llezica, Juzíñamui Jesucristodo caina nizede, ie eróicana nífuenino ñue finócamona cai íllena.

5 Jaiái uícodo caina izíruillano ie comeci jítaina izói, Juzíñamui caina náamatade Jesucristodo ie jítótaiina cai jáillena.

6 Iemo ie izíruiga jítóoiri dájena cai íllamona, afémie caimo dúecaifrede. Afe jira nágarui Juzíñamuina ióbitaredicai, caimo ie dúecaillana iere figura cai daiífireillena.

7 Caimo iere dúecaillano, Juzíñamui ie Jitó tíllado, ie die toíllado caina jíllotate, mei áfedo Juzíñamui cai fiénidífuiaina féitateza.

8 Afémie cai ifoci ñue dénuamona, ie caina iere dúecaillafuena, afémie jamánomo ñue caina onótate.

9 Juzíñamui jaiái uícodo mameca ónoñega ie comeci óiacanafue caina ja fidítate.

10 Bie Juzíñamui uícodo mamécafue ie fácaruimo dúcia, ñue ícoimo fúitaitate. Aféruimo Juzíñamui dáanomo nana éniemo ite náiraiaina ie Jitó Cristo anamo itábicaitaitate, naa bíniemo ite rílleniai, naa jáíe ráaniairi. Daje llezica monamo ite riinoredino Cristo anamo ítiaioí naa afénomo ite jáíe ráaniairi.

11 Jaiái uícodo Juzíñamui caina nizede, Jesucristomo dájena cai jaináinado ie comínina cai íllena. Nana bífuiái jica ia Juzíñamui mamérilla izói ñue joide. Juzíñamui ñue onona dieze, afe izói afémie ñue finófirede.

12 Ja cai bie nanómona Crístomo ñnotinodicaiza. Juzíñamui daií caina ñue nizede, afémiemo ite áillue ebíredifuiaido ñúefue íemo cai nitállena.

13 Daje izói uáfueña lloga, omoi jílloille uaina cacádiomoi. Cacáillano afe uaina omoi ñnuamona Jesucrístomo jaináitagaomoi. Daje llezica Juzíñamui jaiái uícodo llua izói Ñuera Joréñona igáomoi, dama Juzíñamui íeiediomoí daiíllena.

14 Afe Ñuera Joreño caimo íllado, íco jíáíruido Juzíñamui dainafue cai maiñóllena, uáfueña onódicai. Afe íe lloga dainafue cai maiñólliruimo nai dúciñede. Mei íadi nana íemo jaináidinomo, fiénidifueño jaca due íaíoi jainaiñeillifue afémié llóite. Daií íe llua mei nana afémié cáiena lloga dainafue máíñoiticaí. Íe jira afe Juzíñamuimo ite áillue ebíredifuiaido íena íóbitaredicai.

Pablo Juzíñamuimo ñnotino ífoci ñue denóllena Juzíñamuimo jícade

15-16 Íemona cai Ocuíraíma Jesumo omoi ñnogafueña cue fidínamona, Juzíñamuimo ómoiri “Íere figora” fáicaiñeno daiífiredicue. Daje izói nana Juzíñamuimo jaináidinona omoi izíruillana cue fidínamona, nane figora daiífiredicue. Afe llezica Juzíñamuimo cue jíacífireña dáaruido ómoímo jaca uíboífiredicue.

17 Juzíñamui ómoímo jino llogáuaina ñue comécido omoi baitállena jíacífiredicue. Ua, cai Ocuíraíma Jesucristo ebírede Moo Juzíñamuimo jíacífiredicue, Juzíñamuina ñue omoi onóillena.

18 Daje izói Juzíñamui omoi ífoci ñue denóllena jícadícue. Afemona Juzíñamui uáídogano úiñoga ñue cómuitifuiaina ñue ónoitiomoi. Daje izói Juzíñamui omoi ífoci denóllemona íemo jaináidinomo, Juzíñamui fecalle ñuera ebírede cáimafuiaina ónoitiomoi.

19 Íemona bie izói ónoitiomoi: Juzíñamui íere ñúefuiaina ríinoredímié. Afe bie íemo ite áillue ríino ja birui nana íemo ñnotinona ñue comécido íaíoiña canode.

20 Nauí Juzíñamui, daje bie íemo ite áillue ríinona cai onóillena, Cristo tíllanomona meíne abído cáatate. Daií íemo ite áillue ríinona comínimo jino íere uáfori cíótate. Afe daje ríinodo Cristo cáatajanona, monamo íe nabézimo Juzíñamui íena rainade.

21 Dínomo jamánomo ocuídillaímana Juzíñamui íena jóonete. Íemona nana jíáíe ríinoredínuiaí Cristo anamo itíaiói, naa jíáíe ocuífiredínuiaíri. Daje izói nana illainí Cristo anamo itíaiói naa jabóidillaíniaíri. Daje izói nana mona eromo ite ríinoredínuiaí, Juzíñamui íe aillo ríinodo Cristo anamo dájena

jóonete. Nana jiáie mameca riínoredino cai comeci facáacana dieze, daje izói Cristo anamo itíaiói. Nana biruimo itínuiái ie anamo itíaiói, naa ico jiáiruillaído itínuiáiri.

²² Afe dáaruido Juzíñamui nana ráaniaina Cristo anamo jóonete. Daje llezica nana Juzíñamuimo dájena jaináidinomo, Juzíñamui Cristo ifócina mameide. Iemona ifoci cai abi ocuilla izói afémie íaióina ocuífiredé.

²³ Mei jii, Jesucristomo dájena jaináidino ja Cristo abina mamécaiaíoi. Afe jira afémaci nana Cristo comeci ífuiaina iere jeire otíaiói. Mei dama Cristo nana ráfuiaina ñue ícoimo fuitátatimieza.

2

Juzíñamui caina izíruillado jíllodícai

¹ Omoi fiénidifuiaimona nai tíidino izói omoi illa llezica, Juzíñamui Cristo tíillamona meine abído cáatajado afe dáaruido ómoína cáatate.

² Naui afe fiénidifue dibénemo are itíomoi. Bíníemo ite fiénide nairai illa izói are itíomoi. Afe llezica omoi áinodo lláifoide fiénide joreño jitáinafue finófirediomoi, mei afe joreño nana fiénide joríaí nahí ocúiraímaza. (Afe daje fiénide joreño Taife.) Juzíñamuimo jíeruñedínona afémie riire ocuíoide.

³ Naui jiáiruillaído nana cai afe izói fiéni itícai. Cai abi fiéni jitáinafuiái jeire ófiredícai. Afe nanómona cai comécimo ite cai óiacaiga fiénidifuenta fáicanocaiñeno ícoimo finóoicaifiredícai. Daje izói cai comeci fia fácafuiaina jeire otícai. Iemona nana jiáimacina duere finóllemo dúina izói, Juzíñamui iere duere finóllifueмо dúidícai.

⁴⁻⁵ Mei íadi Juzíñamui iere caina dúecaillano, nai cai fiénidifuiaimona tíidino izói cai illa llezica, afémie caina izíruillano Cristo cáatajado dáanomo tíillanomona caina cáatate. Mei jii, dama Juzíñamui ómoiri dúecaillano jíllotagaomoi.

⁶ Uafue, Cristo Jesús cáataja llezica, Juzíñamui afémie diga daane caina cáatate. Afe mei Juzíñamui Cristo abímo monamo caina rainade.

⁷ Juzíñamui daí finode, nana ico nínomo illáruillaído itínuiáimo afémie iere caina izíruillafuena onótallena. Ua, Juzíñamui daí finode afémie Crístodo caina dúecaillafuena nana uícomo cómuitinomo fidíllena.

⁸ Mei jii, Juzíñamuimo ite ómoína izíruillafuedo afémie iere ómoína dúecaide. Ie jira, íemo omoi ínuado jíllotagaomoi. Afe jíllonafue dani ómoímona comuíñede, mei jiáífodo afefue Juzíñamui ómoímo comuítaga.

⁹ Ñúefuemo are cai ñéfinamona afe jíllonafue caímo fécañega. Ie jira áfedo buna abina ínonide.

10 Mei jii, Juziñamui nano fueñe comini finua izói, afémie ie joréñodo como jéiciganona ja cai finode. Iemo ja birui, jaiái uícodo ie mámia izói, Crístodo Juziñamui meine caina cáatate, ñúefuiái cai finóllena.

Ñue uái cai illifue Cristo caimo lloga

11 Iemona nauí omoi illáfuemo mai omoi comeci uibíoiri. Judío nairái íeñediomoi. Ie jira judíuai “Bacano icoi que tánegamacina” ómoína mamédaioi. Dani afémacina cai bie “Teizina quetácanodicai” daidíai; mei jaiái íaiói finófirena izói, íaióimona nágamíai íaiói bacano icoi quetácaza.

12 Nauí omoi íinoñena llezica, Crístonona oni eneno itíomoi. Israel náiraimo Juziñamui nizécanomo jaináñediomoi; íemona Juziñamui íaióimo lloga ie ñuera finóllifuiái fidíñediomoi, naa uícodo ie lloga cáimaduafuiái diga. Aféruillado Juziñamuina onóñeno, biniemo zuure itíomoi, mei caimare omoi ocuírillifue íñédeza.

13 Nauí Juziñamuimona iere oni jica itíomoi; mei íadi ja birui Cristo cairi tíllamona, ie die tóllamona, Juziñamuimo áinozitagaomoi. Ja Crístomo dájena jaináidiomoi.

14 Cristo jíaimana cai icíñenafue comuítatimie, mei dama afémie judíuai judíoñedino diga dáaziena finode. Iemona íaiói bacáuái imáciñediomoi. Nauí ómoína oni eneno itátate éoinafuena ja Cristo niné féitate.

15 Dama ie abi izi cácanado, ua ie tíllado, ocuica uai ñue íoimo fuitade. Fúitajano, áfena záitate. Afe ocuica uai iere rairuide. Ie mei Cristo mena náiraimona, judíuai judíoñedino diga, dáaziena comue náiraina finode. Afe ménade náiraiái ja dama Crístomo dájena jaináitagaiaioi. Afedo afémie cai conima diga cai icíriñenafue nana caimo comuítate.

16 Afe bie izói, Cristo cruzmo ie tíllado, bie mena nairái dáamacina finuano, nauí íaiói fuirífirenafuena záitate. Afe llezica, Juziñamui dibénemo ñue uái íaiói illifue Cristo afémacimo jino denode. Dénuano, íaióina jeire otátate. Afemona comínimo Juziñamui caimare eroide.

17 Cristo afe ñue uái cai ille uaina nana comínimo lluaíbite. Onínemacimo Cristo afe uaina lluaíbite. Omoi afe onínemaci izóidiomoi. Daje izói áinori ite judíuaimo, afe uaina afémie lluaíbite.

18 Iemo Cristo cai jíllotajamona, mei nibai judíuidicai, mei nibai judíuaiñedicai íadi, nana cai afe daje Ñuera Joréñodo, Moo Juziñamuimo áinozifiredicai.

19 Afe jira, Juziñamui dibénemo ja onínemaciñediomoi. Daje izói dani íaiói illánomo dúíñedino izóiñediomoi. Mei

jiáifodo nana Juzíñamui jaináidino jainaila izói, uafue íemo jaináidiomoi. Dájena Juzíñamui náiraidiomoi.

²⁰ Nana omoi ebírede niga jáilliraina dallíraide anáneco izóidiomoi. Cristo oréfiregamaci llófueinafueña iere baitádinona ja jáidiomoi. Ua jáillirai jáicina mairi naidánia izói, aféfuemo ja riire jónegaomoi. Afe bie Cristo orécamaci Juzíñamui uai jino llóraini. Dama Jesucristo afeco nahíllirai izóidimie.

²¹ Bie Nahílliraimo izóidimie mo nana afeco Juzíñamui nicana uite. Afe izói áfemo nana jofócaiai ñue jáicina jónega. Jofócaiai dallíraidemo dúina izói, daade Jesucristo jaináidiomoi. Afeco nilla fuilla mei, jae Juzíñamui ñuera irácona jáidiomoi; ñuera gairíraco izóidiomoi.

²² Daje izói Crísto dájena omoi jaináinamona, nana jáie Crísto inotino dájena jaináidiomoi, daaco náiraina Juzíñamui íena, omoi jáillena. Iemo Juzíñamui Ñuera Joreño ómoimo íllado Juzíñamui ífirenaco izóidiomoi.

3

Jíllona uai judíoñedinomo llujállena Juzíñamui Páblomo jóonenocáide

¹ Iemona Juzíñamui ómoiri iere cue comeci facáfiredicue. Omoina izíruite Páblodicue; Cristo Jesús ñúefue ómoimo cue llujállena jira llavécamedicue. Omoi judíoñediomoi, íemo ómoína ñue íllena cue cánua jira llavécacue.

² Ja nibai Juzíñamui cuemo jónega bie tájinana fidídiomoi. Ji, Juzíñamui ie cáimaduafuiai ómoimo cuena llotátate.

³ Juzíñamui ie nai jino lloñega nanómona mamérrillafue cuena fidítate. Ie mei cuemo lluno aféfuemo iere baitádimiena Juzíñamui cuena jónete. Afe ie mamérrillafuedo ja nano íanori due ómoimo cueticue.

⁴ Aféfuena omoi facáduamona, afe nai jino llóñega Cristo dibene illáfuemo iere cue báitajana ónoitiomoi.

⁵ Afe báinino comeci ie fácafue nauí jáiruillaído bumo Juzíñamui jino lloñede. Mei íadi birui Juzíñamui ie Ñuera Joreñodo, ie eneno nizeca íainide orécamacimo aféfuena jae onótate. Daje izói jáie ie uai jino llórainimo fidítate.

⁶ Afe jaijai jino raire llóñegafue bie izói jóide. ¡Cácarei! Jíllona uaina ínuamona, judíoñedino naa judíuairi daje Juzíñamui cai cáimaduafuiai dájena máíñoitiaioi, mei dáamiemo jaináidiaioiza. Ua Crísto, dáaziena jaináidiaioiza. Daje izói Juzíñamui lloga Cristo Jesús caina ñue finóllifue judíuaimo dúina izói, birui judíoñedinomo ja dúide.

⁷ Cue jamáimedicue, mei íadi Juzíñamui dama ie ríinodo, cue canóllena mamérite. Iemona afe bie ñúefue jíaimacimo lluájillena jónegacue.

⁸ Nana Juzíñamuimo jaináidinomona iere erófenemo iticue. Mei íadi Crístomo ite facádonide aillo cáimaduafuiái judíoñedinomo lluájitimiena Juzíñamui mamécacue. Afe bie cue lluájille iere cuemo ráifide.

⁹ Juzíñamui jaiái ninómona jino llóñega mamérilla fue nana comínimo jino llóitimiena dama Juzíñamui jónegacue. Afe Juzíñamui nana ráaniai finóraima.

¹⁰ Juzíñamui nana bífuiaina daí íficaitade, nana íemo dájena jaináidinodo, nana monamo ite ríinoredino Juzíñamui iere jamánomo naga ráfuiaina báitajana onóillena.

¹¹ Juzíñamui jaiái ninomo uícodo comeci mamérilla izói, nana bífuiaina cai Ocuíraima Jesucristodo ñue ícoimo fuitade.

¹² Iemo Crístomo dájena cai jaináinamona Juzíñamuimo ja áinoziredicai, mei cai ínuamona afémiemo meáiruiñedinona itícaiza.

¹³ Ie jira izire ómoimo jicádícueza: Birui omoi abíri duere cue zéfuidícueza, mai nánidimaci izói omoi íñeno iri; mei jíáfodo caimare omoi comécioiri; mei afe ómoiri duere cue zéfuia afe ómoimo ebírede nitaina izóidífueza.

Cristo iere jamánomo caína izíruitimiena íemo ínotino onóillena Pablo Juzíñamuimo jicade

¹⁴ Ie jira cai Ocuíraima Jesucristo Moo anamo caiñícido ana dújullanona nana ie comíni íena íemo izire jicádícue.

¹⁵ Nana éniemo ite ie comíni, naa monamo itínuiái díga, afémiemona comuídiaioi.

¹⁶ Cai Moo Juzíñamuimo jamánomo ñuera ríino ite. Afe ie ríinomona, ie Ñuera Joréñodo, iere omoi comeci ñue náireillena izire íemo jicádícue.

¹⁷ Afe llezica omoi ínogafuemona Cristo omoi comécimo nabáirifireillena Juzíñamuimo jicádícue. Daje izói Juzíñamuina iere omoi izíruillena jicádícue. Iemo afe izíruillafuemo izire omoi jaináillena jicádícue. Nane dáanomo omoi ínogafuiái jeire oga uaina ñue omoi ífócimo denóllena Juzíñamuimo jicádícue.

¹⁸ Daje izói Cristo caína izíruilla omoi ónoillena jicádícue, naa jíáie íemo jaináidinori. Mei afe ie izíruillafue monáillaji aillona izóideza. Afe monáillaji ruícafene jica íllana bu onóñede. Mei íadi afémie caína izíruillafue iere ruica are illa izóinana omoi onóillena jicádícue. Daje izói áillue imani erai iere fuiri jica illa izói, afe caimo facádonide Cristo caína ie izíruillafue omoi

onóillena jicádícue. Afe izóí Cristo caina izíruilla iere monáillaji ana jica afórena izoide.

¹⁹ Mei jii, afe bie izíruillafue ñue omoi fidíillena jicádícue. Nana cai onórede aillo ráfuiai baimo, bie izíruillafue jamánomo áillue. Afefue omoi fidínamona, nana Juzíñamuimo ite aillo ñúefuiaina ñue jaícina oruíziitio moi. Mai, daií íteza.

²⁰ Ja birui ie aillo ñuera ríino, cai comécimo ífírenamona nana cai comeci fácarenafuiai baimo, afémie iere jamánomo ñúefuiai caimo finórede. Daje izóí nana cai jicárenafuiai baimo afémie iere finórede.

²¹ Ie jira aillo ebíredífuiai afe cai Juzíñamuimo mai cai nitalli, mei Cristo Jesumo dájena jaináitagacaiza. Mai mei Jesucristodo jaca ninomo naga cómuítigimado aillo ñúefuiaina Juzíñamuimo cai nitalli. Daiítadeza.

4

Juzíñamui Ñuera Joreño do dáamacina maméidicai

¹ Nana bífuiaimona, omoi jaícina ñúefuedo macállena riire ómoimo llóiticue, mei cai Ocuíraima Cristo ícoínia llavécamiédicueza. Ua Juzíñamui uáidogamací maca izóí, omoi macállena izire ómoimo jicádícue, mei uafue ie uáidogamací itíomoiza.

² Nana omoi, mai jiba abina íñoñedinona omoi iri; daje izóí comécina mánaidimacina omoi iri. Dani conímána izíruillano illa dígamie jíámamo comeci járitaño omoi iri. Afe izóí conímána omoi dúecaífireiri.

³ Afe llezica mai Ñuera Joreño ómoimo comúitaga dájena jaináinafue ñue rairuífireiri. Ua, omoi dáaziena dani conímána comécina jacíruiñenafuedo dáamacina jaináífireiri.

⁴ Daa cómemo da abi illa izóí, daade abi. Afe abi Cristo ie. Afe daade come abi izóidicai. Afe izóí Ñuera Joreño daade. Daje izóí Juzíñamui nana caina daa uire ñue finóllifue mo úíñotagacai.

⁵ Cai Ocuíraima daade. Daje cai ínogafue jeire oticai. Daje izóí dáafue mo báutizagacai.

⁶ Iemo Juzíñamui daade; afémie nana íemo ínotimací Moo. Afe izóí afémie nana comíni Naama. Afémie nana íficaidífuiai díbénedo ie comeci jítaína fúe finode; nága fuiaímo jetáfírede.

⁷ Mei íadi Cristo comeci jítaína izóí, cáimona illa dígamíemo jíáíforiede ñúefue finolle ríinona, Cristo caimo fecade.

⁸ Juzíñamui Cuegáuai daií uícodo daide. Be níie: Caífo monamo jailla llezica aillo nauí llaveca izóidíno afémíeoíri uite.

Iemo fia íga jíámací cánuafuiaína comínímo fecade, daide.

⁹ Afémie caifo jailla daina uai jiáifue caina onótate. Afedo nauí uícodo fueñe afémie monámona ana bíllana fidídicaí. Aféruido bie fiénidifuiarede éniemo afémie monámona iere jica ana bite.

¹⁰ Afe ana bitímie, abido nana caifo ite monániaí caifófenemo jáidimie dáamiede. Dinomo jaide, afénomona nana ie finócanuiaimo illáimaillena.

¹¹ Iemo afe bie Cristo illa dígamiena ñue riinoretade jiáiforiède ñúefuiaina finóllena. Dámierie ie orécamacina afémie jóonete. Jiáimacina Juzíñamui mona oga uailaí jino llóramana afémie mamede. Iemo jiáimacina cai jíllonafue uaina llotátate. Nai jiáimacimo ie comínina ñue úiñollena ocuide, íaioi llófuellena diga.

¹² Afe daí cai Ocuíraima nana íeiena ñue fibítate, ie ocuica táijina ñue íaioi jetállena, íemo nana Crístomo jaináidinona móonaitallena; mei afémaci Cristo abi izóidimaciza.

¹³ Afemona cai ínogafue dibénemo ñue dájena maméidimacina jáiticaí. Daje izóí Juzíñamui Jitona cai onona dibénemo ñue dáamacina íiticaí. Afe daí ñúefuiaina ñue izire jiéruitinona íiticaí. Uafue, nana ñúefuiaina Cristo izire jiéruilla izóí, afe izóí ñúefuiaina rairuíñeno iere jiéruiticaí. Jiéruillamona ñue móonaiticaí.

¹⁴ Ja úrue izóidinona íñeíticaí. Mei íadi jífueacadino comue llófueinafue llúamona, úrue izoide nai figo baitáñedinona jífueítiaioi. Íaioi comeci ñue fácajana raire jiáifodo méidoítiaioi. Bie jífuetino ebire lloga taino lluáfuedo bie úrue izóidino ínoga ñúefuiaina niné féítatiaioi.

¹⁵ Mei íadi conímana izíruillano, íemo uáfuena cai úrilla llezica, mai Cristo dieze cai móonaiilli. Crístomo izire jaináillano nana ie comeci itífuiaí mai jeire cai ófireilli, mei Cristo afe cai jainaina abi ifoci dainámie.

¹⁶ Afémie, ifócina íllamona, nana caina caimare ocuíoide; ñue daa cómena caina jaináitate, mei illa dígamie jiáimiemo ñue dúinaza. Nana afe Cristo dáamiena jaináitagamací caimare dani jiáimaciri táijina llezica, caimare itíaioi. Ua Crístomo jainaide, daade abi izóidino naari conímana izíruillafuedo móonaiioicaide. Móonaiillano caimare ite.

Crístomo dájena cai jaináinamona comue illáfuedo macáredicaí

¹⁷ Iemona bie ómoína cue daiíllifue izóí, cai Ocuíraima mámecido ómoímo jóonenocaidícue. Ja biruímona, Juzíñamui onóñegano illa izóí, mai omoi íñeno iri. Íaioi taino comeci úrilla uai daina izóí ífirediaioi.

¹⁸ Íaioi comeci úrilla uai onóñeno jítifomo fiébicaidiaioi. Juzíñamui comuítaga comue illafue afémacimo íñede, mei íaioi comeci riírenamona ja abina onóñedimacina jáidiaioíza.

19 Ja íaioi comeci meáifuena lloñediaioi. Iemo nana íaifuiaí illa dinó, áfemo aillo gáinafuedo iere jeire otíaioi.

20 Mei íadi afe daií, Cristo llófueñegaomoi.

21 Mei níbaí, uáfueña Cristo illafue omoi cacana mei, íemo ite uafue uai dibénedo afémiedo llófuegaomoi.

22 Ie jira nauí omoi fiénide illafue dibénedo izire ómoína dáititue: Afe nanómona ómoímo itífuiaí, mai zabide iniroi oni dúiñua izói omoi meídori. Afe nauí ómoímo itífuiaí jaca ómoína fiení finode; mei omoi fiénide gáinafuiaí jífuegaomoíza.

23 Mei jíáfodo biruí cómuena méidorediomoí; nana omoi comeci óiacanafuiaí méidorede. Nana omoi ifoci úrillafuiaína méidorediomoí.

24 Afe lezica comue comeci itífuiaí, comue iniroi jítaja izói, mai jeire omoi oíri. Afe comue itífue Juzíñamui illa izói Juzíñamui comuide. Iemo aféfuena jeire omoi úamona, omoi uáfueña íaidonide ñue illafue otíomoí. Daje izói afe omoi comue comécímo itífuiaí omoi úamona, ñue jaícina jóide illáfuedo jáitíomoí.

25 Iemona táinofuiaí lloñeno iri. Mai jíáfodo illa dígamie conímamo uáfueña úriri, mei nana cai dáaziena daje abímo jaináidicaíza. Afe abí Cristo ie.

26 Omoi icíribicaíadi, afe icírafue ana fiénidífueño ómoína uitátañeno iri. Daje izói daaruí náaruido are icíriñeno iri. Raire féitari.

27 Due jiza omoi comécina Taífe illáimaillemo “Jii” daiñeno omoi iri.

28 Nauí meríriraíma bairódimie díga, mai abído meríríñeno iri. Mei jíáfodo zefuíruiñeno táijizairi. Iemo ñue táijiferenamona o táijina íba óitio; áfedo o jítaille ráaniaí íbaitio. O íba mei, ua dúeredímacímo íaioi jítaille raa íaióimo fecáredio.

29 Fiénide uáillaído íaire úriñeno iri. Mei jíáfodo ñuera uáillaído úrifireiri. Cacádinona comeci náiretalle uaido omoi úrifireiri, íaióina ñue ézicitalle uai díga.

30 Daje izói Juzíñamui Ñuera Joréñona zúuretañeno iri; mei afémie ómoímo íllado, jae Juzíñamui íeiena mamécaomoi. Ua biruímona Juzíñamui íllánomo ñue jaícina ómoína jíllotalliruimo, afe Ñuera Joréñodo Juzíñamui íena ñue mamécaomoi.

31 Nana comécímo ite éoinafuiaína oni mai omoi féitari, nana ríifuiaí díga. Daje izói nana icírillamona comuide ríire úrillafuiaí lloñeno iri, naa jíáie báíñuafuiaíri. Nana illa díga fiénidífuaí niné féitari.

32 Iemo jíáfodo, illa dígamie jíáimíemo dúecaillano comeci mánaídímiena iri. Cristo íena omoi íllamona, Juzíñamui omoi

fiénidifuiái ibana oñede. Afena féitateza. Afémie féitaja izói, afe izói illa dígamie jiáima finoca fiénidifuena omoi féitafireiri.

5

Juzíñamui úruiaí izói cai illena Pablo caimo llote

¹ Juzíñamui izíruiga úruiaí omoi íllamona, mai afémie illa izói omoi iri.

² Cristo caina izíruilla izói jiáimana omoi izíruifireiri. Mei jii, caina ie izíruillamona Cristo cai jiáinona fecácamié. Afémie Juzíñamui ióbitallena titada fia fecaca rille izóidimie. Aferi Juzíñamui ióbide. (Afémie dibénemo afefue ñue ziórede uguci izoide.) Mai afe izói conímana omoi izíruillado Juzíñamuina omoi ióbitari.

³ Ja bie omoi Juzíñamuimo jaináidíomoiiza, mai ómoimona ninó dáamié áinina llezica jiáie ringona jetáñeno iri. Daje izói nana jiáie íaifuiaina finóñeno iri. Jaca jiáie cómemo ite ráaniaimo úradoiñeno iri.

⁴ Iairede méaifuiaina bumó lloñeno iri. Daje izói táinodo úrillafuiaido úriñeno iri. Iemo jiámamo fiénide llagüeroilla uaina oréñeno iri. Mei bie izóidifuiái Juzíñamui úruiaimo íeñedeza. Mei jiáifodo Juzíñamuina iere figura omoi daiífireri.

⁵ Jae cue lloga iima ringomo finoca fiénidifue bie izói jóide. Daa come nai áinina llezica, ringo jetáadi, fiénide. Daje izói ja ringo ua mei, jiáie ringo jetáadi, figóñede. Iemo íaifue naa úradoillafue diga finóadi, figóñede. (Afe úradoifredimie jamai jánarai ióbitadimie izoide.) Ja onóidíomoiiza bie izoide fiénidifuiái finuana fibídimie, Cristo Juzíñamui diga illáimana illíruimo jaináinide.

⁶ Jiámama taino uáillaido omoi jífueñeno iri. Mei afe bie fiénidifuiái finuamona, nana ie uaina cacáacañedinona, Juzíñamui iere duere finoiteza.

⁷ Iemona, bie izói ite comini diga omoi nabáiriñeno iri.

⁸ Naui nai omoi íñoñena llezica, jítifomo itíomoi; mei íadi birui cai Ocuíraimamo dájena omoi jaináinamona, ja úzefomo macádíomoi. Iemona ñue uáfodo macádino izói mai omoi ífireiri.

⁹ Cai Ocuíraima Jesucristo egáíñote raa izoide. Iemona cai comécina ñúeitate. Iemo ua uaido caina úritade. Daje izói cai jaícina ñue illifue comúitate.

¹⁰ Cai Ocuíraima ñue ióbitallifuena, mai iere omoi onóoicairi.

¹¹ Báinino macádino finoca táinofue dibénemo íñeno omoi iri. Mei jiáifodo afe báinino íaioi finócafueña uáfomo omoi ciotari.

¹² (Mei íadi afémaci báinino finócafuiái izói cai úriadi, caina meáiruitaite. Ie jira benomo rabedo jino ómoimo llóñeitíue.)

13 Mei íadi nana íaioi illafue jino uáfodo cíotamona, afe fiénidifuiái iere íairenana nana comíni ónoítiaioi, mei Cristo egáíñua úzefo, nana comínimo ua comécimo itífuiaína jino cíotate.

14 Ie jira bie izói daina:

Inídióza, mai cazi.

Tíidinomona mai náidacairi.

Iemona Cristo ie úzefomo ñue mácaitimiena ona jáitaité, daide.

15 Mei íemona, nágarui omoi illáfue mo izire comeci omoi facáoiri. Naga fiénidifuiáimona abi omoi rairuiri. Abina onóñedino izói omoi iñeno iri, mei jíáifodo ñúefuena baitáidinona omoi iri.

16 Biruido aillo fiénidifue íteza, o illafue táinomo fáifitañeno iri; ñúefuiái omoi finófireiri.

17 Táinodo úritino izói iñeno iri. Cai Ocuíraima comeci jítainafuena ñue omoi baitáocairi.

18 Jifáíñeno iri. Mei, afe jífáillafue come comécina aillo íaífuemo ana uitátate. Mei jíáifodo Ñuera Joreño abí omoi úicaitari.

19 Illa dígamie jíáimamo Juzíñamui uáillaído caimare omoi úriri, naa Juzíñamui rúairi. Daje izói Juzíñamui Ñuera Joreño lloga rúaníai omoi roíri. Daí omoi rúado cai Ocuíraimana iere íóbitaitiomoiza.

20 Illa dígaruillaí cai Ocuíraima Jesucristo mámecido Moo Juzíñamuina naga ráaníaíri figura omoi daíífireiri.

Crístomo íñotínona cai úllamona Pablo cai jofo eromo cai illafue llote

21 Illa dígamie jíáima anamo caimare omoi iri, mei Juzíñamui daí cai ocuídeza.

22 Cai Ocuíraima anamo cai itábicailla izói, naga ringo ie ini anamo itábicairede.

23 Mei naga ringo ie ini ocuífrega, íemo jíái ie ini ñue úiñogaza. Afe izói nana Crístomo íñotino, Cristo ocuícaiaioi; daje izói Cristo ñue úiñogaiaioi. Afémie afémaci illaíma. Daje izói afémie íaioi Jíllotaitimie. Afémiemo íñotino íemo dájena jaináinamona, ja ie izóidiaioi; ja dáamiede abi izóidiaioi.

24 Iemona Crístomo dájena jaináidinona afémie anamo illa izói, naga inírede ringo ie ini anamo írede.

25 Cristo íemo jaináidinona izíruilla izói, mai naga íima ie aína izírui. Crístomo jaináidinomo Cristo ie abina fecade.

26 Afémie daíí ie abi fecade ñue íeiena íaioi íllena. Daje llezica afémie íaioimo ite íaífuiaí jáinoimo jococa muilla izói, ie uaido íaioína muiñode.

²⁷ Cristo daií caina muiñode ñuera nífuenidinona ie uiécomo cai cíocaizaillena. Uafue, nana mallizai izói abimo comuídena duano ebire eroide, lliriñede abi ígoína caina finode. Jaca due jiza fiénidífueña fiéñede. Nana íaioína íeiena iere ñue finode.

²⁸ Afe izói naga iima dama ie abina izíruilla izói, ie aina izíruirede. Ie aina izíruitimie dama ie abina izíruite.

²⁹ Bu jaca dama ie abina éoiñede. Mei jíáifodo cai abina ñue ecádicai, ñue úiñotícaí. Afe izói Cristo íemo dájena jaináidinona ñue rairuide.

³⁰ Mei afémaci dama íeieza; ja daa ie abi izóidiaioi. Cai bie afe abimo jaináidicai.

³¹ Bífuiáimona Juzíñamui daina izói, dámie ie moo, ie ei diga, fáicanocaillano, ie ai diga dájemo jaináicaite. Jáinaicaillano, daade come abi izói itíañillinoi.

³² Bie daade come abi izói íficaillafue, jaiáimona áillue báinide rafue. Mei íadi afefue Crístomo dúide; daje izói íemo dájena jaináidinomo dúite, daidicue.

³³ Mei íadi daje llezica ómoimona illa dígamie omoi abina izíruilla izói omoi aina izíruiri, daiíacadicue. Iemo naga inírede ringo ie inina ñue jacíruiredeza, daidicue.

6

¹ Uruiaí, omoi cacai. Crístomo ínotinodiomoiza, o moo uai jeire omoi olle iere jitáirede, mei afe bifue Juzíñamuimo jaícina jóideza.

² Bie lletara uai llua mei, Juzíñamui dáanomo ñue cai illífue llote. Daií nana ie lletara uáimona dama bíuaido Juzíñamui cai ñue illífue llote. Afe llétaja uai bie izói daide: “O moo, o ei diga, ñue jacíruiri,

³ áfedo caimare o íllena, daje izói bie éniemo are o íllena.”

⁴ Ja úruiairedino, mai omoi cácarei. O úruiaína comécina ríicaitañeno iri. Mei jíáifodo riire llétaja uaido ñue íaioína llófuefireiri. Daií íaioína ñue omoi móonaitari, cai Ocuíraima Jesumo ñue íaioi íñollena.

⁵ Ocuífiregano, mai omoi cacai. Biniemo ite omoi ocuídímie dánana ñue jeire omoi oíri. Cristo ocuíllamo o táijina izói o táijitatímie mo ráairuíñeno ñue táijiri. Afémie ocuíllana ñue jacíruiri. O táijitatímie uaina nibéfodo oñeno iri.

⁶ O ocuídímie eroille llezica ñue táijiri, daje izói afémie iñena llezica náamonaze ñue táijiri. Dama ocuídímie eroille llezica, íocire táijidímiena iñeno iri. Afe izoide táijide come jamai come íóbitade. Afe izói iñeno jíáifodo omoi iri. Cristo táijitagano izói, Juzíñamui comeci jitáinafuena izire omoi finori, afémie omoi íóbitallena.

⁷ Comeci ñue jítaina izóí caimare omoi táijiri. Jamai come íena táijíñeno, cai monamo ite Ocuíraíma íena ñue omoi táijíiri.

⁸ Mei ja onódiomoiza, illa dígamie ie ñue táijífirenado cai monamo ite Ocuíraímamona ñúefuena jirídoite. Rairuícamie, ráiruíñegamie díga dájerize nano íaioí táijínaze jirídoite.

⁹ Ocuífredino, mai daje izóí omoi táijítaganomo ñue dúcaífireiri. Afémacina fiéni omoi jácidoñeno iri. Daade cai Ocuíraíma anamo nana dájena itícaíza, omoi úibicairi. O táijítagano monamo ite Ocuíraíma anamo illa izóí, o jáí daje Ocuíraíma anamo itio. Afémie da cómena eneno maméñedeza. Illa dígamie dájerize mamede. Aféfuemo omoi úibicáífireiri.

Jesumo ínotino comei náireitalle abi ríidua uai Pablo llote

¹⁰ Mei ámatiaí, cai Ocuíraíma Crístomo ite ríinodo benómona mai riire omoi iri. Cai Ocuíraíma Jesumo omoi jáináinamona riire abí omoi mameri. Mei, afémie jamánomo ríiredeza.

¹¹ Juzíñamui lloga abi ríidua uai, ñue jeire omoi oíri, naa ie ñuera ézicigafuiairi. Mei jáí, dáarie comíni abi ríidollena ñue fuiríllena llojécuiroi jítádiaioi. Afe íaioí jíta izóí, nana Juzíñamui cai ríidua uai, mai jeire omoi oíri. Afe uaido Taife jífuia uaina uáitarediomoi.

¹² Jamai abina mairide come díga fuiríñedícaí. Mei jáífodo fiénide jóriaí díga fuirídícaí. Afémaci caífo cai acónimo táífodo macádiaioi. Afe cai díga fuirífirede jóriaí nana bíniemo ite jítífodo jaide fiénidímacina fiéni ocuíoide. Bínie comínina “Cáiediomoí” daííoicaidiaioi, mei “Omoi náamadícaí” daíífirediaioi.

¹³ Ie jira Juzíñamui lloga abi ríidua uáillaído abí omoi rairuiri. Afe bie uaido jobáirillaruímo ñue abina ríidoitíomoi. Daíí abina ríidotíomoiiza are ñue ríinoredínona ítíomoi.

¹⁴ Ie jira riire omoi iri. Fuiríraíma círaígí ífe riire tírínua izóí jízíñeno ñue ie fuiríllena, afe izóí Juzíñamui lloga ua rafue jeire omoi oíri. Daje izóí ñue jáícina omoi íllado nágarui ñue abí omoi ríidofireiri. Afe bie omoi jáícina illafue, fuiríraíma jogobe ríidollena jítaca llojeco izoide.

¹⁵ Afe fuiríraíma fuirízaila llezica ie ídai ico riire maíga izóí, áfedo riire ie naídáillena, afe izóí Juzíñamui comécina jacíruiñeno uai jeire omoi oíri. Afedo abina riire mámano, fiénidífuena ómoína anáfenoñeíteza.

¹⁶ Iemo illa dígaruillaído Juzíñamuímo omoi ínogafuena féitañeno iri, mei áfedo Taife caímo mameca fiénidífuiaína oni caítarediomoi. Omoi ínogafue jae fuiríraíma abi ríidollena úífirega llojeco finoina escudo izoide.

17 Iemo Juzíñamui lloga jíllona uai jeire omoi oíri, mei aféuai, ifo riídollena jitáfirega ifo ico llojeco izoide. Iemo nana Juzíñamui uáillaina mai jeire omoi oíri, mei afe Juzíñamui uai, Ñuera Joreño ómoimo fecaca fuirira llojébici izóideza.

18 Nana bie cue ocuífauiai, mai Juzíñamuimo jícano finori. Jaca Ñuera Joreñodo izire Juzíñamuimo omoi jicáfireiri. Bie izói omoi íllena, nana bífuiaina fáicanocaiñeno ñue abí omoi rairuíocairi. Daje lezica nana Juzíñamuimo jaináidinomo Juzíñamuimo omoi jicáfireiri.

19 Daje izói jíái cuemo jicáfireiri; náiraímo cue úria, Juzíñamui cue uai nabáilleza. Iemo jacíruiñeno íocire íaioímo cue úrillena, Juzíñamuimo omoi jicari, nauí báinino lloga jíllona uai jino comínimo cue fidítallena.

20 Bie ñuera uaido comínimo úrillena Juzíñamui orécamiedicue. Afe uai ícoínia, ja birui llavécamiedicue. Iemo, bífuedo ñuera llujítimie izói jacíruiñeno naire cue úrillena, mai Juzíñamuimo omoi jicari.

Iraicaiño uáidua uailai

21 Cai izíruiga ama Tíquico, cai Ocuíraíma Jesumo táijinana fáicanocaiñeno canófiredimie. Afémie nana cuemo itífuiaina ómoímo jino llóite, naa jíáie cue finócafuiiai diga.

22 Jira, bímie ómoímo orédicue, cue illafue ómoímo jino llóllena. Iemo jíái áfedo omoi náireficaillena, íena ómoímo orédicue.

23 Moo Juzíñamui, cai Ocuíraíma Jesucristo diga, cai ámatiaímo ñue comeci uái illifue ómoína ñue onótaiteza. Daje izói Juzíñamuina ñue omoi izíruillena jicádícue. Ie jira Juzíñamui omoi ínogafuena aillo móonaitaiteza daídícue, afe bífuiiai omoi maiñóllena.

24 Nana cai Ocuíraíma Jesucristona féitañeno izíruitinona, Juzíñamui ñue íaioína ézicíteza. Mai; jae ñie. Daí íteza.

FILIPO COMINIMO SAN PABLO ORÉCABE La Carta del Apóstol San Pablo a los Filipenses

Filípomo ite Jesumo ñnotinomo Pablo llavéracomona cuete

¹ Cue Páblodicue. Cue nabai Timoteo diga bibe ómoimo cuetícoco. Jesucristo táijitagamiedicoco. Nana Filipo jófuego ite Juzíñamuimo jainaide ámatiaimo cuetícoco. Daa bibedo omoi cígiri ite ocuídillainimo, naa eneno mameca canódinomo, cuetícoco. Cristo Jesumo nana dáaziena jaináidiomoi.

² Cai Moo Juzíñamui ñue ézicigafuego omoi iri, naa comeci caimare uái illafue diga. Daje izói cai Ocuíraima Jesucristo ézicigafue dibénemo omoi iri, omoi ie lloga comeci caimare uái illafue diga.

Pablo Jesumo ñnotinori Juzíñamuimo comécido úrite

³ Naga ómoimo cue úbicaifirenaruido, cai Moo Juzíñamuina: “Iere figura” daiífiredicue.

⁴ Juzíñamuimo comécido cue úriadi, jaca nana ómoiri caimare jicáfiredicue.

⁵ Mei fueñe tainéinaruimona ua biruimo Juzíñamui ñúfuedo dáafuego naa ómoiri táijifiredicaiza. Afena figura daiífiredicue.

⁶ Juzíñamui nauí omoi comécimo ñúfueña déitate. Afe ñúfueña déitallifue tainédimie ua Jesucristo billíruimo fáicanocaiñeno déitaocaite. Afefue taino daiñideza onódicue.

⁷ Mei ómoína iere izíruillano nana ómoiri daií comeci cue fácafue iere jaicina jóide. Afe izói daje cuemo iga ézicigafue, jeire otíomoi. Llavécamiedicue íadi, omoi cúeoiri jeire oga ézicigafue, ñúfue cue llujillena canode. Iemona cai jílloillifueña comínimo uáfueña ñue fidítaticue. Daje izói bífueña iere nahífueza daiítaticue. Afe izói bie ñúfueña uáitaacadino uíecomo daa bífuedo cai jílloillifuedo jaicina ñue úriticue.

⁸ Jesucristo ómoimo dúecaillano izíruilla izói, omoi cígiri iere cue íacanana Juzíñamui ñue onode.

⁹ Juzíñamuimo comécido cue úrillado ómoiena jicádicue. Dani conímána aillo jamánomo izíruillana jicádicue. Daje izói nana ñue fibíllafue abina omoi onóillifue diga, jicáfiredicue. Ua daií ómoiena jicádicue, ñúfuiái omoi níziaña omoi fibíllena.

¹⁰ Afe bifue jeire omoi óiadi, omoi comeci ifue íainite. Daje izói Cristo billíruimo nífuenidinona íitiomoi.

¹¹ Daií Jesucristo omoi illáfueña mámeite. Ua ria llizilla jofo úaina izói, ómoína mámeite. Ua aillo ñue finócafuiai omoi illáfueño Jesucristo mámeite. Afedo Juzíñamuimo ñúefue ebíredifue diga nítaitiomoi.

Cristo jítainafue cue finuamona cue comeci ifue ráifide

¹² Amatiai, omoi cácarei, cuemo zúidifuiaina omoi fidítaiticue. Aféfuiai Juzíñamui cai jíllotaliui jino llúana nahí uáfueña canode.

¹³ Benomo cue llavéinamona, nana nahíllaima jofo abi úiñoraini, ñúefuedo cue llavéinana onódiaioi; ua Cristo ñúefue jeire cue úamona ja llavécamedicueza, áfena nana onódiaioi.

¹⁴ Llavécacueña íaioi ciónamona, ja nana íinote ámatiaimona nabémaci iere náicaidiaioi, Juzíñamui uai jino llóllena. Ua meáiruiñeno uáfori jino llotíaioi. Daje izói cue llavéinamona cai Ocuíraimamo jamánomo ínotiaioi.

¹⁵ Uáfueña dámerie cuemo úradoillano Crístodo úritiaioi. Afémaci énenoruillano cue baimo jamánomoidimiena íacadiaioi; mei íadi jíaimiaí comeci ñúefuedo jino llotíaioi.

¹⁶ Dáarie dani íaioi comeci óiacanafuiaido Crístona jíáifo úritiaioi. Cue llavébillafue baimo jamánomo raamo cuena jíiritaiacadiaioi.

¹⁷ Mei jíaimaci cuena izíruillano Juzíñamui ñúefue jino llotíaioi, mei nai benó llavéracomo cue íllana onódiaioi. Ua Juzíñamui jíllóillui cue uáitañena jira llavécacueza onódiaioiza.

¹⁸ Mei íadi ¿cúemona níbai? Dáarie jáicina Crístodo úritiaioi; jíaimaci Crístodo jíízioicana úritiaioi. Mei daje ábiedo Crístodo íaioi úriadi, cuena jaca íóbitade.

Afe cue íóbillá baimo jamánomo nai íóbioicaiticue.

¹⁹ Mei nana bífuiaimona nífuenino záiticueza onódicue. Ua cueri Juzíñamuimo comécido omoi úrillado ñue jíllóiticue. Daje izói Jesucristo Joreño cue cánuado ñue jino jáiticue.

²⁰ Jesucrístodo meáiruiñeno cue úrillena cue comeci jítailafue. Afe daje bífueño iere ocuírídicue. Birui cue illáfuedo jíaimaci Crístomo aillo ñúefue nitádiaioi. Afe bie nita baimo, nai jamánomo íaioi nitállena jítaídicue. Nibai cáaiticue, nibai tíiticue dama mei áfena lloñédicue. Dama Jesucrístomo ñúefuiaina nita daidicue.

²¹ Nai tíñeno cue jáicaíadi, Cristo comeci jítainafue cue finuana jamánomo naga raa baimo gáidicue. Iemona nai cue cáanafue ñuera; íemo jíái cue tílle jamánomo baimo ñuera.

²² Mei íadi bie cue abido nai cue caana llezica, cai Ocuíraima comeci jítainafue bíniemo jino denóllena tájifireiticue.

Meita bie mena cuemo itífue mona nifue nizada óitícueza onóñedicue.

²³ Nai feire jánaideza, bie ménafuedemona nifue óitícue. Aféfuena ñue cue onóille féirede. Mei jíáifodo caífo Cristo diné cue jáillena tíiacadicue; bie izóidífue cúemona jamánomo ñuera.

²⁴ Mei íadi jíáie izóí omoí cígido bie caana abido cue jáicallena, ómoiena iere jítaírede.

²⁵ Mei daa bífuena jáicina onódícue; omoí diga nai cue ícaillena ñue onódícue. Omoí diga cue íllena jítaírede, omoí ñue ínogafue nágarui jeire omoí cue otátallena. Ua ómoíri cue illa jítaírede, jae jeire omoí ua izóí afe baímo jeire omoí óllena. Daje izóí omoí ñue ínogafuedo omoí íóbioicaillena, omoí cígiri cue ícaillena nai jítaírede.

²⁶ Mei daíí nana omoí cígiri ítícue. Afe uire cue bílledo Jesucrístona jamánomo aillo íóbitaitíomoi.

²⁷ Cristo ñúefuiai úbicaillano, afe izóí nágarui omoí illafue ñue jáicina jóoneri. Nibai omoí cue éroizaiadi bifue jeire omoí úamona, omoí illa ñúefuena fidíacadicue. Daje izóí ómoímona jica itícue íadi, daje omoí illa ñúefuena onóiacadicue. Afe bie izoide ñúefuena fidíacadicue: dáaziena caímare omoí jáináillana onóiacadicue. Daje izóí jíllloillíuaimona lloga ínogauaimo izire omoí níciduana fidíacadicue.

²⁸ Daje izóí omoí bacáuai ímíiaina due omoí jáicaiñenana cuemo omoí lloiri, daidícue. Afe omoí jáicaiñenafue, niné íaíoi táinocaillífuena uáfodo jino llotátate. Mei íadi daje llezica omoí jíllloillífuena uáfodo jino llote. Bie omoí onóitainafue Juzíñamui dibénemona bite.

²⁹ Mena rafue Juzíñamui ómoímo mamede. Nánorafue daide: Cristo uaina iere jeire óredíomoi za.

Nane jíáífue daide:

Cristo ñúefue jeire omoí ua méífomo, afémie ícoiri duere ze-fuífiredíomoi.

³⁰ Cue naa ómoíri daje fuirilla izóidífuemo itícaí. Naui cue fuirídímie izóí íllana cíódiomoi. Ja birui fuirídímie izóí, nai cue jáicana ráfuena onódiomoi za.

2

Cristo jamánomo uáitagamiéna jaide ie méífomo Juzíñamui jamánomo ñue ébífue íemo nífade

¹ Ja birui Cristo ómoína nácaítarede. Afémie ómoína izíruillano, comeci zúurenamona omoí comécina cáimacaitarede. Ie Ñuera Joreño omoí diga ite. Conímana izíruillafue dúecaillafue diga afe dibénemo itíomoi. Nana bífuíaina omoí onónamona, maí cue omoí íóbitari.

² Ua caimare ñue omoi illífuedo cuena ióbitari. Afe izói daje izíruillafuemo omoi jaináinamona cuena ióbitari. Afe mei dájemo comeci jitáinafue jeire omoi úado cuena omoi ióbitari. Afe emódomo dáafuemo omoi comécinado cuena omoi cáimacaitari.

³ Dani omoi comeci jitailla izói mamériñoeno iri. Fia abi ñnuafuedo nífuena lloñoeno iri. Mei íadi comeci mánaínafuedo omoi mamériri. Omoi mona illa dígamierie omoi aino cómena o baimo comécina ñuera, omoi daífíreiri.

⁴ Dani omoi ñue illáfuenta jenóñoeno iri. Mei íadi nana jiáimaci ñue illáfuenta omoi jenori.

⁵ Cristo Jesús comeci mámia izói, dájemo comeci omoi mameri.

⁶ Nano fueñe ie illa llezica afémie daa Juzíñamui izoide. Juzíñamui izói ie illa ríino afémiemo ite. Mei íadi ie fiénocaiga ríinona “Raíre meine cue olli” daíñede.

⁷ Mei íadi afémie Juzíñamui izoina llezica afe íemo ite ríinona oni eneno fiénocaide. Fiénocaillanona jiba iima jéicia izói Cristo jéiciga. Daí ie jéicinamona fia jamai táijitagamie bie éniemo jáicana izói jáicade.

⁸ Jamai cómena ie illa llezica jamánomo comécina mánaidimiena abí mamede. Daí mámiano ie Moo Juzíñamui daínauai jeire uano dama tízaide. Ua aillo meáire cruzmo tízaide.

⁹ Ie jira Juzíñamui jamánomo aillo ñúefue íemo nitade. Ua áfemona nana jiáie mámeciai baimo jalléidicina Juzíñamui íemo jitade.

¹⁰ Daí bie mámecina Juzíñamui íemo jitade, nana comini ie anamo dújuillena. Ua afe Jesús daínacina íaioi cacánamona nana monamo itínuiai, bie éniemo itínuiai, daje izói énie anamo itínuiai cañícido ie anamo dújuitiaioi.

¹¹ Daí dújuillano nana comini comécido íena ónuano, Jesucrístona nahí Ocuíraimana daítiaioi. Daí daínado Moo Juzíñamui ñúefue nítaitiaioi.

Crístomo jaináidino bínie egáñotino izóidiaioi

¹² Mei jira, cue izíruiga ámatiai, nauí omoi cígiri cue illa llezica jaca ómoimo cue llogáuaina jeire otíomoi. Ja birui ómoimona jica itícuemo, nauí omoi úana izói, afe baimo aillo jeire omoi oíri. Dani omoi jíllonafuemo comécina mánaidimie izói jacíruioicana áfemo omoi comécioiri. Aféfuena nana comínimo ñue jino omoi denóicairi.

¹³ Mei Juzíñamui afe ñuera comeci óiacanafuiai ómoimo fecádimie. Afémie dama ie comeci ñue jítainafuedo ómoína canófirede, omoi comeci ñue óiacanafuiai jino denóllena.

14 Bífuiái jino omoi denolle llezica nana omoi jetácafuiái fieni úriñoeno omoi finori. Daje izói áfena júfidoñoeno omoi finori.

15 Iemona bie izói omoi iri ninena jiáimaci ómoimo íaifue jóoneñeillena. Daií nífuenino omoi iri, áfemona íaifuenidínona omoi ílleza. Mei daií omoi íllamona, comécina íaifuemó féitate figóñede comini cígiri, Juzíñamui úruiaína mamélliomoiza. Iaiói cígiri, ucudu caifona bie jítirede énie egáñua izói, ie izói comini comeci jítirenana egáñoitíomoi.

16 Afe egáñuado zíñona cáataite uai íaioimo jino llóitiomoi. Daií Cristo billíruimo ómoiri meáidaiñoeno caimare abí ñnoitícue. Daje izói omoi ñue illáfuedo nauí ómoiri iere cue táijinafue táinomo jifánofiñenana onódícue.

17 Nauí ñúfueña omoi ínuaruimo dani omoi illáfueña Juzíñamuimo llotíomoi. Birui nai omoi ínogafue ñue jaícina cue jóoniamona, nibai benó cue tíadi, áferi cáimacaitícue. Afe llezica omoi cánuai biga íobillafueri íobidícue.

18 Daje izói caimare omoi iri; cue cáimacaila dibéfuemo jeire omoi oíri.

Timoteo Epafrodito diga Filipos comínimo oréillícue

19 Cai Ocuíraima Jesús comeci óiacania, Timotéona omoi eróizaitaitícue. Omoi illafue afémie abido cuemo lluáibiadi, iere áferi cáimacaitícue.

20 Cue comeci faca izói, comeci facade jiáie cómena íñede. Dama Timoteo cue izói comeci úrilla. Dama afémie omoi ñue illífuemo uáfueña comeci facáoifírede.

21 Nana jiáimaci dani íaioi comeci jítainafue jenódiaioi. Cristo Jesús dibéfuena lloñédiaioi.

22 Afémie cuemo ráifinafueña náganuiaimo jino ciótagaza onódiomoi. Ñúfue jino cue llócaillado afémie cue diga, jító izói jáicaide. Ua moo ie jító diga táijicana izói cue diga táijicaide.

23 Cuemo ite itífuiaí jino déillana ñue cue onóadi, bie Timotéona omoi méiñOtaacadícue.

24 Cai Ocuíraima ñue ñnotícue. Iemona nibai ómoína raire dama eróizaibitícue.

25 Daje izói cúemona uáfodo jóideza, cue ama Epafrodito omoi cígimo jáirena. Afémie cue táijinana nabáifíredímie. Daje izói fuirilla izói cue llócaigafue nabáifíredímie. Mei íadi nauí cue jitaica raamo táijillena omoi cuemo orécámie, abido ómoimo orédícue.

26 Mei afémie nana ómoína izire cióacade. Ie irárenana omoi fidínamona afémie comeci iere járitaide.

27 Uáfueña iere irárede; tíillanomo figo dúcide. Mei íadi Juzíñamui íemo dúecaillano íena jíllotate. Dama afémiemo dúecañedeza; mei jiái daje izói cuemo dúecaide. Ua Juzíñamui

cuemo dúecaide, cuemo ite zúufuiai baimo jiáie aillo comeci zúufuiai cuemo bíñeillena.

²⁸ Iemona íena iere oréacadicue, raire afémiemo omoi érocaillano iere omoi ióbicaillena, cue zúucaillafue raire niné féilleza.

²⁹ Bie Epafrodítona mai jamánomo caimare omoi uáidori, Juzíñamui izire jainaide ámaza. Nana ie illa izóidimíai caimare jacíruioicana íaioimo mai omoi cacáreiri.

³⁰ Ua afémie Crístomo táijnafuedo tállanomo figo dúcide. Dama ie cáanafue jacíredifueмо afémie jóonete cuena canóllena. Ua omoi bíninamona afémie cue cánuaibillena iere jamánomo nícidote.

3

Uáfueña Juzíñamui ióbilla cai ñue jaícina illafue

¹ Cue ámatiai, mai cai Ocuíraima omoi ióbioicairi. Cue cuela fue meine ómoimo cue lolle cuena áfedua izói íñeite, mei íadi ómoína iere ñue canode.

² Íairuiga jiba jico izói fiénidifueмо itímacimona abí omoi rairuiri. Omoi bacano icoi quetátafirediaioi.

³ Cai bie ua quetácamacinaza. Cai bie cai joréñodo Juzíñamui ióbillamacidicai. Fia jínofenemo cioide raana íñoñedicai. Cristo Jesús íeiena cai íllari caimátaidinodicai.

⁴ Bífuiaimo aillo cue ínoregafuiai ite íadi, áfena lloñedicue. Cue baimo buna aféfuiaimo ínonide.

⁵ Cue jocóinamona ocho dígarui íllamona cue bacano icoi quetádiaioi, mei nahí israelita nairai ímiedicueza. Cue bie Benjamín izíemo jaináidimiedicue. Cue jocóinanomona hebreo ímiedicue. Ua hebreo ímie jitódicue. Judíuai ocuícáfue jino cue dobáiñuamona cue bie fariséodicue.

⁶ Jacire ocuíoídimie izói Crístomo jaináidino fállena íaioína racadicue. Judíuai ocuícáfueмо lloga ñue jaícina illafue dibéfuemo, jaca nífuenidimiedicue. Bu úaitañegamiedicue.

⁷ Mei íadi nana bie nauí cúemona aillo ráifidifuiaina, ja birui aféfuiaína Cristo ícoína náfueñedicue. Ua aféfuiaína jamai ráifíñedifuiiai izói áfemo coméciidicue.

⁸ Afe baimo aillo jíáifuemo coméciidicue. Cue Ocuíraima Jesucrístona cue onóillifue, nana cuemo itífuiiai baimo aillo ráifide. Iemona cuemo itífuiaina féitaticue. Cristo ícoína naga cuemo itífuiaina cue féitaga. Ua aféfuiaína oni dotáacaiga raa izói coméciidicue, afe ibana Cristo cue náamatallena.

⁹ Daje izói cue afémiemo jaináiacadicue. Ocuícáfueña cue ínuamona ñue illáfueña líinoticue. Mei íadi afe ñue illáfuedo

Crístomo jáinaiñeiticue. Jesumo ñnotinomo Juzíñamui iga nahí ñue illáfuedo Crístomo jáinaiticue.

¹⁰ Cue comeci jítainafue Cristo cue onóillena. Daje izói ie tíllanomona meine abido cáatate ríinona, “Cuemo iri,” daidicue. Afémie duere zefuilla izói duere zefuíacadicue. Afe daií ie tíllaruimo ie illa izói íiticue.

¹¹ Afemona tíidinuaia meine cáallifueмо ocuírídicue.

Cristo fueñe cue ocuilla izói cue jáillena, fuirilla izói izire nícidocana uiticue

¹² Ja nana afe bie mamérillafue oticue daiíñedicue. Daje izói comeci jáicina ñue jóidimiedicue daiíñedicue. Mei íadi Cristo fueñe cue ocuilla izói íacadicue. Ie jira nágarui aféuaimo nícidocana uiticue, afémie cuena daína izói cue jáillena.

¹³ Cue ámatiai, bífuiaimo ja dúcidicue dama daiíñedicue. Mei cue nahí finóacaigafue jíáfodo jóide. Naui cue illáfueña féitaticue. Afe llezica nahí como cuemo déioicaiticueмо ríire coméciidicue.

¹⁴ Aizídino raire mózizailla izóidinomo dúciacadicue. Juzíñamui monámona fia jirídolle raa izoide cue llínuaibillena, Juzíñamui monámona cuena uáidote. Crístomo cue jáináinamona afe jirídolle raana máíñoiticue.

¹⁵ Cáimona nana ñnogafuedo ñue mónaitino, mai bie izói cai comécioilli. Jáifodo omoi coméciaidi, Juzíñamui áfena ómoína fidítaite.

¹⁶ Mei íadi bifue mai cai náfuelli: cai onóigafue izói mai ñue cai illi. Daje izói ñue jáicina mai cai comécioilli.

¹⁷ Cue ámatiai, naui omoi cígiri cue íllana ciódiomoiza, afe izói omoi iri. Omoimo cue ciotagafue jeire otínomo izire comeci omoi facáoiri.

¹⁸ Ja aillo Cristo tíllafueña uáitatino íteza. Iemona diga icaiño afémacido ómoimo lloticue. Nane zuure éebicaillano dáanomо ómoimo llóiticue. Afémacimona abí omoi rairuiri.

¹⁹ Bie izói ítino írairuimo niné táinocaitiaioi. Dani íaioi abi jítainafuiaína daidíaioi:

—Bie cue juzíñamui, —daidíaioi. Meáirede raana meáiruñediaioi. Mei íadi áfedo abí ñnotiaioi. Fia bie énie ífueмо coméciidiaioi.

²⁰ Mei íadi cai nana caifo mona imácidicai. Cai nana, cai jíllotade Ocuíraima Jesucristo monámona bíllemо úiñoticai.

²¹ Cai zíiñoñede abina afémie méiduaibite, afémie ie abi ebire cioina izói cai íllena. Afémiemo ite ríinodo naga raana náamatade. Iemona afe daje íemo ite ríinodo cai abi ífueña méidoite.

4

Jaca cai Ocuíraimamo caimátaioicairi

¹ Cue izíruiiga ámatiai, mei ómoína iere cióiacadicue. Omoi cue ióbioinamacidiomoi. Iemo cue jirídolle raa izóidiomoi. Ua cue izíruiгамacidiomoiza; mai cai Ocuíraimamo jaícina riire omoi comécioiri.

² Evódiana mámeciredingo íemo Síntique diga, izire jicadicue, dáafuemo ómingo coméciri. Mei cai Ocuíraimamo jaináinamona ebúñona maméidiomongoza.

³ Daje izói jíaimiemo úriticue. O, cue táijinado jaca ñue cuena nabáidio. Ua cue ínoga nábaidio. Jira bie cai miríngotiaína o canótaiticue. Mei afe íainguai cúeoiri afe jillona uai cue llócaínado nícidocaidiainguai. Bíainguai, Clemente diga naa jíaimieoiri cúeoiri táijicadiaioi. Nana afémaci mámecei ja Juzíñamui zíñona illino óitino mámecei cúeinanicomocuega.

⁴ Nágaruillaido cai Ocuíraimamo mai omoi caimátaioicairi. Nane dáanomoc daidicue, mai caimátaioicairi.

⁵ Omoi comeci mánaina naga cómemo, mai cíotaitiomociza. Cai Ocuíraima billíruimo áinozideza. Cai áinori íteza.

⁶ Omoi comeci nífuemo járitaitañeno iri, mei jíáfodo naga ómoimo comuídifuiaina Juzíñamui úrilla llezica, afémiemo mai omoi lloiri. Daje izói omoi jitailla raana jicari. Afe llezica “Iere figura” mai omoi daífireri.

⁷ Ie mei Juzíñamui comeci caimare uái illafue ómoimo íteza. Bie comeci uái illafue comini onoiga táinofue baimo ñuera. Afe caimare uái illafue omoi comécina ñue ráiruite. Daje izói omoi comeci jarire úrillafuena ñue manánaitaite. Mei Cristo Jesumo daane jáinaitiomociza.

Ñúefuiaimo comeci omoi facóoiri

⁸ Cue ámatiai, íraicaiño omoi llóiticue. Nana nahí uáfuiaimo omoi coméciri. Daje izói nahí caimare jacíruiogafuiaimo omoi coméciri. Daje izói nana jaícina illáfuiaimo omoi coméciri. Afe izói nana íainidifuiaimo omoi coméciri. Daje izói nana ióbillafuiaimo omoi coméciri. Daje izói nana caimare jalléinafuemo omoi comeci uibíoiri. Nana bie ñúefuiaimo omoi comécioiri. Daje izói nana ñúefuena nitáfireganomoc afémacimoc omoi uibíoiri.

⁹ Omoi cue llófuia izói mai omoi iri; ómoimo cue lloga lletárafuiaimo mai omoi ínori. Cue dánana omoi cacana izói, cue finócana omoi ciona izói, afe izói mai omoi iri. Iemona comeci caimare uái illafue fecáfirede Juzíñamui omoi diga ífireite.

Filipo imaci fia fecaca raa Páblomoc orédiaioi

10 Meine nane cuemo omoi coméciillari cai Ocuíraimado iere ióbídicue. “¿Nibái mei cuena féitatiomoi?” ómoína daiíacañedicue. Cue omoi canóacana raa átiitimie iñédeza, onódicue.

11 Cue ráaninari ómoína fiendi úacañedicue; cuemo ite raari cue ióbillana ja fibídicue.

12 Duere cue íllana fibídicue. Daje izói aillo cue jitaica ráaniai íllana fibídicue. Nifue cuemo comuíadi, afe izóidifue cue ocuillana ja fibídicue. Nibai jeíredicue, nibai juffruiticue; afe izói caimare cue íllana fibídicue. Güiga alla cuemo íadi, mei cuemo iñéniadi daje izói ñuera.

13 Naga cuemo eróicana comuide raana ocuíredicue; mei Cristo cuena ríiduado ocuíredicue.

14 Mei íadi cue dúerena llezica cuemo omoi dúecaillamona, cue omoi cánua ñuera. Diga icaiño duere cue finóinari omoi zúunaila cuena náicaitade.

15 Omoi Filipos imácidiomoi, daje izói bífuena onódiomoi. Nano fueñe jíllona uai cue llócaína llezica, daade cue canófiredinodiomoi. Ua Macedóniamona oni jáinomo cue jailla llezica daade cue canode Jesumo ínotinodiomoi. Fia fecaca ráaniai cuemo oréfirediomoi. Afemona comínimo cue feca izói, íemo íaioimona cue llínua izói, afe dájemo naa ómoiri táijidinodicai.

16 Nai Tesalónicomo cue illa llezica, omoi diga ícaiño, fia fecáfireiga ráaniaína cue jitaicanaiína cuemo orédiomoi.

17 Fia ráaniaína cue llínoiacanamo coméciñedicue; mei íadi cue comeci jitaillafue, Juzíñamui uiécomo ómoimo aillo ii, daidicue. Iemona daií aillo omoi ofítaga raana uire maiñóritiomoi. Afemo comécidicue.

18 Mei nana jae cue llínoga. Afena cue jitaica ráaniai baimo ja llínoticue. Epafrodítodo cuemo omoi oreca ráaniai figo baite. Baimo cue jitáillena iñede; ja aillo íteza. Cuemo fia omoi oreca ráaniai iere Juzíñamuina ióbitade. Daií cuena omoi cánuado, Juzíñamui comeci jítaina finódiomoi. Aferi Juzíñamui ióbicaillano afémie áfena jeire ote.

19 Cue ínoga Juzíñamui nana omoi jitaica raana ómoimo fécaite, mei nana Cristo Jesús ebire comuítaga ráaniai Juzíñamuimo dúideza. Ie jira íemo aillo ite ráaniai izói, afe izói ómoimo fécaite.

20 Mei ñuera ebíredifue cai Moo Juzíñamuimo jaca íoicaideza. Daiítadeza.

Iraicaiño uáidonocaillafue

21 Cue dibénedo nana Juzíñamuimo jaináidino Jesucristo mámecido omoi uáidori. Cue diga ite cai ámatiaí ómoimo uai orédiaioi.

²² Nana benomo ite Juzíñamuimo jaináidino daje izói uai ómoimo orédiaioi. Romano nahíllaima jofomo itino iere ómoina izire uáidoiacadiaioi.

²³ Cai Ocuíraima Jesucristo nana ómoina ñue éziciiteza. Mai daiítadeza; jae nñe.

COLOSAS IMÁCIMO SAN PABLO

ORÉCABE

La Carta del Apóstol San Pablo a los Colosenses

Pablo Colósamo ite Juzíñamuimo ñinotino cuete

¹ Cue Páblodicue. Iemo cue nabai Timoteo diga ómoína uáidotico. Juzíñamui comeci jítaina izói Jesucristo orécamedicue. Afe orécamedicue daiácana uai, Jesucristo ñúefuena llúájitagamedicue. Cue ama izóidime Timoteo diga,

² Colosas jófuego ite féitaño ñinofrede ámatiamo bibe cuetico. Omoi daje izói Crísto jaináidimo. Cai Moo Juzíñamui ómoimo caimare erócaiteza. Afe llezica Juzíñamui dibénemo icíríoño uái illifue Juzíñamui ómoimo fécaiteza.

Pablo Jesumo ñinotino Juzíñamuimo úrite

³ Omoína Juzíñamuimo coco úrilla llezica jaca cai Ocuíraima Jesucristo Moo Juzíñamuina “Figora” daífiredicoco.

⁴ Mei Cristo Jesumo omoi ñinuana cócona ja fidítaiáiza. Daje izói Juzíñamuimo jaináidinona omoi izíruillana cócomo llotíaia.

⁵ Afe bie izói itímo, mei monamo ómoimo éenoga maiñolle raamo ñue ocuítimoiza. Afe ómoimo lloga ua uai omoi cacánamona, ñue ocuítitagaomo. Afe lloga ua uai ñuera jílona uai.

⁶ Afe daje lloga uai náganuaimo llócaillado oni aillo mónaioicaide. Ua, ríganai llizilla izói, iere jebuide. Mei daje izói afe uai omoi cacana mei, omoi cígiri aillo jebuideza. Juzíñamui caína izíruillana omoi cacana mei, afe izíruillana ua ráfueza ja omoi onónamona, afe ñúefue ómoimo aillo oni mónaitagaza.

⁷ Cai izíruiga ama Epafras bie ñuera uai ómoimo llófuete. Afémie nauí cai méfomo afe uai llúamo táijide. Ie jira afémie ómoína Cristo ñue ocuícame, mei afe llezica afémie Crísto féitaño iere ñinofredimeza.

⁸ Afémie Ñuera Joreño ómoimo comútaga cuena omoi izíruillafue cuemo llúábite.

⁹ Jira áfena cai fidíaruimona biruimo jaca fáicanocáño ómoína Juzíñamuimo úrifiedicoco. Juzíñamui comeci jítainana ñue omoi onóillena afémie jicáfiredicoco. Daje izói nana jíáforie ífoci úrillana omoi onótallena jicádico, naa Juzíñamui dibéno onógafuairi.

10 Afe bíemona cai Ocuíraima Jesumo jaináidino illa izói, ñue írediomoí. Mei afe izói omoí ille jítáiredeza. Daií omoí íllamona afémiena nágarui íóbitaitiomoí. Afe afémie íóbillaraa be ñíie: Riga llizíllajíai aillo illa izói, omoí finoca ñúefuiaina aillo omoí jebuítallena; íemo jíai Juzíñamuina jamánomo ñue omoí onóíllena.

11 Daje izói nana cai ebírede Juzíñamuimo ite ñuera ríinodo omoí ñue náireíllena afémiemo jicáfiredicoco. Daií jicáfiredicoco nana ómoímo cómuitifuiaina járitaiñeno fíaicana omoí ocuíoíllena. Daje izói caimare aféfuiaína omoí ocuíoíllena ómoiena jicádíicoco.

12 Nane daií omoí comeci náireíllamona caimare cai Moo Juzíñamuina “Iere figora” omoí daiífireíllena jicádíicue. Mei nana afémiemo dúidinomo ie fecalle zíiñona illífue ómoiena batí Juzíñamui illa úzeredinomo omoí maiñóíllena, afémie ómoína ñue finódeza.

13 Mei uáfueza, Taife ocuífírega jítifomona Juzíñamui caina jíllotate. Jílluano ie izíruiga Jító illáimana illánomo caina jóonete.

14 Mei afémie Jító tíllado, caimo ite íaífuiaí féitajano, Juzíñamui caina jíllotateza.

Cristo tíllado Juzíñamui diga ícíríñeno dájena uái itícaí

15 Afe bie cai Moo Juzíñamui jaca cíóñenamie íadi, comini cíonamie izói ie Jitodo ana bite; íemona afe Jító Juzíñamui ñíie ua izóidena caina onótate, naa ie comeci ífuiaíri. Afe Jító nana comuítaga ráaniaí baimo jamánomoidímie.

16 Juzíñamui ie Jitodo nana monamo itínuiaina finótate, naa éniemo itínuiáiri. Cíoide ráaniaí naa cíóñena raa diga, nana afémiedo Juzíñamui finoca. Mei uáfueza, daa fíéñeno, nana afe cai cíóñena ríinoredinona naa ocuídíllainíri, íemo jíai Juzíñamui abi imaci diga, dáamiedo finócaiaíoi. Nana afe ie Jitodo finoca. Daje izói afémie íena finoca.

17 Mei afe Cristo nana ráaniaí nai íñenia afémie jaca íteza. Daje izói dáamiedo nana ie finoca ráaniaí oni féiraiñeno ñue jaícina itíaiíoi.

18 Afe baimo Cristo nana afémiemo jaináidino afe ífo dainámie. Iemo nane afémiemo ínotino ie abi dainámaci. Afémie afe bie ie abi daina ínotinona zíiñona cáatatímie, meí afémie tíidinomona fueñe meine cáadimienaza. Afémie daií fueñe meine cáadimiena jaide, nana itífuiaí baimo jamánomoidímiena íllena.

19 Nana Juzíñamui zíiñona illa izói, nana afe izói Cristo íllena Juzíñamui jitaide.

20 Nane daje izói afe Cristo tíllado, Juzíñamui nana afémie comuítaganuiaina ícírafuenino dájena caimare uái illífuemo

jóoneacade. Mei uáfueza, nana bíniemo itífuiái naa comini diga, íemo jíái nana monamo itínuiári, Cristo cruzmo tíllado Juzíñamui éoiñeno dájena caimare uái itátaacade.

21 Naui diga íaífuiái omoi fínuamona Juzíñamuimona iere jícanemaci izóidíomoi. Daje llezica omoi comécido Juzíñamuina éoidinona itíomoi. Mei íadi ja birui Juzíñamui afémie diga ómoína icírafuenino dájena uái illífuemo jóonete.

22 Cristo tíizailla llezica ie abi izi cácanado, Juzíñamui daí ómoína caimare dájena uái illífuemo jóonete. Afémie bie izói finode, íaífuenidínona, daje izói níifuenidínona afémie uíecomó cai ie jóoneillena. Uáfueza, afémie bie izói finode íeiena cai íllena.

23 Bie izói uáfueña omoi íllena, fáicanocaiñeno jaca íinoredíomoi. Afe izói amena ana jica jainade riire illa izói, riire íredíomoi. Daje llezica ñuera jíllona uaina omoi cacánamona omoi maíñoça caimare ocuírillafuena fáinocainidíomoi. Afe bie ñuera jíllona uai ja náagobiaído llócaiga. Iemo afe izói afe llócaigamo cue jíái canódícue, mei afe uai llócaillena Juzíñamui jóonenocaigaeza.

Pablo Jesumo ínotino cánoitimíena jóonega

24 Birui omoi ícoínia duere cue zefuíllari íobidícue. Mei áfedo Cristo abi dáina afémiemo ínotinori nana uícodo lloga nai duere cue zefuíllana ñue ícoímo fuitáredícue.

25 Mei omoi ñue íllena Juzíñamui cuemo jóonenocaigafuedo nana afémiemo ínotino cánoitimíena jáidícue. Mei uáfueza, Juzíñamui nana comínina llóicaiga uai, afe uai jino cue llúana ícoímo fuitállena jóonenocaigacue.

26 Afe bie ñuera uai jaiái nínoímona ua biruimo comini figo onóñediaioi; diga ígímaíai záilla méífomo afe uai nai retáiruiga raa izói joide. Mei íadi ja biruimo íeiedínomo ja jino báífitate.

27 Juzíñamui ja judíoñedínomo afe bie naui báinino ite uai ñuera áillue cámafueña jino ómoímo onótaiacade. Bie báinide uai dáina, Cristo ómoímo illa llote. Iemo íco jíáíruido ñue caimare omoi illífuemo omoi ocuírillena afémie jino dénoite.

28 Cai bie Crístona jino uáfodo llotícai. Afe llezica nana comínina ñue rairuídícai. Daje izói nana ñúefuiái ñue íaíoi onóillena afémacína nana llófiredícai. Afe izói naga come Crístomo dájena jaináíllamona afémie dibénedo ñue íaíoi móonaillena llófiredícue.

29 Bie cue fuitállena, nana Cristo cuemo iga máíriedo fúirienaila izói nágarui Juzíñamuimo izire jícáfiredícue.

2

¹ Mei bífuena ómoína fidítaacadícue. Jaca ómoína iere fuirilla izóí Juzíñamuimo riire jicáfiredícue; daje izóí Laodicea jófue mo itino íena, íemo jíái nana cue uíecona cíóñedíno íena riire jicáfiredícue.

² Afémaci comeci náireillena fuirilla izóí Juzíñamuimo riire jicáfiredícue. Iemo afe comeci náireillamona conímána ñue íaíoi izíruillena riire níciduano jicáfiredícue. Mei daí dájena omoi jainaina jira, bie nauí figo báitañega uai Cristo omoi íñua mei, omoi díga íllana ñue jaícina onóredíomoi. Afe daí uáfori jaícina afémíena ñue omoi onóíllena, riire níciduano nágaruí Juzíñamuimo izire jicáfiredícue. Mei jíi, nana bie riire nícidotícue, figo ónoñega Juzíñamuí ñuera uaina ñue omoi onóíllena; mei afe báíñega Juzíñamuí uai daína dama Crístoza.

³ Mei uáfueza, nana comeci jamánomo úrillafuíai naa onóigafuíairi afémíemo ite.

⁴ Bu ómoína ebírede uáíllado bífueñeillena, nana bífuíai ómoímo llóitícue.

⁵ Cue abí omoi cígírí íñede íadí, benómona jicana izire ómoímo comécíidícue. Iemona daí cue fídía izóí dájena caímare omoi íllari íóbídícue. Daje izóí fáicanocaiñeno Crístomo omoi íñuari íóbídícue.

⁶ Jae caí Ocuífirede Jesucrístomo ñue omoi íñuamona íe lloga íodo jáiredíomoi.

⁷ Afe bie daíacade, amena riire jáinaja izóí, Crístomo riire jáináiredíomoi. Iemo jíái daje llezica jáinónide jáííllirái izóí omoi íllena, nágaruí Cristo uáíllai jeire omoi ua baimo jamánomo jeire ófireírí. Mei afe izóí llófuegaomoi. Iemo afe llezica nágaruí Juzíñamuína “Íere figora” maí omoi daífireírí.

Crístomo caí jáináínamona caí comeci cómuena méidoga

⁸ Mei bíruí ñue abí omoi ráiruíri, baimaci omoi jífueacadeza. Afémaci táínodo ífocí úrillado, daje izóí íaíoi lloga táino uáílláímo jífuebíñeno írí. Mei afémaci Cristo díbénemo íñédíaíoi. Mei jíáfodo jáíai nínomo comíní lloga táino uai díbénemo jáináídiaíoi. Daje izóí dama bínie raa díbénedo comíní comécííllafuíáímo jáináídiaíoi.

⁹ Mei íadí nana Juzíñamuí zííñona ñue ílla díeze, afe izóí Crístomo nana ñue jaícina íte.

¹⁰ Iemona Crístomo dájena omoi jáináínamona, Juzíñamuína oruíde comíní izóídíomoi. Afe Cristo nana monamo íte ocuídílláína, naa caí cíóñena ríñoredínona ocuífirede.

¹¹ Iemo nane daje izóí Crístomo dájena omoi jáináínamona ja bacano ícoí quetácano izóídíomoi. Mei íadí ua quetañegaomoi,

mei jiáifodo nanómona omoi jocoína llezica ómoimo ite íaifuemona ja jílloidiomoi. Mei ua, bacano icoi quétaja izói, omoi fiénidifuemona quetaca izói jílloidiomoi. Afe bie quetáfírena Crístona comuide.

¹² Iemo nane jiáifuemo cacáreiri. Mei omoi báutizanamona Cristo éniemo ana raia izói ja raigáomoi. Bie nanómona omoi fiéni finócafuiái titaca izói, ja fáicanocaitiomoi^{za}. Iemo Juzíñamui ite áillue ríinomo omoi ínuamona Cristo izói cómomiena afémie diga ja cáadimacina itíomoi; mei Juzíñamui dama íemo ite ríinodo Cristo tíide meine cáatateza.

¹³ Naui jiáiruido ómoimo ite íaifuiamona comeci diné tíidino izóidiomoi. Daje izói quetátañena judíuainédino omoi illa llezica, omoi fiénide óiacanafue jeire omoi úamona, comeci dine ónonino tíidino izóidiomoi. Mei íadi birui Juzíñamui nana omoi fiénidifuiái féitajano, dájena Cristo diga ómoína abido cáatate.

¹⁴ Caimo ite íaifue íballe raa izoide. Afe cai íbañenia tíiredicai. Mei íadi Cristo tíillado Juzíñamui cai íbácana záitate. Afe cai íbácana Juzíñamui fiébiñeno ñue íbaja Cristo cruzmo coráiado ácatate.

¹⁵ Mei afe llezica Cristo cruzmo tíillado, monamo ite ocuídillainina, naa cióñena ríinoredinona afémie ríinitade. Afémie uáfori íaioi illáiena báiruado, nana afémaci baimo ie jamánomoidimie illana ácatate.

Monamo ite ñúefuiaina omoi jenori

¹⁶ Mei bíemona ninó dáamie omoi güille dibénedo omoi jánana júfidoiadi, áfemo mai náfueñeno omoi iri. Daje izói omoi jírúa dibénedo ninó dáamie fiéni ómoína úriadi, áfemo náfueñeno mai omoi iri. Iemo jiái dáarie judíuai lloga ráfuiaimo eneno omoi coméciiñenado, ninó dáamie omoi jánana júfidoiadi, áfemo mai náfueñeno omoi iri.

¹⁷ Mei nana bífuiái, uire Cristo billifue dibénedo comini ñue onóillena canódeza. Mei íadi Cristo bíllamona afe cai onótatífuiái jítaiñega, mei dama Crístono nana uafue raa báífideza.

¹⁸ Iemona nino dáamie ómoína fiéniruiadi, mei afémie táinona mánaidimiena illana ómoimo ácatateza, áfemo náfueñeno omoi iri. Daje izói afémaci diga Juzíñamui abi imaci ómoína íobitafireiadi, áfemo náfueñeno omoi iri. Mei afémaci ónoñega nicai anado ciófirena raado úrifirediaio^{iza}. Afémaci jiba come comeci fácafuiaido abi iere ínofirediaioi.

¹⁹ Afémaci Crístono dájena jaináiñeno itíai^{oi}. Mei jiáifodo Cristo nana íemo ínotino ífódimie. Afe ífo izói mamécamié nana ie abi écaja izói comécina náiretajamona afe abina móonaitade. Afe izói nana ie abimo jaináidino conímamo

dájena jaináitajamona, ie abina móonaitade. Afémie Juzíñamui mamérilla izói nana bífuiái ocuífiredede.

20 Mei Cristo tíllaruimo afémie diga tíidino izói jáidiomoi; bie daiíacade nanómona omoi fiēni finócafuiái titaca izói omoi fáicanocaigaza. Afe llezica bie énie ocuífiredede cai cióñena ríinoredinomona zuitácamací izói jáidiomoiza. Iemona ¿nibái mei nai bíniemo dúidino izói ífirediomoi? ¿Nibái mei ie ocuífafuemo jeire otíomoi?

21 Dáarie bie íaiói ocuica fímaírilla uáimona bie izói daide: “Bie riñeno iri,” iemo jiái “Afeniaina güiñeno iri,” iemo nane jiái “Baie jetáñeno iri,” daide.

22 Nana bie rairuúllafuiái bie éniemo ite jétamona fúioicaite güílleniaino dúide. Jira aféfuiaimo náfuenidiomoiza. Nana afe íaiói ocuica uaillai fia jiba comini daina uaillai. Daje izói fia jiba comini llófuega.

23 Mei uáfueza, afe bífuiái báitafuiái izói cacáreide, mei afe ocuídino, “Bie cai daina izói monamo itínona mai omoi caimátaífireiri” daií daidíaióiza. Daje izói fia comini daina comécina mánaidinona ómoína oréacadiái. Iemo jiái comini íaiói abi táinona duere zefuítatíai. Mei íadi nana bie íaiói ocuífafuiái cai comécimo ite fiēnide óiacanafuiái rairuúllena canóñede.

3

1 Iemona, Cristo diga meine abido cáatagamaci omoi illa jira, mai mei mona dibénemo ite raa omoi jenori. Mei afénomo Jesucristo Juzíñamui nabézimona illáimana íteza.

2 Daje izói mona dibénemo ite raamo comécillano afemo omoi járitaífireiri. Mei jiáífodo bíniemo ite ráfuiaimo izire comeci uitáñeno omoi iri.

3 Mei Cristo tíllaruimo afémie diga jae tíidinona jáidiomoi. Jae omoi jaiái fiēni finóacagafue titaca izói afe omoi fáicanocaiga. Iemo ja birui Crístomo dájena omoi jaináinamona omoi uáfueña cáatagano; iemo jiái Juzíñamui dínomo rairuícamoí, mei Cristo daje izói Juzíñamuimo dájena jaináideza.

4 Dama Cristo cai uáfueña cáatagano. Iemo afémie cíocaille llezica, afémie diga cíocaitíomoi. Afe llezica aféniemo ite jamánomo ebírede ñúefuiaimona ómoíena máíñoitíomoi.

Cai jaiái illafue méiduano cómfuedo jáiredicái

5 Ie jira nauí bie éniemo omoi jainaina jira, ómoímo diga fiēni óiacanafuiái ite. Aféfuiaí titalle izói mai omoi fáicanocairi. Naga áinidímie ringo diga jaca iñeno o iri. Iemo jiái, áiredímie ie áíñedingo diga jaca iñeno o iri. Iemo daje izói jiáie cómemo

íai fúiaido coméciñeno omoí iri, íemo jíai omoí abímona comuide jiruífúena omoí finóñeno iri. Daje izóí omoí comeci fieni óiacanafúena jeire oñeno omoí iri. Iemo nane jíai e cómemo úradoiñeno omoí iri, mei úradoifiredimie diga raa óiacanamona jánaraimo caimátaidimie izóideza; Juzíñamui ífúiai baimo jamai bínie raana izíruiteza.

⁶ Ie jira nana bífúiaimona íemo cacáñedinona Juzíñamui iere duere finófirede.

⁷ Iemo jaiái Crístomo omoí íinoñena llezica, nana bie izóidifúiai finófirediomoí.

⁸ Mei íadi ja birui nana bie fáicanocairi: Jáimamo icíriñeno omoí iri, íemo rírede uaillai bumo lloñeno omoí iri. Daje izóí jíai e fiénidifúiai finóñeno omoí iri. Iemo jíaima jánana úriñeno omoí iri. Daje izóí jíaima zanóllena fiénide uáillaído iaire úriñeno omoí iri.

⁹ Conímamo táinona lloñeno omoí iri, mei omoí jaiái fieni illafue jae méidogaza. Daje izóí nano omoí finófirega jae fáicanocaigaza.

¹⁰ Iemo ja birui comue iniroi jita izóí ñue illáfúena ja méidotio moíza. Iemo afe comue illafue comuítatimie Juzíñamui. Ie jira ie illa izóí afémie caina cómuena finótacana uite. Iemona afémiēna ñue ícoimo ónoitícaí.

¹¹ Afe jira afe cómomaci judío ímiēna ie íllana náfuenidiaíoi. Iemo jíai judíoñedimēna ie íllana daje izóí náfuenidiaíoi. Iemo jíai afémaci bacano quetácamiēna ie íllana náfuenidiaíoi; daje izóí quétañegamiēna náfuenidiaíoi. Afe izóí afémaci onínemaci íllana, íemo jíai onóñedino íllana, íemo jíai izire ocuífíregano íllana, íemo jíai ócuifinigano íllana náfuenidiaíoi. Mei jíaífodo afémacimo Cristo iere jamánomo ráifinamona dama afémiemo náfuefirediaíoi. Mei Cristo naga íemo ínotinomo ífiredeza.

¹² Iemona bífúemo cácarei: Juzíñamui ómoína izíruite. Izíruillano afémie ómoína nizede ie íaifuenide comínina omoí íllena. Mei ie jira bie ñúefúiai izóí omoí ífireiri: Jáimacimo dúe caífireiri. Jeruíñeno canófiredimēna omoí iri. Comécina mánaidimēna omoí iri, cámafúiaído úrifireiri, járidoñeno omoí iri.

¹³ Conímamo jaca járidoñeno fáicana omoí canori. Daa come jíaimamo icíriadi afémiemo ñúefuedo omoí jicari, áfedo icírafue záillena. Omoí íaifue ícoínia Cristo oni féitaja izóí, afe izóí jíaimie omo fieni finóadi afe ícoínia oni o féitafireiri.

¹⁴ Nana bífúiai emódomo iere omoí izíruífíreiri. Mei afe izíruillafue cómena dájena jáináitateza, jáimaci diga. Afe daií jíaimacina cai izíruillamona, nana afe ñúefúiai jáícina caina finótate.

¹⁵ Iemona Cristo comuítaga caimare uái illafue omoí ífoci

úrillana ífoiteza. Mei dáamaci izói íemo cai jaináinamona afe bie izói cai íllena Juzíñamui caina uáidoteza. Afe llezica jaca Juzíñamuina “Figora” omoi daiífireiri.

¹⁶ Mai mei nana omoi comécido Cristo daináuai jeire órediomoiza. Afe mei aféuai ñue omoi onónamona conímana omoi llófueri. Iemo daje llezica áfedo conímana ñue onóicana comécina omoi náiretari. Iemo jiái Juzíñamui íóbitalliruai omoi rófireiri, jiáie íena caimátailliruai diga. Daií ruano omoi comécido Juzíñamuina “Figora” omoi daiífireiri.

¹⁷ Mei jií, nana omoi jetáacaga raa, íemo jiái ómoimo ocuica caimánidifue diga, naa omoi daiíllifuiari cai Ocuíraima Jesús mámecido omoi finófireiri. Afe llezica Moo Juzíñamuina afémiedo “Figora” omoi daiífireiri.

Crístomo ínotinomo dúide comini diga finófirega uai

¹⁸ Daje izói bie jiái lllólfuemo omoi cácarei. Íníredingotiai, mai omoi ínítiai anamo ñue ífireiri, mei Crístomo ínotinguaina omoi illa jira, afefue ínoredeza.

¹⁹ Daje izói ínítiai omoi áitiaina ñue izíruiri; afénguaina fiéniruiñeno omoi iri.

²⁰ Uruiai, omoi móotiaina nágafuemo omoi cacáreiri, mei afe daií omoi íllamona cai Ocuíraima íóbide.

²¹ Móotiai, omoi úruiaina ícidoñeno omoi iri, afémaci jacinállamona minícana finónide daií íaioi íñeillena.

²² Ocuífiregano, bíniemo ite omoi ocuídínona nágafuiaimo ñue omoi cacáreiri. Daa afémaci ñue ómoimo comécillena afémaci fia eroina llezica ñue cacáreíñeno, mei íadi jiái daje izói afémaci éroiñena llezica ñuera comécido omoi cacáreiri, mei Juzíñamuina ñúefuedo jacíruiticaiza.

²³ Daje izói nana omoi finóacaiga raa, ñúefuedo finori. Comini dibénedo izói táijiñeno, Juzíñamuimo o táijina izói omoi finori.

²⁴ Mei ja onódiomoiza, Juzíñamui ómoimo lloga omoi jiríddolle ziiñona illifue afémie ómoimo fécaiteza. Mei uáfueza Cristo ocuícamacina maméidiomoiza. Afémie omoi ua Ocuíraima.

²⁵ Mei íadi fieni finódimie afe íbana ie fieni finua dieze duere finóbite. Mei Juzíñamui jaca dáamie oni énenorie maméñede. Nana daje dieze jaícina duere fínoite.

4

¹ Ocuírani, omoi anamo ite ocuífireganomo ñue jaícina omoi eroiri. Afémaci jitaica raamo uibóicana omoi ocuífireiri. Mei monamo omoi Ocuíraima ítena onórediomoiza.

² Mai fáicaiñeno Juzíñamuimo omoi úrifiereiri. Jaca afémiemo cáaina izói úriri. Afe llezica “Figora” Juzíñamuina omoi daiífireiri.

³ Daje izói cáiena Juzíñamuimo omoi jicáfereiri, cai Ocuíraima uaillaí ñue cai llócaillena. Juzíñamui bie izói caina itátallena

omoi jicari. Daje izói naui comini figo ónoñega Cristo dibénedo uai, uáfori cue llófuellena omoi jicari, mei dai llófueredicueza. Naui afefue cue llua jira ja birui llavébidicue.

⁴ Mai omoi Juzíñamuimo jicari, bie ñúefue cuemo dúina izói, onóreoicana jino cue llóllena.

⁵ Crísto mo ínoñedino cígimo jaca ñue onódime izói omoi ífireiri. Nágarui Cristo illafue afémacimo raire omoi ácatafireiri.

⁶ Nágarui cáimafuiaido úriredio. Daje izói jaca ñue oíacanado o úriri, illa dígamie uai ñue o óllena.

Iraicaiño uáidufue

⁷ Cai izíruiga ama Tíquico, cuemo birui itifue ómoimo lluájite. Afémie fáicanocaiñeno iere cue canófiredimie. Daje izói afémie cai Ocuíraima cue diga ocuífregamiena ite.

⁸ Ie jira afémiena ómoimo óreiticue, birui cai illafue ómoina onótallena; íemo jíái omoi comeci náiretallena.

⁹ Afe llezica jíáime Onésimo mámeciredimie Tíquico diga jáite. Afémie cai izíruiga ama, íemo jíái iere ínofiregamie. Afémie ómoimaci ie. Afe íaillinoi nana benomo ífiredifuiái ómoimo llóitiaillinoi.

¹⁰ Iemo cue llavébilla llezica cue nabai Aristarco, uaillai ómoimo orede. Daje izói Bernabé enaize Marcos uaillai ómoimo orede. Marcos dibénedo jíáie lluáfuiái ja onódiomoiza. Afémie omoi méiñuaiadi, caimare íena omoi uáidori.

¹¹ Iemo jíái Jesús ómoina uáidote. Afémie jíái Jústona mámeciredimie. Juzíñamui illaíma illano dibénedo cue táijina llezica, daa afe bimaci judíuaimona Crísto mo ínotino cue canódino. Afémaci iere daa cue íóbitadino.

¹² Iemo jíái Epafras uaillai ómoimo orede. Afémie ómoimaci ie. Daje izói Cristo ocuífregamie. Afémie ómoiena jaca izire Juzíñamuimo jicáfirede, fáicanocaiñeno Juzíñamuimo omoi ínollena. Daje izói Juzíñamui dibénedo ñue omoi móonaillena íemo jíái nana Juzíñamui comeci jítaina izói jáicina ñue omoi finóllena, afémie Juzíñamuimo jicáfirede.

¹³ Afémie iere ómoimo comécillana uaina nabáifiredicue. Daje izói afémie jíái Laodicea jofue comínimo iere comécifirede, naa Hierápolis jofue comíniri.

¹⁴ Iemo jíái izíruiga manóriraima Lucas uai orede, daje izói Demas.

¹⁵ Iemo jíái Laodicea jófuego ite ámatiaí uáidori. Daje izói Ninfas daínámie omoi uáidori, naa ie jofomo gairífirede ínotino diga.

¹⁶ Bie rabe omoi nana facádua mei, Laodicea Juzíñamuimo gairíracomo facádollena omoi oreri. Daje izói Laodicéamo cue oreca rabe omoi diné dúciadi, nana omoi facádori.

¹⁷ Jiái Arquípomo lloiri: “Mai cacai, Juzíñamui omo jóonega ie táijina mai ñue jaícina o fuitari,” daiíri.

¹⁸ Cue Páblodicue. Afena uafue daiíllena, bie uáidua uai dama cue ónoído ómoimo cueticue. Onóitíomoiza, cue mei llavébidicueza; ie jira Juzíñamuimo cue dibénedo úriri. Juzíñamui ñue ómoído eróiteza. Mai daiítadeza. Jae ñie.

NANOIDE SAN PABLO TESALONICA IMÁCIMO ORÉCABE

Primera Carta del Apóstol San Pablo a los Tesalonicenses

Tesalónicamo ite ñnotimacimo Pablo ie nabáññiari rabe cuetíaioi

¹ Cue Páblodicue. Bie rabe Tesalónica jófuego ite Juzíñamui gairide ámatiaimo cueticue. Benó cue diga ite cue nabai íaillinoi Silvano Timoteo diga dáabemo cai uai cueticue. Moo Juzíñamui dájena jaináidiomoi. Daje izói cai Ocuíraima Jesucristo dájena jaináidiomoi. Cai Moo Juzíñamui ézicigafuego caimare omoi iri. Daje izói Juzíñamui fecaca comeci ñue uái illáfuego omoi iri. Afe izói ie jító cai Ocuíraima Jesucristo comeci ñue uái illáfuego omoi iri.

Tesalónica imaci íaioi Jesumo ñnuafue ñue jino ácatatiaioi

² Nana ómoiri Juzíñamuina “Figora” daiñfiredicai. Daje llezica Juzíñamui cai úrillamo nana ómoína uibíoidicai.

³ Cai Moo Juzíñamui uiecomo ómoína uibíoidicai, jamánomo ñnuafuedo omoi táijina jira. Afe llezica aillo izíruillafuedo comínina canócana tájifirediomoi. Ie emódomo cai Ocuíraimamo omoi úñnuafue jaca fáicanocaiñediomoi.

⁴ Cai ámatiai, Juzíñamui ómoína izíruite. Afe Juzíñamui nizécamacidiomoi onódicai.

⁵ Meita naui jíllonafue ómoimo cai lluaíbillaruido aféfuena fia daina uáillaído lloñédicai, mei íadi Ñuera Joreño ríinodo lloticai. Daje izói afefue uáfuena ñue cue onóigamona áfena uai jizíñeno jino ómoimo lloticai. Omoi cígido cai ñue illáfueña, áfedo omoi comeci ñúeillena onódiomoi.

⁶ Omoimo cai jino cíotaga illafue izói ja dani ñue macádiomoi. Daje izói cai Ocuíraima Jesucristo maca izói macádiomoi. Afe llezica cai llogáuaina ñue jeire otíomoi. Ua Ñuera Joreño fecaca cáimafuedo afe uai jeire otíomoi, afefue ícoínia duere finócaomoi íadi.

⁷ Iemona ñuera illafue jino cíotatinona íficaidiomoi. Ua nana Macedonia éniemo ite ñnotimacina, daje izói Acaya éniemo ite ñnotinona fidítatiomoi.

⁸ Mei jira Ocuíraima Jesucristo llogáuai ómoimona nana Macedóniamo énie Acaya énie diga jica jalleide. Ie mei afe baimo Juzíñamui omoi ñnogafue jae náganíaimo jica jalleide. Ie jira jae cai jíáifodo daiíllifue íñede.

⁹ Mei afeno imaci omoi ñue caina llínuaufue llotíai. Ie emódomo jánaraimo omoi ñnuaufue fáicanocaillano caade Juzíñamui omoi ñnollena llotíai. Afe ua caade Juzíñamui omoi como fueñe táijinafuedo úritíai.

¹⁰ Ie baimo tállanomona Juzíñamui cáataga Jitó, monámona meine bíllena ie omoi úíñuaufue llotíai. Afe meine abido cáataga Jesús, cai jállotarama; ua uire biite cai iere duere finóllifuemona, afémie caina jállotaite.

2

Pablo Tesalónicamo táijinafue

¹ Amatíai, nauí ómóido cue illafue fia táinomó baiñede, dani afena ñue onódiomóiza.

² Afe cue billa úicodo Filipos jofue comíni caina báíñota duere caina finódiaí. Mei íadi Juzíñamui cai cánuamona afe ñue jállonafue uáfodo jacíruiñeno ómóimo jino llotíai, jáimaci caina uáitaoidiaí íadi. Afena onódiomó.

³ Cai comeci jífueinamona ómóimo cai llogáfuaí lloñédicaí. Daje izóí fiení ómóina maméñédicaí. Daje izóí ómóina jífueacañédicaí.

⁴ Omóimo cai llogafue jáifodo joide. Cai figomíellena Juzíñamui facátagamacidicaí. Nue jállonafue uai Juzíñamui ómóimo caina llotátate. Mei jira daí ómóimo jino llotíai. Comíni baimo Juzíñamuina ióbitadicaí, afémie cai comeci ífuaí eroille jira.

⁵ Ebírede uáillaido ómóina fia bífueñédicaí. Afena onódiomóiza. Iemo fia úcube cai óllena táinofuaína lloñédicaí. Juzíñamui bífueimo uai nabáiraimana afefue uáfuellena.

⁶ Comínina ñéfuaína caimo nitáañédicaí. Mei íadi omoi onódiomóiza; daje izóí jáimaci onode, cai Cristo orécamacidicaí. Afemona ocuilla riino caimo ite, omoi cai ocuállena. Aféfuemo ómóina izire cacáreitareidicaí. Mei íadi afe izóí ómóina ocuñédicaí.

⁷ Jáifodo ómóina icíñeno fiaicana omoi cígimo llófueticaí. Ua úrue ei úruiaí comúitaja úíñua izóí, ómóina dúecaillano izíruíticaí.

⁸ Omóina jamánomo izíruíticaí. Iemona Juzíñamui lloga ñéfue ómóimo llóllena ñue ja finóbídicaí. Afe baimo nana cai comeci ífuaí ómóimo fecáacadicaí, ómóina iere cai izíruillamona.

⁹ Amatíai, nauí cai jitaica raa cai óllena izire cai táijina, uibídiomó. Ua daí riire cai níciduana afemo uibíoidiomó. Mona naio diga táijifiredicaí ómóimona bu abina jafue fínoñeillena. Mei afe llezica Juzíñamui lloga ñuera uai ómóimo jino llotíai. Afe uaina jai ñnotimacidiomó.

10 Jaca omoi uíe como íaifuenino macádicai. Daje izói buna jífueñoeno macádicai. Nana omoi Juzíñamui diga áfemo uai nabáifiredi omoi. Daií buna caimo nífuena nitánidiaioi.

11 Mei illa dígamie omoi comécina náiretadicaí, onódi omoiza. Daje izói úrue moo ie úruemo dúecaillano fíraja izói ómoína fíradicaí.

12 Juzíñamui íeiena omoi maméinamona omoi jaícina nágarui ñue macállifue jitáirede. Afefue nauí ómoimo ocuídícue. Juzíñamui ie náamataganona jíirite ie illáimana illánomo omoi jáillena, afe llezica Juzíñamui ebírenafuena omoi onóillena.

13 Bífueri iere Juzíñamuina “Figora” daiífiredicaí. Cáimona omoi cacana Juzíñamui uai dibénedo, “Afe uai jiba come uai” daiíñedi omoi. Mei íadi aféuai illa izói, dama Juzíñamui nahí uai jeire otí omoi. Afe Juzíñamui uai ja omoi ínotino comécimo ñúefuiaina déioicaide.

14 Amatiái, cácarei. Omoi comínimona duere omoi finóbiadi, jae judéamo íte Juzíñamuimo gairídino izói íficaidi omoi. Afémaci Jesucrístomo daje izói jaináidiaioi; mei íadi íaioi éniemo íte judíuaimona daje duere finóinafuemo duere zefuúdiaioi omoi zefuilla izói.

15 Afe judíuai duere finódino cai Ocuíraíma Jesuna fatíaioi. Jaiái ninomo daní íaioi Juzíñamui uai jino llórainí fatíaioi. Afe judíuai dáarie jófuemona caína jino jíúdiaioi. Afémaci Juzíñamuina íóbitañediaioi. Daje izói nana comínina uáítaoidiaioi.

16 Mei judíoñedinomo bifue cai llóiacaniadi caína rairuíacadiaioi. Daje izói aféfuemona afe judíoñedino jíllollena, cai lloi dáí caína rairuíacadiaioi. Afe ícoínia íaioi fíenidífuiaí aillo ofíoicaide. Mei íadi birui ícoímo aféfuiaí ícoínia Juzíñamui íaioína jamánomo duere finode.

Pablo meine Tesalónica comini eróziaiacade

17 Amatiái, ómoimona nano níe dino oni jáidicaí. Mei conímána cíóñedicaí íadi ómoimo comeci facáoidicaí. Afe jira izire ómoína cíoizaíbiacadicaí.

18 Omoi illánomo cai jáillena mamériticaí. Cue dama diga ícaíño iere jáiacadícue. Mei íadi naga cai jáiacanaruillaído Taife llótaidogacaí.

19 Mei ie jira ¿Minica mei cai úíñoigafuena? ¿Minica cai íóbillafuena? ¿Minícamona cai caimátaillafue comuide? ¿Minícamona cai comeci zuitáinafue comuide? Mei cue llófuega Juzíñamui uaina ñue ínoti omoiza. Ie jira cai Ocuíraíma Jesucrísto billíruimo daní omoi, daa bie cai comeci íóbillafuena.

20 Uáfueña, omoi cai comeci zuitáinafuena, cai cáimafue diga.

3

1 Mei jira afe baimo are cue úiñonidicue. Ie jira benó Aténasmo dama cue illífueña mamériticue.

2 Afe llezica cai ama Timoteo ómoína eróizaitadicue. Afémie Juzíñamui ñue táijitagamie. Afémie cai diga Jesucristo ñúefue jino llúamo táijide. Omoi ñnogafuemo ómoína ñue riire naire itátaite.

3 Iemona ómoimona buna baie duere omoi finóinamona omoi ñnogafuena féitañede. Mei afe bie zúufuiaido duere cai finóbille jitáirede. Afena onódiomoiza.

4 Afe emódomo nauí ómoiri cai illa llezica afe duere cai zefuillifue ómoimo lloticai. Afe daií ómoimo ja íficaide. Ja onódiomoiza.

5 Ie jira áfena ja iere cue ocuñenamona, omoi ñnogafuedo mácajana jicánotadicue. Mei Taife ómoína fiénidifuemo baiitate izóinamona cue comeci jacíruiode. Daií cai táijina táinomo jifánofide izoide.

6 Mei íadi ja birui Timoteo Tesalónicamona meine dúcide. Afémie ñue omoi ñnuafue izíruillafue diga cai lluáibite. Caina izíruillano caimo omoi uibóinafue Timoteo lluáibite. Ie mei ómoína cai cióacana izói caina iere cióacadiomoi; daií Timoteo caimo lluáibite.

7 Iemona aillo duere cai finóinafue illa llezica omoi ñnogafuedo ñue jaícina omoi mácajana fidídicue. Aferi cai comeci iere ñue firazite.

8 Cai Ocuíraimamo ja birui ñue jaináidiomoi. Afena cai onónamona caimo cómfuena comuide.

9 Ua ómoiri iere ióbidicai. Juzíñamui uiécomo caina iere ióbitadiomoi. Afe aillo cámafueri Juzíñamuina ibana “Iere figura” fáicanocaiñeno daiíredicai.

10 Mona naio diga conima uiécomo eróicana ómoimo cai úrillena Juzíñamuimo izire jicádica. Afe llezica omoi ñnogafuemonai ñue fíebide uai jaícina cai fuitállena Juzíñamuimo jicádica.

11 Omoi cai eróizaillena daa cai Moo Juzíñamui naa cai Ocuíraima Jesucristori cai canóllena jitáidicai.

12 Omoi ñnogafue oni móonaillena cai Ocuíraimamo jicádicue. Afe izói conímana omoi izíruillena jicádicue; daje izói naa jiáimaciari. Omoína cai izíruilla izói mai nana jiáimacina omoi izíruiri.

13 Omoi comeci jaícina jóonellena jicádicue. Daje izói cai Moo Juzíñamui uiécomo omoi nífuenillena ñue finócafue jicádicue. Iemona cai Ocuíraima Jesús billíruimo méairuñeitiomoi. Aféruimo nana íemo jaináidino afémie diga bené biite.

4

Juziñamui ióbitade illafue

¹ Cue ámatiai, omoi cácarei. Birui cai Ocuíraima Jesús mámeçido izire ómoimo jicádicue. Daje izói izire ómoina llétaiticue; nauí ómoimo cai lloga Juziñamui ióbilla illafue daií omoi iri. Aféfuena afe emódomo aillo omoi móonaitaocairi.

² Cai Ocuíraima Jesús riífuedo ómoimo lloga llétafuena onódiomoi.

³ Juziñamui dama ie nabaina finócamacina omoi jáillena afémie jítaide. Ie jira nana omoi jiruíreño iri. Dama nahí ai diga illa figona.

⁴ Ua Juziñamui eróicana áireri. Afengo ua mei íena jámairuñeno íena o izírui.

⁵ Juziñamui onóñedino fia íaiói comeci fieni óiacanafuedo áirenaza, mei íadi afe izói omoi iño iri.

⁶ Daje izói izire ómoina dáititcue, o abi come ie áina jífueta bairóño o iri. Daje izói o abi come ie inina jífueta meríño o iri. Afe bie izói itinona cai Ocuíraima Jesús, afémacina iere duere fñoite, ómoimo cai llua izói.

⁷ Juziñamui íaifuenidinomo nágarui cai íllena caina ocuide. Afe daií ie nabaina finócamacina cai íllena ocuide.

⁸ Ie jira bie llogafue jámairuitimie jiba cómena jámairuñedeza; mei íadi Juziñamuina jámairuite. Daje Juziñamui ie Ñuera Joreño caimo fecaca. Afe bie Ñuera Joréño Juziñamui íeiena caina ñue finode. (Afémie íena ñue finódogacai.)

⁹ Juziñamui ómoina llófuete conímama omoi izíruillena. Ie jira jíaie ámatiaina omoi izíruille cue llóllena jítáinide.

¹⁰ Mei jii, afe daií nana Macedonia éniemo ite ámatiaina ñue izíruiomoi. Mei íadi omoi izíruillafue aillo móonaioicallena izire jicádicue.

¹¹ Caimare ñue illáfuemo mai ríire omoi iri. Daje izói dani omoi nícidogafuiai izire omoi llínori. Nauí omoi cai llua izói mai ñue izire omoi táijiri.

¹² Afemona onínemaci omoi uáillaimo ñue cacáritiaíoi. Afe llezica omoi ñue táijinamona minícana jítaiñeitiomoi.

Cai Ocuíraima billafue

¹³ Amatai, tíidino íficaillafuena omoi onóñenana jítaiñedicue. Aféfuena omoi fidíadi zúucaíñeitiomoi. Jíaie cáillfuemo coméciñedino zuure jáitiaíoi.

¹⁴ Afe Jesús tíllano meine abido cáanafuemo cai ínua izói, afe daje izói Juziñamuimo ínnotino tíidiaíoi íadi, Jesucristodo Juziñamui íaiói cáatallifuemo ínnoticai.

15 Ie jira cai Ocuíraima cai llófueinafue ómoimo llóiticue. Afémie billíruimo cámona cáadimaci tíidimacimona uícoficaiñeticai.

16 Mei dama cai Ocuíraima ríire ocuille uaido úricana monámona ana biite. Afe llezica Juzíñamui abi imaci illaíma uai cácaite. Daje llezica Juzíñamui ficírede vudugoi cácaite. Iemona Jesucrístomo ínotino tíidimaci nano fueñe cáaitaíoi.

17 Afe mei aféruimo caade ínotino afe cáataga tíidino diga daane úillie cígimo itábicaíticai. Ua dinomo nana dánomo itábicaíticai, cai Ocuíraima Jesucristo diga caífo táífomo cai cíozaiíllena. Afemona cai Ocuíraima diga jaca ua ninomo zííñona ííticai.

18 Ie jira búaido conímana caímare omoi fírari.

5

1 Mei íadi afe íirairuillaído cue ómoimo cuelle jítaínide.

2 Afe afémie billíruina ñue onódiomoíza. Omoi due jiza úíñoillíruimo cai Ocuíraima dúciite onódiomoíza. Ua merírizaíbitímie naío billa izói biite.

3 “Comeci ñue uái illafue nana caímo ite. Cai jacíruíllafue íñede,” comini daina llezica niné íaíoi táinocaíllífue ónonino íaíoimo raíre zúite. Ua ríngo úrue jocóacana llezica ero izírena izói, afe táinocaíllífue íaíoimo zúite. Afemona jaca buna oni jíllonide.

4 Mei íadi, ámatiaí, omoi cácareí. Jítífomo íñédiomoíza, cai Ocuíraima bíllemo jácicaíñeítíomoíza. Ua, meríriraíma jacínaílla izói jácicaíñeítíomoíza.

5 Mei nana omoi úzefomo jaínáidinodíomoi. Daje izói monánemacídíomoi. Naío imáciñedicai; daje izói jítfío imáciñedicai.

6 Ie jira jaca íninídímacídícaí jíáímací ínía izói. Afe jira cai abína ñue onónafuedo cáaoíredícaí.

7 Ínídino jaca naío ínídíaoí. Jífaííredíno jaca naío jífaííredíaoí.

8 Mei íadi monánemacína cai íllamona abína ñue cai onónafuedo cai íllana jítaírede. Jesumo cai ínuafuedo abína daní ríidoredícaí. Daje izói jíáímana cai izíruíllafuedo abína daní ríidoredícaí. Ua fuíríraíma íe jogóbemo jítaíca llojécodo íe abi ríidua izói, afe izói bífuíaido daní cai abína ríidoredícaí. Afe jíáífue, cai jíllóíllemo cai úíñoínaíue ua ífomo jítaíca ríidua llojeco izoide. Afedo fuíríraíma íe ífona ríidote.

9 Mei cai duere finóbíllena Juzíñamui caína maméñede. Mei íadi cai Ocuíraima Jesucrístodo jíllonafuemo cai dúcínaína Juzíñamui caína mamede.

10 Jesucristo cairi tíide daane afémie diga cai íllena; ua daje izói cai caadi cai tíadi, afémie diga iticai.

11 Ie jira uáillaido conímána omoi náiretari. Afe izói mai dani omoi comeci riíretari. Ja birui afe bifue omoi fínua izói, baimo omoi finóicairi.

Pablo ámatiai cáimafuedo lletade

12 Amatai, omoi cígimo Juzíñamui uáillaido táijidino mai uaimo ñue omoi cacáreiri. Daií izire jicádícue. Mei afémaci cai Ocuíraima Jesucristo uai ómoína jeire otátatiaioi. Jesucristo mámedido ómoína lletádiaioi.

13 Iaiói caimo táijnamona, íaiói dáinana ñue cai cacáreillena jitáirede. Daje izói íaioína cai izíruillena jitáirede. Conima comécina omoi jacíruiñeno iri.

14 Daje izói, ámatiai, ómoimo jíáie uai jóonenocaidícue: Afe uailai daií bie izói ite. Táijiacañedinomo íaiói táijilleza riire omoi lloíri. Comécina náinidinona mai omoi náiretari. Juzíñamui uai como jabo ínotinona mai omoi canori iere íaiói ínollena. Naga cómemo o comeci jaridoñeno mai omoi úriri.

15 Dámie fiéni omoi finóadi afe iba úamona abi omoi rairuiri. Mei abido dájeicana jíáfodo ñue omoi finori. Conímamo ñue omoi finori. Afe omoi finóllifue izire omoi jenori. Daje izói nana jíáimíiaido ñue omoi finori.

16 Jaca caimare omoi iri.

17 Fáinocaiñeno Juzíñamuimo úriri.

18 Nágari ómoimo íficaide raana, mai Juzíñamuina “Figora” omoi daiíri. Mei Jesucristomo ínotimacina cai íllamona, afe izói cai daiífirenana Juzíñamui óiacade.

19 Juzíñamui Ñuera Joreño cómemo úritallifuenta rairuíñeno omoi iri.

20 Juzíñamui úritagamíai llogáfuenta jámairuíñeno omoi iri.

21 Nana daináfuiái omoi facátari Juzíñamui llogafue iéniadi onóillena. Facátajamona ñúefuenta jeire omoi oíri.

22 Nana figóñedifuemona mai oni omoi iri.

23 Ja birui Juzíñamuimo jicádícue. Juzíñamui cai comeci ñue uái illafue caimo fecáfírede. Daje Juzíñamuimo, nana omoi ñue íeiena maméillena íemo jicádícue. Daje izói benómona cai Ocuíraima Jesucristo bíllemo, Juzíñamui omoi joreño, omoi comeci, omoi abi diga, nana jaca íaidoñeno ñue úíñollena jicádícue.

24 Omoi Ocuíraima Jesús dáinana jaca oni jíáiuaimo únide. Afémie nana bífuiaina dúcitaite.

Iraicaiño uáiduano ézicite

25 Amatai, mai Juzíñamuido caimo omoi jicáfíreiri.

26 Ñue cáimaduano nana ámatiai omoi uáidori.

²⁷ Cai Ocuíraima ríifuedo ómoimo uai jóonenocaidicue bie
cuegabe nana ámatiaimo jino omoí facádollena.

²⁸ Cai Ocuíraima Jesucristo ómoína ñue éziíteza. Jae nñe.
Mai, daiítadeza.

MÉIFODO SAN PABLO TESALONICA IMÁCI MO ORÉCABE

Segunda Carta del Apóstol San Pablo a los Tesalonicenses

Tesalónicamo ite Juziñamuimo ñnotimacimo Pablo ie nabáiñiairi rabe cuetiaioi

¹ Cue Páblodicue. Bie rabe Tesalónica jófue mo ite Juziñamuimo gairide ámatiaimo cueticue. Benó cue diga ite cue nabai íaillinoi Silvano Timoteo diga dáabemo cai uai cueticue. Cai Moo Juziñamuimo jaináidiomoi. Daje izói cai Ocuíraima Jesucristomo jaináidiomoi.

² Ñue cai Moo Juziñamui ézicigafuiaimo omoi iri. Daje izói Juziñamui fecaca comeci ñue uái illáfuemo omoi iri. Cai Ocuíraima Jesucristo fecaca ézicigafuemo daje izói caimare omoi iri, ie comeci ñue uái illafue diga.

Jesucristo billa llezica, Juziñamui éniemo ite fiénidinona duere fñoite

³ Amatiai, ómoiri Juziñamuina “Iere figura” daiífiredicai. Daií ómoína cai daiíllifue ñue jaícina jóide, omoi ñnogafue oni aillo móonaioicaila jira. Dani conímaiaína jamánomo ñue izíruioicaidiomoi. Iemona áferi Juziñamuina “Aillo figura” daiífiredicai.

⁴ Ua omoi iere ñnogafue jiáie Juziñamuimo gairídinomo aféfuere ióbioicana úriticai. Jiáimaci, Jesumo ñnoñedino, jacire omoi duere finóllena racádiaioi. Mei íadi afe duere omoi zéfuillafue cigiri, ñue comeci jaríreiñenafue jino ciótatiomoi naa ñue omoi ñnogafuiairi.

⁵ Ja duere finótagamacidiomoi, mei íadi Juziñamui ómoimo ñue comeci de ie illáimana illíruimo ñue nífuenino omoi dúciillena. Bífue mona Juziñamui jicánuafue ñue jaícina jóinana jino náiraimo ciótate. Afe Juziñamui illáimana illíruido duere finócaomoi.

⁶ Mei Juziñamui ñue jaícina finódime, omoi duere finódino ibana duere íaioína finóallena.

⁷ Ua cai izói duere finócamacidiomoi, mei íadi Juziñamui cai izói ómoína caimare ocózinaitaite. Ua cai Ocuíraima Jesucristo bíniemo cíocairuimo, afémie caina caimare ocózinaitaite. Aféruimo afémie ie jamánomo riírede abi imáciri monámona cíocaite; ua réiciai izoide cigido cíocaitiaioi.

⁸ Juziñamuina onóacañedino Jesucristo íaiõina duere finótaibite. Daje izói cai Ocuíraima Jesucristo ñúefuena jeire óiacañedino duere finótaibite.

⁹ Nana afe fiénidimacina jaca ninomo jilloñoeno duere íaiõina finótaite. Ua cai Ocuíraima uíecomona jica ninomo dótaite. Afémie ebire illánomona jica ninomo íitiaioi. Ie ríinona ónoñeitiaioi.

¹⁰ Aféruido Jesucristomo jaináidino íena “Iere figomie” dáitiaioi. Daje izói nana ie uaimo ñnotino íena caimare íóbtaite. Ja ómoimo cai llogáfueña ñue ñnotiomoiza.

¹¹ Bífue jira ómoiri Juziñamuimo comeci úrifiredicai. Omoí ñífuenino illafue Juziñamuimo jicáfiredicai, Jesucristo jírígamacina omoí illa jira. Daje izói nana omoí comeci jítaina ñue illifue, ñue ícoimo Juziñamui ríinodo fuitállena jicádicaí. Afe izói Juziñamui uai omoí jeire úamona finócafuiái fuitállena Moo Juziñamuimo jicádicaí.

¹² Bífuemona cai Ocuíraima Jesucristo mámece omoí nícidogafuedo ñue caimare úbicaitaite. Afe íbana cai Moo Juziñamui cai Ocuíraima Jesucristo diga ómoína izíruillamona ñúefuiái ómoimo nítaite.

2

Iere fiénidifuiaina oruídime billifue

¹⁻² Amatiai, birui jae cai Ocuíraima Jesucristo billífueña ómoína nauí cue fidítagafue emódomo uai nabáiacadicue. Afe izói afémiemo dáanomó cai gairíllifue emódomo ja ómoimo llóiacadicue. Dáarie taino llotino cai Ocuíraima billirui ja dúcidez a daidíaiõi. Afemona omoí comécinafueña raire jíáfodo meídoñeillena izire jicádicaí. Daje izói jíáie taino llogafue ite. Afe taino llotino dáíifrediaioi:

—Cai llogafue Juziñamui Joréñomona oga. Cristo ja bíteza, — daidíaiõi; mei íadi aféfuere jacínaiñoeno omoí iri. Afe izói omoí cacana ía júfidogafuere jacínaiñoeno omoí iri. Ie emódomo ñe rabe omoí llínoia cai úrilla izóidibe, aféberí jacínaiñoeno omoí iri.

³ Niémóna táinofuemo jífuefiñoeno abí omoí rairuirí. Ua Jesucristo billa uícodo, Juziñamuina comini uáitallifue uícomo cómuíte. Aféruillaído iere fiénidifuiaina oruídime cíocaité. Afémie dama ñine táinocaille. Daí Juziñamui íena mamede.

⁴ Bímie Juziñamuina bacáuairedímie. Nana Juziñamuido mameca ráaniaina bímie uáitano ñiné táinocaitaíbite; daje izói nana Juziñamuimo caimátaidinona anáfenuaíbite naa jíáie caimátailla ráaniairi. Afémie Juziñamuimo gairíracomo,

afeco naama Juzíñamui izói, ráinazaibite. Dáamie “Cue bie Juzíñamuidicue” daille.

⁵ ¿Nauí omoi diga cue illa llezica bifue ómoimo lloticue, íadi aféfuemo úbicaiñediomoi?

⁶ Afe fiénidifuiaredimie nai bíñeillena jizilla raana onódiomoi. Afémie billirui raire cíocaiñellena Ñuera Joreño nai rairuide.

⁷ Afe jíáinomo lloñega fieni illa maméinafue bie éniemo ja comuide. Aféfuena rairuídímie cai cígimona oni ógana fiénidifuiái jamánomo jebuíoicaite.

⁸ Aféfuena rairuídímie oni ollíruimo afe jamánamo íáibadímie cíocaite. Iemo cai Ocuíraíma Jesús ana billano, ie fuemo ite faidórafuedo afe íáibadímiena títaite. Ua ie billa meáirenado afémiena niné táinocaitaite.

⁹ Afe jamánomo fiénidímie Taife táijinafuedo bite. Aillo íemo ite riino ácataite. Afedo aillo cíórainina uaido finoca ráaniaido táinona jífueite naa jíáie taino onótate ráaniai diga.

¹⁰ Iemona afe íáiba naga fiénidifuiáido niné táinocaitallimacina jífueite. Jae niné táinocaitallimaci, Juzíñamui ua ñúefuena jeire óiacañedino jaca jíllloñeítiaíoi.

¹¹ Afe jira Juzíñamui íaíoi fiénidifue ínuamona íaíoína íáibado jífuetaitaite. Daje izói táinofuiaina íaíoína ínotaite.

¹² Mei fiénidifuiái Juzíñamuina ñúefue baimo íaíoi gáinamona, Juzíñamui íaíoína duere finótaite.

Jíllloillena nizécano

¹³ Mei cai benómona jaca ómoiri Juzíñamuina “Iere figura” daíñifredicai. Jae cai Ocuíraíma izíruiaga daje ámatiaídicaí. Jaca jae nanómona Juzíñamui jíllloillena nizécamacidiomoi. Mei ua ñúefue omoi jeire úamona Juzíñamui ómoína nizede. Daje izói caina ñúeítate Joreñodo Juzíñamui ómoína nizede.

¹⁴ Afe jira cai ómoimo lloga ñuera jíllona uaido Juzíñamui ómoína jírite, cai Ocuíraíma Jesucristo illa ebíredifue dibénemo omoi íllena.

¹⁵ Amataí, mai bífuemo jaícina omoi coméciri. Omoi cígiri dama cue llogáfuiaina, ie emódomo nana rabedo ómoimo cue ciegáuaina féitañeno omoi iri.

¹⁶⁻¹⁷ Mai birui cai Ocuíraíma Jesucristo cai Moo Juzíñamui diga omoi comeci cáimare náiretari. Mei jira cai Moo Juzíñamui ie comeci cáimafuedo caina izíruite. Afe llezica afémie cai comeci zúurenafue cáimafuena méidofirede jaca ninomo cáimare cai íllena. Daje izói Juzíñamuido ñue cai illifue cai úíñoillena afémie caimo jino lloite. Afe izói omoi comeci jaícina Juzíñamuimo jóillena jícadicue. Afemona bie nana

ñúefuiai daiirediomoi. Daje llezica afe ñúefuiai jino comínimo ácatarediomoi.

3

“Cairi Juziñamuimo omoi jicari”

1 Amatiai, íraifue ómoimo llotícueza. Cairi Juziñamuimo omoi jicari, cai Ocuíraima llogáuai náagobiaido raire dúciiteza. Afe emodo aféuai omoi jeire ua izói, afémaci jeire ólleza.

2 Juziñamuimo mai jiáifodo omoi jicari. Bie íáirede fiénidino cígimona cai zúitailleza, mai Juziñamuimo omoi jicari. Mei nana comínimona nai nana íinoñediaioiza.

3 Mei íadi cai Ocuíraima jaícina uafue llotímie. Afémie jiáino fiénidifueмо omoi báíñeillena ómoína riire jaícina mozíoide. Daje izói íaifuiamona ómoína rairuíoide.

4 Cai Ocuíraima ñue ínogamie ícoinia, nauí ómoimo cai ocuícáfuijai jeire omoi úana ñue onódicai. Iemona daje izói aféfuiaina uire nágaruillaído jeire omoi óllena ñue onódicai.

5 Mai cai Ocuíraima ómoína cánoiteza, Juziñamui ómoína izíruillafuena omoi onóillena. Daje izói Cristo comeci járidoñenafue ómoimo íllena jicádícue.

Naga come dani íaioi tájinamo tájirede

6 Amatiai, birui cai Ocuíraima Jesucristo mámeçido ómoína ocuídicai. Naga tájiacañede ámamona oni omoi iri, mei afémie ómoimo cai llogáfuijai afe dibéfuemo íacañedeza.

7 Mei nauí omoi cígiri ómoimo cai cíotaga tájina izói, afe izói omoi íllena onódiomoi. Cai omoi cígiri fia tájiñeno íñédicai.

8 Daje izói omoi güíllena íbáñeno fia güíñédicai. Mei jiáifodo mona naio diga ocózinaíñeno tájifiredicai, ómoimona daa cómena cai llégitañeillena.

9 Ua afe omoi caina canolle daií cai jicalle ríino caimo ite, mei íadi tájifiredicai ñue illáfuenta ómoimo fidítallena, bie ómoimo cue cíotagafue izói omoi íllena.

10 Nauí omoi cígiri cai illa llezica, bie lletara uai ómoimo lloticai: Tájiacañedímie jaca güíñeiteza.

11 Mei jiáimaci caimo llotíaioi ómoimona dáarie tájiñediaioi. Tájiñeno fia illa llezica jiáie comini illáfuiaimo afémaci gágutajifirediaioi.

12 Afe daií ite comínina cai Ocuíraima Jesucristo ríinodo ocuídicai. Afe llezica íaioína riire daidicai: Mai ñifue lloñeno omoi tájiri dani omoi jitaica ráaniai omoi ólleza, daidicai.

13 Amatiai, omoi jetaca ñuera raana zefuíruiñeno omoi ñedóicairi.

14 Ninó dámie bie rabedo cai daináuaina jeire oñéniadi, bu mei afe uaina ñinoñedimienaza mai mei omoï eróiri íena onóillena. Ie mei afe cómemona ifo oni omoï fáinocairi, ie meáidailleza.

15 Mei íadi afémiena uáiogai ímiena maméñeno omoï iri. Afémie ama izóí ñue omoï llófuerei.

Iraicaiño Pablo afémaci caimare uáidonocaillafue

16 Mai cai comeci ñue uái illafue llófirede Jesús, nágaruillaido, íemo náganuiaiido afe comeci ñue uái illáfuena ómoimo llóiteza. Afe izóí cai Ocuíraima ómoïna nabáifireiteza.

17 Mai, cue Páblodicue. Bie uáidua uai dama cue ónoïdo cueticue; bie cueticue cue mámece diga. Nana cue cuezábiaimo daíí jónefiredicue. Bie izóí cúefiredicue.

18 Cai Ocuíraima Jesucristo ézicigafuemo íitiomoïza. Jae ñie. Ja daíítadeza.

NANOIDE SAN PABLO TIMOTÉOMO

ORÉCABE

Primera Carta del Apóstol San Pablo a Timoteo

Pablo Timotéomo cuete

¹ Páblodicue. Jesucristo ocuícamedicue. Cai Jíllotaraima Juzíñamui cai Ocuíraima Jesucristo diga íaillinoi daina uaido orécacue. Afe Jesucristodo cai ñue illifue abi úiñoticue.

² Juzíñamui uai coco ñnogafuemo nahí cue jitó izóidio. Ie jira bibe omo cueticue. Cai Moo Juzíñamui íemo ñue cai Ocuíraima Jesucristo diga o ézicillena iere jitáidicue. Daje izóí afe íaillinoi omo dúecaillena jitáidicue. Iemona afe íaillinoi o comeci ñue uái illena óiacadicue.

Jiáimaci íaioi taino lluáfuiado o jífueñeillena abí o rairuiri

³ Naui Macedóniamo cue jailla lezica Efeso jófuemo o fiébillena izire jicádicue. Aféruido afénomo o fiénocaidicue, afénomo itínuiamona dáarie taino llófuiana íaioina o rairuillena.

⁴ Daje lezica íaioi jaiái ninomo lloga ráfuiái naa jagai diga, áfena íaioina júfidotañeitioza. Íaioi jaiáigima lloga fuiñede ráfuiái llúana ráruitioza. Nana bífuiái taino lluáfuiaimo cai comécina uite. Mei íadi nana bífuiái Juzíñamui caimo jóonega íemo cai ñnogafuena ñue ícoimo fuitáañede.

⁵ Juzíñamui caimo jóonega llujáillifue bie izóí joide: Illa dígamie conímana ñue izíruiredicái. Afe bie izíruilla íainide comécimona comuide. Daje izóí afe izíruilla comeci ñue úrillamona comuide; bie izíruilla afe izóí jiáimana jífueñede Juzíñamuimo ñnogafuemona comuide.

⁶ Bie ñue izíruillafue dibénemona dáarie oni táifodo jáidiaioi. Afe taino llua ñnota oni jáífodo féiraitiaioi.

⁷ Afémaci Juzíñamui lletara uai llófuetinona jáiacadiaioi, mei íadi dani íaioi daina uaina onóñediaioi. Iocire llófuetiaioi íadi íaioi llócaiga uaina ñue baitáñediaioi.

⁸ Juzíñamui lloga lletara uai ñúeraza onódicái. Bíuaido Juzíñamui naga come lletállena mamérite. Dámie Juzíñamui mamérilla izóí afe uaimo coméciaidi ñuera.

⁹ Afe lletara uai ja ñúefuiái finófiredinomo llóñega. Afena ñue onódicái. Mei jáífodo fiénide comínimo mameca. Bie izoide comínimo Juzíñamui lletara uai dúide. Afe comini illaíma lloga uaina uáitafirediaioi. Ocuícana náfueñediaioi. Fiénidifuenta finófirediaioi. Daje izóí fiéniruidinona itíaioi.

Afe izói Juzíñamuina jacíruiñediaioi. Daje izói Juzíñamuimo ñinogafuemo náfueñediaioi. Iemo Juzíñamui lletara uai, moo ei diga fatínomo dúide. Daje izói comínina titáfiredinomo dúide.

¹⁰ Afémaci naga ringomo fieni comeci fácajano iáire finófirediaioi, afémaci áirediaioi íadi. Daje izói jíáie ímana iáire finódiaioi. Juzíñamui lletara uai nana bie izoide comínimo dúide. Daje izói cómena llaitádinomo dúide. Táinona úrifiredinomo dúide. Daje izói uafue daiíllena táinomo Juzíñamui mámecei llínotinomo dúide. Iemo Juzíñamui lletara uai nana jíáfodo jífueñede llófuiafuena uáitafiredinomo dúide.

¹¹ Afe bie jíáimacina jífueñede llófueinafue Juzíñamui cuemo llogafue daje izói jóoide. Juzíñamui cuemo lloga uai nana comíni ñue jíllona uai. Afe uai oni comínimo cue llujállena, iere ñuera Juzíñamui jóonegacue.

Juzíñamui cuena dúecaillari iere figora daidicue

¹² Cai Ocuíraima Jesucrístona “Figora” daidicue, mei afémie ie uai jino cue llujáille ríinona cuemo ígaza. Juzíñamui cuemo comécido facade: O táijinana fáicanocaiñeno ñue fuitáfiredio, daide. Jira bie uai llujáille táijillena Juzíñamui cuemo jóonete.

¹³ Jaiai uiécodo Juzíñamuina iáire daiífiredicue. Daje izói íemo ñinotina duere finóllena racáfiredicue. Afe llezica cue uaido Juzíñamuina icídicue. Bífuiaido Juzíñamuina duere finódicue íadi, ja birui afe Juzíñamui nana bie ñúefuiái cuemo jóonete. Jaiai aféruillaido ie uaimo cue ñnoñena jira Juzíñamui iere cuemo dúecaide. Daje izói cue fínua fue cue onóñena jira cuemo dúecaide.

¹⁴ Iemona cai Ocuíraima iere ñue cuena ézicite. Daje llezica Cristo Jesumo dájena cai jaináinado aillo íemo ñinogafue naa ie izíruillafue diga caimo comuide.

¹⁵ Bie izóidifue iere uafue. Nana áfemo ñinoredicai. Bifue bie izói daide: Cristo Jesús fiénidino jíllotallena ana bíniemo bite. Afe fiénidinomona cue iere jamánomoina.

¹⁶ Mei daií iticue íadi Juzíñamui iere cuemo dúecaide. Are íllamona Juzíñamui cuemo dúecaillado náiraímo Jesucristo ie ñue comeci mánainafue cuedo jino íaioímo cíotate. Iemona comínimo ñúefuiái ja cíotatimiena jáidicue, mei fiénidifuiairede Páblodicuemo Juzíñamui iere dúecaideza. Jesumo cue ñnuamona cue comeci ífueña méidoticue. Afena onóillamona nana zíñona illifue óiacadino, cue comeci ífue méidua izói, afe izói afémaci afémiemo ñnota íaioi comeci ífue ñúefuena méidoitiaioi.

¹⁷ Ie jira jaca tíñede buna cíóñena Juzíñamuina íóbitaacadicaí. Afémie daade Juzíñamui, daje izói nana ráfuiaina onódimie.

Afe ziiñona Jamánomoidillaímamo ñue ebírede uai jaca nágarui íemo jóneticaí. Daí jóoide.

¹⁸ Cue jitó Timoteo, bifue omo jóneticue. Riire fuirídimie izói o iri. Naui Juziñamui mámeçido odo úritino, ñue o illifue llotíaioi. Afémaci daina izói mai birui o íñori. O comeci úrillafue ñue o jóneri.

¹⁹ Dámierie íaioi comeci úrillafuena náfueñenamona nocáe buíllamona táinocailla izói, íaioi íñogafuemona oni táinocaidiaioi.

²⁰ Himenéomo Alejandro diga afe izói comuide. Ie jira afe íaillinoi Taifemo izájidicue, Taife anamo íaillinoi daí zefuíllena. Dinomo Juziñamui jánana úriñeíllena ónoitiaillinoi.

2

Juziñamuimo cai úrilla llufue

¹ Fueñe ona dáiticue: Mai nana comini íena Juziñamuimo o jicáfireiri. Afena Juziñamuimo íñotinona o lloiri. Iemo jíai, izire comínimo ie dúecailleza mai jicari. Daí nana comini íena Juziñamuimo o úrífireri. Afe llezica nana comínido afémiena iere figora o daífireri. Daí féitañeno nana comínido Juziñamuimo ñue úrífireri.

² Gobierno oreca omoi úiñotimie íena Juziñamuimo jicáredio, naa jíaié jaboide illaini diga. Afémaci íena izire o jicari, áfedo nífuenino caimare cai íllena. Daje izói comeci ñue uái illáfue mo íredicaí. Afe daí cai jicamona nana cai illáfuena Juziñamuimo ñue mámeiticaí. Daje izói conima diga comécina ñueiticaí.

³ Bifue iere ñuera, cai jíllotafirede Juziñamuina ñue íóbitade.

⁴ Mei afémie comeci jitáinafue nana comínina jíllori, daide. Daje izói afémacina ua ráfuena onoiri, daide.

⁵ Cai Juziñamui jaca dáadeza. Daje izói Juziñamui eróicana caina ñue finódimie caido úritimie daade. Afémie Jesucristo. Afémie íaifuenidimie íadi, cai izóidimie.

⁶ Juziñamui mamécaruimo dúciamona Jesucristo ie abina éeruñeno nana cai jíllóillino ibana izájiga.

⁷ Iemona nana judíoñedinomo afe Juziñamuimo íñolle ua ñúefue cue llófuiaíllena orécacue. Daí jíllona uai llujáfiredimiena jónegacue. Crísto mo cue íñuamona táinofue lloñédicueza, uafue lloticue.

⁸ Ie jira nágagobiaido naga cómena: Juziñamuimo omoi úrífireri, daidicue. Ñue nífuenide comécido omoi jicari. Jáímamo ríicaiñeno comécido Juziñamuimo omoi úriri. Daje izói dani ómoimo júfidoñeno comécido íemo omoi jicáfireiri.

⁹ Daje izói ringóniai iniroi jitállifue llóiticue. Jabóidingo ringo jita izói, naga ringo jítaiteza. Ima jiruídollena jitaca abina cíoitae iníroina, jitáñeno iri. Daje izói comíni cíodollena ifótirai jamánomo ebire finóñeno iri. Jabo ifo jua figona. Daje izói quenírede raana aillo jiróñeno iri, naa jamánomo ráifide iniroi diga. Jámaicuro jitáoiarena.

¹⁰ Mei jíáfodo comínimo dúecailla ñúefuiaido naga ringo finóbiri, naa jíáie caimare uáiduafuiai diga. Mei nana Juzíñamui íeiiena ñue finódogango bie izói íteza.

¹¹ Ringóniai llófueinamo uai oñeno cacáreitiaoiza. Comeci mánainafuedo afe uaina onóicaitiaoí.

¹² Nairai cígiri ringo llófuellena rairuídícue. Ringo ímana anáfenotañedicue. Mei jíáfodo, ringo íma anamo úriñeno uái iri, daidícue.

¹³ Mei Juzíñamui nano fueñe Adán finódeza, afe méifomo Eva finode.

¹⁴ Adán jífueñega, mei íadi ringo Taife jífuega. Iemo jífuefillamona afengo fiénidífuemo baiíde.

¹⁵ Mei íadi naga ringo Juzíñamuimo ínogafuemo jeire oíadi, íemo ei ocuífauiai ñue ícoimo fuitáadi afengo jíllóite. Afe llezica afengo naga cómena izíruirede. Iemo comeci ñue ínuafue díbénemo írede. Daje izói ñue jáicina macállífuemo írede.

3

Ocuídillaímo jitáirede ñue illafue Pablo llote

¹ Ja cue llollí fue íere ua rafue. Dámie ocuídillaímana jáiacade ñuera. Afe izói táijiacanafue ñuera.

² Ie jira afe izoide ócuitillaíma mamécámie jáicina ñue írede. Afémie nífuenino macárede. Afe daíí afémie mácafue jíáímie lletánide. Afémie daango ótena figura. Ménango ónide. Afémie comínimo lloga uaido jífánodoínide. Daje izói ráfuena ñue baitádimiena írede. Naga come afémiena caimare jacíruirede. Daje izói nana afémie mo mácaíbitinona afémie jíáfodo comécíñeno ñue caimare uáidorede. Iemo jíáímacina caimare llófuerede.

³ Afémie jaca jífáinide. Daje izói afémie fuírínide. Come jífuiamona oga úcubena, afémie llínonide. Mei jíáfodo jeruíñeno raana fecáfírede. Iemo comeci ñue uái illafue díbénemo írede. “Aillo úcubena cue ollí” daíínide.

⁴ Dama íe jofuero comíni ñue ocuírede. Dama íe úrue ñue raire cacáfíreillena lletárede. Daje izói íe úrue jíáie eicomínina ñue jacíruiarede.

⁵ Dámie ie jofona ocuállana ónoñeniadi, ¿mei nie izói Juzíñamuimo gairíracona ócuite? ¡Ocuínide!

⁶ Ie jira como fueñe Juzíñamuimo ínotimie, Juzíñamui ico ocuídillaímana ínide. Como fueñe Juzíñamuimo jaináitagamie raire illáímana jóoniamona afémie iere abina ínoite. Iemo fieni abi ínuamona, Juzíñamui Taife ana duere finóllifuemo dótaja izói, afe izói bímie daí zéfuite.

⁷ Afe Juzíñamui ico ocuídillaíma ñue jacíruigamiéna írede. Afémie daí íllamona, Crístomo nai ínoñedino ñue íena úritiaíoi; ie jánana fieni úrinidiaíoi. Afémie afe izói írede, meáíufue dibénemo ie íñeillena; daje izói Taife uai íena jíitañeillena.

Jabóidillainimo jitáirede ñue illafue

⁸ Daje izói comini dinena nana jabóidillaini ñue jacíruiganona írediaíoi. Daje izói ie úrilla uai jíáfodo méidonide. Iemo afémie jífáinide. Daje izói come jífuiamona oga úcubena llínonide.

⁹ Afe izói cai ínollena jino lloga ua ráfuenta afémie fáicanocaiñeno jeire órede. Daje llezica afémie comeci úrilla uai nífuenino írede.

¹⁰ Afémaci ñuera daíllena facátagamacina írediaíoi. Facata mei íaíoi nífuenia jabóidillainina írediaíoi.

¹¹ Daje izói aféllaini finódogango ñue jacíruigangona írediaíoi. Daje izói aféngotiai jíámamo fiénidífuenta íaíoiimo llónidiaíoi. Iemo lloga uaido jíámamo jífánodoínidiaíoi. Aféngotiai nana ocuica raana fáicanocaiñeno fuitárediaíoi.

¹² Afe jabóidillaini dáangona áiredena figura. Ménango ónide. Daje izói íaíoi úruiaína ñue ocuírede, naa íaíoi jofo ero comíniri.

¹³ Naga jabóidillaíma íaíoi táijiana ñue fuitádino ñúefuenta otíaíoi. Comini iere ñúefue íaíoiimo jóoneitiaíoi. Daje llezica íaíoi Cristo Jesumo ínogafuenta jamánomo meáíruíñeno llórediaíoi.

Cai ínoga jaiái báinino llogafue ja jino uáfodo denode

¹⁴ Raire o éroizaillena comécidicue. Nai cue biñena llezica, bibe omo cueticue.

¹⁵ Mei nai are cue biñéna llezica, Juzíñamuimo jaináidimie jitaiga ñue illífuenta o onóillena llóiticue. Afe Juzíñamuimo jaináidino caade Juzíñamuimo ínotino. Afémaci Juzíñamui ua ráfuenta ñue riire úíñotiaíoi. Jofo riire mozíoide jíaillirai izóidiaíoi. Ie jira afe rafue uaina oni caitánide.

¹⁶ Jaiái báinino lloga cai ínogafue iere jamánomo ebírede; nana comini ja uáfodo onoga. Be níuui:

Juzíñamui cai cígimo cómena jéciaíbite. Ñuera Joreño afémiedo úrite; daide: Bímie comécina jáicinaidimie, daide.

Afémie Juzíñamui abí imácimo ácatagamie. Diga náiraiáido ie illafue llócaide. Biniemo aillo comini íemo ínotiaioi. Afe mei afémie caífo monamo abído uiga.

4

Juzíñamuimo ínogafuena féitaitino ífue

¹ Ñuera Joreño jino caímo uáfodo llote, íirairuillaído dámerie íaioi ínogafuena féitaitaioi. Féitajano cómena jífuefe jóríai jítáinafuaí jeire óítaioi. Daje izóí Taífemo jainaide fiénide jóríaimona onóigafuemo ínoítiaioi.

² Afe izóí, comeci ífuena jíáífo jóidino llógana cacáreitiaioi, naa táinona úrillafuaíri. Afe bie jífuefiredino ja íaioi ífoci úrillafuena ja niné féideza. Uzírede llojédamo uzide onoi cacáñena izóí, bie comini itíaioi.

³ Bie Juzíñamuimo ínogafuena féitate comini jíáimaci áirenana rairuíaioi; daje izóí ringona: “Ínireiri,” daíñediaioi. Daje izóí ñuera caí güillemona dáarie: “Güíñeno,” daídíaioi. Mei íadi afe bie güille Juzíñamui comútaga, íemo ínotino ecállena, naa ñúefuena onódinori. Afe güílleri íóbillano Juzíñamuina “Íere figura” íemo jaináidino daírediaioi.

⁴ Mei nana Juzíñamui finoca güille ñúeraza, bácanide. Iemona afémie caímo fecaca raana oni fáinidicaí. Mei jíáfodo Juzíñamuina “Íere figura” daínano, nana ñue llínoredicaí.

⁵ Juzíñamui uai afe güíllena ñue finode. Daje izóí íena figura caí daífirena afe caí güíllena ñue finode.

Jesucristo ñue ocuícamié bie izóí írede

⁶ Bífuaí caí ámatiaímo o llófueia Jesucristo ñue Ocuícamiéna ítío. Afe bie llófueinafue jeire o oía bie ínofirega uai dama ñue ona comécina náiretaite. O jeire oga uaido ñue riire ítío.

⁷ Mei íadi bie fiénide énie ie ráfuaína náfueñeno o iri, naa jíáie taino jagai izóidífuaíri. Juzíñamui illa izóí o íacanamo áfemo nágarui o comeci llícitairi. Afedo riire ítíoza.

⁸ Caí abí caí ríireta, daa bíníe ífuefemo caína canode. Mei jíáfodo Juzíñamui illa izóí íllena caí nícidoia naga ñúefuemo caína canode. Daí caí íllemona biruíllaído caína canode, íemo daje izóí uire bíitífuefemo jaca caína cánoite.

⁹ Bífue íere nahí ua ráfueza, nana áfemo ínorediaioi nana cáioiri.

¹⁰ Afe bífue jira íere comeci fácaíticaí. Iemo áfemo zéfuidicaí. Ua zegóruioicana ñéfidicaí. Mei ñue caí íllena caade Juzíñamuimo ocuírídicaíza. Afe caade Juzíñamui nana comini jíllotaíbite. Iemo ínotino ja jíllotatímie.

¹¹ Bífuiaido nana comini o ocuífíreiri. Daje izói aféfuiai o llófueiri.

¹² O fia jitócomena jira comini o llófuiafue jáímana jámairuitataño iri. Mei jááfodo ñue Juzíñamui izói illafue Juzíñamuimo ñnotinomo jino ciótaitimiena ítioza. Ñue o úrillafuedo afémacina onótaitioza. Daje izói comini eróicana ñue o mácafuedo íaioina onótaitioza. Iemo naga cómena ñue o izíruillado íaioina ñue cánoitioza. Cristo izói o íllamona ñue íaioina llétaitioza. Daje izói Juzíñamuimo izire o ñnogafuedo llófueitioza, naa o comeci íáinidífuiari.

¹³ Nai cue dúciñena llezica, Juzíñamui cuela uailai comínimo o facádofíreiri. Daje izói cai ámatiaina o íociretari. Afémacimo ñue o llófuefíreiri.

¹⁴ Juzíñamui omo iga o fibíllafuiái fáicanocaiño o iri, mei nauí Juzíñamuimo gairífiredino ocuídillaini. Ñuera Joreño daina izói, íaioi onoi omo bitádiaioza.

¹⁵ Bífuiaina fáicanocaiño o finófíreiri, o jamánomo jáíno baimo íaioi onóilleza.

¹⁶ O illafue ñue abi o rairuiri, naa jáíno o llófuiafueiri. Fáicanocaiño riire abí o mameri. Ñue ímana o comúilleza. Bie cue daina izói o íadi, o jilloitio, naa o uaimo cacáreidinori.

5

Crístomo ñnotino uícomo ñue o illifue

¹ Eicomemo lléjecaiño o iri. Mei jááfodo o moomo o llófuiái izói fáicana o lloiri. Jáie jitócominina nahí o ama izói llófueiri.

² Ringóniaina jéengotiaina dama o ei izói llófueiri. Daje izói jitáingotiaina nahí o miríngo izói o llófueiri. Iaiomimo ñue comeci o facáfíreiri.

³ Uáfueña raana jitaide fecíngotiaina ñue o canori.

⁴ Mei íadi jáie jitórede daje izói enáizeñorede fecínguai ite. Afe úruiai íaioi éitiaina uzúngotiaina fueñe ñue úñorediaioi. Daje izói nahí ie enáizeño dani íaioi uzúngona úcairediaioi, mei naga jitó enáizeño diga íaioi móotiaina izíruirediaioza. Afe bie izói illáfueimo Juzíñamui ñue íóbideza.

⁵ Ie mei cómenide ua fecíngo, dango Juzíñamuimo ñue ie finóllifue ocuíríde. Daje izói Juzíñamuimo ie úrillafueña naio mona diga aféngo fáicanocaiñede.

⁶ Dango ie comeci gaina izói fecíngo ite. Caade íadi Juzíñamui dibénemo tíide izoide.

⁷ Bífuiaina íaioi o ocuiri, lletánidíngotiaina íaioi ílleza.

⁸ Dámie ie nahí come úcaillana ráairuía ie ñnogafue táinomo jifánofide. Dama nahí comínimo ite duéredinona úcaicañedimie, Juzíñamuimo ñnoñedino fiénina baimo, afémie fiénide.

9 Fecíngotiai íena mámece illabe fínoitio. Bie izói ñuera fecíngotiai mámece afébemo cúerena. Sesenta fimona ite fecíngo mámece cúerena. Afe bie fecíngotiai, daje izói dámiena iníredíngona írediaioi. Afe ízoidíngo mámece cúerena.

10 Iemo jiái ie illafue ñúeinamona jalléidíngo afengo mámece cúerena. Iemo jiái úruiai ñue comuítatingo mámece cúerena. Jicana jiáima ie jofomo dúcia caimare uáidofiredíngo mámece cúerena. Iemo jiái Juzíñamuimo ínnotinomo rairuíño comece mánainado canófiredíngo mámece afébemo jóonerena. Mei afengo naga jiáima cánuana idai jócuá izóidena caimare finófiredeza. Iemo jiái duere zefuide comini canófiredíngo mámece cúerena. Daje izói nana jiáie ñúefuiai finódíngo mámece jóonerena. Bie izóidifuiái nana daje fecíngo finórede; ímona afengo mámece cúerena.

11 Mei íadi sesenta fimona jofófenemo ite fecíngo mámece jóoneño iri. Mei aféngotiaimona dáarie dani íaioi comece óiácanamona ñibai Crístona zóofeitiaoiza. Zóofiano nane meine iníreiacadiaoiza.

12 Daí íaioi illa dani íaioi ícoinia daí ite. Mei fueño íaioi Jesucrístodo jáillena mamérrillafue ja fáicanocaidiaoiza.

13 Afe baimo naga comini jofodo jáicaidiaoí. Jáicailamona, “Fia táijíño daí cue illi,” daidiaoí. Afe llezica jiáimana úridoicana jáidiaioi. Iaoimo dúñede jiáimacimo itífuiaimo gágutajífrediaoí. Comínimo ñue íñedífuedo úrioífrediaoí.

14 Ie jira nai fecínaite jitáíngona daidícue: Abido iníreiri. Iníreillano úruereiri. Daje izói jofo náangona ñue o iri, Taifemo jáináidino ómoína úridoíñeilleza, daidícue.

15 Mei fecíngotiaimona dáarie, Juzíñamuina féitano Taifedo jáidiaoiza.

16 Crístomo ínnotinomona daa cómemo úcaille fecíngo íadi, afe fecíngona dama afémie úcairede. Afe fecíngona Juzíñamuimo gairífredinona úcaitaño iri. Mei afe gairífredino ua cómenide fecíngotiaína úcairediaoiza.

17 Jesúmo gairídino ñue ocuide écomini, ñue táijidiaoiza ménacaiño ibárediaoí. Daje izói ñue íaioi táijnamona mai caimare íaioína omoi jacírui. Iere comini ñue llófuetino, iere ñue lletáidino diga jiáie come iba baimo ibárediaoí.

18 Mei Juzíñamui Cuegáuai daide: “Arroz izoide trigo, juráreto gájirillena záiza llezica, áfemona íaioi gúllezica fue íbáíño omoi iri.” Iemo jiáinomo jiáífodo daide: “Naga táijitagame ie táijnado ñue íbárede.”

19 Fia da come ocuide écomemo fiénidífue jóoneíadi, áfena náfueño o iri. Mei íadi mena ñibai daámani uai nabáidímie afe izói afe cómemo llóíadi, áfemo cacáreiri.

20 Ocuide eicomínimona dáarie fiénidifue finóadi, nana comini eróicana afémiena o áadori, nana jiáie comini ñue abi jacínaificaillena.

21 Juziñamui eróicana, daje izói cai Ocuíraima Jesucristo eróicana bifue omo jóneticue. Daje izói Juziñamui nizeca ie abi imaci eróicana omo jóneiticue. Nana bie omo cue lloga lletara uai ñue o náfuerei. Nana comínimo dájerize jaícina o lloiri. Dámie oni eneno mámeñeitioza.

22 Dámie ie illafue nai figo onóñena llezica, ocuídillaimana ie o maméllena raire íemo o onoi bitáñeno o iri. Bie izói o illado jiáimamo ite fiénidifuena raire nábaizaiñeitio. Naga íaifuiamona oni o iri.

23 Mei o ero izírefireia daa jainoi jiróñeno o iri. Iemo due vínona o jirori.

24 Nai íaioimo riire jicánoñena llezica, comínimona dáarie íaioimo ite fiénidifuiái uáfori cíoide. Iemo jiáimacimo ite fiénidifuiái íaioi duere finoille mámia méifomo onórede.

25 Daje izói jiáie cómemo ite ñúefuiái uáfodo cíocaide. Iemo jiáimacimo ite ñúefuiái cíóñena íadi, dinó íaioi díga báinino íñeite.

6

1 Táijitafiregano íaioi ocuídimiaina ñue jacíruirediaioi, jiáie comini Juziñamui mámeçido fiéni úriñeillena. Daje izói cai llófueinafuena fiéni íaioi daiñeillena.

2 Afe izói Crísumo ínote ocuífiredimiaina ñue jacíruirediaioi. Juziñamuimo ínogafuemo daje ámana íaioi maméiadi, nai ocuídime ocuícamié díga conímama caimare jacíruirediaioi. Mei jiáifodo afe Juziñamuimo ínote ámamo, jiáimaci baimo, riire táijirediaioi. Afe riire táijina ínotino, afe ocuídino izíruiga ámatiai. Afémaci dáamací. Dájena Crísumo ínotino. Bifue o llófueiri. Daje izói áfedo o lletámairi.

Juziñamuimo cai ínogana, “Figo baite” cai dáinana canode

3 Afe bie cai Ocuíraima Jesucristo lloga jaícina jóide llófueinafuemo coméçíñedímie, oni jiáifodo tánofuiái llófuete. Daje izói cai ínoga ñuera uaina afémie figo jeire oñede.

4 Daiítade come nífuena onóñedeza, táinodo abi ínote. Afémaci fia fiénide uáillaimo júfiduana iere gáidiaioi. Afe júfidogafuemono aillo úradoillafue comuide. Iemo dájena caimare íñénafue comuide, íemo jiáimana éoinafue comuide, íemo jiáimana caimare uáidoñenafue comuide.

5 Dáanomona féitañega fuiríllafuiái, jiáifodo oni comécina jóidimacimo comuide. Bie comini ua ráfuena onóñediaioi. “Fia

cai ínogafuedo iere cai ráanailli,” táinona comécidiaioi. Bie izoide comínimona oni o iri.

⁶ Ua onóigaza, cai ínogafue jamánomo ráifide. Juzíñamui caimo fecaca raana “Figo baite” daidímiemo, ie ínogafue ñue ráifide.

⁷ Mei jii, bíniemo fueñe cai jocoina llezica minícana atíñedicai. Afe izói uire cai tíia minícana úiñeiticai.

⁸ Mei biruimo cai caana llezica caimo ite güílleri, daje izói caimo ite iníroiri “Figo baite” daiñedicai.

⁹ Mei jíáifodo aillo ráanaiacadino fiени comeci fácafue dibénemo jáidiaioi. Afémaci aillo fiени comeci óiacanafuiaimo raamo jíride izói itíiaioi. Bie izoide fiени óiacanafuiái cómena fiени finode. Daje izói íaioi illafue niné táinocaitate; jofa zabella méino izói niné táinocaitate.

¹⁰ Mei jii, úcubena izíruillafue nana fiénidifuiái comuíllano aféfuiai jillaci. Dáarie iere izire úcubena óiacanamona, Juzíñamui íaioi ínogafuemona oni nibéfodo jáidiaioi. Afémaci dani íaioi illáfueña táinona iere duere finódiaioi.

Juzíñamui cai ínogana, fuirilla izói riire íredicai

¹¹ Mei íadi o Juzíñamui nizécamedioza, bie ailli cue lloga izóidifuiaimona oni o iri. Ñue comécina jaícina illáfueño o mamériri. Juzíñamui illa izói mai o iri. Afémiemo ñue o ínofireiri. Jáie comínina ñue o izíruiri. Comeci járidoñeno o iri. Comécina mánaidimiena o iri.

¹² Mai Juzíñamui ínogafueño fuirilla izói nágaruillaído riire o iri. Juzíñamui omo iga zíiñona illafue ñue jeire o oíri, mei áfemo Juzíñamui uádogamedioza. Afe Crísto o ínogafueña comini cóicana jino llotio. Afe bie o llúamo o uai nabáidinona aillo ite.

¹³ Ja birui Juzíñamui eróicana ona ñue ócuticue. Afe Juzíñamui nana bíniemo itínuiaimo íaioi cáananona fecade. Daje izói Jesucristo eróicana ona dáititue. Afémie daje izói ñúefue jino uáfodo llote. Poncio Pilato uícomo ie illáfueña jáanoñeno llote. Daií Moo Juzíñamui, Jesucristo diga íaillinoi uícomo ona ócuticue.

¹⁴ Omo cue ocuícana, jíáifodo méidoñeno, ñue jeire o oíri. Aféfuena ñue jeire o oíri, jíáima ona llétañeiteza. Bífuiai ua Jesucristo billíruimo jeire o ófireiri.

¹⁵ Juzíñamui jaiái uícodo mamécaruimo dúcia, Jesucristo cócaizabiteza. Afémie daade cai iere ñuera ríinorede Juzíñamui. Daje izói afémie nana illáicomini ie Illáimaza. Daje izói afémie nana ocuífiredino Ocuídillaíma.

¹⁶ Dama afémie jaca zíiñoza, tíñede. Afémie illano jamánomo meáire egáiñoteza, buna ánozinide. Afémiena jaca bu

cióñede. Caade come jaca íena cióñide. ¡Jaca ninomo ñúefuiai afe Juzíñamuimo nitácaza! ¡Aillue ñuera riño jaca ninomo afémiemo dúideza! Aquíe izói íteza.

¹⁷ Bie éñiemo aillo ráaredino abi íaiói íñoñeilleza ñue o lloiri. Daje izói íaiói mo ite raamo ócuiñeítiaíoi za, mei afe ráaniaí are íñeítiaíoi za. Mei jíáí fodo: Dama Juzíñamuimo omoi ocuíriri, o daiíri. Mei afe Juzíñamui ua cáadimie. Afémie jeruíño nana cai jitailla raana cai cánuano caimo fecade.

¹⁸ Afe ráanaitino ñue íaiói ílleza íaiói mo ocuiri. “Omoi ñue íñoítifuiái ráanaitiomoí za,” íaiói na o daiíri. “Omoi mo ite ráaniaí mona jeruíño jítáidinomo jíáí fodo coméciiño fe-cari,” daií íaiói na o daií fireiri.

¹⁹ Daií íaiói íllamona, íco cómuitifue nahí raana máíñoítiaíoi. Afe maiñóllena comécido ñue onódiaíoi. Afe dáaruido zíño na illífuena óítiaíoi.

Iraicaiño Timotéomo jóonenocaigafue

²⁰ Timoteo, nana bie omo cue lloga ñúefuiai ñue o rairuiri. Bíniemo ite táinona úrioinafuiái mo cacáreiño o iri. Daje izói Juzíñamuina uáitafuemo cacáreiño o iri. Mei íaiói: “Íere baitádicue,” daína uai taino uaiza.

²¹ Mei bie izóidifuiái ínote comini ja baie Juzíñamuimo ínogafuiái mona oni nibéfodo jáidiaíoi za.

Mai, Juzíñamui ona ñue éziciíteza. Jae ñie. Mai daiítadeza.

MÉIFODO SAN PABLO TIMOTÉOMO ORÉCABE Segunda Carta del Apóstol San Pablo a Timoteo

Pablo Timotéomo cuete

¹ Cue Páblodicue. Jesucristo ñúefue llujilla orécamiedicue. Juzíñamui comeci jítaina izói orécamiedicue. Daje izói uícodo lloga zíñona cai cáaillifue llujitagacue. Cristo Jesumo dájena cai jaináinamona afe cáaillifueña óiticaí.

² Cue izíruiga jító Timotéomo bibe cuetícueza, ona Juzíñamui ñue éziciiteza, daíacadicue. Daje izói: Juzíñamui omo dúcaiteza daídicue. Iemo: Cai Moo Juzíñamuimona oga comeci ñue uái illáfueño ítioza, daídicue. Nana bie ñúefuíaí cai Ocuíraíma Jesucristodo óredío.

Pablo Crístomo uai nabáiacade

³ Juzíñamuimo nágarui comécido úrifiredicue. Mona naío diga Juzíñamuimo cue úrilla llezica omo comeci uibífredicue. Omo cue úbicaillano Juzíñamuina: Iere figora, daídicue. Cue uzútiaí Juzíñamui íóbitallena ie ocuífirégana ñue ínuua izói, afe izói íáinide comeci úrillafuedo ie ocuífirégana ñue ínofiredicue.

⁴ O comeci zúucaifirenamo uibíoidicue; íemona ona iere jaca cíoiacadicue, áfemona caímare cue íllena.

⁵ Taino lloñeno ñue Juzíñamuimo o ínuafueño uibíoidicue. Afe birui Juzíñamuimo o ínogafue nano fueñe o uzungo Loida ínoga. Daje izói o ei Eunice ínoga. Iemo bífueña o jaca ñue ínofiredioza, ñue onódicue.

⁶ Ie jira bie izóidena o ócuiticue. Nauí omo onoi cue bítajamona Juzíñamui omo lloga llófuelle ríino féitañeno o iri. Niné ona féiza afefue nágarui meine ríire o uibíoicairi. Irai dúzaide meine boota izói o uibíoicairi. Afemona jamánomo o llófuelleza.

⁷ Mei Juzíñamui comeci jacíruillafueña caímo fecáñede. Mei jíáifodo comeci meáiruifueña Juzíñamui caímo fecade; íemo jíáimana cai izíruillafue, íemo abina ñue cai onónafue diga, caímo fecade.

⁸ Ie jira cai Ocuíraíma, Crístomo uai nabáillana meáiruifueño o iri. Daje izói ie uai ícoínia llavécacueza, cuena meáiruifueño o iri. Mei jíáifodo ñuera jíllona uai ícoínia comuide duere zefuillafueña ruifíruifueño o iri. Omo cómuide duere zefuillafueña rairuífueño o líinori. Mei Juzíñamuimo íte ríinodo cai comécina caímare fíraiteza.

⁹ Juziñamuimo cai jaináillena afémie ñue caina jillotate, daje izói caina uáidote, ie íaifuenide comínina cai íllena. Dani ñue cai illáfuedo Juziñamui íena índicai. Mei jiáfodo dama Juziñamui jaiái uícodo mamérillado íeiena iticai. Daje izói Jesucrístomo cai jaináillado Juziñamui caina izíruite. Daí caina ie izíruillado íeiena iticai. Mei jaiái ninomo nai énie comuíñena llezica, Juziñamui caina izíruite.

¹⁰ Mei bie caina ie izíruillafue, cai Jíllotaraíma Jesucristo ana bíniemo bíllado, afefue caimo jino onótate. Afe Cristo cai tíllafuena ja jacínitate. Daje izói jíllona uai llúado, ziiñona cai illafue jino uáfomo cíotate. Ua, íemo íinotino ziiñona itátallena afe Juziñamui uáfodo caimo onótate. Afe bie ziiñona cai illafue buna jaca niné táinocaitainide.

¹¹ Bie ñuera uai llujillena Juziñamui jóonegamiedicue. Judíoñedino llófuellena, Juziñamui orécamiedicue.

¹² Iemo afe bíedo nana bífuíai duere zefuídicue. Mei íadi áfena meáiruiñedicue. Cue íinoga Juziñamui comeci ífuena ñue cue onónamona, jacíruíñedicue. Mei afémie cuemo jóonenocaigafue jaca féíñeiteza. Afe bifue Juziñamui dama Cristo billíruimo ñue úíñoite, mei afémie iere ríinoredeza. Afena onódicue.

¹³ Naui jaícina joide llófueinafue o cue llófuia izói, áfena o llófueíreiri. Juziñamuimo cai íinogafuena jeire o oíri. Daje izói Jesucrístomo dájena cai jaináinamona caina ie izíruillafuemo o íri.

¹⁴ Cai diga ite Ñuera Joreño canócaza Juziñamui omo lloga ñuera rafue féitañeno o íri.

¹⁵ Ja onódioza: Nana Asia énie comíni ja cuena zóofetiaíoi. Afémacimona bie mena íima íaillinoí: Figelo, íemo Hermógenes.

¹⁶ Mei íadi bie afe jiáimie Onesíforo dibénedo nana ie comíni diga, mei cai Ocuíraíma afémacimo caimare dúecaiteza. Mei afémie diga ícaíño cue jitaica raana atífirede. Llavécacue íadi jaca meáiruiñeno cuemo atífirede. Iemona Juziñamui afémie comécina náicaitaiteza.

¹⁷ Uafue, Rómamo afémie illa llezica cuena are jénua ícoínia baite.

¹⁸ Cai Ocuíraíma cai comeci ífue ríire jicánollíruimo afe Onesíforomo dúecairi, Juziñamuina daidicue. Ja ñue onódioza, Efésomo cai illa llezica, afe Onesíforo diga ícaíño caina canode.

2

Jesucristo dibénemo itímie ñue fuirídímie izoide

¹ Cue jító Timoteo, Jesucrístomo dájena cai jaináinamona Juziñamuimo ite ñuefuiaímo iticai. Afedo ñue o náireiri.

² Cúemono o cacánafuemo cue uai nabáidinona aillo íteza. Iemono afefue mai oni jíáie ñue ñnofiredimiammo o jóneri. Afémaci daje izói oni jíáimacimo llófuiailleza.

³ Duere zefuúllafue omo comuádi, Jesucristo dibénemo ñuera fuiríraima izói abíriire o mameri.

⁴ Naga jíáimiena anáfenoacade fuiríraima fuiríllena maméioide. Iemono uícodo nana jetáacaigafue fáicanocaite; afémie jae náamatagaza. Fáicanocaillano daa ie ocuídillaima anamo itábicaite, afe ie jíiritillaima ióbitallena.

⁵ Daje izói naga jífánora raamo jífánotimie ñue jáicina jífánorede. Jífánua ocuide uai daína izói jífánorede. Afémie fieni jífánoia, minícana jíridoñeite. Táinomo jífánoteza.

⁶ Jacafai ríllamo izire táijidimie afe ie riga llizilla jeia llezica, afe ritímie fueñe ótena figura. Dama íeiena fueñe jofo óite.

⁷ Omo cue llógamo ñue comeci o facari, íemono cai Ocuíraima ona nana ñue fibítaiteza.

⁸ Mai tíllanomonona meine abido caade Jesucristomo o úibicairi. Daje izói afe Cristo cai jaiia illaima David úicoidigimamona comuídime. Afémiemo ñue o coméciri. Cue lloga ñue jíllona uai aci bie izói joide.

⁹ Bie ñúefue ícoinia duere zefuítagacue. Jíi, fiénidifue finódino izói maiano duere finócacue. Mei íadi Juziñamui lloga ñuera uai jaca buna llavénide.

¹⁰ Ie jira Juziñamui nizécamací cue cánua ícoinia duere zefuídícue, mei íadi áferi zúucaíñeno jaca caimare iticue. Afémaci ñue jíllobicaillena duere finócacue. Afe Jesucristomo dájena cai jaináinamona comuide jíllonafue iere ebírede. Iemo jaca zíiñona fúíñeite.

¹¹ Bifue táinoñedeza, iere uafue:

Afe Cristo tílla izói cai tíadi, afémie meine abido cáadimiena jailla izói, afe izói dani cai meine cáaillano afémieoiri íiticaí.

¹² Afémie ícoinia duere cai zefuádi ie illáimana illánomo jáinaíticaí.

Afémiena cai jáanoiadi, afémie jíái caina jáanoite.

¹³ Afémiemo cai ñnoñeniadi, afémie jaca ie daína izói nai finófirede;

Mei Juziñamui dama ie abina jáanonideza.

Ñuera daiúllena facaca tájiraíma

¹⁴ Bífuiamo jíáimacina ñue o comécitari. Daje izói bífuiái cai Ocuíraima eróicana íaioímo jóneri. Íaioí ráifiñede júfidofirega uáillaímo mai afémacina júfidotañeno o iri. Afe bie izoide júfidofirenafue ráifiñedeza, buna canóñede. Afemo

cacáreidinona jáífodo oni comécina jóitate. Daje izói íaiói íinoga ua uaina niné féitateza.

¹⁵ Juzíñamui uícomo figura daiíllena facaca táijiraima izói o iri. Iemo afe llezica jáífodo lloñeno daje izói o illáfuenta ñue jaícina o jónefireiri. Daií ñue facácamié ie meáicaillafue íñede. Daiítade come Juzíñamui ua ráfuenta jaícina comínimo llófuete.

¹⁶ Bíníemo ite táinona úrioinafuemonona oni o iri. Daií táinona úrifiredino jamánomo fiénidifuiaimo baiídiaioiza. Anábaitagano izói íficaidiaioi.

¹⁷ Fieni íaiói llófueina uai raire jica jalleide. Come abímo comuide fiénide ñozagi jarire oni móonaioicaila izói, bimaci llófuega uai oni jalléicaide. Afe bie izói ja Jimeneo Fileto diga, bimaci izói, fieni llófuétinona jáidiaillinoi.

¹⁸ Afe íaillinoi Juzíñamui ua uáimona oni nibéfodo jáidiaillinoi. Juzíñamui tíidino meine abído cáaillifue dibénedo llotíaillinoi: Ja záide, daidíaillinoi. Daií jáíe comini Juzíñamuimo íinogafuena uáitacana jáidiaillinoi.

¹⁹ Mei íadi cai íinoga uai oni cáitañeillena, Juzíñamui áfemo jáíe riírede uaina nabaide. Iemona féitañoeno afe Juzíñamuimo íinoicaidicai. Afemona cai bie riire mozíoiga jáillirai izóidicai. Juzíñamui nabaica uai Juzíñamui dama íeiena caina mameide. Afe uai bie izói jóoide: Cai Ocuíraima nana dama ie nahí comínina ñue onode. Iemo afe Juzíñamui nabaica uai jáífodo bie izói daide: Nana “Cristomo jaináidicue,” daidino fiénidifuena féitano, aféfuemonona ja oni írediaioi. (Bie ie nabaica uaido, Juzíñamuimo cai íinogafuena afémie riire finode.)

²⁰ Aillue jofo eromo diga raa ite. Ráífide oro ie finoina raa ite. Daje izói ráífide plata ie finoina raa ite. Iemo jiba ráífiñede amena finoina raa ite, naa nogóramona finoca raa diga. Dáarie bie ñuera rairuica jiróracuaido jicana bitínona jirótafiredicai. Jáíe figo jinoñede jiróracuaido jalleide illáimana ecáñedicai.

²¹ Afe izói naga jáíimaci canóllena Juzíñamui nizécamié, jaca comécina íaifuenino írede. Afémie jaca íaifuemonona oni írede. Iemona afe cómena Juzíñamui íeiena ñue finóbitade. Ebona ñuera táijinanomo Juzíñamui raire íena órite. Mei afémie íainide ráífide oro finoina jiróraco izóidímieza.

²² Jitócomena llezica comeci fieni óiacanafuiaimona oni o iri. Mei jáífodo come ñue jaícina illáfuedo o jairi. Daje izói Juzíñamuimo o ínofireiri, íemo jáíimana o izírufireiri, íemo comeci mánainafuedo naga cómena o uáidofireiri. Iemo, nana comeci íaifuenino Juzíñamuimo úrifiredino diga o nabáiriri.

²³ Daje izói táinomo comécilla uáillaina náfuéñoeno o iri. Mei ja onódioza, bie izoide úrillafuiaí fúirienailafue comuítate.

²⁴ Juzíñamui ocuífíregamie jaca jíáima diga icírínide, íemo jíái fuírínide. Mei jíáifodo afémie nana comíni diga caimare írede. Daje izói jíáímacina caimare llófuerede. Iemo afémie jíáímamo jarire úríñeno, fíaicana úriredede.

²⁵ Daje izói Juzíñamui ocuífíregamie naga ie llófueinana náfueacañedinona comeci manai fínuano, íaioina lletárede. Afémie daíí íaioina lletárede, íaioi comeci ífue Juzíñamui méidotalleza. Iemona daje izói ua ráfueña Juzíñamui íaioina onótaiteza.

²⁶ Bie izoide llógana jámairuitino Taife írebaimo jíilla izói itíaiói. Iemo afe Taife ie comeci óiacana izói afémacina ócuite. Mei íadi ua ráfueña íaioi onónamona jíllorediaíoi. Afénomo jíizaidinona oni bairórede. Afémaci ínídímie como cazilla izói, abina onóitiaíoi; íemona Taife anámona jíllorediaíoi.

3

Comíni íirairuillaído illífue

¹ Ja bífuiaina o onótaiticueza. Íirairuillaído jacíredíruina caimo mónaite.

² Aféruimo comíni dani íaioi abina fieni izírúitiaíoi, íemo úcubena íere duéruitiaíoi, íemo íere fieni abi íñoitiaíoi. Daje izói “Jamánomoidímíedicue” dainano, cómena canóñede tánofuíaímo comécíitiaíoi. Iemo Juzíñamuimo fieni úritiaíoi, íemo íaioi móotiaíai ocuilla uaina náfueñeítiaíoi. Iemo jíáimana “Íere figora” daííñeítiaíoi. Daje izói Juzíñamuimo ínogafuena náfueñeítiaíoi.

³ Afémaci jíáimana íziruíñeítiaíoi, daje izói féitañeno íaioimo duere finódímíemo dúecaiñeítiaíoi, íemo jíáímacimo fieni úritiaíoi. Iemo íaioi comeci fieni óiacanafuena “Dama íte” dáííñeítiaíoi. Iemo jíáima íaioi ícíadi núéfuedo finóacañediaíoi. Daje izói comínina íere izi cácataítiaíoi. Nana núéfuiaina bacáuai ífueña mámeítiaíoi.

⁴ Afémaci daní íaioi nahí comínina jíáie comínimo fállena fécajífrediaíoi. Iemo “Dama cue íacana izói íredicue,” daíífrediaíoi; íemo táínomo comécíillano “Íere jamánomoidímíedicue,” dáíítiaíoi. Daje izói Juzíñamui jenóñeno dani íaioi comeci gáínafuíaína jénoítiaíoi.

⁵ Diga jínofene íuaido “Cue bie ñuera Juzíñamui uaina ínotímíedicue,” dáíítiaíoi. Mei íadi jofona íaioi comeci ráatailla mei, afe ínogafuemo íte méíolle ríinona jáanotiaíoi.

Afe bie izoide comíni diga nabáíríñeno o íri.

⁶ Mei bimácimona dáarie, jíáímaci jofomo jaillano comécina ríínide ríngóniai jífuefrediaíoi. Afe ríngóniai fíenídífuíaína oruíde. Afe ríngóniai nana fieni óiacanafuíaína anáfénogaiáoi.

7 Diga ráfuiái onóiacadiaíoi mei íadi Juzíñamui ua ráfueña baitánidiaíoi.

8 Jaiái Moisés illáruillaído mena aimá Janes, Jambres diga, Moisés daína uai uáitaiailinoi. Afe íaillinoi uáitaja izói, bie comini íirairuillaído ua uaina uáitaitiaíoi. Iaiíoi ifoci úrillafue oni nibéfodo jóoide. Juzíñamuimo ínogafueña fáicanocaidiaíoi; áfemo ínidiaíoi, tánofue ínotiaíoi.

9 Mei íadi bimaci are jíáimacina jífuecana úíñeítiaíoi. Mei íanori íllamona nana comini íaíoi jífuefirenafueña fídítiaíoi. Jaiái Moisés uáitate íaillinoi táinona úrilla uaina comini fídía izói, nane afe izói bimaci táinona úrilla uaina nana comini fídítiaíoi.

Iraicaiño Pablo Timotéomo jóonenocaigafue

10 Mei íadi o cue llófuiana ñue jeire otio. Cue maca izói jaca ñue macáido. Iemo cue mamérilla izói ñue mamérifredio. Iemo Juzíñamuimo cue ínuá izói, afe izói íere ínofredio. Cue comeci jarire úríñena izói, afe izói fíaicana úritio. Jíáimana cue duéruilla izói duéruitio. Diga juáredifuiái cuemo comuide, íadi fáicanocaiño Juzíñamui ñúefue llócadicue. Afe cue ocuilla izói ñue ocuíoíido.

11 Comini duere cue finóllena cuena racádiaíoi, mei íadi áferi jacínaiño caimare iticue. Nauí Antioquía jófue mo duere cue zefuállana onóido; daje izói Iconio jofue, Lystra diga cuemo íaíoi finócafueña onóido. Nana racada duere cue íaíoi fínuafuiaina onóido. Mei íadi cai Ocuíraíma nana aféfuaiímona ñue cuena jíllotate.

12 Uafue onóigaza, nana Jesucrístomo jaináinamona ñue jaícina illáfuemo íacadino, nai ínoñedimacido duere zéfuitiaíoi.

13 Iemo afe llezica fiénide jíáimana jífuefiredino jamánomo fiénidifuiáimo ana jáítiaíoi. Jíáimacina íaíoi jífuia llezica, dani jíáimaci íaíoi íafueítiaíoi.

14 Mei jíáífodo omo llófuegafuiáimo ríire o comécioicairi, mei aféfuaiímo íere ñue ínotioza. Iemo afe bífuiaína o llófuetimiena onóido.

15 Daje izói o dúemiediomona Juzíñamui ñuera Cuegáuaina fueñe onóicaidio. Aféuaimona llófuegao, jíllonafue o maíñóllena. Afe jíllonafue Cristo Jesumo o ínuado o oga.

16 Nana Juzíñamui Cuegáuái, Juzíñamui afe cueraini comécimo úrilla izói ñue jaícina cuega. Bie uai íere ráifide comini ifoci déíllena. Aféuaido comini llófuerega; íemo afe bíuaido táinomona lloga uaina uáitarede; íemo áfede jíáimacina lletárede; daje izói aféuaido jaícina comini ñue illífueña íaíoi mo llórede.

17 Afe daií Juziñamui Cuegáuaido Juziñamui ocuícamié ñue baitádimiena írede. Iemona afémie ñue finóbide, nana ñúefuiái ie finóllena.

4

1 Juziñamui eróicana, cai Ocuíraíma Jesucristo diga, Juziñamui uailái o llófireillena iere omo llonódacaidicue. Mei Jesucristo bíniemo illáimana bille llezica, afémie nana caade comínina, naa tíidino diga íaioimo itífuenta riire jicánoiteza.

2 Afémie raire bíacana jira, riire ona dáitícue: Nágari Juziñamui uailái jino o llófireiri. Afemo riire o maméroiiri. Comini aféfuena cacáacana llezica, daje izói aféfuena afémaci cacáacañena llezica, nana afémacina jaca daje izói Juziñamui uai riire o llófireiri. Ñue riire llófireiri Juziñamuimo nai íinoñedino aféuaina íaioi jíeruillena. Daje izói afémaci illafue figóñedeza, bíuaido íaioina lletari. Iemo ñúeodo íaioi jáillena, mai riire íaioimo lloiri. Nana bífuiaina, nana comeci járítañenafuedo fáicana o llófuefireiri.

3 Afe daií llófuefireiri, mei diga irui íllamona, comini ua llófueinafuemo cácañeitíaióiza. Mei jíáifodo dani íaioi fieni gaina izói dani íaioi cacáacana izói, íaioi llófueitinona aillo jénoitíaióiza.

4 Juziñamui ua ráfuena fáicanocaillano, nana jagai izoide táinomona llogáfuiáimo náfueitíaiói.

5 Mei jíáifodo o iri. Cáadímie izói ñue abina o onoiri. Zúufue omo comuádi, áferi jacínaiñeno abi riire o mameri. Iemo jíllona uai o llóllemono maméroiiri. Juziñamui omo jónega táijina ñue ícoimo o fuitari.

6 Ja íanori íllamona Juziñamui íóbitallena fatá fecaca rille izói, fécajigacue. Cue titáíllirui ja áinozide.

7 Ñuera fuiríraíma izói, fiénidífue anáfenua izói táijinana jae riire ñue ícoimo fuitádicue. Iemo jífánotímacimona riire aizida goal orédímie izói, afe izói cue táijina fuillánomo dúcidicue. Iemo Juziñamuimo cai íinogafuena fáicanocaiñeno, ja ñue ícoimo ínotícue.

8 Iemona ja birui cai Ocuíraíma cuemo fecalle fia jíridoga raa izóidífueomo ocuírídícue. Afe ie billíruimo, Juziñamui anamo ñue nífuenidímacimo dújde zíiñoña illáfuena afémie cuemo fécaite; mei afémie comínimo itífuenta ñue jaicina jicánoitimieza. Dama cuemo fécañeiteza, mei íadi daje izói nana ie billíruimo caimare ocuírídínomo jíridorede zíiñoña illáfuena afémie fécaite.

Dama Páblomo dúidífuiái Timotéomo llote

9 Timoteo, mai raire cue eróizaíbiri; riire afemo o mamériri.

10 Mei cue nabai Demas, bínie ráaniaina jamánomo gáinamona jae cuena zóofeteza. Zóofiana jae Tesalónica jófuemo jaide. Iemo jiáie cue nabai, Crescéntena mámeciredimie, jae Galacia éniemo jaide. Daje izói jiái Tito oni Dalmacia éniemo jae jaide.

11 Dama Lucas cue diga fiébilla. O billíruimo, mai Marcos jénuailano cue diné ómicoi biri, mei afémie benó cue táijina cuena iere cánoiteza.

12 Cue nabai Tíquico, Efeso jófuemo jae cue oreca.

13 O billíruimo cue fieca emódomo jitáraro o atiri. Naui Troas jófuemo ite Carpona mámeciredimie jofomo cue fieca. Daje izói cue rabénicuai o atiri. Iemo jiáie cuega rábiai féitañeno o atiri, mei afébiaina iere jitáidicueza.

14 Naui Alejandro aillo fiénidifuiái cuemo nitade. (Afémie lloéfiái finuamo táijifiredimie.) Nana fieni ie úrillafuiái dieze cai Ocuíraima afémiemo iba ójte.

15 Afe Alejándromona abí o rairuíoicairi, mei afémie cai lloga uaina iere uáitaacadeza.

16 Nano fueñe cue abí riídollifue, ríillaini uícomo cue llua llezica, bu cuena nabáiñede. Nana cuena zóofetiaíoi. Juziñamui afefue iba íaioimo óñeillena afémiemo jicádicue.

17 Mei íadi naui abí cue riiduaruimo cai Ocuíraima cuena canode. Afémie cuena ñue riire finode, jillona uai oni nana judíoñedinomo cue llujillena. Afémie afe llujillafue ñue ícoimo cuena fuitátate. Afe daíí cai Ocuíraima iere jacíredifuemona ñue cuena jíllotate.

18 Daje izói nana jiáie fiénidifuiáimona, afémie cuena jíllotaite, íemo dama íeiena cuena ráiruite, monamo ite ie illáimana illánomo cue dúcillena. Ñuera ebíredifue jaca ninomo íemo íteza. Daíítadeza.

Iraicaiño uáiduafuiái naa ézicigafuiái diga

19 Mai, Prisca, Aquila diga caimare uáidori, naa Onesíforo comini diga.

20 Erasto Corinto jófuemo fiébide. Cue nabai Trófimo ie irárenamona, Mileto jófuemo cue fieca.

21 Mai raire rozírediruillái nai dúciñena llezica benó o biri. Benómona jiáimaci omo uai orédiaíoi, be nímaci: Eubulo, íemo Pudente, íemo Lino, íemo Claudia. Daje izói nana Crístomo jainaide ámatiaí o uáidotiaíoi.

22 Cai Ocuíraima Jesucristo nágarui ómoimo nabáirifireillena Juziñamui jicádicue. Daje izói Juziñamui nana omoi ézicillena jicádicue. Mai daíítadeza; jae ñie.

SAN PABLO TÍTOMO ORÉCABE

La Carta del Apóstol San Pablo a Tito

Pablo Títomo cuete

¹ Páblodicue. Juzíñamui táijitagamiedicue. Jesucristo orécamiedicue. Juzíñamui nizécanomo ínotalle uai cue llúájillena ie orécamiedicue. Daje izói cai ínoga ua uai, íaioi onóillena orécacue.

² Afe bie cai ínoga ua uai, jaca ninomo ñue cai illínomo cai ocuínranomo móirede. Nai énie cómuñenia uícodo, Juzíñamui afe zíñona cai cáaillinona lote. Juzíñamui jaca táinona llófinide.

³ Ja birui ie llóiacaga uaina, ie mamécaruimo cuemo jónega llófuecaillado caina onótate. Uafue, cai Jíllotaraima Juzíñamui afe daje uai cue llófuecaillena cue ocuide.

⁴ Tito, daje izói Juzíñamuimo ínoticoco, íemona nahí cue jitó izóidio. Jira bibe omo cueticue. Afe llezica, cai Moo Juzíñamui cai Ocuífiredede cai Jíllotaraima Jesucristo diga o ñue ézicillena jitáidicue. Daje izói omo dúecaillena jitáidicue. Afe dáaruido caimare uái ñue o íllena jicádicue.

Tito Crétamo llófuete

⁵ Monáillai cigi idu Crétamo o cue fiénocaillaruido, nai figo finóbiñede raa ñue daje dine jaícina o finózillena ona fiédicue. Aféruído naga diga jofue illánuiamo ite Juzíñamuimo jainaide gairídinomo íaioi ócuitimiena o jóneri daidicue. Ñue ócuite eicomínina jenoda o jónetadicue. Afe izói nauí uícodo omo llonódacaidicue.

⁶ Naga ñue ocuide éicome nífuenino írede. Daje izói afémie daa ringo otímie írena. Daje izói ie úruiai Juzíñamuimo ñue ínorediaíoi. Afe úruiai fiénidífueña jóoneñegazana írediaíoi. Ocuilla uaina náfueñedino izói índiaíoi.

⁷ Iemo naga ócuitillaíma Juzíñamui dibénemo ocuícuaíoi. Ie jira afémie nífuenino jaícina ñue írede. Daje izói afémie “Cue bie iere ríimiedicue” daíñide. Daje izói afémie comécina éocainide. Daje izói afémie jífaíñide. Daje izói afémie illáiredimiena íñide. Daje izói afémie fia Juzíñamuimo táijinado úcube otímiena íñide.

⁸ Mei jíáfodo, afémie ie jofomo mácaíbitinona jíáfodo comécíñeno caimare llínofiredimiena írede. Afémie ñue caimare finófredimiena írena. Afe izói dama ie abíña ñue ocuídímiena írena. Afe izói afémie comécina jaícina itímiena

írena. Afe izói afémie Juzíñamuimo ñue jaináidimiena írena. Afe izói afémie dama ie abina lletádimiena írena.

⁹ Afémie ñue ínofirega íemo lloga uaimo iere coméciirede, jíaimaci comécina náicaitallena. Iemo jíái afémie daíí írede, nana uáitatinona uafue daíítallena.

¹⁰ Mei uafue, aillo ocuícana náfueñedino ite. Judíuaimo ite nabene. Afémaci táinodo úritiaioi. Afe llezica comínina jífuetiaioi.

¹¹ Afémaci úrilla llíicaitarede, mei dáarie afézie nana íaioi ñue ínogafue dobáiñotadiaioiza. Afe llezica llófuerainina uaido llófueñrediaioi, meáirede fínuado úcube óllena.

¹² Afe Creta énie imácimona daade uai jino lloraima, ie nabáitiaido úrite. Daide: “Creta imaci táinofuerediaioi, íemo jazici ie rílleniai izóidiaioi, íemo iere güillárediaioi, íemo jaca iere ráiraiediaioi,” daide.

¹³ Afémie uafue daide. Ie jira riire íaioina lletari, Juzíñamuimo íaioi ínogafuena féitañeno ñue jeire íaioi óllena.

¹⁴ Iemo daje izói ñue íaioina lletari, judíuai dani uibica uáillaimo íaioi náfueñeillena. Iemo jíái, ua uáimona oni jíicaidino comútaga ocuilla uaimo íaioi cácareiñeillena.

¹⁵ Nana comécina íaifuenidimíemo naga raa íaifuenide. Mei jíáfodo íadi nana Juzíñamuimo ínoñedino íaifuiaredinomo naga raa íaifuiarede. Daje izói íaioi ífoci uibíllafue íáirede, nana íaioi comeci úrilla uai díga.

¹⁶ Afémaci “Juzíñamuina onódicai” daidíaioi, mei íadi íaioi finócado Juzíñamuina jáanotiaioi. Mei afémaci íáiruigamacina jáidiaioiza. Iemo náfueñedino izói itíaioi; íemo due jiza ñuera raana finónidiaioi.

2

Ñuera uafue llófueina uai

¹ Tito, o daíille uallai ñue uafue llófueina izói jaca jaícina jóirede.

² Nana éicomini jaca jífaifinidinona írede. Daje izói ñuefuiado jacíruiregaiaioi. Iemo, abina ñue onódimiaina írediaioi. Daje izói Juzíñamuimo íaioi ínogafuemo íránifinidimíe izói írediaioi. Daje izói nágaruillaido ñue izíruicana íñrediaioi, íemo jíái jaca comécina járitaifinidiaioi.

³ Daje izói eiringótiai úrioinide; íemo ñuefuedo jacíruiregaiaioi. Afe izói táinona llófinidiaioi. Iemo jíái jaca jífaírado jífaifinidiaioi.

4 Daií ñue íaioi íllana ácatarediaioi, jíaié ringóniaí jítáinguai afe izói íllena. Afedo íaioi inítiaína izíruillena llollíaioi. Daje izói jítaingo íaioi úruiaí gáillena llófueregaiaioi.

5 Afe izói íaioi abina ñue onóillena llófueregaiaioi. Daje izói íaífuiaínidinona íaioi íllena llófueregaiaioi. Afe izói jofo ero finoca raa ñue úiñollena llófueregaiaioi. Daje izói illáinidíngo izói íaioi íllena llófueregaiaioi. Afe izói íaioi ini ocuícana jíeruifireillena llófueregaiaioi. Be daií írediaioi, buna Juzíñamui lloga fieni úridoíñeillena.

6 Daje izói jítócomini ñue íaioi íociretari, abina ñue íaioi onóillena.

7 Iemo jíai, naga o jetáacaga dibénedo o ñue illa izói íaioi íllena ácatari. Iaioina o llófuelle llezica, taino jífueñeno llófuefireiri. Daje izói jífánodoíñeno lloiri.

8 Daje llezica táinodo úrinidío, buna o jánari úriñeillena. Afe daií o uáitaacadino meáiruítiaioi, mei ja odo fieni úrinideza.

9 Iemo jíai, nana ocuícano íaioi ocuídino anamo ñue íllena o llófuefireiri. Daje izói cáimamacína íaioi íllena lloiri. Iemo uai ófireiñedinona írediaioi.

10 Afe izói íaioi táijina llezica íaioi ocuídino ráaié meríñedinona írediaioi; mei jíaífodo naga táijinana jetátagamie ñue ínofiregamiena írede. Afe izói írediaioi, cai Jíllotaraima Juzíñamui lloga uai iere ebíredeza, dani afémaci abido onótallena.

11 Mei jíi, Juzíñamui caimo ie dúecaillana caimo cíotate. Afe caimo ie dúecaillado nana éniemo itino jíllorediaioi. Afe jíllorenafue Juzíñamui jae caína onótate.

12 Afe caimo ie dúecaillamo cai coméciadi fieni illafue cai fáicanocaillena caína onótate. Afe izói bie énie imaci óiacaga cai fáicanocaillena onótagacai. Iemo jíaífodo biruúllaido cai illafue ñue úillena caimo llote. Jaca abí ñue cai ocuífirena caimo llote, íemo cai illafue ñue jaícina cai jóoneillena cai llote. Afe izói Juzíñamuimo dúide uaina caimare finóredicai.

13 Iemo daje izói Juzíñamui uícodo lloga uai, caimare zuíllemo ocuíoiredicai. Mei aferui iere ríinoredimie Juzíñamui, cai Jíllotaraima Jesucristo caimare billíruiza.

14 Afémie cai ícoinia tíillinomo uigámie, nana fiénidífuiaímona cai jíllloillena. Daje izói nana cai íaífuiaí muiñóllena uigámie. Afedo afémie íena caína mamede, ñúefue iere íocire cai finóllena.

15 Be nie o llófuerena uai. Nana nánide comini comécina náicaitari, íemo lletáredino omo ite ocuille ríino dieze íaioina lletáfireiri. Buna ona jámairuitañeno iri.

3

Juziñamui mo ñnotino bie izói írediaioi

1 Jesucristo mo ñnotino énie illaíma anamo íaioi írena uibíñotari, naa ocuínuaíari. Daje izói aféllaímai ocuica uai íaioi jíeruillena uibíñotari. Afe llezica ebena ñúefuiai fínuamo iere jícairediaioi.

2 Daje izói jíaíma jánana fiéni úrinide. Afe izói afémaci comécina caímare uái itínona írediaioi, íemo illáinidinona írediaioi. Iemo daje izói nana comínina omoi uáidua llezica, comécina mánaidimiena o illa jino íaioimo onótari.

3 Mánaidimiena íredicaí. Mei naui uícodo daje izói cai bie jaca abina onóñedinodicaíza. Juziñamui lloga uaimo cacáreiñedicaí. Aféruimo niné féiraitino izói ífiredicaí. Daje izói nana cai comeci fiéni gáinafuiaímo riire ocuícánodicaí; íemo jíái cai íóbitade raamo riire llavécánodicaí; jaca nágarui fiéni ífiredicaí, íemo jíáimamo úradoífiredicaí. Iemo comécina éoidicaí, daje izói conímána éoicaífiredicaí.

4 Mei íadi cai Jíllotaraíma Juziñamui íemo ite cáimafue jino caímo cíotate, íemo nana náiraíaina ie izíruífiréna diga.

5 Afémie caína jíllotaacade, mei íadi jaca nanómona cai daína ñúefuena cai fínuamona Juziñamui caína jíllotañede. Mei jíáifodo dama afémie caímo dúecaillado caína jíllotate. Caímo ite íaífuiai dama ie múiñuado caína jíllotate. Afe llezica Juziñamui Ñuera Joreño afe múiñuado, meine como jéciganona caína finode. Iemona daje izói afe Ñuera Joreño como comútaga ñúefuedo caína úicaite.

6 Cai Jíllotaraíma Jesucristodo, Juziñamui ie Ñuera Joreño jeruíñeno caímo fecade.

7 Afe daí Juziñamui caína dúecaillano, nífuenidinodicaí izói caímo caímare éroide. Afémie daí caína itátate, cai ocuírina zíñona cai illino cai maíñóllena.

8 Bie uailalai iere uáfueza. Daje izói nana bífuiai jeire íaioi ólleza ona íaioína iere llotátaiticue. Daíí ona llotátaiticue Juziñamui mo ñnotino bie ñúefuiaímo nágarui íaioi jíeruillena. Comini canóllena bífuiai nana ñuera.

9 Mei íadi abina onóñedino júfidogafuemona oni o jíicairi. Daje izói jaiáidigíma dibénedo lloga íaioi comuilla táinofuiaímona oni o jíicairi. Afe izói jíáimana uáitafirenamona oni o jíicairi. Iemo jíái, Moisés lloga uaimo ite féiredífuiaído fuirídinomona oni jíicairi. Nana bie izóidífuiai cómena canóñede. Daje izói bífuiai ífócina úriñedinomona comuide.

10 Juzíñamuimo dájena jaináidino cígiri dámie eneno bozíetaiacania, íena uáidota ménacaiño lletari. Daií lletaca cacáacañeniadi, omoi cígimona íena ruifiruri.

11 Uáfueña íena ruifiruri, mei ja áfemona afémie fiénidimiena onóredeza. Afémie ñúfueмона oní nibéfodo fiénidifueмо baíidimie. Iemo dama ie finoca fiénidifuedo duere finóbide.

Pablo naa ie nabáíñiari mamérilla uai

12 Artémána mámeciredimie, nibai Tíquiconá mámeciredimie omo cue óreiadi méifomo, Nicópolis jofue illánomo raire cue eróizaibiri. Afénomo o jáillena raire mamériri, dinomo dáanomo conímamo dúciiticozo. Mei afénomo rozírediruillaí záitaiacadícueza.

13 Iemo nane jiáifue, Zénana mámeciredimie Apolos diga nana omo ite dieze íaillinoína canori. Afe Zena jiáimado ñue úrifiredimie. Iaillinoí jaille llezica jitaica raana íaillinoímo fecari, minícana íaillinoí jítaiñellena.

14 Iemo daa cai Juzíñamuimo jaináidino ñue lloíri, ñúfuiaimo íaioí táijifireilleza; daje izóí jiáie come jitáíadi, íaioí jitailla raana fecari. Iemona íaioí illafue ñue ráifiteza.

Iraicaiño uáiduano ñue íaioí íllena Pablo Juzíñamuimo jicade

15 Nana cue diga itino omo uai orédiaioí. Cai izíruga nabáíñiaí daje Juzíñamuimo ínotino o uáidori. Mei Juzíñamui nana ómoína ñúfue dibénemo itátaiteza. Daiítateza. Jae ñie.

SAN PABLO FILEMÓMO ORÉCABE La Carta del Apóstol San Pablo a Filemón

Pablo Filemomo cuete

¹ Cue Páblodicue. Cristo Jesús ícoinia llavécamiedicue. Cai ama izóidimie Timoteo cue diga illa llezica, Filemomo bibe cueticue. O coco táijinamo izíruiga nabáifiredimiedio.

² Afe llezica Juzíñamuimo ínotingo cai miringo izóidíngo Apiamo cueticue, íemo jíái Juzíñamui uaimo iere cai nícidogafuemo nabáifiredimie Arquípomo cueticue. Iemo jíái Filemón jofomo gairífirede Juzíñamuimo jaináidinomo cueticue.

³ Mai birui cai Moo Juzíñamui cai Ocuíraima Jesucristo diga, ñúefue dibénemo ómoína itátaiteza; daje izói caimare uái illifue ñue ómoimo itátaiteza.

Pablo Filemón Jesucristona izíruilla íemo íe ínuana llote

⁴ Juzíñamui diga cue úrilla llezica omo uíbicaidicue. Uíbicaillano, jaca Juzíñamuina “Figora” dáifiredicue.

⁵ Mei o ñue o finócafue fidídicueza. Cai Ocuíraima Jesuna o izíruillana íemo o ínuana diga, fidídicue. Daje izói nana Juzíñamuimo jaináidinona o izíruillana fidídicue.

⁶ Juzíñamuimo o ínuado jíáimaci afémie uai jeire o otátallena Juzíñamuimo izire jicádicue. Afémaci o diga nana Cristo Jesúmona comútaga cai ñue ínofirenafuiai, ñue onóillena jicádicue.

⁷ Afe daí jicáfiredicue, mei ja o izíruillado íóbidicueza, daje izói áfedo cue comeci íociredeza. Daí ori íóbidicue, mei Crístomo ínotino odo comécina fíracaiáioiza.

Riire ocuícamié Onésimomo Filemón dúecaillena Pablo íemo jicade

⁸ Iemona ja birui, Cristo orécamiéna cue íllado omo dúide finolle raana riire ocuiredicue.

⁹ Mei íadi afe izói ócuiñeiticue. Riire ocuilla baimo caimare jícana gáidicue. Iemo conímana coco izíruillamona omo jícaiticue. Ua ja cue éiromadicue, íemo jíái Cristo Jesús llavécamiedicue.

¹⁰ Daí cue íllamona, daa cue onógamiemo o dúecaillena jicádicue. Benó cue llavéjina llezica afémie cue jító izóidimieña jaide, mei afémie comécina Jesucristomo ínuamei afémie jainátaticueza. Afémie Onésimo. (Jesucristomo íe ráifidimieña omo íllana jaca comécíñedio.)

11 Naui Onésimo omo ráifiñedimie izoide. Mei íadi birui cue o diga afémie ráifidimie izói táijirede.

12 Meine abido íena omo orédicue. Afe ie cue ória cue iere izíruiga úrue ória izoide.

13 Nai benomo ñúefue ícoinia cue llavébilla llezica, afémiena “Benó cue diga fiebi” uáfueña daíacadicue, o méifomo afémie cue canóllena.

14 Mei íadi nai o jii dáiiñenia minícana ocuácañedicue. Daí daidicue, o cue jícajana ocuilla izói íñeillena. Mei jíáfodo dama o comeci jitailla izói cue jícajana o finuana jitáidicue.

15 Nibai Onésimo naui fia nígarui fidi oni o abímona jaide, meine billano biruímona o abímo afémie jaca ninomo íllena.

16 Iemona birui riire ocuícamié izóiñeno, mei jíáfodo izíruiga ama izóidimiena afémie o diga írede. Afe jira naui riire ocuícamié baimo ñúemiena o diga írede. Afe bímie iere izíruiticue, mei íadi o cue baimo íena izíruiredio. Birui daa afe ñue táijitallimie izói íena izíruinidio, mei afe baimo cai Ocuíraimamo jainaide ámana o izíruilla izói, afe izói íena izíruiredio.

17 Iemona uáfueña cue nabáidimie o íadi, cue o llínua izói, afémie o llínori.

18 Nibai nano afémie fiénide raa omo finóadi, íemo jíái nibai minica omo íbañenia, cuemo jica, cue íbállena.

19 Ona uafue cue daítallena cue ónoído cueticue: Afena íbaiticue. Cue Páblodicue. Mei jíáfodo cue ona uibíñotaredicue, dama o ñue méidoga abi cuemo dúide, mei Juzíñamuimo ona ínotadicueza.

20 Ua mii, cai Ocuíraimamo o ínuamona, afe bímie o llínuado caimare cue itátari. Crístomo dájena jainaide ama izói cue comeci fírari.

21 Omo cueticue mei o jíeruifireña ñue onódicueza. Jíái onódicue, cue ocuica baimo finóredio.

22 Afe llezica cue iníllico uiéodo raire finori. Mei bie izói ocuírídicue; Juzíñamuimo omoi jíicállemona, Juzíñamui omoi cue eróizaibillena cuena óreite.

Iraicaiño uáidua, caimare ñúefue dibénemo omoi itátallena

23 Cristo Jesús ícoinia cue diga llavécamie Epafras uai omo orede.

24 Daje izói jíáie cue táijinamo canódimaci Marcos, Aristarco, Demas, Lucas diga omo uai orédiaíoi.

25 Mai mei cai Ocuíraima Jesucristo ñúefue dibénemo ómoína itátaiteza. Daítadeza. Jae ñie.

HEBREO IMÁCIMO CUEGABE

(Daa bimaci jáífodo mameina Judíuai)

La Carta a los Hebreos

Juzíñamui ie Jitodo ja comínimo úrite

¹ Jaiái ninomo cai judíuai jáíaidigimamo Juzíñamui úrite. Ua, ie uai llórainido diga icaiño, diga jáífodo jóoide uáillaído úrite.

² Mei íadi ja birui íirairuillaído Juzíñamui ie Jitodo caimo úrite. Bie Jitó uaido Juzíñamui jaiái bie éniena naa úcuairi finode. Iemo naga raa íeiena náamatallena Juzíñamui íena mamede.

³ Afe Jitó ie Moomo ite ebíredena jino cíotatímie. Daje llezica afémie jino náiraimo cíotaga; ua daje Juzíñamui izóidímie. Nana finoca ráaniaina afémie dájena jaináitano ie ñue rírede uáillaído nágarui ñue jáícina finócana uite. Bímie, cruzmo dama ie die tótajado cai fiénidifuiái ñue múiñua mei, caifo monamo ite Juzíñamui nabezi dibénemo ráinazaide, dinómona nahí illáimaillena.

Juzíñamui Jitó Juzíñamui abi imáciai baímo fígomie

⁴ Afémie afe jamánomo ríredinomo jáillamona, nana Juzíñamui abi imáciai baímo fígomiéna jaide.

⁵ Juzíñamui ie abi imácimona dáamie jaca “Cue jítodio” daíñede. Ua, “Cue Jítodio, ja birui illáimana o jóoneiticue” jaca daje izói íaioina daíñede. Mei íadi ie Jitó Jesucrístona daí daide. Daje izói ie abi imácimona dáamiéna “O moona íiticue” daíñede. Dáanomo “Cue jítóitio” daíñede. Mei íadi Jesuna daí daide.

⁶ Ua Juzíñamui ie izoide daade Jitona bie éniemo comuítajano daide:

Mai, nana Juzíñamui abi imaci, bie cue jitona jacíruiocana ñue omoi íóbitari.

⁷ Mei íadi abi imácina Juzíñamui daide:

Bimaci cue abi canórainina íllamona, íaioina ocuífiredicue. Iemona jairifo raire náidacailla izói, bimaci cue ocuícana raire jetáfirediaioi.

Afe izói nana cue canófirede cue abi imaci jacírede boode iraiçi izói, íaioina ocuífiredicue, —daide.

⁸ Mei jáífodo ie Jitona daide:

Juzíñamui o íllamona, o illáimana illirui jaca ninomo zíñona íite.

Ñue comécina jáícinaínafuedo jaca illáimaífireitio.

⁹Ua, comécina jaícina nainafuena izíruitio, mei íadi fiénidifuiaimo éoicana eróidio.

Iemona Juzíñamui, ua o Juzíñamui, jae ona ióbitade.

Nana Juzíñamui uaina jíeruite o nabáíñiai cáimadua baimo, cáimatagao, —daide.

¹⁰Jiáinomo ie Jitona Juzíñamui daide:

O Ocuíraimadio.

Naga ráaniai o táinia mei, bie énie finóidio.

Nana monamo ite naga úcuai o ónoído finócano.

¹¹Afe énie naa úcuairi niné táinocaitiaioi, mei íadi o jaca zíñona íitio.

Aféniai jácara iníroillai zabilla izói zábitiaioi.

¹²Iemo inícuero dócoiano oni jóonia izói, oni eneno íaioina jóoneitio.

Iemona iniroi jiáiroina abimo jita izói, bínie naa ucúduairi méidoficaitiaioi.

Mei íadi o jaca méidoñellioza, dinó nímieitio.

Omo itifue jaca zíñona íite.

¹³¿Níie mei ie abi ímiemo Juzíñamui llogámie:

O fairíconi o anamo cue anáfenotalle llezica mai benó cue nabézimo illaíma nabai izói ráinazaíbi?

Daí daínámiena íñede. Dama ie Jitó Jesuna daí daide.

¹⁴Nana afe Juzíñamui abi imaci Juzíñamui ocuica canófirede jóriaiai. Ua Juzíñamui orécaiaioi, afémiedo jíllotino ñue rairuñllena.

2

Cristo caímo lluaíbiga jíllona uaimo ñue úíñoredicaí

¹Ie jira Juzíñamui Jitó, Jesucristo daí naga illaíma baimo jáidimiena íllamona, nana Juzíñamui mona cai cacana uaillai jeire cai olle iere jitáirede; omoi jefóniai ñue jinéoiri. Aféuaimo ñue omoi cacáreiri, oni nibéfodo fiénidifuemo cai báíñeillena.

²Mei Juzíñamui jiaí ie abi imácido llogáuai jaca oni caitánide. Naga aféuaina jeire oñédino naa cacáfinidíno raire iere duere finócaiaioi. Mei afe fiénidifue fínuamona Juzíñamui íaioímo jaícina íbana ote.

³Mei íadi birui aféuai baimo jamánomo ñue riírede uaina cacádinodicaí. Ie jira bie Crístono cai cacana uáillaina jeire cai óñenia, ¿níífuedo jaícina íba uáfue mona jílloticaí? ¡Jíllonidicaí! Afe baimo ñue riírede uai nano fueñe Ocuíraíma Jesucristo caímo llogáuai. Ie mei ie daínana cacádinodo aféuai jae cai uafue daíllena llotátaga.

⁴Afe íaioi daína uaimo onótate raado Juzíñamui ñue uai nabáitate. Iemo jíai jacírede raado, aillo cíórainina raa diga afémie ñue uai nabáitate, íaioi daínáuaimo ñue cai ínollena.

Afe llezica Juziñamui ie jítáinafue izói, ie Ñuera Joreño ñúefuiai finolle ríino, illa dígamierie íaioimo fecade, daje izói caimo.

Jesucristo Juziñamui Jitó íadi afémie cai illa izói, fia cómena íficaide

⁵ Cai úrifirena ñuera úreitiruillaído nímie illáimaillena, Juziñamui ie abi imácina: “Illáinina jáitiomoi” daííñede.

⁶ Mei jíáfodo comínina illáimaitaacade. Jaiai Juziñamui Cuegáuaimo David Juziñamuina daide:

¡Níi naga come Juziñamui dibénedo jamáimíiaina!

¿Níbái mei íaioimo comécíidío?

¿Níbái mei íaioi jítótiaimo járitaitio?

⁷ Mei uáfueña due jiza o abi imaci jofófenemo comínina comútatío.

Illaima ebírenano naa ñúefue díga íaioimo nitádío.

⁸ Naga raa íaioi anamo o itátatío.

Daí naga raa íima anamo itábicaillamona, jae mìnica ie anamo itábicaíñedena íñede. Mei íadi ja birui íima dibénedo naga raana náamatañega. Afe izóiñedeza; afémie nahí náamañede.

⁹ Mei íadi jíáfodo birui Jesuna cai onónamona íemo comécíidícaí. Afémie nana íanori due jiza Juziñamui abi imaci jofófemo jónegamie. Aféruido afe Jesús nano cai jíainona, tílla onóillena facade; mei afe llezica nana comíni fiénidífue ícoínia Juziñamui zóofegamieza. Ie mei tíide meine abído cáanamona jamánomoidímíena jaide. Afe mei afémie, illaima izói, ñúefueña nitácámie, jae ebire finócamie, mei nauí ie tíllaruimo íere duere ie zefuállamona. Juziñamui caíri dúecaillano, nana comíni níne táinocaitañellena cai ícoínia Jesuna daí zefuítate.

¹⁰ Juziñamui daí ie Jitó duere finoille caímare íemo jóbide. Ie jira Juziñamui íaioína jíllotaite ífódimie duere zefuállafuedo nana cai jíllonafueña ñue fuitade. Mei jíi, naga raa Juziñamui íeíena ie ínuamona ja birui itíaioi. Afémie nana comínimona aillo jítótiai jíllacade ie caímare ebírenanomo dáanomomo íaioi dúcizaillena.

¹¹ Mei Juziñamui dibénemo oni jónetímie Jesús, nana Juziñamui dibénemo oni jónegamaci díga daje Juziñamuina móorediaioi. Iemona, cai baimo jamánomoidímie íadi, Jesús “Cue ámatiaídiomoi” daí dáinana meáíruíñede.

¹² Afémie Juziñamuina daide:

O mámeceí cue ámatiaímo jíno llóíticue.

Nana omo gairídino cígiri rocana ñúefue omo níítaiticue.

¹³ Jíáinomo Cuegáuaimo daide:

Cue Juziñamuidío. Omo íínoíticue.

Ie mei jíáinomo daide:

Be, benó iticue, Juziñamui cuemo iga naa úruiairi.

¹⁴ Onódiomoiza, nana cai jae cómena comuítagacai. Daií cai íllamona, daje izói Jesús dama cómena comuíbicaide. (Ua, fia come izói jéiciga.) Afe mei come abi íemo íllamona, ie tíllado cai títaite Taifena ríinitade.

¹⁵ Jaiáimona nana tílle jágiedo Taifemo rairuícamacidicai. Mei íadi Jesús jae cai jacíruiñeillena nane ñue cai finode. Ja ráiruiñeganona afémie daií cai ñue orede, nana nauí cai caana llezica tíllena jacíruiticai íadi.

¹⁶ Mei uáfodo onóigaza: Jesús ie bíllado Juziñamui abi imácina cánuaibíñedeza, mei íadi cómena íficaillano nana Abrahámona comuídigimana cánuaibite naa jíaie Juziñamuimo íinotínoiri.

¹⁷ Afémie cai cánuaibillemona ie ámatiai nana íaioi illa izói afémie íficaillana iere jítaíredeza, mei dúecaífirede nahí comínimona Juziñamuimo comínido úritíllaimana jáideza. Ua íinofirega Juziñamuimo úriraimana jáiacade, afe daií ie tíllado comínimo ite fiénidífuiai oni muiñóllena.

¹⁸ Mei Jesucristo íaífue fiéni facátafuíaímona duere zefuide, aféfuemo baiíñede íadi; íemona ja birui fiéni Taife facátagamacina cánua ríino Crístomo íteza, ja caina ñue canórede.

3

Jesús Moisés baimo jamánomoidímie

¹ Ie jira, cue ñue ámatiai, Juziñamui uáidogamací díbénemo jaináidíomoiza, Jesumo izire comeci omoi facari; ua cai jeire oga ñúefue lluaíbitagamíemo ñue comeci omoi facari. Iemo nane Juziñamui díbénemo caído ñue úritímíemo, mai íemo comeci omoi facari.

² Bie Jesús íena daií mamédímie ocuica uaina jaca nágaruillai íinofírede; ua, jaiáidímie Moisés nana íemo llogáuaina jeire ófírena izói, afe izói bímie nana íemo ocuica uaina jeire ófírede.

³⁻⁴ Jae onódiomoiza naga jofo come niga; dama abina niñédeza. Mei íadi naga ráaniai finódímie Juziñamui. Iemo daje izói ja onódiomoiza, naga jofo niraíma afe nigaco baimo ñúemieza. Afémíemo jamánomo ñúefue jóonere. Ie izói afe bie Jesús Moisés baimo ñúefuena nitáregamie, mei naga raa afémie comuítagaza; íemo jíái daje izói Juziñamuimo cai jaináinana Jesús comuítateza.

⁵ Ua, afe Moisés nana Juziñamui íemo llogáuai, Juziñamui díbénemo tájiaacadímie izói, aféuaina ñue jaícina Juziñamui eneno nizeca Israel náiraimo llotátate. Afe daií afémie ie méifodo bite llófuellífuemo uai nabáitate.

⁶ Mei íadi Cristo, jofona náamataga Jitó izói, nana ie anamo itínona ñue jaícina ocuíoide. (Afe daíi Cristo Moisés báifene ímienaza onódicai, mei naga jitó, jofo ero tájiraima baimo itímienaza.) Iemona Cristo dáinana, cai ínuafue ñue riire itífuedo are illa ícoimo jeire cai oíadi, Juzíñamui comínidicai. Afe llezica afémiemo caimare cai úíñuana jitáirede.

Juzíñamui comini comeci caimare uái illafue

⁷ Ie jira Juzíñamui Ñuera Joreño jaii Cuegáuaido daide: Birui Juzíñamui daínáuai omoi cacana llezica omoi coméciai riiretaño iri.

⁸ Jaii énie zaféredinodo Israel comini facátaruimo afémaci íaiói comeci riire ínuano Juzíñamuina uáitaiái.

Jíi, afe izói omoi íñeno iri, daide.

⁹ Iemo nane Juzíñamui daide:

Aféruillaído jaii omoi uzútiai Judíuiai cuemo íñoño fieni facátafuedo cuena facátataí.

Cuarenta diga fimónado nana íaióimo cue finócafuiaina ciódiaí íadi, cuemo fieni comécidiaí.

¹⁰ Ie jira afe bigima cuena rícaitate.

Afémacido daidicue: “Íaiói comeci cuemo figo jaináñenamona, cue lloga io onóño oni nibéfodo jáidinona itíaiói.”

¹¹ Iemona áferi ícírillano riirede uaido daidicue: “Jaca cue lloga caimare comécina uái ocózinaillana óñeitiaí,” daidicue.

¹² Amatiai, daje izói figóñede, ñúefuena íairuiga íñoñede comécimona mai abí omoi rairuiri, afe izói omoi íñeillena. Mei afe izóidimie cai caade Juzíñamuimona oni eneno jica íteza.

¹³ Mei íadi nágaruillaído, Juzíñamui ómoína nai uáidua llezica, Juzíñamui dibénemo ñue riire jainairi. Iemo dani ómoimona ñue lletari. Daíi ñue omoi llóiri, fiénidifue ie abi jífuiáfuedo buna ómoimona dáamie comécina riireiñellena.

¹⁴ Mei nanóidemono caimo ite izire ínogafue, riire fáicanocaiño uáfuena cai onóyadi, jae Cristo dibénemo jaináidinodicaí. Aféfuemo rairuíño ñue omoi jíruiri.

¹⁵ Juzíñamui Cuegáuai daíi daide:

Birui Juzíñamui daínáuaina omoi cacana llezica, jaii Israel Juzíñamuina uáitajaruimo comeci riirena izói, omoi comeci riiretaneño iri.

¹⁶ ¿Bu mei afe Juzíñamui uai cacáдино íadi, nane dáanomo íena uáitate? Mei nana Egíptomona Moisés bairócamaci Juzíñamuina uáitate.

¹⁷ ¿Mei nímaci cuarenta diga fimona Juzíñamuina ícíritate? Mei nana afe Juzíñamui uai íñoño fieni finódino; ní afémaci ícuruai énie zaféredinomo fiénocaiga.

18 ¿Ñi náiraina riírede uaido Juzíñamui daide: “Jaca cue lloga caimare comécina uái ocózinainllinomo dúciñeitiomoi?” Mei nana afe ie uaina cacádinona íadi aféuaina jeire oñédinona daií daide.

19 Daií íaiioina dáinana íaiioi ñinoñenado jofu cáimanomo dúcinidiaioi. Ua daií ñúenomo íaiioi dúciñenana onódicai.

4

1 Ja birui Juzíñamui uafue caimo lloga caimare comécina uái ocózinainllana cai olle uai caimo ite. Aféuai nai caimo illa llezica mai ómoimona dáamie aféuai comécimo óñeillena daiítadifuemona mai abí omoi rairuiri.

2 Mei uafue cai bie ñúefuena llogámacidicai. Ua afe jaiiai Egíptomona bairócano ñúefuena llóina izói ñúefuena llogámacidicai. Mei íadi íaiioi cacana uai figo íaiioina canóñede; mei ñinoñediaioiza fia táinona cacádiaioiza.

3-4 Mei íadi Juzíñamui lloga caimare comécina uái ocózinainllinomo nahí jofu jáidinodicai, mei ie uaina ñue cai ñinofirenado. Birui Jesumo cai ñinuamona, caimare comei jacíruiñenafue dibénemo jónegacai. Jira ocózinairanomo táijiñeno cai illa izói, jae caimare uái iticai. Ie mei uire Juzíñamui illánomo ñue afémie diga caimare uái íiticai. Jaiiai ñinoñedinona Juzíñamui daide:

Iaioimo cue rícaillano ñue riírede uaido daidicue, “Afe cue lloga caimare comécina uái ocózinainllinomo jaca dúciñeitiaioi,” daidicue.

Daií Juzíñamui íaiioina daide. Mei íadi ua íaiioi caimare illifue Juzíñamui are uícomo mamécaza; mei jae are énie ie comuitajarumona, nana Juzíñamui ie finócafuiiai, naa caimare cai illífuiairi, jae fuitádeza. Mei Juzíñamui jiáinomo ie Cuegáuaimo afe ie ocózinaiilaruido úrite; daide:

Juzíñamui seis dígarui táijide; ie táijina mei siete iruimo nana ie finócafuiaimona caimare uái ocózinaide.

5 Afe mei jiáiruido ie Cuegáuaimo Juzíñamui daide:

Cue lloga caimare comécina uái ocózinainllinomo dúciñeitiaioi.

6 Iemo ñúefuena nanoide cacáдино ñinoñenamona afénomo jofu íaiioi jáinina méifomo, áfeo nai jiáimaci jáillena túide.

7 Ie jira Juzíñamui diga fimona jailla mei, David roránicuaído comini uáiduano meine jiáie billirui íaioimo llote. Aféuaimo, due jiza íllamona cue lloga izói, Juzíñamui daide:

Birui Juzíñamui daínáuaina cacádiomoiiza omoi comécina riíretañeno iri, daide.

8 Mei íadi Josué afe jaiáidinona nahí caimare come comei jacíruiñenanomo uíñede. Ie jira diga fimona illa mei Juzíñamui meine abido comini caimare illíruina úrite.

⁹ Iemona afe nahí caimare come comécina uái ocózinailafue nai ite, Juziñamuimo jaináidimacina daní íaioiena maiñóllena. Afe ñue caimare cai illífue ocózinailaruimo cai ocózinaila izoide.

¹⁰ Mei naga afe Juziñamuimona oga caimare illífueña maiñódime, dama ie jilloille naa ie nícidogano fáicanocaillano, caimare uái ite. Ua Juziñamui naga ráaniai ie fínua fuilla mei, ocózinailano caimare uái ite. Afémie uái illa izói caimare uái iticai.

¹¹ Ie jira afe caimare cai illífueña mai ñue omoi maiñori. Mai benómona daí omoi ífireiri, ómoimona buna jáiairagima bífueña íaioi ñnoñenado íaifuemo baiilla izói omoi báñeillena.

¹² Nana Juziñamui lloga uai, jaca íocire cáadime izoide. Afe uai jaca ninomo riíredeza, buna oni caitánide uai. Aféuai comini ífóciaino déifirede; ua íaioi comécina zuitáfirede. Mei jii, jaire jicaica lloéfaido abi ñeta iere jofó ícurumo raire dúcizailla izói, afe izói Juziñamui uai nana cai comeci ífuiái onótate. Uáfueña cai comeci facáduana naa cai comeci jítailafuiairi fídiano ñue uáfodo jaícina jino caimo onótate.

¹³ Nana Juziñamui finócafuiái íemona oni retáidonide. Ua, daa Juziñamui cióñenamiéna iñede. Nana cai comeciillafuiaí cai finócafuiái diga, uáfori cai nahí jicánoraima ui anamo ite.

Jesús Juziñamui dibénemo caido ñue úrifiredillaíma

¹⁴ Jae Juziñamui Jitó, Jesús, mona úillie illano iere caifófenemo jaillano, Juziñamui illánomo dúcide. Dúciillano Juziñamuimo dibénemo caido ñue raire úriraimana jaide; ua afémie caido úrifiredillaímana jóonega. Afe bie úriraima caimo íllaza, mai nana afémiemo cai comécilli; afémiedo cai ñnogafuiaí fáicanocaiñeno jaícina riire ñue íemo cai ñnoilli.

¹⁵ Afe caido Juziñamuimo úrifiredillaíma nana cai abi riídolle riino iñénana onode. Ua afe cai riino iñenamona cai féirairénana afémie onode. Ie onónamona caimo dúceafirede; mei afémie cai izoide cómena íficaillamona, nana fieni facátafuiaína cai cacana izói cacade íadi afe fiénidífuiaímo baiñede. Iemona Juziñamui dinena jáiredicai.

¹⁶ Ie jira Juziñamui illáimana illánomo cai úrizaili; mai omoi jacíruiñeno afe caido úrifiredillaímado Juziñamuimo raire úrifireiri. Daí íemo úriredicai caina ie dúceañano cai fieni finócafuiái íba caimo óñeillena; daje izói afémie cai jítáilliruido cai canóllena, afémiemo úriredicai.

5

¹ Naga come dibéfodo Juziñamuimo úritillaíma comínimona nizada oga. Uano Juziñamuimo comínido úrillena mamécamie. Daje izói afémie comini dibéfodo Juziñamui íóbitalle ráfuiái finófireillena mamécamie. Íaioi Juziñamuimo fia iga ráaniai

afémie izájite. Daje izói íaiói fiénidifue iba otátañelle fia fállena fecaca tóica rílleniai afémie Juzíñamuimo izájite.

² Afémie ríinide cómena íllamona, íaiói illa izói abina onóñedimacina íiaicana comeci járitañeno caimare fíraizitaite. Daje izói oni nibéfomo baíidinona comeci járitañeno llétaite.

³ Mei afe nizécamié cai izói ríinidimie. Iemona dama ie íaífuiai muiñolle tóica rille jáímaci fécajilla izói, afémie jáí fécajirede. Ua nana comini dibéfodo izáibilla izói, dama íeiena afémie izáibirede.

⁴ Afe iere ñuera Juzíñamuimo úriraimana íllena, buna dama ie comeci jitaina izói ínide; dama Juzíñamui jóonegamie daí írena. Afémie caimare jacíruigamie. Jáíáidíruimo daí Juzíñamui Aarona uáidote. Uáiduano, Juzíñamui íena nizeda úritillaimana jóonete.

⁵ Afe izói Jesucristo Juzíñamuimo comínido úriraimana íllena raire dama uícoficaiñede. Mei íadi Juzíñamui daí úritillaimana ie jóoniacana llezica íena daide:

Cue jitódio; ja birui illáimana o jóoneitícue, daide.

⁶ Ie mei daí dainámiena Juzíñamui jáínomo nane daide:

Jaca ninomo Juzíñamuimo comini dibéfodo úriraimadio. Ua jáiai ninomo Juzíñamuimo úriraima Melquisedec izói jaca ninomo Juzíñamuimo comini dibéfodo zííñona úriraimana ítío.

Aquíe izói Juzíñamui ie Jitó Jesuna daide.

⁷ Cristo cai come izói bie éniédo jáicaillarullaído, izire éecana Juzíñamuimo comeci facade. Iemo dáaruido Juzíñamuimo izire jicade. Afémie daí íena jíllotaredimie comécido úrite; daide: “Bie cue tíacanafuemona mai cue jíllota” daide. Iemo Moo Juzíñamui anamo afémie ñue itábicaillamona comécido Juzíñamuimo ie jícajana Juzíñamui cacade.

⁸ Daí Jesucristo Juzíñamui Jitó íadi, ie duere zefuíllafuiaído ocuilla uai anamo itábicaillana fibide.

⁹ Afemona afémie daí nana cai jíllóillí fue ñue fuitállena jamánomo jáicina fibítagamiena jaide. Ie jira nana íemo ínotimaci dibénemo Jesús zííñona jíllotaramana jaide. Ua zííñona jíllonafue tainédimiena jaide.

¹⁰ Mei jira Melquisedec izóidimie Juzíñamuimo comini dibéfodo zííño úrifireitimiena, Jesús jae Juzíñamui mamécamié.

Cai ínogafue meine abído cai jáanolle iere jacírede

¹¹ Bífuiáido aillo úriacadicue, mei íadi iere cacáacañediomoi. Iemona nai figo baitáñedino izói itíomoi. Daí omoi íllamona, bífuiai ómoimo jino cue llolle iere féirede.

12 Naui nano Crístomo omoi ñnuaruimona jae diga fimona jaide. Iemona jae oni jiáimacimo omoi llófuerizaille iere jitáirede. Mei jiáifodo ja birui meine abido Juzíñamui llogáuai tainéinafuaiaina ómoimo jiáima llófuelle jitáirede. Nai monoi jirode úrue izói meine abido úruetaidiomoi; nai figo baitáñedino izói itíomoi. Ua llíciaina nai rínide izóidinona abido jáidiomoi.

13 Mei jii, naga monoi jirófredino, móonaiñena llezica nai dúetiru. Daje izói naga Juzíñamui anamo ñue jaícina caina móonaitade llófueinafue dibénemo baitáñedime nai úrue izoide. Mei afémaci nai móonaiñeno úruiai izói baitáñediaoiza.

14 Mei jiáifodo dama móonaite écomini llíciaina rírena. Afe izói juárede llófueinafue ñue onona dama comécina ñue jéedimacimo dúide; mei afémaci aillo facáfírenamona ñúefue fiénidifue baimo ñue onónana fibídiaoiza.

6

1 Ie jira afe nánoide Cristo dibéfodo llogáfuiái ómoimo llúana ja moziñocaidicue, jiáie cómfue ómoimo jino cue llólleña. Ómoimo cue lolle bie cómfue, Juzíñamui llogáuailaido ómoína ñue jaícina móonaitaite. Aféfuiai mai jeire cai olli. Nano uícodo lloga ñúefue jillácina meine abido diga icaiño ómoína llófueñeiticue. Afe nanóidifuiái bie izói daide: “Ómoína jillotañeite omoi nícidogafuiái fáicanocaillano ñúefuena méidori. Méiduanó, mai Juzíñamuimo omoi ñnori,” daide.

2 Iemo afe nanóidifuiái báutizaafuedo úrite. Iemo dáanomo onoi cómemo bitafuedo úrite. Daje izói come tulle mei, afe tídinomona meine abido cáailifue llote. Afe emódomo, írairuimo Juzíñamui nana comínimo jicánolle mei zíñona duere finótallifuedo úrite.

3 Nana bie nanoide llogáfuiaina meine abido llófueñeiticue. Mei íadi, Juzíñamui comeci jitaina izói, afémie cue canólledo, ñue móonaitadifuiaina omoi llófueiticue.

4-6 Dai birui ómoimo llófueacadiceza, mei nanóidifuiaina uáitajano oni jiáifodo féiraitimiai íaiói illafue nano ñue ñnogafuena jaca méidonide; mei afe ñúefuena nai náfueñediaoiza. ¡Mai, abi omoi rairuiri! Afe daiñadimaci nauí dáaruina Juzíñamui llófuegamaci izóidiaoí; ua Juzíñamui dibénedo ífócina déitaganona itíaiói. Daje izói, monamo ite Juzíñamui daina caimátallifueña facádiaoí. Iemo daje izói afémaci Juzíñamui Ñuera Joreño úcaillana jae facádiaoí. Afe llezica Juzíñamui ebírede daináuai cómena ñúetatífueña afe íaiói fácamona, ñúerana onódiaoí. Afe emódomo, Juzíñamui Jitó uire illáimana illirui llezica, íemo ite comini cáimadolle rínodo jae bimaci canócaiaoí. Jae nana bie núefuina fibídiaoí. Mei íadi afe mei Juzíñamui ífuina móonaitaoíñeno, aféfuiaiana

íaiói uáitaiadi ñúefuena méidofinidinona jáidiaíoi; mei daií afémaci íllamona Juzíñamui Jitona cruzmo fatátatimaci illa izói afémaci dani itíaiíoiza. Ua nairai uiécori íena jifánodoia izói íena meáidaitadaiói.

⁷ Bie izoide comini comue jacafai aiñena izoide. Juzíñamui bíitaga noci naga éniemo diga ícaiño biide. Iemona afe éniemona ñue ria aite, afe éniemo táijidino güllena. Aféniena Juzíñamui ézicite.

⁸ Iadi jáinomo noci bíilla mei, daa figóñede éegiai ailla, naa zaie diga. Afe izóidinie ráifiñedeza; nibai íanori íllamona Juzíñamui fáidoite. Iirainomo afénie jobáillamo dúide, naa afénomo zicódinuairi mei figóñedeza.

Cai úiñoigafue caina riire nabaide cai ñnogafue féiñellena

⁹ Mei íadi cue izíruiga ámatiaídiomoi. Jae cue lloga faidórafue baimo jamánomo ñúefuiai dibénemo jaináidiomoi. Ua omoi jíllonafuemona comuide cáimaduafuiai maiñófirediomoi. Aféfuena ñue onódicue.

¹⁰ Juzíñamui comécina jaícina jóidimie. Iemona nana íena omoi izíruillamona omoi finoca Juzíñamui comini cánua ráaniaina, afémie féitañede. Daje izói aféfuiaimo nai birui jíeruitiomoi. Ua Juzíñamui jaináidinona izíruillano, ñue afémacina riire canófirediomoi.

¹¹ Ie mei birui afe izire omoi nícidua izói, daje izói ómoimona illa dígamieriena Juzíñamuimo ocuíriri daidicue. Iemona omoi ñnogafuiai jeire ómoína otátacadicue, omoi úiñoigafue táinomo fáifiñellena, mei jáífodo ñue jaícina omoi fuitállena. Afemo ómoína nágarui izire coméciri daidicue.

¹² Daií izire omoi comécioillamona ráiraiédino illa izói íñeitiomoi. Mei omoi ñue comécillamona, jáífodo daade Juzíñamui lloga ua caimare illafue dibénemo itino illa izói íitiomoi. Afémaci íaiói ñnogafuedo íaiói abina ñue finóinafuena Juzíñamuimona otíaiói. Ua comeci járitaiñeno are illa ícoimo Juzíñamui uícodo íaióimo lloga ñúefuena maiñóroidiaíoi. Iaiói illáfuemo ñue omoi coméciri, íaiói illa izói omoi íllena.

¹³ Mei jii, Juzíñamui iere ñnofiregamie. Jaiai Abraham illáruimo Juzíñamui uafue uai Abrahamo llote. “Aillo comini jebuítaitio” jaiai uícodo íemo llote. Llua llezica uafue daiíllena Juzíñamui dama ie mámecina llínote, aféfuena Abraham ñue ñnollena. Ua Juzíñamui dama ie mámecina llínote, mei jáie baimo jamánomoidimiena íñedeza.

¹⁴ Daií Juzíñamui Abrahana daide: “Uafue iere ona ñue caimátaitaicue. Jae cue o jítóretallemona, o erófene igímana jamánomo iere jebuítaitaicue,” daide.

15 Iemona Abraham comeci raire járitaiñeno, diga fimona áfemo úiñooides. Daií ie ocuúrina mei, afe Juziñamui lloga caimare ie nairai jebuúllifueña Abraham ñue maiñódeza.

16 Bínie comini cígimona dáamie uáfueña daiíacana llezica, afémie baimo riúredimie mámedido uafue daiítate. Daií lloga uaina buna oni caitáñede. Nana dani íaiói júfídogana záitate.

17 Daje izói Juziñamui ie lloga finóllifue, jáie ñue riúrede uaido, aféfuena iere uafue daide. Afémie daií dáideza, mei ie úicodo lloga ñúefueña máíñoitínomo, afefue ua jáífodo méidonidena jino íaióimo uáfodo llóiacadeza.

18 Daií Juziñamui mena caitánide uáillaido íaióimo llote. Afe ménacaiño ie daina dibénemo Juziñamui táinona llónide. Afémie daií daide, áfemona cai comécina ñue íociretallena. Iemona caimo ie lloga ñue cai jíllonafuemo fáicanocaiñeno ínofiredicai. Mei jii, cai Jíllotaraima Jesucrístomo jarire jaillano caina ie úiñotaga comeci íaifue dóllena raire íemo jicádicaí, caimo ite fiénidifue iba óñeillena.

19 Afémie cai jíllotallena caimare úiñooidicai. Iemona afémie caina daináuai cai comeci nífuenina ñue mozóitade. Ua cai úiñoigafue caina riire nabaide cai ínogafuiai féiñellena. Daií comeci docáiñeno ñue riire nabáitaga jacíruiñedinodicai. Mei cai jíllotaite cai úiñoogamie Jesús, caifo monamo Juziñamui nahí ie iránomo íteza.

20 Afe Jesús, cai jáillio ífódimiena afénomo jae jaide. Daií íllamona afémie jae comínido Juziñamuimo zíiñona úritillaimana jaide. Ua, jaiiai Juziñamuimo úriraima Melquisedec izóinado, Jesús jaca ninomo caído úrite.

7

Jesús, jaiiai Melquisedec illa izói comínido Juziñamuimo úriraima

1 Afe Melquisedec Salem jofue illaima. Afe llezica afémie comini dibéfodo jamánomoide daade Juziñamuimo úrifredimie. Jaiiai illáruimo Abraham jáie aféniemo ite illáinina anáfenuaide. Íaióina anáfenuano Abraham meine bítemo, afe Melquisedec io anamo Abrahamo dúcizaide. Dúciillano Melquisedec, Abraham abi ñue finóllena Juziñamuimo jicade.

2 Afe llezica Abraham nana ie bairoca ñuera ráaniaimona, Juziñamui íena eneno mameca ráaniaina, Melquisedécimo raiñoñeno fia fecade. Melquisedec nanoide daina mámecei “Comécina jáicinaidillaima” fueñe daiíacade. Ie mei afémie nane jáici ote: “Salem Illaima.” Afeci “Comini comécina caimare uái itátatillaima,” daiíacade.

3 Afe Melquisedec moo mámecei jaca onónide, naa ie ei mámecei diga. Daje izói ie emódoidigima jái óñoñega. Daje izói

afémie jocóinarui ónoñega, ie tíllarui díga. Iemona afémiena comini “Ziñona itímie” daide. Afe Melquisedec comini cígiri illáfuedo Juzíñamui Jitó ziñona cai dibéfodo úriraimana illáfueda caina fidítate.

⁴⁻⁵ Mai bífuemo ñue omoi coméciri, Melquisedécimo ite jamánomoidífueda omoi onóillena. Ua Melquisedec, cai nanoide jáiairagíma Abraham baimo jamánomoidímie. Mei Abraham ie bairoca ráamona Melquisedécimo fecádeza.

Abraham enaize Jacob doce dígade jitórede. Iemo afe jitóniaí cígimona Leví comuídeza. Afémie comini dibéfodo Juzíñamuimo úrillena Juzíñamui nizeda ogámie. Ie jira nana judíuai Juzíñamuimo úriraini Leví úicoidigimamona comuítagaiaíoi. Afe Juzíñamui nizeca Leví náiraina, Juzíñamui Moisés ocuica uaido daide: “Nana jáie judíuai nairai imácimona Juzíñamuimo dúide ráaniaina órediomoi,” daide. Ua Leví náiraimo ibárede, nana jáie Israel nairai daa Abrahámona comuídino íadi. Ie jira Leví comini nana afe Juzíñamuimo dúide ráaniaina llínofirediaíoi.

⁶ Mei íadi afe Melquisedec, Leví nairai izíe íeñede. Mei íadi afémie áfena llínoñeniadi afe Melquisedec, Leví emódoidigíma Abrahámona Juzíñamuimo dúide ráaniaina uáfueda llínote. Iemona Melquisedec Leví baimo jamánomoidímieza onódicai.

Afe ráaniaí ie llínua llezica, Melquisedec Abrahamo úrite. Abraham Juzíñamui íemo ñue finóllifue, uíecodo fidítagamie. Iemo ja birui Melquisedec afémie ñue éziciano daide: “Juzíñamui ona ñue cánoiteza,” daide.

⁷ ¿Nibémie mei jamánomoidímiena? ¿Ezicitímie mei nibai ézicigamie? Ua, ézicitímie baimo jamánomoina. Afefue buna jáanoñega.

⁸ Nane jáífue llóiticue. Cai cígimona eneno nizeca Leví comini, Juzíñamui íena nano mameca ráaniaina llínofiredino. Mei íadi afémaci fia comíniza tíffirediaíoi. Mei jáífodo afe jáie llínotímie Melquisedécina mámeciredímie Juzíñamui Cuegáuai daína izói, tíñeno caade izóidímie. Ie jira Melquisedec jamánomo bámoidímie. Leví imaci nai Melquisedec jofófeneidino.

⁹ Iemo jáífue Levido daírede. Leví Abraham erófene ígíma. Mei íadi afe Juzíñamui íena eneno mameca raana llínofiredímie jaiái uícodo Melquisedécimo ie uzuma Abrahamo Juzíñamuimo dúide raana ibade. Daí Leví comini, jaiái uíecodo Juzíñamuimo dúide raana Melquisedécimo ibádiaíoi.

¹⁰ Mei Leví nai jocóñena llezica ie comuíllino nai Abrahamo íteza. Ua Melquisedec ja Abrahamo dúcinaruimo, Leví jocóillino nai jaca ie nanoide uzúmamo ite.

11 Israel náiraimona eneno nizécazie Leví comini. Aféziemona nizeca nanoide Juzíñamuimo úriraima Aarón. Afémie naa ie erófene igímairi comínido Juzíñamuimo úriraini. Ie jira afe úrirainido Israel nairai Juzíñamui ocuilla uáillaina llogáiaioi. Mei íadi nana afe Juzíñamuimo úriraini finócafuiai comini ua zíñona jílloillena figo jínoinede. Comini comécina Juzíñamui jítaina izói nahí jaícina jóoitañede. Aarón naa ie erófene igímairi finócafuiai figo jínoinena jira, jiáie afémie izóinede baimo jamánomoidimiena jítáidicai, afémaci méifomo jóonellena. Ua Melquisedec zíñona illa izóidimiena jítáidicai. (Ie jira afe Aarón comini meifo méidoitimiena Juzíñamui jae jino náiraimo cíotate. Afémie mámece Jesucristo. Ua Aarón comini méifomo jóonegamie Melquisedec izóidimie Jesús; afémie Aarón dibéfomo jaináinede.)

12 Jae afe jaiái uícomo ite Juzíñamuimo úriraini nana dáanomo jiáiena íaioi méidua llezica, afe Moisés íaioimo ocuica uailai daje izói jiáifodo méidorede.

13 Juzíñamui Cuegáuai daí daínámie cai Ocuíraima Jesucristo. Afe como jóonega Juzíñamuimo caido úriraima Jesús, Leví nairai ímieñede. Jiáziemona comuídímie. Ie nairai ímiaina jaca nizéñega, Juzíñamuimo comínido úrillena. Ua comini fia fecaca tóica rílleniai naa ráaniai diga Juzíñamuimo izájillena, nízeñegaiaioi.

14 Ñue onóigaza cai Ocuíraima Jesús Judá náiraimona comuídímie. Moisés afe náiraimo Juzíñamuimo úrirainina íllena, jaca lloñede.

15 Afe jiáie como jóonega comínido Juzíñamuimo úriraima Jesús, jino cíóillamona, bífuiaina jino uáfodo baimo onódicai; mei dama afémie Melquisedec izóinaza.

16 Bímie dama ie ñue zíñona ífirenamona comínido Juzíñamuimo úriraimana jaide. Mei jiáifodo Leví náiraimona jaiái nizeca Juzíñamuimo úriraini ocuica uai daínado úrirainina jáidiaioi. Afe uai ñie náiraimona nizéllena llote.

17 Mei íadi como jóonegamie Jesuna Juzíñamui ñue rírede nabáitaja uaido daide:

“Melquisedec izói jaca ninomo Juzíñamuimo comínido zíñona úriraimana ja birui itíoza,” daide.

18 Iemona afe uícodo ite ocuica uai jae oni caitaca, mei afe uai ríñideza. Iemo jiái, aféuai comini comeci nahí duáfuenta figo jínotanideza.

19 Afe Moisés ocuica uai buna comécina nahí jaícina finóñede. Mei jiáifodo jiáie aféuai baimo, ñuera cai jílloitaite úiñoigamie Jesucristo jae caimo cíotaga. Afémiedo Juzíñamuimo

áinozifiredicai, uáfodo Juzíñamuimo cai úrillena.

²⁰ Afe Jesucristo Juzíñamui riire nabáirede uaido jóonega.

²¹ Ie uícodo Juzíñamuimo úrirainina jáidino, riirede uaido jóoneñegaiaioi. Mei íadi Jesús comínido Juzíñamuimo úriraimana jáillaruiimo, Juzíñamui riire nabaica uaido ja daií mameca. Mei Juzíñamui ie Cuegáuaimo Jesudo úrite, daide:

“Cue Juzíñamuidicue. Bifue riire cue nabaica uaido daidicue. Cue comeci faca uai jaca jáíuaina méidoñeiticue.

O zíñona comínido Juzíñamuimo úriraimana itio;

Ua Melquisedec izóidimiedio,” daide.

²² Ie jira Jesucristo, Juzíñamui jamánomo ñuera caimo comue finóllifue caina ñue onótate. Ua Jesucristo aféfuemo iere uafue daide. Afe finóllifue Moisés lloga nanoide finóllifue baimo ñuera.

²³ Jesucristo uícoidiruillaimo ite Leví náiraimona nizeca Juzíñamuimo úriraini ua aillo ite; mei íaioi tícoizifirenaimona jaca jáímierna méidofiregaiaioi.

²⁴ Mei íadi Jesús cai dibéfodo Juzíñamuimo úrillana, jaca jáímierna méidonide; mei afémie jaca ninomo zíñona itímieza.

²⁵ Iemona Jesús nana íedo Juzíñamuimo úrizaibitina, jaca ninomo jaícina ñue jíllotarede, mei afe Jesús, íaioiri Juzíñamuimo zíñona úriraimana íllaza.

²⁶ Ua, afémie izoide Juzíñamuimo comínido úritillaimana jaiái ninómona jitáidicai. Ñue cai jíllloillifue afémie caimo ñue zúitaitimie, mei afémie nahí ñuera nífuenidimieza. Afe llezica afémie nana fiénidimaci íaifuemona oni eneno rairuícamié. Ie mei afémie mona ero úcuai illa caifomo, Juzíñamui nahí illánomo uigámie.

²⁷ Jaiái uícomo ite Juzíñamuimo úritillaini nágaruillaído tóica rílleniaina fatá Juzíñamuimo izájifirediaioi. Nano fueñe dani íaioimo ite íaifue ícoinia áfeniaina izájjidiaioi. Afe mei comínimo ite íaifue ícoinia áfeniaina izájifirediaioi. Mei íadi Jesús afe izói fínuana jitáíñede. Afémie dácaíño nana comini íaifue ícoinia dama ie abi Juzíñamuimo fecade. Ua cruzmo ie duere zefuida tíllado abi fecade.

²⁸ Afe Cristo uíécodo lloga ocuúllafuedo llotino, jáíie jamai figo nahí jaícina finótañede comínimona Juzíñamuimo úritillainina mamédiaioi. Mei jáíifodo, afémaci méifomo jóonega úritillaima Jesucristo, Juzíñamui ñue riire nabaica uaido jóonega. Afémie jaca ninomo nahí jaícinaítaga Juzíñamui Jitó.

8

Juzíñamui caimo cómuena finóllifue, Jesús caimo jino denódimie

¹ Nana cai daináfuiaimona llógana bie ñue nahífuena ómoimo llóiticue: Como lloga caimo ñue jóbide caido Juzíñamuimo úriraima birui ja caimo ite. Afémie caifo monamo ite Juzíñamui nabézimo ráinazaide.

² Dinomo Juzíñamui nahí illánomo Jesús íllamona, jamánomo ñuera Juzíñamui uiécomo Jesús caido úricabite, cai jílloillifue ñue caimo zúillena. Afe Juzíñamuimo cai nahí ánozirano comini fínoñega. Jaiai biniemo ite Juzíñamuimo ánoziraco comini niga.

³ Naga Juzíñamuimo úritillaíma, fia iga ráaniai, tóica rílleniai diga Juzíñamuimo fecáfireitimiena mameca. Ie jira cai dibéfodo Juzíñamuimo úriraima Jesús, daje izói dama ie fécajille raa jítáirede.

⁴ Biniemo afémie nibai abido ie bia, afémie caido Juzíñamuimo due jiza úriraimañeite, mei Moisés ocuícuaí daina izói Juzíñamuimo caido úriraini biniemo nai íteza. Daje izói bimaci nai benó Juzíñamuimo fia fecaca raana íemo izájifrediaioiza. (Ie jira caido ziiño úriraima Jesús, caifo monamo Juzíñamuimo cai ie canólledo úricabite.)

⁵ Biniemo ite Juzíñamuimo úriraini aillo ráfuiáido nícidotiaioi. Nana íaioi nícidogafuiaí jánana mameide. Íaioi finócafuiái caifo monamo ite Juzíñamui nahífuiaína caína fidítate. Daje izói biniemo ite jaiai Juzíñamuimo ánoziraco, Juzíñamui nahífuena cai fidítaraco. Afena onódicaíza, mei Moisés afeco nitátaacanuimo, Juzíñamui íena daide:

“Caifónedumo o illa llezica omo cue ácataga afécona o ciona izói, afe izói jaícina mai o niiri,” daide.

⁶ Mei íadi biniemo ite Juzíñamuimo úriraini nícidogafue iere afe baímo, cai caifo monamo ite úritillaíma Jesús caido jamánomo ñuefuena nícidote. Mei jii, afe Jesucristo caimo zuitaca Juzíñamui ñuera cairi comue finóllifue, jaiai Moisés lloga finóllifue baímo ñuera. Mei Moisés ocuica uai baímo, Juzíñamui uícodo lloga cómfue jamánomo ñuera uáimona comuídeza.

⁷ Afe Moisés lloga nanoide finóllifue, comini jílloillena ñue jinoiadi, jáíe uire iite ñue finolle uai jítaiñeitiaioi. Mei íadi afe naonide uai íaioi jílloillena figo jínoñede.

⁸ Afe nano ocuica uai jeire otino nahí jaícinaidífue mo figo dúciñediaioi. Dúciñediaioimona, Juzíñamui ie Cuegáuaimo íaioína daide:

“Uire jáiruido nana Israel náiraimo comue ñue cue finóllifue ócuticue, naa Judá náirairi.

⁹ Jaiái íaiói uzútiaimo cue daina ocuica uai izói, ócuiñeiticue. Jaiái aféruillaído Egipto éniemona afémaci billa llezica íaióina ifódicue:

Ua afémacina izire úcaidicue.

Mei íadi cue lloga ocuica uaina nano íanori fáicanocaillano, áfena figo náfueñediaíoi.

Afe jira íaióina zóofeticue,” Juzíñamui daide.

¹⁰ Nai nane íaióina lluanu Juzíñamui daide:

“Uíreituruillaído Israel imácimo bie izói cue ñue comue finóllifue ócuticue.

Aféruillaído cue ocuica uáillaina íaiói ifócimo jaícina déitaiticue.

Ua aféuaina íaiói comécido jeire íaióina otátaiticue.

Iemona afémacina dama cúeiena nane meine abido máíñoiticue.

Afe llezica íaiói nahí Juzíñamuina íiticue.

Iemo cue náiraina íitiaíoi.

¹¹ Aféruillaído nana afémaci uáfodo ñue cuena ónodiaíoiza, cuena íaiói onóillena abi diné jáíima llónide.

Iemona ie abi ímiaimo buna Juzíñamuina onótanide. Daje izói dámie ie ámamo Juzíñamuina onóillena llóñeite; mei nana cuena ónodiaíoiza.

Naga jamáimie, íemo jáíi naga jamánomoide riíredillaíma, nana daje izói cuena ónoitiaíoi.

¹² Nana íaióimo cue dúecaillamona íaiói fieni finócafuiái ibana óñeiticue.

Nana íaiói comeci íaífuiaina jaca ninomo féitaiticue.

Aféfuiaina úibiñoñeiticue,” dinó Juzíñamui daide.

¹³ Bie méifodo lloga Juzíñamui finóllifue, cómfuena méiduamona, afe uícodo Moisés lloga finóllifue jae jaiáiza feide. Afena Juzíñamui daií uáfodo llote. Iemo naga jaiái raa zabízaillamona raire oni dotánocaiga; oni dotánocailleza cíóñelle.

9

Bíniemo ite Juzíñamuimo ánozirano, jana izói jáíie monamo ite Juzíñamuimo ánozirano cai fíditate

¹ Afe nauí nano lloga finóllifue llua llezica, Juzíñamui íemo ánoziraco nitátate. Afe nitátaja dáaruido, comini Juzíñamuina íóbitalle uallai afémacimo daje izói lloga.

² Afe lloga Juzíñamuimo ánoziraco Moisés nitátaga. Afeco ere niñeno jédaciede iníroina ibáicaco. Afe áreco ero ménaco titaca. Jinóidico Juzíñamui Ñúeco daina. Afeco eromo áillue mechera izoide egáñora ite. Siete diga dájemona boode raa

ite. Dáanomo Juzíñamui dibénemo oni enénorie rairuica pan jóonerabani ite, naa afe páaniairi.

³ Afe áinoziraco jofóidico Jamánomo Ñuera Rairuícaco daina. Afe jofóidico daje izói jédaciede iníroina ruica diné eróicana nacona ibaica. Jédaciede jígaroi izóidena fetaca.

⁴ Afe fetaca jédaciroi abimo uguci jobáirabani ite. Bibani llíaide órona jinófene aifítaga. Bie jofóidico eromo daa áillue ráaniai éenora ite. Cajona eroide. Afe éenoraco nana jinófene órona aifítaga. Afe éenoraco eromo Juzíñamui nofici ibícimo cueda ocuica uaillai ite. Ie jira afeco nofíbícimo cueda Juzíñamui cai ocuilla éenuacona mameina. Iemo afénomo daa oro finoína nogo ite. Afégomo ite Juzíñamui monámona cocítaga güille. Afe güille mámei maná. Daa afe éenoracomo Aarón jigüida izoide radozi ite. Afe idozi jamai jazici radozi óinaza dúididozi. (Zícorede juzítufe izóíñede.) Mei íadi Juzíñamui afe idózina éniemo riñeno, fia táinomona zicótano raire ñue llizítate.

⁵ Afe éenoraco ibáirabíci emódomo mena oro finoína Juzíñamui abi imácina eroide jana naidáide. Mei íadi afe íaillinoi íáicorede. (Afe íaillinoi mámei ráimona “Querubines.”) Afe íaillinoi conima uiécomo eróidiaillinoi. Íaillinoi naidaina cígimo Juzíñamui cícaifirede. Afe Juzíñamuina cíóñenaza; dama ie abi egáñuana cíófírena. Afénomo faga tóiniaí díena recuífirediaioi. Daí recuífirediaioi, Juzíñamui meine abido comínimo dúecaillano, íaioimo ite fiénidífue iba íaioimo óñeillena, ua afe ícoínia íaioína duere fínoñeillena. Nana afe dibénemo ite duera nícidogafuíaína ja birui benomo llónide.

⁶ Afe ocuica áinoziraco nilla mei, íemo naa ie jofe ero ráaniairi finua mei, comínido Juzíñamuimo úriraini jinóidicomo jáifirediaioi. Afénomo íaioimo ocuica comínido Juzíñamui íóbitalle ráaniai finófirediaioi.

⁷ Mei íadi afe jofóidicomo, dama Juzíñamuimo úritillaíma jáifirena. Aféllaíma naga fimónaíaido dácaíño afeco jofe eromo jáirede. Faga tóiniaí díena jaca jofe úifirede. Dama íemo ite onóñeno finoca fiénidífue ícoínia daí díena Juzíñamuimo izájide. Ie mei nane nana comíni íaífue ícoínia jíáíe díena Juzíñamuimo izájide.

⁸ Bífuaído Juzíñamui Ñuera Joreño daa jáífúena cai fidítaiacade. Afefue daide: “Baie jinóidico nai illa llezica, jofóidicomo jiba comíni jaille nai rairuírede. Ua aféruillaído jofe dama Juzíñamui illánomo jáinidiaioi.

⁹ Nana bie Moisés illágimado nícidogafuíaí birui cai

onóillena canode. Ua comínimo ácatafirega raa izoide, aféruído Juzíñamuimo ánozillena nigaco, naa afe eromo íaioi nícidogafuiai, ñue jaícina caina onótate. Biruúllaido judúuai aillo faga tóiníai jíáie fia fecaca raa diga, Juzíñamuimo nai izájifirediaioi. Mei íadi afe bíedo íaioi comeci Juzíñamuimo ñue jaícina jóitanide, mei íaioi comécimo ite fiénidifuiyai nai féitañegaza, fia ibaica izói íteza.

10 Nana afe íaioi nícidogafuiai fia jinófene ífuiyai. Nñe izói íitiaioi daide. Dárie íaioi güille, jirole diga fimairillafuedo úrite. Afe izói fia emódoide múñuafuedo úrite. Nana bífuiyai fia nano nié dño comínimo ocuica, mei Juzíñamui jíáifuenaméidolliruimo nai dúciñedeza. Ie jira aféfuiai daa aféruillai íena ráfide.

11 Mei íadi caído Juzíñamuimo úrifireitillaimo Jesucristo, jae caimo dúcide. Afémiedo ñuera cáimafuiai caimo zúide, mei ua nahí Juzíñamuimo ánoziracomo afémie jaináideza. Afe jaiyai bíniemo ite comini niga Juzíñamuimo ánoziraco jaboide. Afécomona cai íóbillafue baímo, Jesucristo jamánomo ñuera jíllonafue, caífo monámona ana caimo zúitaíbite. Afémie afe nahí Juzíñamuimo ánoziracomo dúide; afeco bínie comini níñega. Dama ie nahico monamo ite.

12 Nana comini íena, dácaíño afeco eromo ite jofóidicomo afémie jaide. Ie jailla lezica chivo die, juráreto jiza die diga uiñede; mei jíáfodo dama ie die uite. Mei jíi, afémie íaífuenidimiena íllamona, cruzmo cai ífomo tíllano, ie die tótado zíñona cai jíllonafue ote.

13 Jaiyai Moisés daína izói, íaicaíllamie íemo ite íaífue bie izói muiñórede. Múíñoñegamie Juzíñamuimo dúide comini cígido macánide. Daje izói afémie Juzíñamuimo nabáirinide. Ie jira faga tóiníai die atírede. Iemo jíáie Juzíñamuimo mameca juráreto jiza jobailla afe jízechoma atírede. Ie mei afe íaicaíllamíemo aféchoma júdairede. Iemona afémie íaicaíñegamíena jaide. Mei jínofena muiñócaza. Ja Juzíñamui comínimo meine abído caímare úrirede.

14 Mei jíi, Juzíñamui dánamona afe tóiníai die ríirede, come jinóidífue mo muiñóllena. Afefue daítania, ua onódicaíza. Mei Jesucristo die jamánomo ríirede. Ua dama afémie ñue nífuenidimíenado Juzíñamuimo ie abí dama izáíbite. Afe ziiño Ñuera Joreño ie cánuado Jesucristo dama ie abí Juzíñamuimo izájide. Iemona ie die tótamona nana cai comécimo ite íaífuiyai muiñótate. Ua nana cai jaiáimona nícidogafuiai caina zíñona cáatañede. Mei íadi Jesucristo díedo cai comeci múíñua mei, ua zíñona cáatagacai, afe jaca nahí caade

Juziñamui ocuícano ráiruiñeno cai jetállena.

¹⁵ Ie jira Jesucristo jae Juziñamui comue finóllifue caimo jino zúitaitimie. Afémiedo nana Juziñamui nizécano uafue uícomo lloga ziiñona cáimaduafuena maiñóritiaioi. Juziñamui daií nana comini jilloillifue uícodo mamede, mei dama Cristo tíllado comini fiénidifuiiai Juziñamui dote. Ua jaiiai uícodo lloga nanoide finóllifue illa llezica, nana aféruimo afémaci fieni finócafuiai ja birui Cristo tílla jírari, Juziñamui dote; duano, nana íemo ínotinona jíllotate. Daií Juziñamuimo ziiñona caimare nabáirillafue maiñódiaioi.

¹⁶⁻¹⁷ Afe maiñórillaufue, come tílla méifomo ítifue izoide. Dámie tíadi ie fiébide feci raa jáimie oni llínoga. Afémie nai tíiñenia, feci raa oni llínoitimie minica raana nai llínonide. Ie jira oni llínoitimie íemo dúide raa maiñóllena, afe raa naama tílla jitáirede. Daje izói Juziñamuimo caimare nabáirillafue cai maiñóllena, Cristo tílla jitáirede.

¹⁸ Afe jira jaiiai uícodo lloga Juziñamui ñue finóllifue tániaruimo díena recuíñorediaioi.

¹⁹ Moisés nana afe ocuica uaillai nana comínimo jino llua mei, afe uaillai cuiábicimo faga tóniaí díena cuirínote. Daje izói afe mei nana comínimo cuirínote. Ua llua mei, Moisés duera “hisopo” daína raroci llínote. Llínuario, afécimo jáirede oveja itíraína maite. Iemo jáinoína jaicuica díedo afe rarócina riáitate. Ríaitano, ocuilla uai cuiábici naa comíniri díena cuirínote.

²⁰ Cuirínua llezica Moisés daide: “Juziñamui ómoiena ocuica ie finóllifue bie die uafue daítate,” daide.

²¹ Daje izói aféruillaído Moisés íaioi iniroi finoina Juziñamuimo ánoziracomo díena cuirínote. Daje izói nana afeco eromo ite Juziñamui ióbifirena raamo díena cuirínote.

²² Ua, Moisés ocuica uai daína izói jamánomo díga raa, díedo Juziñamui dibénemo dua izói ñue finoca. Iemona die tótañegana comini comeci íaifuiiai iba jaca órede.

Cristo dama ie abi Juziñamuimo izájille comini fiénidifuiaina muiñode

²³ Afe comini niga Juziñamuimo ánoziraco Juziñamui ocuide, naa afeco eromo ite ráaniairi. Iemona nana afeco eromo ite ráaniairi Juziñamui dibénemo ite nahífuiaína jánana cai ciona izói caina onótate. Nana biniemo ite afeco ero ráaniai Juziñamui illánomo nahí itífuiiai jana. Ie jira biniemo ite ráaniai dibénemo figura Juziñamui daíllena, bie die recuille jitáirede. Mei íadi Juziñamui nahí illánomo jáifireitino dibénemo, bie die baímo ñuera Juziñamuimo fia izájifireille raa jitáirede,

afémacina Juzíñamui iere figura daiíllena. Ua tóiniaí die baimo Jesucristo jamánomo ñuera die jitáirede.

²⁴ Iemona Cristo tílla lezica, afe Cristo bíniemo ite comini niga Juzíñamuimo ánoziracomo eromo jofo jáiñede. Afe bico fia nahico jana. Mei jáífodo Cristo, Juzíñamui nahí illánomo caido úrillena jae cíocaizaide.

²⁵ Afénomo Cristo dama ie abina, diga icaiño meine nane izájiñede. Mei íadi bíniemo ite Juzíñamuimo comínido úritillaíma, naga fimónado faga tóiniaí die uillano, afe Juzíñamuimo jáiraco jofoide iere ñuera rairuiredicomo jaide.

²⁶ Afémaci jáífirena izói Cristo jáífiredena figóñede. Mei nibai afémie daií diga icaiño jáiadi, íemo énie finuaruimona afémie afe izói diga icaiño meine abido tíirede; mei íadi afe izóiñedeza. Afémie cai illáruillaído jaiái lloga Juzíñamui finóllifue fuilla lezica, dácaiño fia cómena íficaillano caimo cíocaizaibite. Ua afémie bíniemo cai jáínona ie tízaibillado, nana caimo ite fiénidifuiái niné féillena oni dote.

²⁷ Ja onógaza, naga come bíniemo dácaiño tíide. Tílla mei, íaioi illafue Juzíñamui jáícina jicánoite. Aféfuena daje izói ñue onódicai.

²⁸ Daje izói Jesucristo, comini fiénidifuiái oni dóllena dácaiño tízaibite. Ie mei uire jáíruido afémie fiénidifuiái na duáibiñeite; mei jaiái ie dógaza. Mei íadi afémie uafue meine dáanomo cíocaizaibite, nana íena izire úiñoidinona jíllotano monamo ie illánomo úillena.

10

¹ Mei jaiái Moisés ocuica uai naa ie lloga níciduairi, ico nirui bite caimare illífuíai jana. Afe ie lloga jáiaifue nahífueñede. Moisés bie ico zúitífue cai onóillena jana uícodo llote. Iemona naga fimónaiaído faga tóiniaína íaioi úífirena, íaioi comécina figo jáícina jóitañede. Mei uáfueña, afe faga tóiniaí íaioi úífirena Juzíñamuimo ánozidino nahí íaífuenidínona jáitañedeza.

² Mei daií uafue íaífuenidínona íaioi jáiadi, nibai afe tóiniaína izájiñenana fáicanocaidiaioi; mei jáífodo fáicanocaiñediaioi, nai comécina jáícina jóoneñegaiaioiza. Daje izói áfedo Juzíñamuimo ánozidino comécina íaífueña nahí nífuenidínona jáiadi, nibai jae íaioi fiénidifue izire íaioimo iñede. Mei íadi íaioi fiénidifue jaca izire íaioimo ite. Iemona onódicai, tóiniaí fecáfirena íaífueña figo doñede.

³ Mei íadi afe fatá Juzíñamuimo izájitaga tóiniaína ciónamona, comini íaioi fiénidifue naga fimónaiaído úbicaitagaiaioi.

4 Mei jii, juráretuai, chívuai die diga, jaca come fiénidifuiái dónide. Mei áfemo ua dollé ríino iñédeza.

5 Ie jira Jesucristo bíniemo bíacana llezica ie Moo Juzíñamuina daide:

Omo fia fecaca faga tóiniaina gáíñedioza, comínina iere figura o daiíllena.

Mei jiáifodo énie cómena ja cuena jéicitaitio.

Afemona cue tílledo íaioina óiena nífuenidínona jáitaiticue.

6 Ua comíni íaifue ícoínia jobaica tóiniái ja birui ona ióbitañede.

7 Ie jira ciegánico cuedo úrilla izóí birui ona daidicue:

“Moo Juzíñamui benó bíniemo o comeci jítáillafue fínuaíbiticue,” daide.

8 Nano fueñe afémie daide, nana afe Juzíñamuimo fia fecaca tóiniái, íaifue ícoínia jobaica tóiniái diga Juzíñamui comécina zuitañede. Ua íena ióbitañede, nana afe nícidogafue jaiái ocuilla uai daína íadi.

9 Afe emódomo Jesús daide: “Moo Juzíñamui, ja o comeci jítáillafue birui benomo fínuaíbiticue.” Daií Juzíñamui nana afe jaiái ocuica nícidogafuina zóofete. Zóofiano, afe méífomo Cristo dama ie abi cruzmo izájillafue Juzíñamui jeire ote, ñue comínimo caimare érocaillena.

10 Daií Jesucristo, ie Moo Juzíñamui comeci jítainafue izóí finode. Daií ie fínuamona jae dama Juzíñamui nabaina ñue finócamacina jáidicái. Mei jii, Jesucristo dácaiño jaícina nana cai fiénidifue oni eneno féitate. Mei ninomo féiñeítana cruzmo dama ie abi Juzíñamuimo izájideza.

11 Naga judío Juzíñamuimo comínido úriraima nágaruillaido naidáillano daje izóí faga tóiniaina Juzíñamuimo izájifirede; mei íadi afe rilledo comíni íaifuiái dónide.

12 Mei jiáifodo Jesuscristo dácaiño comíni fiénidifue ícoínia duere zefuida, tíizaíbite, afe izóí dáanomo íñeillena. Ie tíilla mei meine abido cáaillano caifo monamo Juzíñamui nabézimo ráinazaide, nana comíni íaifue múiñuana fuilla jira.

13 Dinomo, nana ie fairíconi ie anamo íaioi itábicaillena afémie úiñoide.

14 Mei jii, Jesucristo, dácaiño ie Moo Juzíñamuimo ie abina izájide. Afe izájillafuedo, ñii cruzmo ie tíillamona, nana caina ie nabaina ñue finode. Jae nana cai comeci íaifuenta ñue múiñuano jaca ninomo caimo caimare érocaide.

15 Aféfuemo Juzíñamui Ñuera Joreño uaina nabáide, iere uafue cai daiíllena. Ñuera Joreño Cuegáuaimo daide:

16 Juziñamui daide: “Uire jiáiruillaido cue comínimo bie izói jiáie como cue finóllifue llóiticue, naa jiáie cuemo ñnotinori.

Aféruillaido cue ocuica uáillaina íaiói comécimo jaícina onótaiticue.

Ua afe uaillai íaiói ifócimo ñue jino denótaiticue,” daide.

17 Ie mei nane emódomo daide:

“Nana íaiói fieni finócafuiai ibana otátañeiticue.

Daií oñena llezica, íaiói comécimo ite íaifuiaina jaca niné féitaredicue.”

Dinori Juziñamui daide.

18 Nana comini fiénidifuiiai daií dua mei, jiái íaifue ícoinia dóllena fatá fecaca tóiníai jae jítaiñega.

Juziñamuimo cai áinozillena jitáirede

19 Iemona, ámatiai, cácarei. Jae Juziñamuimo cai jáillio uáfodo túide. Ua ie nahí illánamo, afe iere ñuera rairuícacomo caimare jacíruiñeno íemo úrizairedicai; mei Jesús cairi tízaibillano caina Juziñamuina éoitadifue oni muiñócaza.

20 Afémie tuiñoca io ñuera rairuiredico jédaciede ibáiraroido joide. Jira Juziñamui illánomo cómena cáataite comue io Jesús tuiñuano, afe iodo afémie caina ifode. Afe io tuiñóllena dama ie abi izi cácatate, íemo cruzmo duere zefuírede.

21 Iemona Jesús nana Juziñamuimo ñnotinodo Juziñamuimo Uritillaimana jae jaide.

22 Afémie ja cairi úrioinamona, mai Juziñamuimo jacíruiñeno omoi ánoziri, mei íemo ñue cai ñnuamona jae meáiruiñedinona mamécacaiza. Ie jira jífuenide comécido, mai omoi ánoziri. Ánozillano, mai íemo caimare cai úrilli. Ua táinona lloñeno mai íemo começi cai facalli. Mei nana cai íáirede começi ícoinia afémie jae jaícina oni féitagaza; ua come abi ñue jáinoido jocoina izói comécina muiñócaçai.

23 Afe uáfodo jino comínimo cai lloga Juziñamuimo caimare cai úrillafuena, mai fáicanocaiñeno áfemo izire cai ñnofireilli, mei afefue caimo llotímie Jesús jaca ñnofiregamieza.

24 Daje llezica illa dígamierie, mai conímamo ñue cai comécilli, conímamo cai izíruillino cai jenóllena. Daje izói jiáimana ñúefuiaina rairuñeno jiéruillinona jenóredicai.

25 Daje izói omoi Juziñamuimo gairífirenafuena mai féitañeno iri. Dáarie aféfuena féitafirediaioi. Daií illa fiénide. Mei jiáifodo, Jesucristo meine billirui raire dúciacanana omoi onónamona, mai conímamo ñue úrillauaido comécina caimare cai náireitalli, nana cai ñnogafue féiñellena.

26 Juziñamui llogafue daide: Jaca dama Jesús tíillamo cai ñnuamona jlloredicai. Aféfuena cai ie onótaja mei, mei íadi afe

uaina nai cai ruifíruioiadi jae abi dine jíáie cai íaifue múiñoitena iñede.

²⁷ Daí ruifíruioi dimacimo jamánomo izire jácifue zúite, mei Juzíñamui duere íaioi finóllifue mo jae ánozideza. Afémie iere íaioimo rícaillano iere boode jáifodo joide iraimo íaioina duere zefuítaite. Ua nana Juzíñamuina bacáuairedinona irai amena cuarita izóidemo, Juzíñamui íaioina dinomo zúifona duere zefuítaite.

²⁸ Moisés ocuica uaina ruifíruitimiena raire titádiaioi. Ua, mena nibai daámani uai nabáiraini daina uáimona, íemo dúecaiñeno íena titádiaioi.

²⁹ Mei Moisés ocuica uaina ruifíruitimiena daí duere finóbiteza, Juzíñamui Jitona ruifíruitimie mo jamánomo izire duere finóllifue, afémie mo zúiteza. Afémie Jesús díena jámairuitimie. Afe tíllamo totaca díedo, afémie nauí dácaíño Juzíñamuimo oni eneno nizécamienna jaide. Mei íadi Jesuna ruifíruitimie caimo dúecaifirede Ñuera Joréñona íaire daífiredimiena jaide. Daí ítimiena iere Juzíñamui duere finórede.

³⁰ Ja birui daí ítimie fiénidifue iba ófiredimiena onódicai, nímie cai Moo Juzíñamuina. Afémie daide: “Afe iba ófiredimiedicue. Ua nana íaifuiái ibana duere finótafiredimiedicue,” dáideza. Jáinomo Juzíñamui Cuegáuai daide: “Juzíñamui ie comini comeci ífueña jáicina jícanoite. Jícanuano íaioimo dúide duere finóllifue ócuite,” daide.

³¹ Daí ie úrillana cai onónamona, caade Juzíñamuimo duere finóllena izájina jamánomo jacírede.

³² Mei íadi nauí íanori omoi illáfuemo uibíoiri. Aféruimo ñúefuena omoi onona mei, aillo duere zefuídiomoi, mei íadi aféruimo omoi ínogafue fáicanocaiñeno ñue ocuídíomoi.

³³ Dáruillaído uáfori comini erócana báíñuano duere finócaomoi. Jáiruillaído daí finócamacimo omoi nabáillamona duere zefuítagaomoi.

³⁴ Afe llezica llaveca ámatiaimo dúecaifirediomoi. Afe baímo, ómoimo ite ráaniaina jíáimaci báiruana caimare rairuíñediomoi, mei onódiomoiza, bíniemo ite raa baímo, jamánomo ñuera jaca bairónide raa ómoiena monamo íteza.

³⁵ Ie jira nauí izire omoi ínoga uaina mai birui omoi féitañeno iri. Aféuaina ñue omoi ínofireiri, mei ícoimo iere ñuera jíridoga ízoide raa máíñoitiomoiza.

³⁶ Juzíñamui jítainafuena omoi jíeruilla llezica raire comeci járidoñeno írediomoi. Ua, omoi ínoga ñúefue, omoi are jáicina llocana uille mei, Juzíñamui uícodo lloga caimare jíllonafuena máíñoitiomoiza.

³⁷ Mei jí Juzíñamui Cuegáuaimo daide:

“Ja íanori íllamona, uícodo lloga bíitímie Jesucristo, jizíñeno raíre dúcizaíbite.

³⁸ Afémie nai biñena llezica, níifuenidena cue mamécámie, cuemo ie ínuado nágaruillaído caimare ie illano, cuena íóbitaite.

Mei íadi afémie afe ie ínoga uaina meine abído féitaiadi, afémieri íobiñeíticue,” dinó Juzíñamui daide.

³⁹ Mei íadi meine abído féitatino dibénemo jaináíñedícaí. Afémaci daí íaíoi ínoñenamona jíllóñeítiaíoi. Mei jíaífodo cai bie Jesucrístomo ínotinodícaí, daí daní cai jíllotagacai.

11

Juzíñamuimo cai ínuafue

¹ Mei ¿mínica ínuafuena? Ínuafue Juzíñamui daína uaina jeire cai uafue. Ínuamona cai úiñoga cáimafue jeire cai ollínona onódícaí. Daje izói Juzíñamuimo ínuamona, ie lloga cáiena mameca ñuera raa cíóñena íadi, afefue ua íllana comécido ua onódícaí.

² Ua, ínuafuedo judíuai jaiáídígimamona Juzíñamuimo jaináídímíai, Juzíñamui comeci jítaillamacina jáidiaíoi.

³ Juzíñamuimo cai ínuamona, Juzíñamui ie úrilla uaido bínie fínuana onódícaí. Daí ie fínuado nana bie cai ciona énie, táinomona Juzíñamui comúitate. Ua, mínicana íñédeza cíóñena ráamona naga ráaniaí comúbicaide.

⁴ Juzíñamuimo ínuano Abel, Caín fecaca baimo, ñuera Juzíñamui íóbitalle raa fécaíbite. Iemona Abel Juzíñamui dibénemo jaícina ítímiena jaide. Juzíñamui jíeruigamíena jaide. Mei Juzíñamui Abel fécaíbiga raa llínuamona, Juzíñamui comeci Abelna jítainana onódícaí. Daí Juzíñamui íena jíeruillafuedo Abel jaícinaidífue mo Juzíñamui uai nabaide. Afe Abel, jaiái uícodo Juzíñamuimo ie ínuado ñue illáfuedo jaide. Aféfuena cai fídiamona, afémie titácámie íadi, ie ínogafue, úrillauai izói caímo úrite. “Juzíñamuimo ñue cai ínolli,” caina daide.

⁵ Iemo Enoc Juzíñamuimo ie ínuado tíñeno caífo monamo uiga. Daí tíllana ie ónoñeíllena, cáanori monamo Juzíñamui uiga. Afe mei afémie bíníemo cíóñenamie, mei afémie Juzíñamui úigaza. Afémie nai úiñega Juzíñamui íóbitadímie dainámie.

⁶ Mei jíi, Juzíñamuimo cai ínoñenia jaca íena íóbitanidícaí. Dáamie Juzíñamuimo ánoziacania, Juzíñamui nahí illánona uícodo ie ínolle jítaírede. Nane íemo nana izire íena

onóiacadino, ñue ibana dama ie abi ífuena íaiioina onótaite. Aféfuemo uícodo daje izói íñorediaioi.

7 Daje izói Noé, Juzíñamui lloga raire biite nai cióñena duere finóllifuena fídiano Juzíñamuimo ñue ínote. Inuano áillue jofóredicae finode, áfedo nana dama ie comini daí jilloillena. Noé daí dama Juzíñamuimo ínuado, nana jáie ínoñede cominimo duere finótatiuai jino íaiioimo llote. Afe izói Juzíñamuimo ínuado Juzíñamui comeci jitaina nífuenidimiena jaide.

8 Afe mei jáiádiruimo Juzíñamui Abrahana jírite, jáie éniemo jáiánillena, áfeniena ico jáíruido íeiena maiñóllena. Abraham Juzíñamuimo ínuamona afe jírilla uaina cacáillano, raire ie illániemona oni jáínomo jáizaide, ie dúcillino nai ónoñega íadi.

9 Abraham nai Juzíñamuimo ínuamona, Juzíñamui íemo fecáacaiga éniemo fia jicánemiena diga fimona fia ite. Ua, iniroi niina úicaifirega jofomo aféniemo are íoide. Daje izói Abraham comútaga jitó Isaac, dinómona Jacob diga afénomo daje izoide iniroi nillácuaimo are itíaiillinoi naa ie cominiri. Juzíñamui daje éniema fecalle uaina Abrahamo llua izói, afe íaillinoimo uícodo llote.

10 Ua Abraham afe jamai illácuaimo dama íeieñede éniemo caimare íoide. Afémie caimare ite, mei Juzíñamui dibénemo ite caimare táinocaitanide illínomo dúcillena afémie úiñoideza. Afe caimare illico Juzíñamui mamérrillano dama ie uaido niga.

11 Daje izói Abraham ai, Sara, Juzíñamuimo ínuamona, jamánomo jónaite íadi, fueñe úruerena ríino ote. Iemona daa jitó jocode, mei Juzíñamui aféngona aféfuena uícodo daína uai, afengo iere ñue ínoteza. Afengo bie izói daide: Bímie ie daína uaina jáíifo méidofinidimie.

12 Iemona Abraham iere jónaite íadi, iere aillo erófene igímaiaína jebuitate. Ua jamánomo diga nairai jebuide; nii ja lloga monamo ite facádonide úcuaí izói itíaiioi. Nane monáillai fuédamo ite facádonide guamai izói jebuidiaioi.

13 Nana cai lloga comini Juzíñamuimo nai íaioi ínoina llezica tídiaioi; nana Juzíñamui uícodo lloga ñúefuiaína nai llínoñediaioi, tílla. Mei íadi afe lloga ñúefuiai ico jáíiruimo zúillena jicana fídídiaioi. Fídiano caimare aféfuemo ínuano comécíidiaioi, mei bíniemo ónoñega jicánemacina íaioi illa raire méaicaiñeno llotíaioiza. Uáfuena bíniemo jáiánicana jáidiaioi.

14 Nana daí llotino, dani íaioi nahí illínomo íaioi jáiacanana llotíaioi. Ua jáie éniemo jáillana íaioi úiñoínana caina fídítate.

15 Daií íaiói dáinamona, mei nibai jaiái íaiói illániemo comécidiaíoi. Daií íaiói coméciadi diga icaiño meine abido afénomo jáirediaíoi. Mei íadi abido afénomo jáiñediaíoi.

16 Mei jáinomo comécidiaíoi. Jáie jamánomo ñuera illánomo, monamo ite Juzíñamuimo nabáirizaillinomo izire úiñoidiaíoi. Daií Juzíñamuimo íaiói ínuamona, Juzíñamui iere ióbite. Bie jaiánicana jáidino Juzíñamuina dáiiadi: “O cue Juzíñamuidio,” daií íaiói dáinari Juzíñamui méaicaiñede. Mei íaiói jofue izoide ñuera illino, dinomo Juzíñamui diga zíiñona nabáirizaillena, Juzíñamui jae finócaza.

17-18 Naui Isaac jocoina llezica Juzíñamui Abrahana daide:

“O úicoitigima bie jitó Isáacimona aillo jébutiaíoi,” daide. Diga iruillai íllamona Juzíñamui dáaruimo Abrahana ínuafue facátate. Iemo Juzíñamui ocuilla izói, Abraham nai Juzíñamuimo izire ínuano, ie jitó oni uite, titada Juzíñamuimo fecállena.

19 Mei Abraham Juzíñamuimo ñue ínuano comeci facade:

“Juzíñamui jamánomo ñue ríinoredimie; tíide come meine cáataite ríino íemo ite. Cue jitó tíidena Juzíñamui meine íena cáatarede,” daií Abraham comeci anado daide. Iemo, Abraham ie jitona fáiacana llezica Juzíñamui aféniemo raire úrillano, ie daade jitona jíllotate. Abraham ie jitona fañede. Ie jira jáífodo daiírede, tíillanomona Abraham ie jitona meine abido ote.

20 Daje izói Juzíñamuimo ínuamona Isaac ie jitó íaillinoi Jacóbomo Esaú diga uire Juzíñamui orelle caimátaillifue ua llote.

21 Daje izói Juzíñamuimo ínuamona Jacob, ie tíizailliruimo José jitó íaillinoimo úrite. Urillano ie enaize íaillinoimo uire Juzíñamui orelle caimátaillifue jino llote. Afe llezica ie macara jigüida llínota ie abi mozíñuano caimare Juzíñamuimo úrite, ie ióbitallena.

22 Daje izói Juzíñamuimo ínuamona José ie tíizailliruimo ánozillano, Israel comini Egipto éniemona uire oni dani íaiói éniemo jáillifue llote. Afe llezica ie ícuruai aféniemo fiéñeno oni úillena, uímodo uai íaioimo jónete.

23 Diga fimona jailla mei, Egipto ríillaima nana Israel como jéiciga jitótiaína fazítate. Mei íadi Moisés jocoina mei, ie moo íaillinoi Juzíñamuimo ínuamona, illáimana jacíruíñeno Moisen a retáidotiaillinoi. Dauíamani íena retáidotiaillinoi, afeza iere ñúezana jira.

24 Aféllaima jiza Moisen a náamataja mei, Moisés móonailla llezica Moisés aféngomo dúillana ruifruite; mei afémie Juzíñamui dibénemo jaináideza. Ie jira Juzíñamuimo ínuamona Moisés afe mámece oni faite.

25 Mei jáífodo Juzíñamuimo jáináidino cígiri íllana, afémie jamánomo gaide, nana duere zefuídiaioi íadi. Daje izói ie comínina fienu ie zóofiamona raire féite jabo íóbillafue dibénemo íllana afémie gáñede. Moisés Juzíñamuimo ínuano ñue coméciide.

26 Bíedo afémie coméciide: “Nana Egipto énie ebírede ráaniai baimo, Juzíñamui dibénemo ie dámie illa jamánomo ráifide, duere afémie zefuide íadi.” Afémie daí comeci facade. Ua Moisés, Cristo ícoinia zefuíllano, féitañeno daí comécioifirede; mei Juzíñamuimo ínuamona baimo ñuera féinide raa izóidifue afe ie jirídollena afémie onódeza.

27 Iemona Moisés Juzíñamuimo ínuamona, afe Egipto illáimamo ite ríinona jacíruiñeno Egiptomona botade. Ua jacíruiñeno afe Moisés oni jaide, mei buna cíóñena Juzíñamuimo fáicanocaiñeno ñue nágarui comécioifiredeza. Daí ie comécinamona, uído cíónamiemo ínuua izói, Moisés Juzíñamuimo iere ínote.

28 Daje izói Moisés Juzíñamuimo ínuamona, Juzíñamui lloga pascua rafue como fueñe finode. Ua Juzíñamui llua izói, Moisés íaioi jofóniai naze fuédamo oveja díena jiritate. Daí ínuamona, Juzíñamui oreca títaite abi ímie nana Israel nano fueñe jococa jítótiaimona buna títañede, aillo Egipto imaci jítótiai tícoizitiaioi íadi.

29 Daje izói Juzíñamuimo ínuamona nana Israel aillo comini “Jíairede” daina monáillai ñue zaférede iodo ruícafenemo jaitádiaioi, mei afe monáillai jáinoi Juzíñamui oni gaitácaza, íaioi ruica jáillio tuiñóllena. Mei íadi Egiptomona racáidino afémaci jailla izói jáidiaioimo, meine io jáinoina íbábicaillari coróbaitiaioi.

30 Iemo Israel comini Jericó jofue anáfenoacadiaioi. Afe jofue riire naidároga nofíbanina cirínoga. Iemo Juzíñamuimo ínuamona ie daina izói, siete dígarui afe riire íbaica jofue jinófenedo ífoina macáoidiaioi. Iemona ícoi iruimo afe caifo nitaca nofici ínoina jofue jinófene cirínuabani, Juzíñamui ana éniemo caitade.

31 Daje izói Juzíñamuimo ínuamona nauí uícodo fiénidíngo, Rahab fañega, nana jáíe afe jófuemo ite íñoñedino fazícaicioi íadi; mei Juzíñamui comínimona oreca énienu ñue onóillena méiñoitinona afengo caimare cánuano jofu uáidoteza.

32 Nai jino lloñega aillo ite jáíe jáiai Juzíñamuimo ínofiredino. Bibedo íaioi illáfuiaina cue llóllena cue abi juánideza, nana llónidícue. Fia íaioi mámečiai jino llóiticue, íaioimo omoi ñue comécioillena. Afémaci Gedeón, Barac,

Sansón, Jefté, David, Samuel; daje izói Juzíñamui uai jino llóraini ite.

³³ Bimácimona dámerie Juzíñamuimo ínua mona jáie náiraina anáfenodiaioi. Jáimaci Juzíñamuimo ínua no Juzíñamui jáicina jódifuena comínimo ocuide. Dáarie Juzíñamuimo ínua mona ie uícodo lua izói, Juzíñamui canócaiaioi. Dáarie Juzíñamuimo ínua mona riírede jánallarilla fuena ibaica izói finode, íena íaioi riñeillena.

³⁴ Jáimaci uzírede iraimo dotácaiaioi ía, nai Juzíñamuimo íaioi ínua do afe iráimona uzíñeno jino bitíaiioi. Dáarie Juzíñamuimo ínua mona fuiríllafuía imona otábiñeno jino ñue jíllodiaioi. Iemo jóbairo illa llezica Juzíñamuimo ínua mona dáarie mairíñedimíai ñue márimíai ina jaide. Daí Juzíñamuimo ínua mona onina bite fuiríra inina abido rainódiaioi.

³⁵ Daje izói Juzíñamuimo ínua mona dáarie ringónia imona íaioi úruiaí tíide íadi, meine abido íaioimo cáataga.

Mei íadi jáimaci nai Juzíñamuimo ínua llezica, íbátarede tíide jíllotafuena lloñediaioi, mei aféfuedo Juzíñamuina jáanotaiticai, daidíaiioi, íadi Juzíñamuina jáanotanidiaioi. Ie jira iere duere zefuítano titácaiaioi. Daí tadena lloñediaioi; mei afémaci meine abido caana mei, jamánomo ñuera zíñona illáfueña méaicaiñeno maiñóacadiaioiza.

³⁶ Nai jáimaci Juzíñamuimo ínua llezica, fiénide zánonafuía imona duere finóbidiaioi. Jáimaci riire zechénogaiioi. Ua dáarie Juzíñamuimo íaioi ínua mona cúinajano llavécaiaioi.

³⁷ Daje izói jáie Juzíñamuimo ínua no tinu no fíciaina níjicaiaioi; jáimaci dáafemíaido amena dera izóidedo ñetácaiaioi; jáimaci caimare taino uáillaido bífuegaiaioi, íaioi ínua fue facátallena, íemo lloéfaido fagáiaioi. Jáie Juzíñamuimo ínua no tinu, íaioi ínua no tinu jira, tóica rille igórainu jítaoidiaioi. Daí fia macáoidiaioi, mei jofónidiaioiza. Ua iere ráanidiaioiza. Ie emódomo duere zefuítano iere fiéni finócaiaioi.

³⁸ Daí finócaiaioi íadi, Juzíñamuimo íaioi ínua fue fái canocaiñediaioi. Iemona bimaci Juzíñamui dibénemo iere izíruigano; mei íadi bíniemo ite ínua no tinu afe Juzíñamui uaina jeire otínona jámairuitiaioi. Ie jira ínua no tinu afe ínua no tinu maci cígiri íllena, ínua no tinu maci figo dúíñede, mei ínua no tinu maci comeci iere íairedeza. Ínua no tinu jámairuillano, íaioi ina oni jíufrediaioi. Iemona ínua no tinu mona dámerie zaféredizicimo jáidiaioi. Jáimaci caifóneduai íllánomo botádiaioi. Íaioi jaillánomo ite ífuaimo ífrediaioi, naa íduai ana ífuairi.

39 Nana bimaci Juziñamui ñue “figora” dainamacina jáidiaioi. Mei íadi nana Juziñamui uícodo lloga caimare ñue illífuiaina figo maiñóñediaioi; jabo maiñódiaioi.

40 Mei Juziñamui jae uícodo cai canolle jamánomo ñuera cáimaduafue mamédeza. Afe jamánomo ñuera cáimaduafue Jesucristodo cai nahí cai jilloillífue. Daií jaiai ua Juziñamui ñinotino naa cai diga, birui dáanomo jaiai Juziñamui mameca nahí jilloillífueмо dúciiticaí. Ua afémaci naa cai diga, Juziñamui caimare nabáirillafuena jeire óiticaí.

12

Jesumo ñue jaícina omoi comécioiri

1 Ie jira, cue ámatiai, comécido ñue omoi facari. Ua aillo jamánomo Juziñamui izire ñinotino bíniemo cai uícodo macáoidiaioi. Afémaci Juziñamui cai ióbitallífue caina ifode. Afémaci cai ñinogafueмо jaícina ífoite uai nabáiraini. Cai abido ífoina itíai. Afémacimo cai comécillamona, nana cai jizítacana uite fiénidífue mai oni cai féitalli. Ua, caimo ite fiénidífue, abi llótaidote ñiroi izói caimo jíide. Jíinamona jaca caina aruire itátate. Afena fáicanocaillano, Juziñamui ióbitallífueмо zefuíruiñeno mai izire cai nícidolli.

2 Afe llezica duere cai zefuállano féitano, mai Jesumo comeci cai facalli; mei afémie Juziñamui ióbitallíodo, ñinuañedo cai jáillena cai ífódímieza. Mei afémie ie Moo Juziñamuina féitañeno ie fáainaruimo nai íemo izire ñinoide. Daií ie ñinua, afémie izói jaícina cai ñinollena, afémie cai ifode. Iemona afémie cai ñinogafue ñue ícoimo fuitádimie. Ua, Jesús duere zefuide, íadi afe duere zefuilla méifomo íite cáimafueмо, afémie ñue comécide. Afemo comécioillano uái dáii cruzmo tíizaide; mei áfedo nana íemo ñinotino caimare jíllobicaitiaioiza, afémie onode. Iemo afe meáirede tíillana náñueño, abido meine cáadímiena jaide. Afe daií jaillano caifo Juziñamui nabézimo Jesús ráinazaide.

3 Ie jira, cai jíáinona duere zefuítagamie Jesumo mai ñue omoi comécioiri, omoi duere finóbicaillamona omoi zefuiruiñeillena. Daje izói Jesumo ñue omoi uibíoiri omoi comeci ñue náireillena. Mei afémie fáicanocaiñeno Juziñamui ñinoicaide, fiénidíno íena uáitajano duere ie finódiaioi íadi.

4 Fiénidífue omoi comécina jíirioide, íadi nágarui áfemona abi ráiruifiredíomoi. Afemona abi rairuállano iere Juárezde. Iemona jabo duere finócaomoi. Mei íadi fiénidífue omoi anáfenoacanamona nai tííñediomoi. Dama Jesús ícoinia jabo duere zefuídíomoi.

5 Afe llezica Juziñamui caimare llogáuaina nibai jae féitatomoi. Aféuaido Juziñamui ie úruiai izói, ómoína llófuete; ona riire daide:

“Cue jitó, o Ocuíraima Juziñamui omo oreca duere zefuítajafuena jámairuiñeno iri, mei áfedo afémie ñue ona rairuállano lletádeza.

Daje izói fieni o finuamona afémie duere o finóadi, comécina riinidimie izói iñeno iri.

Mei jáífodo, abi mámano, ie llétafuena ñue jeire oíri, ñuémienna o jáilleza.

6 Mei Ocuíraima Juziñamui nana ie izíruiganona fáicana lletáfiredeza, íaifuenidinona íaioi jáillena.

Afe izói nana ie ua onoiga jitótiaina llorebai mailla izói due ízitate, mei afémaci dama íeieza,” daide.

7 Omoína izíruillamona Juziñamui afe daí ómoína duere zefuítate, ómoimo llófuellena, baimo ñuera ie jitótiaina omoi jáillena. Ie jira duere zefuítagaomoi. Mei onódiomoiza, bíniemo ite moo llétañega jitó ñue móonaiñeiteza. Iemona afe moo nana ie jitótiaina llorebai mailla izói ízitate.

8 Ie jira Juziñamui ízitañegamie nibai ie nahí jitóñedeza, móonidiza; mei nana nahí ie jitótiai izi cácatagaiáioiza.

9-10 Afe emódomo cai bíniemo ite móotiai nauí ñue cai móonaillena, ñue comeci íaioi fácamona, izire caina lletádiaioi.

Ua nano íanori illáruillaído caina duere finuafuedo lletádiaioi. Ua izi cácatagacai. Afe llezica nai cai moona caimare

jacíruticai; jacíruioillano ñue íaioi anamo itábicaidicai.

Daje izói cai monamo ite Moo anamo jamánomo caimare itábicairedicai; mei afémiemo cai ínuano, nahí ie jitótiaina

comuítagacaiza. Nana afémie duere cai finuafue cai dibénemo aillo ráifide, afémie ebire ñuera illa izói, daje izói cai íllena.

11 Ua, ja onódiomoiza nana izi cácatafuemo illa llezica, áfena gáñedicai. Mei íadi afe izi cácatafue záilla mei, áfedo

lletácano, Juziñamui anamo ñue jáicina íficaillano, comécina jacíruiñedinona caimare jáiticai.

Juziñamui uaina ruifíruilla iere jacírede

12 Juziñamui daí omoi llétajana omoi onónamona, mai abí omoi mame. Ja abina náinidino izói omoi iñeno iri. Omoi zúurede comeci náiretari.

13 Afe llezica omoi duere zefuúllafuemo, mai bífuemo jáicina comeci facátori. Aféfuado daíri “Juziñamui ióbillé jitótiaina móonaitagacai.” Daí o dáinamona, jáie ómoimona Jesumo ínogana féitaacadino, comécina caimare náiretaitio. Daí ie náireillamona afémie meine abido Jesús uaina izire ínocana jeire óite.

14 Afe emódomo nana comíni cígiri, mai comeci ríicaitaño cáimafuemo omoí iri. Daje llezica, Juzíñamui ebire ñue illa izóí, afe dibénemo mai omoí abi ífuiaí nágarui méidocana uiri. Bie izóidifuemo omoí nai iñeniadi jaca buna Juzíñamuina cíõeille. Mei íadi comeci íaininafuemo cai íadi, íena cíoiticaí.

15 Juzíñamui caimo fecaca cai ie cánuafue aillo ite. Bifue nana jeire omoí ófireilleza izire omoí comécíiri. Daií íllamona buna fiénidifuemo oni nibéfodo báíiñeiteza. Daa daií oni fiénidifue dibénemo baiídimie nana jíaimaci comécina fiendi finode. Mei jíi, duere zefuillamona Cristo dibénemo figo jaináiacañedimie, jucúrede juia izoide. Mei afe juia illemo totáa, nana áfeji jucúredijina jaide. Daiítade come nana ie aino comínina daje izóí figóruiñede. Afemona abí omoí rairuiri.

16 Daje izóí nana jíruírenafuíaímona abí omoí rairuiri. Afe llezica ómoímona dámie Esaú illa izóí iñeno iri, mei afe Esaú jaca Juzíñamui jítainafuemo figo comécíiñedeza. Aféfuena jámairuillano, afémie nánoramie íadi, íemo ite maiñórrille ríino, fia due jiza güille íbana fecade.

17 Afe Esaú illáfuena ñue onódiomoíza; mai aféfuemo omoí comécíioiri. Ico íraíruimo ie moo ézicírafuena Esaú maiñóacade, íadi ie moo ja íena ruífruite. Afémie comeci ífue méiduano éecana ie moomo izire jícade; íadi “Jii” daiíñede. Afe nauí Esaú jámairuillafue jaca méidonide.

18 Ja birui Juzíñamuimo caimare nabáirillanomo dúcidiomoi. Jaiái Juzíñamui comíni áillue caifónedumo áinozidiaíoi, Juzíñamui dáina uaina cacáillena. Afedu mámeceí Sinaí. Afedu náaduna irai izóí boode, aillo úillie diga. Afe llezica íere jacire nairíbicaide. Nairíbicaillano, jairifo riire jaiñode.

19 Aféruimo bainada izoide ficire cácaicaide. Afe llezica áillue come úrilla uai íaíoímo ficire cácaicaide. Afe uai íere jacírede cacaide. Afemona, áfena cacáidino jíáie emódomo lletara uaina llóñellena izire jícádiaíoi.

20 Afe íaíoi cacana íaíoímo lloga lletara uai jamánomo íere juáredeza. Aféuai daide:

“Bie óode íduna omoí jetáiño iri. Ninena daa rille bídumo bíadi, raire noñiciaído fáiri. Daje izóí ninena bídumo bite come fáiri,” daide.

21 Uafue, afe cacánafue naa cíocaidifue diga íere jacírenamona, dama Moisés uai ua: “Aferi íere jacínaiticue. Jacíruillano cuidíriticue,” daide.

22 Mei íadi, jae jíáífodo Jesucrístomo omoí ínuamona, ja birui Juzíñamuimo ite jacínide caimare nabáirillafue dibénemo dúcidiomoi. Ie mei ícoímo monamo ite jaca caade Juzíñamui uícomo úrizaitiomoi. Juzíñamui illa jofue, “mona ero ie

Jerusalén” mámeceirede. Iemo jáífodo “Sión Caifónedu” daina. Afémiemo ja omoi caimare nabáirillamona diga íeza facádonide Juzíñamui abi imaci Juzíñamuina ióbioicana iráizitiaioi.

²³ Ua, omoi ínuamona Juzíñamui ómoína daide: “Ja cue daade Jitó Jesucristo izóidinodiomoí. Cuemo ie dúina izói, afe izói ja cuemo jaináidiomoí,” daide. Afemona nana Juzíñamui íena comuítagamacimo jae jaináidiomoí. Nana afe íemo jaináidino mámeceiaí jae monamo cuega. Ie jira nana Moo Juzíñamui ie comuítaganona, ñue jicánuana fibídímie izói, ñue íaioina ríidoite, mei afémie nana nairai Mooza. Jaiaí ie anamo ñue itino, jae tídiaioí, mei íadi íaioí ñuera joreño nai figo caimare íñédiaioí. Ja biruíllaido Cristo cairi tíllano caina jíllotate. Daií nana íemo ínotinona jíllotano, afe tíidino ñuera joréñuai ñue jaícina caimare itátagaiaioí.

²⁴ Uafue, Juzíñamui comue caimare caimo fecállifue caimo llóiacade. Afefue caimo lluaíbitímie Jesús, mei ie cruzmo ie die tótajado caimare íaifuenidinona finócacaíza. Ie jira ie die, úrilla uai izói jamánomo ñúefue cai ífócimo denode. Mei jáífodo Abel die tóilla afe izói caimare ñúefuiaí caimo lloñede.

²⁵ Nana bie caimare Juzíñamui caimo llotátagafuiaína jae onódiomoí. Afena omoi onónamona, afefue ómoímo llotímie mai omoi ruifíruiñeno iri. Afe íena ruifíruiillamona abí omoi rairuiri. Mei jaiaí biniemo Juzíñamui jónega lletárama dáinana ruifíruitino, duere íaioí finóinamona jaca jíllonediaioí. Afe baimo birui monámona caimo llotímie dáinana cai ruifíruiadi, daje izói ua jíllonéiticaí.

²⁶ Jaiaí aféruimo ie úrilla uai éniena diga icaiño riire docáitate. Mei íadi birui afémie uafue llote: “Nane afe emódomo dáacaiño éniena riire docáitaitícue, naa caífo ite monániari,” daide.

²⁷ Afémie daina “Nane afe emódomo éniena dáacaiño docáitaitícue” Juzíñamui íirairuillaido finóllifue caina daide. Aféruimo nana ie finoca raa, ranítado izírilla izói níraidoite. Afe níraíduado nana nírairede ráaniaína, afémie oni niné táinocaitaite. Mei íadi nírainide ráaniaí jaca méidonide; fiébillano zíñona íitiaioí.

²⁸ Ja birui Juzíñamui méidonide illáimana illánomo jaináitagacai. Iemona íena “Iere figora” cai daiífieilli. Afe llezica caimare úrillafuedo mai íemo cai ióbilli. Ua, ñue jacíruiocana ie uáillaímo mai ñue cai cacáreilli.

²⁹ Mei jíi, cai Juzíñamui, irai amena cuarilla izói, nana íaifueredinona jaca zíñona íaioína duere fínoite.

13

¿Nie izói Juzíñamuina ióbitaredicaí?

¹ Amatiaí, mai conímana omoi izíruiífieiri.

² Daje izói onina bitínona mai dúecaillano ñue caimare uáidori, mei daí dáríe jíáimana íaioi caimare uáidofirenamona ónonino Juzíñamui abí ímíaina jofo llínotiaioi.

³ Iemo Jesumo ínuamona llavécamacimo ñue omoi úbicairi. Ua dájena llavécano izói, mai íaioimo comeci omoi facari, íaioina omoi canóllena. Daje izói duere finoca Jesumo jaináidímacimo, mai omoi ñue comécíiri, mei dani omoi abina jíáimaci duere zefuítarede; íemo bimaci diga daí zéfuitiomoiza. (Dáamacíiomoiza.)

⁴ Daa come daje ringona áireia ñuera. Afémie dama ie ai abina onona ñuera. Iima dama ie ai jeta ñuera. Mai bifue íáiño ñue omoi fímairi. Mei Juzíñamui nana jiruédinona izire jicánuano íaioina duere fínoiteza, naa dama áireíño ringo diga itínori.

⁵ Daje izói omoi comeci ífuena ñue onoiri. Ucubena aillo jitailla fiénide. Afemona abí omoi rairuiri. Mei jíáfodo ómoimo due jiza ite ráaniairi júfidoño caimare uái iri, mei Juzíñamui uafue dáideza: “Ona fáicanocaiñeíticue. Daje izói jaca ona zóofeñeíticue,” daide.

⁶ Iemona minícana jizíreño daíredicai:
“Juzíñamui cuena canófredimie; íemona fieni cue
fínóacadimíena jáciruíñeíticue.”

⁷ Iemo mai Juzíñamui uai ómoimo nano fueñe jino llófuetinomo ñue omoi uibíoiri, mei ñúeodo ómoína ífódiaioiza. Íaioimona comuide ñúefuíaimo, féitaño mai ñue omoi comécíiouri. Afémaci Jesús ícoínia titácaiaioi, mei íadi afémaci fáicanocaiño Jesumo ínua izói, afe izói féitaño mai omoi ínofíreiri.

⁸ Mei jíi, Jesucristo nanómona ie illa izói, ja birui jíáfodo méidoño dáamíeicaide. Ua afémie jaca zíño na dáamíeite.

⁹ Ja birui diga jíáfodo cacaide onina bite ónoñega fieni llófueinafuiaí ite. Aféfuiaí ñúeomona oni níbéfodo omoi baítaiacadeza; áfemona abí omoi rairuiri. Juzíñamui cairi dúecaillano cai cánuano cai comeci náirecáitate. Afe ie cai comeci náiretaja ñuera. Mei íadi afe jicana llúaíbiga güille rairuínafuíaína jeire cai óiadi, caína ñue cánoñeite. Daje izói afe uai jeire otínona canóñede.

¹⁰ Jesucristo cai ífomo fécafue Juzíñamuimo caimare cai nabáirillena dani caimo dúide. Nana Judíuáido Juzíñamuimo úriraini, ie jaiái gairíracomo aillo Juzíñamuimo ánozille nícidogafuiaí fínódiaioi. Mei íadi afémaci Jesús díbenemo ite cámafuaína llínonidiaioi.

¹¹ Judíuáimona comínido Juzíñamuimo úritillaíma dáacaíño naga fimona afe faga rille die Juzíñamui icomo uite. Afe

Juziñamui icomo ite jofoides ñue rairuícacomo comini íaifue ícoina díena uite. Mei íadi afe faga rille, comini illácuai jinomo jobáifrediaioi.

12 Afe izói Jesús Jerusalén jinomo duere zefuide, dama ie die tóillado nana comini fiénidifue oni dóllena. Daí duano íaioina Juziñamui íena mamede.

13 Ie jira nana Judíuai Juziñamuimo áinozille nícidogafuiaina féitajano, mai dama Jesumo jaca cai ínolli. Ua, daí íemo caimare cai jaináinamona jíllotícaí. Ie meáire duere zéfuilla izói, duere cai zefuádi, áfena náfuéño nai caimare íemo jáinaitícaí.

14 Ja bíniemo ñuera méidoñega illano caimo íñede; mei íadi Juziñamui finoca monamo ite méidonide cai illínomo izire úiñoidícaí, caimare zíñona ie díga cai nabáirizaillena.

15 Iemo, Jesús caido Juziñamuimo nahí úriraimana íllamona, mai Jesudo nágaruillai Juziñamuimo ñúefue cai nitalli. Ua, cai fuemo ite uaido Juziñamuina caimátaitaredícaí. Cai Ocuíraima Jesús mámecido cai úriadi, jaca Juziñamuina ebire íóbitaredícaí.

16 Daje izói nágarui jíáima canolle ñúefue jeire o úana, mai féitaño iri. Aféruido jítaídínomo ómoimo ite raana jeruñeno fecari; mei aféfuiaina Juziñamui íere íóbideza.

17 Omoi illaini llogáuaimo ñue omoi cacáreiri. Aféuai anamo ñue omoi itábicaíri; mei omoi comeci ñue íllena aféllaini nágarui ómoína rairuífirediaioiza. Ua aféllaini ómoína rairuilla nie izói íadi, afémaci Juziñamuimo jino llórediaioi. Ie jira íaioi táijinana omoi daidóño iri; mei jíáfodo ñue íaioi anamo omoi itábicaíri. Afedo aféllaini Juziñamui ocuica táijinana caimare fínoite. Mei íadi afémaci afe táijinana zúurecana finóadi, figo cánoñegaomoi.

18 Mai birui caido Juziñamuimo omoi úriri, afe Juziñamui cai canólleza, mei cai comeci ífue íáinideza. Mei jíi, nágaruillai náganuíaímo illa dígamie íaioi eróicana ñue jaícina fígomiena íacadícaí.

19 Ua, cuedo Juziñamuimo comécido omoi úrillena izire jícadícue, raíre meine abido omoi cígimo Juziñamui cue orélleza.

Iraicaiño uáidota ñue ézicínocaillafue

20 Ja birui Juziñamui ñue omoi ézicillena jícadícue; Moo Juziñamui, comécina uái illafue comínimo fécaítimie. Iemona cai Ocuíraima Jesuna tíllanomona Juziñamui meine abido cáatate, mei Jesús ie die tóillado nana caimo ite fiénidifuiaina muiñódeza. Múíñuano zíñona Juziñamuimo cai nabáirillafue cáiena mamede. Ua, Jesús jamánomo ñuera ovejai úíñoraima

izoide. Afémie ovejai rairuilla izói, caina úiñofirede, comécina uái cai íllena.

²¹ Afe bie Juzíñamuimo omoi comeci náireillena jicádícue. Ua nana ie ñuera ríinodo omoi coméciaina ñue jaícina caimare náireillena jicádícue. Afe bie cue jicácado ie jítáinafuena ñue comini eróicana fínoitiomoi. Afe llezica Juzíñamui comeci óiacana izói dani caimo zúillena izire íemo jicádícue. Mei daí jamánomo ebírenafue Jesucrístomo, ninomo fúíñeitena nitáredicaíza. Mai, daí íteza.

²² Amatiai, nana bie ómoimo cue cuega lletárafuiamo járitaño fia omoi coméciiri. Afena izire ómoiena jicádícue, mei bie ómoimo cue cuegáuai íanorideza.

²³ Iemo jíáifuena ómoimo fidítaacadícue. Jae cai ama Timoteo llavéinanomona jae jino zuitaca. Omoi dine nai jáíñeiticuemo, afémie cue illánomo raire dúciadi, nibai daane omoi éroizaibiticoco.

²⁴ Nana omoi llófujete illáinina cuedo ñue uáidori, naa afénomo ite Jesumo ínotinori. Itáliamona benomo cai bite amatiai ómoimo uailai orédiaíoi.

²⁵ Juzíñamui nana ñue omoi íllena ñue éziciteza. Mai.

Daítadeza. Jae ñie.

SANTIAGO CUEGABE

La Carta de Santiago

Ráidozitinomo Santiago cuete

¹ Cue Santiágodicue. Juzíñamui táijitagamedicue. Daje izói cai Ocuíraíma Jesucristo táijitagamedicue. Israel náiraímona doce dígazie nana éniedo ráidozitinona uáidotícue.

Juzíñamuimona oga onónafue

² Cue ámatiai cácarei, ñie facátafuiai ómoímo jíiriadi iere caimare omoi iri.

³ Mei jii omoi ñnuafue facátaficaiadi áfedo baimo comécina járidoñenafuena onótalliomoi. Mei áfena onódiomoi.

⁴ Afe comécina járidoñenafue ñue jeire omoi móonaitari. Afedo jaícina jéetagamacina ítiomoi; omoi jitáillifuena íñeite.

⁵ Omoimona dáamie figo onóñenia, Juzíñamuimona onónafue mai o jicari. Iemona Juzíñamui áfena afémiemo fécaite, mei jii Juzíñamui jeruñeno nágamiáimo onóillifuena fecáfirede. Afémie icíriñeno comínimo fecáfirede.

⁶ Mei íadi ñnuafuedo o jicari. Daií jitáirede; minícana o comeci anado ígicaiñeno jicari. Naga uaina ígiciredimie jorai bagua izói jairífodo dóbaidobaicaide.

⁷ Daiítadimie Ocuíraímamona minícana óllena comécimo facáñeno iri.

⁸ Aféfuena onóigaza. Níimie birui bie raa óiacade, uire jíáiena óiacade, ñue jaícina macánide.

⁹ ¡Ráanide ama, caimare o iri! Juzíñamui caifófenemo ona jóonelle jira.

¹⁰ Ráaredimie, o anáfeficaiadi, áfena náfuéñeno caimare o iri. Mei ráaredino ráitie záfia izóideza. Afe záfia are íñeite.

¹¹ Jitoma bíllamona éna iere llirítaite. Caigáillamona afe záfia ana júide. Daií ie ebírenano fuite. Daje izói ráaredimie ie nícidocaigafuiai cígiri táinocaite.

Facátafuiai fiénidemo baiítafuiai díga

¹² Dáamie facátafuiai járitañeno llínoiadi afémie caimare ite. Facátafuemona ñue oni jaillano ícoínia fia iga raa jirídoite, ñue facátaoicailla jira. Afe ícoínia fia iga raa ñucirai izóidífue. Afe iga raa ua Juzíñamui ie illa ziiñona cáataitinona. Ua Juzíñamuina izíruitinomo uícodo lloga ziiñona cáataitinona íaioimo fécaite.

¹³ Dámie íaífueмо baiítafuena cacáadi, afe Juzíñamui orécaza comécina facáñeno o iri, mei jira afe daiítadífue Juzíñamui jaca

jítáiñede. Daje izói Juzíñamui bumo afe íaifuemo baítafueña comuítañede.

¹⁴ Mei afefue jíáifodo bite. Dáamie dama ie comeci fiene jítainafuíaído comeci óiadi, áfede íaifuemo báíte. Afe izói dáamie ie fiene jítainafuíaído jífueficailla; íemo afe jífuiafuedo afémie meine íaifuemo báíte.

¹⁵ Afe bie comeci fiénino jítainafuíaímona íaífue comuide. Ie mei afe íaífue jae orúbicaillamona tíllafue comuide.

¹⁶ Cue izíruiğa ámatiai jífuefizaiñeno iri.

¹⁷ Nana ñuera caimo iga raa, nana caimo jáicina jóbidífuiai diga, caifona Juzíñamuimona bite. Afémie nana monamo ite egáiñotinona finode. Juzíñamui jaca dáamie; afémiemo jíáifodo meídogafueña íñede.

¹⁸ Afémie uáfueña úrilla uaido cáatatinona caína comuítate. Afena finode ie finócafuaímona como fueñe oga llizie izói cai illena; mei ie comeci jítaina izói finode.

Uáfueña Juzíñamuimo cai comécinafue

¹⁹ Ie jira izíruiğa ámatiai cacai. Omoimona nágamiai jaca jefo jinéoiri, mei íadi fáicana o úriri, daje izói fáicana rícairi.

²⁰ Mei jí, rícaidímie Juzíñamuina íóbítañede.

²¹ Mei daí nana íairedífuiai omoi fáicanocairi, jamánomo móonaioicaide fiénidífuiai diga. Omoi comécimo lloga uai Juzíñamui úrilla uaina comeci mánainafuedo jeire omoi oíri. Mei jí afe úrillauai rínorede omoi joreño jíllóillena.

²² Jira úrillauai ómoimo lloga ráfueña fino. Fia aféfuemo táinona cacáreíñeno. Fia táinona omoi cacádi dani abí jífueitímo.

²³ Afe úrillafue fia táinona cacáidímie aféfuena iere cácañenia, afémie acáranimo uíeco ciona izóidímie.

²⁴ Afémie ie izóidena ciode, mei íadi raire jailla llezica, ie izóidena féítate.

²⁵ Cacánafueña féítañedímie jamánomo ñuera ocuícáfueña jeire ófiredede. Afe jamánomo ñuera ocuícáfue caimo rairuíñenafueña itátaga. Aféfuemo méidoñeno afémie íoide. Afe ocuícáfue afémie ínota finode. Daí finóidímie nana ie finócafuaíído caimare ite.

²⁶ Dámie Juzíñamuimo coméciidímie comeci facáoiadi, mei íadi fueña rairuíñeno úriadi, afémie dama abí jífueete. Afémie comécinafue táinóbicaide.

²⁷ Nífuénide comécinafue, Moo Juzíñamuimo eróicana íainidífuie bie izói ite; ñue Juzíñamuimo coméciidímie móonidizaiai íemo éinidizaiai diga, íaioina duéruillano canófiredede. Daje izói fecínguaina íaioi duéruillano canófiredede.

Afe llezica éniemo ite Juzíñamuina éoidimaci íaifuiaido ñúemie abina íaidoñede.

2

Conímána énenoruiñeno iri

1 Cue ámatiai, cai ebíruigamie Ocuíraima Jesucrístomo íinotimacidiomoi. Daií omoi íñua llezica comínimona dáarie enénotañeno iri.

2-3 Acatagafuedo dáitícue: Omoi gairíllanomo queníredena onoi icuíforedimie, ráifide inícuuro jítáoidimie bíadi, afémiena daiífrediomoi: “Bie ñúenomo ráii.” Mei íadi afe llezica dúeredimie tíbaizarodo bíadi, afémiena jíáifodo llínota nibai dáitio: “Batí naidai,” o nibai dáitio: “Ana benó éniemo ráii.” Daií ráanaitimiena raire ñue llínotiomoi, mei íadi dúeredimie buna náfueñega.

4 Ie jira daií dani ómoimona dáarie énenoruidiomoi. Daií cómemo jicánotimiena dani omoi abi mamédimoi, mei íadi fiénidemo comécinafuedo abi mamédimoi.

5 Cue izíruiga ámatiai, bíemo omoi cácarei. Bie éniemo úcubenidinona Juzíñamui nizede, íaioi íñuafue jamánomo jebuíllena. Daa afe izói íaioina Juzíñamui nizede, feci raa izói ie illáimana illáruina maiñóllena. Juzíñamui ie uícodo lloga uai daína izói afe illáimainanona íena izíruitimacimo fécaite.

6 Mei íadi dúeredimacina meáidaitadiomoi. ¿Uáfueñede, ráaredimaci ómoína llégitafirediaioi? Jii, uafue. ¿Ríiredimaci uícómo ómoína gugúroicana uitíaioi? Jii, uitíaioi.

7 ¿Ñie afe ráanaitimaci Crístona íáiruioidino? Jii, níimaci. Mei íadi afémie ñue izíruiga mámedido Cristo iédimoi.

8 Cúegáuaimona lloga jamánomo ocuícáfue omoi jíéruiaí ñue finódimoi. Afefue daide: “O aino cómena izíruiri, dama o abina o izíruilla izói.”

9 Mei íadi conímána dámie omoi énenoruia, íaifue mo baiídimoi. Juzíñamui ocuícáfue omoi ícoína jae daií ite.

10 Dámie naga ocuícáfue iere cacáadi, mei íadi dáallegoi ocuícallegoi nai fuitáñeniadi dama afémie ícoína daií ite. Uafue nana ocuícáfuiái fuitáñedimie zefuille izói dáallegoi fuitáñedimie daií daje izói zéfuite.

11 Mei daje Juzíñamui daide: “Jiruíreñeno iri,” afémie dáanomo daide: “Cómena titáñeno iri.” Daa come jíruireñenia mei íadi cómena fáiaí, jae ocuícáfue iere cacáñede.

12 Jira ñue o úriri; o illafue jáicina o jóneri. Caimo rairuíñenafue itátaite ocuícáfuedo jicánollícaí, ie jira ñue cai íllana jítaírede.

13 Mei jii, nana jíáimacina duéruíñedino, afe ibana duéruíñeno, jicánollícaí. Mei íadi jíáimacina duéruitino nie

izói níbaiñegaza ñue jáite, duéruillafue jicánollifue baimo ñue illa jírari.

Ínuafue níciduafue diga jitáirede

14 Cue ámatiai cacai. Dáamie ñúefuena finóñeniadi, mei íadi “Ínoticue” daiíadi ¿níifuena ñuera? ¡Afe fue ñúeñeite! ¿Afe daina ínuafue jíllotaite? Jíllotañeite.

15 Acatagafuedo dáíticue. Íncuironide güllenide ama miringo izóidino omoi cígimo íadi,

16 mei íadi ómoimona dáamie fia uaido daiíadi: “Ñue o iri. Rólliemona jíforiri. Mai güiri,” mei íadi aféruimo ie abimo jitaica raa o fecáñeniadi, ¿nie izói ñue ite? ¡Ñúeñeite!

17 Cai ínuafuemo daje izói ite. Dáamie ie ínuafuemo níciduafuedo ácatañenia afe ínuafue jae nine táinocaide, afe ie ínuafue nabáinina jírari.

18 Mei níbai, dáamie cuena dáite: “Ínuafue omo ite mei íadi cue nícidofiredicue.” Mei jira cue uai óiticue: ¡O ñue níciduafue eneno o ínuafuena cuemo ácatari! Afe llezica cue ínuafuena cue ñue níciduafuedo omo cíotaiticue.

19 Daade Juzíñamui íllana ínotio. Afe dinomo o ínuafue ñue baite. Mei íadi aféfuena fiénide janábaiai daje izói ínotiaioi. Iemona afe jácieri cuidíridiaioi.

20 Abina onóñedimiedio. ¿Jaícina jáidifuena onóacañedio? Dáanomo dáíticue: Ñue níciduafuedo cíotañega ínuafue jaca nine táinocaide.

21 Cai jaiáigima ímie Abrahana ie íáfuenidimie izóinado Juzíñamui ñue íena jíeruite. Ua Juzíñamui íáfuenidimiena íena ñue líínote. Mei ie jító Isaac titada Juzíñamuimo fecaca raana izói fecáacana jira, daií íena líínote.

22 Jira Abraham fínuaigafuemo bie uáfuena cíodio. Abraham ie níciduafuedo ie ínuafuena ñue jino cíotate. Daje llezica afe bie níciduafuedo ie ínuafue ñue jaícina mónaioicaide.

23 Daií Cuegáuai dáinana ñue fuitade. Aféuai daide: “Abraham Juzíñamuimo ínote. Ie jira Juzíñamui íemo comeci facade: Afémie cuemo ínuafue ñue baite íena íáfuenidimiena cue líínollena, —daide.” Mei Abraham Juzíñamui nabaina mamécamie.

24 Mei áfemona come níciduafuedo Juzíñamui íena íáfuenidimiena líínuafuena ónoitiomoi; dama ie ínuafuemonna líínoñedeza.

25 Afe bifue izói Rahábamo daií íficaide. Afengo jíruíredingo. Mei íadi énie fidítaraini caimare líínuamona, íaioina canode

oni jáiígodo ñue íaiói jáillena. Afe íaiómo nícidua jira Juzíñamui aféngona íáifuenidingona izói ñue llíinote.

²⁶ Mei daíí omoi ónoigafuemona llóiticue. Naga joréñonide abí tíide, afe izói níciduafuedo nabáinide íinuafue ñine táinocaide.

3

Cai fue rafue

¹ Cue ámatiai cacai. Omoimona aillo llófueraimana íacadino izói iñeno omoi iri. Mei jii, nana llófueridino, cue izóidino baimo izire jicánollicai. Afena onódiomoi.

² Nana cai aillo fiénidillegoi finódicai. Dáamie minícana fiénidillegoi ie daináfueмо iñeniadi, afémie ñue comécina figomie, ñue jaícinaidimie. Afémie nana ie abí rairuúllana onode.

³ Mozíñoragai caballo fuemo cai jóoneadi caina iere íaiói íinollena, ie ifo oni datállena finóredicai. Afemona nana ie abí diga dájade.

⁴ Daje izói áillue jofóredicaemo comeci omoi faca. Afecae jamánomo áillue íadi, afe llezica riírede jairífodo ñuitáocaide. Mei íadi datárima duera jiza datárabeñodo ie jáiacana diné datáocaide.

⁵ Afe izói cai fue ite. Cai abí aillona mei íadi fue duera. Mei íadi afe fuedo jamánomo áillue ráfuiai finórede. Uafue duera jiza récimona áillue icáiena bóotate.

⁶ Jae come fue irai izoide. Afe fuemo jamánomo facádonide íaifuiái ite. Afe bie fue Juzíñamui cai abímo finoca; mei íadi afe fue nana cai abína íaire finode. Fieni comini duere finóllirai ite; afe iráimona uneca izói cai fuemo fieni úrioidino ite. Iemona nana cai caana llezica finótagafuiái bóobicaide.

⁷ Ímado nana riire rílleniai tóirede, féedino, jaióniari, naa buináizairi. Nana áfeniai fibítagaiaíoi.

⁸ Mei íadi fuena buna fibítanide. Cai fuedo bite íairede raana jaca buna llícaitanide. Aillo fieni úritadino, titade juia izói cai fuemo ite.

⁹ Afe daje fuedo cai Moo Juzíñamuimo caimátaíoidicai; ie llezica Juzíñamui finoca cómena faidódicai. Uafue Juzíñamui dama ie eroille izói cómena finode.

¹⁰ Daje fuedo caimátaíallafue jino bite faidórillafuiái diga. Cue ámatiai, cacai. Bifue izói omoi iñeno iri.

¹¹ ¿Daje jainoi ifómona toráfomona ñújei erírediji diga jino tórede? ¡Tónide!

¹² Cue ámatiai, cacai. ¿Noménamona comáijina órede? ¡Onide! ¿Íriconamo cineci llizírede, meita áfena? ¡Llízínide! Afe daje izói cúerediji naimérediji diga daje jainoi ifómona toráfomona

jaca jino tónide. (Ie jira omoi fue rairuiri, fieni úrillafue o fuedo jino bíñeilla. Mei jira Juzíñamui imáciðomoi.)

Uáfueña ñue onónafue

¹³ Omoimo dáamie onóðimie, ñue baitáðimie íadi, afe ie onóigafue nágarui ñue ie illáfuedo ácatari. Ua ie fibíllafuedo fecaca comeci mánainafuemo ie finócafuiái cíotari.

¹⁴ Mei íadi omoi comécimo izire úradoillafue íadi, afe llezica omoi finoca ráfuiaina járidotiðomoi; bie omoi fibilla abi ñnuafuemo comeciñeno omoi iri. Afe izoíðifuiái táinofuiái, uáfueña jáanote.

¹⁵ Afe izoide fibíllafue Juzíñamuimona biñede, mei íadi afe fibíllafue bínie comini comeci úrillafue; Juzíñamuina éoíðimaci onóigafue; dama Taife ifue.

¹⁶ Aillo úradoillafue, jarire uícodo máíñuafue diga illánomo, afénomo aillo júðazitiðifue ite naa fiénidifuiári.

¹⁷ Mei íadi Juzíñamuimona fibíllafue otímaci nano fueñe nífuenino macáðiaioi. Ie mei afémaci mánaiðimaci; ríifuedo ocuñediaioi; jáiðimemo uícodo comeciitadiaioi. Afémaci dúecaillafueña oruíðino; ññufueña finófiðediaioi. Afémaci uáfodo úritímaci; jífueriñediaioi.

¹⁸ Comeci ñue uái illáfueño comuítatino afefue rigájiaí izoí comínido fecáðiaioi. Afemona ria llizilla izoide comeci jaícina ññueitaitino llínotiaioi.

4

Eniemo ite Juzíñamuina éoíðimacimo nabáirillafue

¹ Omoimo ite fuiríllafuiái ¿ninena bite, júfiduafuiái diga? Omoi fieni comeci óiacanafuiaimona bite. Aféfuái omoi comécina jaca éoitade.

² Omoi daa raana jitáíadi, áfena ómoimo llínonina jira fatíomoi. Jáie raamo omoi úradoiadi áfena ónidiomoi, jira fuiríllano jóbairitiomoi. Omoi jitaiga raa oñéðiomoi, Juzíñamuimo jícáñena jira.

³ Afémiemo omoi jícáadi llínoñediaomoi, iaire jica ícoínia. Mei jíí áfena óiacadiomoi fia omoi caimare íacanafuiaimo dotállena.

⁴ Jáifodo fiénidimacidiomoi. Biniemo ite Juzíñamuina éoíðimacimo nabáiriacadino Juzíñamui fairíconina jáite. ¿Omoi meita bífueña onóñediaomoi? Níimie éoíðimacimo nabaina maméidimie Juzíñamui fairícomana dóbaicaide.

⁵ Cuegáuai taino lloñede. Aféuai daide: “Juzíñamui ie Ñuera Joreño caimo fecade cai diga illena. Afe Joreño uríoína izoí caina izíruite,” daide.

6 Mei íadi Juzíñamui caina ríiduafuedo baimo caina cánuaibite. Mei jii Cuegáuai daide: “Juzíñamui afe abi íinotinona rairuide; mei íadi comécina mánaidimacina íaioina ríiduafuedo íaioina cánuaibite.”

7 Juzíñamui anamo mai omoi itábicaire. Taifemo omoi mameri, íemona ómoimona oni bótaiteza.

8 Mai Juzíñamuimo áinozillano caimare omoi úriri; afe ibana afémie ómoimo caimare úrite. Íáifueredino, mai omoi comeci íaifuiaí doíri. Juzíñamuina izíruiacadino íemo dáanomo íena éoidimacina izíruintino, mai omoi comeci íáínitari.

9 Omoi zúreficairi; omoi cáillicailli eeri. Omoi zadáilla jeme; jiaífodo meídocairi. Afe izói omoi cáimafue zúucaillano méidori.

10 Cai Ocuíraima Jesucristo uíecomó omoi manánairi, íemona afémie ómoína caifo naidáneiteza.

Cai ama fínócafue fieni jicánuafue

11 Amatiai, jiáimana fieni omoi úriñeno iri. Amana fieni úritimie daje izói ocuífafuemo fieni úrite. Afe izói ámana fieni jicánotimie, daíí ocuífafuemo fieni fairíote. Mei jira ocuífafuemo fieni o fairíoadi, jira ocuífafuena íere cacáñedimedio. Jae jicánoraimana íitio.

12 Mei íadi daade ocuífafue llotímie; afe llezica afémie Jicánoitimie. Dama afémie cai jíllotaraíma, jiáie izói afémie cai táinocaitaraíma. Mei, o, ¿níimedio jiáimamo itífuiaí o jicánodoillena?

Úreitirui monáillirui onónide

13 Mai bíemo omoi cacai, omoi úrilla uaina daidino. Bie izói daíífredíomoi: “Birui nibai uire jítiramo jiáie jófuemo jáiticaí. Dínomo daa fimona fecárzaiticaí, úcube cai óllena,” daidíomoi.

14 Mei íadi due onóñedíomoi uire jiti caímo íitífueña. Mei jii ¿minica mei cai cáatatinona? Cai cáatatinó daallu cíocaizaibite úillie izói. Iemona afe úillie nine táinocaide.

15 Bífue izói omoi daírede: “Juzíñamui jítaiadi íiticaí. Iemona aféfuena nibai jiáífuena fínóiticaí.”

16 Mei íadi afe ibana, o dáinana meídoiacañeno nai abi ínocana úritíomoi. Nana afe abi ínuafue fiénide.

17 Núefuena fínuana onódimie afefue finóñenia afémie fiénidífuemo báide.

5

Ráaredimaci llétafue

1 jRáaredimaci, bífuemo omoi cácarei! Cáillicailli eeri, aillo duere finóbillífuiaí ómoimo ííteza. Aféfuendo duere zéfuitíomoi.

2 Omoi ebírede ráaie jae rifaide. Omoi ñuera iníroillai ícuai güiga.

³ Omoï úcube quenírede ráaniai diga jae éezite. Afe éeíafue fiénidifue ómoïmo nítaite, ie mei bie éeíafue omoï comeci duere fínoite; irai amena cuarítaoina izóï ómoïna fínoite. Afe birui íirairuimo omoï ráaienai jae ofítatiomoï.

⁴ Omoï güíllena óinaruillaïdo táijitagamacï úcube jeruídïomoï. Afe jeruica úcube ómoïmo riire jíáifodo dájecana úrite. Nana nairai illaima Juzíñamui bie táijitagamacï éecana dáinana cascade.

⁵ Bie éniemo jamánomo ñue ebírede ráaniai ómoïmo ífirede. Dani nana omoï comeci jitailla izóï ífiredïomoï. Fia güíllárenamona mero izóï farédïomoï. Afe llezica fazílliruimo dúcizaide.

⁶ Nano fueñe nífuenidimacina titátatiomoï, ie mei afémacina fatïomoï. Afe nífuenidino ómoïmo abi zóofetiaïoi, mei íadi íaïoïmo dúcañeno fatïomoï.

Comeci járidoñenafue

⁷ Ie jira, ámatiai, cai Ocuíraïma Jesucristo billíruimo comeci járidoñeno omoï iri. Jacáfaimo táijidimie ráifide llizíllaniaïna járidoñeno úiñote. Ua nano fueñeide uáici mei nai úiñoide. Íraïe uáici mei afe llizíllaniaïna óite.

⁸ Daje izóï omoï járidoñeno. Omoï comeci mame; cai Ocuíraïma billírui jae áinozideza.

⁹ Amatiai, conímamo ríiríiñeno omoï iri, jicánollimacina omoï íñeïllena. Mei jii, Juzíñamui dama Jicánoraïma; afémie cai finócafuiï jicánollírui jae áinozide.

¹⁰ Cue ámatiai, uai llórainïmo comeci uibíoiri. Iaïoi nágarui ñue illafue caïmo ácataiteza. Juzíñamui mámeçido íaïoi úrillamona iere duere zefuídiaïoi, mei íadi jaca járidoñediaïoi.

¹¹ Duere zefuillafuemonã zefui cácañedino caïmare itíaiïoi daífiredicai. Jáiaigima Job ie járidoñenafuena cacádiomoï. Afe llezica Juzíñamui íemo íirainomo finócafuenta onódiomoï. Mei jii, Juzíñamui cai Ocuíraïma caïmo dúcañifrede, fiénidifuiï iba are ninomo caïmo óñeite.

¹² Cue ámatiai cacai. Jamánomoidifue llóiticue. Juzíñamui mámeçï uafue daíllena táinomo llíinoñeno iri; afe daí monã mámeçï énie mámeçï diga táinomo llíinoñeno iri, ñie jíáie raana táinomo llíinuano uafue daíllena daíñeno iri. “Jii” o daíia ñie izóï íteza. “Ieñede” o daíia íeñeiteza. Afe izóï mai omoï úriri Juzíñamui duere omoï fínoñeilleza.

¹³ Omoïmonã dáamie duere zefuïa afémie dama Juzíñamuïmo úriri. Dáamie caïmare íadi afémie ñuefue nitada róiri.

¹⁴ Dáamie iráreia, gairiraco imácimona eicomínina jíirizairi, afémieri Juzíñamuïmo íaïoi úrillena. Afe llezica afémiemo Juzíñamui mámeçido cáredijina jóoneitiaïoi.

¹⁵ Inuafuedo Juzíñamuimo íaiói úriadi iráredimie jíllobicaite, ie mei Moo Juzíñamui íena náidacaitaite. Íáiredifuiaimo nauí ie baíadi, afe íaifuiái oni dófinamona, ñue nífuenidimiena Juzíñamui íena líinoite.

¹⁶ Ie jira omoi íaifuiái jofó conímamo omoi lloiri. Afena jáanoñoeno iri. Afe mei conímamo Juzíñamuimo omoi jicari, íemona ñue omoi jílloilleza. Fígómie izire Juzíñamuimo úrillafue iere riinorede.

¹⁷ Uai lloraima Elías jiba cai izóidimie. Juzíñamuimo ie úrillado noci bíñeillena Juzíñamuimo jicade. Jícamona jae dafimonaámani átuedo éniemo nocina bíñede.

¹⁸ Ie mei dáanomo Juzíñamuimo jícamona meine bízaide; áfemona énie naa líizieri zicode.

¹⁹ Cue ámatiaí, ómoimona dámie ua uáimona oni fieni nibéfodo jáiadi, jíámie íena meine abido atídena ñuera.

²⁰ Bífuena omoi onóilleza. Fiénidimie ie íáirede íómona meine atídimie afe fiénidimie joreño tíllanomona jílloitaite. Afe llezica aillo íaifuiái oni dóficaite. Jae ñie.

SAN PEDRO NANOIDE CUEGABE

Primera Carta del Apóstol San Pedro

Jesumo ñnote ráidozitinomo Pedro cuete

¹ Cue Pédrodicue; Jesucristo orécamiedicue. Bibe Jesumo ñnote ráidozitinomo cueticue. Ua omoi éniemona oni Ponto éniemo, Galacia éniemo, Capadocia éniemo, Asia éniemo, Bitinia éniemo jae áfeniaido júdaizitagaomoi.

² Mei íadi Moo Juzíñamui nizécamaciomoi. Jaiai ie mamérilla izói, ja ie nizécanodiomoi. Ie Ñuera Joreño jae íeiena mamécaomoi, Jesucristo uaimo iere ñue omoi cacáreillena; afe emódomo Jesucristo díedo íaifuenidimacina Juzíñamui eróicana omoi jáillena, jae mamécaomoi. Mei Juzíñamui ómoína aillo ézicíteza, íemo comeci caimare uái illafue ómoímo llóíteza.

Juzíñamui daina ñue uáfuenta zúitífuego caimare coméicifredicai

³ Cai Ocuíraima Jesucristo Moo Juzíñamuina mai cai ióbioitalli. Mei nano fueñe afémie jamánomo caimo dúecaide. Dúecaillano como meine nane caina jéicitaacade. Ie jira Juzíñamui Jesucristona tíidinuaímona meine abido cáatate. Afe Jesús meine cáanamona Juzíñamui ua como meine jéicigacai. Afe bie cai comue dáanomó jéicínafue ñue Juzíñamui caimo fecálluifuego caina nágarui úiñotate. (Afefue cai zúíñona illífue.)

⁴ Afefue amena záfia izóíñede. Amena záfia jaca lliríírede, mei íadi afefue zúíñona jaca ñinomo lliríñede. Ua, Juzíñamui ómoína dainafue, monamo ite ñuera feci raa izóidena ómoína onótate. Afena Juzíñamui ómoíena jóoneoide, omoi como meine jéiciamona ico jíáíruido omoi maiñóllena. Afe feci raa izóidena, jaca ñiné táinocaitanide. Daje izói afe raa jaca íaidonide.

⁵ Juzíñamuimo omoi ñnuado íemo ite ñuera ríinodo ómoína ríidote. Ua ómoína ríidote, íemo ite jíllonafue dibénemo omoi dúcillena. Afe omoi zúíñona jíllonafue afémie ñue finode, íirairuillaído jino ñue onótallena.

⁶ Bífuaído omoi jamánomo caimare itíomoi. Mei íadi dáaruirie jíáíforie duere zefuíredíomoi. Afefue ñibaí jabo jítaírede.

⁷ Omoímo ite Juzíñamuimo ñnogafue, oro izoide. Naga oro iraimo facaca, bie ua oro daíllena. Afe izói ómoímo ite Juzíñamuimo ñnogafue facárede. Caimo íficaíírede facátafuíai oro zia irai izoide. Nana bie facátafuíaimona ñibáinino ñue

jino bite Juzíñamuimo ñnogafue, aillo ráifide. Ua afe ñue ñnogafue oro baímo jamánomo ráifide, mei afe oro fúiteza. Mei jira ja daí facátagamie íemo ite ie ñnogafue ñuera. Ie ñnogafue ja nibáinino ñue jino jailla, áfemona ja figora. Jesucristo cíocaizaibilliruimo afémie ñue facátagamiena jáite. Dáaruina Juzíñamuimo ite ebírenafue llínoite. Daje llezica aféruimo ñúefuena Juzíñamui íemo nitárede.

⁸ Jesucristona cíóñediomoi íadi, íena izíruiomoi. Afémiena cíóñediomoi íadi íemo ñnotiomoi. Afe omoi ñnuamona jamánomo caimare itíomoi. Afe cáimafue ñue omoi comécina zuitade. Ua afe aillo cáimafueri omoi daílluai íñede.

⁹ Omoi ñnogafue ícoinia omoi comeci jíllona máíñoitíomoi.

¹⁰ Jaiáidigima illáruillaído Juzíñamui uai jino lloraini afe bie jíllonafue riire jicánotiaíoi. Afe dáaruido bie jíllonafuena uáfodo onóillena jicájicanodiaíoi. Afe uai lloraini Juzíñamui ómoímo finóllifue uícodo llote. Ua uire Juzíñamui ómoímo dúecaillano ómoímo fecállifuiái raire uícodo llotíaíoi.

¹¹ Cristo Joreño afe uai llórainimo Cristo uire duere finóbillifue raire uícodo fidítate. Afe dáaruido Crísto ebire nitállifueña íaíomoi daje izói fidítaibite. Afe íaíomoi ite Joreño íaíomoi lluíbigafuiái ñue onóillena, comécido jenódiaíoi. “Bie lluíbigafue ¿bume dúide?” daídíaíoi. Afe emódomo: “¿Niruido bie llogáfuiái zúite?” daídíaíoi.

¹² Iemona Juzíñamui jíáifuena íaíomoi fidítate. Afefue daide: “Íaíoi uícodo llogáuaido aféruído itínuuina figo canóñediaíoi. Mei íadi nana caina ñue cánoítiaíoi.” Daí Juzíñamui íaíomoi llote. Jae biruillaído ómoímo llogáfuiái afe bie jaíai llogáuai izói jóide. Birui ñue omoi jíllouilluaina llotino, Ñuera Joreño ríinodo úritiaíoi. Afe Ñuera Joreño monámona ana oreca. Afe bífuina Juzíñamui abi imaci dani comécido onóacadiaíoi.

Juzíñamui íaífuenino cai íllena ocuide

¹³ Mei jira nana omoi jetáacaga raamo ñue comeci facari. Omoi comeci ñúefuedo omoi úrifireiri, mei Juzíñamui íco níruí íeíena ómoína uáidoiteza. Ua Jesucristo cíocailliruido Juzíñamui ómoímo dúecaillíuaimo daa áfemo izire omoi comécíiri.

¹⁴ Ocuíllana jíeruítu úruíai izói omoi iri. Jaíai Juzíñamuina omoi ónoñena llezica ómoímo ite comeci jítaíllafue izói, omoi íñeno iri.

¹⁵ Mei birui jíáífodo ñue omoi iri. Nana omoi jetáacagafuiaimo, jamánomo ñue íaífuenino mai omoi iri, mei ómoína uáidote Juzíñamui íaífuenidímieza.

16 Mei Juzíñamui Cuegáuai daií daide: “Cue íaifuenidimiedicueza, cue izói íaifuenino omoi iri,” daií Juzíñamui daide.

17 Juzíñamui illa dígamie íaioi illáfuiái riire jicánoite. Ua illáicomínimo, jamáicomínimo dámie fiéñeno daje izói nana riire jicánoite. Ja birui afe bie Juzíñamuina “Cai Moo” daidíomoi. Afemona afémiena mai caimare omoi jacírui. Ua bie éniemo omoi ille dinó bie izói omoi iri.

18 Mei Juzíñamui omoi illa táinofuiaimona ja ómoína jílloateza. Afe ómoimo ite táinofuiái omoi jaiáidigimamona otíomoi. Afe jílloafue ráifinana ñue onódiomoi. Bie ráifina órodo íbánide. Daje izói plátado íbánide, naa jíáie úcubetunido.

19 Afe jílloafue dama Cristo ráifide díedo íbátarede. Mei Jesucristo cruzmo, íainide boáfenide ovéjatiru izóidimie, Juzíñamuimo fállena fecaca.

20 Jaiai ninomo bie énie nai cómuitañenia Cristo daií mameca, mei íadi are illa ícoimo, benó cai illa llezica, afémie cíocaizaíbite ñue omoi íllena.

21 Afe bie Crísto Juzíñamuimo ínotíomoi. Tíidimacimona Juzíñamui bie Crístonameine cáatate. Afe méifodo Juzíñamui ñúefue íemo nitade. Afemona afémiedo Juzíñamuimo ínotíomoi. Afe izói ja Juzíñamuimo izire comécidiomoi.

22 Ja birui ua llogáuaina Ñuera Joréñodo omoi jíeruillamona omoi comeci íaifuiái muiñódiomoi. Afe omoi comeci íaifue múiñuamona omoi ámatiaína uáfueña nahí izíruiarediomoi. Afe daií conímána mai omoi comécido, naa omoi ríinodo izírui.

23 Mei jíi, como meine jéicigaomoi. Come móomona meine jéiciñegaomoi mei tíitiaioiza. Mei íadi Juzíñamui uaido meine jéicigaomoi. Afémie uai jaca ninomo féiñeno zíiñona ite.

24 Jaiai Juzíñamui Cuegáuai daje izói llote. Aféuai daide: Nana bíniemo ite náiraímona illa dígamie jaca ráitíai izoide. Íaioi jamánomo jalléinafue ráitíai záfia izoide. Afe ráitíai dúifirede; dúillamona ie záfia uaide.

25 Mei íadi cai Ocuídímie uai féiñeno jaca zíiñona ite. Afe bie uai, ua ómoimo lloga ñue jílloa uai.

2

1 Mei jira nana ómoimo ite éoicana finócafuíai fáicanocairi. Daje izói jíáimana o jífueacanafue abido oñeno fáicanocairi. Comeci íáirena mei, emodo ífuedo comínina ñue úritímie izóidífue omoi féitari. Daje izói jíáimamo omoi úradoñeno iri. Afe mei naga jíáimana ebena úacaillafuiái mai omoi féitaziri.

2 Mei afe méifodo como jococa úrue izói comeci náiretaite jirole jenori. Ua, monoi ii jírua izói Juzíñamui lloga íainino,

juánide uaillai mai izire omoi jenori, nágarui áfemo omoi comécillena. Afedo ñue riire móonaitiomoiza. Daje izói aféuaido nanómona omoi ñinoia, jílloitiomoi.

³ Ua daií omoi jenori, mei cai Ocuíraima comécina ñué nana onódiomoiza.

Jesucristo cómena zíñona cáatate nofici izóidimie

⁴ Ie jira cai Ocuíraimamo mai omoi áinoziri; afémie cómena cáatate nofici izóidimieza. Afémie comínimona fiénide nofici ruiífriullano oni dotaca izóidimie. Mei íadi Juzíñamui dibénedo afémie iere ráifide nizeca nofici izóidimie.

⁵ Afe izói omoi cáatate nofici izóidimaciomoi. Iemona Juzíñamui ómoína óiacade, ie cióñena ua ífírenaco níllena. Afemona abina omoi rairuíñeno iri. Daje izói Juzíñamui íeiena mameca, Juzíñamuimo comínido úrirainina dáaziena ómoína jóoneacade. Daií omoi jáillemona, uaido Juzíñamui ióbillena fecácafue íemo Jesucristodo fécaitiomoi. Afena Juzíñamui jeire óiteza.

⁶ Cai Ocuíraima Jesucristo bie nofici izóidimie. Ie jira Juzíñamui Cuegáuai uícodo daje izói llote; aféuaido Juzíñamui daide:

Afe cue irácomo, nii Sión daínácomo, dámie jóneticue.

Afémie iere ráifide nizeca ñue riire mozíoide nofici izóidimie.

Nana afémiemo ñnotino meáidaiñeno táinomo fáifíñeitiaíoi, daide.

⁷⁻⁸ Ja birui afémiemo ñue ñnotimaciomoi. Omoiiri bie nofici izóidimie jamánomo ráifide. Mei íadi afémiemo ñnoñeite comini, écitailla izói, afémiemo baíidiaíoi. Ua Cuegáuai benomo daina izói ja íaíoiimo zuide. Aféuai daide:

Afémie écitaitate nofici izói ite.

Ua áillue noficimo écitaide baíilla izói afémie íemo ñnoñedinona báitate.

Mei afe llogáuai jeire oñenamona, écitaidimie izói baíidiaíoi. Afe íaíoi baíille jaíai ninomo daií mamécamací. Daje izói afe ñue riire nofici izóidimieimo íaíoi ñnoñenamona nane jáíie daínáuai íaíoiimo zuide. Íaíoi ñnoñegamie dibénedo aféuai daide:

Jofo níraini oni dotaca nofici jae ua riire mozíoide nofici izói jaide.

Juzíñamuimo jaináidimaciomoi

⁹ Mei íadi nizécaziediomoi. Afe izói Jamánomoidillaima Juzíñamui iédiomoi. Juzíñamui ocuífíregá afémiemo comínido úrirainidiomoi. Afe emódomo Juzíñamui ñue finoca ie ocuífíregá náiraíidiomoi. Daje izói dama Juzíñamuimo jainaide comínidiomoi. Bífuiái bie izói jóide, Juzíñamui cai jílloillena uaido jamánomo ebire finócafuiái jino comínimo omoi llóllena.

Afe bíedo Juziñamui, omoi jítifomona jino ie jamánomo ebírede úzefomo, ómoína jíríte.

10 Jaiái illáruido Juziñamui ómoína daide: “Cue comíniñediomoi,” mei íadi ja birui Juziñamuimo jainaide náiraidiomoi. Jaiái ómoimo buna dúecaiñede, mei íadi birui Juziñamui duéruigamacidiomoi.

Afe jaináidino Juziñamui táijitagana itáioi

11 Izíruiga ámatiai, Juziñamuimo ínoñedino cígiri itíomoi za, jicánemaci izóidiomoi. Ie jira izire jicádicue, bie éniemo ite táinomo come abi jitailla fiénidifuiamona mai abí omoi rairuiri, mei afe abi jítáinafuiái omoi comécimo bacáuaina íoideza.

12 Juziñamuimo ínoñedino cígiri omoi illa dinó ñue illa dibénedo mai omoi iri. Mei birui afémaci fiénidimacidiomoi izói, ómoína uáitaoidiaioi. Mei íadi afe ómoína uáitaoidino, omoi ñue illáfueña íaioi ciónamona, ñibai íaioi comécimo ite fiénidifuiái ñúefuiaina méidoitiaioi. Iemona Juziñamui íaioína dúecaizabilliruímo afémaci daje izói Juziñamui íobioitaitaioi.

13 Cai Ocuíraimana ícoinia, nana comíni jónega ríimaci anamo, mai omoi itábicaíri. Daje izói jabóidillaíma nahíllaíma anamo omoi itábicaíri. Afe nahíllaíma jamánomo ocuídímie.

14 Afe nahíllaíma oreca jabóidillaíni, fiénidinona duere fínoítiaioi, mei íadi ñúefue dibénemo itínona ébitaitaioi. Iemona íaioi anamo ífireíri.

15 Mei jira Juziñamui ñue illáfueño omoi íllana jitaide, áfedo abina onóñedimaci, comécinino úritimaci diga íaioi táinodo úrillauai omoi fáinocaitallena.

16 Ráiruifégamací izói ñue omoi macari. Mei íadi afe omoi rairuíñenafuedo fiénicana abina omoi ínoñeno iri. Dáarie afe rairuíñenafuedo abí ínuamona fiénidifue finóacadiaioi. Afe izói omoi íñeno iri. Mei íadi Juziñamui izire rairuica táijitagano izói omoi macari. Daí omoi íadi iere ñuera.

17 Dáamie jámairuíñeno nana íaioi íllaze ñue caimare jacíruioiri. Nana ámatiaína daje izói omoi izíruiiri. Juziñamuimo ñue izire omoi jacíruioiri. Daje izói nahíllaímana uáitañeno ñue omoi jacíruioiri.

Cristo nauí duere zefuíllafue afe izói cai íllena caímo cíotate

18 Táijitagamací, omoi ocuídímiaína ñue jacíruioicana íaioi anamo mai omoi itábicaíri. Omoimo dúecaífrede caimare ocuídímiaí, mai íaioi anamo itábicaíri. Daje izói jíáie ríire táijítate ocuídímiaí anamo mai omoi itábicaíri.

19 Nágamíai taino abiri duere zefuítaadi, mei íadi afe llezica Juziñamuimo comécinamona afémaci nai caimare ía, afe

Juzíñamuina ióbitade. Juzíñamui ñue facátainafue afémacimo jóoneite.

²⁰ Mei jiáifodo fiénidifue omoi finóadi, íemona ómoína duere íaioi finolle llezica nai járidoñeno omoi ia, onóigaza afefue figo jóñoite. Mei íadi ñúefue omoi finuamona ómoína duere íaioi zefuítaadi nai járidoñeno omoi ia, ja omoi illafue Juzíñamui eróicana figura.

²¹ Ua afe daií omoi íllena Juzíñamui mamécamacidiomoi. Mei jii omoi ícoinia Cristo iere duere finócaza. Afe ie duere zefuíllafue omoi fidítate, afémie illa izói omoi íllena.

²² Afémie jaca due fiénidifue finóñede. Daje izói jaca buna jífueñede.

²³ Fiénidiuailai Jesumo íaioi nita llezica, iba olle fiénidiuailaina afémie lloñede. Izire íena zefuítatiaioimo, Jesús riire ibana otátañede; mei íadi dama afémie Juzíñamuimo dama ie uai jóonete, mei Juzíñamui ñue jaícina jóonefirede riire jicánoraimanaza.

²⁴ Daje Cristo cruzmo illa llezica, dama ie abido cai fiénidifuiaina abíocaiga izói uite. Ua afémie cai fiénidifuiiai uiga, aféfuiiai dibénemo tídinuiiai izói cai íllena. (Daií aféfuiaina fínoñeiticai.) Mei afe méifodo, nífuenino Moo Juzíñamui io dibénemo ñue jaícina íredicai. Afémie aillo bofécamiena jaide ñue jíllotagamacina omoi jáillena.

²⁵ Naui úiñoñega júdaizite ovejai izói ebena macádiomoi; mei íadi birui Crísto mo ja meine abido dúcidiomoi. Ovejai úiñoraima izói afémie ómoína úiñoñefirede. Afe izói afémie omoi comeci rairuítagamie.

3

Airedino iníredino diga íaioi ñue íllena llétafue

¹ Nana riímaci anamo cai itábicailla izói, nana ómoimona iníredingotiai dani omoi inítiai anamo ñue omoi itábicairi. Mei omoi inítiaimona nibai dáríe Juzíñamui llogáuaina nai íinoñediaioi; mei íadi omoi ñue illáfueña íaioi ciónamona, íaioi comeci ífue nibai ñúefueña méidotaita, jíaie uáillaina nai omoi llóñeniadi.

² Ua omoi íaioi anamo ñue íáinino itábicaillafue áfena íaioi ciónamona, daje izói Jesumo ínoitiaioi.

³ Jamáingotiai fiérilla izói mai omoi fiériri. Mei aillo jino abimo jitaca raa izóidedo fiériñediaioi. Mei jira fia abi fiédua ráifide oro finoina raana jitáñeno omoi iri. Afe izói jamánomo féirede ífóti níllo fiériñeno iri. Daje izói aillo ráifide iníroina jitáñeno iri.

⁴ Mei íadi omoi comécina ebire fiérilla izói ñue omoi finori. Afe omoi comécina mánainafuena járidoñenafue diga omoi fiéríta afe iere ñuera. Afe bie féiñede ebíredifue Juzíñamui eróicana jamánomo aillo ráífide.

⁵ Afe daí jaiáidinomo ite Juzíñamuimo ínofirede íaífuenidingotiai comécina ñue fiéritadiaoí. Afe llezica íaíoi inítiai anamo ñue itábicaidiaoí.

⁶ Ua daí Sara Abraham daináfuena jeire ote. Afe daí úamona afengo íena: “Cue ocuíraimadio,” uáidofirede. Ja birui nífuemo omoi jacínaiñeno, ñúefue omoi jeire oía, Sara izóidingotiaína jáitiomoi.

⁷ Afe dáanomo nana ómoimona áiredimíai cácarei. Caimare omoi áitiaimo comécillano, dani íaíoiimo dúide ñúefuena íaíoiimo nitari. Mei ringóniai iima jofófemo jabóicana maírídeza. Daje izói Juzíñamui ómoimo dúecaillano fecaca ziiñona illifue, dájeze ringóniaimo fecaca. Afemona cáimafuedo íaíoiimo úirediomoi. Afe izói omoi iri, omoi Juzíñamuimo úrilla uai jíziñeilleza.

Ñue omoi illa ícoinia duere zefuítagaomoi

⁸ Nana bífuiaimona daa ráifidiuaido nana ómoimo úriticue. Mai dáafuemo comeci fácano, conímana caimare omoi canori. Daje izói conímana omoi duéruiri. Ua nahí ámatiai izói conímana omoi izíruiiri. Come dúecaillano comécina mánaidimacina omoi iri.

⁹ Daje izói fiénidifue comuía afe íbana oñeno iri. Afe izói báíñuafue comuía, íbana báíñoñeno iri. Mei jíáifo dájecana ñúefue íba íaíoiimo oíri; Juzíñamui ómoína ie ñúefue llínollena mamédeza.

¹⁰ Mei jii; Juzíñamui Cuegáuai bie izói daide:

Biruillaído ñue illáfuenta izíruiitimie, caimare are íacadimie diga, fieni úrillafuemoná mai ie fue ráiruíteza.

Afe izói dámie caimare íllado are íacade ie fue rairuíteza.

Iemo daje izói táínofuiaína mai afémie llóñeíteza.

¹¹ Fiénidifuiái afémie fáicanocaillano mai ñúefuemo comécíteza;

Iemo conímana comeci caimare uái illafue jenórede.

Afe mei afémie nágarui áfeodo jáiredeza.

¹² Mei cai Ocuíraima comécina jaícina jóidimacina rairuíllano ñue úíñoteza.

Daje izói afémiemo íaíoi úriadi, íaíoiimo cacáreide.

Mei íadi fiénidifue finódinomona ie uíeco oni jíicaide.

¹³ Jáímamo ñue finóllino jaca izire omoi jenóadi, íraamo omoi jíritaitimiena íñeíte!

¹⁴ Mei íadi omoi jaícina ñue illáfuedo omoi duere zefui daí, caimare íitiomoi. Buna jacíruiñeno iri; daje izói áfedo comeci llícitaiñeno omoi iri.

15 Mei íadi Cristo omoí comécido nahí Ocuídillaímana mai omoí mameri. Mai uícomo ñue omoí finóbiri, ómoímo ite úiñogafue jicánotimaci uai omoí ólleza. Mei íadi jacíruioicana comeci mánaínafuedo afe fairíoína uai omoí oíri.

16 Omoí illafue ñue jaícina mameri, omoí comeci úrillafue nífuenino uái íllena. Ja Crístomo omoí ínuamona, omoí illafue ñuera. Afe omoí ñue illáfuedo fiéni úritino ite. Ie jira ua omoí abi illafue ñue jaícina jónefireiri, ómoímo fiéni úritino daní íaioí fiéni úrilla uáillairi meáidallena.

17 Juzíñamui jitáíadi ñúefue ícoínia duere omoí zefuíadi afe fue ñuera. Juzíñamuina íóbitade. Mei íadi omoí fiéni finócafue ícoínia duere omoí zefuíadi afefue figo jinoñede. Afefue Juzíñamuina íóbitañede.

18 Mei dama Cristo cai fiénidífue ícoínia, dama abído tíñellinomo, dácaíño duere zefuúllano tíide. Afémie iere fígomie, mei íadi cai fiénina ícoínia cáiconi duere zefuízaíbite, Juzíñamui illánomo cai jáillena. Ie abi íeizi dibénedo titácamié, mei íadi Juzíñamui Joréñodo meine abído cáadimie.

19 Ie mei Cristo íe joréñodo, nai meine caífo náidañena llezica, jáínomo íbaicoga tíidino joréñuai afémie llétajide.

20 Bimaci jaíai ninomo Noé illáruido llogáuaina jíeruiñedino. Aféruillaído áíllue nocáe Noé fínua llezica, fiénidino duere finólliruimo Juzíñamui comeci raíre járidoñeno, fíaicana áfemo úiñoide. Afe áíllue nocaedo nana dane ocho dígamie jíllodiaíoi. Ua Juzíñamui izire comini duere fínua mona, afe aillo jaínoi cígimona jíllodiaíoi.

21 Afe jáinoimo cai uibíllano, íaioí jílluafue caína onótate. Ie jira afe jaínoi báutiza jaínoi izoide; mei báutiza jáinoido fiénidífuemona cai jílluana onótagacaíza. Bautismo ráifinafue fia abi íaífue duáfueñede. Mei íadi ñue íainide comeci úrillafue Juzíñamuimo cai jícafue dibénemo bautismo ráifinafue comuide. Afe íainide comeci úrillafue afémiemo jícarédicai, mei Jesucristo tíide meine cáanafuedo jíllotagacaíza.

22 Afémie meine cáaillano monamo jaíde. Jaillano Juzíñamui nabézimo ite. Nana Juzíñamui abi imaci, jae Jesús anamo itíaioi, naa jíaíe ríimaciri. Ua nana máirimaci baímo afémie ríinorede.

4

Juzíñamui caímo fecaca eróicana, come máirie illa dieze, íemo tájiredicai

1 Mei jira, Cristo dama íe abído duere zefuúlla izoí, daní omoí abína Crístodo duere zefuúllena daíí finóbiredíomoi. Afena

rairuñeno omoi iri. Mei Cristo ícoinia abina izi cácatagamie abido fiénidifuiaina finóacañede.

² Iemona nana ie cáanaruillaído Juziñamui comeci jítainafue izói iite. Afémie bie éniemo jaináidino comeci jítáioinafuiaina fuitállena jénoñeite.

³ Afe Juziñamuina onóñedino gáinafuiái izói jamánomo jaiái ninomo are omoi illa ja daí itíomoiiza; meine daje izói iñeno omoi iri. Naui aféruillaído fiénidifue diné jaináidiomoi. Omoi comeci fiéni jítainafuiáimo íoidiomoi. Daje izói jamánomo fiénidiji omoi jíruamona jifáifirediomoi. Omoi dáanomo aillo güilláruillaído fiénidifuiáiri faillíñafirediomoi. Daje izói jánaraimo gairífirediomoi, afe jánarai íóbitallena. Daí gairíllano aillo bie izoide íaifuiái finófirediomoi.

⁴ Ja birui bie Juziñamuina onóñedino, ja aillo jamánomo íaifue dibénemo itíaiói. Iemona íaiói omoi fiéni nabáñenari, fáigacaidiaíoi. Iemona ómoimo fiéni úritiaíoi.

⁵ Mei íadi afe fiénidimaci íaiói comeci ifue jino Juziñamuimo llórediaíoi naa íaiói finócafuiári. Ua cáadino tíidino diga afémie íanori íllamona iere riire jicánoite.

⁶ Mei jii, Juziñamui daína jíllona uai tíidimacimo uícodo llotátaga, afe tíidino joreño dibénedo Juziñamui illa izói íaiói íllena. Jiái íemo baimaci, nana bínie comíni tíilla izói tíitiaíoi íadi, ja Juziñamui illa izói cáaitimacina írediaíoi.

⁷ Ja naga ráfuiái fuizáillinomo ánozide. Mei jira ñúefuemo comécidimacina omoi iri. Afe izói Juziñamuimo ñue úrillafuemo jifánodoñeno izire omoi facáoiri.

⁸ Omoi finoca naga jiáie raa baimo, conímana iere omoi izírui; mei izíruillafue aillo íaifuiaina enínaitaga izói niné féitateza.

⁹ Conímaiaína ómoimo mácaibitónona diga, omoi jofomo comécido ruifíruñeno caimare llínofireiri.

¹⁰ Illa dígamaci Juziñamui ómoimo iga táijina ríino daína izói jiáimana canórediomoi. Afe izói omoi íllamona Juziñamui ómoimo fecaca jiáifodo onóigafuiaina ñue dájerize fecaráimacina íitiomoi.

¹¹ Dámie uaillai jino llóiacania, comíni llófuellena, Juziñamui daína uaillai jino llórede. Dámie jiáimana canóadi, Juziñamui fecaca ríinodo canórede. Nana omoi táijinafuedo ñúefue Juziñamuimo nitárediomoi. Jesucristo cai diga íllamona daí Juziñamuina íóbitaredicai. Mei afe Crístomo nana ebirede ñúefue, daje izói ríino diga jaca afémiemo zíñona dúideza. Aquí izói jóideza.

Jesucristomo cai jainaina ícoinia duere finócanodicai mei íadi meáiruñedicai

12 Izíruiġa ámatiai, ómoimo cómuite izire facátainafueri fáigacaiñoeno iri. Aféfuiaina jánaidífue daiñoeno iri.

13 Mei jáífodo aféfuemo omoi caimátaioiri; ja Cristo duere zefuállafuiai dibénomo dúirediomoiza. Afe izói omoi íadi, Jesucristo ebire billana omoi cíuillemona jamánomo ióbicaítio moi.

14 Cristo ícoinia omoi íaioi báinoia, cáimafue dibénomo ítíomoi; mei Juzíñamui ebírede Joreño úicaigaomoiza. Omoi báinoitino Crístori fieni úritiaioi, mei íadi omoi dibénomona ñúfuedo íemo úritíomoi.

15 Omoimona dámie duere zefuíadi, come fáfiredímie, mei nibai merírifiredímie dibéfuemo duere zefuíñoeno iri. Daje izói íáibadímie, jáíe come ífuemo gágutajidímie dibénomo duere zefuíñoeno iri.

16 Mei jáífodo, Crístomo ínotinona omoi mameina ícoinia, duere omoi zefuíadi, áfena meáiruinoeno iri. Ua meáiruinoeno aféfuerei Juzíñamuina omoi ióbioitari.

17 Mei ja Juzíñamui cai lletálliruimo dúcizaide. Ua dani Juzíñamuimo jáinaidíonomo jáicina llétafue fueñe táiniaide. Mei afe jáicina llétafue dai caimo tainéiadi, ¿nie izói Juzíñamui llogáuaina jeire oñédino, írairuimo dúcille llezica, íitiaioi? Afémaci lletállífue jamánomo riire zúite.

18 Fígomaci dibénomo jílloillífue juare ia, Juzíñamui ñue jacíruiñoedino jílloillino iere féirede. ¿Nie izói nibáilliaioi? ¡Níbaiñeitiaioi!

19 Ie jira Juzíñamui comeci jítailla izói duere zefuídino, naga ñúfuiaina finóicairediaioi. Afe llezica íaioi coméciaí Juzíñamuina rairuítarediaioi. Mei Juzíñamui méidoñoeno ínofiredímieza, íaioi comúitatímieza.

5

Crístomo ínotino llóina uai

1 Omoi gairífirena cígimo ite ocuide eicomínimo cue llóina uai llóitícue; cue ja afémaci izói eicómedícueza. Daje izói Cristo duere zefuilla uai ñabáidímíedícue. Ico ñírui Cristo bille llezica ie ebíredífue cíocalliruimo, afe ie ebi omoi cácaille izói, afe izói ie ebi cácaítícue.

2 Nana omoi uai anamo itínuiái ñue íaioina omoi úíñori, oveja úíñoraíma ie ovéjaíái úíñua ízoi. Ráairuinoeno, Juzíñamui jítailla izói, omoi comeci figónamona íaioina omoi úíñori. Jáíma izire ocuilla izói íaioina omoi úíñoñoeno iri. Dama úcube óllena úíñua izói íaioina omoi úíñoñoeno iri. Dama omoi comeci óiacana izói caimare omoi táijiri.

3 Omoi uai anamo itínona ríirerie comécina éoide comini úíñotímie úíñua izói omoi úíñoñoeno iri. Mei jáífodo omoi

illafue ñue jaícina omoi mameri, omoi illa izói íaioi ílleza. Mei daií ñue illafue fueñe íaiοimo jino llotímiediomoiza.

⁴ Afe jira Nahí Uiñoraíma Cristo cíocailliruimo ebírede ñúefue ómoimo nítaite. Afefue jaca ninomo féiñeite. (Comini dibénemona cómemo fecaca raa, jamánomoidímie daiíllena, fia rábiai finoina ifo icuifoí. Afécuifoí etuda niné táinocaite, mei íadi omoi maiñóredifue jaca niné táinocaiñeite.)

⁵ Afe daje izói, jítócomini, mai omoi ocuide éinamaci ñuera ríuui anamo itábicaíri. Ua nana omoi conímana comeci mánainafuedo daje anamo dájena itábicairediomoí. Mei jaiái Juzíñamui Cuegáuai daíde:

Juzíñamui, nana fiēni abí íinotinona uáitaοide; ua íaiοimona ie uíeco oni jíicaide.

Mei íadi nana comécina mánaidinona afémie dúecaifirede.

⁶ Mei jira Juzíñamui ñue ríirede uai anamo ríiriñeno comécina mánaidímiena omoi iri. Afemona ie comeci daiílliruido afémie ómoína jamánomoidímiena jóneite.

⁷ Nana omoi izire comeci lícidifuiái Juzíñamuimo uáfodo lloíri; mei afémie ómoína iere rairuídeza.

⁸ Ñue cáadímie izói abi omoi rairuíoiri; mei cai bacáuai ímie Taife caina jenódeza. Ua jufíruite jánallari rille jénua izói afémie caina jenódeza. Ua jenode caina fiēnidifueмо ifóllena.

⁹ Afémiemo omoi íinogafuedo izire uáitaοicana abí omoi mameri. Mei nágagobiaimo ite omoi ámatiaí dáafueri duere zefuídíaiοiza onódiomoiza.

¹⁰ Mei íadi nano íanori duere omoi zefuilla mei, Juzíñamui meine abido caimare duere zefuíñena dibénemo ómoína itátaite. Afe llezica íaifueмо comécina féitanide cómena ómoína mámeite. Ua dáaruido ómoína riire nibáinino nabéfuena náretataite. Afe daje Juzíñamui fiēnidifueмона abi rairuúllafuena cai ite, naa jíaie canóinafuiari. Dáamie íemo ite ziiño ebírenafueмо ebi cai cácaillena, afémie áfemo caina mamede; mei Jesucrístomo cai jaináíllamona, áfemo ebi cácaíticai.

¹¹ Uafue, afe Crístomo nana ebirede ñúefue, ríino diga jaca ziiñona dúide. Aquíe izói íteza.

Iiraiфуena facádua uai

¹² Bie íanori cue cuegabe Silvánodo ómoimo orédicue. Afémie ñue íinofirede ámaza comécido onódicue. Afe bibedo ñúefueмо omoi íllena omoi llófueticue. Ja aillo Juzíñamui ézicigafuiaina jeire otíomoí. Iemona afémie ómoína iere izíruiteza ua onódiomoí. Aféfuеdo riire nibáinino ómoína mamédicue, uáfodo omoi onóíllena. Bifue nágarui jaícina jeire omoi oíri.

¹³ Babilonia jófuego ite Juzíñamuimo gairídino, Juzíñamui omoi izói eneno nizécano, ómoimo uailai orédiaioi. Daje izói cuedo jáicadimie Marcos ómoína uáidote.

¹⁴ Nahí ámana izíruilla izói caimare conímana omoi uáidori. Nana omoi Jesucristomo jaináidinodíomoiza, mai caimare uái omoi iri. Mai; jae n#e.

SAN PEDRO MÉIFODO CUEGABE

Segunda Carta del Apóstol San Pedro

Jesumo ñnotinomo Pedro cuete

¹ Cue Simón Pédrodicue. Jesucristo ocuífiregamiedicue. Daje izói ie oréfíregamiedicue. Iere ráifide ñnuafue jeire otínomo bibe cueticue. Omoi ñnogafue daa cai ñnogafue izói ráifide. Aféfuena ja fairíotiomoi, mei cai Jíllotatimie Jesucristo Juzíñamui diga comécina ñue jaícina jóidimieza.

² Cai Ocuíraima Jesús, Juzíñamui diga, omoi onónamona diga éziciafuiai, daje izói comeci caimare uái illáfuiai dibénomo omoi iri.

Crístomo jaináidinomo ite nie izóidifuiiai

³ Nana cai comeci jitaica raa, Juzíñamui iodo caimare cai jáillena Juzíñamuimo ite ríinodo caimo fecaca. Afémie cai ie fidítamona bífuiaina caimo ite. Ua dama íemo ite ññuefuiaido afémie caina íemo ñnotade. Daje izói ie fáigacailla ebire finócafuiaido íemo caina ñnotade.

⁴ Iemona ie jífueñeno fecalle uai caimo llote. Bie caimo llogáuai iere aillo ráifide uai. Afe uáillaído Juzíñamui illa izói íitiomoi. Nana comini íaifue dibénemo fieni comeci jítainafuiaido uigámaci; mei íadi Juzíñamui ómoimo llogáuaido afe íaifuemona jae jíllodiomoi. Iemona Juzíñamui ñue illafue dibénemo íitiomoi.

⁵ Mei ie jira omoi ñnogafuemo, nágarui Cristo ñue illáfuedo omoi íocire jáillafuena aillo nabáicana uiri; afe omoi ñue jáillafuemo caimare fibíllafue daje izói nabáicana omoi uiri;

⁶ afe caimare fibíllafuemo, dama abina rairuíllifue omoi nabáicana uiri; afe dama abina rairuíllafuemo comeci járidoñenafue omoi nabáicana uiri; afe comeci járidoñenafuemo Juzíñamuimo caimare comécillifue dájemo nabáicana uiri;

⁷ afe Juzíñamuimo caimare comécillafuemo ámatiaina duéruillafue dájemo nabáicana uiri; afe ámatiaina duéruillafuemo nahí izíruillafue mai izire dájemo nabáicana uiri.

⁸ Nana bie izói daináfuiai jeire omoi óiadi, afe llezica aféfuiai ñue omoi móonaitaiadi, omoi illafue táinomo báíñeite. Daje izói cai Ocuíraima Jesucristona omoi onónafue táinoñeite.

⁹ Mei íadi bífuiaina jeire oñédino uínidimie illa izói ite; jica cióñeno áinori ciódimie izói ite. Jaiai ie finoca fiénidifuiiai dóinamo ja comécíñede.

10 Mei jira, ámatiai, Juziñamui uáidota eneno nizécamaci omoiza onódi omoiza. Iemona jíeredimaci izói omoi iri, aféfuiai omoi comécimo riire amena jáinao izói illena. Afe izói omoi íadi, jaca Cristo íomona oni nibéfodo jáiñeiti omoi.

11 Bifue daina izói omoi íadi, cai ocuide Jíllotaraima Jesucristo zíñona illáimana illánomo, rairuíñeno caimare jofu uáidolli omoi.

12 Mei íemona bífuiaimo omoi comécioitaiticue; aféfuiai onódi omoi íadi. Daje izói afe ómoimo birui ite ua uai jeire otí omoi íadi, nai jaca jáicina comécioitaiticue.

13 Bie ñue llóinafue uáfodo ómoimo cue lletalle nai cue jáicana llezica, cúemona ñue jáicina cíoide.

14 Mei jii, nauí cai Ocuíraima Jesucristo benó illa llezica, raire cue tíllano bie éniemo cue íñeillena cuena daide. Afémie cuemo llua izói ja raire íficaite.

15 Ie jira birui nana cue ríinodo llófueriticue, cue tilla méfomo bífuiaimo jaca ñue omoi comécillena.

Pedro Cristo jamánomo ñuera ébifuenta ciónana jino llote

16 Nauí cue nabáiñiai cue diga cai Ocuíraima Jesucristo ite ñuera ríino ífuenta omoi llófueticai, ie meine abido billifue diga. Nana afe llófueinafuiai dani cai comécimo comuídifueñede. Táinofuenta lloñédicai, mei íadi dani cai uído ie jamánomo ñuera ébifuenta cíodinodicai. Iemona uafue lloticai.

17 Ie Moo Juziñamui íemo ñúefue nítana, jáie ebíredifue íemo fécana dani cai uído cíodicai. Juziñamui ebire ie uaido daide: "Bie cue izíruiga jító. Afémieri iere íóboidicue," daide.

18 Aquíe izói monámona Moo dáinana dani cai jefodo cacádicai; mei afe ñue eneno nizeca ídumo afe cai Ocuíraimaioiri jáidicaiza.

19 Bie como cai llogafue baímo, jáie nahí ua llogafue ite. Bie nahí uafue jaiái uícodo uai jino llóraini lloga cuezáuai. Afe cuezáuai cai llogáuaina nabaide. Bínie nai jíití fomo illa llezica búaina ráiruíñeno iere jeire óredí omoi. Aféuai mechera naio bóua jíitífo egáiñua izoide. Ua aféuai nai mona mónaiñenia, jíitífo egáiñua izói omoi comécina egáiñote. Afe mona monailla llezica monáiracudu izóidímie billano, omoi comécina ñue jáicina déitaitaite.

20 Mei fueñe bífueimo omoi coméciri: Cuezáuailaímo ite uícodo jino lloga daináfuiai dama afe uai lloráimamona llóñega.

21 Mei onódicaiza, uai llóraini jaca dani íaiói comeci jítainafuiaído úriñediaíoi. Mei jíáifodo afe Juziñamui íeiena maiñócamaci afémie dibéfodo úritiaíoi; mei Ñuera Joreño ífócaiaíoiiza.

2

*Táinofuiaina llófuefiredino
(Jud 4-13)*

¹ Mei íadi afe dáaruillaido Israel comini cígiri táinofuiaino llóraini ite. Afe izói omoi cígiri táinofuiaido llófueritino íite. Afémaci dani fieni finode ifoci úrillafuena báinino omoi llófueitiaioi, comini Juzíñamuimo íaioi íinogafue féitallena. Daií aféuaido íaioina jílloitaite Ocuíraimana jáanoitiaioi. Afemona íaioi niné raire táinocaillifue dani íaioimo zúite.

² Íaioimo ite fiénidifue dibénedo aillo comini jáitiaioi. Dani afémaci ícoinia cai ua ñue jaille iori fieni úritiaioi. Bie ñue ua cai jaille io Juzíñamui ñúefue.

³ Íaioi aillo úcube llínoiacanamona, táinofuiaido omoi íaioi jífuiado úcubena llínoitiaioi. Mei íadi íaioi niné táinocaitaimie, íaioi finócafuiaina cíoillano daií íaioi táinocaillifuena fáicanocaiñeno maméoi. Mei jaiai ninomo íaioi duere finóllena mamécaiaioiza.

⁴ Juzíñamui abi imácimona dáarie fiénidifuemo baíidiaioi. Afémaci íaifuena Juzíñamui doñede. Doñeno duere zefuille iraimo íaioina orede. Jítifomo íaioina fiénocai. Dinomo íco izire jicánolliraimo baí óllena cuinácaiaioi.

⁵ Daje izói Noé illágima llezica fiénide comini íaifuena Juzíñamui doñede. Mei íadi jamánomo áillue jáinoido afe fiénidinona Juzíñamui nana fiéñeno fuitade. Afe fiénide náiraímona dama Noéna naa siete diga íe comíniri Juzíñamui jílloitate. Afe Noé jáicína ñúefuedo íaioina lletade íadi jamáiena faitíaioi.

⁶ Bífue mei, daje izói Juzíñamui Sodoma jofue, Gomorra jofue imaci diga niné táinocaitate. Ua nana íaioi jofue bóua mei, daa imuícaí fiébilla. Ua daií izire niné táinocaitate, íe méifodo fieni ítino, bífuena cíoillano, Juzíñamui fiénidino izire duere finófirede daiíllena.

⁷ Afeno bóocuamona Lot dainámie comeci ñuénado íena jílloitate. Lot afe íairede comini fieni illáfue íe cíonamona íe comeci jamánomo zúucaide.

⁸ Bie comécina ñúemie Lot, nágarui fiénide comini cígiri íe íllari, íaioi fieni finócafuiaina cíode; íaioi fieni úrillafuiaina cacade. Aféfuíai íe ñuera comécina zuure finode.

⁹ Daií cai Ocuíraíma nana íena ñue jacíruitino íaioi comeci fieni facátafuiamona íaioi jílloillena ñue onode. Daje izói afémie nana fiénidino íco íraicaiño íere jicánolliraimo duere finóllena oni eneno jóniana ñue onode.

¹⁰ Nana íaire comeci jítainafue jeire óiacadinona Juzíñamui íere duere fínoite. Cai Ocuíraíma ríinona jámairuitinona

daje izói duere zéfuitaitiaioi. Afémaci llétana cacácaañedino. Illáimana jacíruiñedino. Daje izói monamo ite jóriai izoide ríinoredinona báíñuana jacíruiñediaioi.

11 Juziñamui abi imaci afe fiénidino baimo ríinorediaioi. Daí íaioi illa íadi, afémaci afe jóriai izoide ríinoredinona fienni daíñediaioi. Ua caí Ocuíraima uiecori afémacina báíñuafuedo “Duere zéfuitiomoi,” daíñediaioi.

12 Afe fiénidino ríllenai izói abina onóñediaioi. Afe ríllenai da ebena illáfue mo itíaioi. Níue fue díne comeciñediaioi. Fia llaitada fállena jocócaiaioi. Bie izói itímiaí ónoñegafuedo fienni úritiaioi. Mei íadi afémaci jiba rille izói tíitíiaioi.

13 Jiáie comini duere íaioi zefuítado duere finóbitiaioi. Ianori caimátaillufuedo jiáie iere íóbitadinodícaí, daíñírediaioi. Afémaci meáidaitadimaci. Comeci fienni finode raa izói omoi cígiri itíaioi. Daje llezica omoi finoca ráfuiáido nabáiriacadiaioi ómoina íaire finóllena. Táinona jífue te caimátailla raado jífanotiaioi.

14 Afémaci nana ciona ringomo fia érocáiñeno llaitada jiruifue finócadiaioi. Afémaci fiénidífue fínuana iere gáidiaioi. Afena fáicanocaiacañediaioi. Comécina náinidinona bífue ta íaífue mo uitíaioi. Naga raana izire máíñuana iere fibídiaioi. Afe izoide comini íaire faidócano.

15 Afémaci Moo Juziñamui ñuera íómona oni fiénidíodo jáidiaioi. Jaiaí uai llóraima Balaam ífuedo jáidiaioi. Afe Balaam Beor jíto. Afe Balaam fiénidífuiái ie fínuado aillo úcubena líinoiacade.

16 Mei jíáfodo áfemona uáinide burra Balaam fiénidífuiái díne íena lletade. Afe burra come izói úrillano, Balaana uáiritaidímie úrilla izói rairuúllano íena úritañede.

17 Nana bie táinofuena llófueridino jainoi íñeno jainoi orano zafénailla izóidiaioi. Jairíodo oni níne ñaitaca mona úillie izóidiaioi. Jamánomo jítirede jítinomo zíñona íllena ríire faidócaiaioi.

18 Mei aillo abi íinua uáillaído naa táino uailaí diga, níuemacina jífuecana uitíaioi. Íaioi íaífuiáido, comini abi jítainafuiái diga jíáimacina bífuetiaioi. Ua íaífue díbénemo itínomona uáfue na jíllodinona meine íaífue mo nane bífuiáidiaioi.

19 Uíodo raíre llotíaioi: “Uáfue ráiruiñega comini izói íitíomoi,” daíñírediaioi. Mei íadi afe dáina llezica, dáni afémaci íaífue díbénemo izire jaináitaganona itíaioi. Iemona afémaci fiénidífue fínuana fáicanocainidiaioi. Illa dígamie íena anáfenode raa íena náamatade. Iemo áfemo izire jaináitagamiéna jaide.

²⁰ Mei cai jállotate Ocuíraima Jesucrístona onódimaci, éniemo ite íaifuiamona oni jállodiaioi. Bimácimona dáarie íaioi jállua mei nauí íaioi anáfenogafuemo abido íaioi baiíadi, nano íaioi illa baimo, jamánomo figoñeite.

²¹ Juzíñamui ñuera iona íaioi onóñenia afefue afémacimona figóñede. Mei íadi ja Juzíñamui iona onona mei, íaioimo iga ñuera lletárafuiaina féitaadi, afefue jamánomo fiénide.

²² Jaiái daina ua uai como afémacimo zúilla. Aféuai daide: “Jico ie cicúecana abido guízajide. Daje izói mero abina ñue jococa nane dama ie íaibimo nane jabíjabiizaide,” daide.

3

Cai Ocuíraima billifue

¹ Cue izíruiga ámatiai, omoi cácarei. Bie méifoidibe ómoimo cueticue. Ménacaiño ómoimo cue orécabedo ómoína abi jífueñeno bífuemo comécitaacaducue. Ñue llófueinafuedo ómoína comécitaducue.

² Afe jira jaiái ñuera uai lloraini caimo llogáfuemo omoi uibíoiri. Daje izói Cristo orécamací ómoimo lloga jállotate Ocuíraima lletara uaimo féitañeno áfemo omoi comécíiri.

³ Nano fueñe bífuemo omoi uibíoiri; ico íirairuillaído Juzíñamui lloga ñúefuiaina zanófiredino bíitiaoiza. Afémaci dani íaioi comeci fiéni óiacanafuiaido itíaiói.

⁴ Afémaci ómoimo zanoda jicánoitiaoí: “¿Ñinomo ite ómoimo lloga meine bite Cristo? ¿Némei afe? Cai jáiaigima tilla méifomo naga raa daje izói ite. Ua énie comuállaruimona naga rafue daje izói jáioicaide.”

⁵ Daií llóitiaoí, mei jaiái ninomo monana Juzíñamui ie uaido fínuafuemo comécíacañediaoiza. Afe izói Juzíñamui uaido ocuállamona, zocade raa zocai ízoi, bínie jáinoimona comuide. Iemo jainoi cígido bínie Juzíñamui ie uaido riire itábicaitate. Aféfuena náfueñeno bie zanófiredino onóacañediaoí.

⁶ Afe mei daje izói énie anábaitade áillue noci aféruillaído bie éniemo ite cáadinuaina niné táinocaitabite.

⁷ Mei íadi birui ite mona énie diga daje Juzíñamui daina uaido táinocaitalle irai íena oni jóoneoiga. Afe irai fiénidinuiai niné táinocailliruiamo ico íiraicaiño iere jicánolliruiamo afe bíniena naa mona diga cuarítaite.

⁸ Izíruiga ámatiai, bie emódomo ífuena omoi féitañeno iri. Cai Ocuíraimamona daa mona mil fimona izóideza. Daje izói afémiemona mil fimona daa mona izóideza.

⁹ Cai Ocuíraima ie daináfuiái fuitálliruiamo dúcia bai jáíruiamo dúñoñeite. Dámierie afémiena jáíruiamo dúñoite daíírediaoí. Mei íadi afémie cairi járitaiñede. Afémie buna oni fáiacañede, mei jáífodo caimo ite fiénidífuiai ñúefuena

méidollena afémie iere jitaide. Afémie aféruina bai jiáiruimo dúiñoñeite. Féitañeno ie mamécaruimo zúite.

¹⁰ Cai Ocuíraima billirui meríriraíma naio billa izói, nai due ócuriñeitiaímo déizaibiteza. Afe billíruimo mona naa íemo ite ráaniaíri jacire niné táinoficaite; áfena iere ficire cácaite. Nana afe mona fínua ráaniaí naa úcuairi iraimo niné táinocaite. Afe llezica bínie naa íemo ite itínuiáiri cúarite.

¹¹ Ja nana daíí táinocaillifuenta omoi fidínamona, nana íaífuemona abí omoi rairuúllifue iere jitáirede; benómona afémiena caímare íóbitaredicai. Ua Juzíñamui íeiena omoi illifue iere jitáirede.

¹² Mai Juzíñamui ie nahí illáimana cíocaizaibillíruimo omoi úiñori. Uíñua llezica, omoi onóigafuedo aféruina raire mai omoi járidori. Aféruillaído mona ero iraido niné táinocaite. Nana énie fínua ráaniaí iraimo niné íbina jáitiaíoi.

¹³ Mei íadi Juzíñamui uícodo caímo lloga comue monamo comue éniemo ocuúridicai. Afe comue éniemo mona díga, nana raa ñue jaícina jóite. Naga raa níífuenite.

¹⁴ Izíruiga ámatiaí, mei benómona nai bífuemo omoi úiñoína llezica, nana ómoímo ite ríinodo omoi illafue jaícina jóoneri. Daíí omoi comeci caímare uái illafue dibénemo íllamona Juzíñamui ómoímo eróicaizaibilleza. Afe izói omoi comeci íaicaiñeno nífuenino Juzíñamui ómoímo cíoizaibilleza.

¹⁵ Nane jiáífuemo omoi comécioiri. Afefue daíde: Cai Ocuíraima comínimo járitaiñenafue, ua cai jíllloillifue. Daa bíuai cai izíruiga ama Pablo ómoímo cuete. Juzíñamui íemo lloga comeci jaícina fibíllafuedo cúefirede.

¹⁶ Nana afémie orécabaiímo daa bífuiái lloite. Mei íadi dáarie ie uaíllai ñue onóíllena iere féirede. Abina onóñedino afe féirediúaina jiáífodo mamédiaíoi. Afe izói jabo ínotino aféuaina jiáífodo dobáíñotiaíoi. Daje izói jiáie Juzíñamui Cuegáuai lloga uáíllaina oni jiáífodo áífedotiaíoi. Afemona afémaci dani abí niné táinocaitaitiaíoi.

¹⁷ Izíruiga ámatiaí, nana bifuiaina ja uícodo onódiomoíza, mai fiénidinomona abí omoi rairuiri, afémaci jífuerillafuedo meine abído íaífuemo omoi báíiza; omoi jeire oga ñúefuena niné féiza.

¹⁸ Mei jiáífodo, cai jíllotate Ocuíraima Jesucrístona, mai jamánomo ñue abina omoi onoiri. Caina ie duéruillafuemo, omoi comeci ífue aillo oni móonaitaícairi. Iere ebire ñúefue dama Jesucrístomo mai birui omoi nitari. Daje izói zíiñoña ebíredífue afémieímo mai omoi nitáfíreiri. Mai. Jae ñie.

NANOIDE SAN JUAN CUEGABE

Primera Carta del Apóstol San Juan

Cáatate úrilla uai

¹ Nana raa nano tañeina llezica itímjedo ómoimo cueticai. Afémie Jesucristo. Afémiemona cai cacánana lloticai. Dani cai uído cai ciónana lloticai. Afémiemo eróidicai. Afémiena dani cai ónoido jetádicai. Afémie Juzíñamui uailai lluaíbitimie. Afémie uai caina cáatate.

² Afe cáatatena itímie cai onóillena caimo cíocaide. Afémiena cíoillanona íemo uai faiticai. Afémie fecalle ziiñona cáananona ómoimo jino lloticai. Nanómona afémie Moo Juzíñamui diga ite, ie mei caimo cíocaide.

³ Jira cai cacánafue cai ciónafue diga uáfueña jino lloticai, daaco comínina omoi cai diga íllena. Ua afe izói uáfueña Moo Juzíñamui dájena jaináidicai. Daje izói ie Jitó Jesucristomo jaináidicai.

⁴ Jira aféfuaiña ómoimo cueticai aféuaido jamánomo caimare ñue omoi íllena.

Juzíñamui nairai comeci egáioidimie

⁵ Bie úrillauai Jesucristo caimo llogáuai. Afena jino ómoimo lloticai: Juzíñamui comécina egáioidimie. Afémiemo jaca jítinona iñede.

⁶ Dájena afémiemo jaináidicai cai daiíadi, íadi afe llezica jítifodo cai macáadi, taino lloticai. Daje izói táinona finódicai.

⁷ Mei íadi Juzíñamui úzefomo illa izói, daje izói úzefomo cai macáadi, ua dájena conímamo jaináidicai. Iemo ie Jitó Jesucristo ie cruzmo tíillamona, ie die tótajamona nana cai fiénidifuiái dote.

⁸ Cai fiénidifue iñede cai dáiiadi, cai abi jífueticai. Táinofuefiredimacidicai.

⁹ Mei íadi Juzíñamui ñue jaícina finóllifueño afemo íinoredicai cai fiénidifuiái jino cai llóiadi, uáfueña afe fiénidifuiaina afémie dóite. Nana íemo fieni cai finócafue íbana caimo óñeite.

¹⁰ Cai fiénidifuiái finóñedicai cai daiíadi, Juzíñamui táinofueredena cíotataiticai. Ie úrilla uaina uáfueña jeire oñédicai.

2

Cristo cáiconi ñue úriraima

1 Cue jitótiai, bífuiyai ómoimo cueticue, íairedifuiaimo omoi báiiñellena. Mei íadi dámie íairedifuiyai finóadi, Moo uíécomo cáiconi ñue úritimie ite. Afémie Jesucristo. Ñue jaícina itímie.

2 Jesucristo cai fiénidifuiyai ícoinia fagámie. Dama cai ícoiniañedeza, mei íadi nana énie comini fiénidifuiyai ícoinia.

3 Juzíñamui ocuífuiyai iere cai cacáreadi íena onódicaiza fidíticai.

4 Mei íadi dámie “Íena onódicue” daiíadi ie ocuífuiyai iere cácareñeniadi, afémie taino lloraima, ua táinofuefiredimie.

5 Mei ie ibana Juzíñamui ocuífuaena finódimie, jae Juzíñamuina nabéfuena izírute. Daií áfedo íemo cai jainánana fidídicai.

6 “Juzíñamuimo jaináidicue” dámie daiíadi Cristo maca izói ie macállino jitáirede.

Comue ocuífuafe

7 Cue izíruiagamaci, comue ocuífuafe ómoimo cueñédicue. Afe fue nanómona ómoimo itífue. Afe jaiyai rafue daje omoi cacana úrillafue.

8 Mei íadi ómoimo cue cuezafue comue ocuífuafe izói ómoimo íficaizai bite. Bie ocuífuafe Crísto mo nahí ua ráfuaena ite. Afe izói bje ocuífuafe ómoimo nahí ua ráfuaena íte. Afe fue ua nahí fue, jítino oni jáioicaideza. Jae ua comécina egáiñollena ñue egáioinaza.

9 Dámie “úzfemo iticue” daiíadi, íadi jiáimana nai éoia, afemie nai jítifomo ite.

10 Ie ámana izíruitimie úzfemo ite. Afémiemo minícana fiénidifuiaimo baítaitena ñede.

11 Mei íadi ie ámana éoicaidimie nai jítifomo ite; ua jítifodo macade. Niné jáideza onóñede, jítino uina cíoitañena jira.

12 Jitótiai, ¡omoi cacai! Juzíñamui Jesucristo titáinanomo omoi fiénidifuiyai ibana ote. Ie jira bifue ómoimo cueticue.

13 Móotiai, ómoimo cueticue, nano tainéinanomo itímiena jae omoi onona jira. Jitócomini, ómoimo cueticue, Taifena omoi anáfenua jira.

Jitótiai, ómoimo cueticue, ja Moona omoi onóicailla jira.

14 Móotiai, ómoimo cueticue, nano tainéinanomo itímie omoi onóicailla jira. Jitócomini, daje izói ómoimo cueticue omoi ríredimacina jira; omoi comécimo Juzíñamui úrilla uai jeire omoi ua jira; Taifena omoi anáfenua jira.

15 Biniemo ite Juzíñamuina bacáuairédino finócafuiaina izíruiñeno omoi iri. Daje izói íaioimo itífuiaina cacáreiñeno omoi iri. Dámie afémaci finócafuiaina izíruiadi, afe llezica Moo Juzíñamuina izíruiñeite.

16 Nana íaioimona lloga ráfuiyai minícana Juzíñamuimona biñede. Fia dani íaioi cígimona comuide. Comécina

íáiredemona fienu óiacanafue bite. Cai ui íóbicailla jítaillamona jíáie fienu óiacanafue bite. Caimo ite ráaniaimona fienu abi íinuafue bite. Nana afe billáfuiái bíniemo ite Juzíñamuina bacáuairedino llóolloga.

17 Afena bacáuairedino fúioicaide, naa íaioimo ite fienu óiacanafuiái diga. Mei íadi Juzíñamui jítaínafue finódime jaca ninomo zíñona ite.

Uafue táinofue diga dájemo jaináñede

18 Jitótiai, jae írairuimo dúcidez. Cristo uáitaoidime bíllana cacádiomoi. Ja birui aillo Cristo uáitaoidino cíocaide. Ie jira birui írairuina onódicai.

19 Afémaci cáimona jino jáidiaioi. Mei íadi uáfuenta cáieñediaioi. Uáfuenta cáena íaioi íadi, cairi fiébite. Ua afémaci cáimona jino jáidiaioi nana cáieñeitiaoiza uáfodo daí áfedo onóillena.

20 Mei íadi Cristo Ñuera Joreño igáomoi; íemona afémiedo onótagaomoi.

21 Omoimo cueticue mei, uáfuenta omoi onona jira. Uáfuenta omoi onóñenamona cueñedicue. Uáfuemona jíáie daa táinofuenta comúinide. Jae onódiomoiza.

22 ¿Bu táinofueredime? Jesuna Crístoñede daidime, afémie dama táinofueredimena. Níime Crístonu uáitaoidime. Afémie Moo Juzíñamuina jáanote. Afe izói ie Jitona jáanote.

23 Jitona jáanotime aféniemo daje izói Moona íñede. Mei íadi Crístonu jíeruitime daje izói Moona onode.

24 Ie jira, nanómoma omoi cacana úrillafue omoi comécimo ñue omoi jóoneoiri. Jira nanómoma omoi cacánafue ñue omoi comécia Juzíñamui Jitomo dájena ítiomoi. Afe llezica cai Moori dájena ítiomoi.

25 Jesús uáfuenta uícodo llote, zíñona cáananona caimo fecállena.

26 Omoi jífueiacadinodo bifue ómoimo cueticue.

27 Mei íadi Jesucristo ómoimo fecaca Ñuera Joreño ómoimo ite. Ie jira daí buna ómoimo llófuenidiaioi.

Daje Ñuera Joreño nana ráfuiaina ómoina llófullofuede. Afémie llogafue uafue; táinofueñede. Jira daí Crístonu dájena omoi iri, Ñuera Joreño ómoimo llua izói.

28 Jitótiai, mai birui Crístonu dájena jaináicairi, afémie cíocaillirimo ie dánana ñue cai ínollena. Daí ie bíllemo ie uécona méairuíñeiticai.

29 Ja onódiomoiza Jesucristo ñue jáicina finódime. Afemona daje izói nana jáicina finódino Juzíñamui jítotiaiza ónoitiomoi.

3

Juzíñamui jítótiai

1 Mai ¡comécimo faca! Nñ jamánomo Juzíñamui caína izíruilla. Iemona ie jítótiaína maméidicai. Jae áfedicai. Ie jira éniemo ite Juzíñamuina éoidino cai izói comécíñediaioi, mei Juzíñamuina íaioi onóñena jira.

2 Izíruiga ámatiai, jae Juzíñamui jítódicai. Iirairuimo cai íficaillifuenta nai caimo ácatañega. Mei íadi onódicaiza, Jesucristo cíocaia afémie izói íiticai, ie illa izói námiena cai ciona jira.

3 Nana aféniemo daí comécidimaci daní dáamací nana íaífuiaimona ñue dóficaitadiaioi, mei Jesucristo íaífuenidimie illa izói íiticai.

4 Mei íadi nana fiénidifue finódimaci Juzíñamui ocuífafue uáitajano jámairuite. Mei jira fiénidifue ocuina ráfuenta uáitaoina.

5 Jae Jesucristo bie éniemo cai fiénidifue oni duáíbillana onódiomoi. Daje izói aféniemo ñifue íñénana onódiomoi.

6 Mei jira nana aféniemo dájena jaináioicaidimaci fiení macánidiaioi; mei íadi nana fiení macáfiredimaci afémiena jaca cíóñediaioi; íena onóñediaioi.

7 Cue jítótiai cacai. Buna ómoína jífueñellena nane dáíticue; ñúefue finófirenimie ñúemie, Jesucristo ñúemiena illa izói.

8 Mei íadi fiení macáfiredimie Taífemo jaináidimie, mei nanómona Taífe fiénidifuaíredimiena ite. Uafue Juzíñamui Jitó Taífe finócafuaí táinocaitaíbite.

9 Juzíñamui jítótiaimona jaca buna figóíñeno macáoicaiñede, Juzíñamui íemo iga cáanano íemo illa jira. Afémie fiénidifuenta finófnide, Juzíñamui jitoza.

10 Afedo bu mei Juzíñamui úruiaínaza, bu mei Taífe úruiaínaza onódiomoiza. Uafue níimierie ñúefuena finóñenia, ie ama íziruiñenia, afémie Juzíñamui dibénemo ítimieñede.

Conímana cai izíruillafue jítáirede

11 Mei jñ nanómona omoi cacana úrilla uai, be ñie uai: conímana cai izíruillafue jítáirede.

12 Caín izói omoi íñeno iri. Afémie Taífe dibene ímie, íemona ie ama titade. ¿Ñibái mei íena titade? Caín úradoillano ie ama titade, Caín finócafuaí figóñena jira; mei íadi ie ama finócafuaí ñuera.

13 Cue ámatiai, Juzíñamuina bacáuairédino ómoína éoinamona fáigacaiñeno iri.

14 Jae tíizaille íomona zíñona cáailliomoi dóbaicaidicai. Afena onódicai, Jesuna ínotinona cai izíruilla jira. Mei íadi izíruiñedimie tíizailiido jaide.

15 Nágamie ie abi cómena éoidimie cómena titádimie izói ite. Iemo come titádimie comécimo zúñona cáanano iñénana onódiomoi.

16 Jesucristo ie cáanano cáiconi iga; áfedo nana izíruillafuiaina onódicai. Afe izói cai cáananona lloñeno Jesuna ñnotinori dai abina zóoferedicai.

17 Dámie ie illínomo jitáirede raa ítemo, ie aino come jitaica raa iñénana cióillano, mei íadi íemona jeruide, ¿ñie izói Juzíñamui izíruillafue ie comécimo íteza? ¡ñede!

18 Cue jitótiai, ¡fia fuena daina uaido mai cai izíruiñeno iri! ¡Mei íadi ñue finóllifuiaido uafue izíruillafuedo mai conímana cai izírui!

Juzíñamui uiécomo ñue íena ñnofiredinofue

19 Jira dai uáfue mo jaináidimacídicaí onódicaiza; nane aféfuemona Juzíñamui uiécomo ñue íena ñnofiredinodicaí.

20 Cai comeci cai ícoinia lloíadi, Juzíñamui cai comeci baimo aillo ñuemiesa onódicaí. Afémie nágaíuiai onode. Iemona afe ícoinia caimo íbana óite.

21 Mei jira, izírui ga ámatiai, cai comeci cai ícoinia lloñeniadi Juzíñamui uiécomo ñue íena ñnofiredinodicaí.

22 Nana íemo cai jicaca raana fécaite, ie ocuífafuiaina jeire cai úamona; ua íena cai íóbitamona áfeniaina caimo fécaite.

23 Afémie ocuífafue daide: “Te Jitó Jesucristomo cai ñnori. Afe emódomo cai conímana cai izírui afémie cai ocuilla izói,” dai ñocaide.

24 Ie ocuífafuiaina iere cacáreidimaci afémieoiri itíai. Daje izói afémie nágarui íaiori ite. Afémie jaca caimo íllana onódicaí. Ua áfena afémie caimo iga Ñuera Joreño onódicaí.

4

Ñuera Joreño Crístona uáitafirede joriaína anáfenoacade

1 Bie énie táinofuiái llotínona oruízaideza. Afémaci “Juzíñamuido úriticai,” daidíai. Izírui ga ámatiai, jomoi cácarei! Naga “Juzíñamui dibéfodo úriticai” daidímiena ñnoñeno iri. Mei íadi íaiolina facátari, ñie joreño íaiomo íllana onóillena, Juzíñamui ie, ñbai íeñede.

2 Juzíñamui Joreño itímie omoi onóillifue lloíticue. Nágamie Jesucristo ua cómena biniemo bite jino onótatímie, afe cómemo Juzíñamui Joreño ite.

3 Mei íadi dai jino onótañedímie Juzíñamui Joreñoñedímie. Afémiemo Crístona uáitafirede joriaí ite. Afe izóidena fiénide joriaí bíllena ja cacádiomoi. Mei afe jae bie éniemo ite.

4 Jitótiai, omoi Juzíñamui iédiomoi. Omoiri itímie baimo ríinorenamona, afe táinofiredinona jae anáfenodiomoi, mei

íai oi daináfui ai omoi ñnoñena jira. Biniemo ite táinofiredinori itímie jabóidimie.

⁵ Afémaci Juzíñamuina bacáuaredinomo jaináidino, ie jira Juzíñamuina bacáuaido úritiaioi. Iemona biniemo ite Juzíñamuina ñnoñedino afémacimo cacáreidiaioi.

⁶ Mei íadi cai Juzíñamui iédicai. Juzíñamuina onódimie caimo cacáreide. Mei íadi Juzíñamui íeñedimie caimo cacáreíñede. Afedo uafue uaina llófueinafuena onódicai; daje izói jífuetena llófueinafuena onódicai.

Juzíñamui izírui timie

⁷ Izíruiga ámatiai, conímana cai izíruilla jitáirede; izíruillafue Juzíñamui mona bíteza. Nana izíruillafui airedino Juzíñamui jitótiai. Afe llezica Juzíñamuina onódiaioi.

⁸ Juzíñamui jamánomo izíruillafui aina oruídímie, ie jira izíruillafuenidímie Juzíñamuina onóñede.

⁹ Juzíñamui daade ie Jitó ana éniemo orede afémiedo cáananona caimo íllena. Afedo ie caina izíruillafue caimo ácatate.

¹⁰ Afe óriado uáfuena izíruillafuena cai fidítate. Juzíñamuina cai duéruia nahí izíruillafueñede. Mei íadi afémie caina dúecaillano cáconi ie Jitó ória, afe nahí izíruillafue. Ua Juzíñamui cai fiénidífuia i coínia cai jáinona duere finóllimiena ie Jitó orede.

¹¹ Izíruiga ámatiai, Juzíñamui daí caina izíruillamona, afe izói conímana cai izíruillafue jitáirede.

¹² Juzíñamuina jaca buna cióñena; mei íadi conímana cai izíruia Juzíñamui cai comécimo ite. Afe illa dáaruído Juzíñamui izíruillafue caimo ñue riire comuíoicaide.

¹³ Juzíñamui dibénemo cai íllana, cai comécimo Juzíñamui íllana ónorede. Afena ie Ñuera Joreño caimo fecáinado onódicai.

¹⁴ Moo Juzíñamui ie Jitó orede afémiedo comini jilloillena. Iena dani ciódicai. Afena jino uáfodo lloticai.

¹⁵ Nágamierie Jesús Juzíñamui Jitona onótatímie, jaca Juzíñamui diga ite. Daje izói Juzíñamui afémie comécimo ite.

¹⁶ Daí Juzíñamui caina izíruillana fidítagacai. Aféfuena ñnoticai. Juzíñamui jamánomo izíruillafui aina oruídímie. Izíruillafuemo itímie Juzíñamuimo ite. Afe izói Juzíñamui afémie comécimo ite.

¹⁷ Daí jamánomo ñuera izíruillafue caimo comuíoicaide. Iemona íirairuimo facátalliruido ñue íena ñnofiredinona íiticaí. Mei Jesucristo bie éniemo ñue cáimami ena illa izói afe izói iticai.

¹⁸ Izíruinafuemo jacíruillafue iñede. Mei jira ñue jáicina izíruillafue jácifuena jino orede. Mei jácifuemo duere finótajano ite. Ie jira jacínaitímie ñue jáicina izíruioicaíñede.

¹⁹ Cai Juzíñamuina izírúiticaí, nano fueñe caina ie izírúilla jira.

²⁰ Dámie daiíadi “Juzíñamuina izírúitícue” mei íadi afe llezica ie daano cómena éoia, afémie táinofueredimie. Uafue dámie ie ciona daano cómena izírúíñede, afe llezica cióñena Juzíñamuina izírúinide.

²¹ Juzíñamui caimo iga daa ocuícáfue. Afe bie ocuícáfue daide: “Juzíñamuina izírúitímie daje izói ie aino cómena izírúiri,” daide.

5

Cai dinena bíniemo ite fiénidifuiaina anáfenoiticaí

¹ Nágamie Jesús Crístona íinotímie Juzíñamui jító. Dámie come moona izírúitímie afe izói afe moo jítótiaina izírúite.

² Moo Juzíñamuina cai izírúia, afe llezica ie ocuícáfuea cai finóadi, Juzíñamui jítótiaina cai izírúillana ja ónoiticaí.

³ ¿Mínica Juzíñamuina izírúillafuea? Mei ie ocuícáfuiaina jeire cai ua. Ie ocuícáfuiái llégienide;

⁴ mei naga Juzíñamui jító éniemo ite fiénidifuiaina anáfenorede. Ua cai ínuafuedo éniemo ite fiénidifuiaina anáfenodicaí.

⁵ Dama Jesús Juzíñamui Jitona íinotímie éniemo ite fiénidifuiaina anáfenorede.

Juzíñamui Jitomo uai nabáillafue

⁶ Jesucristo jainoi die diga ciócaizabitímie. Ie báutizaillaruímo Juzíñamui Jitona comíni fidítagaiaíoi. Afe izói ie tíizaillaruímo, dama ie abí zóofiano, ie die tóillamona áfedo comíni onótagaiaíoi. Fia jáinoíñedeza, íadi jainoi die diga bite. Jesús Juzíñamui Jitónafuemo Ñuera Joreño uai nabáiraima. Ñuera Joreño llogafue uafue.

⁷ Afe Jesús Juzíñamui Jitónafuemo damieámani uai nabáiraima monamo ite: Moo Juzíñamui, Juzíñamuimona Uaillai Lluáibitímie, Ñuera Joreño diga. Bie daámani come daináuai dáamiemo jainaide.

⁸ Eniemo daje izói daámani uai nabáiraima ite: Ñuera Joreño, íemo Jesús báutizaja jainoi, íemo ie tíllaruimo totaca die diga. Bie daámanide dane dáamiede.

⁹ Comíni uai nabáillafue llínofiredicaí, mei íadi Juzíñamui uai nabáillafue jamánomoide, ie jira ie Jitori uai nabáillafuea cai ínolle iere jítáirede.

¹⁰ Juzíñamui Jitona íinotímie bie uai nabáillafue dama ie comécido úicade. Juzíñamuimo íinoñedímie Juzíñamui táinofueredena cótate, Juzíñamui ie Jitori uai nabáillafue dainana ie ínoñena jira.

¹¹ Afe daináfuedo Juzíñamui daide: zííñona cáanano afémie caimo iga. Afe cáanano ie Jitodo bite.

12 Juzíñamui Jitona comécido llínotimiemo afe zíñona cáanano ite. Mei íadi Juzíñamui Jitó comécido llínoñedimiemo afe cáanano iñede.

Juan úraicaiño llúáfuiái fuizáillafue diga úrite

13 Ja Juzíñamui Jitona ínotiomoi. Jira bifue ómoimo cueticue zíñona cáanano ómoimo íllana omoi onóillena.

14 Juzíñamui uáfueña caimo cacáfírenana ínofíredicái. Daa minícana cai jíacíadi ie comeci jítaina izói, afémie cai daina cacana onódicái.

15 Mei jira afémiemo cai úrillana Juzíñamui cacáfírenana onódicái. Afena onónamona cai jíacícana afémie caimo fécana daje izói onódicái.

16 Cómena títañeite fiénidífue ite. Dámie ie aino come afe fiénidífue finuana cióadi, Juzíñamuimo afémieri jícarí. Iemona Juzíñamui cáananona íemo fécaite. Títade fiénidífue ite. Afemo Juzíñamuimo omoi jícarí daiñedicue.

17 Nana fiénidífuiái íaífue; come comécina títañeite. Mei íadi jíaíe íaífue ite; afefue cómena títañeite.

18 Juzíñamuina Móoredimie íaífuedo macáñedeza onódicái; mei Juzíñamui Jitó íena úiñoteza. Ie jira Taiíe íena ocuínide.

19 Juzíñamui íedicaiíza onódicái. Afe izói nana bínie comini Taiíe ocuícáfue anamo itíaiíza onódicái.

20 Juzíñamui Jitó jiaíai bíllana onódicái. Afémiedo ua nahí Juzíñamuina onótagacái. Afe Uámiemo jaináicana iticái. Afefue daiíacade Juzíñamui Jitó Jesucristo dibénemo iticái. Afémie nahí Juzíñamui. Afémiemo jaináicana cai íadi zíñona caina cáataite.

21 Jitótiai, mai jánaraimo caimátaiñeno omoi iri; daje izói nana jíaíe jífujete jóriaimona abi omoi rairuíri. Jae nñe.

MÉIFOIDIBE SAN JUAN CUEGABE

Segunda Carta de San Juan

Uafue íemo izíruillafue diga llóiticue

¹ Ja éicomedicue; ocuíramadicue. Jae Juzíñamui nizeca cue miringo izóidingodio. Bie rabe ómoimo cueticue naa o úruiairi. (Bimaci iglesia daina Juzíñamuimo gairífiredino.) Naa o diga afémacina uáfueña izíruiticue, mei dama cúeñedeza. Nana uáfueña onódino daje izói afémacina naa ori izíruitiaioi.

² Ñue uafue ícoinia ómoína izíruiticue. Afe uafue cai comécimo ite; ie mei afefue jaca ninomo cairi iite.

³ Moo Juzíñamui ie Jitó cai Ocuírama Jesucristo diga, ómoína cáimacaitaite. Afémie dúecaillano jamánomo izíruillafueña ómoimo llóite, naa comeci caimare uái illafue diga. Izíruillafueña uáfueña nana aféfuiaína cai onótate.

⁴ O jitótaiamona dáarie uafue daina izói mácana fidídicue. Afefue cuena ióbitade, mei Moo Juzíñamui daí cai ocuídeza.

⁵ Miringo izóidingo cacai. Ja birui omo izire jicádícue conímana cai izíruillena. Bie omo cuegafue comue ocuícafueñede. Mei íadi afefue nanómona caimo ite.

⁶ Bie izíruillafue daíacade Juzíñamui ocuilla izói cai finóllena. Ja nanómona omoi cacana izói afe ocuícafue daide: "Izíruillafuedo omoi macari."

Jífueriraini ifue

⁷ Mei jii, aillo jífueridino bie éniedo macádiaioi. Afémaci Jesucristo ua come izói bíllana uáitatiaioi. Daítadimie jífueriraima. Afémie Crístona uáitaoide.

⁸ Afémiemona abí omoi rairuíoiri o táijinamona oga comeci ñúefue táinocaiñeillena. Iemo jíái afémiemona abí omoi rairuiri nana o táijina iba ñue Crístomona jaícina óllena.

⁹ Níimie Cristo llogáfuemo comécíñeno nibéfodo jáidimie, afémie comécimo Juzíñamui iñede. Mei íadi Cristo llogáuaimo comécíidimie comécimo Moo Juzíñamui ite, ie Jitó diga.

¹⁰ Dámie ómoína llófuiabiadi, íemo bie Cristo llogáfueña atíñeniadi, íena uáidoñeno, jofu eromo llíinoñeno omoi iri.

¹¹ Iena uáidotimie, afémie lloga íaifue dáafueña llíinoiteza.

Fuizájidíuui

¹² Ómoína aillo daíacadicue, mei íadi rabelo cúeiacañedicue. Omoi daní coníma uíécomo cue úrizaillena úiñoitícue. Afe daí cai cáimafue jaícina íficaite.

¹³ Omoi ebuño izoide benomo ite iglesia daina Juzíñamuimo jaináidino daje izói Juzíñamui nizécamaci. Afémaci omo uai orédiaioi. Jae nñe.

IIRAIIBE SAN JUAN CUEGABE

Tercera Carta de San Juan

Gáyodo ñuefuenta úritimaci

¹ Ja éicomedicue, ocuíraimadicue. Cue izíruiga nabaimo bibe cueticue. Bímie mámecei Gayo. Afémiena uáfuenta izíruiticue.

² Cue izíruiga ama, ori Juzíñamuimo jicáfiredicue áfedo nana o finócafuiái ñue móonaillena. O abi caimare náireillena jicádícue, o joreño ñue nífuenina izói.

³ O ñúefuedo macáfirenafue dáarie ámatiaimona cue fídiamona, afe cuena iere ióbitade; mei ua onódícueza o jaca ñúefuedo macáfiredio.

⁴ Ua ie baimo cue ióbillena iñede. Afe cue cacana cue jitótiai uáfueмо comécídiaioi; áferi jamánomo ióbidícue.

⁵ Izíruiga ama, o illánomo ite ámatiaína o canóllena figura. Ie mei oni jíainomona bite ámatiaína o canóllena jamánomo ñuera.

⁶ Juzíñamui mámeceido gairídímaci uícomo íaioina o izíruillafue jino llotíaioi. Izire daídícue: Mai íaioi cano; íaioi jáillíruimo jitaica raana íaioimo ine; áfedo caimare íaioi jáilleza. Ua Juzíñamuimo ióbillena izói íaioi cano.

⁷ Mei jira afémaci Jesucristo táijinafuedo jáizaidiaioi. Afe cánuana Juzíñamuina ónoñegamacimona llínoñediaioi.

⁸ Ie jira íaioi jitaica raana cai finóredícai, afémacina cai canóredícai. Afedo íaioi uáfuenta llúana canódícai.

Diótfes fíenino mácafue

⁹ Juzíñamui mámeceido gairífiredinomo cuegafue lluabe naui orédícue, mei íadi Diótfes cai ocuilla ríinona óiacañede, íaioi cígimo úicofiacadímie illa jira.

¹⁰ Ie jira cue jáiadi ie fieni mácafue jino uáfodo onótaitícue, nana ie fieni úrioinafue, ie táinofuerena caina uáitaoinafue díga. Ie mei afe baimo bitino ámatiaína afémie llínoñede. Afe llezica afe bitino llínoacadímacina rairuúllano, afémie gairídímacimona íaioina jino jiude.

¹¹ Izíruiga ámatiai, fieni onótarafuiaido jáiñeno iri. Ñúefue finori. Ñúefuenta finódímie Juzíñamui ímie, mei íadi íaífuiaí finódímie Juzíñamuina jaca onóñede.

Demetrio ñuera onótafue

¹² Nana comini Demétriori ñue úritiaioi, mei afémie ñue mácafue uáfori cióideza. Dani cai nane aféfuemo ñue uai nabáiraimacídícai. Iemona uáfuenta cai daíífirenana onódiomoi.

Uai Fuizájillauai

¹³ Ona aillo daiíacadicue, mei íadi rabelo cúeiañaedicue.

¹⁴ Ona raire cíoilena úiñoticue. Aféruido conima uíecomo eróicana úriticoco.

¹⁵ Começí caimare uái illáfuemo o iri. Benomo ite nabáiñiaí omo uai orédiaíoi. Izire daidicue nágamierie coco nabáiñiaímo conima uíecomo o uáidori. Jae nñe.

SAN JUDAS CUEGABE

La Carta del Apóstol San Judas Judas

Juzíñamui uáidoganomo cuete

¹ Jesucristo táijitagamie Júdadícue. Santiago ámadícue. Bibe Juzíñamui mamécanomo cuetícue. Ua cai Moo Juzíñamui uáidoganodiomoi, íei ena ñue finoda maiñócanomo omoi íllena. Jesucristomo omoi jaináinamona ñue eneno rairuícanodiomoi.

² Mei Juzíñamui jamánomo aillo caimo ie dúecaillafue, íemo jíaí ñue uái omoi illífue, íemo jíaí ñue izíruillafue, dígafue ómoimo llóiteza.

Táinofuiaina llófueñiredino
(2 Pe 2.1-7)

³ Izíruiga ámatiai, cai comeci jílloillifuedo izire ómoimo cúeiacadícue; mei afe jílloillena Juzíñamuimo cue ínua izói, afe izói iere ínotiomoiza. Mei íadi ómoína jíaífuedo rabedo llóredícue. Táinofuiái lluáíbitino omoi jeire ogáfueña féitaiacadiaíoiza; ie jira izire ómoína daidícue: Riire abí omoi mameri. Íaiói díga fuirilla izói omoi iri, omoi ínogafue íaiói féitañeilleza. Afefue nauí nana Juzíñamuimo jaináidinomo dácaíño iga.

⁴ Mei omoi cígimo ninena dámerie táinofue lluáíbitiaíoí. Afémacina Juzíñamui Cuegáuailai jaiái uícodo íaiói olle duere finóllífueña lote. Afémaci íáibaniai. Afe ííñiai daide: “Juzíñamui ñúefueña jeire óitícai;” mei íadi afe dáinado rairuíñeno fiénidífueña iere nícidotiaíoí. Afémaci daade cai Naama Juzíñamuina ruífruitiaíoí. Daje izói cai Ocuíraíma Jesucristo llogáuaina uáitatiaíoí.

⁵ Mei ja onódiomoi íadi, como cue daííacanafueño ómoína uíboítaacadícue. Juzíñamui Israel comínina Egipto éniemona oni orede. Oni uano daíí nana íaíoína ñue jílloate. Mei íadi, íaiói cígimona dáarie ínoñena jírari, Juzíñamui afe ínoñedinona jíaíruido niné táinocaitate.

⁶ Afe izói Juzíñamui abí imácimona dáarie Juzíñamui anamo ñue íaiói illáfueña fáicanocaiacadiaíoí. Afe mei dani íaiói illánona fáicanocaillano oni jíaínomo jáidiaíoí. Ie jira Juzíñamui íaíoína íco izire íraicaiño iere jicánollíruimo íaíoína maitá jae íbaica. Afémaci jae jítinomo iere zábiñede llóejina maigáiaíoí.

⁷ Daje izói Juzíñamui Sodoma jofue íemo Gomorra jofue díga bóotate, naa afe áinori ite jófueniaíri. Mei afécuai comini Juzíñamui abí imácimona fiénina jira dáarie

llavécamací izóidiaioi. Afe bimací jamánomo dani jofo conímari ébecotaifirediaioi. Naga Juzíñamui comínimo mameca ñue illáfueña jiruïreïllena uáitafirediaioi. Daí íaioi íllamona ziiño iraimo duere finócaiaioi. Afe bifue, afémací izóí caí íñeïllena, caimo cíotaga.

8 Afe emódomo bie taino lluaíbitino íaioi táinomo comécillafuiaido dani íaioi abina bácadiaioi. Daje llezica caí Ocuíraima ríinona uáitatiaioi. Caífo monamo ite jóriai izoide ríinoredinona íaire dáifirediaioi.

9 Mei íadi Juzíñamui abi imácimona illaíma Miguel, Taife díga fuirízaila llezica ñuefodo úrite. Tíide Moisés abina júfídotiaillinoi. “¿Buna náamareite?” daidiaillinoi. Aféruimo Miguel íairede uaido íena faidóñede, mei íadi fia íena daide: “Ocuíraima Juzíñamui ona izire llétaiteza,” daide.

10 Mei bie táinodo llotínuiái íaioi ónoñega ráfuedo fieni úritiaioi. Mei íadi comécina onóñede rílleníai izóí itíaioi. Fia íaioi abi jítaina ráfueño comécioidiaioi. Daí comécillano áfeodo jáillamona dani íaioi niné táinocaitalliaioi.

11 ¡Níí íaioina dúerena! Caín dibéfuedo jáidiaioi. Aillo úcube óiacanamona Balaam izóí oni íaífueño baízaidiaioi. Daje izóí jaiaí ite Coreña mámeciredimie, Moisés dotáacanamona niné táinocaite naa íemo jaináidinori. Afe izóí birui omoí cígiri ite fiénidifuaí llotino llíicaitiaioi.

12 Omoí finoca conímána izíruilla ráfuaí cígiri meáire finódinona itíaioi. Juzíñamuina jacíruiñeno omoí cígiri caimare güillano jífaízaíbitiaioi. Jáímacina ñue úiñoñeno dani íaioi abi úiñotiaioi. Jairifo oni niné ñaitaca mona úillie izóidiaioi. Ríaniaimona daana llizíllaruimo dúcide íadi llizíñede zena izóidiaioi. Afe izóí bie comíni itíaioi. Afe amena are llizíñenia dúilla llezica aíñoda dotácaza. (Daje izóí bimací ráifíñenamona táinocaitiaioi.)

13 Monáillai jacire bagua izóí itíaioi. Iaiommo ite meáire fiénidifuaí bagua mulle izóí, comíni eróicana jino cíotafirediaioi. Daje izóí úcuai íaioi íómona oni jíaiommo féiraila izóí itíaioi. Jamánomo jítirede jítinomo ziiñona íllena riire mamécaiaioi, dinomo duere zefuïllena.

14 Ua bimáciri jaiáidígima Enoc úrite. Adán jító dinómona íe jító, dinómona nane íe jító, siete dígafue daí illa emódomo, bie Enoc mámeciredimie jocoína. Afémie bie taino llófuetinodo uícodo úrite. Juzíñamui Joreñodo úrillano daide: “Caí Ocuíraima jamánomo aillo íe abi náirairi bíllana cíódicue.

15 Afémie nana fiénide comínimo ite fiénidifuaí íere riire jícanuáibite. Daje izóí nana íaioi íaire ílláfuaí íere jícanuano duere íaioina finótaite. Fiénidino riire daínauaido

cai Ocuíraimana uáitaoidiaioi; bífue mona daje izói duere zéfuitalliaioi.” Daíí Enoc bie fiénidimacido úrite.

¹⁶ Afémaci iere fiéni cáillirediaioi; ñue caimátaiñediaioi. Dani íaioi comeci fiéni jitáinafuiai jino denólledo úritiaioi. Urillano aféfuiaina uáfuena finódiaioi. Dani abi íaioi íñua uáillaído ficire úritiaioi, “Aillo jácimacídicaí,” daííllena. Daje izói caimare comínimo úritiaioi, íaioina bífuellena.

Crístomo íñotino ñue llea uailai

¹⁷ Cue izíruiga ámatiai, cai Ocuíraima Jesucristo orécamaci ómoína daináfue mo omoi coméciri.

¹⁸ Afémaci ómoína daide: “Íco íraírullaído ñúfuiaina zánoitinona íteza. Íaioi comeci íaire óiacanafuiaído íitiaioiza.”

¹⁹ Bimaci dáanomo ñue ítinomona oni eneno bózietaidiaioi. Dani íaioi abi óiacanafue jeire otíaioi. Mei afémaci Juzíñamui Joreño úcaíñegaiáoiza.

²⁰ Mei íadi izíruiga ámatiai, omoi jeire Juzíñamuimona ogáfue mo ríire omoi jáináicari. Daje izói Ñuera Joreño rínodo Juzíñamuimo omoi úrifireiri.

²¹ Juzíñamui omoi izíruillafue dibéfuemo omoi iri. Cai Ocuíraima Jesucristo caimo dúecaillano zíñona cai illíruimo omoi úíñoiri.

²² Nai jabóicana jizire ínotinona jáicina llóiri, ñúfuena jeire íaioi ólleza.

²³ Iráimona bairoca izói íaioina jíllotari. Jáímacimo omoi dúecari; mei íadi íaioimo ite íaífuemo jírcaiñeno omoi iri. Afe fiénidifue íairede iniroi izoide. Íaioi abimo jíideza; áfemona iere abí omoi rairuiri.

Juzíñamuimo íraicaiño cai caimátaillafue

²⁴⁻²⁵ Cai daade Juzíñamui jamánomo nágaífuiai baitádimie. Afémie Jesucristodo cai Jíllotaraima. Iemona cai fiénidifue mo báíñelle rairuilla ríino íemo ite. Daje izói afémie caina íaífuenino caimare dama ie ebírede uíécomo caina izájirede. Afe Juzíñamuimo ebire ñúfuiaí íteza. Jamánomo ñuera ébifue íemo íteza. Daje izói nana ñuera ríino íemo íteza. Daje izói nana rjire ocuállafuiai íemo íteza. Nana bífuiaina cai Ocuíraima Jesucristodo nauí, íemo bíruí, íemo jáí uire daíí jaca ninomo, Juzíñamuimo dúcaíteza. Mai. Jae ñie.

HIRAIRUILLARIDO IITIFUIAI JINO CIOTAINA Juziñamui San Juamo Jino Ciotagafue EL APOCALIPSIS O Revelación a San Juan

Jesucristo jino onóitagafue

¹ Bifue uire íitifuiaí jino cíotainafue. Juziñamui bífuiaína Jesucristomo cíotate, afémie ie ocuífireganomo ácatallena. Daií Cristo uáfue na raíre ífícaítífue na jino íaíoímo ácatate. Jesucristo ie ángel daína abí ímiedo bie jino cíotagana ie ocuífiregamie Juaamo onótate.

² Afe Juan nana ie cíónana uáfue na jino llote. Daje izóí afémie Juziñamui lloga uaina nabáífirede. Afe Juziñamui lloga uai Jesucristodo ñue jaícina llócaiga.

³ Bie Juziñamuimona oga uaina jíáímacimo facáduana cacáđino caímare itíaiói. Daje izóí bie rabénicomo cuega uaina cacáíllano ñue náfuetño caímare íóbitiaíói. Mei bie rabénicomo llogáfuaí zúítírui ja áinozideza.

Siete dígade iglésiaí daína Juziñamuimo gáírífiredinomo Juan cuete

⁴ Asia éniemo ite siete dígade iglésiaí daína Juziñamuimo gáírífiredinomo cueticue. Cue Juáadicue. Mai Juziñamui ñúefuaí dibénemo, naa ie caímare uái illafue dibénemo omoi iri. Mei afe Juziñamui birui itímieza, íemo jaca nanómona jaiaí itímieza, íemo uire jaca ninomo íitimieza. Daje izóí ie ráírano uícomo siete dígade ñuera jóriaí ite. Afe jóriaí Juziñamui Ñuera Joreño jana. Afémie ñúefue dibénemo omoi iri.

⁵ Iemo daje izóí Jesucristo lloga ñúefuaí jeire omoi oíri. Afémie jíáífo méidofínide uai nabáiraíma. Daje izóí afémie nano tíllanomoná abído meine tíñellena cáatagamie. Iemo jíáí afémiemo bínie illáícomíní ocuilla ríino ite. Afe Cristo caina izíruillano ie totaca díedo caí fíénidífuaína oni dote.

⁶ Iemo nane illáícomínína caina itátate ie Moo Juziñamuimo caí jaínáíllena. Daje izóí comínído Juziñamuimo úrífiredinona caina jóonete. Afe Juziñamui íena jóonegacaí. Ie jira jaca ninomo áíllue ébifue naa ocuilla ríino díga afémie íena íteza. Aqué izóídeza.

⁷ ¡Ero, Cristo mona uílliedo bite! Nana comíní íena cíoitiaíói. Daje izóí ie fatino íena cíoitiaíói. Iemo nana bínie nairaí afémie bíllana cíoíllano éenaitiaíói. Jíí, uafue daítadeza.

⁸ Cai jamánomo riire Ocuídime bie izói daide: “Nana ráfuiái nai cómuñenia uícodo itímiedicue. Daje izói fuizájillanomo itímiedicue. Abecedario A-do táinia izói nánoramiedicue. Daje izói abecedario Z-mo fuizailla izói íraimiedicue,” daide. Afémie birui itímie, íemo jaca nanómona itímie, íemo uire jaca ninomo íitimieza.

Ebírede Cristo nicáirilla izói ciona

⁹ Omoi ama Juáadicue. Omoi duere zefuilla izói daane duere zefuídicue. Daa omoi izói Juzíñamui illáimana illánomo jaináidicue. Iemo Jesucristo omoi úiñotaja izói daa omoi díga úiñotagacue. Jesucristodo fairíotaga Juzíñamui ñuera uai jino cue llócailla jira llavécacue. Pátmosmo mámeçirede monaillai cigí ídumo llavécamiedicue.

¹⁰ Iemo afénomo cai Ocuíraima cai ocózinaitaruimo Juzíñamui Ñuera Joreño náamatagacue. Afe llezica vudugoi fúunua izoide ficírede uaina cue méfomo cacádicue.

¹¹ Afe uai cuena daide:

—Naga ráfuiái uícodo itímiedicue. Daje izói fuizájillanomo itímiedicue. Abecedario A-do taineca, íemo Z-mo fuilla izóidimiedicue. Mai nana o ciona díga daa rabénicomo cúeiri. Cuiano, Asia éniemo ite siete dígade iglésiai daína Juzíñamuiimo gairífredinomo o oreri. Afe jófueniaí mámeçiaí: Efeso, íemo Esmirna, íemo Pérgamo, íemo Tiatira, íemo Sardis, íemo Filadelfia, íemo Laodicea, —daide.

¹² Bu cuemo úrilla daiíllena abído gírecaidicue. Gírecaillano, siete dígade oro finoína mechérana ciódicue.

¹³ Afe cígimo cómemona comuídimeña eróidena ciódicue. Afémie jitáogaroi éiba ícoimo dúcide. Ie jogóbemo lláiidife oro finoína.

¹⁴ Afémie ifótirai iere úzerede, jaillici úzerena izói úzerede. Iemo jiái nieve izói úzerede. Ie ui irai bóua izói cíoide.

¹⁵ Afémie éiba ñue queníretaga bronce izói quenírede. Ua bronce iraimo ruílla llezica jamánomo quenírena izói, ie idaí quenírede. Iemo aillo imánillai nofíco tua ficírena izói ie uai ficírede.

¹⁶ Afémie onoi nabézimo siete díga ucudu llíide. Ie fuémona iere jáirede llojéfaí izoide raa jino billa; afefai nágafene jáirede. Ie uíeco jitoma iere riire egáíñua izói riire egáíñote.

¹⁷ Afémiena cíoillano, ie anamo tíidime izói baiídicue. Mei íadi afémie ie nabezi cuemo bíitano cuena daide:

—Jacíruiño o iri. Cue bie nanóidimiedicue; dáamiedicue fuizájillanomo íitimiedicue.

18 Birui cáadimedicue. Mei nauí tíidicue, mei íadi birui jaca ninomo cáaiticue. Tíilla zuitara llave izoide raa cuemo ite; daje izóí tíidino illano lláveniai cuemo ite.

19 O ciona díga mai cúeiri; birui itífuiai cúeiri, íemo uire cómutifuiai cúeiri.

20 Cue nabézimo o ciona siete dígade ucúduai rafue nauí báinino ite. Ja birui jino uáfodo llórede; daje izóí siete dígade mechera rafue llórede. Afe siete dígade ucúduai siete dígatie Juzíñamuimo gairídino uai llócaítico jana. Iemo afe siete dígade mechera siete dígatie Juzíñamuimo gairífiredino jana, —daíí afémie cuena daide.

2

Siete dígade iglésiai daina Juzíñamuimo gairífiredinomo lollíuui: Efésomo ite ñnotinomo llogáuui

¹ Cue ciónamie dáanomo cuena daide:

Efésomo ite Juzíñamuimo gairídino úiñoraímamo búuai cúeiri: “Afe nabézido siete dígade ucúduai llíidimie daje izóí siete dígade oro finoina mechera cígido macáfiredo. (Afémie mechera cígido mácafírena izóí, comini ñue úiñolle jana.) Afémie afe úiñoraímama bie izóí daide:

² Nana o finócafuiaína onódicue. O riíredemo táijidíoa onódicue, naa o comeci jaritaiñedeza. Daje izóí fiénidino fiéni illáfuiaina iere izire o rairuállana onódicue. Iemo jíai táinona “Jesucristo orécanodícaí” daidínona facátatíoa onódicue. Afemona afémaci táino llúana baitíoa.

³ Jaca o comeci jaridoñedio, íemo iere cuedo o táijina llezica cue ícoínia iere duere zefuídíoa. Afe llezica zefuíruiñeno ñue táijidí.

⁴ Mei íadi daa figóñedífuena omo ite. Nano fueñe cue o izíruilla izóí birui cuena izíruíñedio.

⁵ Ie jira ninómona oni nibéfodo baídíoa comeci uibi. Mai omo itífue méidori. Fueñe o illa izóí o iri. Bífuena o méidoñenia omo raire bíticue, omo ite egáñote raa oni óllena.

⁶ Mei jíáfodo, daa ñúefuena nai omo ite. Afe nicolaítas fiéni finócafuiaímo naa íaiói fiéni jíáfodo llógamo éoícana eróidí. Cue daje izóí áfena éoidicue.

⁷ Ñuera Joreño Juzíñamuimo jaináidínona dáinamo cacácadimie áfemo cacai. Afe Ñuera Joreño bie izóí daííacade: “Fiénidena anáfenodínona jáidímacina Juzíñamui nífueninanomo ite cáatate amena llizállana güitátaiticue,” daide.

Esmírnamo ite ñnotinomo llogáuui

8 Daje izói Esmírnamo ite Juzíñamuimo gairídino úiñoraímamo bíuai cúeiri: “Nanóidímie dáamie íraímiena ómoimo úrite. Naui bíniemo tíidímie, íemo meine abido nane cáadímiena jaide. Afémie ona daide:

9 Nana o finócana onódicue. Daje izói o duere zefuállana onódicue, naa o ráanina diga. Mei íadi uáfueza Cristo dibénedo iere ráaredio. Jiáimaci fieni omo úrillana onódicue. Afémaci, “Juzíñamui nizeca Judíodicai” daidíaiói, mei íadi íeñediaíói. Afémaci dani Taife dibénemo jaináidino.

10 Duere o zefuállamo jaináidíno o iri. Mei ómoimona dámierie Taife llavéracomo llavétaiteza, nana omoi facátallena. Daií omoi comeci ifue onóillena facátalliomoi. Diez dígarui duere zefuúredíomoi. Mei íadi o tíllinomo zóofeñeno ínofíreiri. Daií o íadi ziiñona cáallena o jirídotaiticue.

11 Ñuera Joreño Juzíñamuimo jaináidínona dáinamo cacáacadímie mai áfemo cacai. Afe Ñuera Joreño bie izói daiíacade: “Fiénidena anáfenodínona jáidímaci nane méifodo tíllamo raamo jiriñeítaiói,” daide.

Pérgamomo ite ínotinomo llogáuai

12 Daje izói Pérgamomo ite Juzíñamuimo jaináidíno úiñoraímamo bíuai cúeiri: “Afe nágafene jáirede lloefai líidímie bie izói ona daide:

13 Nana o finócana onódicue. Afe izói Taife ocuícana cígimo itíoza onódicue. Afénomo itio íadi zóofeñeno cuemo ñue o ínuana onódicue. Daje izói cuemo o ínuana fáicanocaiñedio. Afe izói Antipas mámeciredímie cue ñue jáicina cue uai nabáífredímie. Afémie omoi cígiri fatíaiói. Ie fáinaruido, cuemo omoi ínuana zóofeñedíomoi, Taife illánomo itíomoi íadi.

14 Mei íadi cue lletárafuiána ómoimo ite. Omoimona dáarie jádí Pérgamomo Balaam llófuiana fáicanocaiacañediaíói. Afe Balaam jaiái Balacna llófuete Israel comíni fieni ínuallena. Afe Balac Balaam llófuiamona Israel comínina jánaraimo fecaca rílleniána ritátate. Afe dáaruido afémacina iere jiruíretade.

15 Nane jáíie cue lletárafuena ómoimo ite. Omoi cígimo dáarie afe nicolaítas lloga uaina féitaiacañedíno ite. Afémacina éoidicue.

16 Ie jira mai omoi comeci ifue méidori; mei íadi omoi méidoñenia, raire omoi diga fuirízaíbiticue. Uáfueza cue fuémoma bite jáirede lloéfado omoi fieni finódínona fáziaíbiticue.

17 Ñuera Joreño Juzíñamuimo jaináidínona dáinamo cacáacadímie, áfemo cacai. Afe Ñuera Joreño bie izói daiíacade, “Fiénidena anáfenodímiena jáitímie afe báinino ite maná dáina

monámona cocide güillena güitátaiticue. (Bie maná Juzíñamui íaiói comécina náiretaillena jana.) Iemo afémiemo úzerede nofitofena fécaiticue. Afe nofitofemo buna ónoñega comue mámecei cuelle. Dama afe nofitofe llínoitímie áfena onuille.” Aquie izói daide.

Tiatíramo ite ñnotinomo llogáuai

¹⁸ Daje izói Tiatíramo ite Juzíñamuimo jaináidino úiñoraímamo búuai cúeiri. “Juzíñamui Jitó ómoímo úrite. Afémie ui irai bóua izoide, íemo ie éiba ñue queníretaga bronce izói quenírede. Afémie bie izói ómoína daide.

¹⁹ Nana omoi finócana onódicue. Cuen a omoi izíruillana onódicue, naa cuemo omoi ñnua diga. Daje izói cue dibénedo ñue omoi táijicaillana onódicue, naa omoi comeci járitaiñena diga. Fueñe omoi táinia baímo birui jamánomo finócaidiomoi.

²⁰ Mei íadi ómoímo daa cue lletárafuena nai ite. Afe Jezabel mámeceiredingo llógana rairuíñediomoi. Afengo, “Juzíñamui dibénedo úriticue,” daífirede, mei íadi fiene ie llócaigafuedo cue ocuífireganona jífuete. Afe jífuia uaido íaióina iere jiruítetade. Daje izói jánaraimo fecaca rílleniaina íaióina ritátate áfemo caimátaillena.

²¹ Aféngomo are úiñoidicue afengo comeci ifue méidollena. Mei íadi afengo áfena méidoacañede. Afengo ie jiruífueña fáicanocaiacañede.

²² Mei jira birui afémaci afengo finócafuena fáicanocaiñenia, aféngona iere izire iráretaiticue. Daje llezica nana afengo diga jiruiredinona duere zefuítaiticue.

²³ Afengo úruiaína titaiticue. (Afe úruiaí daina afengo llógamo jíeruitino.) Afemona naga come ifoci úrillana, ie comeci ifue diga ñue ícoímo cue onónana, nana Juzíñamuimo gairídino fídítiaíoi. Iemo ómoímona illa dígamie fiene omoi finuaze ómoína duere fínoiticue.

²⁴ Mei íadi ómoímona Tiatíramo ite jáímaci afe Jezabel omoi llófuia fiénide uaina náfuéñediomoi. Afe Jezabélmo jaináidino íaiói llófueinana daídíaíoi, “Cai llófueina uai Taífe ie, iere báinide nai uáfodo ónonidífuiái,” daídíaíoi. Afe llófueinana onótañegaomoi. Iemo ómoímo ite nauí cue lloga baímo jáíena ómoína ócuíñeiticue.

²⁵ Daa bie llóiticue: Ómoímo ite ñúfuiaí ñue rairuiri, nai cue bíñeille dino.

²⁶ Fiénidena anáfenodinona jáítinona náiraíai ócuitimacina jóoneiticue. Afémaci cue jítainana ñue ícoímo fuitáidino. Ocuille ríino íaióimo jóoneiticue,

²⁷ mei daíí cue Moo cue ocuille ríinona cuemo jóoneteza. Iemona náiraíaina rírede lloébici izóidedo riire ócuitiaíoi.

Iaioimo cacáreacañedinona icírui llaia jéenino llairúngotailla izói, afe izói íaioina duere fínoitiaíoi.

²⁸ Daje izói monáiracudu iere ebire egáñua izói, afémacina ebire fínoiticue.

²⁹ Ñuera Joreño Juzíñamuimo jaináidinona dáinamo cacácadimie mai áfemo cacai.” Aquie izói daide.

3

Sárdismo ite ñnotinomo llogáuai

¹ Daje izói Sárdismo ite Juzíñamuimo jaináidino úñoraimamo bíuai cúeiri: “Afe siete dígade Juzíñamui joríairedimie, ñi afe Juzíñamui Ñuera Joreñoredimie Cristo, íemo afe siete dígade ucúduai llíidimie dáamie. Afémie bie izói ona daide: Nana o finócana onódicue. Crísto o jainaina izóinado jica jalleide, íadi onódicueza tíidimie izói itio.

² Come cazilla izói mai abina onoiri. Nai omo due jiza fiébide ñnogafuiaina meine riire finori, mei aféfuiai jae táinocaiacadeza. Eródicuemo o finócafuiiai cue Juzíñamui eróicana ñue jaícina jóiñedeza.

³ O fueñe ñnoga íaíoi llófuiamo uibíoicairi. Afena jeire o oíri. Afe llezica o comécimo itifue ññefuena méidori. O abina ñue onóñenia, merirífredimie ónonino billa izói, duere omo fínuabiitícueza. Cue billíruina ónoñeitio.

⁴ Mei íadi ómoimona jadí Sárdismo dáarie comécina ññuemacina ite. Afémaci ññiroina íaíñedino izoide. Afémaci úzecuiruai jítada cue diga jáitiaíoi, mei afe daí íaioimo dúideza.

⁵ Fíenidena anáfenodinona jáidino úzecuirona jítaitiaíoi. Iemo zíñona cáaitino mámecei cuiánicomona íaíoi mámeceiaina dóñeiticue. Iemo daje izói cue Moo Juzíñamui uícomo “Bie cúemaci” dáitícue; daje izói ie abi imaci ángeles daínamaci uícomo “Bie cúemaci” dáitícue.

⁶ Ñuera Joreño Juzíñamuimo jaináidinona dáinamo cacácadimie mai áfemo cacai.” Aquie izói daide.

Filadélfiamo ite ñnotinomo llogáuai

⁷ Daje izói Filadélfiamo ite Juzíñamuimo jaináidino úñoraimamo bíuai cúeiri: “Afe ññifuenidimie omo úrite. Afémie uáfuena úrifiredimie. Afémiemo jaiái illaíma David naze tuiñora llave ite. Afémie Juzíñamui illáimana illano tuiñóadi buna íbáinide. Daje izói afémie íbáia, buna zuitánide.

⁸ Bímie bie izói ona daide: Nana o finócana onódicue. Buna íbáinide túide naze o uíecori jóneticue. Mei figo mairíñedio, íadi cue uaina náfuetio; cuena jaca jáanofinidio.

⁹ Iemona Taífemo jaináidinona o anamo caiñícido ana íaíoi dújutano óreitícue. Afémaci táinona úrillano bie izói

daiñfirediaioi: “Cai bie Juziñamui nizeca judiuaidicai” daidíaiioi, mei íadi íeñediaioi. Nana baimaci o anamo dújutaiticue, íemona ona cue izíruillana fidiitiaioi.

¹⁰ Cue ocuica uai jeire o úamona aféuai daina izói comécina jariñoñedio. Ie jira nana bíniemo bite facátalliruimona ona ñue ráruiticue. Aféruido nana bíniemo ite comini facátalliaioi.

¹¹ Raire biticue. Omo ite ñúefuiái ñue rairuiri, o jirírolle raa bu báiroñeilleza.

¹² Fiénidena anáfenodinona jáitinona cúeiena máiñoiticue. Máinuano cue Juziñamui gairíracomo ite mairide jáillirai izói íaioina óreiticue. Iemona Juziñamui illánomona jaca jino jáiñeitiaioi. Iaiioimo cue Juziñamui mámecei cúeiticue. Daje izói cue Juziñamui jofue mámecei íaioimo cúeiticue. Afe jofue mámecei “Comue Jerusalén.” Afe jofue cue Juziñamuimona caifo monámona ana bite. Daje izói afe fiénidena anáfenodinomo cue comue mámecei cúeiticue.

¹³ Ñuera Joreño Juziñamuimo jaináidinona dáinamo cacácadimie mai áfemo cacai.” Aquie izói daide.

Laodicéamo ite ñnotinomo llogáuai

¹⁴ Daje izói Laodicéamo ite Juziñamuimo jaináidino úiñoraímamo bíuai cúeiri: “Uáfueña llotímie omo úrite. Afémie jáicína uai nabáifiredimie; daje izói jaca méidoñeno uáfueña úrifiredimie. Afémie nana Juziñamui finócana tainérama.

¹⁵ Afémie bie izói ona daide: Nana o finócafuiaina onódicue. Ráairuillano figo o ñnoñenana onódicue. O ñnoga ñue uzírediji izóiñede. Daje izói o ñnoga caimare mánaidiji izóiñede. Ñue o uzírenana jitáidicue, nibai jáífodo o mánaínana jitáidicue.

¹⁶ Mei íadi jabo uzírediji izóidido. Iemona jabo uzírediji jino tua izói ona jino dótaiticue.

¹⁷ Bie izói daiñfiredio: “Ráaredimiedicue,” daidido. Iemo “Nana cue illafue ñue jóide. Cue jitaica raana iñede,” daiñfiredio. Mei íadi jáífodo o íllana onóñedio. Juziñamui eróicana bu cáimadoñegamedio. Iemo daje izói iere duere zefuítagao, íemo iere dúeredimiedio, íemo uina cíoiñedimie izóidido. Iemo jáí íncuironino emuíromade izóidido. Afe bie izói o íllana jaca onóñedio.

¹⁸ Mei jira omo llóiticue, “Iraimo ñue finoca órona cúemona íba, uáfueña ráaredimiena o jáillena. Daje izói cúemona úzerede íncuirona íba, o meáire emuíromana íbáillena. Daje izói ui manórajina cúemona íba, o uimo jóoniamona ñue o cíoiliena.

¹⁹ Nana cue izíruiganona lletádicue; daje izói íaioina duere finódicue ñue íaioi íllena. Mei íemona Jesucrístomo izire o jaináicaillano, iere o ñnofireiri. O comeci ífuiái méidori, ona duere cue fínoiza.

²⁰ Ero cacai, come comeci naze ízoinamo iticue. Dinómona jíiriticue. Cue uaimo cacáreitimie ie naze tuiñóadi cue llínollena, afémie illánomo jofo jáiticue. Jaillano dájena afémie diga nabáiriticue. Daje izói conima diga caimare úriticoco.

²¹ Fiénidena anáfenodinona jáitinona, illáimana cue ráiiranomo afémiena cue diga ráitaiticue. Mei daií fiénidena cue anáfenuamona cue Moo illáimana ráiiranomo ráinazaidicueza.

²² Ñuera Joreño Juzíñamuimo jaináidinona dáinamo cacácadimie, mai áfemo cacai.” Aquie izói daide.

4

Monamo Crístomo lloga cáimafuiai

¹ Bie méifomo éroidicue, monamo ite naze túnana ciódicue. Fueñe cue cacana uaina meine nane cacádicue. Afe uai vudugoi ficirena izói cacaide. Afe uai cuena daide:

—Caifo benomo bi. Bífuiái méifomo raire cómutifuiaina omo ácataiticue, —daide.

² Afe llezica Ñuera Joreño anamo itábicaidicue. Iemona monamo ite illaíma ráiiranona ciódicue. Afénomo dáamie ráiinana ciódicue.

³ Afémie iere quérede ‘jaspe’ daina ráifide nofiji izói éroide. Aféjina jiáífo daina ‘cornalina.’ Afe ráiirano abido rózigüeo nágafene ífoina ite. Afe rózigüeo ‘esmeralda’ daina ráifide nofiji quenírena izói quenírede.

⁴ Iemo afe ráiirano abido veinticuatro diga jiáíe illaíma ráiiranuaina nágafene ífoina íllana ciódicue. Afénuaimo veinticuatro diga mona ero ocuide éicomini ráiidiaíoi. Afémaci úzerede iníroillai jitádiaíoi. Iaiíoi ífomo oro finoína illaíma jitáfiregacuífoi jíiena.

⁵ Afe áillue ráiiranomona aillo boride. Afe llezica afénomona iere ficire mona giría cácaide. Iemo afe ráiirano uícomo siete dígade áillue bobáieniai bóoide. Afe siete diga bóoide bobáieniai Juzíñamui Ñuera Joreño jana.

⁶ Dáanommo afe ráiirano uícomo, daa monáillaina eroide illa. Afe monáillai anáfenemo ñue cíoide vidrio izoide.

Afe ráiirano abido cuatro diga cáadimiíai ífoina itíaíoi. Afémaci erófene dibénemo aillo uíjiai ite. Daje izói emodo dibénemo ite.

⁷ Bimácimona daa jánallarina eroide. Iemo jiáíe juráreto íitona eroide. Iemo jiáíe uíéco, come uíeconna eroide. Iemo jiáíe feede máajaiñona eroide.

⁸ Afe cuatro diga cáadimiíaimo illa dígamíemo seis diga íaicuai ite. Afe íaicuai erófenemo uíjiaína oruide; daje izói

emódo dibénemo ite. Afémaci mona naio diga líicaiñeno úritiaioi; Juzíñamuina daioidiaioi:

¡tere íaifuenidio! ¡tere íaifuenidio! ¡tere íaifuenidio!

¡ere ñuera cai Ocuíraimadio.

Jamánomo ríinorede Juzíñamuidio.

Jaca nanómona itímiedio,

Iemo nai birui itímiedioza,

Iemo uire jaca ninomo zíiñona íitimiedioza, —daií daiíofirediaioi.

⁹ Illa dígacaiño afe cáadimaci, ráiiranomo ráiide Moo Juzíñamuimo ebíredifue nitáadi, íemo ñúefue jóoneadi, íemo jíái figura íena dáiiadi,

¹⁰ afe llezica afe veinticuatro diga ocuide éicomini áillue ráiiranomo ite Juzíñamui anamo dújufirediaioi. Iemo afe jaca ninomo zíiñona itímiena caimátaidiaioi. Afe llezica íaioi oro finoina illaíma ífo icuífui ráiirano uícomo jóonefirediaioi. Jóneta daiífirediaioi:

¹¹ Cai Ocuíraíma Juzíñamui,

¡ere ebíredifue omo nitáregaza,

Daje izói ñúefuiai omo jóonefíregaza.

O jamánomo ríinorenana omo nitáregaza.

Nana aféfuiai ona náamaredeza.

Mei naga ráaniai o comuítaga.

Iemo o comeci jítaina izói itíaioiza.

Daje izói o comeci óiacanamona finócaiaioi.

Aquíe izói daiífirediaioi.

5

Ráiidímie líiga rabénicono ciódicue naa Cordero dainámie Cristo diga

¹ Afe méifomo illaíma ráiiranomo ráiidímie nabézimo ite rabénicono ciódicue. Afénico ferínoga rabe. Erófenemo cuega, daje izói jinófenemo jíái cuega. Afénico siete diga sello daina ñue íbaira raado íbaica.

² Iemo ríirede ángel daina Juzíñamui abí ímiena ciódicue. Afémie ficírede uaido jicánofírede; daide:

—¿Bie sello mei cuatállena bu ñuena? ¿Bumo ñue dúide binico tuiñóllena? —daide.

³ Mei íadi afénico tuiñoitimiena íñede. Caífo monamo íñede. Bíníemo íñede, íemo bíníe anamo tíidino illánomo jíái daje izói íñede. Daje izói afénícomo buna eróinide afe facádollena.

⁴ Afénico tuiñoite comécina ñúemiena baiñenamona íere éedicue. Daje izói afénico facádoitimie íñenamona, íemo jíái afénícomo eróillano ónoitimie íñenamona, íere éedicue.

⁵ Iemona veinticuatro diga eicomínimona dámie cuena daide:

—Mai benómona éeñeno o iri, mei Judá nairai illaima Jánallarina mamécamié, fiénidena jae ñue anáfenotateza. Afémie jaiái illaima David erófene igímamona comuídimie. Afe ie anáfenuamona afémie binico tuiñolle ríino ote. Daje izóí afe siete dígade sello cuatalle ríino íemo ite, —daide.

⁶ Iemona afe ráirano cígimo, íemo afe cuatro diga cáadimiái cígiri, íemo afe veinticuatro diga éicomini cígimo, Corderona mameca Crístona ciódicue. Afémie táide, mei íadi Juzíñamuimo fia fecállena ie íaíoi fáina meifo cíoide. Afe Cordero siete diga zicairede, íemo ie ui siete dígade. Afe siete dígade uíjiaí naga éniáimo oreca Juzíñamui Ñuera Joreño jana.

⁷ Afe Cordero illaima ráiranomo ráiidimie nabézimo ite rabénicono llínuaide.

⁸ Afémie afénico llínua llezica afe cuatro dígade cáadimiái, íemo afe veinticuatro dígade ocuide éicomini afe Cordero anamo dújudiaíoi. Afe eicomínimona illa dígamie ‘arpa’ daina rua roia taiga raa llíediaíoi. Daje llezica afémaci oro finoina ugúciaína oruide ichecoi llíidiaíoi. Afeniaí Juzíñamuimo jaináidino afémiemo jicara uailai jana.

⁹ Afe éicomini bie comue rua rotíaíoi:
O iere comécina ñuemenamona bie rabénico llínota tuiñolle omo dúide.

Mei nauí Juzíñamuimo fatá fecácamedioza.

Caina o die tóillado Juzíñamui íena ibáedioza.

Uáfuenta nágaziemona,

Iemo nana jáífo úritinomona,

Iemo naga comini jófuiamona,

Iemo nana náiraiamona Juzíñamui íena caina ibáedioza.

¹⁰ Cai Juzíñamui ie illáinina caina jáitatio;

Daje izóí comínido Juzíñamuimo úrifireitinona caina jóonetio;

Iemona énie náiraiaina ócuiticai.

Aquíe izóí rotíaíoi.

¹¹ Afe mei eródicue. Iemo aillo afe illaima ráiranomo ífoina ite ángeles daina Juzíñamui abi imaci úrilla uaina cacádicue. Daje llezica afe cuatro diga cáadimiái uaina cacádicue. Iemo dáaruído éicomini uaina cacádicue. Afe Juzíñamui abi imaci iere jamánomo aillo itíaíoi. Ua millones y millones dáinaze itíaíoi.

¹² Afémaci fícirerie úritiaíoi; daidíaíoi:

Fatá Juzíñamuimo fecaca Cordero comécina iere ñuenamona ñuera ríino maiñolle afémiemo dúide.

Daje izóí aillo ráifide ráaniaí dáamiemo dúide.

Iemo ifoci déillafuiaí dáamiemo dúide.

Iemo nana ñuera máirre dáamiemo dúide.

Iemo nitárega ñúefue dáamiemo dúide.

Iemo ñuera ébifue dáamiemo dúide.

Iemo aillo afémiemo caimátaille uai afe Cordéromo dúide.

¹³ Afe llezica nana Juzíñamui comuitaganuiai úrilla uaina cacádicue: nana monamo itínuiai, daje izói éniemo itínuiai, daje izói énie anamo itínuiai, daje izói monáillaimo itínuiai, naa afénuiaimo itínuiai úrilla uaina cacádicue. Daídíaioi: Nana caimátaille uailai illaíma ráiiranomo ráide Moo Juzíñamuimo íredeza,

Daje izói jíai Cordéromo íredeza.

Afe izói ñúefue afe íaillinoimo nitáredeza, naa ñuera ébifue diga,

Iemo ñuera riino íaillinoimo íredeza.

Nana aféfuiai íaillinoimo nana fimónaiaido, jaca ninomo zíñona daí daírenaza.

¹⁴ Iemo afe cuatro diga cáadimiai aiáirilla izói daídíaioi:

—¡Daíítadeza! —daíioifirediaioi.

Iemo afe veinticuatro dígade écomini ana dújuillano, jaca ninomo zíñona cáadimiemo caimátaiouifrediaioi.

6

Siete dígade sello daina rabénico ibaira rafue

¹ Cordero afe siete dígade séllomona nánora tuíñuana ciódicue. Daje llezica cuatro dígade cáadimiamona dáamie daínana cacádicue. Ie úrilla uai, mona giria ficirena izói ficirede. Daide:

—Mai eróizaibi, —daide.

² Cue eroilla llezica úzerede cabállona ciódicue. Afe emódomo ráicaidimie zicuirra llícaide. Iemo illaíma ifo icuífoina ie jitádiaioi. Jita mei afémie naga náiraina anáfenocana jaide. Ie mei nágaruillaído afémie íaioina anáfenofirede.

³ Méifoide séllona Cordero cuata llezica, tórona éroide cáadimie úrillana cacádicue. Afémie:

—Mai eróizaibi, —daide.

⁴ Afe llezica jáirede caballo jino bíllana ciódicue. Afe emódomo ráicaidimiemo féitalle riino afémiemo iga. Afémie nana nairai caimare uái illa féitaite, comini conímana fazítallena. Afe llezica áillue lloébicina afémiemo iga.

⁵ Iemo Cordero nane jáie tercer daina sello cuata llezica, jáie cáadimie úrillana cacádicue. Afémie:

—Mai eróizaibi, —daide.

Jira eróidicue. Eróidicujemo daa jítirede cabállona ciódicue. Afe emódomo ráicaidimie mérenana onóillena facara raa llícaide.

⁶ Iemo cáadimiai cígimona dáamie úrilla uai cacádicue. Aféuai daide:

—Daa kilo trigo daa mona táijina fidi. Iemo daamani kilo cebada daa mona táijina fidi. Iemo aceite vino diga jaca jeruiredeza, mei afe iballe úcube iñédeza, —daide.

7 Afe mei Cordero jáie ‘cuarto’ daina sello cuata llezica, cáadimiamona íraimie úrillana cacádicue. Afémie:

—Mai, eróizaibi, —daide.

8 Eróidicueмо borárede cabállona ciódicue. Afe emódomo ráicaidimie titáfiredimie dainámie. Afémie ódana tíidino illano jana maméidimie bite. Enie cuatro diga fecácamona dáanie íemo iga, afénomo riire ocuállena. Afénomo comínina fuiríllado íaioina tícoizitaite. Iemo daje izói júbiedo íaioina tícoizitaite. Iemo dúicuaído íaioina tícoizitaite. Iemo éniemo ite illáirede rílleníai íaioina tícoizitaite.

9 Afe mei Cordero jáie ‘quinto’ daina sello cuata llezica, ‘altar’ daina Juzíñamui caimátaitarano anamo ite, titaca comini coméciaina ciódicue. Afémaci Juzíñamui uai llócailla ícoinia titácaiaioi.

10 Afe bimaci ficire úritiaioi; daidíaiioi:

—Íaifuenide cai Ocuídime, uícodo o llógana méidoñoño ñue fuitáfiredio. Eniemo ite cai titádino iere jicánota duere o finóllena, ¿nié dinó nai mozíñoitio? Cai fatino iba o ollirui, ¿nigarui nai bai dúíñoitio? —daidíaiioi.

11 Mei jira afe altar anamo itímaci úzecuiruaina igáiaioi. Afe llezica nai nano íanori ocózinaitagaiaioi. Mei nana íaioi tílla izói uire titállino, Juzíñamui mámanomo nai dúciñede. Afe titállino, nauí íaioi titaca ámatiaí izói, Cristo uaimo táijifirediaioi.

12 Cordero nane jáie ‘sexto’ daina sello cuata llezica, eróidicueмо, énie iere jacire docaide. Iemo jitoma zúnaillana, jítaca jítiroi izói éroide. Afe llezica fuí náauina jáirede die izói méidoficaide.

13 Afe dáaruído mona ero ucúduai cocídiaioi. Ua, higuera daina amena llizilla, jairifo riire begüíñuamona cócia izói, afe izói ucúduai ana biñiemo cocídiaioi.

14 Afe llezica, rabe jofo ferírioicailla izói, mona ferírioicaide. Iemona cióbicaíñena. Iemo dáaruído nana caifóneduai naa monáillai cigi íduai íaioi illánomona oni jirecaide.

15 Iemona nairai illaini caifóneduai anamo ite ífuaimo, naa jéerie noficiaí cigiedo retáiritiaioi. Afénomo jamánomoidino daje izói retáiritiaioi. Iemo aillo ráanaitino, íemo fuíríraini illáicomini, íemo iere riíredinuiaí, íemo nana jacire rairuícano, daje izói buna ráiruiñegano, nana afénomo retáiritiaioi.

16 Afémaci caifóneduaina jéerie noficiaína daíifirediaioi:

—¡Mai caimo baii! Mai caina jiita, baie illaíma ráiiranomo ráiide Juzíñamui mona caina rétaido. Cordero finolle jacire cai duere finóllifuemona caina rétaido, —daiífirediaioi.

¹⁷ Mei jii, iere jacire comini duere finóllirui jae dúcidez. ¿Bu mei áfena moziñorena?

7

Israel náiraimona náamana onóillena cuegámaciai

¹ Bie méifomo bínie fuédaíaimo cuatro dígade ángeles daina Juzíñamui abi ímiiai, naidáienana ciódicue. Afémaci nágafeniaimona jairifo jáiñuana moziñotiaioi. Afe éniemo jairífona jaiñótañediaioi, daje izói monáillaimo jaiñótañediaioi, íemo jáíi aménaíaimo jaiñótañediaioi.

² Iemo jáíie Juzíñamui abi ímiena mona móimona bíllana ciódicue. Afémie caade Juzíñamui íeie daiíllena sello daina jóonelle raa lílicabite. Afémie ficire úrite. Enie fuédaíaimo cuatro diga naidáidimíaimo úrite. Afémaci bínie fieni íaioi finolle, naa monáillai diga ríinona igámaci. Afémacina bímie daide:

³ —Cai Juzíñamui ocuífireganomo, íaioi ozócimo náamana onóillena mámecei nai jóoneñena llezica, nai bíniena duere finóñeno iri. Daje izói monáillai naa aménaíai raire duere finóñeno iri.

⁴ Jónia mei, nígamaci náamana onóillena mámecina jóonegano íaioi número na cacádicue. Nana Israel náiraimo itíziaimona afe cuegano ciento cuarenta y cuatro mil dígade.

⁵ Judá izíemona doce mil diga cúefide.

Iemo Rubén izíemona doce mil diga cúefide.

Iemo Gad izíemona doce mil diga cúefide.

⁶ Iemo Aser izíemona doce mil diga cúefide.

Iemo Neftalí izíemona doce mil diga cúefide.

Iemo Manasés izíemona doce mil diga cúefide.

⁷ Iemo Simeón izíemona doce mil diga cúefide.

Iemo Leví izíemona doce mil diga cúefide.

Iemo Isacar izíemona doce mil diga cúefide.

⁸ Iemo Zabulón izíemona doce mil diga cúefide.

Iemo José izíemona doce mil diga cúefide.

Iemo Benjamín izíemona doce mil diga cúefide.

Aillo dáanomo úzecuiruai jitada gairídino

⁹ Afe méifomo eróillano jamánomo aillo comínina ciódicue. Nana náiraiimona dáanomo bitíaioi. Daje izói nágaziemona bitíaioi. Iemo daje izói jáíifo úritinuiamona bitíaioi. Iemo daje izói naga jófuiamona bitíaioi. Nana bimaci illaíma ráiirano uícomo naidáidiaioi. Daje izói Cordero uícomo

naidáidiaioi. Afénomo aillo itíaiõiza buna facádonide. Nana afémaci úzecuiruai jitáoidiaioi. Daje llezica afémaci rafóruai llíiediaioi.

¹⁰ Nana fíçirerie daidiaioi:

Cai jllonano, illaíma ráiiranomo ráide cai Juzíñamuimona comuide.

Daje izói cai jllonano Cordéromona comuide, daidiaioi.

¹¹ Afe llezica nana Juzíñamui abi imáciai, illaíma ráiirano onido ífoina naidáiediaioi. Daje izói veinticuatro dígade éicomini onido ífoina naidáiediaioi. Iemo jíai cuatro diga cáadimíai onido ífoina naidáidiaioi. Afémaci afe ráiiranomo ráidimie anamo éniemo fueco diné bíjicaidiaioi. Bíjicaillano Juzíñamuimo caimátaidiaioi.

¹² Daidiaioi:

¡Bie izóideza! Núefuai nitalle cai Juzíñamuimo dúide, ñue ebíredifuai diga.

Daje izói nana ñue onóigafue íemo dúide, naa figura daífirena diga.

Daje izói afémiemo nitárede ñúefue dáamiemo dúide, naa áillue máirie diga.

Nana bífuai cai Juzíñamuina jaca ninomo ziiñona daí daírenaza.

Aquíe izóideza, —daidiaioi.

¹³ Afe mei afe eicomínimona dáamie cuemo jicánote:

—¿Baie buoi úzecuiruai jitáoina? ¿Afémaci mei ninena bitiaioi? —daide.

¹⁴ Jira íena daidicue:

—Afena onóñedicue. O ñue onódio, —daidicue.

Iemo afémie cuena daide:

—Bimaci aillo duere zefuilla ícoimo jino bitino. Afémaci comécina iere íaifuenino íaioi íllena ja Cordero díedo muiñócaza. Afémaci iere úzecuiro inícuiro illa izói itíaiõi.

¹⁵ Ie jira Juzíñamui ráiirano uícomo itíaiõi. Afe llezica nágaruillai, mona naio diga, Juzíñamui gairíraco ero ie ocuállana finófrediaioi. Iemo afe ráiiranomo ráide Moo Juzíñamui, íaioi diga íllado jácifuemona íaioina ráiruite.

¹⁶ Afémaci jaca júbiemona duere finóbiñeitiaioi. Daje izói jiróacanari duere zéfuiñeitiaioi. Iemo jitoma íaioina jíai úzitañeite. Daje izói uzírediruimo mona uzírena íaioimo uzire cácañeite.

¹⁷ Mei illaíma ráiirano abimo ite Cordero, ovejai uíñua izói íaioina uíñoiteza. Afe llezica ñuera jainoi jino toránuaído íaioina ífóicaité. Afe jainoi ziiñona cáatatiji. Iemo afémaci éeadi Juzíñamui íaioi ui jeme nana oni dóite.

8

Iraie sello cúatajana cioide, oro finoina uguci uillítara diga

¹ Iemo Cordero llíga rabénicomo ite íraie sello daina ibáioide raa cuata llezica, daa hora átuado mona tii daíñocaide.

² Afe mei siete dígade Juzíñamui abi imaci Juzíñamui uícomo naidáienana ciódicue. Afémaci siete diga vudugoi izoide raana igáiaioi.

³ Afe mei jíaie ángel dainámie Juzíñamui abi ímie oro finoina uguci uillítara llícabillana ciódicue. Afémie altar daina Juzíñamui caimátairano uícomo naidaide. Iemo aillo ugúciai afémiemo fecácaza, áfena Juzíñamuimo uillítallena. Mei nana Juzíñamuimo jaináidino afémiemo íaioi jicáfírena uaillai llua llezica, bímie dáanomo afe ugúciai Juzíñamuimo uillítaiteza.

Afe Juzíñamui ráirano uícomo ite oro finoina ie caimátairanomo, bímie afe ugúciai jutade; íemo afe llezica afe Juzíñamuimo jaináidino jicáfírena uaillai llócaigaza.

⁴ Afe uguci uillie, Juzíñamui abi ímie áfena altarmo juta mei, Juzíñamui uícomo caifo uillíoicaide, nana Juzíñamuimo jaináidino jicáfírena uaillai diga.

⁵ Afe mei Juzíñamui abi ímie uguci uillítara raa llínote. Llínuano altármona oga caade iráiciaina áfena oruítate. Daí fínuano ana éniemo dotade. Afe dota llezica mona jacire giride naa ficíriede raari. Iemo aillo améuaí llairide. Iemo énie jacire docaide.

Siete dígade vudúgoina eroide raa

⁶ Iemo afe siete dígade vudúgoina eroide llíide Juzíñamui abi imáciai afe vudugoi fúunollena maméritiaioi.

⁷ Nanóidimie fúunua llezica, jéerie nocíjiaí éniemo cocítate. Afe dáaruido réici diga die taméricaide éniemo cocítate. Afe cóciamona éniemona jarífenie boode. Daje izói nana aménaiaimona jarífenaiaí boode. Daje izói nana caade ráitiaimona jarífene boode.

⁸ Afe meifo Juzíñamui abi ímie ie vudugoi fúunua llezica, boode áillue íduna éroide raa monáillajimo dotaina. Iemona monáillajimona jarífeido díena jaide.

⁹ Afemona nana afénomo ite caade chámuniaimona jarífeniaí aillo tícoizitiaioi. Daje izói afénomo ite jéerie bárconiaimona jarífenedo aillo niné táinocaidiaioi.

¹⁰ Iemo jíaie Juzíñamui abi ímie ie vudugoi fúunua llezica, áillue ucudu monámona éniemo baíide. Afe ucudu bobaie izói boode. Afe bóodicudu nana imánillaimona jarífemanimo baíide. Daje izói éniemona jainoi jino toránuaímo baílla.

11 Afe ucudu mámeçi Eríredicudu. Iemona nana imánillaimona jarífemanillaí eríriede. Iemona afe jainoi erire jáillamona aillo comini tíidiaioi.

12 Ie mei nane jáíe Juzíñamui abi ímie ie vudugoi fúunua llezica, jítómamona jarífetomado jítirecaide. Daje izói fiuímona jarífeuido jítirecaide. Iemo jáí ucúduaimona jarífecududo daje izói jítirecaide. Ie jira nana afémacimona jarífenedo jítirecaide. Naga mona naio diga jarífemonana egáíñoñediaioi.

13 Afe méifomo caifo monamo éroidicue. Afe mona erodo feede Juzíñamui abi ímiēna cacádícue. Afémie ficire úrioicaide. Daide:

—Aii. Eniemo ite comini nii dúerena; mei Juzíñamui abi imácimona daámāni nai fiébide vudugoi fúunollena. Afémaci fúunua llezica énie imaci, ¡Nii duere zéfuitiaioi! —daide.

9

1 Iemo nane jáíe Juzíñamui abi ímie ie vudugoi fúunua llezica, daa ucudu monámona éniemo baiillana ciódicue. Iemo fiénide jóriaí ibáirafo zuitara llave afe ucúdumo iga.

2 Afemona afécudu aféfona tuiñode. Tuiñuamona aféfomona jacafaí bóua uillia izói caifo uillide. Aféfomona caifo uillide uillie jítómāna dúitate. Afe llezica mona erona jítire finode.

3 Afe uilliemona bíniedo feede fiuai comuide. Afémaci, éniemo ite acáiduai izói molléroirediaioi.

4 Afémaci ráitie güllena rairuicaiaioi. Daje izói nana amena rábiaína guitátañegaiaioi, naa jáíe mócore zicode ráaniaí diga. Daa comini duere finóllena orécaiaioi. Mei íadi dani Juzíñamui ie daiitate mámeçi ozócimo cúeñeganona, afe fiuai duere fínoitiaioi.

5 Mei íadi afe fiuai comínina títatañegaiaioi. Mei jáífodo afémaci cinco diga fiui comínina izi cácataitiaioi. Afe fiuai mailla, acaido come mailla izói izíreite.

6 Iemona aféruillaído comini, “Raire cue tílli” dáitiaioi, mei íadi tíñeitiaioi. Iere tíiacaitiaioi íadi, titáfírede raa afémacimona oni jica jáite.

7 Afe fiuai jóbairizaillena mamérilla cabállona eróidiaioi. Iaioi ifócimo oro finoina illaíma ifo icuífoina éroide jína. Iemo íaioi uiéco come uiécona éroide.

8 Iaioi ifótií ríngo ifótiína éroide. Iaioi ízie ‘león’ daina jánallari íziēna éroide.

9 Iemo llojécuiroi izoide abi ríidote icogí íaioi jogóbemo jíide. Iaioi féeoína jamánomo ficírede. Uafue, jóbairizailla caballo zonóicaiga ‘cárroniaí’ ficírena izói ficírede.

10 Iemo afémacimo ite ooda acaido ooda izói molléroirede. Afe óodamo cinco diga fiui comini duere finolle ríino ite.

¹¹ Afe fíuái illaíma ite. Afémie fiénide jóriaí íbáirafo úiñotimie. Afémie mámeçi hebreo uaido Abadón; íemo griego uaido Apolión. Afeci daiíacade “Niné táinocaitaitimie.”

¹² Nanoide jacire izi cacánafue jae záaide. Mei íadí nai mena fiévide.

¹³ Iemo nane jíáie Juziñamui abí ímie ie vudugoi fúunua llezica, Juziñamui uícomo ite oro finoína altar dáina afémiemo caimátairanomona úrilla uaina cacádícue. Afe uai afe caimátairanomo ite cuatro dígade caífo fáide zicaí cígimona cácaçaide.

¹⁴ Afe uai jae vudugoi fúunote Juziñamui abí ímiéna daide:

—Afe cuatro dígade Eufrates imani abímo cuinaca ángeles izóidino mai zuitari, —daide.

¹⁵ Jira zuitácaiaioi, nana comini jarífenairaido titállena. Mei aféruimo dúcinamona bai óllena eneno mamécaiaioi. Daje izói biruimo dúcinamona mamécaiaioi. Daje izói bie fíui íena mamécaiaioi. Iemo daje izói bie fimona íena mamécaiaioi.

¹⁶ Afe cuatro díga ángeles ocuúllino aillo ite. Nana afémaci cabálloniaí emódomo ráiediaioi. Iemo afémaci dígadíaioi dáinana cacádícue. Afémaci doscientos millones dígadíaioi.

¹⁷ Bie izói éroide cabálluai nícaido ciona izói ciódícue. Afe cabálluai emódomo ráiidino jogóbiaimo llojeco jitáoidiaioi. Afe llojécuiromo jíaire, mócore, borare cuega. Íaioi cabálluai ífo ‘leon’ dáina jánallari ífona éroide. Afémaci fuémona irai izói jino bite, íemo uíllie bite, íemo daje fuémona nairai iere uzire cóonaitalle raa jino bite.

¹⁸ Afe cabálluai fuémona bite daámani jacire táinocaitate ráamona aillo nairai fuite. Uafue, nana comínimona jarífenairai tíidiaioi.

¹⁹ Daje izói afe cabálluai óodamo jacire títaite ríino ite, mei afe oda jaiona eróideza; ifóredeza. Afedo comínina ainízicana uite.

²⁰ Mei íadí tíidinomona fiébidino, baie daámani jaciredemona tíiñedino, íaioi finófireiga fiénidífuiaí féitaacañediaioi. Daje izói fiénide joriaimo caimátaitajana fáicanocaiñediaioi, naa jíáíforie finoça jánaraiaína. Dáarie afe jánaraiaí oro finoína, jíáie plata finoína, jíáie bronce finoína; íemo jíáie nofíci finoína, íemo jíáie amena finoína. Nana bie jánaraiaí jaca cióñede; daje izói minícana cacáñede, íemo daje izói macáñede.

²¹ Afe fiébidino jíáimaci méiniana fáicanocaiñediaioi. Daje izói jíáima fue gáiana fáicanocaiñediaioi. Daje izói íaioi jiruúrenana féitañediaioi. Daje izói íaioi merírifirenana féitañediaioi.

10

Daa ángel dainámie Juzíñamui abi ímie duera rabénico llíide

¹ Afe méifodo riírede Juzíñamui abi ímie monámona ana bíllana ciódicue. Afémie uíllie cígido bite; íemo afémie ífomo rózígüeo izoide jíina. Ie uiéco jitoma egáiñua izói quenírede. Iemo ie idai boode jáillirai izói éroide.

² Afémie daa duera rabénico tuiñoda llíide. Ie idai nabezi monáillaimo bitade, íemo ie jarífezi éniemo bitade.

³ Iemo jánallari ficire írilla izói ficire úrite. Afémie úrilla mei, mona siete dígacaiño giríde; ie giría come úrilla izói cácaide.

⁴ Afe siete dígacaiño mona giría llíicailla mei, íaioi daina uaillai cúeiacadicue. Mei íadi cúeiacadicuemo monámona daa uai cuemo úrillana cacádicue; daide:

—Afe siete dígacaiño mona giría uaillai rabemo cueñeno iri; báinino comécimo o jóoneri, —daide.

⁵ Afe mei afe monáillaimo naidaide, éniemo naidaide Juzíñamui abi ímie, ie onoi nabezi monamo zitáoide.

⁶ Afe llezica zíñona ite Juzíñamui mámece llíinuano riire úrite. Afe dáaruido énie comútatímie mámece, daje izói monáillai comútatímie mámece, íemo nana afénomo ite cáadinuai comútatímie mámece llíinota riire daide:

—Benómona jaca ja móziñoñelleza.

⁷ Jabe siete dígademona íraímie Juzíñamui abi ímie ie vudugoi fúunolliruimo dúcille llezica, Juzíñamui jica ia comécido báinino mamécáfue, ñue ícoimo zaite. Daií Juzíñamui ie uai jino llórainimo jaiái uícodo llote. Afémaci dani ie ocuífiregano, —aquíe izói daide.

⁸ Naui monámona cue cacana uai nane meine cuemo úrite. Cuena daide:

—Afe éniemo monáillaimo naidáidímie ónoimo ite túide duera rabénico mai llíinuai, —daide.

⁹ Jira afe Juzíñamui abi ímiemo afe duera rabénico jícajidicue. Jicádicuemo afémie cuena daide:

—Llíinota mai güi. Afe duera rabénico o fuemo cíiji naimérena izói cácaite, mei íadi o jébemo erire cácaite, —daide.

¹⁰ Mei jira Juzíñamui abi ímie ónoimona afe duera rabénico llíinota güitícue. Güitícuemo cue fuemo cíiji izói naimere cácaide. Mei íadi afe ja cue güilla méifodo cue jébemo erire cácaide.

¹¹ Afe mei cuena daidíaioi:

—Juzíñamui daina aillo comíni jófuiaimo cómuitífuiai, meine dáanomo llóredioza. Daje izói aillo náiraiaina Juzíñamui dáinana llóredioza. Iemo daje izói jíáiforie úritinona Juzíñamui

dáinana llóredioza. Iemo jiái aillo illáinina Juziñamui dáinana llóredioza, —aquie izói daidíaioi.

11

Uai nabáifirede íaillinoi

¹ Afe mei ápera rázina cuemo itíaioi. Afezi jofu facáradozina eroide. Afezi cuemo fécano cuena daidíaioi:

—Mai náidacaillano dama Juziñamui gairíracu nie dinóride fácaji. Daje izói Juziñamuimo caimátairano o fácaji nie dinóride. Afe llezica afénomo nieze aféniemo caimátaidimacina ite mai fácado.

² Mei íadi afecho jinófebiri facáñeno o iri; mei afeno jicánemacimo dúideza. Afémaci Jerusalén daina íaifuenide jófuenta cuarenta y dos diga fiuido fienu anáfenoitiaoi.

³ Iemo cue dibénedo úrillena uai nabáifirede íaillinoina óreiticue; come zuure ia jítaca jítacuiro, jítaitiaillinoi. Afe íaillinoi mil doscientos sesenta dígaruillai cuendo úritiaillinoi. (Afe mil doscientos sesenta dígarui, cuarenta y dos diga fiui.)

⁴ Bie cue uai nabáifirede íaillinoi ménade olivo amena izóidiaillinoi. Daje izói afe íaillinoi bínie comúitate Juziñamui uícomo jónega mena boode áillue lámpara izóidiaillinoi.

⁵ Dáamie íaillinoina fienu finóacaniadi, afe íaillinoi fuémona irai oréidiaillinoi, afe íaillinoi fáiacadinona náamiena cuarítallena. Nana íaillinoina fienu finóacadinona daí títaiteza.

⁶ Bie cue uai nabáifirede íaillinoimo monámona noci bítañede ríino ite. Afe íaillinoi Juziñamui dibénedo úricaille dinó, nocina bítañeitiaillinoi. Daje izói jainoi díena ória ríino íaillinoimo ite. Iemo jiái comíni duere fínoite nana jacírede duico comúitaja ríino afe íaillinoimo ite. Afe íaillinoi comeci óiaçana dinori comínina duere finórediaillinoi.

⁷ Mei íadi afe íaillinoi tájina fuilla mei, iere jacire éroide caade rille afe fiénide joríaí íbáirafomona jino bite. Jino billano afe íaillinoi diga fúirite. Fuiríllano íaillinoina anáfenoite. Anáfenua mei íaillinoina títaite.

⁸ Íaillinoi tílle mei, cai Ocuíraíma coráinanomo, ní afe Jerusalemo, afe áillue jofue cigi iomo, íaillinoi tíide abi fiénocaigaiiaillinoi. Afe jofue mámece, fienu íllana onótate uaido Sodoma daina. Daje izói jiái Egípto daina.

⁹ Iemo daruíamani átuendo diga jófuiái nairaí afe íaillinoi abi tíllamo acáritiaoi. Iemo íaillinoi abina raitátañeitiaoi. Daje izói dígazie íaillinoi abi bínamo acáritiaoi, naa jiáifodo úritinuiari.

¹⁰ Bíníemo ite comíni afe íaillinoi tíllari iere íóbidiaoi. Daje izói caimare íitiaoi. Afe caimare íaioi íllamona conímamo ráaniaina raiñóñeno fécaitiaoi. Mei afe íaillinoi

Juzíñamui dibénedo úricailla llezica, bimácina iere duere zefuítatiailinoiza.

¹¹ Mei íadi daruíamani átuedo jailla méifomo Juzíñamui afe íaillinoína meine abido cáatate. Iemo meine abido íaillinoína macátate. Iemona íaillinoímo acáritino jamánomo jacínaitiaíoi.

¹² Afe mei afe uai nabáifirede íaillinoí monámona ficírede uaina cacade. Aféuai íaillinoína daide:

—Caífo bené bí, —daide.

Jira íaillinoína éoidino éroidemo, caífo mona uílliedo monamo jáidiaillinoí.

¹³ Afe íaillinoí jailla llezica énie iere riire docaide. Afe riire docáillamona afe áillue jofue diez díganodemona dáagobe nana jáicoizite. Afemona siete mil comini tícoizitiaíoi. Afemona fiébidino iere jacínaitiaíoi. Jacínailano monamo ite Juzíñamuina caimátaidiaíoi.

¹⁴ Méifoide iere jácifue ja záide, mei íadi íraie bille ja raírede.

Siete dígade vudugoi fúunotinomona ja íiraimie fúunote

¹⁵ Siete dígade ángeles dainámaci Juzíñamui abi ímíaiamona íiraimie ie vudugoi fúunote. Fúunua llezica, monámona díga ficire úrilla uailai cácaçailla; daídíaíoi:

—Nana bínie illaini illáimaillano naa íaíoi ocuícánuaíri ja dájena cai Juzíñamuímo, íemo ie Crístomo jaínáitaga.

Iemo afe Cristo jaca ninomo zíñona ócuífireite, —daídíaíoi.

¹⁶ Iemona Juzíñamui uícomo ráide veinticuatro dígade éicomini íaíoi illaíma ráíiranomona ana bíjicaidiaíoi. Uáfueza, afe úrilla llezica éniemo fueco diné bíjicaillano, Juzíñamuina caimátaidiaíoi.

¹⁷ Iena daídíaíoi:

Ona figura daídicaí.

Jamánomo ocuide Juzíñamuidioza.

Birui ítimiedioza, íemo jaiái nanómona ítimiedioza, íemo jíái jaca ninomo zíñona ítimiedioza.

Figura ona daídicaí, mei o áillue ríino maíñódioza.

Máíñuano ja nane como ocuízaidioza.

¹⁸ Náíraíai ícírinaizitiaíoi, mei íadi íaíoi duere o finólliruimo ja dúçzaide.

Daje izói tíidino iere riire o jicánolliruimo ja dúçzaide.

O dibénedo úrite o ocuífíreganomo íaíoiéna o mameca ñúefuiaina íaíoiímo fécaítio.

Daje izói o uaina ñue ínofirede ñue finócanomo íaíoiímo dúide ñúefuiaina fécaítio;

íemo daje izói o mámecina jífánodoíñeno ñue llíinotinomo íítio.

Uáfueza, jamánomoidimíemo,

daje izói jamáimíemo íaíoiímo dúide raana íaíoiímo ífiredio.

Daje izói bínie ñúemacina fiéniruitadino o táinocaitalliruimo ja dúcizaide.

Aquíe izói afe éicomini daidíaiói.

¹⁹ Iemona monamo ite Juziñamui gairíraco tújijicaide. Afénomo Juziñamui comini diga caimare úrira raa uáfori cíocaide. Afe úrira raa emodo órona ibaica caja. Afe eromo Juziñamui lloga uailai éenotíaiói. Afe gairíraco tújijicailla llezica améuai riire llairide, íemo ficíriede ráaniai cacaide; íemo mona ficire giride; íemo énie iere riire docaide; íemo iere mairide nocíjiai cocide.

12

Ringo íemo jacírede zicínaimana eróidimie diga monamo cíocaide

¹ Afe mei monámona jacírede onótate raa cíocaide. Afénomo iníroido ferínua izói, jitómado ferínoga ringo cíoina. Afengo idai anamo fiui cíoina, íemo afengo ifomo doce dígade ucudu illácuifoí, illaíma jitáfíregacuifoí izoide jitáoiide.

² Afe ringo úrue jocóacade izínaila. Afe iere izírenari caillícade; mei afengo úrue jécíacana llezica iere duere ze-fuídeza.

³ Afe méifodo jíaiie jacírede onótate raa monamo cíocaide. Afénomo áillue jáirede jacírede zicínaimana eróidimie cíocailla. Afémie siete diga ifórede. Iemo afémie diez diga zícairede. Afe ifóciaímo illa dígacímo illaíma jitáracuifoí jíina. Daa ie mámece Taife.

⁴ Ie ódado monamo ite úcuaiímona jarífecuduna aillo dánomo jainánote. Jainánuano afécuduaiína ana éniemo dotade. Afe 'dragón' daína zicínaimana éroidimie, afe úrue jocóacade ringo uíécomo jóoneoide, afe ie jocóacaga úrue jócua llezica raire ríllena.

⁵ Iemo afe ringo íza jocode. Afémie uire móonaia nana náiraiíana llojébici izóidedo riire ócuífireite. Afe úrue jócua méifodo Juziñamui bairoca. Bairoda ie illáímana ráíiranomo uiga.

⁶ Afe llezica afe ringo táizicimo botade. Afe dinomo afengo retáirillino uícodo Juziñamui finoca. Afénomo mil doscientos sesenta diga mona afengo ecáecaille.

⁷ Afe méifodo áillue fuiríacana caífo mona eromo comuide. Afénomo Juziñamui abi imaci illaíma Miguel naa jíaiie Juziñamui abi imáciari afe dragón diga fuirídíaiói. Daje izói afe dragón naa ie abi imáciari fuirídíaiói,

⁸ mei íadi afémaci Miguel náiraiíana anáfenonidíaiói. Iemona dragón imaci illino monamo íñede.

⁹ Afe ie illino iñena jira afe riirede dragón monámona ja jino dotaca. Afe jaiái ninomo ite jaio dainámie jiáifodo mameina Taife, íemo Satanás, íemo dáamie nana náiraina jífuefiredimie. Afémie naa ie abi imáciri ana éniemo dotácaiaioi.

¹⁰ Afe méifomo monámona ficirede uaina cacádicue. Afe uai daide:

—Cai Juziñamui bínie comini jilloillena mámiarui mo ja dúcide. Daje izói íemo ite riino facálliruimo ja dúcide. Iemo daje izói illáimana ie illíruimo ja dúcide. Daje izói ie jitó Cristo riire ocuálliruimo ja dúcide. Mei cai ámatiaimo fiénidifue nitáfiredimie ja jino dotácaza. Afémie nágaruillai, mona naio diga cai Juziñamui uiécori afémacimo fiénidifue nitáfiredie.

¹¹ Cai ámatiaí Cordero díedo fiénidifuená anáfenodiaioi. Daje izói íaioi jino meáiruñeno lloga Juziñamui uáillaído caifófeficaídiaioi, mei jaca túillana jacíruiñediaioiza; mei jiáifodo jaca túillemo ñue finóbidiaioiza.

¹² Iemona, mona naa afénomo ite cáadinuiaíri mai omoi íóbiri. Mei íadi éniemo itino nii dúerena, naa monáillaimo itínuiaíri, mei Taife ómoimo ana iere icírillano jáideza. Afémie nano íanori ie íllena onódeza.

¹³ Afe dragón ana éniemo ie dótajana onóillano, nauí íza jocódingo racade.

¹⁴ Mei íadi afe ringo mena áillue máajaiño íaicona iga, áfedo afe jaio dainámie dragómona jica táizicimo afengo féellena. Afénomo daámani fimona átuedo afengo ecáecaiga.

¹⁵ Iemo jaio dainámie áillue jainoi ie fuémoma orede, imánina comuillena, mei afe imánido afe ringo coróbaitallena.

¹⁶ Mei íadi énie ringona riídote, mei afe dáaruido énie bóccaillano, afe dragón fuémoma oreca imánina naítateza.

¹⁷⁻¹⁸ Afe bíemona afe dragón ringomo iere riicaide. Riicaillano aféngomona fiébide ie erófene igímaiaí diga fuírizaide. Afémaci Juziñamui ocuica uallai jeire otíaioi. Daje izói afémaci Jesucristo lloga ua ráfuená fáicanocaiñeno nágarui jeire ófirediaioi.

13

Mena áillue jacire eroide rille cíocaide

¹ Monáillai fuédamo cue naidáillano monáillaimona iere jacire eroide rille caífo bíllana cíódicue. Afémie ífo siete dígade, daje izói afémie diez diga zícairede. Afe illa diga zícaimo illaíma jítaracuífoi jíina. Afémie ífóciaímo Juziñamuina fiéní daina mámece cúeina.

² Afe cue cíona jacírede rille jánallarína eroide. Ie ídaiaí oso ídaina eroína, íemo ie fue león fuena eroide. Bíniemo dragón

íemo ite ríino naa ie illáimaillano diga afémiemo fecade. Afe llezica riire ocuífirenafue afémiemo lloga.

³ Afe jacírede rille ífóciaimona daaci titade áillue boáfena eroide illa. Mei íadi afe titáacade áillue boafe raire jacaide. Iemona nana énie náiraiaí áferi iere jacínaitiaíoi. Jacínaillano afémiemo ínotiaíoi.

⁴ Afémaci dragón uícomo éniemo fueco diné bíjicaillano íemo caimátaidiaíoi, mei dragón riire ocuille ríino afe jacírede ríllemo ígaza. Iemo daje llezica jacírede ríllemo caimátaidiaíoi. Caimátaillano daidiaíoi:

—¿Bu mei bie jacírede rille izoina? ¿Bu mei afémie diga fuirírena? ¡Afémie anáfenonide! —daidiaíoi.

⁵ Afe llezica afe jacírede rille afémie úrilla bu llétañega. Iemona Juzíñamuina íaire daina uaina llote, naa fiени abi ínuafuiaíri. Afe izóí cuarenta y dos diga fiui, daíí ie ocuilla buna ráiruiñega.

⁶ Iemona afémie bie izóí finode; Juzíñamuina uáitano, ie mámecina íaire daííoide. Daje izóí Juzíñamuimo úriranona íaire daííoide. Iemo monamo itínuiaína daje izóí íaire daííoide.

⁷ Iemo jíái daje izóí Juzíñamuimo jaináidino diga ie fuirilla buna ráiruiñega. Daje izóí afémaci ie anáfenolle buna ráiruiñega. Iemo nágazie ocuille ríino afémiemo fecaca. Daje izóí nana comíni jófuaíi ócuífireite, íemo daje izóí nana jíáfodo úritínuiaíi ócuífireite, íemo daje izóí nana náiraiaína ócuite.

⁸ Nana bíniemo itino afe jacírede ríllemo caimátaidiaíoi. Afémaci mámeciaí zííñona ítino rabénicomo cúeñega. Ua énie taineina llezica baimaci mámeciaí afénicomo cúeñega, mei afémaci íñoñena jira. Afénico nauí titaca Cordero ie.

⁹ Bífuemo cacácadímie mai bíemo cácarei.

¹⁰ Jíáímacina maitá uitino méifodo nane maitá uille. Iemo jíái lloéfaido jíáímacina titáidino méifodo afémie daje izóí lloéfaido titalle. Mei jira Juzíñamuimo jaináidino comécina járidonidiaíoi; daje izóí jíái ñue ínorediaíoi.

¹¹ Afe méifodo jíáie jacire eroide rille éniemona caífo bíllana cíódicue. Afémiemo mena zicai ite; cordero zícaina eroide. Mei íadi afémie dragón úrilla izóí úrite.

¹² Nauí monáíllaimona bite nanoide jacire éroide ríllemo ite riire ocuille ríino, daje izóí bie méifoidímie ite. Iemo nanoide jacírede rille uícori, bímie íemo ite ríino ácatate. Ie ríino ácata llezica afémie nana éniemo itínuiaí, nanoide jacírede ríllemo caimátaillena ocuide. Afe nanóidímie ífomo ite áillue boafe raire jacáidímie.

¹³ Iemo afe méifoidimie daje izói iere jácimie daiitate raana ciótate. Mei uafue, afémie nana comini eróicana monámona iraiçi ana éniemo cocítate.

¹⁴ Iemo afe nanoide jacírede rille uícomo buna ráiruiñega ie finócaigado nana biniemo itínuiaina jífuete. Afémacina jífuiano afe aillo bofédaite jacírede rillena eroide jánaraina afémacina finótate. Afe bofédaite jacírede rille lloéfaido aillo bofeca, mei íadi nai caade.

¹⁵ Iemo afe méifoide jacírede rillemo, afe jánarai cáatalle riino iemo iga. Iemona afe jánaraina cáatano, afémie afe jánaraina úritate. Daje izói nana afe jánaraimo camátaiñedinona afe jacírede rille jánarai íaiõina fatátate.

¹⁶ Nana afe baimo, nana náiraiaina bie izói itátate; nana jabóidimaci naa jamánomoidimiai diga, nana ráaredino naa dúredino diga, nana ráiruiñegano naa rairuícano diga, íaiõi onõi nabézimo daa onótate número jóonetade. Afe onótate número nabézimo jóoneñenia íaiõi ozócimo jóonerede.

¹⁷ Naga afe onótate númerona cúeñegamie jaca ibárinide, daje izói raana fecánide. Afe número nanoide jacírede rille ie. Afe número aféniemo dúide mámeçi daiíacade.

¹⁸ Bifue onóillena iere báitajamo dúide. Afena onódimie, mai afe jacire eroide rille número faca. Afémie número iima ie. Afe número seiscientos sesenta y seis.

14

144,000 dígadino roga rua

¹ Afe méifomo Cordero Siõn mameina idu emódomo naidáinana ciódicue. Afénomo afémie diga ciento cuarenta y cuatro mil comini naidáiede. Afémaci ozócimo Cordero mámeçi naa ie Moo mámeçi diga cúeina.

² Iemo monámona ficírede raana cacádicue. Afe ficíreña aillo imánillai nofíco tua ficíreña izoide. Jiái riire mona giria ficíreña izoide. Iemo jiái aillo arpa daína, rua roia taiga ráaniai ficíreña izoide.

³ Afe lleziça illaima ráirano uícomo afémaci comue rua rotíaiõi. Daje izói cuatro diga cáadimiai, iemo éicomini uícomo rotíaiõi. Afe rúana jaca buna ónide. Dani afe ciento cuarenta y cuatro mil diga éniemona jíllode comini afe rúana onona.

⁴ Afe bimaci ringomo jíriñedino, mei afémaci jaca íaifuenidino; dani íaiõi abi rairuídíaiõi. Daje izói afémaci Cordéromo jáináitagamaci. Afémaci comínimona jíllotagamaci, Juziñamuiimo nanóidino ie dúidimacina íaiõi illena. Daje izói Cordéromo nanoide dúidino itíaiõi.

⁵ Afémaci jaca táinona úriñediaioi, mei afémaci Juzíñamui illáimana ráirano uícori íaifuenino itínoza.

Daámani ángeles dainámaci Juzíñamui abi ímíai llócaiga uai

⁶ Afe mei jíáie Juzíñamui abi ímie mona dáafenedo féiana ciódicue. Afémiemo zíñona jílloliuai illa, bíniemo itínomo llóllena. Nana énie náiraiamo llórede, íemo nana jíáziemo. Daje izói nana jíáifodo úritinomo llórede, íemo daje izói nana comini jófuiáido.

⁷ Afémié ficírede uaido daide:

—Juzíñamuina ñue omoi jacírui; ñúefuiaina afémiemo omoi nitari, mei afémié iere riire jicánolliruiamo ja dúcideza. Mai mona finódimie, daje izói énie finódimie, íemo monáillai finódimie, íemo éniemona jainoi jino torano finódimie; afémiemo omoi caimátaifireiri, —daide.

⁸ Iemo nane jíáie Juzíñamui abi ímie méifodo cíocaide; afémié daide:

—Ja jáicoizite, ja jáicoizite. Afe áillue Babilonia jofue jáicoizite. Mei aillo fiénide jiruífuiái izoide íaifuiái omoi fínofirenado, nana nairai jífáidino izói itátatiomoiza, —daide.

⁹ Afe méifodo íraie Juzíñamui abi ímie ficire daífoicaide:

—Dáamie jacírede ríllemo caimátaiadi, íemo jíái afe jánaraiamo caimátaiadi, íemo daje izói afe rille mámecei ozócimo ninena ónoimo cuetátaiadi,

¹⁰ afe izóidino Juzíñamui lloga jamánomo duere finóllinomo orélliaioi. Mei afe izóidinomo afémié iere ríicaide; ríicaillano afémié duere íaioi finolle, féíñellena riire íaioimo mamécaza. Iemo Juzíñamui abi imaci uícomo, daje izói Cordero uícomo, iraido íaioina iere izi cácatalliaioi. Iemo daje izói nairai iere uzire cóonaitalle raado afe izóidinona iere izi cácatalliaioi.

¹¹ Duere íaioi zefuítate irai uíllie jaca ninomo llícaíñeno caifo uíllioide. Afe jacírede ríllemo caimátaitino mona naio diga afe duere finóinamona jaca ócozinaiñeitiaioi. Afémaci naa afe ríllena eroide jánaraiamo caimátaidinori, íemo jíái ie mámeceina onótate número otino diga nana jaca ócozinaiñeitiaioi.

¹² Mei jira Juzíñamuimo jainaide ie ocuica uaimo jíéruitino, naa Jesudo fáicanocaiñede jáidino diga, comécina járidonidiaioi.

¹³ Nane afe méifomo monámona daa uai cuemo úrillana cacádicue; daide:

—Bie cúeiri: “Benómona cai Ocuíraimamo ínote títino caimare íitiaioi.” Afena Juzíñamui Ñuera Joreño “Jii” dáideza, mei afémaci íaioi táijinamona ocózinaitiaioiza. Daje izói íaioi finócano, jíáima diga nabáirilla izói féitañegaza, —daí daide.

Ria llizilla óina izói, énie comini jofo ollíruimo dúcide, Juzíñamui duere íaiói finóllena

¹⁴ Afe mei eróllano úzerede mona ero uílliena ciódicue. Afe uíllie emódomo Nanoide fima Jitona Jesuna éroidimie ráiina. Ie ifomo oro finoina illaíma jitáracuifoí jíina. Daje izói hozna mámecirede arroz izoide llízie ñetara llíide. (Afe raa jofo icuífoina néfide jáirede lloefai izoide.)

¹⁵ Iemo nane jíaíe Juzíñamui abi ímie ie gairíracomona jino billa. Afémie ficírede uaido uíllie emódomo ráiidimiena daide:

—O llíiga llízie ñetara raado táijiri. Ja jeede díga mai jofo ono. Ja jofo ollíruimo dúcideza. Enie comini finócafuiaí ja jeede ríaniaí izói fiénidífueña iere oruídeza, —daide.

¹⁶ Afe mei uíllie emódomo ráiidimie ie llíiga llízie ñetara raado énie comínimo táijizaide. Afedo fiénidífueña oruídino jofo ote.

¹⁷ Afe mei jíaíe Juzíñamui abi ímie monamo ite Juzíñamui gairíracomona jino bite. Daje izói afémie jáirede llízie ñetara raa llíicabite.

¹⁸ Afe llezica jíaíe Juzíñamui abi ímie Juzíñamuimo caimátairanomona jino bite. Afémiemo jobáitalle ríinona ite. Iemo afémie, jáirede ñetara raa llíidimiena ficire jírillano daide:

—Mai omo ite jáirede ñetara raado táijiri; éniemo ite jírigoillai ollíruimo ja dúcideza. (Afe jírigoillai fiénide comini jana.) Mai jofo ono, mei afe jírigoillai ja iere jiduúdeza, —daide.

¹⁹ Iemo afe jíaíe Juzíñamui abi ímie, ie jáirede ñetara raado énie comínimo táijizaide. Afedo éniemo ite jeede jírigoillai izoide fiénidino jofo ote. Uano áillue iduíriraco izóidinomo jofo dite, afénomo riire iduíllena. Bie iduilla Juzíñamui bie izói duere afémacina finolle jana.

²⁰ Afe jírigoillai izoide fiénidino áillue comini jofue jinomo iduica. Afe iduíracomona aillo díena tote. Afórede imani izoide; áfeji caballo táia ie fue illa dinori afórede. Daje izói áfeji trescientos kilómetros dinó tote.

15

Iraie siete dígade jacírede duere finóllifuiái Juzíñamui abi imaci mameca

¹ Iemo monámona jíaíe jacínaitade áillue raa jánana ciódicue. Siete dígade Juzíñamui abi imaci íraie siete dígade jacírede duere finóllifuiái lluaíbitiaíoi. Afedo Juzíñamui ríicaillana záaite.

² Daje izói, vídriona finóinana eroide monáillajina ciódicue. Afeji réici diga taméricaide; daí eroide. Jacírede ríllena anáfenodino afe fuédamo naidáiediaíoi; daje izói ie jánaraina anáfenodino; íemo jíái afe ie número mámecina ozócimo cúeñegano diga. Nana dáanomo afe vídriona eroide monáillai fuédamo naidáiediaíoi. Nana bimaci Juzíñamui íaíoi mo fecaca ‘arpa’ daina rua roia taiga raa llíiediaíoi.

³ Afémaci Juzíñamui jaíai ocuífirgamie Moisés rua rotíaíoi. Daje izói jíái Cordero rua rotíaíoi. Aférua bie izói daide: Ocuíraima, nana o finócanuíai iere ebíriede.

Jamánomo ríinorede Juzíñamuidio.

Náiraíai Illaíma, nana o jáifirena io uáfuenta jaícina jóide.

⁴ Ocuíraima, ona ñue jáciruíñeitimiena íñede.

Daje izói omo ñúefuena jóoneñeitimiena íñede.

Mei dama o íaífuenidimienaza.

Naga náiraíai omo caímátaizabítiaíoi, mei o jaícina finófirregafuíaina ciódiaíoi za.

Aquíe izói rotíaíoi.

⁵ Bie méifodo, monamo ite Juzíñamui gairíraco tújicaillana ciódicue. Afeco nofíbicimo cuela Juzíñamui ocuica uailai éenorano.

⁶ Afécomona Juzíñamui siete dígade abi imaci jino bite. Afémaci siete dígade jacírede duere finóllifuíai uite. Afémaci ráifide íáinide queníredicuiruai jítaíodiaíoi. Íaíoi llaitáoi ga oro finoína ciraigi ífe jogóbemo dúcide.

⁷ Ie mei cuatro dígade cáadimíaimona dáamie afe siete dígade Juzíñamui abi imácimona illa dígamíemo oro finoína ichecoí fecade. Aféhecoí jaca ninomo zíñona ite Juzíñamui ocuica duere finóllifuena oruide.

⁸ Íemo afe Juzíñamui gairíraco uílliena oruide. Afe uíllie Juzíñamui jamánomoidimiena íllamona, daje izói ie iere ríinorenaymona comuide. Afe llezica afécomo buna jofo jáinide. Nai afe siete dígade Juzíñamui abi imaci siete dígade jacírede duere finóllifuíai záíñena llezica buna jofo afécomo jáinide.

16

Juzíñamui duere finóllifuena oruide ichécuai

¹ Afe mei Juzíñamui gairíracomona jino bite ficírede uaina cacádicue. Afe uai siete dígade Juzíñamui abi imácina daide:

—Juzíñamuimona bite siete dígade duere fínuana oruídichecuai ana éniemo tótaji, —daide.

² Nanoide Juzíñamui abi ímie jaillano, afémiemo ite icheco: ana éniemo totade. Afemona nana jacírede rille mámecina ciegánomo jacírede duico comuide. Afémacimo izírede jílloañede ñozagi izoide duico comuide, daje izói afe rille jánaraimo caimátaifiredinomo.

³ Iemo méifoide Juzíñamui abi ímie afémiemo itícheco: monáillaimo totade. Tótamona afe monaillai jainoi tídimie die izói jaide. Iemona nana monáillaimo ite cáadinuiai tícoizite.

⁴ Iemo nane jíáie Juzíñamui abi ímie afémiemo itícheco: imánillaimo, daje izói éniemona jainoi jino toránuaimo totade. Iemona afeno jáinoillai díena jaide.

⁵ Afe mei jainoi fieni finótate Juzíñamui abi ímie dánana cacádicue; daide:

—Ocuíraima, íaifuenide Juzíñamuidio. Bie izói comini duere o finóllena iere comécina jaícina jóidimedio.

⁶ Mei omo jaináidinona títano íaioi díena nauí totádiaioiza. Daje izói o dibénedo úritino díena totádiaioiza. Iemo birui afe ibana o afémacina díena jirótatio, mei daíí afémacimo dúideza.

⁷ Afe mei nane Juzíñamuimo caimátairanomona dámie dánana cacádicue; daide:

—Jii, uáfueza, cai Ocuíraima, o jamánomo riírede Juzíñamuidio. Uáfueña ñue jaícina iere riire jicánotio, —daide.

⁸ Ie mei nane jíáie Juzíñamui abi ímie afémiemo itícheco: jítómamo totade. Afemona afe jitoma comini cóonaitalle ríino iga.

⁹ Iemona nana comini jamánomo cóonaitaiaioi. Mei íadi íaioi comeci itífuiaina méidoñediaioi. Daje izói Juzíñamuimo caimátaifediaioi. Mei jíáfodo afe jacírede duere finóllifuiái ocuidimiena faidófirediaioi.

¹⁰ Iemo nane jíáie Juzíñamui abi ímie afémiemo itícheco: jacire eroide rille illáimana ráiiranomo totade. Afe llezica afémie náamataga illano jítirecaide. Iemona nana comini afe uícodo íaioimo comuide dúicuai izírenari daní abi ainízitiaioi.

¹¹ Mei daíí itíaioi íadi, íaioi finoca fiénidifuiái fáicanocaiñediaioi. Mei jíáfodo, izi íaioi cácana ícoina, daje izói jacire íaioi ñozánaillamona, monamo ite Juzíñamuina íáire daidíaioi.

¹² Iemo nane jíáie Juzíñamui abi ímie afémiemo itícheco: áillue Eufrates mámecirede imánimo totade. Afemona afe imani zafénaite, áfedo illaini raire ruica bille io tuiñóllena. Aféllaini naa íaioi fuirírainiri jitoma caifo biránomona bitíaioi.

13 Afe mei dragón dainámie fuémoma, daje izói jacire eroide rille fuémoma, daje izói taino uai jino llófredimie fuémoma daámanide cúuraicina eroide fiénide jóriai jino bíllana ciódicue.

14 Afe daámanidino Taife jóriai. Afémaci ciórainina raana ciotafiredino. Bie damieámanidino nana énie illaini naa íaiói fuirírainiri dáanomo gairítate, jamánomo ríinorede Juzíñamui diga fuirillena. Aferui Juzíñamui aillo iba ollirui.

15 Aféruído monámona Cristo úrillana cacádicue; daide:

—Ero, cacai. Merírizaibitímie billa izói, comini nai cuemo comeciñediaioimo déizaibiticue. Cue bille llezica iníñeno cuemo comeci facáoidimie caimare íite. Daje izói emuíroma mácañeillena iníroina ñue úiñotímie izói, íaifuemona abina ráiruitímie méairuíñeite, —daide.

16 Iemo afe daámanide fiénide jóriai, nana illáinina dáanomo gairítate. Afeno mámecei hebreo uaido daina Armagedón.

17 Iemo siete dígademona íraie Juzíñamui abi ímie afémiemo itíchecei caifo táifomo totade. Tota llezica monamo íte gairíracomona ficírede uai cácaide. Afe uai illaíma ráíiranomona jino bite; daide:

—Ja fuite, —daide.

18 Afe méifodo, améuai llairilla. Mona gíría naa ficíriede ráaniai diga cácaide. Afe llezica énie iere riire docaide. Nanómona bíniemo comini ía docáifirena baímo, jamánomo riire docaide.

19 Iemona afe áillue comini jofue daámami díeze bójicaide. Jiáie bíniemo íte jofue jáicoizite. Afe llezica Juzíñamui áillue Babilonia jófuemo úibicaide, duere íaioina finóllena. Afe duere finóllifue comini títaite ríiji jírua izói íite. Afémie ríicaillano daí íaioina fínoite.

20 Afe dáaruído nana monáillaji cigi íduai naa jiáie caifóneduairi niné táinocaide.

21 Afe llezica aillo jéerie nocíjiaina monámona comínimo cocide. Aféjiaimona dáarie cuarenta kilos méere. Iemona afénoimo íte comini afe áillue nocíjiaí cóciari Juzíñamuina íaire daidíaíoi, mei afe bimaci duere fínua íere jamánomoideza.

17

Jamánomo jiruúredingo duere finóinafue

1 Afe méifomo siete dígachecoí llíide Juzíñamui abi ímácimona dáamie cuemo úrizaibite. Cuena daide:

—Eróizaibi. Jamánomo jiruúrede izoide íaifueredingo duere finóinana omo ácataiticue. Afengo monáillajillaímo íte. Afe bie izói daíacade aillo naírai afengo anamo itíaiói.

² Bínie illaini afengo diga aillo fiénide íaifuiái finófirediaíoi. Iemo bínie comini afengo íaifuerenamona jifáifiredino izói íaire jáidiaíoi, —daide.

³ Afe mei Juzíñamui Ñuera Joreño nicáirilla izói cuemo ácataja llezica, daa Juzíñamui abi ímie táizicimo cue uite. Afénomo daa ringo jáirede jacire eroide rille emódomo ráinana ciódicue. Afe rillemo diga Juzíñamui íaire daina uaillai cúeina. Afe rille siete diga ifócirede, daje izói afémie zicai diez dígade.

⁴ Afe ringo jitáoi gacuiro jáirede, íemo morádonna eroide. Afengo oro finoina íena ebire finóbide, íemo ráifide ñue finoca noficiaina, íemo ‘perla’ daina zíriona finóbide. Iemo afengo oro finoina ichecoí llíide. Aféchechoí íairede raana oruide, íemo jáíi afengo jiruína llezica finoca íaifuiaina oruide.

⁵ Afengo ozócimo cuetá jónega ónonide mámece illa. Afeci bie izói daide: “Aillue Babilonia jofue, nana fiénidifuiái jillaci, aféfuíai ei daina izói mameide. Iemo nana bíníemo ite éoigafuiái ei daina izói mameide.”

⁶ Iemo diga Juzíñamuimo jaináidino afe ringo ícoínia fazícaiaíoi. Afémaci Jesús uai llócaína jira afengo titácaiaíoi. Iaiíoi fazícanori afengo, come jifáifirena izói, iere íóbide. Afena cíoillano iere jacire fáigacaidicue.

⁷ Ie jira Juzíñamui abi ímie cuena daide:

—¿Minícari jacínaitio? Afe ringo ónonino daííacanafue jino omo onótaiticue. Daje izói afengo uífirede jacírede rille maméinafuenta omo onótaiticue. Afe rille ifo siete dígade, íemo diez diga zícairede.

⁸ Afe o ciona jacírede rille jaiaí nino itímie, mei íadi ie tílla mei jae íñede. Mei íadi afémie íraicaiño ie tílle uícodo meine abido fiénide joríaí íbáirafomona caífo bíite. Mei íadi billano zííñona ie duere finóllinomo orelle. Eníemo ite comínimona zííñona ille rabénicomo énie taineína llezica mámeceína cúeñegano, afe ríllena cíoillano iere jacínaifcaítaíoi, mei afémie jaiaí íteza, íemo birui jae íñédeza, íemo meine abido uire bíiteza.

⁹ Birui cai uaina féiruiñedinomo nai benó jáíie llollífuenta ite: Cácarei. Afe siete dígade ifóciaí baie ringo ráina siete dígade caifóneduai jana.

¹⁰ Iemo afe llezica afe siete dígade ifoci daje izói siete dígade illaini jana. Afe siete dígade illáinimona cinco diga ja dotácaiaíoi. Afe mena fiébidemona daa nai illáimana ite. Iemo jáímie nai illáimaizaíbiñede. Afémacimona íraíllaíma bíadi are íñeno táinocaite.

¹¹ Naui caade íocirede rille, tíide íadi, nane birui caade illaíma. Afémie siete dígademona afémaci emódoídillaíma. Mei íadi afémie siete dígademona dáamie. Afe mei afémie íiraicaiño ie tíllinomo jáite.

¹² Afe o ciona diez dígade zicai, diez dígade nai illáinina jáíñedino jana. Mei íadi jacírede rille díga dáaruido afémaci nano íanori dieze illaini ocuífírena ríino lláinoítiaíoi.

¹³ Bie diez dígade illaini conímamo daje izói comécíidiaíoi. Iemo íaíoi mo ite ocuille ríino jacírede ríllemo fécaítiaíoi.

¹⁴ Iemona Cordero daína Jesucristo díga fúírítiaíoi; mei íadi Cordero íaíoi na anáfenoite. Mei afémie nana ocuídínomona Jamánomo Ocuídímieza. Daje izói afémie nana illáinimona Jamánomoidillaímaza. Afémie díga jáicadino Juzíñamui nízeda jáírígano. Daje izói afémaci fáicanocaiño Juzíñamuimo ñue íínofíredino, —daí afémie cuena daíde.

¹⁵ Juzíñamui abi ímie nane dáanomo cuena daíde:

—O ciona monáillajillai, níi afe íaífuere díngo illano, afe monáillajillai aillo jófueníai jana. Daje izói aillo comíni jana, íemo jáíforíe úrítino jana, íemo aillo náíraíai jana.

¹⁶ Jacire eroide ríllemo o ciona zícainíai jáíie illáímaíai jana. Afémaci bie járuíredíngona éoitiaíoi. Eoillano aféngona zóofeítiaíoi, íemo jáí aféngona emuírogi óreitíaiíoi. Afe mei afengo íeizína rítiaíoi. Iemo jáí aféngona iraimo cóonaitaítiaíoi.

¹⁷ Juzíñamui comeci jítaina izói afe ringona duere íaíoi finóllena ónonino íaíoi comécímo úrite. Ie jira dájena comécíidiaíoi íaíoi mo ite jacire ocuille ríino jacírede ríllemo fecállena. Iemona afémie jamánomo ríirede. Daí Juzíñamui daína uáíllána fuillíruimo dúcia llezica finófírediaíoi. Iemona afémie daína uaina ñue ícoímo záítatíaiíoi.

¹⁸ Afe nauí o ciona járuíredíngo, nana énie jamánomo ocuífíredíllama illágo be jana, —aquíe izói daíde.

18

Babilonia jofue táinoicaílla

¹ Bie méfodo monámona jáíie ángel daínámie, Juzíñamui abi ímie ana bíllana cíodícué. Afémie aillo ríino díga bite. Afe llezica ie quenire bóodedo bínie egáíñote.

² Afe llezica afémie ficire úrite; daíde:

—Aíllue Babilonia jofue ja jáicoízite, ja táinoicaíde. Taífe ocuífíregano illánona jaíde. Daje izói nana jáíforíede íáírede jóríai uíñoracona jaíde. Afe izói nana íáíre féedíno jílláíllinona jaíde, naa jáí caí éoíga féedínuaíri.

³ Mei aillo fiénide íaifuiái afengo finófirenado, nana nairái jifáidino izói itíaióiza. Iemo naga énie illaini afengo diga aillo jiruífue izoide íaifuiaina finófirediaíoi. Biniemo ráaniai fecáfiredino iere úcuberedinona jáidiaíoi. Mei uafue, afe áillue jofue comini izire jicaca táinomo faitátate ráaniai íaiói jicáfirenmona bimaci aillo úcubenaídiaíoi.

⁴ Afe mei monámona jíáie uaina cacádicue; daide:

—Omoi cúeiediomóiza bie jófue mona oni omoi jai; íaiói finoca fiénidífue afémaci fínua izói omoi fínoñeilleza. Daje izói íaióimo zúite jacíredífuiái ómoímo jíriñelleza.

⁵ Mei afémacimo ite fiénidífuiái ofilla ja monamo dúcidez. Íaiói finoca fiénidífuiáimo Juzíñamui ja uíbicaideza.

⁶ Iemo Juzíñamuina daide:

—Jíáimacimo íaiói feca izói, afe izói íaióimo fecari. Íaiói fiéni fínua izói, afe baímo ménacaiño afémacimo finori. Afémaci ñúemacimo eríredena jóoneta jirota izói duere íaióina finódiaíoi. Afe íaiói fínua izói, afe íbana ménacaiño afémacimo riire duere íaióina finori.

⁷ Aillo táinodo abi íaiói ínua dieze, íemo cómena canóñedemo fáififirena dieze, áfeze afémacina duere finori; afe izói íaióina duere zefuítari. Mei bie ringo izoide jofue comini afengo ie comécido daiífiredeza: “Benomo illáingona ráiidicue. Jaca fécinaíñeíticue; jaca dúeníticue,” —afengo daide.

⁸ Ie jira bie izói úrillamona, dáaruído omo dúide jacíredífuiái cómuíte: tília íemo duere zefuilla, íemo júbie. Iemo iraimo cóonaitio. Mei o duere finótate Juzíñamui jamánomo riinoredeza. Afémie jaca cai Ocuíraíma.

⁹ Afengo diga jiruírede bínie illáicomini, daje izói afengo diga cómena canóñedemo fáifidino aféngori iere éenaitiaíoi. Mei uafue, afengo cónaila uílliena cióillamona aféngori cáillicailli éeítiaíoi.

¹⁰ Afengo iere duere finóinari jacínaillamona oni jica íítiaíoi. Afemona dáítiaíoi:

—¡Aii, ñii o dúerenal! Jamánomo riirede Babilonia jófuedio, jñii duere o zefuilla! ¡Mei raire dáaruído o duere finoina comuíbicaide! —dáítiaíoi.

¹¹ Bínie ráaniai fecáfiredino aféngori cáillicailli éenaitiaíoi, mei ja íaiói atica ráaie íbaitino íñede.

¹² Íaiói atífirega ráaniai, be ñie: Oro, plata, ráífide noficiai, ‘perla’ daina ráífide zírío, ráífide úzecuero, íemo jíairede ‘sédacuiro,’ morádon a eroide seda diga, íemo jíái diga jíáifodo zióriede aménaíai, íemo ebírede ‘marfil’ daina elefante zicai finoina ráífide raana, íemo ráífide amena finoina raa, íemo

'bronze' daina borárede lloébici finoína raa, íemo jamai lloébici finoína raa, íemo 'marmol' daina nofici finoína raa,

13 daje izói 'canela' daina güüllemo faiga raa, íemo jáíforie ráifide ziórede raa, íemo ziórede uguci, íemo 'mira' daina ziórede raa, íemo come abi jilláiraniai, íemo 'vino' daina jirórají, íemo cáiredíj, íemo ñuera pan finófírena harina, íemo trigo, íemo daje izói abífirede cáadino, íemo ovéjaiai, íemo cabálluai, íemo 'carros' daina arínellai, daje izói jacire rairuica comínina fecádiaioi. Bie izói daina cáadino iima ringo diga jáímacimo fecádiaioi riire íaioi ocuüllena.

14 Afe jofue comínina dáitiaioi:

—¡Baie omoi gaiga caimárede amena llizíllaniai izoide ráaie jae ñede. Nana omoi ofítaga ebíriede ráaniai ja táinocaide! — dáitiaioi.

15 Afe ráaniai fécajano iba úcube ófiredino bie áillue jofue comínimona otíaioi. Uano aillo úcuberediaioi. Mei íadi aféruido afe jofue iere duere finóinari jacinaillamona oni jica íitiaioi. Afénomona aféngori cáillicailli éeitiaioi.

16 Iemo dáitiaioi:

—¡Aii. Aillue jófuedio ñii dúerena! Naui ñuera ráifide úzecuiro jítádingo izóidio. Daje izói o comíni jáirede ráifide ñiroi, íemo morádoná eroide ráifide ñiroi jítáfrediaioi. Afe llezica oro íena finóritiaioi; daje izói ráifide nofici finoína raana finóritiaioi, íemo jáí 'perla' daina zíriona jítáfrediaioi.

17 Iemo dáaruído naado aillo ráaniai niné táinocaide.

Daje izói nana 'barco' daina áillue nocáe ocuídillaini, naa afécaedo jáidino diga, áfena jacíruillano oni jícarié itíaioi; daje izói afécaedo táijidinori naa jáífodo monáillajimo táijide comíniri oni jícarié itíaioi.

18 Iemo afe jofue bóua úilliana cióillano caillídiaioi:

—Bie izoide naui áillue jófuena, ¿Ñinomo cíoiticaí? Bie izoide jofue jaca ñeite, —daidíaioi.

19 Iere zúucaillano íaioi ifomo énie júdaidiaioi. Daií ñiano cáillicailli éediaioi. Daidíaioi:

—¡Aii! ¡Aillue jofue ñii dúerena! Nana monáillajido ráaniai fecáfiredino afe ráaniai o comíni úamona afémaci aillo úcuberediaioi. ¡Mei íadi dáaruído afe áillue comíni jofue ja niné táinocailla! —daidíaioi.

20 Afe mei áfena ciódimie daide:

—Monamo itínuiai, mai afe áillue jofue táinocaillari omoi íóbiri. Uáfueza, Jesucristo orécana, naa Juzíñamui dibénedo úritinori mai íóbiri, naa Juzíñamuimo jaináidino diga. Mei Juzíñamui afengo niné táinocaitajado, omoi duere zefuítaja ñue jaícina iba ote, —daide.

21 Afe mei riírede Juzíñamui abi ímie áillue nofici caifo raiñode. Afeci áillue ‘molina’ daina trigo llaira mérede nofici finoína eroide. Caifo ráiñuano afécina monáillajimo dotade. Dótajano daide:

—Afe bie izói áillue Babilonia jofue ana cáicoizite, ímona jaca ninomo meine cíõeille.

22 Benómona jaca o cígido joide iomo ‘arpa’ daina rua roia taiga raa rúaniaina meine cácaiñeille. Daje izói totíbacui uai naa bainada uai diga ja meine cácaiñeille. Afe izói nana jíáíforie táijiana baitádinomona buna fiébiñena. Iemo daje izói dobérilla ficírena izói ‘molina’ daina nofici uaina cácaiñeille.

23 Afe daje lezica o jófuiái eromo bóofírede mechera izói boode ráaniai abido bóoñeite. Iemo aféruimo áirena lezica iráizie caimare ficírerie íaioi úrilla uáillaina meine jaca cácaiñeille. Mei nauí omo ite ráaniai fecáfíredino bínie comínimona jamánomoidiaioi íadi, ja biruí afe caimárede uailai cácaiñeille. Nauí aféruimo aimá bífuefirena uai izóidedo náiraiaina jífuefíredio; mei íadi afe jífuefirena ona nabáiñede.

24 Mei uafue, afe o jofue cígimo Juzíñamui dibénedo úrifíredino díena ciona. Daje izói Juzíñamuimo jaináidino naa jíáie bíniemo fagano díena aféno mo ciona. Afe ciona die, afe jofue comíni jíáimaci títaja ícoínia daí illa jana, —daide.

19

1 Afe bie méífomo monamo ite aillo comíni ficírede uáillaina cacádicue. Daidíaioi:

¡Aleluya! Cai jíllonano cai Juzíñamuimo dúide.

Daje izói iere ebíredífue afémiemo mamérede, íemo naa ñuera ríino diga.

2 Mei afémie ñue jaícina ua uaido iere riire jícanofíredeza.

Afe iere jíruíredingona afémie riire duere finótateza.

Afengo iere ie jíruírenado énie comínina íaire finode.

Juzíñamuimo táijitagano tilla iba aféngomo oga, daidíaioi.

3 Nane dáanomo daidíaioi:

—¡Aleluya! mei afengo jobailla uíllie jaca ninomo llíicaiñeno uillíoite, —daidíaioi.

4 Afe llezica veinticuatro dígade éicomíni, íemo jíái cuatro diga cáadimíai diga, ana éniemo bíjicaillano, Juzíñamuimo caimátaidiaioi. Illaíma ráiiranomo ráide Juzíñamuimo caimátaillano daidíaioi:

—¡Daiítadeza! ¡Aleluya! —daidíaioi.

5 Nane afe mei illaíma ráiiranomona jíáie uaina cacádicue; aféuai daide:

—Cai Juzíñamuimo nana afémie ocuícano afémiemo ñúefuiai omoi mameri. Daje izói íena caimare jacíruitino, illáicomini naa jiba comíniri, ñúefuiai afémiemo jónefireiri.

Cordero daína Cristo áirena rafue

⁶ Nane daje izói aillo comini uaillai izóidena cacádícue. Afe uaillai aillo imánillai ficírena izói ficírede, íemo jiái afe uaillai ficire mona gíría ficírena izói ficírede. Afe uaillai daide: ¡Aleluya! Jamánomo riírede cai ocuide Juzíñamui nane meine como ócuite.

⁷ Mai cai ióbilli; daje izói iere caimare cai illi.

Afémiemo ebíredífue cai mamelli.

Mei Cordero áirena izóidiruimo ja dúcidez.

Afémie ai izóidinona jáitino ja ñue finóbidiaioi. Afémaci Crístomo ua íinotimaci.

⁸ Ráífide úzecuirona jítárediaioi.

Mei uafue, íáinino queníredíroi Juzíñamui afémacina jítátaga.

Mei afe ñuera ráífide úzecuiro Juzíñamuimo jaináidino comécina jaícina jóoina jánaza.

⁹ Iemo Juzíñamui abi ímie cuena daide:

—Mai cúeiri: Cordero áirena ráfue mo uáidogano ja caimare itíai, —daide.

Nane cuena daide:

—Bíuai Juzíñamui lloga ua uai, —daide.

¹⁰ Iemona afe Juzíñamui abi ímiemo cue caimátailena ie anamo dújudícue. Mei íadi afémie cuena daide:

—Cuemo daí íñeno, mei o izói cue Juzíñamui ocuícamedícueza. Jíi, Jesús llócaiga ua uaimo féitañeno ínote o ámatiai izóidícue. ¡Cuemo caimátaiñeno; Juzíñamuimo cáimatai! —daide.

Mei afe Jesús llócaiga ua uai, Juzíñamui dibénedo lloga uaillai jino llotino comeci úritade.

Uzerede cabállomo ráiicaidímie

¹¹ Nane afe méifomo mona tuíñuana ciódicue. Afénomo úzerede caballo cícaide. Afe emódomo ráiicaidímie mámecei “Fiel” íemo jiái “Verdadero” daínámie. Mei afémie ñue jaícina illáfuedo ocuúdeza; daje izói áfedo fiénidino diga fuirítateza.

¹² Ie ui irai bóua izói quere cíoide. Ie ífócimo diga illaima jítaracuífoi jítáoide. Daje izói afénomo dama ie onoiga mámecei cúeina.

¹³ Afémie jítacacuiro díemo mutácaroi. Afémie mámecei Juzíñamui Uai.

¹⁴ Afe llezica nana monamo ite Juzíñamui ocuica fuirídino afémie óodana jáidiaioi. Afémaci ráífide úzecuiro jítáoidiaioi.

Aferoi jaca íáinide. Baie nana afémiedo jáidino úzerede cabállomo ráicaidiaíoi.

¹⁵ Afémaci ífódímie fuémona jáirede lloefai jino bite, áfedo nana nairai boféllena. Afe lezica afémie lloébicí izóidedo náiraiaina ócuíte. Vínó finóacanomó úvaiaí iduállena riire záizia izóí, afe izóí afémie afémacimó iere riire jicánoíte. Iemo jamánomó riinorede Juziñamui ráicaillamona cómuíte iere duere finóillifue, vínó jirótaja izóí afémacina duere finótaíteza.

¹⁶ Ie inícuíro emódomo jítácacuíromó cuega mámece illa. Daje izóí ie riáizimó cuega. Afeci daide: “Nana illáinimona Jamánomoidillaima,” íemo jíái “Nana Ocuídínomona Jamánomó Ocuídímie.” Afémie níí caí Ocuíraíma Cristo.

¹⁷ Afe meí Juziñamui abí ímie jítoma riire egáiñuanomó naidáinana cíódícue. Afémie nana mona erodo féedínuaí íficire jírite; daide:

—Juziñamui finoca áillue güille nana dáanomó omóí riáíbi,

¹⁸ meí benomó illáini íeizi ríitiomóiza, naa fuírírainí illáicomíni íeizi díga. Dáanomó íocírede fuírííredino íeizi ríitiomóí, naa caballo íeizi díga. Daje izóí afe emódodo ráicaidino íeizi ríitiomóí. Iemo nana fiébidino íeizi ríitiomóí. Buna ráíruiñegano, daje izóí jacíre rairuícano, íemo jíái jamáimaci íeizi, naa jamánomoidímaci díga daje izóí ríitiomóiza, —daide.

¹⁹ Afe meí afe jacíre eroide ríllena cíódícue naa bínie illáicomíni naa íaíoi fuírírainiaí díga. Nana bimaci fuíríllena dáanomó ofídíaióí. Afémaci afe úzerede cabállomo ráicaidímie díga fuírízaíbitiaíoi. Afémie “Juziñamui Uai” daínámie. Daje izóí afémie canode fuírírainí díga fuíríllena maméritiaíoi.

²⁰ Afe meí afe jacírede rille, taino uai jino llócaidímie díga ja llaveca. Afe taino uai jino llotímie, jacírede rille eróicana, jacínaitade cíórainina raa cíótate. Aféfuiaído afe taino uai jino llotímie, nana afe jacírede rille mámeceína cuetátaganona jífúete. Daje izóí afe jacírede rille jánaraimó caímátaidínona afémie jífúete. Iemona ‘monstruo’ daína jacíre eroide rille, daje izóí taino uai jino llotímie, cáanori dáanomó duere finolle jorai izoide bóodímó dotácaiaíllinoí. Afe jorai izoide duere finóllino íere uzire boode.

²¹ Nana áfemona fiébidino úzerede cabállomo ráicaidímie fuémona bite lloéfáido titácaiaíoi. Iemona nana féedínuaí bie titácano riáíbillano íaíoi íeizíri jéirediaíoi.

20

Mil díga fmona díno comíni caímare íítiaíoi

1 Bifue méifomo ángel dainámie Juzíñamui abi ímie monámona ana bíllana ciódicue. Afémie afe fiénide jóríai ibáirafo zuitara llave naa áillue llójeo diga llíicabite.

2 Afe bie Juzíñamui abi ímie ‘dragón’ daina jáiaira áillue jaio lláitano anáfenode. Afe jaio jáífodo mameina Taife, dáamie Satanás. Anáfenuano afémiena mil diga fimona llaveca.

3 Ana fiénide jóríai ibáirafofomo óriano íena llavede. Lláviano afe nazemo ‘sello’ daina “buna zuitánide” daide raa jónete. Daií finoca náiraiaina mil diga fimona dinori jífueñeillena. Afe mil diga fimona jaille méifomo, afémie nano íanori zuitalle.

4 Afe mei illaini ráiranuaina ciódicue. Afénomo ráiiedino iere riire jicánolle ríinona igáiaioi. Afe dáaruido ifóciaina jáicoicano coméciaina ciódicue. Afémaci Jesús jáicina lloga Juzíñamui uai íaioi llócailla ícoínia ifócina jaitácaiaioi. Afémaci afe jacire eroide ríllemo caimátaiñediaioi; daje izói afe jánaraimo caimátaiñediaioi. Daje izói afémaci ozócimo ie mámecei cuetátaiñediaioi, íemo daje izói íaioi ónoimo. Afémaci abi meine abido cáaillano mil fimona dino Cristo diga illáimaitiaioi.

5 Afe bie meine abido cáadino, nanóidino meine cáailliruimo abido cáaitiaioi, jae cai daina Cristo diga illáimaillena. (Mei íadi jáie tíidino mil diga fimona záíñena dino meine abido cáaiñeitiaioi.)

6 Nana afe nanoide cáailliruimo meine abido cáaitino caimare itiaioi. Daje izói afémaci Juzíñamui ñue finócano. Afe meífoide tílle afémacimo jaca jiriñeite. Mei íadi afémaci comínido Juzíñamuimo úrifireitinona íitiaioi; daje izói Cristo íeiena zíñona íitiaioi. Iemona mil fimona dino afe Cristo diga illáimaitiaioi.

7 Afe mil diga fimona záilla méifomo, Taife ie llavéinafomona zuitalle.

8 Jáillano nana énie náiraiaina jífueite. Aféruído “Gogna” mámeceirede náiraina jífuiaite, “Magog” daina náiraina diga. Afe náiraiai fúiritinuiaina Taife dáanomo jofo óite, íiraicaiño fuiríllena. Afémaci monáillajimo ite guamai dígadeza facádonidiaioi.

9 Afemona énie nániena afémaci iere oruíbicaite. Iemona Juzíñamuimo jáináidino illánona nágafene fállena cirínotiaioi. Afe illano Juzíñamui izíruiga Jerusalén daina jofue; áfena cirínotiaioi. Mei íadi Juzíñamui monámona irai afémacimo orede. Afe iraido fiébiñeno cónaitiaioi.

10 Afe llezica afémaci jífueoicaide Taife boode jóraimo dotaca. Afe jorai iere uzire boode. Afe dáanomo jacire eroide rille, íemo jái taino uai jino llócaidímie nauí dotaca. Afénomo mona naio diga jaca ninomo zíñona iere duere finócaiaioi.

Aillue úzerede ráirano illaima ie, íemo afe uícomo iere riire jicánollino cioina

¹¹ Afe méifodo áillue úzerede ráirano illaima íena ciódicue. Iemo afénomo ráiidimiéna ciódicue. Afémie uícomona nana énie mona diga niné cióbicaíñena. Afe mona énie diga illino jae íñede; jae niné táinocaidiaioi.

¹² Daje llezica Juziñamui uícomo nauí Juziñamuimo íñoñoeno tíidino naidáienana ciódicue. Afeno jamánomoidinori naa jamáimaciri dáanomo naidáiediaioi. Afe llezica comini finócafuiái cuiánicuai túide. Daje izói afénomo jiáie zíiñoa íitino mámeçi cuiánico túide. Bie tíidino íaioi finócafuiái íllaze riire jicánogaiaioi, mei afe íaioi finócafuiái cuiánicomo cúeina dieze riire jicánogaiaioi.

¹³ Afe llezica monáillajimo báíide tíidino meine abído Juziñamui uícomo caífo náidacaitagaiaioi. Daje izói nana jiáíforie tíidinuiái íaioi tíllanomona meine abído Juziñamui uícomo caífo náidacaitagaiaioi. Afe nana náidacaitagano íaioi finócafuiái íllaze afémacimo riire jicánogaiaioi.

¹⁴ Afe mei ‘muerte’ daína comini tíllafue boode jóraimo dotaca, ie mei niné táinocaide. Daje izói dáanomo nauí tíidino íbáinaco afénomo dotaca. Dotaca mei niné táinocaide. Afe bie boode jorai, íraie tíllana mameide.

¹⁵ Iemo afe zíiñoa ítino mámeçi cuiánicomo mámeçina cúeñegano afe boode jóraimo dotácaiaioi.

21

Comue mona comue énie diga

¹ Afe méifodo comue mona, comue énie diga ciódicue. Mei nanoide mona nanoide énie diga ja niné cióbicaíñenaza. Daje llezica monaillai jae íñede.

² Afe llezica comue Jerusalén daína íaífuenide jofue, Juziñamui uícomona monámona ana bíllana ciódicue. Afena ciódimiedicue, Júaadícue. Afe jofue, óllena jicánoga ringo ebire finóbina izói ebire cíoide.

³ Iemo monámona ficíre dáinana cacádicue. Afe uai daíde:
—Ero, comini cígiri birui Juziñamui illa. Afémaci diga ífíreite, íemo afémaci afémie comínina íítiaioi. Ja birui dama afémie afémaci cígiri íite, afémaci Juziñamuina ie íllena.

⁴ Juziñamui afémaci ui jéména zafénaitaite. Aféruimo tílle íñeite. Daje izói eia íñeite, íemo jiái duere zefuillamona eia íñeite. Daje izói comini abí izírena íñeite, mei jaiái ítífuiái jae záaideza.

⁵ Iemo illaima ráíranomo ráiidimie cuena daíde:

—Ero. Nana cómuena méidotícue.
Iemo nane daíde:

—Bie uai iere ua uaiza, mai cúeiri. Daje izói bie uai iere ñnofiregaza, —daide.

⁶ Nane afe mei cuena daide:

—Ja ñue ícoimo finócaza. Cue bie naga ráfuiaina nai cómuiñenia uícodo itímiedicue. Daje izói dáamiedicue fuillínomo itímiedicue. Abecedario A-mona táinia izóidimiedicue. Daje izói abecedario Z-mo fuizajilla izóidimiedicue. Jáinoina jiróacadimie ñúejina jirótaja izói, afe izói ñúefuiái dibénemo íacadimie mo raiñóñeno afémiemo ziiñona illáfueña ífireiticue.

⁷ Fiénidena anáfenodimie nana bíena feci raa fia máíñua izói, máíñoite. Afe llezica afémie Juziñamuiticue, íemo daje llezica afémie cue jitóite.

⁸ Mei íadi nana ñnoñedino dibéfodo duere zefuille afémacimo dúide. Uáfueza, ñúefueña jacíruintino daje izói ñnoñedino, íemo jáimana éoidino, íemo jáimana titádino, íemo jáí jiruífueña finófiredino, íemo jáíma fue gáiana fibídino, íemo jáí jánaraimo caimátaidino, íemo nana táinona úritino; nana bie izóidino boode jóraimo dotárediaioi. Afe jorai iere uzire boode. Afe bie boode jorai íraie tíllana mameide, mei afénomo dotácana jaca ninomo Juziñamuimona oni eneno duere finócanona íitiaioiza.

Comue Jerusalén

⁹ Afe mei siete dígade ángeles daínamací Juziñamui abí ímácimona daa cuemo úrizaibite. Afémie nauí Juziñamui ocuica siete dígade íraie jacírede duere ínuana oruide ichecoí uitímie. Afémie cuena daide:

—Ero, Cordero aí izóidena jáitínona o ácataiticue, —daide.

¹⁰ Iemo Juziñamui Ñuera Joreño bie izóidena nicai anado cuena cíotote. Afe Juziñamui abí ímie áillue caifónedumo cue uite. Afénomo monámona Juziñamui uícomona ana bite jamánomo ñuera Jerusalén jofue cuemo ácatate.

¹¹ Juziñamui abí ebire quenírena izói afe jofue quenírie cíoide. Daje izói iere ráifide nofici quenírena izói queníriede. ‘Jaspe’ daína nofici vidrio enéfecomo cíoina izói cíoide.

¹² Afe jofue jinófenedo nágafene áillue cirínubairo raa ite. Afe cirínogamo doce dígabe naze ite. Iemo illa díga nazemo Juziñamui abí ímie naidaina. Iemo afe náziaimo doce dígade Israel nairai mámeciaí cúeina.

¹³ Afe jofue náziaimona, fuirífenemo dazeámani ite. Iemo jáíe dazeámani onífenemo ite; íemo jáíe dazeámani féifenemo ite; íemo jáíe dazeámani afáífenemo ite.

14 Afe jofue jinófene cirínua anamo nofici finoina mozíoidibani doce dígade. Illa dígabanimo Cordero nágagobiaimo orécano ‘apóstoles’ dainámaci mámeciai cúeina.

15 Afe cue diga úrite Juzíñamui abi ímie, oro finoina facáradozi llíide, afe jofue facállena. Daje izói ie náziai facállena, íemo jiái afe jinófene cirínua facállena.

16 Afe jofue fueda nagaámariede; nágafene daje dinóriede. Ie ápera dibene daje dinóriede; íemo ie ruica dibene daje dinóriede. Afe Juzíñamui abi ímie ie llíiga radózido jofue facade. Facádemo dos mil doscientos kilómetros ápera. Daje izói ruica diné eróicana dos mil doscientos kilómetros. Iemo caifo diné eróicana jiái daje izói dos mil doscientos kilómetros. Nágafeniai daje dinóriede.

17 Afe mei jinófene cirínuabani facade. Facádemo sesenta y cuatro metros caifo ite. Afena Juzíñamui abi ímie come facáfírena izói facade.

18 Afe jinófene cirínuabani ‘jaspe’ daina nofici finoina. Afe jofue íainide oro niina. Ñue enéfecomo cíoide vídriona eroide.

19 Jinófene cirínua anamo mozíoidibani nana jiáiforiede ráifide noficiado ebire ñue finoca. Nanóidibani ‘jaspe’ daina noficiado ebire ñue finoca, íemo jiáibani ‘zafiro’ daina noficiado ebire ñue finoca, íemo jiáibani ‘ágata’ daina noficiado ebire ñue finoca, íemo jiáibani ‘esmeralda’ daina noficiado ebire ñue finoca,

20 íemo jiáibani ‘ónice’ daina noficiado ebire ñue finoca, íemo jiáibani ‘cornalina’ daina noficiado ebire ñue finoca, íemo jiáibani ‘crisólito’ daina noficiado ebire ñue finoca, íemo jiáibani ‘berilo’ daina noficiado ebire ñue finoca, íemo jiáibani ‘topacio’ daina noficiado ebire ñue finoca, íemo jiáibani ‘crisoprasa’ daina noficiado ebire ñue finoca, íemo jiáibani ‘jacinto’ daina noficiado ebire ñue finoca, íemo jiáibani ‘amatista’ daina noficiado ebire ñue finoca.

21 Afe doce dígade naze ibáirabici áillue perla. Illa dígaze daa perla ie finoina. Afe jofue cígido joide áillue macárao íainide oro finoina. Afe macárao enéfeomo ñue cíoide vídriona eroide.

22 Afe jofue eromo Juzíñamuimo gairíraco jaca ninó daa cíonedicue; mei jamánomo ríinorede Juzíñamuimo ebena nágafeniamo caimátaidiaioiza. Afémiena jiáifodo daina cai Ocuíraima. (Afe jofue gairíraco Juzíñamui abiza. Daje izói jiái Cordero abiza.)

23 Afe jofue jitómado egáiñuamo dúiñede; daje izói fiuido egáiñonide. Mei afe jofue Juzíñamui abimo ite ebírede

quenírededo egáíñogaza. Daje izói jíái Juzíñamui Cordero afe jofue egáíñogaza.

²⁴ Nana jíllotaga nairai afe jofue egáñuado mácaitiaioi. Bínie nairai illaini afe jófuemo íaioimo ite aillo ebíriede illaima daíllena ráaniaina átíitiaioi. Atiano Juzíñamuimo, íemo jíái Crístomo izájitiaioi. Daje llezica afe jofue ocuídime íaillinoimo aillo ñúefuena mámeitiaioi.

²⁵ Afe jofue naze jaca monari íbaiñelle. Iemo afénomo jaca mona náuíñeite. Jira náziai íbáillirui íñeite.

²⁶ Enie náiraiaí íaioimo ite ebíriede ráaniaina afénomo átíitiaioi. Daje izói afénomo aillo ñúefuiaí mámeitiaioi.

²⁷ Mei íadi comécina íáiredino jaca afénomo jofo jáinide. Daje izói comécina éoidino dinomo jofo jáinide, naa taino llotínori. Dama zííñona ítino mámece cueránicomo mámeceina cuezámace daní afénomo jofo jaille. Afénico Cordero daina Jesucrístomo ite.

22

¹ Afe mei Juzíñamui abí ímie íáinide imánina cue ácatate. Afémani jainoi cómena zííñona cáatate. Afeji vidrio enéfenemo uáfori cioina izói cíoide. Afe imani Juzíñamui illáimana ráiiranomona tote. Afe ráiirano daje izói Cordero ie.

² Afe jofue cigído áillue macárao illa. Afe macárao dáafenedo comínina zííñona cáatate aménaiaí riina. Daje izói afénomo ite imani fuédado nágafene daje ie aménaiaí riina. Afe aménaiaí illa diga fíui llizífirede. Iemo jíái afe aménaiaí íbiaí nairai ñue manóllena ite.

³ Aféruillaído afénomo faidórafuena jae íñeite. Juzíñamui illáimana ráiirano afe jófuemo ite; daje izói Cordero ráiirano afénomo ite. Ie ocuífíregano daa afémiemo caimátaitiaioi.

⁴ Afe llezica afémace Juzíñamuimo, meáiruiñeno jofo conímamo éroitiaioi. Afémace ozócimo afémie mámece cúeina.

⁵ Afénomo mona jaca náuíñeite. Afénomo itino mechera izoide egáíñuana jítaiñeitiaioi. Daje izói jitoma egáíñuana jítaiñeitiaioi, mei cai Ocuide Juzíñamui íaioina egáioite. Iemo afémace jaca ninomo zííñona illáimaitiaioi.

Jesucristo billirui ja áinozide

⁶ Afe méfomo Juzíñamui abí ímie nane cuena daide:

—Bie uai íere ua uaiza. Daje izói bie uai íere íinofíregaza. Afe cai Ocuíraima nauí Juzíñamui uai jino llóraini comécimo úritímie. Afémie birui ie abí ímie orede, ie ocuícamacimo raire cómuitífuiaina onótallena, —daide.

⁷ Iemo Jesucristo daide:

—¡Raíre bitícue! Bínícomo cuela Juzíñamui uáillaína jíéruitímie caimare ite, —daide.

⁸ Cue Juáadicue. Bífuiaina cacádicue, daje izói bífuiaina ciódicue. Bífuiaina cacáillano, íemo daje izói cue ciona méfomo, cuemo ácatate Juzíñamui abi ímie anamo dújudicue afémiemo caimátailena.

⁹ Mei íadi afémie cuena daide:

—Jadí izói cuemo íñeno. O izói Juzíñamui ocuícamiedicue. Daje izói Juzíñamui dibénedo úrifirede o ámatiai izóidicue. Iemo jíái binícomo cuega uáillaina náfuetino izóidicue. Cuemo caimátaíñeno; dama Juzíñamuimo caimátaifireiri, —daide.

¹⁰ Nane dáanomo cuena daide:

—Binícomo cuega Juzíñamui uaina báinino o comécimo jóoneñeno o iri. Mei bífuiiai ícoimo ñue fuizájillirui ja áinozideza.

¹¹ Nai bie fuiñena llezica, fiénidimaci íaioi finófirega fiénidifuenta dama íaioi finócaza. Fia eroi, mei afe izói íaioi íllado jamánomo duere finólliaioiza. Daje izói comécina íáiredino dama comécina íáireoicaideza. Fia eroi, mei áfede duere finólliaioiza. Mei íadi ñue itino íaioi illa baímo ñue iri. Daje izói Juzíñamui íena ñue finócamie fáicanocaiñeno afémie íena ífireiri, —daide.

¹² Iemo Jesucristo daide:

—Jii, raíre biticue. Illa dígamíemo cue fecalle fia jirídoga izoide raa atídicue. Illa dígamíemo afémie finoca dieze fécaiticue.

¹³ Nanódimíedicue. Iemo jíái íraímíedicue. Daje izói naga ráfuiái uícodo itímíedicue. Daje izói fuizájillanomo itímíedicue. Iemo jíái abecedario A-mona táinia izóidímíedicue. Daje izói abecedario Z-mo fuizájilla izóidímíedicue.

¹⁴ Íaioi iníroina jocófiredino izói, comeci ifue ñuérana méidotino caimare itíaioi. Íemona cáatate amena llizíllana güirediaioi. Afe bie izói daiíacade zíñona íaioi íllena. Daje izói íaioi iníroi ñue jócuamona, afe jofue nazedo Juzíñamui illánomo jofo jáirediaioi.

¹⁵ Mei íadi comécina íáiredino afénojofo jáinidiaioi. Iemo daje izói jíáima fue gáiana fibídino, íemo daje izói nana jíáíforiede jiruifue finódino, daje izói cómena méinetino, daje izói jánaraimo caimátaidino, daje izói jíáie comínina iere jífuefiredino, naa afe izoide fibídnori; nana bie izoide comini afe jófuemo jofo jáinidiaioi; jáíñeno jino fiébitiaioi.

¹⁶ Cue Jesúsicue. Juzíñamuimo ua jáináidinomo nana bífuiái jino llóllena cue abi ímie ja cue oreca. Jaiái illaíma David comuilla moi ímíedicue; daje izói afémiemona jebuídino comuítagamiedicue. Iemo iere egáíñote monáíracudu izóidímíedicue, —daide.

¹⁷ Iemona Juzíñamui Ñuera Joreño daide:

—Mai bi, —daide.

Daje izói Cordero ai daina afémiemo ua jaináidino íena daide:

—Mai bi, —daide.

Daje izói búuailaina cacádino afémiena:

—Mai bi, —omoi daiíri.

Iemo Cristo daide:

—Jiróacaitimie ziiñona cáataite jáinoina ibáñeno mai fia jíruaibiri. Afe bie izói daiíacade ziiñona illáfuenta óiacadimie mai cuemo bi; raiñóñeno omo fécaiticueza.

¹⁸ Nana binícomo cuega Juziñamui uaimo cacáreidinona bie izói llétaiticueza, cacai: Dáamie bie ráfuenta baimo zotáadi, Juziñamui binícomo cuega jacírede duere fínuaniana afémiemo jóoneite.

¹⁹ Daje izói binícomo cuega Juziñamui uáimona dáamie daa uai oni óiadi, Juziñamui afe ziiñona cáaitino mámecei cuiánicomo cuega afémie mámeceina oni óite. Daje izói binícomo lloga nífuenide jófuego Juziñamui afémiena jofo jáitañeite.

²⁰ Bifue jino llotímie nane dáanommo lloste:

—Jii, raire biticue, —daide.

Afemona Juan daide:

—Aquie izóideza. ¡Cai Ocuíraima Jesús, mai bi!

²¹ Cai Ocuíraima Jesucristo nana ómoína ñue fínoiteza. Daiítadeza. Jae ñie.